






5.


m m







**BREVIARIUM**  
**VNIVERSÆ THEOLOGIÆ.**  
**EMINENTISS., ET REVERENDISS.**  
**PRINCIPI, AC DOMINO**  
**D. BENEDICTO**  
**S. R. E. CARDINALI.**  
**PAMPHILIO**  
**INNOCENTII X. Pontificis Maximi Prone-**  
**poti, & Bononiæ, suiquè Comitatus**  
**à Latere Legato**  
**DICATVM.**



---

**BONONIÆ. M. DC. XCI.**

# BRITANNIA

UNIVERSITY OF OXFORD

THE LIBRARY OF THE

UNIVERSITY OF OXFORD

OXFORD, ENGLAND

1850

1850

1850

1850

1850

1850

1850

1850

1850

1850

1850

1850

1850

1850

**BREVIARIUM**  
**VNIVERSÆ THEOLOGICÆ,**  
**NEMPE SPECVLATIVÆ,**  
**DOGMATICÆ, AC MORALIS**  
*IN QVATVOR PARTES DISTRIBVTVM*

*Juxta principia Scholæ Scotistarum*

In commune Sacræ Theologiæ Studentium præsertim,  
nostræ Seraphicæ Religionis commodum, atque  
vtilitatem elaboratum

**A F. ANTONIO GAVELLO**  
**A CANDELARIA PISAVRENSI**

Ordinis Min. Strict, Obser. Prou. Marchiæ S. Theologiæ  
Professore; olim iteratò Diffinitore, ac Commissa-  
rio Prouinciali; nec non Forisempronij Exami-  
natore Synodali, & S. Officij Consultore

*In quibus breui, sed perspicua, & fundamentali  
methodo proceditur*

Non omiſſis Controuerſijs, quæ in Scholis  
agitari ſolent.



**PRODIT PARS SECVNDA:**

---

Apud Petri-mariæ de Montibus. 1691.  
*Superiorum permiſſu.*

# THE UNIVERSITY OF CHICAGO

THE UNIVERSITY OF CHICAGO  
OFFICE OF THE DEAN  
540 EAST 58TH STREET  
CHICAGO, ILLINOIS 60637  
TEL: 773-936-5000  
FAX: 773-936-5001  
WWW.CHICAGO.EDU

THE UNIVERSITY OF CHICAGO  
OFFICE OF THE DEAN  
540 EAST 58TH STREET  
CHICAGO, ILLINOIS 60637  
TEL: 773-936-5000  
FAX: 773-936-5001  
WWW.CHICAGO.EDU

THE UNIVERSITY OF CHICAGO  
OFFICE OF THE DEAN  
540 EAST 58TH STREET  
CHICAGO, ILLINOIS 60637  
TEL: 773-936-5000  
FAX: 773-936-5001  
WWW.CHICAGO.EDU

THE UNIVERSITY OF CHICAGO  
OFFICE OF THE DEAN  
540 EAST 58TH STREET  
CHICAGO, ILLINOIS 60637  
TEL: 773-936-5000  
FAX: 773-936-5001  
WWW.CHICAGO.EDU

THE UNIVERSITY OF CHICAGO  
OFFICE OF THE DEAN  
540 EAST 58TH STREET  
CHICAGO, ILLINOIS 60637  
TEL: 773-936-5000  
FAX: 773-936-5001  
WWW.CHICAGO.EDU

# FR. CAROLVS FRANCISCVS DE VAREGIO

*Ordinis Minorum Strictioris Observantia S. P. N. Francisci Lector emeritus, Suprema, & vniuersalis Inquisitionis Qualificator, ac Cismontana Familia, tam Observantium, quàm Reformatorum Commissarius Generalis, & Seruus. Dilecto nobis in Christo Patri Fratri Antonio à Candelara Lectori Theologo nostræ Reformatæ Prouinciæ Marchiæ. Salutem in Domino sempiternam.*

Cum iuxta Apostolicas. nostrique Ordinis Constitutiones reuissum, & approbatum fuerit volumen quoddam à Te nuper editum, cuius titulus est *Breuiarium vniuersæ Theologiæ, nempè Speculatiuæ, Dogmaticæ, & Moralis*. Tenore presentium, ad salutaris obedientiæ meritum, facultatem Tibi impertimur, quatenus, seruatis seruandis, illud Typis mandare valeas.

Dat. Romæ 15. Aprilis 1690.

Fr. Carolus Franciscus de Varese Comm. Gen.

Reg. Tit. Prou.

De mandato S. P. Reu.

F. Innocentius de Cryptis ad Mare Sec. Gen.

---

Breuiarium Vniuersæ Theologiæ speculatiuæ scilicet Dogmaticæ, & Moralis in quatuor partes in commune bonum in lucem paratum ab Adm. Reu. Patre Antonio de Candelara Sac. Theologiæ Lectore generali Ord. Min. Strict. Obser. cuius partem secundam iuxta facultatem Adm. Reu. Patris Antonij Mariæ de Pergula Minis. Prouin. eiusdem Ordinis, Nos Infra scripti vidimus, & attentè perlegimus, & cum nihil bonis moribus, fideique, veritati contrarium repererimus, dignam censemus pro luuenum vtilitate typis mandari.

Dat. Esij hac die 2. Aprilis 1690.

Fr. Albertus ex Murro Vallium Sac. Theol. Lector &c.  
Fr. Zacharias à M. Bodio Exprou. Sac. Theol. Lector &c.

Vidit D. Antonius Baruchi Cler. Reg. S. Pauli, & in Eccl.  
Metrop. Bonon. Penitent. pro Illustriss. & Reuerendiss.  
D. D. Iacobo Boncompagno Archiepisc. Bononiæ, &  
Principe &c.

---

23. Octobris 1690.

A. R. P. Mag. Clemens Fellina Reuisor S. huius Inquisitionis videat pro S. Ofic. præsentem secundam partem Breuiarij vniuersæ Theologiæ &c. à P. Antonio Gauiello Ord. Min. strict. Observantiæ elaboratum &c. & referat &c. an Typis possit permitti &c.

Fr. Paulus Hieronymus Giacconus Inquisitor Bononiæ.

---

Breuiarij Vniuersæ Theologiæ partem secundam, à Reu. Adm. P. S. Theol. Lect. Generalis Antonij de Candelaria Doctiss. calamo prodeantem, de mandato Reuerendiss. P. Mag. Inquisitoris examinaui, nihilque non Fidei Sacrosanctæ, probisque moribus consentaneum in ipsa reperi; quin omnia subtiliter ad mentem Scoti exarata, eleganti methedo concinnata, sanis, ac profundis doctrinis roborata, & nedum Scholasticorum ingenijs, verum & Fidelium animabus ita proficua conspexi, ut pro publica utilitate publicis Typis dignissima existimem, si videbitur &c.

Ita censeo Ego Fr. Clemens Maria Fellina Carm. Sanctiss. Inquisitionis Reuisor.

Stante anteposita attestazione

*Imprimatur*

Fr. Paulus Hieronymus Giacconus Inquisitor Bononiæ.



# I N D E X

Tractatum, Disputationum, Quæstionum, &  
dubiorum, quæ in hac secunda parte  
continentur.

## TRACTATVS PRIMVS.

De Angelis.

### DISPUTATIO I.

*De creatione in generali.*

- Q**uæstio I. Vtrum sint plura principia, vel vnum tantum. pag. 1  
Quæstio II. Vtrum Deus possit aliquid creare ex nihilo. 6  
Quæstio III. Vtrum prima causalitas respectu omnium causabilium de necessitate sit in tribus Personis. pag. 10  
Quæstio IV. Vtrum si per impossibile in Diuinis daretur tantum una Persona, illa posset producere creaturas ad extra. 18  
Quæstio V. Vtrum solius Dei sit creare, vel etiam aliqua creatura possit creare. 19  
Quæstio VI. Vtrum creatura per absolutam Dei potentiam possit, vt causa principalis cum dependentia tamen à prima, aliquid creare. 22  
Quæstio VII. Vtrum creatura possit concurrere ad creationem vt instrumentum D. potentiæ. 25  
Quæstio VIII. Vtrum Deum creare potuerit mundum ab æterno, & absque durationis principio. 31  
Quæstio IX. Vtrum creatio sit actio, & mutatio. 37  
Quæstio X. Vtrum creatio sit aliquid medium inter creatorem, & creaturam. 39  
Quæstio XI. Vtrum creatio, & conseruatio sint idem, vel quid diuersum. 41

- Quæstio XII. Vtrum in creaturis sit vestigium Sanctissimæ Trinitaris. 45
- Quæstio XIII. Vtrum naturali ratione probari possit creationem esse possibilem. 51

## DISPUTATIO II.

### *De Angelorum natura, & conditione.*

- Quæstio I. Vtrum Angeli sint omninò spirituales, & incorporei. 53
- Quæstio II. Vtrum Angeli sint compositi ex materia, & forma. 56
- Quæres. An Angeli sint immortales. 59
- Quæstio III. Vtrum Angelus, & Anima differant specie. 60
- Quæstio IV. Vtrum Animæ potentiæ, & earumdem operationes differant specificè à potentijs Angeli, & operationibus &c. 64
- Quæstio V. Vtrum in eadem specie sint plures Angeli solo numero differentes. 68
- Quæstio VI. Vtrum dentur plures Angelorum hierarchiæ, & ordines. 75
- Quæres 1. An Angeli sint numero finiti, vel infiniti. 79
- Quæres 2. An singuli Angeli habeant propria nomina. 80
- Quæres 3. Quando Angeli fuerint creati. 81
- Quæres 4. An sit adeo certum Angelos esse creatos simul ab initio temporis, vt oppositum sit saltem erroneum in fide. ibid.
- Quæres 5. Vbi fuerint Angeli creati. 82

## DISPUTATIO III.

### *De intellectu, & voluntate Angelorum.*

- Quæstio I. Vtrum Angelus intelligat per suammet substantiam, vel per potentiam à substantia distinctam. ibid.
- Quæres. An intellectus Angelicus sit discursiuus. 86
- Quæstio II. Vtrum ad res cognoscendas indigeat Angelus rationibus cognoscendi. 87
- Quæres 1. An Angelus cognoscat se ipsum sine specie. 91
- Quæ-

- Quæres 2. An Angelus naturaliter cessare possit ab omni cognitione. 92
- Quæres 3. An Angelus decipi possit in rebus agnoscendis. pag. 92
- Quæstio III. Vtrum Angelus cognoscat quidditates creatas per distinctas rationes cognoscendi, vel per vnam rationem possit plura intelligere; itaut Angelus superior per pauciores, & vniuersaliores intelligat. 95
- Quæstio IV. Vtrum Angelus habeat notitiam naturalem distinctam Essentiæ Diuinæ. 103
- Quæstio V. Vtrum Angelus sua naturali virtute cognoscere valeat secreta cordium. 110
- Quæstio VI. Vtrum Angeli naturaliter cognoscere valeant effectus supernaturales, & mylteria gratiæ. 116
- Quæres. Quid dicendum sit de Dæmonibus postquam amiserunt statum viæ. 119
- Quæstio VII. Vtrum Angelus sua naturali virtute cognoscere possit futura contingentia. 121
- Quæstio VIII. Vtrum Angeli ad inuicem loquantur, & quomodo loquantur. 123
- Quæstio IX. Vtrum Angelus illuminare possit alium Angelum, & quomodo. 129
- Quæstio X. Vtrum Angeli gaudeant, vera libertate, & vfu liberi arbitrij. 131
- Quæres. An in voluntate Angelica dentur habitus naturales morales. 133

## DISPUTATIO IV.

*De loco, motu, & mensura durationis Angelorum.*

- Quæstio I. Vtrum Angelus sit in loco. 134
- Quæstio II. Vtrum Angelus sit in loco per suam essentiam, vel per operationem, vel per aliquid aliud. 137
- Quæstio III. Vtrum Angelus sua naturali virtute possit esse in loco quantumcumque minimo. 143
- Quæstio IV. Vtrum Angelus sua naturali virtute possit esse simul in pluribus locis. 148
- Quæstio V. Vtrum Angelus possit se mouere localiter. pag. 151

Quæ-

- Quæstio VI. Vtrum Angelus transire possit de extremo ad  
extremum, non transeundo per medium. 154
- Quæstio VII. Vtrum mensura Angelorum sit æuum. 158
- Quæstio VIII. Vtrum operationes Angelorum mensuren-  
tur æuo, vel tempore discreto. 163

## DISPUTATIO V.

*De gratia, merito, & demerito; nec non de peccatis,  
& pœnis Angelorum.*

- Quæstio I. Vtrum Angeli in primo instanti suæ creationis  
gratiam sanctificantem receperint. 169
- Quæres 1. An sicut Deus potuisset Angelus creare in bea-  
titudine supernaturali, sic pariter potuisset illos creare  
in miseria pœnæ absque culpa. 171
- Quæres 2. An Angelis sit infusa gratia in 1. instanti depen-  
denter à propria dispositione. 172
- Quæres 3. Quo sensu Patres asserant Angelis esse infusa do-  
na gratiæ proportionatè ad naturalia. 174
- Quæstio II. Vtrum Angeli meruerint beatitudinem super-  
naturalem priùs quàm eam recepissent. 175
- Quæres 1. Per quid Angeli meruerunt suâ beatitudinē. 179
- Quæres 2. Quamdiù durauerit Angelorum via. ibid.
- Quæres 3. An in mora illa viæ potuerit Angelum pœnite-  
re &c. 179
- Quæstio III. Vtrum de potentia Dei possit creari aliqua  
creatura intellectualis ex sui natura impeccabilis. 181
- Quæstio IV. Vtrum Angeli potuerint peccare in primo in-  
stanti suæ creationis. 185
- Quæstio V. Vtrum primum peccatum Angeli fuerit super-  
bia. 190
- Quæstio VI. Vtrum Angelus reuerà peccauerit appetendo  
æqualitatem Dei. 194
- Quæstio VII. Vtrum Angeli mali sint in malo obstinati, &  
vnde proueniat talis obstinatio. 199
- Quæres. An Angeli mali, & alij damnati possint velle ali-  
quod bonum morale. 207
- Quæstio VIII. Quomodo Angeli mali ob igne infernali  
crucientur. 209

## DISPUTATIO VI.

*De potentia Angelorum tam bonorum, quam reproborum.*

Quæstio I. Vtrum Angeli sua naturali virtute corpus assumere valeant. 216

Quæres 1. An Angeli possint producere substantias tam spirituales, quam materiales. 219

Quæres 2. Quænam sunt illa mirabilia, quæ Angeli efficere possunt applicando actiua passiuis. 220

Quæres 3. An Angelus mouere, vel transferre possit corpus quantumcumque magnum. 221

Quæres 4. An Angelus possit alium Angelum localiter mouere. ibid.

Quæres 5. Quomodo Angelus moueat alia à se. ibid.

Quæres 6. An Angeli in corporibus assumptis possint generare homines. 222

Quæstio II. De custodia Angelica. 223

Quæstio III. De infestatione malorum Angelorum contra homines. 227

## TRACTATUS SECVNDVS.

*De homine, ac hominis varijs statibus.*

## DISPUTATIO I.

*De statu Innocentie.*

Quæstio I. Vtrum homo creatus fuerit à Deo extra Paradisum terrestrem. 230

Quæres 1. Quid, & qualis sit Paradisi terrestris situs. 232

Quæres 2. Cuius magnitudinis, & amenitatis sit Paradisus. pag. 232

Quæres 3. An Paradisus adhuc extet. 233

Quæstio II. Vtrum Animæ sint à Deo creatæ, vel sint productæ ex traduce. 234

Quæstio III. Vtrum homo reuera factus fuerit de limo terræ, & Eva de costa Adæ. 236

Quæ-

Quæstio IV. Vtrum Adæ fuerit à Deo donata iustitia originalis. 239

Quæstio V. Vtrum homo, si in statu innocentie perseverasset, fuisset immortalis. 244

Quæstio VI. Vtrum si status innocentie perseverasset, filij nati fuissent in iustitia confirmati, & omnes soli electi pag. 249

Quæstio VII. Vtrum Adam in statu innocentie potuisset peccare venialiter, priusquam peccasset mortaliter. 256

Quæres 1. An homines in statu innocentie mox geniti habuissent perfectum usum membrorum. 260

Quæres 2. An mox nati, immò & in utero habuissent usum rationis. ibid.

Quæres 3. An somno indiguissent in statu innocentie. 261

Quæres 4. An nostri parentes creuissent in scientia in eo statu. ibid.

Quæres 5. An in statu innocentie nascerentur tot scemine, quot masculi. ibid.

Quæres 6. An homo innocens dominium habuisset in alios homines. 262

## DISPUTATIO II.

### *De statu nature lapsæ, & nature puræ.*

Quæstio I. Vtrum primum peccatum nostrorum parentum fuerit superbia. ibid.

Quæres 1. An primi parentes lapsi fuerint etiam in hæresim pag. 265

Quæres 2. An peccatum Adæ fuerit grauius peccato Eux pag. 265

Quæres 3. An Adam peccauerit ex ignorantia. 266

Quæres 4. Quanto tempore nostri parentes manserint in Paradiso terrestri. ibid.

Quæres 5. An primi parentes egerint pœnitentiam, & saluati sint. 267

Quæstio II. Vtrum quilibet secundum legem communem propagatus ab Adam contrahat peccatum originale. 268

Quæstio III. In quo consistat ratio formalis peccati originalis. 272

Quæ-



Quæstio IV. Qualiter, & in quos transfusum fuerit peccatum originale. 278

Quæstio V. Vtrum per peccatum originale, non solum natura humana fuerit spoliata gratuitis, sed etiam in naturalibus vulnerata. 280

Quæstio VI. Vtrum paruuli decedentes in peccato originali puniantur pœnis inferni. 284

Quæstio VII. Vtrum sit possibilis status naturæ puræ. 287

## A P P E N D I X.

*Deceteris operibus sex dierum.*

### DISPUTATIO VNICA.

Quæstio I. Vtrum materia prima fuerit creata informis. 291

Quæres 1. An tota mundi machina fuerit producta in instanti vel in paruo tempore, vel spatio sex dierum. 294

Quæres 2. An mundi productio facta fuerit tempore uerno, vel autumnali. 295

Quæstio II. Vtrum lux prima die facta faceret diem, & noctem. ibid.

Quæstio III. Quid intelligitur per firmamentum 2. die factum. 299

Quæstio IV. Vtrum cælum crystallinum sit de natura aquæ pag. 300

Quæstio V. Qualiter congregatæ sint aquæ, & terra genuerit herbam virentem, & facientem fructum &c. 303

Quæstio VI. Vtrum luminaria à Deo facta sint nobis in signa, & tempora. 309

Quæstio VII. Vtrum conuenienter descripta sint opera quintæ, & sextæ diei. 311

Quæres 1. Quid intelligatur per Cete grandia. 313

Quæres 2. An animalia imperfecta sint creata sexta die. 313

Quæres 3. An reuera Deus post Vniuersâ productionem cessauerit ab omni opere. 314



## TRACTATUS TERTIVS.

De actibus humanis.

### DISPUTATIO I.

*De principijs elicitiuis actus humani.*

Quæstio I. Vtrum intellectus sit principium elicitiuum actus humani adeo ut voluntas sine illustratione intellectus nequeat elicere actum volitionis, 315

Quæstio II. Vtrum Anima possit Deum actualiter diligere sine aliqua præuia cognitione intellectus, vel sensus. 317

Quæres. An voluntas possit plus amare, quam intellectus intellegat. 321

Quæstio III. Vtrum intellectus moueat voluntatem per aliquod imperium, vel simplicem cognitionem, vel iudicium. 321

Quæres 1. An Deus de potentia possit producere in voluntate actum &c. 325

Quæres 2. An voluntas peccet ratione alicuius erroris præcedentis in intellectu. 326

Quæstio IV. Vtrum appetitus sensitivus moueat immediate voluntatem. ibid.

Quæstio V. Vtrum voluntas moueatur ab aliqua causa extrinseca ad suos actus elicendos. 328

Quæstio VI. Vtrum licitum sit Astronomis ex astrorum aspectibus futura prænunciare, 332

### DISPUTATIO II.

*De actibus voluntatis in genere, id est de voluntario, & inuoluntario.*

Quæstio I. Quid sit voluntarium. 336

Quæres 1. Quotuplex sit voluntarium. 337

Quæres 2. Quomodo omissio possit dici voluntaria. 338

Quæstio II. Vtrum violentia causet inuoluntarium, & an voluntas possit pati violentiam. 339

Quæstio III. Vtrum ea, quæ fiunt ex metu sint voluntaria, vel potius inuoluntaria. 345

Quæ-



Quæstio IV. Vtrum concupiscentia causet inuoluntarium  
pag. 348

Quæres. An ea, quæ fiunt ex concupiscentia sint aliquan-  
do inuoluntaria secundum quid. 351

Quæstio V. Vtrum ignorantia causet inuoluntarium. 352

### DISPUTATIO III.

#### *De actibus elicitis voluntatis in specie.*

Quæstio I. Quid sit intentio, & an sit actus voluntatis di-  
stinctus ab amore, spe, & desiderio; vbi etiam diuersa  
quæsitæ. 355

Quæstio II. Vtrum voluntas possit velle plures fines simul.  
pag. 357

Quæres. Quid sit consilium, quid deliberatio, quid electio  
quid imperium, & vsus. 360

### DISPUTATIO IV.

#### *De bonitate, & malitia morali actus humani.*

Quæstio I. Quid sit bonitas, & malitia moralis. 363

Quæstio II. Vtrum moralitas actus humani statuatur ne  
dum in directione, seu dirigibilitate à ratione recta, sed  
etiam in libertate. 365

Quæstio III. Vtrum bonitas, & malitia sint differentiæ es-  
sentialia actus humani. 369

Quæres 1. An idem actus humanus tam internus, quam ex-  
ternus bonus possit successiuè affici morali malitia. 372

Quæres 2. An eidem actui externo competere possit boni-  
tas, & malitia respectu diuersorum operantium, immò  
& eiusdem operantis. ibid.

Quæstio IV. Vtrum actus humani desumant bonitatem,  
vel malitiam ex obiecto. 373

Quæstio V. Vtrum actus humani aliquam bonitatem, vel  
malitiam desumant à circumstantijs. 376

Quæstio VI. Vtrum actus interior sumat bonitatem à fine  
extrinseco. 381

Quæstio VII. Vtrum idem actus voluntatis possit simul, &

- eodem tempore habere diuersas species moralitatis, 'bonitatis, & malitiæ. 384
- Quæstio VIII. Vtrum actus externus addat aliquid bonitatis, vel malitiæ actui interno. 386
- Quæres 1. An bonitas, vel malitia competat prius actui interiori, vel exteriori. 391
- Quæres 2. An actus internus, & externus sint vnum peccatum, vel duo. 392
- Quæstio IX. Vtrum dentur actus indifferentes tam in specie, quàm in indiuiduo, qui nec boni sint, nec mali. ibid.
- Quæstio X. Vtrum bonitas moralis dependeat à conformitate cum voluntate Diuina. 398

## TRACTATVS QVARTVS.

De Conscientia in genere, & de probabili.

### DISPVATIO I.

- Quæstio I. Quid sit Conscientia. 403
- Quæres 1. Quotuplex est conscientia. 405
- Quæres 2. Quor, & qui sint actus conscientiæ. 406
- Quæstio II. Quotuplex est conscientia recta, & infallibilis, & vnde habeat suam infallibilitatem. 407
- Quæstio III. Quid sit opinio. 408
- Quæres. Quotuplex sit opinio. 409
- Quæstio IV. Vtrum liceat ex quacunque opinione probabiliter operari. 411
- Quæstio V. Vtrum in concursu duarum opinionum, quarum vna est probabilis, altera est probabilior, possit quis, relicta probabiliori, vti minus probabili. 419
- Quæres 1. An possit esse aliqua opinio magis tuta, sed minus probabilis. 420
- Quæres 2. An inter opiniones verè probabiles teneatur quis per se tutiorem sequi. 421
- Quæres 3. Quæ opinio censeatur verè probabilis. 422
- Quæres 4. An sententia vnius Doctoris possit facere opinionem vere probabilem. 423
- Quæres 5. Vtrum iudex, quando rationes hinc inde sunt æquæ

æquè probabiles, possit arbitrari, ferendo sententiam in fauorem illius partis, quæ sibi placuerit. 424

Quæstio VI. An licitum sit ex probabilibus opinionibus alterutram ad placitum, imò & minus probabilem contra propriam opinionem sequi. 425

## DISPUTATIO II.

### *De conscientia dubia.*

Quæstio I. Vtrum conscientia dubia sit regula sufficiens ad prudenter operandum. 426

Quæres 1. An quando quis est dubius de honestate actus, possit cum tali dubio conscientiaæ agere. 428

Quæres 2. Qualiter intelligi debeant illæ duæ regulæ iuris: In dubio melior est conditio possidentis: In dubijs tutior pars est eligenda. 429

Quæstio II. Vtrum in dubio iuris, vel facti semper tutior pars sit eligenda. 431

## DISPUTATIO III.

### *De conscientia erronea, & scropulosa.*

Quæstio I. Vtrum sit peccatum agere contra conscientiam erroneam. 433

Quæres. An obligatio operandi iuxta conscientiam proveniat à lege naturali, vel à lege positiva. 435

Quæstio II. Vtrum quando conscientia inuincibiliter errans existimat vtramque partem contradictionis esse peccatum, peccet quis alterutram partem amplectens. 436

Quæres. An quando quis apprehendit tantum malum in genere, nesciens distinguere, an peccatum sit mortale, vel veniale, peccet mortaliter. 437

Quæstio III. Vtrum conscientia inuincibiliter errans magis obliget, quàm præceptum superioris. 439

Quæstio IV. Vtrum teneamur sequi conscientiam inuincibiliter errantem. 440

Quæres. Quomodo sit deponenda conscientia erronea vincibilis. 441

Quæstio V. Vtrum scrupulosus agendo contra conscientiam scrupulosam peccet. 441

## TRACTATUS QUINTVS.

De legibus.

### DISPV TATIO I.

*De legibus in communi.*

Quæstio I. Quid sit lex.	444
Quæres 1. Quænam sunt conditiones legis.	445
Quæres 2. Quotuplex est lex.	446
Quæstio II. Vtrum ratio legis consistat in actu intellectus, vel voluntatis.	447
Quæstio III. Vtrum ad obligationem legis requiratur promulgatio.	449
Quæstio IV. Vtrum ad hoc ut lex obliget, requiratur acceptatio populi.	453
Quæstio V. Vtrum lex ferri debeat pro communitate.	456
Quæres 1. Quinam possint legem condere.	459
Quæres 2. An legislator merè politicus possit condere aliquas leges ecclesiasticas ad Religionem pertinentes.	463
Quæres 3. An potestas condendi leges sit delegabilis.	464
Quæres 4. Quænam sint legis proprietates.	465
Quæres 5. Quinam sint præcipui legis actus.	ibid.
Quæres 6. Quinam sint legis, effectus, & officia.	ibid.

### DISPV TATIO II.

*De lege æterna, & naturali.*

Quæstio I. Vtrum lex æterna sit propriè lex, & an aliæ leges ab ea deriuentur.	466
Quæstio II. In quo consistat essentia legis naturalis.	471
Quæres. An lex naturalis sit omnino eadem in omnibus hominibus.	476
Quæres 2. An lex naturalis se extendat ad omne opus virtutis.	478

Quæ-

Quæstio III. Vtrum ad materiam legis naturalis spectet non solum substantia actus, sed etiam modus.	479
Quæstio IV. Vtrum lex naturalis sit immutabilis.	481
Quæstio V. Vtrum lex naturalis possit de potentia Dei dispensari.	483
Quæstio VI. Vtrum Pontifex dispensare valeat in ijs, quæ sunt iuris naturæ, vel diuini.	488
Quæres 1. An in lege naturali locum habeat Epikia.	490
Quæres 2. An lex naturalis admittat interpretationem.	491
Quæres 3. Quid sit ius gentium.	ibid.

## DISPUTATIO III.

### *De lege Diuina positiua.*

Quæstio I. Vtrum lex vetus fuerit bona.	492
Quæstio II. Vtrum lex vetus solos Iudæos obligauerit, & qualiter obligabat.	494
Quæstio III. Vtrum cessauerit lex vetus, & quando cessauerit.	496
Quæstio IV. Vtrum lex Euangelica lata sit pro toto Orbe, & sit duratura vsque ad finem mundi.	499
Quæstio V. Vtrum vsus legalium in lege noua aliquando licuerit.	500
Quæres 1. An in legem Diuinam positiuam cadere possit mutatio.	504
Quæres 2. An lex Diuina positiua admittat interpretationem.	ibid.
Quæres 3. An Deus sua potentia potuisset condere hominem ex legem.	505
Quæres 4. In quibus lex noua excedat veterem.	ibid.



## DISPUTATIO IV.

*De lege humana tam Ecclesiastica, quàm ciuili.*

- Quæstio I. Vtrum admittendæ sint leges humanæ præter legem naturalem, & diuinam 508
- Quæres 1. Quodnam sit ius canonicum, vbi de modo illud citandi &c. 511
- Quæres 2. Quodnam sit ius ciuile; vbi de modo illud citandi &c. 514
- Quæstio II. Quænam sit materia legis humanæ. 515
- Quæstio III. Vtrum lex humana præcipere possit actus internos. 518

## DISPUTATIO V.

*De ijs, qui legibus subiiciuntur.*

- Quæstio I. Vtrum Princeps, seu Legislator teneatur suis legibus. 521
- Quæstio II. Vtrum Clerici teneantur legibus ciuilibus, & Religiosi legibus Synodalibus. 523
- Quæres. An Clericus coniugatus gaudeat ijsdem priuilegijs, quibus gaudet Clericus non coniugatus. 526
- Quæstio III. Vtrum aduenæ, & peregrini teneantur legibus tam proprii territorij, quàm loci extra suum territorium. pag. 527
- Quæres 1. An proficiscens è proprio territorio, in quo est festum ad aliud, vbi non est festum, teneatur Missam audire &c. 531
- Quæres 2. An pergere volens extra proprium territorium, vbi sit ieiunium &c. 532
- Quæstio IV. Vtrum pueri, amentes, & ebrij teneantur legibus. ibid.
- Quæstio V. Vtrum leges humanæ tam ciuiles, quàm Ecclesiasticæ obligent in foro conscientiæ. 534
- Quæres 2. Vnde dignosci possit leges obligare in conscientia. 540

Quæ-

- Quæres 2. An leges fundatæ in præsumptione obligent in conscientia, veritate in contrarium inspecta. 542
- Quæres 3. An lex humana obliget cum periculo vitæ. 543
- Quæstio VI. Vtrum in legem humanam cadere possit interpretatio. 544
- Quæres. Vnde sit desumenda doctrinalis interpretatio legis; ubi ad rem ponuntur plures regulæ. 546

## DISPUTATIO VI.

### *De lege pœnali, & irritante.*

- Quæstio I. Vtrum lex pœnalis obliget ante Iudicis sententiam. 550
- Quæres 1. Ad quid obliget lex pœnalis post Iudicis sententiam. 553
- Quæres 2. An iudex teneatur imponere pœnas à lege præscriptas. 554
- Quæstio II. Vtrum ignorantia excuset à pœna legis humanæ. 555
- Quæstio III. Vtrum omnis lex prohibitiua sit irritatoria actum, quos prohibet, & an leges irritantes obligent in conscientia ad non faciendos illos. 557
- Quæres 1. Vnde dignosci possit legem aliquam irritare actum. 559
- Quæres 2. An lex irritans fundata in præsumptione suum sortiatur effectum quando præsumptio non subsistit. 560
- Quæres 3. An pœna conuentionalis obliget in conscientia. ibid.

## DISPUTATIO VII.

### *De cessatione, & mutatione legis humanæ.*

- Quæstio I. Vtrum lex cesset, cessante fine, seu causa finali. pag. 561
- Quæstio II. Vtrum lex humana cesset per reuocationem seu per abrogationem superioris. 563
- Quæstio III. Vtrum lex cesset per contrariam consuetudinem. 564



Quæres 1. Vnde dignosci possit consuetudinem introdu-	
ctam esse animo obligandi, si de ea dubitetur.	566
Quæres 2. Quomodo consuetudo probetur.	567
Quæres 3. An lex prohibens consuetudinem, tollitiam-	
possit per consuetudinem.	ibid.
Quæstio IV. Vtrum lex cesset per dispensationem.	568
Quæstio V. Quomodo dispensatio reddatur inualida ob	
taciturnitatem veri, vel ob errorem, & metum.	571
Quæres. In quibus casibus censetur electa industria perso-	
næ, si potestas alicui sit delegata.	574
Quæstio VI. Quomodo lex cesset per priuilegium.	ibid.
Quæres 1. Quando priuilegium sortitur suum effectum.	579
Quæres 2. An, & quomodo fiat communicatio priuilegio-	
rum.	ibid.
Quæres 3. Quid sentiendum sit de confirmatione priuile-	
giorum Regularibus concessorum.	580
Quæres 4. Qualiter interpretanda sint priuilegia.	581

## TRACTATUS SEXTVS.

### De Peccatis.


#### DISPUTATIO I.

##### *De natura, & essentia peccati in genere.*

Quæstio I. In quo consistat ratio formalis peccati.	583
Quæstio II. In quo consistat ratio peccati habitualis.	587
Quæstio III. Quodnam sit subiectum peccati.	593
Quæstio IV. Vtrum dari possit pura omissio culpabilis.	595
Quæstio V. Vtrum omnia peccata sint æqualis malitiæ; &	
vnde deriuetur inæqualitas.	599
Quæstio VI. Vtrum peccata commissionis, & omissionis dif-	
ferant specie.	601
Quæres 1. An actus coniunctus omissioni culpabili sit pec-	
catum.	603
Quæres 2. Quo tempore peccatum omissionis contrahatur	
pag.	604
Quæres 3. An qui propria culpa incidit in aliquem morbum	
diu-	



- diuturnum, incurrat omnes omissiones peccaminosas ex morbo sequentes. 605
- Quæstio VII. Vtrum aliud sit peccatum mortale, aliud veniale, & quomodo inter se differant. 606
- Quæstio VIII. Vtrum peccatum mortale, & veniale differant inter se genere, vel specie. 610
- Quæres. Qualiter discernendum sit inter peccatum mortale, & veniale. 612
- Quæstio IX. Quomodo veniale possit transire in mortale, & è contra. 613
- Quæstio X. Quomodo peccatum veniale ex consuetudine, vel ex repetitione actuum fiat mortale. 617
- Quæres 1. Qui possint peccare venialiter. 619
- Quæres 2. Quomodo iudicandum sit quando mortale fiat ex accidenti veniale ex defectu considerationis. 620
- Quæres 3. Quid sit delectatio morosa. 622
- Quæres 4. Quomodo in præceptis, vel legibus sit dignoscenda materia grauis, aut leuis. 623
- Quæstio XI. Vnde desumenda sit specifica peccatorum distinctio. 624
- Quæstio XII. Vnde desumenda sit numerica peccatorum distinctio, vbi etiam de interruptione actus voluntatis &c. 626
- Quæres 1. Quodnam sit maius peccatum, quando duo vitia extrema opponuntur eidem virtuti in medio consistenti &c. 631
- Quæres 2. Quodnam propriè sit peccatum ex malitia. 632
- Quæstio XIII. Vtrum peccatum sit causa peccati, nec non poena peccati. 633
- Quæstio XIV. Vtrum peccatum mortale contineat malitiam infinitam. 635



## TRACTATUS TERTIVS.

De actibus humanis.

### DISPUTATIO I.

*De principijs elicitiuis actus humani.*

Quæstio I. Vtrum intellectus sit principium elicitiuum actus humani adeo ut voluntas sine illustratione intellectus nequeat elicere actum volitionis, 315

Quæstio II. Vtrum Anima possit Deum actualiter diligere sine aliqua præuia cognitione intellectus, vel sensus. 317

Quæres. An voluntas possit plus amare, quam intellectus intellegat, 321

Quæstio III. Vtrum intellectus moueat voluntatem per aliquod imperium, vel simplicem cognitionem, vel iudicium. 321

Quæres 1. An Deus de potentia possit producere in voluntate actum &c. 325

Quæres 2. An voluntas peccet ratione alicuius erroris precedentis in intellectu. 326

Quæstio IV. Vtrum appetitus sensitivus moueat immediate voluntatem. ibid.

Quæstio V. Vtrum voluntas moueatur ab aliqua causa extrinseca ad suos actus elicendos. 328

Quæstio VI. Vtrum licitum sit Astronomis ex astrorum aspectibus futura prænunciare, 332

### DISPUTATIO II.

*De actibus voluntatis in genere, id est de voluntario, & inuoluntario.*

Quæstio I. Quid sit voluntarium. 336

Quæres 1. Quotuplex sit voluntarium. 337

Quæres 2. Quomodo omissio possit dici voluntaria. 338

Quæstio II. Vtrum violentia causet inuoluntarium, & an voluntas possit pari violentiam? 339

Quæstio III. Vtrum ea, quæ fiunt ex metu sint voluntaria, vel potius inuoluntaria. 345

Quæ-

- Quæstio IV. Vtrum concupiscentia causet inuoluntarium  
 pag. 348  
 Quæres. An ea, quæ fiunt ex concupiscentia sint aliquan-  
 do inuoluntaria secundum quid. 351  
 Quæstio V. Vtrum ignorantia causet inuoluntarium. 352

## DISPUTATIO III.

### *De actibus elicitis voluntatis in specie.*

- Quæstio I. Quid sit intentio, & an sit actus voluntatis di-  
 stinctus ab amore, spe, & desiderio; vbi etiam diuersa  
 quæsitæ. 355  
 Quæstio II. Vtrum voluntas possit velle plures fines simul.  
 pag. 357  
 Quæres. Quid sit consilium, quid deliberatio, quid electio  
 quid imperium, & vsus. 360

## DISPUTATIO IV.

### *De bonitate, & malitia morali actus humani.*

- Quæstio I. Quid sit bonitas, & malitia moralis. 363  
 Quæstio II. Vtrum moralitas actus humani statuatur ne  
 dum in directione, seu dirrigibilitate à ratione recta, sed  
 etiam in libertate. 365  
 Quæstio III. Vtrum bonitas, & malitia sint differentiæ es-  
 sentiales actus humani. 369  
 Quæres 1. An idem actus humanus tam internus, quàm ex-  
 ternus bonus possit successiuè affici morali malitia. 372  
 Quæres 2. An eidem actui externo competere possit boni-  
 tas, & malitia respectu diuersorum operantium, immò  
 & eiusdem operantis. ibid.  
 Quæstio IV. Vtrum actus humani desumant bonitatem,  
 vel malitiam ex obiecto. 373  
 Quæstio V. Vtrum actus humani aliquam bonitatem, vel  
 malitiam desumant à circumstantiis. 376  
 Quæstio VI. Vtrum actus interior sumat bonitatem à fine  
 extrinseco. 381  
 Quæstio VII. Vtrum idem actus voluntatis possit simul, &  
 eo-

eodem tempore habere diuersas species moralitatis, bonitatis, & malitiæ.	384
Quæstio VIII. Vtrum actus externus addat aliquid bonitatis, vel malitiæ actui interno.	386
Quæres 1. An bonitas, vel malitia competat prius actui interiori, vel exteriori.	391
Quæres 2. An actus internus, & externus sint vnum peccatum, vel duo.	392
Quæstio IX. Vtrum dentur actus indifferentes tam in specie, quàm in indiuiduo, qui nec boni sint, nec mali. ibid.	
Quæstio X. Vtrum bonitas moralis dependeat à conformitate cum voluntate Diuina.	398

## TRACTATVS QVARTVS.

De Conscientia in genere, & de probabili.

### DISPUTATIO I.

Quæstio I. Quid sit Conscientia.	403
Quæres 1. Quotuplex est conscientia.	405
Quæres 2. Quot, & qui sint actus conscientiæ.	406
Quæstio II. Quotuplex est conscientia recta, & infallibilis, & vnde habeat suam infallibilitatem.	407
Quæstio III. Quid sit opinio.	408
Quæres. Quotuplex sit opinio.	409
Quæstio IV. Vtrum liceat ex quacunque opinione probabili operari.	411
Quæstio V. Vtrum in concursu duarum opinionum, quarum vna est probabilis, altera est probabilior, possit quis, relicta probabiliori, vti minus probabilis.	414
Quæres 1. An possit esse aliqua opinio magis tuta, sed minus probabilis.	420
Quæres 2. An inter opiniones verè probabiles teneatur quis per se tutiorem sequi.	421
Quæres 3. Quæ opinio censeatur verè probabilis.	422
Quæres 4. An sententia vnius Doctoris possit facere opinionem vere probabilem.	423
Quæres 5. Vtrum iudex, quando rationes hinc inde sunt æquæ	

æquè probabiles, possit arbitrari, ferendo sententiam in fauorem illius partis, quæ sibi placuerit. 424

Quæstio VI. An licitum sit ex probabilibus opinionibus alterutram ad placitum, imò & minus probabilem contra propriam opinionem sequi. 425

## DISPUTATIO II.

### *De conscientia dubia.*

Quæstio I. Vtrum conscientia dubia sit regula sufficiens ad prudenter operandum. 426

Quæres 1. An quando quis est dubius de honestate actus, possit cum tali dubio conscientiaæ agere. 428

Quæres 2. Qualiter intelligi debeant illæ duæ regulæ iuris: In dubio melior est conditio possidentis: In dubijs tutior pars est eligenda. 429

Quæstio II. Vtrum in dubio iuris, vel facti semper tutior pars sit eligenda. 431

## DISPUTATIO III.

### *De conscientia erronea, & scrupulosa.*

Quæstio I. Vtrum sit peccatum agere contra conscientiam erroneam. 433

Quæres. An obligatio operandi iuxta conscientiam pro- ueniat à lege naturali, vel à lege positiua. 435

Quæstio II. Vtrum quando conscientia inuincibiliter errans existimat vtramque partem contradictionis esse peccatum, peccet quis alterutram partem amplectens. 436

Quæres. An quando quis apprehendit tantum malum in genere, nesciens distinguere, an peccatum sit mortale, vel veniale, peccet mortaliter. 437

Quæstio III. Vtrum conscientia inuincibiliter errans magis obliget, quàm præceptum superioris. 439

Quæstio IV. Vtrum teneamur sequi conscientiam inuincibiliter errantem. 440

Quæres. Quomodo sit deponenda conscientia erronea vincibilis. 441

Quæstio V. Vtrum scrupulosus agendo contra conscientiam scrupulosam peccet. 441

## TRACTATUS QUINTVS.

De legibus.

### DISPUTATIO I.

*De legibus in communi.*

Quæstio I. Quid sit lex.	444
Quæres 1. Quænam sunt conditiones legis.	445
Quæres 2. Quoruplex est lex.	446
Quæstio II. Vtrum ratio legis consistat in actu intellectus, vel voluntatis.	447
Quæstio III. Vtrum ad obligationem legis requiratur promulgatio.	449
Quæstio IV. Vtrum ad hoc ut lex obliget, requiratur acceptatio populi.	453
Quæstio V. Vtrum lex ferri debeat pro communitate.	456
Quæres 1. Quinam possint legem condere.	459
Quæres 2. An legislator merè politicus possit condere aliquas leges ecclesiasticas ad Religionem pertinentes.	463
Quæres 3. An potestas condendi leges sit delegabilis.	464
Quæres 4. Quænam sint legis proprietates.	465
Quæres 5. Quinam sint præcipui legis actus.	ibid.
Quæres 6. Quinam sint legis, effectus, & officia.	ibid.

### DISPUTATIO II.

*De lege æterna, & naturali.*

Quæstio I. Vtrum lex æterna sit propriè lex, & an aliæ leges ab ea deriuentur.	466
Quæstio II. In quo consistat essentia legis naturalis.	471
Quæres. An lex naturalis sit omnino eadem in omnibus hominibus.	476
Quæres 2. An lex naturalis se extendat ad omne opus virtutis.	478

Quæ-



Quæstio III. Vtrum ad materiam legis naturalis spectet non solum substantia actus, sed etiam modus.	479
Quæstio IV. Vtrum lex naturalis sit immutabilis.	481
Quæstio V. Vtrum lex naturalis possit de potentia Dei dispensari.	483
Quæstio VI. Vtrum Pontifex dispensare valeat in ijs, quæ sunt iuris naturæ, vel diuini.	488
Quæres 1. An in lege naturali locum habeat Epikia.	490
Quæres 2. An lex naturalis admittat interpretationem.	491
Quæres 3. Quid sit ius gentium.	ibid.

### DISPUTATIO III.

#### *De lege Diuina positiua.*

Quæstio I. Vtrum lex vetus fuerit bona.	492
Quæstio II. Vtrum lex verus solos Iudæos obligauerit, & qualiter obligabat.	494
Quæstio III. Vtrum cessauerit lex vetus, & quando cessauerit.	496
Quæstio IV. Vtrum lex Euangelica lata sit pro toto Orbe, & sit duratura vsque ad finem mundi.	499
Quæstio V. Vtrum vsus legalium in lege noua aliquando licuerit.	500
Quæres 1. An in legem Diuinam positiuam cadere possit mutatio.	504
Quæres 2. An lex Diuina positiua admittat interpretationem.	ibid.
Quæres 3. An Deus sua potentia potuisset condere hominem ex legem.	505
Quæres 4. In quibus lex noua excedat veterem.	ibid.



## DISPUTATIO IV.

*De lege humana tam Ecclesiastica, quàm ciuili.*

- Quæstio I. Vtrum admittendæ sint leges humanæ præter legem naturalem, & diuinam 508
- Quæres 1. Quodnam sit ius canonicum, vbi de modo illud citandi &c. 511
- Quæres 2. Quodnam sit ius ciuile; vbi de modo illud citandi &c. 514
- Quæstio II. Quænam sit materia legis humanæ. 515
- Quæstio III. Vtrum lex humana præcipere possit actus internos. 518

## DISPUTATIO V.

*De ijs, qui legibus subijciuntur.*

- Quæstio I. Vtrum Princeps, seu Legislator teneatur suis legibus. 521
- Quæstio II. Vtrum Clerici teneantur legibus ciuilibus, & Religiosi legibus Synodalibus. 523
- Quæres. An Clericus coniugatus gaudeat ijsdem priuilegijs, quibus gaudet Clericus non coniugatus. 526
- Quæstio III. Vtrum aduenæ, & peregrini teneantur legibus tam proprii territorij, quàm loci extra suum territorium. pag. 527
- Quæres 1. An proficiscens è proprio territorio, in quo est festum ad aliud, vbi non est festum, teneatur Missam audire &c. 531
- Quæres 2. An pergere volens extra proprium territorium, vbi sit ieiunium &c. 532
- Quæstio IV. Vtrum pueri, amentes, & ebrii teneantur legibus. ibid.
- Quæstio V. Vtrum leges humanæ tam ciuiles, quàm Ecclesiasticæ obligent in foro conscientiæ. 534
- Quæres 2. Vnde dignosci possit leges obligare in conscientia. 540

Quæ-



- Quæres 2. An leges fundatæ in præsumptione obligent in conscientia, veritate in contrarium inspecta. 542
- Quæres 3. An lex humana obliget cum periculo vitæ. 543
- Quæstio VI. Vtrum in legem humanam cadere possit interpretatio. 544
- Quæres. Vnde sit desumenda doctrinalis interpretatio legis; ubi ad rem ponuntur plures regulæ. 546

## DISPUTATIO VI.

### *De lege pœnali, & irritante.*

- Quæstio I. Vtrum lex pœnalis obliget ante Iudicis sententiam. 550
- Quæres 1. Ad quid obliget lex pœnalis post Iudicis sententiam. 553
- Quæres 2. An iudex teneatur imponere pœnas à lege præscriptas. 554
- Quæstio II. Vtrum ignorantia excuset à pœna legis humanæ. 555
- Quæstio III. Vtrum omnis lex prohibitiua sit irritatoria actum, quos prohibet, & an leges irritantes obligent in conscientia ad non faciendos illos. 557
- Quæres 1. Vnde dignosci possit legem aliquam irritare actum. 559
- Quæres 2. An lex irritans fundata in præsumptione suum sortiatur effectum quando præsumptio non subsistit. 560
- Quæres 3. An pœna conventionalis obliget in conscientia. ibid.

## DISPUTATIO VII.

### *De cessatione, & mutatione legis humanæ.*

- Quæstio I. Vtrum lex cesset, cessante fine, seu causa finali. pag. 561
- Quæstio II. Vtrum lex humana cesset per reuocationem seu per abrogationem superioris. 563
- Quæstio III. Vtrum lex cesset per contrariam consuetudinem. 564

Quæres 1. Vnde dignosci possit consuetudinem introdu-	
ctam esse animo obligandi, si de ea dubitetur.	566
Quæres 2. Quomodo consuetudo probetur.	567
Quæres 3. An lex prohibens consuetudinem, tolli etiam	
possit per consuetudinem.	ibid.
Quæstio IV. Vtrum lex cesset per dispensationem.	568
Quæstio V. Quomodo dispensatio reddatur inualida ob	
taciturnitatem veri, vel ob errorem, & metum.	571
Quæres. In quibus casibus censetur electa industria perso-	
næ, si potestas alicui sit delegata.	574
Quæstio VI. Quomodo lex cesset per priuilegium.	ibid.
Quæres 1. Quando priuilegium sortitur suum effectum.	579
Quæres 2. An, & quomodo fiat communicatio priuilegio-	
rum.	ibid.
Quæres 3. Quid sentiendum sit de confirmatione priuile-	
giorum Regularibus concessorum.	580
Quæres 4. Qualiter interpretanda sint priuilegia.	581

## TRACTATVS SEXTVS.


### De Peccatis.

#### DISPUTATIO I.

##### *De natura, & essentia peccati in genere.*

Quæstio I. In quo consistat ratio formalis peccati.	583
Quæstio II. In quo consistat ratio peccati habitualis.	587
Quæstio III. Quodnam sit subiectum peccati.	593
Quæstio IV. Vtrum dari possit pura omisio culpabilis.	595
Quæstio V. Vtrum omnia peccata sint æqualis malitiæ; &	
vnde deriuetur inæqualitas.	599
Quæstio VI. Vtrum peccata comissionis, & omissionis dif-	
ferant specie.	601
Quæres 1. An actus coniunctus omissioni culpabili sit pec-	
catum.	603
Quæres 2. Quo tempore peccatum omissionis contrahatur	
pag.	604
Quæres 3. An qui propria culpa incidit in aliquem morbum	
diu-	

- diuturnum, incurrat omnes omissiones peccaminosas ex morbo sequentes. 605
- Quæstio VII. Vtrum aliud sit peccatum mortale, aliud veniale, & quomodo inter se differant. 606
- Quæstio VIII. Vtrum peccatum mortale, & veniale differant inter se genere, vel specie. 610
- Quæres. Qualiter discernendum sit inter peccatum mortale, & veniale. 612
- Quæstio IX. Quomodo veniale possit transire in mortale, & è contra. 613
- Quæstio X. Quomodo peccatum veniale ex consuetudine, vel ex repetitione actuum fiat mortale. 617
- Quæres 1. Qui possint peccare venialiter. 619
- Quæres 2. Quomodo iudicandum sit quando mortale fiat ex accidenti veniale ex defectu considerationis. 620
- Quæres 3. Quid sit delectatio morosa. 622
- Quæres 4. Quomodo in præceptis, vel legibus sit dignoscenda materia grauis, aut leuis. 623
- Quæstio XI. Vnde desumenda sit specifica peccatorum distinctio. 624
- Quæstio XII. Vnde desumenda sit numerica peccatorum distinctio, vbi etiam de interruptione actus voluntatis &c. 626
- Quæres 1. Quodnam sit maius peccatum, quando duo vitia extrema opponuntur eidem virtuti in medio consistenti &c. 631
- Quæres 2. Quodnam propriè sit peccatum ex malitia. 632
- Quæstio XIII. Vtrum peccatum sit causa peccati, nec non pœna peccati. 633
- Quæstio XIV. Vtrum peccatum mortale contineat malitiam infinitam. 635



## DISPUTATIO II.

### *De peccatis in particulari, seu capitalibus.*

Quæstio I. De superbia, ac eius filiabus.	645
Quæstio II. De filiabus Vanagloriæ.	646
Quæres 1. An inuentio nouitatum, vt nouarum epularum, vestium, ludorum &c. sit peccatum mortale.	647
Quæres 2. An hypocrisis sit semper peccatum.	649
Quæstio III. Vtrum Auaritia sit peccatum mortale.	651
Quæstio IV. De luxuria in quinque articulos partita.	653
Articulus I. Vtrum luxuria sit peccatum mortale, nec non capitale.	ibid.
Articulus II. De motibus carnis, osculis, tactibus, & aspectibus.	656
Quæres. Quid de verbis inhonestis, cantilenis, choræis, missione litterarum, ac donorum censendum est.	661
Articulus III. De fornicatione, & adulterio.	663
Quæres 1. An actus, & oscula, & tactus, quæ fornicationem sequuntur sint exprimenda in confessione.	664
Quæres 2. Quid sit incestus, stuprum, raptus, & sacrilegium.	665
Articulus IV. Vtrum mollities, seu pollutio sit peccatum mortale contra naturam.	667
Articulus V. Quid sit Sodomia, & bestialitas, & an distinguantur inter se, & à pollutione specie; adeo ut in confessione sint distinctè exprimenda.	669
Quæstio V. Vtrum ira sit vitium capitale, & mortale.	672
Quæstio VI. Vtrum gula sit peccatum capitale, & mortale.	pag. 674
Quæres. An liceat vinum præbere ei, qui inebriari solet.	pag. 676
Quæstio VII. Vtrum comedere, & libere vsque ad satietatem ob solam voluptatem sit peccatum.	677
Quæstio VIII. Vtrum inuidia sit vitium capitale, & mortale peccatum.	678
Quæstio IX. Vtrum accidia sit peccatum capitale, & mortale.	681
Quæres. Quale peccatum sit, si quis fastidiosus vitæ, & cru-	

crumnarum deliberatè optat, se nunquam fuisse natum,  
aut potius esse brutum. 684

## TRACTATVS SEPTIMVS:

De libero arbitrio, & gratia diuina actuali,  
& habituali.

### DISPUTATIO I.

#### *De libero arbitrio.*

- Quæstio I. Quid sit liberum arbitrium 685  
Quæres. An de potentia Dei dari possit potentia intelle-  
ctiua libera. 688  
Quæstio II. Vtrum in homine reuerà reperiatur lib. arbi-  
trium. ibid.  
Quæstio III. Vtrum ad merendum, & demerendum suffi-  
ciat lib. arbitrio libertas à coactione. 691  
Quæstio IX. Vtrum sit de ratione agentis liberi, vt, positis  
omnibus natura, & causalitate ad agendum possit non-  
agere in sensu composito. 697.

### DISPUTATIO II.

#### *De Diuisione Gratia.*

- Quæstio I. Vtrum gratia rectè diuidatur in gratiam gratis  
datam, & in gratiam gratum facientem. 701  
Quæres. Quotuplex est gratia gratis data. 703  
Quæstio II. Vtrum gratia gratum faciens rectè diuidatur  
in actualem & habitualem. 704  
Quæres. Quotuplex est gratia actualis. 705  
Quæstio III. Vtrum gratia excitans rectè diuidatur in suf-  
ficientem, & efficacem; & an ab inuicem distinguantur  
ex natura rei. 706  
Quæstio IV. In quo consistat efficacia gratiæ. 709  
Quæres I. An concursus Dei tanquam causæ primæ quate-  
nus est debitus principio supernaturali &c. 713

Quæ-

Quæres 2. An gratiæ gratis datæ sint permanentes in hominibus iustis; ubi etiam propositiones damnatæ lapsenij.  
pag. 713

### DISPUTATIO III.

#### *De necessitate gratiæ.*

- Quæstio I. Vtrum homo sine gratia cognoscere valeat verum naturale. 714
- Quæstio II. Vtrum homo sine speciali auxilio possit verum morale cognoscere. 719
- Quæstio III. Vtrum homo sine gratia possit cognoscere verum supernaturale. 721
- Quæstio IV. Vtrum homo sine gratia sanctificante, vel sine fide possit facere aliquod opus morale ordinis naturalis. 723
- Quæstio V. Vtrum homo solis viribus naturæ possit obseruare præcepta legis naturæ. 728
- Quæstio VI. Vtrum homo solis viribus naturæ diligere possit Deum super omnia. 734
- Quæstio VII. Vtrum homo solis viribus lib. arb. possit se disponere ad actus contritionis, vel attritionis saltem quoad substantiam. 739
- Quæres 1. An gratia sit necessaria ad actus virtutum moralium; ubi etiam de virtute eroica. 742
- Quæres 2. An homo pro statu naturæ lapsæ cum sola gratia habituali possit elicere actus supernaturales, & meritorios. 743
- Quæres 3. An homo lapsus solo generali concursu possit vitare omnia peccata mortalia, saltem quoad substantiam pag. 744
- Quæstio IIX. Vtrum homo lapsus viribus solius lib. arb. possit vincere omnes tentationes. ibid.
- Quæstio IX. Vtrum homo necessario indigeat gratia, vt ad illam se præpareret. 746
- Quæstio X. Vtrum homo iustus necessario indigeat speciaiori gratia ad perseuerantiam finalem. 750



## DISPUTATIO IV.

### *De sufficientia gratiæ diuinæ ad salutem.*

- Quæstio I. Vtrum homo auxilijs ordinarijs D. gratiæ vi-  
tare possit omnia peccata venialia. 753
- Quæstio II. Vtrum peccatores etiam obdurati habeant au-  
xilium sufficiens ad vitandum nouum peccatum mortale  
pag. 756
- Quæstio III. Vtrum peccatoribus etiam obduratis detur  
gratia sufficiens ad pœnitendum. 759
- Quæstio IV. Vtrum infidelibus detur auxilium sufficiens  
ad fidem, ac proinde ad iustificationem, & salutem. 762

## DISPUTATIO V.

### *De gratia D. habituali.*

- Quæstio I. Vtrum gratia habitualis creetur immediatè à  
Deo, vel potius educatur de potentia materiæ. 762
- Quæstio II. Vtrum gratia distinguatur à charitate. 769
- Quæstio III. Vtrum gratia habitualis ex natura rei intrin-  
secè hominem iustificet. 768
- Quæstio IV. Vtrum gratia habitualis possit augeri, ac de-  
strui. 772
- Quæstio V. Vtrum gratia habitualis augeatur per actus re-  
missos. 775
- Quæres 1. Quando à Deo conferatur iusto augmentum  
gratiæ pro meritum per opera remissa. 778
- Quæres 2. An sit de fide gratia, qua iustificamur, esse  
quid habituale, & permanens. ibid.
- Quæstio VI. Vtrum gratia ponatur immediatè in Anima  
essentia, vel in eius potentia, idest voluntate. 779





# DISPUTATIO VI.

## *De iustificatione primo effectu gratiæ habitualis.*

- Quæstio I. Vtrum adultus debeat aliquas dispositiones præmittere in ordine ad iustificationem. 781
- Quæres. Quot dispositiones, seu actus præuij ad iustificationem requirantur. 783
- Quæstio II. Vtrum fides sit necessaria ad iustificationem. pag. 784
- Quæstio III. Vtrum iustificatio impij fiat per solam imputationem iustitiæ Christi. 787
- Quæstio IV. Vtrum non solum gratia habitualis, sed etiam actus contritionis, seu dilectionis sit forma iustificans pag. 791
- Quæstio V. Vtrum Deus de potentia absoluta possit iustificare peccatorem absque infusione gratiæ, aut physica mutatione peccatoris. 795
- Quæstio VI. Vtrum gratia, & peccatum de potentia Dei absoluta possint esse simul. 799
- Quæstio VII. Vtrum contritio peccatoris perfecta procedat effectiue ab habitu gratiæ, seu charitatis. 801
- Quæres 1. An infusio gratiæ, & remissio peccati sint duæ mutationes, vel vna tantum. 805
- Quæres 2. Quomodo se habeant ad inuicem in iustificatione infusio gratiæ, & expulsio culpæ. ibid.
- Quæres 3. An vnum peccatum mortale remitti possit sine alio. 806
- Quæres 4. An ad remissionem culpæ sequatur infallibiliter remissio pœnæ. ibid.
- Quæstio VIII. Vtrum iustificatio impij sit opus Dei miraculosum. 807
- Quæres 1. An iustificatio impij sit absolutè maximum Dei opus. 808
- Quæres 2. Qualem cœtitudinem possit homo habere de sua iustificatione. 809

## DISPUTATIO VII.

### *De reuiuifcentia meritorum fecundo effectū gratia habitualis.*

- Quæftio I. Vtrum opera meritoria per peccatum mortale  
mortificata in iuftificatione reuiuifcant. 810
- Quæftio II. Vtrum opera mortificata reuiuifcant in iufti-  
ficatione ex mifericordia, vel ex iuftitia. 812
- Quæftio III. Vtrum merita in iuftificatione reuiuifcant in  
ordine ad effentiale præmium cum totalitate, & integri-  
tate reddendi. 815
- Quæres. An refurgens femper in iuftificatione refurgat ad  
maiorē gratiam. 817
- Quæftio IV. Vtrum tota gratia, prioribus meritis debita,  
per fequentem iuftificationem reftituatur. 818
- Quæres 1. An gratia per peccatum amiffa reftituatur ftatim  
in iuftificatione. 820
- Quæres 2. An opera meritoria reuiuifcant pariter quoad  
fatisfactionem. 821

## DISPUTATIO VIII.

### *De merito bonorum operum tertio effectū gratia habitualis.*

- Quæftio I. Vtrum iuftus per fua bona opera poffit aliquid  
à Deo verè, & propriè mereri. 822
- Quæftio 2. Vtrum meritum de condigno, & de congruo  
vniuocè conueniant in ratione meriti. 826
- Quæres 1. Quæ conditiones exiguntur ad rationem meriti  
de condigno ex parte operantis. 828
- Quæres 2. Quæ, & quot conditiones requiruntur ex parte  
actus meritorij. 829
- Quæres 3. Quæ conditiones requirantur ex parte Dei præ-  
miantis. 830
- Quæres 4. Quæ requirantur ad meritum de congruo. 831
- Quæres 5. Quæ opera habeant rationem veram meriti de  
condigno. 832
- Quæ-

- Quæstio III. Vtrum Deus præmium bonis opetibus, seu  
meritis iustorum reddat ex iustitia. 833
- Quæstio IV. Vtrum homo iustus possit mereri sibi, & al-  
teri primam gratiam de condigno. 837
- Quæstio V. Vtrum homo possit mereri reparationem post  
lapsum. 838
- Quæstio VI. Vtrum homo iustus possit mereri sibi donum  
finalis perseverantiæ. 840
- Quæres 1. An homo possit sibi promereri augmentum  
gratiæ iustificantis. 841
- Quæres 2. An homo iustus promereri possit bona tempo-  
ralia. 842



Si celebra l' Infigne Opera  
DEL P. ANTONIO DA CANDELARA  
MINORE RIFORMATO,

*Intitolata*

BREVIARIUM VNIVERSE THEOLOGIE.

Sonetto

Di Giulio Cesare Tosi Nobile da Iesi.

**C***osmografo fedel con dotta mano  
Delinea in picciol foglio i Regni vari,  
L' Isole, i continenti, e i gran diuari  
De' Climi, e ogni confin barbaro, e strano.*


*Con più scaltro sauer, ne punto vano  
Descrìue Antonio in papiri più cari  
L' Eccelso Nume, che le Terre, e i Mari  
Trasse dal nulla Facitor Sourano,*

*Quindi ogni Saggio Archita è Angel palustre;  
O qual' Icaro cade in Mar profondo,  
In paragon del Candelara industre.*

*O quanto è più ammirabile, e giocondo  
Di Mappa Mondial Compendio illustre;  
Ch' esprime il Fabro, il Redentor del Mondo!*



NEL MEDESIMO SOGGETTO.



Sonetto

Dell' istesso Autore.

**D**E l' Aureo Candelier sù l'aurea cima  
Si vide sfauillar face sì bella  
Nel Tempio di Sion, ch' ardente Stella  
Parue, che sopra tutte i rai sublima.

E sù Volume d'or con luce prima  
Risplende Antonio in lucida fauella,  
Qual viuo Sol, non timida facella,  
Che dal notturno horror tragge la stima.

Egli del Sommo Sol dispiega i raggi,  
l' Opere, gli Attributi, e il Diuo lume,  
E gli altri splendidissimi retaggi.

Mostra, che Trino, Vno è il Vero Nume.  
Dunque d' Antonio applaudite, ò saggi,  
A l' aureo Candelier, l' aureo Volume.



PARS SECVNDA  
BREVIARII  
VNIVERSÆ THEOLOGIÆ,

N E M P E

SPECVLATIVÆ, DOGMATICÆ,  
ET MORALIS.

P R Æ F A T I O.



Absoluta, Deo adiuuante, prima parte Breuiarij Vniuersæ Theologiæ, in qua egimus de Deo vno, eiusque infinitis perfectionibus iuxta earum absolutam rationem; nec non de inæffabili fecunditate Diuina ad intra, seu æterna processione Diuinarum Personarum, hoc est de Deo Trino; ordo doctrinæ postulat, vt agatur de Dei fecunditate ad extrâ, idest de Deo Creatore, quantum creaturas omnes in tempore creat, gubernat, & conseruat. Quoniam verò inter creaturas, Angelica est omnibus alijs excellentior; idcirco prius de ipsa tractare consentaneum videtur; præmissa tamen disputatione de creatione in generali.

# TRACTATUS PRIMVS DE ANGELIS DISPVTATIO PRIMA

*De Creatione in generali.*

130111

## QVÆSTIO I.

*Vtrum sint plura principia, vel vnum tantum.*

**N**ot. Quod principium sumitur tripliciter, sicut etiam primum; nam principium dicitur quasicapiens primum, seu primitatem. Igitur primo modo dicitur principium, & primum, idem ac immediatè; vnde Arist. in 1. Post. dicit: primum, & immediatum, hoc est propositio maior, & minor sunt primum, & immediatum, quando ex se habent euentiam. 2. modo dicitur principium in genere, quo sensu à Porphyrio decem genera vocantur principia rerum; dicuntur autem in genere, quia sunt limitata; nam priusquam ens diuidatur in decem prædicamenta diuiditur in ens infinitum, & finitum; deinde finitum diuiditur in decem prædicamenta. 3. dicitur principium simpliciter, primum, independens à quocumque alio, tam in esse, quàm in conseruari, & operari, & sic solus Deus est principium, vt habetur pluribi in S. Scrip. & signanter iuxta illud Apocal. c. 1. *Ego sum Alpha, & Omega, principium, & finis*. Verum principium tertio modo explicatum potest considerari tripliciter: primo ratione bonitatis, an scilicet sint plura principia bona: 2. an sit vnum principium bonum, & aliud malum: 3. an sit vnum principium visibilium, & inuisibilium; his notatis sit.

I. Concl. Datur vnicum tantum principium infinite bonum, tam visibilium, quàm inuisibilium, quod est Deus. Hæc est de fide, & habetur expresse in S. Scrip. &

præ.





agens, agit propter finem, & prius agens agit propter priorem, seu vltimum finem; sed nihil potest esse principaliter, & vltimatè finis primi agentis, nisi primum ipsum agens, cum non sit ordinabile ad aliud à se: ergo primum agens, quod est ipse Deus, est etiam vltimus finis omnium, de quo latè in part. 1. disp. 1.

Arg. 1. contra 1. conc. Nullum contrarium in natura existit possibile, nisi, & suum contrarium sit possibile; sed summum bonum summo malo opponitur; ergo &c. mai. pat. per Arist. 2. Coeli, & Mundi, & prob. min. ex regula topica; sicut se habet simpliciter ad simpliciter ita magis ad magis, & maximum ad maximum; ergo &c.

Resp. neg. mai. ad Arist. resp. Quod illa regula tenet quando prædicatum dicitur de subiecto vniuersaliter, alias non, e. g. bibere, est bonum; ergo magis bibere, est magis bonum; ergo summè bibere, summum bonum; non sequitur quia ista est falsa, omne bibere est bonum, quod requiritur ad regulam; sic in proposito; omne bonum contrariatur malo, est falsa ista propositio, quia summum bonum caret contrario.

Contra. Bonum, & malum sunt opposita; ergo opposita habent principia, aliter idem erit principium boni, & mali; quod est contra Apost. ad Roman. 3. vbi dicitur, *Qui infert iram*. Glosa ibi sic. *Illius rei Deus ultor est, cuius auctor non est, id est iniquitatis, & mali*. Resp. disting. conf. vt sunt contrariè opposita, sicut dicitur bonum, & malum in actibus, & habitibus, conc. vt sunt priuatiuè opposita, qualiter visus, & cæcitas, neg. primo igitur modo respiciunt diuersa principia, non verò secundo modo. Immo primum bonum, nec priuatiuè, nec contrariè habet malum sibi oppositum, sed tantum contradictoriè quatenus summum bonum est negatio omnis mali.

Arg. 2. Probando quod saltem dentur duo principia, quorum vnum sit actiuum, alterum passiuum sic. Pati non potest competere principio actiuo secundum quod huiusmodi: sed pati non est sine principio secundum quod primum est passio, ergo erit aliud principium agendi in corporalibus; aliud principium patiendi primum; ergo duo saltem erunt principia nempe materia, & Deus &c.

Confirmatur, quia in materia est prima potentia passiva, sicut

sicut in Deo est prima potentia actiua : ergo si aliquid haberet principium , acciperet ab eo esse in potentia , ergo posset esse in potentia , cum non dum esset in potentia , ergo potentiam illam produceret alia potentia , & illa non esset nisi materialis , quia potentia respectu actus , quæ non dum est in actu , quoad hoc est materialis ; ergo materia præcederet materiam quod est impossibile .

Resp. neg. 1. seq. & ratio est , quia , licet agere , & pati sint opposita , & reducuntur ad actiuum , & passiuum primum in his , quæ fiunt , vel sunt ex materia ; attamen primum passiuum est à primo actiuo , qui non indiget materia ad creandum aliquid cum de nihilo producat .

Ad confirmationem dicitur , concedendo , materiam esse primam potentiam passiuam in suo genere , sicut Deus prima potentia actiua ; ex hoc tamen non sequitur , quod si haberet principium , esset in potentia antequàm esset potentia , non sequitur , inquam , quia esset in potentia obiectiua non autem in potentia subiectiua , de qua loquimur hic in ordine ad actus seu ad formas . Vnde non bene infertur , esset materia , antequàm esset materia ; potentia namque obiectiua non est materia , vt supponit argumentum .

Ex dictis pat. manifestè error impij Manichæi , qui posuit duo principia vnum bonorum , & alterum tenebrarum , & mali probans suam positionem per illud Ioan. 16. vbi dicit Christus , *Venit enim Princeps huius Mundi , & in me non habet quidquàm* . Vocatur enim Diabolus Princeps Mundi , idest viuentium carnaliter ; nec ob id sequitur , Diabolus est Princeps Mundi , ergo fecit Mundum &c. Pat. etiam error aliquorum Philosophorum ; primò Anaxagoræ , qui in quodam Chaos æterno posuit res quiescentes , & postea per intellectum immixtum , & impassibilem facta est segregatio , & separatatio rerum . 2. Empedoclis , qui posuit ab æterno mundum corrumpi , & generari ad modum hominis per litem , & amicitiam . 3. Error Democrati asserentis , res ab æterno inordinate , & confuse moueri , & postea casu acceptios est motus ordinatus . 4. Arist. docentis , materiam esse ingenitam , & incorruptibilem , vt subsisteret omni productioni , non videns alium modum producendi . Vnde est maxima , ex

nihilo, nihil fit. Et denique error Auicennæ ponentis vltimam intelligentiam creare, & gubernare hæc inferiora.

## QVÆSTIO II.

*Vtrum Deus possit aliquid creare ex nihilo.*

**N**ot. 1. Quod creatio est productio alicuius de non esse ad esse; istud autem non esse intelligitur tripliciter; primò vt dicit non esse simpliciter, & solùm priuationem formæ, quæ est altera pars compositi, & hoc modo generatio est productio de non esse ad esse: 2. vt non esse dicit priuationem solùm alicuius esse secundùm quid, & hoc modo alteratio, augmentatio, & loci mutatio, dicitur productio de non esse ad esse: 3. vt non esse simpliciter negat esse materiæ, & formæ, & hoc modo sola creatio est simpliciter productio de non esse ad esse, quia nihil supponit. Insuper hæc tria differunt inter se propriè loquendo, scilicet actio, creatio, & factio; actio enim est secundùm quam in id, quod subiicitur, agere dicimur; creatio nullum subiectum supponit, & ideò soli Deo competit, vt videbimus infra; factio autem dicit quid commune creationi, & actioni; vnde dicitur Gen. c. 1. dixit Deus, *Fiat, & factum est.*

Not. 2. Quod creatio in S. Scrip. solet capi quadrupliciter, primo modo dicitur creatio, vt dictum est de non esse simpliciter ad esse, & sic accipitur Gen. cap. 1. *In principio creauit Deus Cælum, & Terram.* 2. dicitur, creatio idem, ac ordinatio, & sic accipitur illud Isai. *Ego Dominus faciens pacem, & creans malum;* non enim Deus creat malum, sed ordinat malum ad bonum. 3. dicitur, creatio idem quod recreatio; vnde dicebat Dauid: *Cor mundum crea in me Deus,* & iuxtà illud: *Emitte spiritum tuum, & creabuntur.* 4. sumitur creatio pro omni eo, quod producit sine causa secunda, sic homo dicitur creatura.

Not. 3. Quod ly de nihilo secundum Anselmum in suo Monologio potest sumi tripliciter: primò materialiter, & sic omnes Philosophi asseruerunt, ex nihilo, tanquam ex subiecto nihil fieri. Nam impossibile est nihil esse materiam. 2. causaliter, & est sensus, nihil non potest esse

causa

causa alicuius ; nam quod non est , non potest agere &c. 3. dicitur ordinaliter , & est sensus , ex nihilo fieri aliquid , idest , post nihil aliquid fieri ; & isto modo concedit etiam Arist. & Auicenna in metaph. differenter tamen à Theologis , quia illi dicunt , non esse vniuersi solum præcedere esse eiusdem natura , & ratio eorum est , quia ponunt Deum agere modo naturali , & non libero . At Theologi tenent , vt docet S. Scrip. non esse vniuersi præcedere de facto nedum natura , sed etiam tempore saltem imaginario ; Deus enim agit ad extra liberè .

Ceterum dum dicitur , creationem fieri ex nihilo : ly ex nihilo non est intelligendum ; ita quod excludatur etiam esse cognitum , quod habent creaturæ in mente D. sed excluditur tantum esse essentia , & existentia , vt probat Scot. in 1. d. 36. contra Henricum .

Not. 4. Quod prioritas naturæ ex Scot. in 2. d. 1. q. 1. est duplex , nempe positiua , & negatiua ; positiua tunc est quando aliquid inest intrinsecè alicui , & eius entitas est prior entitate posterioris , vt animal est prius natura rationali in homine . Negatiua tunc est quando aliquid licet actu non insit illi , cui dicitur conuenire tamen quantum esset ex se inesset , nisi impediretur ; igitur ad propositum , ait Scot. quod creatura non habet ex se esse formaliter , nec habet non esse formaliter , sed quantum est in se haberet non esse , si causa extrinseca non tolleretur suum non esse ; vnde potius dicendum est , creaturam non habere esse ex se formaliter , quàm habere non esse ex se formaliter ; præcedit igitur ipsum esse , negatiuè , non positiuè .

Concl. Deus potest aliquid creare ex nihilo ; sumpto ly nihilo ordinaliter ; non autem si nihil accipiat , vt excludit esse cognitum creaturarum . Prima pars pat. quia de esse ad posse tenet consequentia ; sed Cælum , & terra , vt S. Scrip. testatur , sunt creata ; ergo si creauit potuit creare ; si potuit ergo potest , quia in Deo omnia sunt in actu perfectissimo . Prob. ratione ex Scot. in 2. d. 1. q. 1. Deus potest aliquid immediatè causare ; ergo potest immediatè creare : prob. ant. Constat , quod Deus est primum efficiens , vt omnes fatentur , ergo vel potest aliquid immediatè producere , vel non : Si non possit , ergo non erit primum efficiens , cum nequeat operari , alio sublato , &

circumscripto. Si possit, ergo producere potest aliquid nullo alio concurrente, ergo potest producere, aliquid ex nihilo.

Deinde. Illud, mediante quo Deus aliquid produceret, vel esset à Deo productum; vel non. Si non, ergo est ens à se independens, & æquè primum efficiens, ac ipse Deus, ac proinde essent duo Dij, quod est manifestè falsum. Si primum; illud, mediante quo hoc productum fieret, esset pariter productum immediatè, vel non. Si sit productum immediatè, habemus intentum. Si non; dabitur processus in infinitum, & sic nullum erit primum efficiens, quod est æquè falsum.

Præterea. Primum efficiens debet habere aliquam causalitatem sibi soli conuenientem, & nulli alteri communicabilem; alioquin ratio primi efficientis posset pluribus competere, & sic essent plura prima efficientia, quod non minus implicat quam pluralitas Deorum; sed nullam causalitatem propriam habere potest quàm creationem: ergo hæc soli Deo competit: min. pat. quia omne agens natura. le potest aliquid producere præsupposito subiecto; ergo ad hoc vt primum efficiens agat modo sibi proprio debet agere nullo præsupposito subiecto, quod est creare. 2. pars est manifesta. Nam quodlibet agens rationale, seu intellectuale ordinatè agens, prius cognoscit id, quod vult agere, & producere, quàm producat, sed Deus est agens perfectissimum, & infinitum, ergo &c.

i. Arg. cont. conc. quoad 1. part. In Deo non potest cadere mutatio aliqua; ergo Deus non potest aliquid de nouo creare. Prob. conf. Si Deus aliquid produceret, quod prius non producebat, aliter se haberet, quàm prius; at sic caderet in Deo mutatio; ergo &c.

Resp. conc. ant. & neg. conf. ad probationem dicitur disting. seq. Si produceret noua volitione, conc. si antiqua, & æterna neg. Agens namque infinitum voluntarium, quale est solus Deus, potest voluntate antiqua nouum affectum producere absque sui mutatione, facta mutatione tantum ex parte effectus producti. Siquidem ab æterno voluit Deus creare, quæ in tempore creat, sed non pro æterno.

- Contra. Idem manens idem semper natum est facere  
idem



idem ex Arist. 2. de generat ; ergo non erit aliqua variatio in effecta , nisi prius sit in causa .

Resp. Propositionem Arist. valere de Agente naturali ; non verò de libero , & voluntario . Verum quia hæc responsio non adæquatè soluit ; ideo disting. ant. Idem manens idem , tam intrinsecè , quam extrinsecè , conc. ant. Secus autem si sit variatio agentis extrinsecè per terminationem , & tendentiam in rem creatam : de qua re vide disp. de D. voluntate in p. 1. vbi latè traditur doctrina pro firmitate huius responsionis .

Arg. 2. Illud , quod creatur , prius habet possibilitatem ad esse , quàm producat in esse , sed ista possibilitas non est nihil , ergo ante creationem est aliquid , ergo creatio non est ex nihilo .

Resp. conc. mai. & disting. min. Ista possibilitas est alius entis preter esse cognitum , quod habent creature in intellectu D. nego ; est illud esse cognitum , in quo etiam fundatur possibilitas ad esse simpliciter conc. min.

Arg. 3. Tempus est sine principio , ergo mundus non fuit creatus de nouo . Prob. ant. quia si non ; ergo potuit prius tempus fuisse , quam fuerit , sed prius , & posterius sunt differentie temporis ; ergo &c.

Resp. neg. ant. ad prob. disting. seq. mai. Si ly prius sumatur pro differentia temporis realis , nego : Si sumatur pro differentia temporis imaginarij conc. Sicut dicitur extra Cælum nihil est , ly extra non dicit locum realem , sed imaginarium .

Arg. cont. 2. conc. Si creature producantur de esse cognito , ergo essent de aliquo , ex quo fierent ; sed hoc est falsum ergo &c. Resp. neg. seq. mai. tunc esset vera , quando diceretur , creaturas fieri de esse cognito , tanquam ex aliquo concurrente , vel vt forma ; vel vt materia , at dicimus fieri de esse cognito , hoc est post esse cognitum ; præsupponunt igitur esse cognitum , sed non fiunt ex eo ,





*Vtrum prima causalitas respectu omnium causabilium  
de necessitate sit in tribus Personis.*

**N**OT. 1. Quod in hac quæstione sunt duæ opiniones vna Henrici de Gandauo; altera Scoti in 2. d. 1. q. 1. Henricus quol. 6. q. 2. ponit in Deo duas rationes formales producendi creaturas, hoc est, sapientiam, qua illas cognoscit; & amorem, quo diligit easdem. Sed pro maiori intelligentia huius opinionis sciendum, Henricum docere, reperiri in Deo duplicem sapientiam, alteram simplicis intelligentiæ essentialem, & tribus communem, & hæc est purè speculatiua, qua Deus operando percipit creaturas, vt sunt talis, vel talis naturæ; alteram notionallem, qua Deus easdem attingit operando, simulquæ de eisdem disponit. Ex parte voluntatis ponit pariter duplicem amorem, unum simplicis dilectionis essentialis tribus communem per modum inefficacitatis; alterum amoris affectantis. Vnde concludit iste Doctor, quod Deus Pater in productione creaturarum, tam in esse existentiae ad extra, quam in esse essentiae ab æterno habet Filium, & Spiritum S. tanquàm rationes formales, per quas agat, & producat; Filium quidem per sapientiam pratice disponentem, & Spiritum S. velut per amorem veraciter affectantem: eius rationes afferentur inferius.

NOT. 2. Ex Scoto, quod omnia in Diuinis, tum essentialia, & notionalia ad intra, tum essentialia ad extra secundum actus præcisè immanentes sunt simul duratione indiuisibili, semper permanenti æternitatis, licet non simulrate naturæ, & originis, qui sunt alterius rationis, & in quocumque vnius ordinis potest totus alius ordo assignari. Exemplum est de creatura, ubi est ordo naturæ, ordo originis, & ordo durationis, qui sunt alterius, & alterius rationis. Accipiatur enim unum instans durationis in illo instanti possunt assignari omnia ordinata secundum originem, & naturam. Accipiatur etiam unum instans naturæ, in eo possunt assignari omnia ordinata secundum originem simpliciter: tamen in Diuinis ordo naturæ, prior est, ita quod simpliciter procedendo in primo instan-

instanti naturæ debet assignari totus ordo primus originis;  
& si in secundo instanti naturæ assignetur ordo originis,  
non est primus ordo, sed secundus; quod sic explicat ipse-  
met Doëtor.

Ordo naturæ accipitur comparando obiecta ad intelle-  
ctum, & voluntatem D. quia comparando essentiam  
suam ad intellectum, & voluntatem, quæ est primum  
obiectum intellectus sui, & voluntatis, est primum in-  
stans naturæ: & comparando alia obiecta, quæ sunt secun-  
daria ad intellectum, & voluntatem D. quæ non sunt ex  
se obiecta, sed producta per intellectum, & voluntatem  
in esse obiecti; & sic habetur secundum instans naturæ. In  
primo igitur instanti naturæ stando, in illo habetur Per-  
sona perfecta, habens memoriam perfectam Essentiæ D.  
idest habens intellectum, cui Essentia D. est præsens in ra-  
tione obiecti actu intelligibilis; & ista persona, ista me-  
moriam Essentiæ D. potest formaliter operari, & formaliter  
producere, ut idem Scot. docet in 1. d. 2. q. 3. & prius ali-  
quo modo intelligitur ista Persona in se perfecta, & verè  
beata in actu intellectus. Eadem etiam Persona producen-  
do ista memoria producit notitiam adæquatam huic obie-  
cto; & cum hoc obiectum sit infinitum producit Perso-  
nam infinitè perfectam, seu formaliter infinitam, & per  
se subsistentem. Illi autem Personæ communicatur volun-  
tas, ut actus primus, non habens adhuc terminum adæqua-  
tum productum; ista autem una voluntate Persona pri-  
ma, & secunda operantur circa Essentiam D. tanquam  
obiectum amando eam infinitè, & sic sunt in se perfectè,  
& verè beatæ in Essentia D. Præter hæc autem ista eadem  
voluntate una in eis, istæ Personæ producant amorem  
infinitum, & ita spirant Personam D. idest Spiritum S.  
quia nihil est formaliter infinitum, nisi quod per identita-  
tem est Deus. Stando igitur precisè in primo instanti na-  
turæ comparando Essentiam D. ad intellectum, & volun-  
tatem habetur totus ordo originis primas. Sequitur se-  
cundum instans naturæ, in quo comparatur intellectus  
& voluntas D. ad aliud obiectum secundarium; & quia in  
illo instanti obiectum illud non est ex se actu intelligibi-  
le, sed fit actu intelligibile per intellectum; idè non ha-  
bet esse in memoria D. ut memoria est, sed producitur actu  
intel-

Intelligentiæ in tali esse obiecti: sicut in nobis intentiones secundæ producuntur per intellectum, & non sunt in memoria ut memoria est; & siue poneretur, quod haberent esse per memoriam, siue quod producerentur per intelligentiam in esse cognito, saltem prius natura, quam habeant esse in memoria, vel intelligentia est in istis tribus Personis, erit ratio producendi ista in esse. Et hac doctrina Scotus probat non solum primam causalitatem esse in tribus Personis, sed etiam Verbum non produci de cognitione creaturarum, unde subiungit Doctor. Non igitur Verbum prima productione producitur de lapide ut est in memoria Patris; quia vel lapis non habet esse in memoria Patris, ut memoria est principium producendi Verbum; vel si habet esse in memoria; non tamen prius naturaliter, quam intelligatur ipsa in tribus; & concludit, quod prima causalitas creaturarum tam in esse cognito, quam in esse reali necessario est in tribus Personis D.

Pergit Doctor. In secundò tamen instanti naturæ potest assignari quidam ordo originis, quia prius origine Pater intelligit lapidem, quam Filius, quia Pater intelligit à se, Filius non à se, sed hoc habet à Patre, & Spiritus S. à Patre, & Filio. Sed iste secundus ordo originis non est origination simpliciter, qua videlicet Personæ D. producuntur in esse D. naturæ simpliciter, sed est quasi origination secundum quid, siue consequens Personas iam productas. Exemplum huius in creaturis. Si sit origo Socratis à Platone per se secundum humanitatem; ordo originis in istis, in habendo humanitatem est primus ordo originis simpliciter; ordo autem eorum in habendo risibilitatem est alius ordo originis, quasi secundum quid, quia sicut in primo instanti naturæ Socrates habet humanitatem à Platone; ita in secundò habet risibilitatem ab eo; & si prius ambo haberent naturaliter humanitatem, quam risibilitas produceretur, ambo causarent simul risibilitatem, & tamen quod hoc causarent, unus haberet ab alio; ita in proposito ablata quacumque imperfectione discurrendum est in Diuinis.

Not. 2. Quod ly de necessitate, seu necessario positum in quæst. potest intelligi tripliciter. 1. necessitate causæ, ita quod causa in causando indigeat alia concausa ad hoc;

ut sit

ut sit principium sufficiens aliquid producendi. 2. necessitate effectus; ita ut effectus necessario exigit concursum alterius, & alterius causæ. 3. necessitate exigentiæ, & concomitantæ, quatenus causa conueniat in eadem causalitate cum primo præexacto principio, vel causa conuenienti. Non est primo modo prima causalitas in tribus, quia Filius, & Spiritus S. non perficiunt causalitatem à se, & in se, ut docet Doctor quol. 8. §. ad 3. probationem, & eam communicat Filio, & Pater, & Filius Spiritui S. Nec 2. modo, quia ut dicitur in sequenti quæst. Si unica tantum Persona per impossibile esset, adhuc in ea esset tota ratio principij producendi creaturas. Remanet igitur, quod sit tertio modo, quia enim priusquam creatura producat, communicatur sibi eadem natura cum Patre, & per consequens eadem vis actiua respectu cuiuscunque posterioris; sequitur, quod Filius tanquam conueniens in eadem causalitate cum Patre, præexigatur ad productionem creaturæ. Qua doctrina soluuntur, & explicantur huiusmodi auctoritates S. Scrip. nempe. *Verbo Domini Cæli firmati sunt. Omnia per ipsum facta sunt. Per quem fecit, & facta sūt.* &c. dicendo, quod ly (per) non dicit causam formalem, nec instrumentalem, nec causalitatem perficientem, sed præactionem Verbi conuenientis in eadem natura, & causalitate cum primo præexacto; hoc est cum Patre.

I. Concl. Vna Persona non est ratio formalis creandi alteri, neque una Persona per alteram, tanquam per rationem causandi vel disponendi. Est contra Henricum; & sic à Scot. prob. Hihil formaliter agit, quod non est in actu secundum illud, quod est proxima ratio agendi, quia agens debet esse prius in actu primo per rationem formalem agendi, quam agat; sed Pater non est in actu primo per Verbum, & Spiritum S. ergo &c.

Præterea. Dum Henricus dicit, Verbum esse dispositiuam notitiam, & Spiritum S. amorem affectantem, vel per sapientiam dispositiuam &c. intelligit quid proprium; vel quid appropriatum. Si primum; ergo daretur aliquis respectus proprius alicui Personæ qui alteri non competeret, quod est inconueniens, & improbatur à Doct. in 1. d. 18. Si secundum; ergo erit commune tribus; ergo falsa est positio Henrici. Quare D. Aug. 7. de Trin. docet, quod

14  
quod Pater non est sapiens sapientia genita; ac proinde sequitur, quod Verbum non est ratio Patri agendi, nec Spiritus S. ut amor affectans.

II. Concl. Prima causalitas producendi creaturas tam in esse cognito, seu secundum quid, tam in esse realis existentiae, seu simpliciter, de necessitate competit immediate tribus Personis D. Est Scoti in 2. d. 1. q. 1. & prob. ab eodem Doctore sic. Principium duarum productionum, scilicet necessariae, & contingentis prius producit necessaria, quam contingentia; non enim potest effectus necessarius praesupponere contingentem, sed bene est contra; at aliquid in Diuinis est principium productionis intrinsecae, quae est necessaria, & productionis extrinsecae, quae est contingens: ergo prius necessario est in Deo aliquod principium productionis, necessariae, & ad intra, quam contingentis, & ad extra. Sed in illo priori, completa productione ad intra, communicatur tribus Personis omnis fecunditas, quae eis non repugnat, & per consequens principium productionis ad extra, ergo in illo instanti, in quo est proximum principium in Deo ad producendum contingens ad extra, illud communicatur tribus. Item prius naturaliter est primum obiectum praesens potentiae respicienti tale obiectum, ut primum, quam obiectum secundarium sit praesens, & hoc maxime verum est, quando solum obiectum primum ex natura rei, & ex se est obiectum primum; & secundarium non est huiusmodi; sed sit per actum potentiae in tali esse; sed intellectus D. habens essentiam, ut obiectum sibi praesens, non tantum est potentia operatiua circa illud, sed etiam productiua notitiae adaequatae, & sic pariter voluntas D. prius ergo naturaliter, quam intellectus, & voluntas habeant, vel respiciant aliquod aliud obiectum secundarium, habetur completa ratio productionis Personarum D. idque antequam producantur tam in esse secundum quid, quam in esse simpliciter.

Præterea prob. 3. Habitudo naturae ad suppositum prior est habitudine eius ad actum secundum; quia agere praesupponit esse, & habitudo ad suppositum est essentialis, & inquit; illa autem, quae est ad agere non videtur essentialis, ergo natura Diuina prius est principium productionis

ductionum Personarum, quàm creaturarum; ergo &c.

Prob. vltimo auctoritate Conciliorum. In Lateranensi cap. firmiter de sum. Trin. habetur quod *Tres Personae sunt consubstantiales, omnipotentes, vniuersorum principium, & creaturarum omnium visibilibus, & inuisibilibus; & in Tolet. Nulla sine alia existit, nec quicquid operatur.* Accedit etiam auct. D. Aug. 5. de Trin. cap. 14. dicentis, *Quod sicut Pater, & Filius ad Spiritum S. sunt vnum principium, sic omnes res sunt vnum principium creatura ad ipsam producendam.*

Arg. Henricus cont. 1. conc. Sicut se habet forma naturalis ad producendum effectum suum naturaliter; sic forma intellectualis, & volitio concommitans ipsam, ad producendum effectum intelligibiliter, & artificialiter: sed forma naturalis non est immediatum principium operis secundum quod est perfectio eius, in quo est, sed solum inquantum inducit respectum ad opus; & sapientia intellectualis essentialis, & amor essentialis non induunt istum respectum, nisi ut sunt in Verbo, & amore producto: ergo Verbum, & amor productus in quocunque artifice sunt immediatum principium operandi artificialiter.

Rep. Transeat mai. & neg. min. Ratio est, quia in sententia Scoti forma etiam naturalis non est principium producendi aliquid per respectum, sed per suam absolutam entitatem, etsi posterius sit aliquis respectus ad effectum.

Arg. 2. Sapientia speculatiua, & amor sibi correspondens non sunt immediatum principium operandi, ergo sapientia practica, & amor sibi correspondens; Idque patet in artifice rationali; nam notitia vniuersalis, qua considerat operabile in vniuersali, & secundum sua principia communia non est sibi ratio operandi, sed bene notitia quædam particularis accepta de vniuersali; sic pariter de sapientia D. est discurrendum; notitia autem quodammodo particularis, & practica; & similiter amor, sunt Verbum, & Spiritus S. ergo &c.

Resp. neg. ant. eo quia ad operationem, seu creationem non requiritur aliud, quàm ipsa cognitio, & potentia productiua, quæ est D. voluntas volens ab æterno producere in tempore creaturam; vnde cognitio creaturarum possibilium sit quodammodo practica, accedente decreto



D. voluntatis ; ut alibi ostensum est . Neque exemplum allatum de artifice naturali est verum ; falsum siquidem est notitiam particularem deductam ex vniuersali , quæ est speculatiua , esse practicam cum particulare sequatur naturam sui vniuersalis , ut probat Doctor . quol. 8. §. ad ista .

Arg. 3. ex D. Paulo 1. ad Corint. cap. 2. vbi ait . *Prædicamus Dei virtutem , & sapientiam Dei* . Item multi Sancti PP. dixerunt Verbum in creatione fuisse sapientiam Patris , vt Iustinus Martyr ; ergo habet rationem formalem dispositionis , & practicæ operationis .

Resp. ad supradictas auctoritates , & ad consimiles loqui Sanctos PP. non propriè , sed appropriatè , vel sub auctoritatiuè ; quo sensu loquitur etiam Apost. .

Arg. 1. cont. 2. conc. probando , quod Pater solus producat creaturas in esse cognito ; sic ; Pater prius origine cognoscit lapidem , quàm Filius , ergo Pater prius producit lapidem in esse cognito , quàm Filius , ergo Filius non producit , nec Spiritus Sanctus .

Resp. conc. ant. & neg. conf. quia non sequitur Pater prius origine &c. ergo prius producit ; sed solum sequitur , ergo prius origine : quod prius origine nihil aliud est , quàm Patrem producere à se , Filium à Patre , non quidem in diuerso , sed in eodem instanti naturæ . Vel resp. quod mutatur signum à quo in signum in quo , & redit in idem .

Arg. 2. cont. 2. partem conc. nempe , quod prima causalitas ad extra non sit in tribus de necessitate . Productio contingens , non necessariò præsupponit productionem necessariam ; ergo de necessitate non est in tribus .

Prob. ant. ex Scoto dicente , quod si per impossibile non esset aliqua productio ad intrà , adhuc tamen esset , vel posset esse productio ad extra , ergo &c. .

Resp. neg. ant. ad prob. dicitur , quod Scotus non loquitur absolutè , sed dicit , quando duæ sunt emanationes , quarum altera sit necessaria , & altera contingens , contingens de necessitate supponit necessariam , si autem esset tantum vna , tum non esset iste essentialis ordo ; de quo in quæst. seq. .

Arg. 3. Omnis perfectio essentialis in Diuinis est prior proprietate suppositali per Scot. in 1. d. 1. q. 2. vbi arguit  
contra



contra Henricum; idem in 1. d. 7. & quol. 1. docet, quod licet agere præsupponat esse, non tamen præsupponit rationem suppositi, sed potentia, seu virtus productiua ad extra est perfectio essentialis, ergo &c.


Resp. disting. mai. Omnis perfectio essentialis est prior &c. absolutè, hoc est sine respectu ad extra, conc. cum respectu ad extra, neg. mai. Iam modo potentia, absolutè sumpta, prius est in Diuinis proprietate suppositali; ac considerata, prout respicit creaturam, secundum hunc respectum est posterior proprietate suppositali.

Cæterum Scoti auctoritas allata non est ad rem. Siquidem Doct. loc. cit. loquitur de Patre, producente Filium, quæ productio non præsupponit esse Patris in esse Patris; cum per generationem Pater constituatur in esse Patris, seu suppositi.

Arg. 4. Actio est suppositi, ergo plurium suppositorum, plures sunt actiones, ergo actio Patris non est in Filio.

Resp. conc. ant. & disting. cons. Si ad multiplicationem suppositorum multiplicentur principia formalia agendi, conc. consequ. si non multiplicentur, vt se habet in proposito; neg. cons.

Arg. 5. Sicut se habet principium operationis ad principium ipsum; ita operatio ad operationem; quemadmodum enim intellectus est principium prius principio volito; sic intellectio est prior volitione, sed principium operationis est aliquod essentialis, & essentialis est prius naturali, ergo, & actio creandi est prior actionibus ad intra; ac proinde principium creandi de necessitate non est in tribus. Resp. mai. esse veram, quando non exigitur aliquod aliud præter principium ad operandum. At in proposito ultra principium exigitur productio Personarum; rationem dat Scot. Quia illud, quod est principium ordinatum, non intelligitur esse in potentia proxima ad actum remotum, nisi vt est sub actu priori, seu proximo.



*Verum si per impossibile in Diuinis daretur tantum  
unica Persona, illa posset producere  
creaturas ad extra.*

**N**ot. Quod Henricus contendens, Verbum, & Spiritum S. esse rationes formales Patri producendi; consequenter sustinere debet, quod si esset vnica tantum Persona, non posset creare; quia caderet ratio formalis ad creandum. Nos verò; sicut cum Scoto dicimus, Filium, & Spiritum S. non esse Patri rationes formales creandi; ita asserimus; quòd, si per impossibile non esset, nisi vna Persona tantum; illa posset producere creaturas, & agere ad extra: sit igitur.

Concl. Si per impossibile esset tantum vnica Persona in Diuinis, esset in ea perfecta causalitas respectu omnium creaturarum. Prob. sic à Scot. in 2. d. 1. q. 1. art. 3. Quando comparatur causa ad duos effectus ordinatos essentialiter est eius comparatio ad effectum vtrunque, quam vnus effectus ad alterum; propter dependentiam enim eorum ad causam eandem, ordinatè dependent ad inuicem, & non è conuersò; propter dependentiam vnus ad alterum dependent ordinatè ad causam eandem, ergo, si per impossibile destruat ibi ordo effectuum inter se ordinatorum, non propter hoc est negandus ordo, & dependentia vtriusque ad causam; quia propter minus impossibile non est concedendum maius impossibile, nec per minus necessarium est negandum maius necessarium, e. g. si ponatur ignem habere istos duos effectus ordinatos, scilicet calefacere, & ignire. Si essentialius se habeat ignis ad vtrunque, tam ad calefacere, quam ad ignire, quamuis ignere supponat calefacere, si ponatur, ignem per impossibile non posse calefacere, non propter hoc negandum est ipsum non posse ignire: sed in proposito sic se habet, quia in Deo reperitur perfectum principium productionis ad intra, & ad extra habentium ordinem magis necessarium fortassè ad causam, quam alterius ad alterum; ergo, si per impossibile ponatur, Deum non habere productionem ad intra, adhuc pos-

huc posset habere productionem ad extra, vt testatur etiam Ricard. lib. 3. de Trin. c. 16. vbi ait, *Quod si tantum esset una persona adhuc esset in ea plenitudo sapientia, & potentia, atque posset una producere omne possibile.*

Arg. 1. cont. conc. Quicquid in Diuinis ad intra reperitur, est summè necessarium; sed producere ad extra præsupponit productionem ad intra; ergo necessariò illam præsupponit, ac proinde ablata productione ad intra per impossibile; non posset esse productio ad extra.

Resp. conc. mai. & disting. min. Sed producere ad extra &c. materialiter concedo, formaliter nego min. Non enim productio ad intra est causa productionis ad extra, sed quia defacto datur talis ordo.

Contra: de facto ante productionem Filij, & Spiritus S. in Patre non est ratio proxima producendi creaturas, ergo rationem proximam producendi creaturas recipit per ipsas productiones; ergo &c. Resp. disting. ant. ratione defectus principij, nego; ratione talis ordinis defacto existentis, concedo &c. & sic respondetur ad alias rationes, & auctoritates.

Contra. Scotus in hac quæst. dicit, quòd de necessitate prima causalitas est in tribus, ergo nulla responsio.

Resp. disting. ant. de necessitate, ita quòd perficiatur aliquo modo principium productiuum, nego, de necessitate præexigentia, & concausæ, quia defacto datur talis ordo, conc. ant.

## QVÆSTIO V.

*Vtrum Solius Dei sit creare, vel etiam aliqua creatura possit creare.*

**N**Ot. ex Scoto in 4. d. 1. q. 1. contra Henricum, quòd ad creationem non requiritur virtus infinita simpliciter ex eo, quòd inter ens, & non ens sit distantia infinita, vt dicit etiam D. Thomas; quare docet Doctor noster contra Thomistas, quòd quando extrema contradictionis sunt immediata, tanta præcisè est eorum distantia, quantum alterum extremum est maius suo contradictorio. Vnde, cum ens finitum excedat non ens tantum finitè, tanta

erit distantia inter ens, & non ens, seu nihil, quantum est ens. Distantia ergo inter Deum, & non ens, cum sit ille infinitus, erit infinita; distantia verò inter creaturam, cum sit finita, & inter non ens, erit finita. Priuationes enim, & negationes mensurantur per ea, quorum sunt priuationes, & negationes. Nequè requiritur virtus infinita ex parte ipsius nihil præcisè, quia maior resistentia inuenitur in contrario, & in positiuo, quàm in nihilo. Requiritur ergo virtus infinita in suo genere, hoc est ex independentia à subiecto, & à quocumque alio extrinseco causandi genere materiali, vel formali præsupposito.

Concl. Est fidei dogma; nullam creaturam propria virtute posse creare. Prob. 1. ex Sanctis Patribus. D. Aug. lib. 9. super Genes. c. 22. sic habet. *Angeli nullam omninò possunt creare naturam*; & D. Damas. cap. 18. ait. *Qui dicunt, Angelos esse creatores alicuius naturæ, sunt omninò Filij Patris Diaboli*. Insuper probatur ex S. Scrip. nam Ecclesiast. cap. 1. dicitur. *Vnus est altissimus creator omnipo. ens*. Eandem veritatem tradunt Sacra Concilia, ergo &c.

Prob. ratione. Nulla virtus dependens, & finita potest attingere terminum creationis; ergo nulla creatura potest creare: prob. ant. Quia nulla virtus finita potest aliquid de nihilo, & absque subiecto aliquid producere; vt infra apertè ostenderetur, ergo nulla creatura potest attingere terminum creationis.

Arg. cont. conc. Perfectum est, quod potest sibi simile facere ex Arist. sed creaturæ immateriales sunt creaturis materialibus perfectiones; ergo si creatura materialis potest producere sibi simile, & immaterialis; subsumo minorem, sed hoc non potest nisi per creationem, cum non habeant materiam, ex qua fiat, ergo &c.

Resp. Propositionem Arist. valere in ijs, quibus non repugnat productio alterius in eadem natura; vel saltem habent quicquid exigitur ad positionem alterius; licet absolute non producat; homo enim non producit hominem, absolute, cum non producat Animam rationalem; sed dispositiue, & agit subiecto præsupposito, quod non reperitur in Angelis.

Arg. 2. Virtus facientis consideratur secundum mensuram eius, quod fit: sed quod fit est finitum, ergo creatura potest


potest sua virtute ponere in esse aliquid per creationem; cum nihil aliud requiratur inter causam, & effectum, nisi virtus commensurata.

Resp. conc. mai. & min. & negatur cons. Quia in minore non ponitur omne id, quod requiritur ad hoc vt creatura possit creare: concedimus quidem ex parte finitatis, negamus tamen ex parte subiecti; quod præsupponitur ad actionem agentis creati, & finiti. Vel resp. transeat maior; & disting. min. quod fit est finitum, quoad entitatem, conc. quoad modum, quo fit, nempe creatione: neg. min. modus namque creationis actiue non est finitus, sed infinitus.

Arg. 3. Quantò maior est resistentia ex parte facti, tantò maior virtus requiritur in faciente, sed maior resistentia reperitur ex parte contrarij, quàm nihili, ergo, cum creatura ex contrario aliquid producat, poterit etiam ex nihilo producere. Resp. Quòd in argumento assignatur non causa pro causa; non enim asserimus creaturam non posse creare ratione maioris, vel minoris resistentiæ; sed ex eo quod in agendo necessariò dependet à subiecto; quo non præsupposito, nihil potest producere.

Arg. 4. In cuius potestate est annihilare, est etiam creare, vt docuit Scot. in 4. sed agens naturale annihilat destruendo totaliter formam, ergo potest etiam creare.

Resp. ex Scot. neg. min. Etenim Scot. in respons. ad 4. ait, quod solius Dei est creare, & annihilare, quia annihilare non est agere positiuè, sed non agere, idest non conseruare, & breuiter subdit Doctor. Sicut quælibet creatura requirit causam concausantem in fieri, idest principium potentiale, ita super illud non potest destruendo; sicut nec producendo, & per consequens necessariò aliquid relinquit; sicut necessariò præsupponit. Sicut autem creatio propriè dicta est productio de nihilo, idest non de aliquo, quod sit pars primi producti, & receptium formæ inductæ; ita annihilatio est destructio in nihilum vtroque modo.



*Utrum creatura per absolutam Dei potentiam possit  
ut causa principalis, cum dependentia tamen  
à Prima, aliquid creare.*

**N**Ot. 1. Quodd pro intelligentiâ præsentis quæst. reco-  
lenda sunt tradita in Philosophia, nempe, quid sit  
potentia Dei absoluta; quid ordinaria; quid sit causa prin-  
cipalis, quæ condistinguitur ab instrumentali ex eo, quodd  
habeat formam, & virtutem in esse quieto, per quam at-  
tingere potest effectum, nempe sua virtute illum produ-  
cendo. Et insuper, quodd omnes creaturæ sunt in perfe-  
ctissima potentia obedientiali respectu Dei. Vnde potest  
Deus illas eleuare tam actiue, quam passiue ad omne id,  
ad quod habent proportionem, vel saltem potentiam re-  
motam, & inchoatam, & non dicit contradictionem; vt  
etiam in disp. de vis. beatif. dictum est.

Not. 2. Quod in hac quæst. tres afferuntur sententiæ.  
Prima asserit, quodd; licet de facto nulli creaturæ commu-  
nicata sit virtus creatiua; tamen non apparet ratio con-  
uincens, cur id repugnet: ita Durand. in 2. d. 1. q. 4. Ga-  
briel ibidem, Malonius disp. 1. cap. 5. Arriaga disp. 11.  
Phyf. sect. 5. 2. ex opposito, docet, nullam creaturam pos-  
se creare, seu eleuari ad creandum, nec per modum causæ  
principalis, nec instrumentalis: ita Scot. in 4. d. 1. q. 1. &  
videtur communis etiam extra nostram scholam. 3. tan-  
dem ponit, quodd, estò creaturæ repugnet esse causa prin-  
cipalis creationis, non tamen esse causa instrumentalis:  
ita D. Thom. & Thomistæ, de qua opinione erit examen  
in quæst. sequenti; ponitur igitur in hac quæstione resolu-  
tio quoad causam principalem; vnde sit.

Concl. Creatura, nec etiam per absolutam Dei poten-  
tiam potest vt causa principalis creare cum dependentia  
à prima. Hæc conc. ita communiter, & apertè traditur à  
Sanctis Patribus, vt videatur esse de fide. Siquidem D.  
Athanas. ser. 3. contra Arianos: *Solius Dei, inquit, est conde-  
re & creare, eiusque Verbo, & sapientia.* Cyrillus pariter con-  
tra Arianos lib. 2. Thesi 2. pronunciauit. *Virtutem creati-*



*nam suscipere creatura non potest*; & alij, quos apud Doctores modernos videre licet,

Prob. ratione. In causis præcisis, & adæquatis alicuius effectus, sicut affirmatio est causa affirmationis, ita negatio est causa negationis. Post. 1. sed causa præcisa, & adæquata, cur agens creatum agit dependenter à subiecto non est nisi finitas, & limitatio, ratione cuius non valet eminenter continere causalitatem subiecti: ergo causa pariter præcisa, & adæquata, cur agens in creatum independenter agit à subiecto, erit infinitas eminenter continens causalitatem subiecti, ergo virtus infinita requiritur ad creandum per modum causæ principalis; sed ea virtus nequit à Deo communicari creaturis: ergo &c.

Prob. 2. Creatio passiva non est influxus à creatura distinctus, ut docent passim Doctores, & ex parte creaturæ importat relationem dependentiæ essentialis ad Deum, sibi realiter identificatam ex Scot. in 2. d. 1. q. 4. sed fieri non potest, ut relatio respiciens essentialiter vnum terminum, alium terminum respiciat, ergo non potest relatio creationis passivæ importare dependentiam essentialem, nisi à solo Deo, & non etiam à creatura; at, si creatura creare posset, variaretur relatio essentialis, quia variaretur terminus, ac proinde creatura, nec per potentiam Dei absolutam potest creare &c.

Confirmatur. Quia in genere causæ efficientis non datur essentialis dependentia in creatura nisi in ordine ad causam primam: ergo implicat vnam creaturam dicere dependentiam essentialem ab alia creatura, ergo creatura per absolutam Dei potentiam non potest ut causa principalis creare.

Prob. 3. Omnis creatura, vel est spiritualis, vel materialis, vel merè intellectualis; sed neutra istarum potest creare, ergo &c. mai. pat. ex sufficienti diuisione: min. prob. de creatura merè spirituali, qualis est Angelus; hic enim non potest agere, nisi per intellectum, & voluntatem: sed actibus intellectus, & voluntatis non potest producere substantiam, neque accidens: non substantiam, quia accidens non potest in substantiam, ac proinde actus voluntatis, cum sit accidens, nequit substantiam producere; non accidens, quia hoc exigit ex sui natura subiectum



in quo, & ex quo, ergo &c. Vnde si non possunt Angeli, tantò minùs natura inferior, cum magis dependeat in omnibus à subiecto.

Arg. 1. contra conc. Effectus non adæquans virtutem, superioris agentis potest ab agente inferiori, saltèm, vt à Deo eleuato produci: sed nullus effectus adæquat virtutem Dei, ergo quilibet effectus potest produci per agens creatum, ergo agens creatum potest creare.

Resp. conc. mai. & disting. min. Nullus effectus adæquat secundum entitatem conc. secundum modum, secundum quem creatur nego. Vnde duplex est adæquatio, seu proportio effectus ad causam, vna quoad entitatem, altera quoad modum faciendi; estò igitur prior non adæquet potentiam infinitam Dei, adæquat tamen secunda, cum ad illum creandum requiratur virtus infinita.

Contra. Si responsio esset vera, ergo effectus nobilior non ostenderet perfectius virtutem Dei: sed hoc est falsum, ergo &c. Resp. Quod non ostenderet, quoad modum creandi, ostenderet tamen quoad entitatem nobilitatem.

Arg. 2. Angelus est independens à materia, ergo potest agere independenter ab eadem, ergo potest creare. Prob. conf. per illam regulam. Sicut se habet res ad esse, ita ad operari, sed Angelus, quo ad suum esse est independens à materia, ergo, & quo ad suum operari.

Resp. conc. ant. & neg. conf. ad prob. dicitur, quòd in proposito sic est intelligenda regula, sicut, Angelus est immaterialis, ita etiam eius operatio est immaterialis; non autem, quia non est compositus ex materia, ergo potest producere aliquid sine materia, cum non habeat quomodo possit sine materia dare esse alicui creature à se distincte.

Arg. 3. In creatura est potentia obedientialis ad recipiendum aliquam formam supernaturalem, qua mediante potest efficere id, quod excedit suas vires naturales; ergo poterit per absolutam Dei potentiam eleuari ad creandum, quod excedit vires naturæ ipsius.

Resp. neg. conf. Dispar enim est ratio de receptione formæ supernaturalis, quæ pertinet ad potentiam obedientialem passiuam, & de actione creatiua, quæ pertinet ad potentiam obedientialem actiuam, quia potentia passiuam  
à toto

à toto genere, nullam dicit perfectionem, vt tradit Scot. in 3. d. 14. q. 2. in fine; at potentia actiua obedientialis, estò possit aliquid efficere, ad quod habet saltem potentiam remotam, seu inchoatam, non tamen quodlibet, & maxime creare, cum hoc, vt dictum est, exigit independen-  
tiam, & infinitatem, quæ nulla ratione creaturæ compe-  
tere possunt.

Contra. Creatura ex concessis eleuari potest ad actus supernaturales, qui sunt ordinis superioris, ergo, & ad actus creationis, qui sunt ordinis naturalis, ac proinde inferioris; quia quicquid creatur pertinet ad ordinem naturæ. Prob. conf. Nobilior est ordo supernaturalis, quam ordo naturalis, ergo si potest eleuari creatura ad actus supernaturales à fortiori ad actus ordinis naturæ, excedentes tamen vires creaturæ.

Resp. conc. ant. & neg. conf. Ad probat. conc. ant. & neg. conf. Ratio est, quia virtus creatiua est attributum, supernaturale, soli Deo competens, & terminatiue tantum, seu passiuè est in ordine naturæ, quatenus creaturæ, quæ sunt termini creationis, sunt ordinis naturalis.

## QVÆSTIO VII.

*Utrum creatura possit concurrere ad creationem, vt instrumentum Diuinæ Potentiæ.*

**N**Ot. 1. Quòd causa instrumentalis sumitur multipli-  
citer; aliquando pro omni eo, quod in operando ab alio dependet; & sic omnis causa secunda dicitur instrumentalis, quia in operando dependet à Deo. Aliquando pro parte alicuius totius, qua mediante totum dicitur agere, & sic potentiæ animæ, seu partes animalium, & organa sensuum dicuntur instrumenta animæ. Aliquando sumitur pro omni eo, quod inseruit principali agenti ad producendum, terminum, ab ipso intentum, & de hoc quæritur in quæst. quod est triplex, scilicet Naturale, Artificiale, & Morale. Naturale est, quod inseruit, principali agenti in ordine ad aliquem effectum producendum naturaliter, cui ex propria natura proportionatur, & in hoc sensu calor dicitur instrumentum ignis ad producendum

dum ignem. Artificiale est, quod inseruit principali agenti, non per virtutem actiuam, sibi inexistentem intrinsecè, sed per virtutem quandam acceptam ab agente principali in actuali factione, siue productione termini, ab eodem agente intenti; & sic ferra, gladius &c. sunt instrumentum artificiale. Morale est, quod inseruit agenti principali ad aliquem effectum producendum, non per aliquam actionem; seu virtutem physicam; sed per liberam electionem, seu institutionem, & determinationem agentis liberi; sic meritum, præces; sic materia, & forma Sacramentorum, aut aliquod aliud simile dicuntur instrumentum morale; quo sensu à Scoto dicuntur Sacramenta causa moralis; & gratiam causare.

Not. 2. Quod causa vt sic diuiditur in causam physicam, & moralem, ac proinde in causa morali includitur propria ratio causæ, Vnde, sicut in causis physicis datur causa principalis, & instrumentalis, & vtraque habet aliquam causalitatem; ita suo modo in moralibus datur causa principalis, & instrumentalis. Causa igitur principalis meritoria, vt ad præsens spectat, est passio Christi, prout docuit D. Ambros. & determinat Concil. Trid. sess. 6. c. 7. Causa verò instrumentalis est Sacramentum, seu illa actio Sacramentalis; in qua debet reperiri aliqua bonitas, & honestas, ratione cuius habeat saltem rationem remotam, & incompletam, & compleatur per eleuationem causæ principalis; & hoc patet, quia causalitas moralis consistit in aliqua bonitate morali. Quare omnis sacramentalis actio, vt sit valida, debet ex Christi institutione habere obiectum honestum, & bonum, propter cuius honestatem, & bonitatem saltem implicite, & virtualiter fieri debet; vt in p. 4. dicitur; & talis actio est ordinata ad sanctificationem subiecti: vnde in hoc sensu nequit à malo Ministro vitari huiusmodi actio sacramentalis, dummodò habeat intentionem faciendi, quod facit Ecclesia. Itaque Sacramenta sunt instrumenta, in ordine ad causandam gratiam; & habent etiam rationem medij, in ordine ad finem, ad quem sunt instituta; medium autem participat de honestate, & bonitate finis, ad quem ordinatur, vt traditur in tract. de actibus humanis, ac proinde habetur obiectum bonum actionis instrumentalis, idest finis, à Christo instituti.

Not,

Not. 3. Quod Sacramenta dici possunt instrumenta, tum Dei, tum Christi: Christi quidem quatenus ab eius institutione auctoritatem acceperant, & vim mouendi Deum; dicuntur instrumenta Dei, quia Deus ipse est agens principale, qui prius mouet humanitatem Christi, ad hoc vt his Ministris, his actionibus suam auctoritatem communicaret, & virtutem. Dicuntur etiam Dei instrumenta, quatenus habent infallibilitatem à Deo in causando, esto à voluntate Christi habeant auctoritatem, & vim ad Deum mouendum, quatenus voluit, illas esse actiones suas; posset enim Deus illis positis non dare gratiam. Vnde sunt etiam instrumenta apud Deum ad ponendum infallibiliter gratiam.

I. Conc. Nulla creatura per absolutam Dei potentiam potest esse instrumentum physicum, & actiuum, aut propria virtute, vel sibi à Deo communicata, ita vt attingat dispositionem præuiam, vel terminum ipsum creationis; hæc est Scoti in 4. d. 1. q. 4. contra Thomistas asserentes, posse Deum communicare aliquam virtutem creaturæ, vt tanquam instrumentum Dei agat, & hoc modo dicunt Sacramenta physicè concurrere ad gratiam causandam.

Prob. ex Scoto vnica ratione sic. Quia si ageret instrumentaliter, vel vt præuia dispositio, vel vt attingens terminum, non primum, quia in creatione nulla requiritur dispositio ad terminum producendum, cum nihil supponatur; non secundum, quia nequit agere, nisi vt habet aliquam virtutem actiuam, à qua, vt à causa procedit effectus; terminus autem principalis, non solum procedit à causa principali effectiue; sed etiam à causa instrumentali, quæ est effectiua: sed nulla virtus talis potest communicari creaturæ, ergo &c.

Prob. min. Quia talis virtus, vel esset innata; at ista nequit attingere terminum creationis, vt dictum est de voluntate Angeli, de potentia obedientiali, & de forma substantiali; vel esset assistens extrinsecè, sed non hoc; quia illa assistentia, vel se habet per modum applicantis, & dirrigentis, vel per modum concurrentis; aliter enim nequit intelligi mera assistentia, sed vterque modus supponit virtutem actiuam in instrumento, quia applicatio, & directio connotant virtutem actiuam, sicut & concursus.

Vel de-

Vel denique illa virtus esset recepta in instrumento, & sic habet modum accidentis, & dependentis à subiecto, ac per consequens supponit subiectum in agendo.

II. Conc. Creatura potest à Deo eleuari ad aliquid creandum, tanquàm instrumentum morale, quo sensu Scot. loc. cit. docet, Sacramenta esse de facto eleuata ad gratiam creandam, seu producendam. Prob. conc. à Doctore hac maxima. Omnis dispositio, necessitans ad formam (dummodò non sit dispositio passiuæ receptiuæ) potest dici quodammodò causa actiua, seu instrumentalis respectu illius formæ (pro forma intellige hic finem, vt explicat Tatar. in 4. d. 1. q. 5.) sed sic est, quòd Sacramentum, vt actio à Christo instituta, seu susceptio Sacramenti dici potest quodammodò causa actiua per se, & non per accidens instrumentalis respectu gratiæ: ergo &c. dicitur quodammodò, quia dispositio propriè, & per se, non influit in formam, sed quodam modo, & diminutè se habet ad causalitatem illius formæ, quatenus obiectiuè mouet Deum ad gratiam conferendam. Maior probatur à Scoto exemplo meriti. Merita sunt causa instrumentalis respectu præmij, quia per merita acquiritur præmium; & tamen meritum non causat actiue præmium in se, idest physicè non efficit ipsam beatitudinem; nec aliquam dispositionem mediam; sed est dispositio præuia mouens, & quasi necessitans agens ex ordinatione D. ad producendum terminum gratiæ, & gloriæ: ergo &c.

Arg. cont. 1. conc. Incarnatio est perfectior, quàm creatio; sed aliquod instrumentum, virtute supernaturali attingere potest incarnationem, ergo, & creationem; maior patet de B. Virgine &c.

Resp. disting. mai. Incarnatio est perfectior ratione termini, quia est Persona Verbi: conc. mai. ratione modi agendi, neg. mai. Sicut enim creatio est opus solius Dei; ita pariter Incarnatio. Siquidem efficere Incarnationem est vnire naturam humanam hypostaticè Verbo D. quæ vnio actiua soli Deo competit; neque B. Virgo cooperata est ad talem vnionem, nisi generando humanitatem Christi; licet modus talis productionis, seu generationis fuerit miraculosus; de quo in part. 3.

Arg. 2. Non minus est, vt corpus agat in Spiritum, quàm

quàm creatura creet ; sed ignis inferni est corporeus ; & virtute Dei agit in damnatos Spiritus , ergo , & creatura potest creare virtute Diuina .

Resp. neg. mai. Apparet enim maior ratio , quòd , ignis etsi corporeus , agit in spiritum , quàm creatura creet ; quia in hoc statu , in quo Anima est corpori vnita , experimur corpus agere in Animam , afficiendo eam doloribus . Quomòdò autem agit ignis in spiritus damnatos ; an videlicet inducendo in spiritum aliquam qualitatem physicam ; qua eum torqueat , vel intentionalem , hoc est detinendo spiritum in tali loco , in contemplatione ignis &c. valde dubium est ; de quo infra redibit sermo ; vbi agetur de pœna Dæmonis .

Arg. 3. Agens naturale , virtute propria , producit rem ex nihilo , ergo multò magis virtute Diuina , tanquàm instrumentum : patet consequentia , quia agens naturale ex speciebus consecratis producit vermes , acetum , &c. sine forma , & materia , ergo creat : ant. prob. quia ibi nec est forma , nec materia vermibus , ergo creat .

Resp. neg. ant. ad prob. dicitur vermes non produci sine materia ; corruptis namque accidentibus ad conseruationem substantiæ necessarijs , in eodem instanti , quo agens naturale generat aliam formam , & alia accidentia , creaturà Deo materia prima , vt docet Scot. in 4. d. 12. quol. 6. Immò probabilius est , vt idem Doctor subiungit , redire virtute Diuina substantiam compositam , cui talia noua accidentia conuenire possint .

Contra . Homo peccando anihilat gratiam : ergo potest creare . Resp. ex Scoto hominem peccando destruere gratiam moraliter , seu demeritoriè , non autem physicè , cum peccatum in nostra sententia non opponatur gratiæ physicè sed moraliter , & demeritoriè .

Arg. 1. cont. 2. conc. à Suarez , dicente modum huiusmodi causandi moraliter esse gratis excogitatum à Scoto . Illa , quæ nullam habent connexionem cum gratia , non possunt esse dispositiones ad illam : sed sic se habent ex Scoto Sacramenta , ergo &c. .

Resp. conc. mai. & disting. min. Non habent dispositionem physicè , & ex eorum natura ; conc. moraliter , hoc est institutione Diuina , neg. estò enim aliquid ex sui natura ,  
nullo



nullo modo proportionetur alicui physice, potest per D. voluntatem sic, vel sic eleuantem, & instituentem habere proportionem; non quidem physicam, sed moralem, vt est in proposito.

Arg. 2. per Scotum. Sacramenta sunt dispositio, & dispositio debet inesse subiecto, in quo est forma, quæ sit per actionem agentis; sed formæ omnes Sacramentorum non recipiuntur in homine, vt patet de Eucharistia, cuius forma recipitur in pane, & gratia in alijs Sacramentis recipitur in Anima hominis, & dispositio in corpore, ergo non disponunt; seu non sunt dispositiones, quando quidem non ponantur in eodem subiecto, in quo introducenda est forma.

Resp. neg. 2. part. mai. Quia huiusmodi dispositio recipitur in suscipiente, qui est totus homo, & quamuis gratia recipiatur in anima, & Sacramentum in corpore, quia est signum sensibile, tamen quia corpus, & anima sunt vnum totum subiectum, hinc sequitur dispositionem ad formam, & eandem formam repetiri in eodem subiecto; secus autem est de Eucharistia in fine; quia, licet sit Sacramentum in se completum, & perfectius quolibet alio; nihilominus non efficit gratiam sanctificantem, nisi in suscipiente; susceptio igitur huius Sacramenti est dispositio ad gratiam. Ita Hiquæus in comment. Scoti.

Arg. 3. Si Sacramenta sunt causa gratiæ; ergo sunt causa per accidens, & non per se; patet conf. quia causa per se ex Scoto est ea, quæ ex propria virtute, & influxu producit effectum; & non virtute alterius, ergo &c.

Reso. neg. conf. ad probat. disting. ant. Causa per se &c. causa physica, conc. moralis: nego ant. Vnde causa moralis licet non influat per se physice attingendo effectum; influit tamen mouendo agens libetum ad illum producendum ex pactione Diuina.

Contra. Ex hac responsione sequitur, Sacramenta esse tantum signa gratiæ, & causam, sine qua non, sed causa sine qua non, est causa per accidens; ergo falsa est allata responsio. Signa enim, & conditiones non agunt.

Resp. neg. Sequi ex nostra responsione; Sacramenta esse tantum signa gratiæ; & conditiones sine qua non; & per consequens negamus, esse causas per accidens; cum  
in se



in se imbibant veram rationem causæ, non quidem physicæ sed moralis; ut supra ostendimus. Etenim Sacramentum, seu susceptio eius, ex Scoto, est dispositiva, licet moraliter, ad gratiam; at dispositio reducitur ad causam efficientem. Igitur sequitur tantum; quod non est dispositio ex sua virtute naturali, sed ex Divina institutione.

Cæterum fatemur, Sacramenta esse signa, sed practica; ac proinde veram causam per se eius, quod significant.

Arg. ultimo auctoritate. Sancti Patres, & Concilia tribuunt Sacramentis novæ legis virtutem, & vim producendi gratiam; sed talis virtus, & vis, etiam secundum Sanctos Patres, videtur admittenda in sensu physico; ergo Sacramentis, ut nobilius dignificentur, tribuenda est causalitas physica.

Resp. Sanctos Patres, & Concilia tribuere Sacramentis vim producendi gratiam; quod nemo Catholicus negat. At controuertitur à Theologis; an talis vis sit moralis, vel potius physica; affirmant Thomistæ, esse physicam; negant Scotistæ; & quidem probabilius; ut ostendetur in p. 4. cum Sancti Patres, & Concilia favere videantur potius nostræ, quam eorum sententiæ.

## QVÆSTIO VIII.

*Utrum Deus creare potuerit Mundum ab æterno, & absque durationis principio.*

**N**Ot. Quod titulus quæst. sic est intelligendus; an videlicet Deus potuerit creare mundum, hoc est, omnia, quæ sunt in mundo, sine principio durationis; adedut, tam entia permanentia, quam successiva, tam corruptibilia, quam incorruptibilia ab æterno creare potuerit. Circa quam difficultatem duæ sunt sententiæ. Altera D. Bonau. Alberti Magni, Richard. Henrici, & aliorum, asserentium, repugnare creaturæ esse ab æterno, ac proinde Deum per absolutam potentiam non potuisse producere creaturam in esse realis existentia; eorum rationes afferuntur inferius. Altera est Scoti, qui, estd videatur problematicus, utramque partem defendendo, attamen magis inclinatur ad affirmatiuam partem, quam negatiuam, loquendo

quando de entibus permanentibus; secus autem de successivis à parte ante; Ceterum, pro intelligentia huius quæst. faciunt plura dicta in Philosophia; ideo sit.

I. Concl. Potuit Deus creare Mundum, quo ad entia permanentia ab æterno: hæc est Scoti in 2. d. 1. q. 3. D. Thom. & est communis, tam Thomistis, quam Scotistis, quamvis differat D. Thom. à Scoto in probando hanc eandem conc. Prob. breuiter. Conc. nulla apparet contradictio in istis terminis, aliud à Deo esse sempiternum, ex Scoto loc. cit. s. tenentes autem, & si de aliquo sit contradictio, non tamen de omnibus, ut patebit in responsione argumentorum, ergo potuit Deus creare Mundum ab æterno, quoad entia permanentia.

Prob. ant. Non est contradictio ex parte Dei, cum eius omnipotentia respiciat omne creabile, tam pro æterno, quam pro nunc temporis; aliter posset dari, aut intelligi maior omnipotentia ea, quæ non posset producere ab æterno: non ex parte effectus, quia maior, vel minor duratio nihil perfectionis ponit in creatura, ut docet Scot. in 1. d. 2. q. 2. s. ostensis igitur. Albedo namque, durans mille annos non est perfectior, quam si duraret per vnum diem, &c.

II. Conc. Deus non potuit creare Mundum, quo ad entia successiva ab æterno: hæc est Scoti loc. cit. Prob. Si daretur ens successivum ab æterno, puta tempus, illud constaret ex partibus idest diebus, horis, instantibus, & in quolibet die plures essent horæ, & in hora plura instantia, ergo, sicut modo dies est maior hora, & hora instantibus, posset ultra progredi inquirendo; an horæ, instantia, & dies essent finiti, vel infiniti; si primum, ergo totum tempus finitum, quia infinitum non constat ex finitis. Si secundum ergo daretur vnum infinitum maius alio.

Præterea de ratione successivi est, quod non permaneat in esse, sed sit semper in fluxu; aliter si in esse permaneret, esset simul permanens, & successivum, quod est manifesta contradictio; ergo si aliquod successivum potest esse ab æterno, vel simul ab æterno, fuisset verum dicere, tempus est ab æterno, & non est; vel solum esset verum dicere, tempus est ab æterno; non primum, quia apertè implicat, cum sint contradictoria; si secundum, ergo illa

pars temporis, seu ens successuum permanfit in esse per infinitum tempus; & ita finitum fuit infinitum; nam à productione illius entis successui, vel partis temporis, vsque ad infinitum eiusdem, non potuit intercedere solum tempus finitum; seu duo finita, quia sic non esset ab æterno; ergo &c.

Arg. 1. ab Henrico cont. 1. conc. sic. De omni producto verum est dicere, aliquando producit, vel semper producit. Si primum, ergo in illo instanti, in quo producit, recipit esse; ergo non fuit ab æterno, sed habuit principium durationis. Si secundum, ergo creatura semper est in fieri, & nunquam in facto esse, quod est absurdum. Resp. Quod creatura si esset ab æterno, neque aliquando, neque semper produceretur, sed semper esset producta.

Et si dicas. Creatura fit pro aliquo instanti; ergo &c.

Resp. Quod fieret in instanti æternitatis, vel in instanti æui; neque propter hoc esset necesse, quod non esse Angeli prioritate temporis præcedat esse Angeli, sed sufficit, quod præcedat prioritate naturæ negatiuè; & hac ratione diceretur. Creaturam accepisse esse, seu esse acquisitum, habuisse. Non enim est imaginandum, quod in æternitate detur aliquod primum instans; vel secundum, in quo valeat dicere; creaturam incepisse, quia in æternitate non datur primum, nec secundum, sed vnicum tantum instans.

Arg. 2. Illud prius duratione inest alicui, quod prius natura illi inest, sed creaturæ prius natura inest non esse, ergo eidem inest non esse prius tempore, quam esse, ergo non ab æterno.

Resp. ex Scoto, quod duo opposita non insunt creaturæ eidem ordine naturæ positiuè, sed priuatiuè; & sic non esse prius natura inest creaturæ priuatiuè; hoc est, quantum ex se est, inesset, nisi à causa produceretur in esse; & ideò non est necesse, quod id, quod præcedit priuatiuè, præcedat quoque duratione; bene tamen si positiuè præcederet. Quare Doctor in 3. d. 3. q. 1. ait. Quando opposita comparantur ad idem, secundum ordinem naturæ, non simul ambo insunt; sed tantum alterum inest. Reliquum autem, quod dicitur prius natura, non inest, quia in eodem instanti oppositum inest, sed dicitur prius natura, quia

tunc inesset quantum est ex parte subiecti; nisi aliquid extrinsecum impediret; & dat exemplum de materia in ordine ad formam. Itaque non esse creaturæ, & esse creaturæ in æternitate fuissent in eodem instanti; cum in mutatione instantanea terminus à quò, & terminus ad quem sint simul duratione,

Contra. Creatio, vt relatio, non minùs dicit ordinem essentialem ad terminum ad quem, quàm ad terminum à quò, ergo, sicut creatio semper est ad terminum ad quem posituè, ita etiam ad terminum à quò posituè.

Resp. neg. ant. Quia, licet creatio dicat ordinem ad terminum ad quem, & à quo; non tamen eodem modo; respicit namquè terminum ad quem per modum permanentis, terminum verò à quo per modum obiecti, & expulsi.

Arg. 3. Si aliqua creatura ab æterno fuisset producta; sequeretur illam incæpisse esse, & incæpisse non esse, sed hoc est manifesta contradictio; ergo &c. Prob. seq. mai. Incæpisset esse, quia per veram creationem accepit esse; non incæpisset verò, quia quod habet esse per productionem æternam, non incipit esse; aliter Verbum Diuinum incæpisset esse,

Resp. neg. seq. ad prob. dicitur, falsum esse in illo casu creaturam incæpisse esse, quia incipere esse, notat aliquod primum nunc durationis,

Arg. 4. Quælibet species æquè est in potentia, vt sic comparata ad Deum, vt dantem esse, ergo sicut Sol potuit esse ab æterno; ita, & Asinus perfectus potuisset esse, & generare ab æterno, & ab illo possent esse geniti omnes alij Asini, qui sunt, vel fuerunt vsque ad hunc diem. Tunc quæro, vel omnes illi Asini essent finiti, vel infiniti; si finiti, ergo totum tempus ab illo instanti vsque ad hoc tempus esset finitum; & sic habeo intentum; si infiniti; ergo positis extremis potuissent media fuisse infinita, quod est contra rationem infiniti, quod est carere extremis.

Resp. scorus, posset negari, quòd in quacumquè specie est similis impossibilitas ad æternitatem, quia non apparet contradictio ex parte cuiuscumquè speciei, & idè nec similis possibilitas; vel conceditur, quòd Asinus potuisset esse productus ab æterno. Et cum quæris: an fuissent finiti, vel infiniti, &c. negatur, quòd sint infiniti, immò finiti, &

ti, & cum inferis; ergo tota duratio à productione illius Asini fuisset finita, negatur cons. ille enim, & si productus fuisset ab æterno, non tamen potuit, generasse ab æterno, quia generatio necessariò includit in creaturis, quòd sit mutatio inter terminos oppositos, idest inter priuationem, & formam; & quicquid est inter opposita sibi succedentia non potest esse sempiternum, sed oportet quod sit in tempore. Et si dicas quòd tunc oportuit, ipsum per tempus infinitum quieuisse ad generandum, cum tamen fuisset perfectus, & potens ad priùs generandum, quod videtur inconueniens.

Resp. Scotus. Asinus non fuisset factus perfectior ab æterno ad generandum, quàm Deus ad creandum. Et tamen, per te Henrice, oportuisset, Deum quieuisse à creando. Asinum per infinitum tempus, quasi imaginarium, & tamen non ita videtur necessarium, sicut in generatione, quæ est transitus à priuatione ad formam.

Arg. 5. Si mundus fuisset ab æterno, infinita duratio fuisset accepta, ergo non remaneret aliquid aliud accipiendum, quod est contra rationem infiniti. Infinitum enim est illud, cuius, quacumque parte accepta, semper remanet aliquid accipiendum.

Resp. Argumentum non concludit de permanentibus, sed de successiuis, vt dictum est in 2. conc. quæ non possunt esse ab æterno. Impossibile namque est successiuum esse æternum, & tamen terminari ad hunc diem præsentem, cum infinitum terminos non admittat.

Arg. contra 2. conc. Quando sunt aliqua duo eiusdem rationis, quod non repugnat vni, nec repugnat alteri: sed principium temporis, & terminus sunt eiusdem rationis, quia sunt duo instantia ipsius temporis: ergo si enti successiuo non repugnat negatio termini, idest æternitas à parte post, neque repugnabit negatio principij, seu à parte ante.

Resp. conc. mai. & disting. min. Principium, & terminus sunt eiusdem rationis, fundamentaliter sumpta: conc. formaliter, nego. Primo enim modo sunt duo instantia eiusdem temporis, ac proindè si potest esse æternus à parte post, seu sine vltimò instanti, in quo fundatur negatio termini, sic potest esse sine instanti primo, in quo fundatur negatio principij, sed loco illius poni debet aliud instans;

Secundo autem modo non sunt eiusdem rationis. Etenim principium dicit rationem principij, quæ consistit in relatione ad non esse prioris; terminus verò importat rationem termini, qui consistit in relatione ad non esse posterioris, & hinc est, quòd potest ei competere secundum, & non primum.

Contra. Non repugnat tempori æternitas, seu duratio infinita à parte post, ergo nec ei repugnat à parte ante.

Resp. conc. ant. & neg. conf. & ratio est, quia licet utrumque instans tam principij, quàm termini temporis sint eiusdem rationis respectu temporis; non sunt tamen eiusdem rationis ex parte ante, & ex parte post, nam negatio principij ex parte ante deberet includere infinitum tempus in æternitate; & sic esset simul successivum, & permanens. Negatio autem termini ex parte post, non oportet, quòd includat tempus infinitum; sed sufficit, quòd post quamlibet partem acceptam, sit semper alia, & alia in infinitum accipienda.

Arg. 2. Si Deus creasset hominem in æternitate, ille habuisset vitam: sed nequit haberi vita sine motu cordis; ergo in instanti æternitatis esset motus; ac proindè ens successivum ab æterno.

Resp. Quod homo creatus ab æterno habuisset vitam, non per motum ipsius cordis; sed eo modo, quo æternitati competit: non enim Deus est alligatus temporis, & motus legibus.

Arg. 3. Si creatura successiva non potuisset creari ab æterno; ergo nec permanens: patet sequela, quia non minor implicantia apparet de vna, quàm de alia, licet ex diuerso capite; siquidem creatura permanens ab æterno producta non posset à D. omnipotentia anihillari, quia alioquin non includeret infinitam durationem.

Resp. Data hypothesi, quòd creatura esset ab æterno; non posset à Deo anihillari; hoc tamen non derogasset D. Omnipotentia, vt patet etiam in alijs suppositionibus.





*Vtrum creatio sit actio, & mutatio.*

**N**OT. 1. Quoddam actio diuiditur ex Scoto in 1. d. 3. q. 6. & quol. 15. in actionem immanentem, & transeuntem. Prima dicitur operatio, seu qualitas perficiens ipsum agens, & est in prædicamento qualitatis, vt intellectio, & volitio, vocatur etiam à Scoto actio gramaticaliter; tendit enim, seu respicit aliquod, non tanquam passum, sed vt terminum. Actio verò transiens est, quæ tendit in aliud, tanquam in passum, & dicitur transiens, non quod sit extra agens, sed quatenus ponit terminum extra agens; vnde ab Arist. 7. meta. Actio de genere actionis sic definitur, est mutatio transmutantis ad transmutatum.

Not. 2. Quod mutatio potest accipi tripliciter: vno modo generaliter pro quacumque noua acquisitione cuiuscumque esse, siue essentialis, siue accidentalis, siue sit ibi aliquod potentiale receptiuum formæ, siue non, & hoc modo omnis productio cuiuscumque rei creatæ diceretur mutatio acquisitiua, & per oppositum, omnis deperditio cuiuscumque esse diceretur mutatio deperditiva: 2. modo accipitur specialiter pro noua actuatione, seu informatione alicuius potentialis, siue illud potentiale præcesserit duratione, siue natura, & hoc modo in omni productione rei compositæ est mutatio: 3. modo sumitur propriè, & strictè pro noua informatione alicuius potentialis, quod duratione præcesserit talem actum, & hoc modo mutatio reperitur tantum vbi manet idem subiectum, quod transmutatur de forma ad formam, & hoc modo diffinitur à Philosopho mutari, cum dicit: mutari est aliter se haberi nunc, quam prius.

I. Concl. Creatio non est actio propriè dicta, neque immanens, neque transiens, sed dicitur transiens impropriè.

Prob. quoad 1. part. Actio immanens propriè habet perficere agens: sed Deus à nullo perficitur, ergo in Deo non est actio immanens, propriè dicta, ergo creatio non est actio. Prob. quoad 2. part. Actio ex Arist. est principium transmutandi aliud in quantum aliud, sed creatio non respicit vllum subiectum transmutandum, quia nullum



subiectum supponit ; ergo &c. Prob. quoad 3. part. Creatio dicitur actio transiens improprie. Illa dicitur actio transiens improprie, quæ respicit terminum extra se nullo passiuo præsupposito, sed creatio est huiusmodi ; ergo &c.

II. Concl. Creatio simpliciter est mutatio primo modo, dicto in secundo notabili. Creatio actiua compositorum est mutatio secundo modo dicta ; secus verò in simplicibus ; patet quoad primam partem quia in creatione est noua acquisitio esse, ergo est mutatio primo modo dicta.

Prob. 2. pars. Si Deus crearet materiam, & in eodem instanti actuaretur per formam, materiam, non aliter se haberet nunc, quàm prius positiuè, sed negatiuè, ergo creatio compositorum non est proprie, & tertio modo mutatio, sed solummodò secundo modo.

Prob. 3. pars. Simplicia, seu spiritualia non constant ex parte potentiali physica, & actuali, ergo creatio simplicium non est mutatio.

Arg. contra 1. conc. Create formaliter est efficax velle Dei ex Scoto in 1. d. 37. vbi docet ; omnipotentiam Dei esse eius voluntatem, ad cuius velle sequitur esse, sed velle Dei est formaliter immanens, & solum virtute transiens, ergo, loquendo de creatione actiua, non est actio improprie transiens.

Resp. Argumentum ipsum indicare responsionem, dum in ipso dicitur velle Dei esse immanens, & solum virtute transiens, id enim, & nos dicimus, hoc est, huiusmodi Diuinam actionem dici transeuntem, quatenus sua virtute ponit terminum ad extrà.

Arg. contra 2. conc. Non est transitus de contradictorio in contradictorium sine mutatione ; sed in creatione est huiusmodi transitus, ergo &c.

Resp. disting. mai. non est transitus &c. sine aliqua mutatione ex superioribus, conc. non est transitus sine mutatione proprie dicta, nego ; datur namquè in creatione mutatio acquisitiua, & perdititiua &c.

Contra. Aug. lib. 12. de Ciuit. Dei dicit, quòd *Omnia creata sunt mutabilia ex eo, quòd de nihilo sunt facta*, ergo est mutatio proprie dicta.

Resp. D. Aug. loqui de mutatione primo modo dicta, nam sicut omnia creata admittunt mutationem acquisitiuam,

riam, ita mutationem deperditivam, & in hoc sensu verificatur, quòd omne creabile est mutabile.

## QVÆSTIO X.

*Utrum creatio sit aliquod medium inter  
creantem, & creaturam.*

**N**Ot. Quòd creatio est duplex, nempe passiva, & activa: prima se tenet ex parte creatoris, secunda ex parte creaturæ, & utraq; accipi potest dupliciter: vno modo materialiter, & sic velle Deum transiens sua virtute ad creandum dicitur creatio activa, & creatura, quæ est terminus positus in esse, dicitur creatio passiva. Alio modo formaliter, & sic ex parte creaturæ est relatio realis transcendentalis dependentiæ ad Deum creantem, & ex parte Dei est solummodò respectus rationis, aut nullus, ut docet Scot. in 1.

I. Concl. Creatio activa materialiter est ipsum velle Divinum efficax, quo vult hoc, vel illud producere; formaliter verò est respectus rationis extrinsecus adueniens.

Prob. Voluntas Divina, seu velle Divinum est principium perfectissimum ponendi in esse omne possibile, absque quocumque alio; ergo creatio activa nil aliud importat, nisi velle Divinum; patet ant. quia aliter non esset perfectissimum principium.

Præterea, potentia executiva in Deo, seu effectiva non distinguitur ex natura rei à potentia volitiva; distingui enim vnum ab altero necessario includit imperfectionem, licet enim sit activa respectu obiecti, est tamen passiva respectu voluntatis imperantis; unde ponitur in hominibus, & forsitan in Angelis, tanquam perfectio supplens indigentiam, & imperfectionem, ergo cum in Deo nulla imperfectio sit ponenda, dicendum est, suo velle efficaci, absque villo alio medio, creare, & producere.

II. Concl. Creatio passiva materialiter est ipsa creatura producta, formaliter autem est relatio transcendentalis, quæ relatio distinguitur formaliter tantum à creatura, cuius est relatio. Prima pars manifestè patet: de secunda plura dicta sunt in Logica, agendo de prædicamento Relationis.

nis. Prob. autem à Scoto in 2. d. 1. q. 4. §. ad quæstionem. Illud propriè dicitur inesse alicui, sine quo illud non potest esse sine contradictione, & est idem sibi realiter; sed relatio ad Deum propriè inest lapidi, & sine ea non potest esse lapis sine contradictione, ergo illa relatio est eadem realiter lapidi, ergo creatio passiva formaliter, seu relatio est eadem realiter creaturæ: sed quod est idem realiter alicui distinguitur formaliter ab illo, ergo &c.

Prob. mai. Sicut contradictio, dicta de aliquibus, est via concludendi distinctionem, ita impossibilitas recipiendi prædicationem contradictoriorum pertinentium ad esse, est via concludendi identitatem in esse, & hoc ubi non est dependentia essentialis, ut est inter totum, & partes, quæ requirunt distinctionem manifestam. Vnde formatur ratio. Impossibilitas quod A. sit sine B. aut est propter identitatem B. ad A. aut est propter prioritatem, aut simultaneitatem in natura; ergo si B. non sit prius naturaliter quàm A. nec necessariò simul natura, & A. non potest esse absque B. sequitur, quod A. sit idem B. Si autem sit aliud, & posterius eo, non est verisimile quòd non possit esse sine eo naturaliter absque contradictione; sed quod inest alicui propriè, sicut relatio inest fundamento, hoc est, quòd ita inest, quòd si esset aliud, esset posterius eo natura, tale nec est prius natura, nec simul cum eo, cui inest, ergo si illud aliud non potest esse sine eo, absque contradictione, est idem realiter sibi, ergo relatio &c. min. primæ probationis est manifesta, quia, sicut impossibile est lapidem esse sine Deo, ita impossibile est lapidem esse sine dependentia eius ad Deum, nam si posset esse sine dependentia illa, posset esse sine termino illius dependentiæ.

Arg. contra 1. conc. probando, quòd ultra velle Diuinum aliquod aliud requiratur ad producendam creaturam ad extra. Si velle Diuinum se solo est producens ad extra, vel executio operis, hoc est positio creaturæ ad extra, fit per actum volitionis, vel per alium actum executivum; non primum, quia actio immediatè productiva alicuius termini, & ipse terminus simul sunt, & non sunt in actu, quod dicit contradictionem; causa enim in actu, & effectus in actu simul sunt, ut habet Arist. 2. phys. sed actus volendi in Deo est formaliter ab æterno, creatura vero in  
tem-

tempore : ergo creatura non producit per actum volendi solummodo , ergo per aliquod aliud , ultra illud velle .

Resp. Quod ponitur in esse ad extra per actum volitionis efficacis ; & quando subiungitur , quod actio productiva alicuius termini &c. dicitur , quod valet in actione naturali , sed non in actione libera , & maxime Diuina , in qua non oportet , quod terminus ponatur in esse in eodem instanti , in quo est actio volitiua . In tali namque actione duo instantia consideranda sunt ; vnum , in quo est actio volitiua ; aliud , pro quo ponitur actio ; vnde in proposito Deus voluit ab æterno creaturam producere , & non pro æterno . Et si dicatur , quod si productio non distinguitur à volitione , & Deus ab æterno voluit creaturam producere , ergo ab æterno producit .

Resp. Quod illa volitio ab æterno non habet rationem productionis ab æterno , sed tantum in illo instanti , in quo Deus voluit ab æterno rem esse .

Dices iterum , si volitio fuit ab æterno , & non productio ; ergo volitio separatur à productione , & per consequens distinguitur , ergo productio est aliquod medium inter velle Diuinum , & terminum .

Resp. Quod actus Diuinæ voluntatis accipitur dupliciter , vno modo quantum ad id , quod est in se formaliter , & sic ille idem actus , qui est volitio , est etiam productio ; alio modo quantum ad id , quod connotat per volitionem , & productionem , & sic est sibi distinctio , & separatio , Ille enim actus , vt est volitio , connotat obiectum in esse voluto præcisè ; ille autem idem actus , vt dicitur productio , connotat obiectum idem in esse reali , & in tempore ,

## QVÆSTIO XI.

*Vtrum creatio , & conseruatio sint idem ,  
vel quid diuersum .*

**N**Ot. ex Scoto , quod. 12. quod in qualibet creatura est ad Deum respectus dependentiæ in esse , qui quidem respectus , vt paulò superius ostensum est , identificatur realiter cum ipsa creatura ; estque huiusmodi respectus realis , & omninò vnus , quem concomitantur duo alij respectus ,

pectus, non reales, seu non positiui, sed negatiui. Quando enim res à Deo producit, immediatè post non esse; p̄ter respectum, pullulantem à re producta ad Deum producentem, qui est respectus realis; est alius respectus in eadem re producta, non ad Deum, sed ad non esse eiusdem creaturæ immediatè præcedens, & huiusmodi respectus non est realis, seu positiuus, sed rationis, quia terminus ad quem est negatiuus, & iste dicitur creatio. Quando autem eadem res habet esse à Deo, sed non immediatè post suum non esse, sed post suum esse præhabitu, & existens, in eadem re, est realis respectus dependentiæ ad Deum, vt ad causam efficientem, & est respectus non realis esse creaturæ ad esse præexistens, quia respectus eiusdem ad se ipsum non est realis, sed rationis, & iste dicitur conseruatio; Conseruatio igitur est datio esse post esse, ait Scot. in reportatis, in comparatione ad tempus, non ramen in comparatione ad æternitatem, cum in tali mensura non sit prius; & creatio est datio esse post non esse.

Concl. Creatio, & conseruatio, acceptæ pro respectu reali dependentiæ ad Deum, sunt vnum, & idem; acceptæ verò pro formali, hoc est quatenus creatio importat respectum ad non esse immediatè præcedens, & conseruatio importat respectum ad non esse creaturæ mediatè præcedens, non sunt idem, sed realiter distinguuntur, & vnum potest esse sine alio. Prob. conc. ex Scot. loc. cit. quoad 1. part. vnicus est respectus realis dependentiæ creaturæ ad Deum in esse, tam in creatione, quam in conseruatione; ergo idem est creatio, & conseruatio: prob. ant. Esse creaturæ, tam in creatione, quam in conseruatione, semper est idem re, & ratione, ac ipsa dependentia est idem; sed illud, quod est idem in re, & ratione ad aliud, quod est idem re, & ratione, non potest habere nisi vnicam dependentiam essentialem; ergo creaturæ ad Deum vnus est respectus realis; non enim idem potest esse ad aliud pluribus dependentijs essentialibus: mai. patet, quia permanens differt à successiuo, per hoc; quod permanens habet semper idem esse, successiuum è contra; min. quoque est manifesta; manifestum est enim, quod velle Diuinum est semper idem, & sub eadem ratione terminat dependentiam esse creaturæ, tam respectu creationis, quam conserua-

seruationis, & ad hoc videtur facere auctoritas D. Aug.  
lib. 4. super Gen. 14. vbi ait, *Quod mundus, nec iam oculi stare  
poterit, si ei Deus regimen subtraheret*: Et super Gen. pariter  
lib. 8. Aet inquit *Non est factus lucidus, sed semper fit lucidus*, ita  
continù conseruatur res à Deo, & gràtia in animà, sicut  
conseruatur lumen in aere à corpore luminoso: sic creatu-  
ra semper fit à Deo, hoc est, dicit Scot. semper dependet à  
Deo. Prob. conc. quoad 2. part. Creatio potest esse sine  
conseruatione; potest enim Deus dare esse alicui, & statim  
facere desinere esse; ergo &c. patet ant. nam in rebus in-  
stantaneis. & habentibus esse tantùm in nunc, producun-  
tur naturaliter, & non conseruantur; ergo potest aliquid  
creari, & non conseruari, & tunc non haberet esse nisi in  
vnico instanti.

Arg. contra 1. part. concl. Aliquid potest creari, & non  
conseruari; ergo aliquid potest habere respectum ad Deum,  
vt creantem tantùm, & non conseruantem, ergo non est  
idem respectus, Prob. ant. Res in instanti creationis non  
conseruatur, quia non indiget conseruatione, nisi in quan-  
tum potest non esse, & de se tendit ad non esse, sed dum  
creatur, non potest non esse, nec tendit ad non esse, cum  
tunc accipiat esse; ergo, quando res creatur, non dicit res-  
pectum ad Deum conseruantem, sed solùm creantem.

Resp. neg. ant. ad prob. disting. mai. Si per ly conserua-  
ri intelligatur quoad totum, quod importatur per con-  
seruare, conc. mai. si per ly conseruate intelligatur, quod  
res, quæ producitur in instanti, non habeat respectum ad  
Deum creantem, qui est respectus dependentiæ ad causam  
in essendo, & sic nego. Vnde, licet primo modo, quod  
creatur in instanti non conseruatur quoad totum, signifi-  
catum per ly conseruari; quia non dicit respectum ad esse  
præhabitu; tamen alius respectus, qui importatur per  
hoc, quod est creari, etiã est idem cum illo, qui impor-  
tatur per hoc, quod est conseruari: nimirum dependentiæ  
in essendo ad Deum, dantem esse, vt dictum est supra.

Arg. 2. Via in terminum, & manutenentia in terminum  
non sunt idem realiter, sed creatio est via in terminum, &  
conseruatio est manutenentia in termino: ergo non sunt  
idem realiter, & ad hoc confirmandum, adducitur ab Au-  
reolo huiusmodi exemplum; leuare lapidem in aere, & te-



nere non sunt idem. Resp. disting. mai. In agente naturali conc. in agente supernaturali, nego; ad min. disting. si creatio accipiat pro respectu ad non esse immediatè præcedens, & conseruatio ad esse præhabitu, conc. min. si autem sumatur pro respectu essentiali, quem creatura importat ad Deum causantem, nego.

Arg. 3. Quæ se mutuo excludunt; non sunt idem, sed creatio, & conseruatio sunt huiusmodi, ergo.

Resp. conc. mai. & disting. min. creatio, & conseruatio, acceptæ pro respectibus ad non esse immediatè præcedens, & ad esse præhabitu se excludunt, conc. pro respectu ad Deum, dantem esse, nego, quia in æternitate, cum non detur prius, nec posterius, vnum non potest excludere successiue aliud.

Arg. 4. Illud, quod quantum est de se non habet, quod sit nisi per instans, non est idem realiter cum eo, quod de se habet, quod sit plusquam per instans; sed creatio de se est per instans; conseruatio verò in plus se habet, ergo &c.

Resp. Ioan. de Bassolis, dato, quod res possit durare per vnicum instans, in eodem instanti creationis conseruaretur, prout conseruatio dicit dependentiam essentialem ad Deum.

Contra hanc responsionem arguit Lalemandet. Impossibile est, quod in eodem instanti res supponat suum esse, & accipiat suum esse, ergo impossibile est, quod in eodem instanti creetur, & conseruetur. Resp. conc. ant. & dist. conf. impossibile est &c. si creatio sumatur pro respectu ad non esse præcedens, vt alias dictum est, conc. si verò creatio, & conseruatio accipiantur pro respectu essentiali ad causam, dantem esse; nego. Cæterum Bassol. intelligit de creatione, & conseruatione secundo modo, & Lalemandet intelligit de primo, & sic argumenta nihil probant.

Contra. Sequeretur creaturas esse in continuo fieri, sed hoc est falsum, quia factæ sunt, & non sunt in fieri, ergo &c. Resp. ex Scot. in Report. dist. mai. creaturas esse in continuo fieri, hoc est non in facto esse, nego, in fieri, hoc est non accipiendo nouum, & nouum esse, sed semper dependere à Deo, & sic conc. vt patet de lumine &c.



*Vtrum in creaturis sit vestigium San-  
ctissima Trinitatis.*

**N**Ot. 1. Quòd hæc tria sunt inter se diuersa, nempe imago, vestigium, & similitudo. Nam imago est similitudo, repræsentatiua totius; vestigium est similitudo, repræsentatiua partis totius; etsi respectu partis dici possit imago; vnde impræssio pedis in puluere diceretur imago pedis; non verò imago totius animalis, sed vestigium tantum. Similitudo, quæ est conuenientia aliquorum, in aliquo, est quid commune ad imaginem, & vestigium; vnde valet dicere imago est similitudo, vestigium est similitudo, sed non è contra; duo enim oua sunt similia, sed vnum non est imago, nec vestigium alterius. Imago insuper, alia est imitationis, alia vniucationis: hæc soli Dei Filio competit; illa creaturis; & dicitur imago imitationis, quia, stante repræsentatione totius, nisi adsit imitatio, seu expressio, quæ consistit, vel in essentiali dependentia causati ad causam, mensurati ad mensuram; vel in similitudine in naturâ, figura nequit reuerà dici imago &c. Quarè, in rigore loquendo, distinguuntur imago, & exemplar; quia imago est similitudo ad instar alterius producta; exemplar est id, ad cuius imitationem aliquid producitur; estò passim vnum vsurpetur pro alio. Similiter non sunt idem, esse imaginem, & esse ad imaginem. Siquidem, vt aduertit Alensis p. 2. q. 62. memb. 5. art. 3. Esse ad imaginem, vel similitudinem Dei, indicat imperfectam D. similitudinis participationem; esse autem imaginem Dei, est perfectissimè, & adæquatè implere rationem rei, cuius est imago, & eandem perfectè repræsentare, adèut talis imago adæquetur Prototypo in omnibus, & per omnia; & sic solus Dei Filius est imago Dei Patris.

Not. 2. ex Scoto in 1. d. 3. q. 5. vbi præsentem questionem agit ex professo; quòd licet in Trinitate non sit propriè, nec totum, nec pars; tamen in intellectu nostro conceptus Trinitatis est quasi totalis, & Persona est quasi pars, & etiam appropriatum, in quantum appropriatum est

est quasi pars, quia sumitur pro eo, cui appropriatur: immodò, & ipsum appropriabile acceptum, ut non dum appropriatum, est quasi pars; quia ratio huius saluatur in vnica Persona, Quæ quidem ratio non ponit Trinitatem, sed concomitanter ponit personæ vnitatem, in qua sit. Vnde estò creatura communiter non repræsentet personam, ut personam, nec appropriatum, ut appropriatum; attamen repræsentat appropriabile, cuius ratio se habet ad modum partis, respectu Trinitatis in creaturis. Itaque illud dicitur vestigium, quod est repræsentatiuum huiusmodi appropriabilis: Quare supposita fide, naturaliter, idest naturali discursu reperire, & cognoscere possumus. In creaturis vestigium, & imaginem SS. Triadis, quia per fidei lumen dicimur ad vestigiatum, & imaginatum; at, seclusa reuelatione, agnoscimus quidem naturaliter vestigium; non pro formali, idest ut repræsentatiuum, sed tantum pro materiali, quatenus in creaturis agnoscimus vnitatem, veritatem, & bonitatem, quæ sunt appropriabilia Diuinis Personis; ac proinde cognoscimus vestigium pro materiali; non cognito vestigiato.

Not. 3. Quodd illa, quæ habent rationem vestigij in creaturis respectu Dei, sunt duplicis generis: quædam enim repræsentant secundum rationem similitudinis, cuiusmodi sunt ista tria, nempe vnitatem, veritas, & bonitas. Vnitatem siquidem repræsentat vnitatem primi principij; veritas veritatem, appropriatam Filio, & bonitas bonitatem, appropriatam Spiritui S. Alia verò repræsentant, secundum rationem proportionabilis tantum, iuxta assignationem à D. Aug. positam; & relatam à Nicol. de Nise in hac quæst. & consistit in his tribus; quæ sunt modus, species, & ordo; quæ consonant illis tribus, quæ habentur Sapient. cap. 11. *Deus omnia fecit in numero pondere, & mensura*: Nam modus sumitur pro mensura rei, & pro limitatione; & hæc repræsentant in Deo illimitationem principij actiui, non per rationem similitudinis, quia ratio modi, & mensuræ non reperitur in Deo; sed secundum rationem proportionabilitatis; quia limitationi creaturæ proportionabiliter correspondet illimitatio primæ causæ; numerus autem sumitur pro specie, & pondus pro ordine.

Not. 4. Quodd in hac quæst. sunt tres opiniones; Prima est D.

est D. Thomæ, quæ consistit in duobus dictis; primum est descriptio vestigij, quæ est huiusmodi. Vestigium in corporibus est impræssio, derelicta ex transitu alicuius super vacuum (supple in potentia plenum, vel supra plenum, ipsum) imperfectè repræsentans, idest illud, cuius est vestigium. Secundum dictum est, quod vestigium repræsentat aliquid tantum sub ratione speciei; imago verò sub ratione individui.

Verum differentia, allata à D. Thoma inter vestigium, & imaginem, improbat à Scoto; quia nulla creatura repræsentat Trinitatem, seu Deum, nisi secundum conceptus communes, & non secundum conceptum specialem, idest speciei specialissimæ, vt latè ostendit Doct. in 1. d. 3. q. 1. & sic non est differentia creaturæ ad creaturam, puta lapidis ad Animam rationalem in repræsentando Deum in ratione communi, & non communi; cum omnis creatura, quæcunque illa sit, repræsentet Deum, tantum in conceptu communi. Secunda est Henrici quol. 9. p. 1. art. 2. dicentis, quod ratio vestigij consistit in triplici respectu creaturæ ad Deum; nempe, vt ad causam effectiuam, vt ad causam exemplarem, & vt ad causam finalem. Primus respectus, inquit, repræsentat potentiam productiuam, quæ appropriatur Patri. 2. Artem exemplarem, quæ appropriatur Filio, 3. Diuinam bonitatem, quæ habet rationem finientis, respectu creaturæ. At hoc non videtur conuenienter dictum, inquit Scot. Quia licet vestigium de sui ratione dicat respectum ad id, cuius est; tamen præcisè non consistit in respectu, sed in aliquo absoluto, in quo fundatur; sicut similitudo, non solum consistit in respectu, quem formaliter dicit, sed fundamentaliter in aliquo absoluto, ad quod sequitur respectus. 3. est Scoti, ad cuius mentem sit,

I. Concl. Vestigium Trinitatis in creatura non dicitur respectu proprii alicuius Personæ, aut respectu appropriati, vt appropriatum, sed respectu appropriabilis tantum. Est Scoti in 1. d. 3. q. 5. Prima pars prob. Etenim per creaturam nullo modo inuestigari potest proprium alicuius Personæ D. ergo vestigium non dicitur respectu proprii alicuius Personæ D.

Prob. 2. pars. Siquidem cognosci nequit appropriatum,

vt appropriatum, nisi prius cognoscatur proprium, cui appropriatur, sed vi naturali id cognosci non potest; ergo &c. Prob. 3. pars. In creaturis reperiuntur aliqua repræsentantia ea, quæ sunt appropriabilia D. Personis; sed huiusmodi appropriabilia habent modum patris, respectu totius Trinitatis, ergo eorum repræsentantia habent rationem vestigij: mai. & minor patent ex dictis; quia in omni creatura est vnitas, veritas, & bonitas, quæ sunt appropriabilia D. Personis.

II. Concl. In omni creatura est vestigium Trinitatis. Hæc est communis omnibus Theologis; & consonat Sanctis Patribus, maximè D. Aug. qui lib. 18. cap. 7. de Trinit. ait. *Oportet, ut Creatorem per ea; quæ facta sunt, intellectu conspicientes, Trinitatem intelligamus, cuius in creaturis, eo modo, quo dignum est, appareret vestigium*, ergo &c.

Prob. ratione. In omni creatura reperiuntur aliqua tria repræsentantia aliquorum, quæ sunt appropriabilia tribus Personis Diuinis; vt constat ex dictis; ergo in omni creatura est vestigium SS. Triadis.

Arg. 1. cont. 2. conc. Vestigium potest naturaliter inuestigari, sed D. Trinitas nequit naturaliter cognosci per creaturas, ergo in creaturis non est vestigium D. Trinitatis. Resp. disting. mai. vestigium pro materiali, conc. pro formali neg. mai. & sic conceditur minor &c.

Contra. Per vestigium potest inuestigari id, cuius est imago, quia est similitudo eius; ergo si vestigium Trinitatis reperitur in creatura, potest naturaliter cognosci Trinitas; quod est falsum. Resp. data maiori, disting. conf. seclusa fide Diuina; neg. conf. lumine fidei conc. conf. Si quidem absque lumine fidei noscitur vestigium pro materiali tantum; ac proinde, absque ratione repræsentatiua, cuius est vestigium.

Arg. ex Scoto; qui in quæst. cit. docet; per vestigium, distinctè inuestigari id, cuius est imago; ergo si datur vestigium in creatura, per ipsam possumus distinctè agnoscere D. Trinitatem.

Resp. Scot. loqui de vestigio pro formali; & vt tale cognitum, non autem de vestigio pro materiali. Cæterum quod attinet ad distinctè cognoscere Trinitatem; solum voluit Scot. significare, per lumen fidei cognito vestigio,

posse

posse cognosci D. Trinitatem distinctè; quatenus ly distinctè se tenet ex parte ipsius partis repræsentatæ per vestigium; non autem, quòd possit distinctè; idest secundum propria, vel Personam D. vel Trinitatem agnoscere.

Arg. 3. Vestigium est medium cognoscendi rem, cuius est, sed in creaturis irrationabilibus nihil est, quod possit nobis esse medium cognoscendi D. Trinitatem; ergo in ipsis non est vestigium Trinitatis: min. pat. Quia in irrationabilibus nihil est, quod mediet inter Deum, & nos.

Resp. transeat maior, & disting. nihil est, quod possit, tanquam medium cognitum ducere in cognitionem D. Personarum, neg. tanquam medium essentiale: conc. Vnde inter Deum, & nos est medium accidentale tantum, & non essentiale.

Arg. ultimò. In creatura intellectuali est imago Trinitatis, ergo in illa non est vestigium. conc. pat. quia imago, & vestigium habent diuersas rationes repræsentandi.

Resp. conc. ant. & neg. conf. ad probat. neg. pariter conf. & ratio est, quia in creatura intellectuali secundum aliud, & aliud dicitur esse vestigium, & imago; dicitur namque vestigium quatenus est essentia creata; dicitur vero imago quatenus est vna essentia, habens plures potentias, & operationes; inter quas reperitur etiam ordo originis, vnde ascendimus ad D. processiones contemplandas. Verum pro ampliori doctrina ad hanc rem declarandam, tria sunt aduertenda in Anima rationali, vt aliququaliter percipere possimus eam, veluti imaginem D. Trinitatis. Primum. Quod Anima est incorporea, & immortalis, ac æterna. Secundum. Quod est prædita intellectu, memoria, & voluntate; ac proinde libero arbitrio. Ex quo fit, vt sit capax domini, & cunctis animalibus sua potestate præsit, & dominetur; & insuper sit capax Sapientiæ, Sanctitatis, gratiæ, & cæterorum donorum supernaturalium; immò, & ipsius Dei per visionem beatificam, ac fruitionem. Quibus dotibus, & excellentijs repræsentat, & exprimit proprietates Dei, nempe spiritualitatem, immortalitatem, sapientiam &c. Et si confusè, & imperfectè; quia solus Filius Diuinus est imago vnde quaque perfecta Dei Patris. Tertium, quòd Anima non solum respectu Deitatis est imago; sed iuxta Patres, & Theologos est

Imago, repræsentatiua etiam Trinitatis, & processiones D. Personarum aliququaliter adumbratur Processiones quidem. Etenim sicut Pater per memoriam fæcundam producit Filium, seu Verbum, & simul cum Verbo spirat Amorem, idest Spiritum S. ita homo per memoriam fæcundam intelligendo se, producit in mente Verbum expræssiuum sui, & sibi simile; & deinde in voluntate producit amorem sui. Numerum quoque exprimit, quatenus in eadem Anima sunt tres potentia, sicut in D. Essentia sunt tres Personæ. Itaque imago Trinitatis, quatenus in Anima exprimitur, consistit in tribus Animæ potentijs, prout sunt sub actibus suis, idest in potentijs, & actibus earum simul ita Scotus; ex quo igitur D. Essentiæ vnitatem repræsentant tres potentia vnius, & eiusdem Animæ, & actus earum reipsa distincti, distinctionem personarum, & pariter processionem, est in Anima D. Trinitatis imago. Hæc volui hic de imagine compediosè tradere; ne cogar, aliam quæstionem instituere, quomodò homo sit D. Trinitatis imago, de qua agi solet, vbi de hominis formatione ad imaginem, & similitudinem Dei tractatur: eò vel maximè, quòd occasione vestigij non pauca de imagine notata sunt.

### QVÆSTIO XIII.

*Vtrum naturali ratione probari possit, creationem esse possibilem.*

**N**OT. 1. Quòd licet ratione naturali demonstrari non possit, nequè à priori; nequè à posteriori creatio Mundi in tempore facta; ideòque sola fide credimus mundum incæpisse, vt docent Alenf. D. Thomas, & D. Bonau. Scot. & communis sententia Theologorum; nihilominus ostendi potest per rationes naturales phobabilitas creationis, ad cuius cognitionem videtur peruenisse Auicenna, dum in sua Philosophia dicit. Si fuerit eius esse post non esse absolutè, tunc aduentus eius à causa erit creatio, & hæc est dignior omnibus modis dandi esse. Eandem sententiam adumbravit etiam Arist. qui, quàmuis posuerit materiam ingenitam, iuxta communem Philosophorum sensum; immò, & Coelum; attamen posuit substantias separatas



51

ratas Cælorum motrices, quæ quidem substantiæ non dependent in esse à materia, & per consequens indicauit, esse creatas, seu productas independenter à subiecto.

Not. 2. Quòd vt ostensum est in 1. p. Theol. ex Scoto, non potest probari à priori, dari vnum Deum, sed bene à posteriori. Vnde per aliquam perfectionem Dei à posteriori probatam, probari potest alia eius perfectio, & per illam aliam vsquedum perueniatur ad perfectam Dei notitiam. Supposito ergo quòd probetur à posteriori, Deum esse immobilem, potest etiam ostendi, illum esse immortalem, & ex eius immortalitate spiritualitas, & ex spiritualitate Deum esse intellectiuum, volitiuum &c. Insuper potest etiam probari existentia Dei pluribus rationibus eidentibus; quarum aliquæ allatæ fuerunt in prima parte, quæ quidem rationes, estò non sint à priori, sed à posteriori, tamen euidenter ostendunt Dei existentiam.

Concl. Potest naturali ratione cognosci à posteriori, non solum possibilitas; sed etiam existentia creationis. Hæc est conformis doctrinæ Scot. vt videre est in 1. d. 2. q. 2. vbi probat, dari vnum primum ens infinitum, independentens &c. à quo omnia recipiunt esse; & in esse conseruantur, est tamen contra Vulpem, putantem, posse à priori demonstrari possibilitatem creationis; & adedò firmiter hoc asserit, vt non erubescat dicere Bassol. Scoti discipulum, qui consonat Scoto; delirare: in quo nimis excedit; ac proinde Vulpes delirare videtur.

Prob. conc. quoad 1. part. Posito; quòd possit naturaliter probari dari Deum, potest etiam naturaliter cognosci illi conuenire omnem perfectionem simpliciter simplicem, alioquin non esset Deus; sed posse aliquid creare est euidenter perfectio simpliciter simplex, quia est melior ipsa, quam non ipsa, ergo potest ratione naturali probari, Deo conuenire hanc perfectionem, ac proinde creationem esse possibilem.

Prob. 2. Potest euidenter ostendi omnia esse à Deo, quæ non sunt Deus; nam Deus est primum efficiens à quo omnia alioquin essent plura prima efficientia, quod æquè implicat, ac Deorum pluralitas; sed Angeli, Animæ, materia prima non potuerunt à Deo fieri per educationem ex potentia materiali, ex qua præexistente spiritualia non com-

ponuntur; nequè materia ex alia, quia sic daretur processus in infinitum: ergo necessario fuerunt producta à Deo immediatè per creationem, seu per actionem independentem à subiecto, ergo cum ex cognitione effectus inducamur ad cognitionem causæ, ex naturali cognitione rerum creatarum, & creabilium possumus ascendere ad naturalem cognitionem non solum creatoris, sed etiam creationis possibilis, & actualis.

Arg. 1. contra conc. Quod est naturaliter cognoscibile, agnoscitur per principia philosophica: sed hæc potius probant impossibilitatem creationis, iuxta illud axioma: ex nihilo nihil: ergo &c.

Confirmatur. Nam repugnat in terminis, quòd idem eadem via agnoscat simul, ut possibile, & impossibile, ergo cum via naturalis ducat nos ad eius impossibilitatem, non potest simul ducere ad possibilitatem.

Resp. neg. min. Vnde illud axioma intelligendum est de rebus generalibus, & corruptibilibus, quæ de facto, & regulariter contingunt, itaut sensus sit, nihil corruptibile generatur de facto ex nihilo. Ad confirmationem dicitur non repugnare à diuersis intellectibus idem agnosci, ut possibile, & impossibile, sed benè ab eodem intellectu eodem modo se habente in cognitione terminorum, & principiorum.

Arg. 2. Omne ens, vel est accidens, vel substantia. Primum, cum naturaliter existere nequeat extra subiectum, non potest cognosci, ut possibile extra subiectum. Substantia verò vel est materialis, & cum hæc dicat materiam non potest ut factibilis cognosci, nisi ex materia; vel spiritualis, & de hac vix potest haberi notitia, quòd sit simpliciter ab alio producibilis, ne dum creabilis, ergo non potest naturali ratione probari possibilitas creationis.

Resp. neg. mai. saltem quoad substantias, tam materiales, quàm spirituales; quia eas immediatè à Deo produci probari potest.

Arg. Repugnat in terminis cognosci, ut possibile, quod communis Philosophorum conceptio agnouit ut impossibile; ergo &c. Resp. Repugnaret in terminis, si vera esset, conceptio Philosophorum, sed quia est falsa; errauerunt enim in principijs; ideoquè non repugnat, immò

neceſſe eſt aliter phyloſophari, ne in eoſdem errores labamur; & vt Diuinæ fidei principijs, quæ ſunt infallibilia, aſſentiamur.

## DISPUTATIO II.

### *De Angelorum natura, & conditione.*

#### QVÆSTIO I.

##### *Vtrum Angeli ſint omninò ſpirituales, & incorporei.*

**N**OT. 1. Quòd cum Angeli nomen, ſecundùm Ethymon, non ſit naturæ, ſed officij, vt tradit D. Greg., ideoque triplicem habeat attributionem, & ſignificationem; in triplici ſignificatione à Scriptura, & à SS. Patribus uſurpatur. Primò ſumitur pro quouis indiuiduo, à Deo deputato, ſeuè perſona ad aliquod munus obeundum, & hoc ſenſu Sacerdos Domini appellatur Angelus, vt patet ex illo Malachiæ 2. *Labia ſacerdotis cuſtodiant ſcientiam, quoniam Angelus Domini.* 2. ſumitur pro ſolo, & quouis indiuiduo ſubſtantiali, purè ſpirituali, intellectuali, completo, & hoc ſenſu, tam boni, quàm mali ſpiritus dicuntur Angeli. 3. ſumitur ſolummodò pro ſpiritibus æterna gloria fruentibus. Quæſtio igitur procedit de Angelis, tam ſecundo modo, quam tertio modo ſumptis.

Not. 2. Quod de fide eſt, dari Angelos, vt clarè patet, tùm ex veteri, tùm ex nouo Teſtamento, quàm veritatem catholicam tradunt, & firmanr pluribus rationibus; SS. Patres, eſtò non ſint à priori, ſed ſolum à poſteriori, quæ videri poſſunt apud modernos Doctores: patet etiam eadem veritas ex Concilijs, & ſignanter ex Concilio Lateran. 3. c. firmiter, vbi inter cætera dicitur. *Deus eſt creator omnium viſibilium, & inuiſibilium, ſpiritalium, & corporalium, qui condidit utramquæ naturam, ſpiritualem, corpoream, Angelicam videlicet, & mundanam:* ita contra Saducæos, & Atheiſtas.

Not. 3. Quòd nomen ſpiritus eſt nomen æquiuocum, ac proinde variè, & à Phyloſophis, & à Theologis ſolet uſurpari. Primò prò tenuiſſima, & ſubtiliſſima re, ſiue ſit ſubſtantia, ſiue accidens, ſic rerum imagines ab obiectis ad

potentias emissæ vocantur species intentionales; sic pariter tenuissimæ ac puriores sanguinis partes, vocantur vel spiritus animales, vel vitales. 2. accipitur pro vento, aere, exhalatione, hinc spiratē, & respirare est idem, ac aerem trahere, & ventus nimio impetu irruens dicitur spiritus procellarum. 3. pro Anima, siue rationali, siue sensitiua, sic Eccles. c. 3. *Quis nouit si spiritus Filiorum Adam ascendat sursum, & si spiritus iumentorum descendat deorsum.* 4. pro natura intellectuallī omnis materiæ corporeitatem excludente, & sic Angeli, & Animæ rationales dicuntur spiritus.

Concl. Angeli sunt omninò incorporei, & spirituales. Hæc euidenter colligitur ex S. Scrip. quæ Angelos, siue bonos, siue malos appellat spiritus; quod propriè intelligi debet. Nam spiritus propriè sonat quod incorporeum, etiam phrasi S. Scrip.

Prob. etiam auctoritate Concil. Lateran. declarantis, Deum ab initio condidisse naturam, seu substantiam vtramquæ spirituales, & corporales, Angelicam videlicet, & mundanam. Quo nil clarius dici potuisset, vt aduertit Smising. in M. S. de Angelis, vbi contendit conclusionem esse de fide; quàmuis alij plures censeant, verba relata, non esse definitiue dicta à Concilio. Herincx adheret sententiæ Smising, adeout miretur adhuc repertos fuisse, qui post Concil. ausi fuerint, oppositum docere, vt Eugubinus, & Caietanus.

Prob. ratione theologica ab Alensi, q. 20. memb. 1. Deus potuit producere creaturam omninò incorpoream, sed talis creaturæ productio fuit conueniens ad vniuersi complementum; ergo Deus illam condidit: sed illa dicitur Angelus, ergo Deus eam produxit; mai. patet Deus namque produxit Animam rationalem, incorpoream, intellectualem, tanquàm substantiam incompletam, vt esset forma corporis, ergo potuit etiam producere substantiam incorpoream, intellectualem completam absque ordine ad corpus: min. etiam constat. Quia ad vniuersi complementum spectat, vt in illo sint omnium rerum gradus, ergo, sicut in illo est gradus substantiæ corporeæ completæ, & incompletæ, sic pariter debuit esse gradus, non solum substantiæ incorporeæ incompletæ, qualis est Anima rationalis, sed etiam completæ, nempe Angelus.

Arg. contra conc. auctoritate S. Scrip. quæ in psal. 103. habet. *Qui facit Angelos suos spiritus, & ministros suos ignem urentem*, siue (vt vertit Apost. ad Hebræos 1.) *flammam ignis*, ergo Angeli sunt substantiæ aeræ, vel ignæ.

Resp. Angelos ibi dici spiritus propter naturam incorpoream, vt plures veteres exponunt; dicuntur autem ignis; siue ob ignem spiritalem ardentis charitatis, vt Aug. siue ob vim purgandi animos, instar ignis, vt Nazian; siue ob efficaciam in puniendis Dei inimicis, vt alij exponunt.

Arg. 2. In Synodo 7. (quæ est Nicæna 11.) act. 5. recitatus fuit sermo cuiusdam Ioannis Episcopi Thessalonicensis, in quo asseritur, nil nisi corporeum posse pingi, sanctosquæ Angelos, vt potè corporeos posse pingi; immò additur Ecclesiam catholicam sic sentire, quibus lectis, vt refert noster Herincx. Tharasius Patriarcha dixit: *Ostendit autem Pater, quod, & Angelos pingere oporteat, quando circumseribi possunt, & vt homines apparuerunt. Deinde S. Synodus dixit. Etiam Domine.*

Resp. 1. Quod in Synodo 7. refertur id, quod adducitur in argumento, sed non approbatur.

Resp. 2. Synodum approbasse conclusionem scilicet Angelos posse pingi, dissimulata probatione, vt multi respondent. Non enim omnia, quæ in Concilijs, aut epistolis decretalibus Pontificum adducuntur ad probandum, eo ipso definiuntur, cum aliquando adducantur etiam probabilia, ita Herincx.

Arg. 3. Quam plures veteres Patres attribuunt Angelis corpora, vt Iustin. Tertul. Origines, Cyprian. Basiliius, nec non D. August. pluribus in locis, & D. Greg. & Athanasius, qui duo vltimi describunt Angelum esse animal rationale. Resp. Veteres Patres fuisse imbutos Philosophia Platonica, idèdque non est mirum, si ita senserint, & maximè, quia res ista non dum ab ecclesia erat satis declarata, prout declarari cæpit in Concil. Lateran. accedente consensu omnium Doctorum. Cæterum possent multi ex ipsis ad bonum sensum trahi, & explicari; videlicet loquutos fuisse de corporibus, adhærentibus, non verò intrinsicis: vel pro corpore intelligere substantiam veram, & solidam, quo sensu D. Aug. vocat animam rationalem corpus; & indicat Apost. ad Coloss. 2. *In Christo inhabitat*

*omnis plenitudo Diuinitatis corporaliter*, idest, verè, & substantialiter; & huiusmodi explicationes consonant eorum doctrinæ, cum alibi doceant Angelos esse corporis expertes.

## QVÆSTIO II.

*Vtrum Angeli sint compositi ex materia, & forma.*

**N**ot. 1. Quòd compositio est quadruplex. Prima est compositio ex partibus quantitatis, cuiusmodi est compositio corporis humani ex diuersis membris. Secunda est compositio ex partibus essentialibus physicis. Tertia est compositio methaphysica, hoc est, ex potentia, & actu, seù ex genere, & differentia. Quarta est compositio ex subiecto, & accidente.

Not. 2. Quòd materia potest accipi tripliciter. Vno modo materia sumitur pro hæceitate, seù differentia indiuiduali, vt Petreitas, Socreitas, & in hoc sensu debet intelligi, quando dicit Arist. lib. 1. Cœli, & mundi. Dum dico Cœlum, dico formam, dum dico hoc Cœlum, dico materiam cum forma; & alibi docet, quòd ea sunt vnum numero, quorum materia est vna. Secundo modo materia sumitur pro quantitate extensa; vnde dici solet, hic homo est valdè materialis. Tertiò sumitur materia pro altera parte compositi physici. Ex opposito triplex est immaterialitas. Prima opponitur differentiæ indiuiduali, & sic quidditates abstractæ, vt equinitas, & humanitas dicuntur immateriales, quia non habent differentiam indiuidualem. Secunda opponitur quantitati extensæ, & sic Angeli sunt immateriales. Tertia opponitur materiæ physiciæ, & sic forma physica, vt contradistinguitur à materia dicitur immaterialis.

Not. 3. Quòd in hac quæstione sunt duæ opiniones. Prima est D. Bonau. in 2. d. 3. art. 1. q. 2. Alens. 1. part. q. 29. memb. 2. Richard. in 2. d. 3. art. 1. q. 2. Aureoli, & quorundam aliorum dicentium Angelos esse compositos ex materia, & forma, non tamen conueniunt in explicatione huius sententiæ. Nonnulli adscribunt Angelis materiam spiritualem, quæ diuersæ rationis à nostra. Alij ve-

rò ma-



rd materiam eiusdem rationis cum nostra, incapacem tamen proprietatem corporis ratione formæ angelicæ; vt D. Bonau. vbi supra. Verum, obseruant Franciscus Herera, Frassen, & Herinex D. Bonau. non dissensisse à communi opinione, sed à modo loquendi; admittendo in Angelis materiam, & formam, hoc est ex potentia, & actu; sicut, & omnis creatura, quæcumque per se existit, componitur necessario ex actu, & potentia, vel dicuntur compositi ex materia, & forma, quatenus Angeli sunt mutabiles secundum perfectiones accidentales, vt infra dicetur. 2. opinio asserit Angelos non componi ex materia, & forma, & hæc est communis sententia, recepta ab omnibus modernis Doctoribus; ideò sit ad mentem Scoti.

I. Concl. Angeli non sunt compositi ex materia, & forma physica, sed materia, & forma methaphysica dumtaxat.

Prob. conc. quoad 1. part. Omne compositum ex materia, & forma physica est materiale corporeum, & corruptibile; sed Angeli, vt ostensum est in prima quæstione, sunt incorporei immateriales, ac proindè incorruptibiles; ergo non sunt compositi ex materia, & forma.

Prob. 2. pars. Quod ponitur in prædicamento substantiæ componitur ex genere, & differentia, sed Angeli ponuntur in prædicamento substantiæ, ergo componuntur ex genere, & differentia, quorum vnum appellatur materia, & alterum forma methaphysica.

II. Concl. In Angelis admittenda est compositio ex subiecto, & accidente: hæc pariter est communis, & de se patet, quia in Angelis sunt plura accidentia, quæ possunt adesse, & abesse absque subiecti corruptione; potest enim Angelus transire de amore ad odium, de gaudio ad tristitiam, de vna intellectione, ad aliam &c. sed hæc omnia sunt accidentia spiritualia, quæ sunt in Angelo, etiam tanquàm in subiecto; ergo in Angelis est admittenda compositio ex subiecto, & accidente.

Arg. 1. contra 1. part. auctoritate SS. Patrum. D. Aug. in lib. de mirabilibus S. Scrip. c. 1, ait. *Omnipotens Deus ex informi materia, quam ipse prius de nihilo condidit, cunctarum rerum, hoc est sensibilium, & insensibilium, intellectualium & intellectiuentium, species multisiformes diuinxit* D. Damasc. lib. de fide c. 3. *Licet quadam creatura, respectu nostri, materiam vacare dicantur,*

*quantar, tamen quicquid est aliud à Deo crassum esse, & materia constare; Boetius lib. de vnitare, & vno ait: Angelum esse vnum coniunctione materia, & forma: ergo Sancti Patres asserunt Angelos esse compositos ex materia, & forma.*

*Resp. ad auctoritates adductas, & adducendas hac vnica distinctione præmissa; distinctio est, quòd materia potest accipi dupliciter, vno modo pro ente finito, & limitato, carente aliqua perfectione, & in potentia ad illam: alio modo pro altera parte compositi, itaque expendendo Patres, dicimus eos loquutos esse de materia, primo modo accepta, quando dixerunt Angelos esse compositos ex materia, non verò de materia, secundo modo accepta. Vel dicimus D. August. & alios Patres loquutos fuisse ad mentem Platoniorum, quod D. Aug. in lib. de Confess. postea non approbat.*

*Arg. ratione: nulla substantia creata potest secundum idem agere, & pati, mouere, & moueri, sed Angelus agit, & patitur, mouet, & mouetur, ergo non secundum idem, sed agit secundum formam, & patitur secundum materiam; ergo in Angelis est materia.*

*Resp. dist. mai. nulla substantia creata, secundum eandem rationem formalem potest agere, & pati, conc. mai. secundum diuersam rationem formalem, nego mai. vel.*

*Resp. disting. mai. actione vniuoca nequit substantia, secundum idem agere, & pati: conc. mai. actione equiuoca; neg. mai. Potest siquidem idem agens agere in se ipso actione equiuoca aliquid producendo, & illud in se recipiendo; quo modo intellectus angelicus producit intellectationem, eamque in se recipit.*

*Arg. 2. Nulla substantia est pura potentia, quia esset nihil; neque est purus actus, quia esset Deus; ergo est composita ex actu, & potentia; quæ quidem potentia erit materia. Resp. conc. ant. quia illud dicitur actus purus, qui nulla caret perfectione, & disting. conf. Est actus potentialis, quatenus caret aliqua perfectione, conc. conf. ita vt constet ex materia, & forma physica; neg. conf.*

*Arg. 3. In formis dantur gradus vsquè ad formam spiritualem; ergo etiam in materijs admittendi sunt huiusmodi gradus vsque ad materiam spiritualem; ex qua constituentur Angeli.*

*Resp.*

Resp. conc. ant. & neg. conf. Dispar enim est ratio de formis, & de materijs, quia materia, propriè accepta, est imperfecta à toto genere; & ideo non sunt in ea admittendi gradus spirituales, quod non contingit in forma; cum secundum sui naturam à toto genere dicat perfectionem. Si verò accipiatur materia pro substantia spirituali, componibili ex genere, & differentia, atque perfectibili; fatemur, & nos, huiusmodi materiam, etiam in Angelis ponendam esse; vt ex dictis liquet.

Quæres. An Angeli sint immortales, non solum de facto, quia videlicet semper viuunt iuxta fidem, sed etiam natura sua. Resp. affirmatiuè ex communi Theologorum sententia. Prob. Nam ratione physicæ simpliciter; neque ex se petunt aliquando desinere, vt corporea, includentia principia corruptionis, & destructionis: neque possunt à causis secundis pati, seu recipere aliquid, ratione cuius connaturaliter deberent à Deo destrui, quia non datur agens naturale, quod possit introducere in substantiam Angeli qualitatem dispositiuam ad destructionem; vt in materiali substantia contingit; sed res semel producta exigit connaturaliter conseruari à Deo quousque, nec intrinseca, nec extrinseca rei dispositio petat destrui; ergo cum Angeli ita se habeant, ex natura sua petunt, & exigunt esse immortales; & vt tales à Deo conseruari.

Nec refert, quòd Angeli habeant non repugnantiam, vt non destruantur, quia cum repugnantia stat, & consistit, quòd destructio non sit ipsis connaturalis. Sicut namque ignis, applicatus combustibili, habet respectu Dei non repugnantiam ad non calefaciendum; & tamen non calefacere, non est ei naturale.

Confirmatur ex Concilio Lateran. sub Leone X. sess. 8. vbi declaratur. *Natura Animæ rationalis esse immortalis*; ergo à fortiori, Angeli sunt simpliciter, & sui natura immortales. Non tamen sunt naturà sua immortales hoc sensu, nimirum quasi natura illorum non possit destrui, & annihilari etiam à Deo, adeo vt immortalitas eis competat ex se, & ex naturæ necessitate, vt delirando dicebant antiqui Philosophi de intelligentijs; cum de fide habeamus, quamlibet creaturam in esse, & conseruari à Deo essentialiter dependere. Itaque Angeli sunt immortales philosophicè,  
theo-

theologicè autem mortales; & si sint simpliciter incorruptibiles; quatenus corrumpi nequeunt per dissolutionem partium, aut per destructionem formæ, cum careant partibus, realiter distinctis, & corruptionis principijs.

### QVÆSTIO III.

*Utrum Angelus, & Anima differant specie.*

**N**Ot. Quòd conueniunt Doctores, Angelum differre ab Anima specificè; & Animam ab Angelo, tanquam partem speciei, estò non tanquam speciem completam; discordant tamen in assignanda huius specificæ differentię ratione. D. Thom. cum suis, cui consentit Henricus quol. 17. q. 8. putat rationem huius differentię attendendam, esse penes diuersum modum intelligendi Angeli, & Animæ; rationem dat. Quia formæ intellectuales, quæ sic se habent, quòd vna in intelligendo discurrit, & altera non; non sunt eiusdem rationis; sed Anima in intelligendo discurrit, Angelus nequaquam; ergo &c.

Confirmatur à simili. Nam Anima sensitiua in Brutis non videtur distingui, nisi penes diuersos gradus sentiendi, & tamen ibi est differentia specifica, ergo pariter differentia specifica inter Angelum, & Animam colligi debet à diuersis intelligendi modis, & gradibus.

Verùm hæc ratio non placet Scoto. Tum quia non est a priori; nam diuersi gradus, & modi intelligendi in Anima, & in Angelis sunt quid posterius ipsorum essentia. Tum quia, nec à posteriori concludit; quia, vt ait Scot. si discurrere, & non discursere arguunt diuersas naturas intellectuales; cum Anima discurrat circa conclusiones, quas infert ex principijs, per se notis, & non discurrat circa eadem principia, sequeretur, Animam esse à se ipsa specie distinctam; sed hoc est falsum: ergo &c. Neque paritas, allata in confirmatione, aliquid iuuat. Bruta siquidem non distinguuntur inter se per varios gradus, magis, & minus sentiendi; quia magis, & minus non variant speciem, sed per formales, & específicas differentias, quæ nobis innotescunt per diuersas eorum proprietates. D. Bonau. existimat, rationem talis differentię esse petendam ex eo, quòd

quodd Anima fit vnibilis corpori, Angelus verò non ita. At nec ista ratio approbatur a Scoto. Quia omnis aptitudo, cum sit passio, vel se habeat ad modum passionis, supponit essentiam rei, seu subiectum, in suo esse iam constitutum; sed vnibilitas, & non vnibilitas sunt aptitudines, quæ emanant ab essentia rei, ergo non sunt prima ratio distinctionis, sed distinctionem supponunt, & si vnibilitas, & non vnibilitas notificent nobis à posteriori diuersitatem speciem Animæ, & Angeli.

Cæterum, si vnibilitas, & non vnibilitas sumantur radicaliter, in quo sensu putant nonnulli Doctorem Seraph. esse locutum, non solum à posteriori sed etiam à priori nobis ostendunt primam rationem specificam Angeli ab Anima. Denique Alens. p. 2. q. 20. docet, quod ratio distinguendi Angelum ab Anima est, quia Angelus est substantia libe a vertibilis immutabiliter; Anima verò vertibilis mutabiliter. At noster Macedo obseruat, Alens. docuisse eandem rationem distinctionis, quam amplexus est D. Thomas; quare contra Alens. militat eadem rationes &c. sit igitur iuxta Scotum.

Concl. Angelus, & Anima specificè differunt ex proprijs eorum naturis, quia videlicet Angelus est natura completa, Anima natura incompleta. Est Scoti in 2. d. 1. q. 6. & ab eodem ita prob. Quicquid est potens agere, est aliquod ens, habens actum primum, & prius est sibi secundum naturam suam ratio actus primi secundum se, quam in comparatione ad actum secundum, cuius potest esse principium; sed Angelus, & Anima est aliquod ens habens actum primum: ergo prius secundum se est actus primus, quam habeat actum secundum, hoc est vnibilitatem, vel intelligibilitatem; ergo prima distinctio vnus ab altero non est per naturam suam, in quantum est principium talis operationis, sed per naturam suam, vt hæc natura est ad se; licet per identitatem ipsa sit principium actus secundi.

Prob. 2. Ex eo precisè petenda est distinctio specifica Angeli ab Anima, quo posito, cæteris etiam non intellectis; cognoscitur, Angelum, & Animam esse diuersæ speciei; sed posita ratione naturæ completæ in Angelis, & incompletæ in Anima, sufficienter intelliguntur speciem differre; etiam si non intelligatur vnibilitas, & non vnibilitas.

billitas &c. ergo primaria ratio distinctiua Angel<sup>i</sup> ab Anima petenda est à conceptu naturæ completæ, vel incompletæ; quod est idem ac dicere, quia Angelus est hæc natura, & Anima est hæc natura.

Arg. 1. cont. concl. probando, quòd Angelus, & Anima non differant specie, sic. D. Aug. lib. 3. de lib. arb. docet, *Angelum, & Animam esse natura pares*; ergo &c.

Resp. D. Aug. non loqui de paritate naturæ per respectum ad prædicata specifica; sed in ordine ad beatitudinem, ad quam pari ratione ordinantur, cum idem obiectum beatificum sit Angel<sup>i</sup>, & Animæ.

Arg. 2. Operationes, & potentia Animæ, & Angel<sup>i</sup> sunt eiusdem speciei; ergo Angelus, & Anima non differunt specie: patet conf. Quia potentia, & operationes sequuntur naturas rerum, quarum sunt operationes; operari namque sequitur esse &c. Resp. hoc argumentum tangere difficultatem, circa quàm Scotus est problematicus; ut in sequenti questione ostendetur, quæ de re pro nunc tenendo partem affirmatiuam respondemus dist. ant. Potentia intellectiua &c. differunt specie ex parte fundamenti; conc. ex parte obiecti; neg. ant. Nam Anima, & Angel<sup>i</sup> versantur circa idem obiectum; quia verò emanant à fundamentis diuersis, idèò fundamentaliter sunt diuersæ: sed de hoc infra &c.

Arg. 3. Si Angelus, & Anima differrent specie, sequeretur quemlibet Angelum esse perfectiorem qualibet Anima; & per consequens, capacitatem cuiuscunque Angel<sup>i</sup> in ordine ad beatitudinem esse maiorem capacitate cuiuscunque Animæ; sed consequens non videtur admittendum, ergo nec antecedens: patet conf. quia beatitudo satiat totam capacitatem naturæ, ergo maior beatitudo tribui debet maiori capacitati, & sic beatitudo Angel<sup>i</sup> esset maior Beatitudine cuiuscunque Animæ, quod est contra Sanctos Patres, asserentes, Animam Christi summè frui.

Resp. ex Scoto concedendo maiorem cum sequela; & neg. min. ad illud autem, quod adducitur de beatitudine, negamus assumptum; quia beatitudo, ut ex S. Scrip. & Theologorum doctrina constat, non datur cum proportionem ad naturam, sed cum proportionem ad merita; ac proinde non satiat totam capacitatem Angel<sup>i</sup>, & Animæ; cum possent



possent habere maiorem, & maiorem beatitudinem; si maiora haberent merita; vt latè ostenditur in disp. de beatitudine part. 1.

Arg. vltimò. Si species Angeli constituitur per id, quod est actus spiritualis completus; & species Animæ per id, quod est actus incompletus, non videtur posse Angelum, & Animam inter se specie differre; ergo omnes Angeli, & Animæ erunt indiuidua vnius speciei infimæ, & atomæ: patet sequela. Vnde enim desumeretur? Non quidem ex parte generis, quod est spiritus, & adæquatè diuiditur per actum completum, & incompletum: non ex parte differentię; quia hæc solum poterit esse maioris, vel minoris perfectionis intra illam eandem speciem actus completi, quæ perfectio non est specifica, sed gradualis, & idem dicendum de Anima, quæ est actus incompletus; ergo &c.

Confirmatur. Etenim omnis substantia spiritualis necessariò est intellectiua; sed talis ratio intellectualitatis non videtur posse multiplicari specie in genere actus completi, & incompleti, ergo solo numero Angeli, & Animæ differre possunt.

Resp. hoc argumentum tangere difficultatem grauem. Ex quo fit, vt Doctores in diuersas sententias abeant. Si quidem D. Bonau. Albetus Magnus; & ex modernis Arriaga, & Mastrius opinantur, omnes Angelos esse eiusdem speciei; sicut omnes Animæ sunt eiusdem speciei; vnde concedunt totum argumentum. Verum ne recedamus à comuniore sententia, quam docet ipsemet Scot. vt infra monstrabitur, respondemus neg. sequelam ant. & ad discursum, qui fit ad ostendendam veritatem sequelæ; dicendum, quod principia specificæ distinctionis desumenda sunt à rationibus formalibus specificis. Substantia siquidem spiritualis se habet, vt genus ad substantiam completam, quales sunt Angeli, & ad substantiam incompletam, quales sunt Animæ; ac proinde non per graduales, sed per specificas perfectiones multiplicantur species in natura intellectuali. Quod explicari potest paritate Animalis. Planè animal contrahitur velut genus per duas differentias oppositas, nempe per rationalitatem, & per irrationalitatem; per rationalitatem vna tantum species constituitur, nempe homo; at per irrationalitatem, per quam indi-

specie, siue sint causata totaliter, siue partialiter. Nam calor e. g. causatus ab igne, & calor causatus à sole sunt eiusdem speciei, etsi causæ sint diuersæ speciei. Similiter mus causatus, seu productus per propagationem, & mus generatus ex putri sunt eiusdem speciei; estò causæ sint diuersæ speciei. Neque hæc alia propositio est vniuersaliter vera: Causata siue partialiter, siue totaliter ab eadem causa, & sub eadem ratione formali, & specifica sunt eiusdem speciei. Idem enim sub eadem ratione formali potest causare immediatè specie distincta; & quantò causa est vniuersalior, & illimitatio, tantò eadem omnino ex natura rei indistincta potest causare plura specie distincta, vt patet de causa vniuersali.

Not. 2. Quòd sunt aliquæ entitates, quæ ex rationibus suis formalibus sic se habent, quòd semper specie differunt à quibuscumquæ causis, etiam si à specie diuersis causentur, vt patet de mure, generato ex putri, & de vespe, generata, siue per propagationem, siue per putrefactionem; & è contra sunt aliquæ entitates, quæ ex suis rationibus formalibus sic sunt eiusdem speciei, vt quantumcumque à diuersis causis producantur adhuc erunt eiusdem speciei, vt patet de mure, generato ab alio mure, & de mure, generato ex putri.

Not. 3. Quòd aliquæ sunt potentia, quæ comparantur ad operationes proprias immanentes, & aliquæ comparantur ad operationes, seu actiones transeuntes: primo modo se habent intellectus, & intellectio; secundo modo ignis, seu potentia eius calefactiua respectu ligni. Potentia primo modo si non sunt subordinatæ, nec vna in operando præsupponit de necessitate operationem alterius, & respiciunt obiectum idem, sub eadem ratione consideratum, sunt productiuæ operationum eiusdem rationis, & communiter sunt eiusdem speciei tam potentia, quam operationes; sic se habent intellectus humanus, & Angelicus, ac eorum operationes. Si verò sunt subordinatæ vt intellectus, & voluntas, intellectio, & volitio, intellectus, & fantasia, tunc specie distinguuntur, & potentia, & actus earundem, estò circa idem obiectum operentur, loquendo de distinctione, quæ se tenet ex parte potentia; secus autem si se teneat ex parte eiusdem obiecti; obiectum

enim specie diuersum habet ex parte sui causare principaliter diuersitatem specificam, sed quia actus magis dependet à potentia, quàm ab obiecto, hinc est, quòd, licet obiecta sint diuersa, nihilominus sunt eiusdem speciei.

Not. 4. Quòd gradus perfectionales, alij sunt indiuiduales, alij specifici; indiuiduales addunt maiorem perfectionem, sed non variant speciem, sic albedo, vt quatuor, & albedo vt sex. Specifici verò addunt perfectionem, & diuersificant, vt patet in animabus sensituiis; quòd enim aliqua est perfectior, eò plures gradus sensituios habet: Vnde equus habet animam sensituiam perfectiorem quàm musca, non solum quoad gradus indiuiduales, sed etiam específicos. Sic pariter Angelus superior est diuersæ speciei ab inferiori, estò vterquè sit substantia spiritualis. Itaque si velimus partem affirmatiuam tenere, scilicet quòd intellectus Angelicus, & humanus, & eorundem operationes specie differant, dicere debemus, quòd gradus alterius, & alterius intellectus sunt specifici. Si partem negatiuam, tunc debemus dicere, quòd illi gradus sunt indiuiduales, & se habent intellectus, & operationes in perfectione, sicut calor vt quatuor, ad calorem vt sex. His notatis ponuntur argumenta ex vtraque parte.

Arg. prob. Quòd distinguantur specie. A fundamentis specie diuersis non possunt pullulare passionēs eiusdem speciei, ergo nec ab Anima, & Angelis possunt emanare potentia eiusdem speciei: antecedens patet de rudibilitate, & risibilitate.

Resp. neg. paritatem, est enim maxima disparitas de Homine, & de Equo, & de Anima, & Angelo; quia in istis reperitur idem genus substantiæ spiritualis, & intellectuallis, ac etiam eadem propensiones; in illis verò aliter se habet, quia passio emanat à toto subiecto, & non à ratione generica, hoc est ab animali... Vel resp. neg. paritatem, quia intellectus non est passio, sed potentia Animæ, ideo &c.

Arg. 2. Quod est principium distinctiuum alicuius, non est eiusdem rationis cum alio; sed gradus intelligendi maior, vel minor in anima est principium distinctiuum vnius ab alio, ergo non sunt eiusdem rationis.

Prob. min. Anima sensitua in Brutis distinguitur penes gradus

gradus sentiendi, fumendo gradum sentiendi pro fundamento, ergo, & intellectus Angelicus, & humanus penes gradus intelligendi pro fundamento acceptos; eadem enim est ratio; nam sicut quælibet Anima sensitiua est sub genere Animæ sensitiuæ incommuni, ita quilibet intellectus stat sub intellectu communi ut sic, & per consequens, sicut distinguitur vnum, ita, & aliud.

Resp. neg. min. ad prob. neg. ant. seu paritatem, quia fit transitus à fundamento ad potentiam, concedo quòd Animæ distinguantur ab Angelis; sed negamus de potentijs; potentiæ namque admittunt gradus perfectionis indiuiduales, non autem específicos; idem etiam currit de animalibus sensitiuis, respectu potentiarum, minus, vel magis perfectarum, estò Animæ distinguantur specie, iuxta regulam superius traditam, quod non est vniuersaliter vera hæc propositio. Causata à diuersis &c.

Arg. pro parte negatiua, probando scilicet, quòd non distinguantur specie. Potentiæ distinguuntur per actus, & actus per obiecta ex Arist. in lib. de anima; sed idem est obiectum intellectus Angelici, & Animæ, ergo eiusdem rationis. Resp. dist. ant. distinguuntur &c. extrinsecè, concedo; intrinsecè, nego; & hoc modo loquitur Arist.

Contra. Obiectum concurrat ad producendum actum, tanquam causa partialis, licet minus principalis, ergo intrinsecè distinguuntur.

Resp. neg. conseq. quia causa efficiens non distinguit intrinsecè effectum, sicut intrinsecè non componit, vel non includitur in ipso. Stat igitur, quòd distinguatur actus per obiectum extrinsecè, & non intrinsecè.

Contra. Ideò dicuntur potentiæ Animæ, & Angeli specie differre, quia fundamenta specie differunt: ergo, & quando obiecta specie differunt; actus enim, & à potentia, & ab obiecto habent esse, ergo si actus distinguuntur, quia sunt à potentijs specie diuersis; ergo, & quando sunt ab obiectis diuersis specie, & per consequens, quando est idem obiectum non distinguitur; & sic intellectus Angeli, & Animæ, cum respiciant idem obiectum, non distinguuntur specie.

Resp. conc. totum discursum vsquè ibi; ac per consequens, quando est idem obiectum, non distinguitur, negamus,

gamus, autem quòd, quando obiectum est idem, sit etiam identitas specifica in potentia; & ratio est, vt docet Scotus, loc. cit. in resp. ad 1. princip. quia, quæcumquè differentia sufficit ad distinguendum, sed non quæcumquè identitas sufficit ad perfectam identitatem aliquorum; identitas autem ex parte obiecti est identitas secundum quid; diuersitas verò ex parte fundamenti est diuersitas simpliciter; & identitas, secundum quid non tollit diuersitatem simpliciter.

Contra. Si potentia Animæ, & Angelorum non differunt specie, sequeretur quòd visio beatifica Angeli, & Animæ non differret specificè, quod est falsum, quia omnes species diuersæ habent ordinem determinatum secundum perfectiùs, & imperfectiùs.

Resp. ex Scoto neg. sequi huiusmodi inconueniens, quia cum dubium sit, an potentia intellectiua, tam Angeli, quam Animæ se habeant actiue, vel passiuè, vnde tota causa visionis beatificæ erit obiectum, & cum obiectum sit idem, eadem etiam specificè erit visio tam Angeli, quam Animæ; sic possumus respondere, quòd potentia se habeant passiuè. Vel resp. ad Scoti mentem nos non habere pro inconuenienti, quòd vnaquæquè visio beatifica ex parte inæqualitatis potentia specificæ recipiat maiorem, vel minorem perfectionem. Immò defendimus inæqualitatem visionis beatificæ expetendam esse, ne dum ab inæqualitate luminis gloriæ, sed etiam ab inæqualitate potentia, vt latè ostensum est in disputatione de Visione beatifica.

## QVÆSTIO V.

*Vtrum in eadem specie sint plures Angeli,  
solo numero differentes.*

**N**OT. 1. Quòd ad intelligentiam præsentis quæstionis faciunt ea, quæ dicta fuerunt in logica de natura communi, de specie, & de principio indiuiduationis; vnde, ne dicta reperamus, solum ad mentem reuocabo, quòd differentia, alia est generica alia specifica, & alia indiuidualis, & hæc vltima sic diffinitur ad mentem Scoti: *differentia*

ferentia indiuidualis, seu hecitas est vltima realitas rei cuiuscumque, tam substantialis, quam accidentalis, tam materialis, quam spiritualis, propter quam vnaqueque res constituitur indiuidua, & singularis; vnde in quolibet indiuiduo est natura specifica, differentia indiuidualis, &, præter ista, in naturis substantialibus datur subsistentia, quæ quidem subsistentia in natura intellectuali nuncupatur Persona, ac proinde quilibet Angelus est Persona.

Not. 2. Quod Doctores multum variant in positione principij indiuiduationis; etenim Henricus de Gandauo opinatur naturam specificam constitui indiuiduam per simplicem negationem communicabilitatis, absque alio positio superaddito; contra quam opinionem arguit Scotus; eo quia negatio, quæ inseparabiliter competit alicui subiecto, semper supponit aliquod positium, ratione cuius talis negatio competit, vt patet de rationali, & de negatione eiusdem rationalis. D. Thomas, cum suis, existimat principium indiuiduationis esse per quantitatem, vel per materiam, vt est sub quantitate, non per materiam absolutè, quia sic different genere, si different per materiam sed; quia vna pars materiæ est sub altera parte quantitatis, vnde impossibile est inuenire distinctionem numeralem in eadem specie, vbi nec est quantitas, nec materia sub quantitate, licet quidam Thomistæ contendant principium indiuiduationis esse materiam, affectam quantitate, & alijs accidentibus: sed hæc opinio nihil placet Scoto, ideoque eam sic improbat. Quælibet substantia, saltem diuinitus, potest existere, sine quolibet accidente, non autem sine sua singularitate, ergo nullum accidens potest esse principium indiuiduationis; neque materia, talibus, & talibus accidentibus affecta; eo quia tam materia, quam forma ingreditur essentiam formalem rei materialis; differentia autem numerica est extra essentiam. Tum, quia eadem numero materia remanet ingenita, & incorrupta, & tamen genitum, & corruptum numero distinguuntur. Tum, quia res spirituales, quales sunt Angeli, qui nullum ordinem dicunt ad materiam, nihilominus numero distinguuntur, vt probabimus infra, adducendo fundamenta nostræ conclusionis. Neque existentia, vt aliqui



putant potest vlllo modo poni principium indiuiduationis, cum ipsa existentia sit modus afficiens ipsam rem singularem, ac proinde non potest esse ratio indiuiduationis. Itaque remanet vnquamquæ rem indiuiduari, vt docet Scotus, per vltimam suam realitatem, quæ a Scotistis vocatur hæceitas, quæ quidem hæceitas distinguitur formaliter tantum a re, cuius est ratio indiuiduationis.

I. Concl. Admittenda est distinctio specifica inter Angelos; hæc est Alenf. p. 2. Scoti in 2. d. 3. q. 7. §. quod dicunt, quamuis Mastrius, Delgadillus, & quidam alij Scotistæ contendant Scotum oppositum tenere, sed vt bene notat Macêdo decipiuntur, cum Scotus in 2. d. 3. cit. arguens contra aduersarios, dicat sic. Confirmo hoc etiam per aliquos, quibus est inconueniens; quod aliqua species simul tota sit damnata naturæ intellectualis simpliciter; multæ autem species essent Angelorum, in quibus nulla esset saluata, posita ista positione, idest Thomistarum, & paulò inferius adducta auctoritate Augustini, sic loquitur. Ista totalitas, & partialitas in Angelis, non videtur esse irrationabilis, nisi ponatur, quod nulla species Angelica quantum ad omnia indiuidua totaliter perierit, & ita aliqui de quacumque specie corruerunt, & aliqui perstiterunt, & clarius in 3. d. 21. q. 1. ad p. principalē; tunc dico, quod argumentum illud est bonum contra illos, qui ponunt Angelos singulos in singulis speciebus: sed hoc credo falsum, idè non cecidit aliqua species Angelica tota &c. Itaque est aperta Scoti sententia, non omnes Angelos esse eiusdem speciei infimæ, sed plures species Angelorum defacto dari; estò opinio opposita sit probabilis vt patet ex D. Damasc. lib. 21. de fide, c. 3. *Æquales, ait, ne inter se, an dispar es sunt; haud quamquam comparum habemus, solus ille scit, qui illas creauit.* Similia habet D. Aug. Basilii, Athanas. Prob. ratione. Nulla apparet repugnantia ponere plures Angelorum species, immò hæc positio cedit in Diuinæ potentie, ac sapientie comendationem, & vniuersi pulchritudinem; ergo &c.

Prob. Non repugnat in genere intellectiuo ponere præter Angelos, Animas, quæ specie differant ab Angelis, ergo nequæ repugnat plures Angelorum species: patet conf. quia Anima exceditur ab Angelo, ratione gradus perfectio.

tionis, & completi; ita potest vnus Angelus alium Angelum in gradu completo excedere, secundum rationem specificam, vt etiam supra indicauimus in solutione eiusdem argumenti, ergo &c.

II. Concl. Angeli, nedum plurificari possunt numero intra eandem speciem, sed etiam de facto sic se habent, vt plures Angeli, solo numero differentes, reperiantur in eadem specie. Conclusio quoad primam partem est Scoti, & Scotistarum, nec non aliorum Theologorum; immò, & Thomistarum, si loquamur de potentia Diuina absoluta. Quò ad secundam partem est Scoti, D. Bonau. & aliorum communiter contra Thomistas.

Prob. à Scoto 1. pars sic. Nulli speciei infimæ repugnat communicari posse pluribus; ergo nec repugnat habere sub se plura inferiora, solo numero differentia: cons. patet: ant. prob. Si alicui speciei infimæ repugnaret communicari pluribus, vel hæc repugnantia proueniret ex perfectione, vel ex imperfectiōe talis speciei; non ex perfectione, quia communicabilitas conuenit naturæ Diuinæ; nec etiam ex imperfectiōe, quia communicari pluribus conuenit speciebus infimis substantiæ corporeæ, quæ sunt imperfectiores: ergo ex nullo capite repugnat &c.

Prob. 2. Omnis natura, quæ potest intelligi sub ratione vniuersalis absquē contradictione, est plurificabilis numero; si enim esset de se hæc ei repugnaret intelligi sub ratione vniuersalis, sicut repugnat naturæ Diuinæ; sed omnis natura creata potest intelligi sub ratione vniuersalis, absquē contradictione; quia nulla est de se hæc, alioquin per potentiam Dei absolutam non posset multiplicari etiam specificè, quod est contra quosdam Thomistas, censentes de potentia Dei absoluta posse numero multiplicari Angelos intra eandem speciem: ergo &c.

Resp. Thomistæ, aliquid posse dici vniuersale duobus modis: nempe ex parte rei, & ex parte intellectus: primo modo, quando res, quæ est vniuersalis, reuera est in pluribus, vt animalitas in homine, & in Brutis &c. secundo modo, quando res illa ab intellectu percipitur secundum se, & absquē eo, quod inueniatur in pluribus, sed solum repræsentetur sine conditionibus indiuiduantibus, quæ sunt materia, & quantitas; quare dicunt naturam Angeli-

cam non posse intelligi sub ratione vniuersalis primo modo, sed secundo modo, quia illa quidditas intelligitur tantum, sine conditionibus indiuidualibus, sed non inuenitur in pluribus indiuiduis. At cont. dist. Caiet. arguit sic Rada. De ratione vniuersalis est, posse de pluribus dici, & in pluribus esse; ergo diuidere vniuersale in illud, quod est in pluribus, & in illud, cui repugnat esse in pluribus, est diuidere vniuersale in se, & in oppositum sui, quod absurdum est.

Confirmatur. Nam intellectus non potest verè applicare intentionem vniuersalitatis, nisi in fundamento talis vniuersalitatis capaci, alioquin ita benè posset applicari secunda intentio generica naturæ specificæ, & intentio generis indiuiduo, sicut generi; ergo oportet, quod sit in re fundamentum, supra quod fundetur talis, & talis intentio vniuersalitatis, ergo cum intellectus concipit naturam Michaelis, e. g. sub ratione vniuersalis, inuenit in ea fundamentum communicabilitatis, absque contradictione, & repugnantia.

Prob. 3. à Scoto. Potest Deus, annihilato vno Angelo, eius speciem reproducere in alio indiuiduo, non quidem in eodem, quæ erat antea, quia idem numero Angelus annihilatus non potest reproduci in sententia Thomistarum, asserentium, quod si eadem numero Anima non remaneret incorrupta, sed simul cum ipso corpore periret, non posset idem numero homo resurgere, vt expressè docet S. Thomas 4. d. 44. q. 2. ad 3. ergo in diuerso indiuiduo ab eo, qui fuerat prius; ac proinde possibilia sunt plura indiuidua. Resp. Thomist. quod annihilato vno Angelo, si Deus reproduceret in eadem specie Angelum, esset idem Angelus, ac annihilatus. Ad illud de resurrectione dicunt, verum esse non posse resurgere eundem numero hominem, si aliqua eius pars non permaneret; sed non est verum de iterata reproductione, à Deo facta. Verùm ista responsio est friuola, & ideo meritò à Scotistis modernis impugnatur, quam impugnationem breuitatis causa omitto.

Prob. vltimo. Si Angeli non possent numero multiplicari sub eadem specie, maximè, vel quia non haberent differentiam indiuidualem, vel quia non haberent illam distinctam à specifica; sed neutrum dici potest, quia constat

Angelos singulares esse, cum habeant subsistentiam, quæ immediatè non recipitur nisi in natura singulari: neque secundum, quia sicut in alijs rebus, ita in Angelis reperitur differentia indiuidualis, & specifica: ergo &c.

Prob. conc. autoritate August. dicentis in Enchiridio cap. 28. *Quod quia tota natura humana cecidit, ideo placuit a iam partem saltem reparare sed quia non tota natura Angelica, sed pars cecidit, eam non reparauit.* Vnde sic Scotus concludit: Ideo teneo, quod quidditas Angelica non est de se hæc cum non sit actus purus; ergo ex auct. D. Aug. habetur non solum possibilis plurificatio indiuiduorum in natura Angelica, sed etiam de facto intra eandem speciem plura esse indiuidua, quæ erat 2. pars conclusionis, quæ insuper prob. per illud Isaïæ 6. ubi dicitur: *Duo Seraphim stabant.* In quibus verbis quis non percipit indicari numerum; duo namque Seraphim exprimit duo singularia speciei atomæ; alioquin esset manifestum absurdum dicere duo, & non significare duo indiuidua eiusdem speciei; cum nomen Seraphim determinet quandam speciem atomam; ac proinde duo Seraphim sunt duo indiuidua eiusdem speciei atomæ; nequè aliter, & non nisi violenter, inquit Macedo, explicari potest Scrip. textus. Dicerent Aduersarij, illa duo Seraphim poni pro indiuiduis speciei subalternæ, non inferioris, & per consequens non dari duo indiuidua &c. At hæc responsio, & explicatio est prorsus violenta, nam idem esset, ac ponere duo animalia pro duobus hominibus, quod nihil ineptius, vt exagerrat Doctiss. Macedo in 2. collat. 2. diff. 2.

Arg. 1. cont. 2. conc. & signanter cont. 1. p. Arist. lib. 7. meth. ait. In his quæ sunt sine materia, idem est, quod quid est, & id cuius est; sed Angeli sunt sine materia, ergo Angeli non possunt esse plures, manente, quod quid est, seu eadem ratione specifica.

Resp. Arist. loqui de materia sumpta pro differentia indiuiduali, quæ ideo dicitur materia, quia constituit in esse simpliciter subiectum, quod dicitur materiale, comparando ipsum ad esse quidditatum, quod dicitur formale, non verò de materia pro altera parte compositi.

Arg. 2. Omnis differentia formalis est specifica, sed Angeli differunt inter se differentia formali, quia sunt forme  
distinctæ

distinctæ, ergo necessario omnes Angeli. Differunt specie; ac proinde, nulla inter ipsos est differentia numeralis, prob. min. Angelus differt ab Angelo, qui est forma, ergo habent inter se differentiam formalem.

Resp. Scotus, quod differentia formalis potest accipi dupliciter. 1. modo pro differentia, quæ fit per formam. 2. pro differentia formarum, seu pro formis ipsis, quæ differentiam afficiunt. Vnde primo modo, maior est vera, sed minor falsa. Ad prob. dicit Doctor, quod est ibi fallacia consequentis. Non enim sequitur formæ differunt, ergo formaliter, seu per formam differunt; sicut non sequitur plures homines inter se distinguuntur, ergo per humanitatem differunt; non enim per humanitatem differunt, sed per suas differentias individuales. Vnde aliud est aliquid distingui, & aliud esse rationem distinctionis.

Arg. 3. In entibus perfectis, cuiusmodi sunt Angeli, nihil est quod per se non intendatur à natura; sed multitudo numeralis non intenditur à natura: ergo &c. min. patet, quia infinitas non per se intenditur à natura, sed multitudo numeralis sub vna specie tendit in infinitum, ergo &c. Resp. Scotus, quod hæc ratio peccat infallacia consequentis; non enim sequitur in bona consequentia: Infinitas non intenditur, ergo nec pluralitas numeralis; nam potest intendi pluralitas limitata, & rationabilis, non autem infinita, & irrationabilis. Cæterum falsum est illud assumptum. Agens non intendere pluralitatem individuorum. Vel enim intelligit de agente summo, seu prima causa, vel de causa creata; si de primo falsum est, & patet in stellis, inanimatis, & de animabus, quæ sunt spiritus: Si de secundo constat pariter falsitas. Itaque negatur min. &c.

Contra. Multitudo individuorum solum intenditur propter conseruationem speciei, quæ in rebus corruptibilibus deficeret, nisi propagaretur, vt ait Arist. 2. de Anima; sed hæc ratio non militat de Angelis, cum sint spiritus immortales; ergo &c.

Resp. Scot. neg. mai. & ratio est, quia cum rerum omnium artifex præcipue intendat bonum, & ordinem, vniuersi in rerum formatione, non solum debet intendere earum diuersitatem secundum speciem, sed etiam multi-

rudinem secundum indiuidua, vtrumquè enim conducte ad ordinem, & pulchritudinem vniuersi. Quare D. Damascenus in elementario cap. 12. inquit. *Congruium fuit, plures Angelos in eadem specie producere, ut communicantes ad inuicem natura gauderent inuicem, & naturali beatitudine copulati ad inuicem secure, & amicebilitate disponantur.*

Vnde ex dictis rejicitur error Auicennæ 9. meta. opinantis numerum intelligentiarum proportionari numero cælorum, & per consequens non esse nisi decem iuxta vndecim orbes, quod sic delirando ponebat. Prima intelligentia producebat secundam: Secunda tertiam: Tertia quartam vsquè ad decimam: & vltimam intelligentiam secundum ipsum producere terrena, & materialia, eaquè disponere, & gubernati; patet etiam error Saducæorum, qui nullum spiritum admittebant; nec non Arist. dicentis secundum numerum motuum Cælorum numerandas esse intelligentias.

## QVÆSTIO VI.

*Vtrum dentur plures Angelorum Hierarchiæ, & ordines.*

**N**Ot. 1. Quod hierarchiæ vocabulum, græcum est, & idem sonat ac Principatus, seu collectio Personarum aliquo modo sacrarum sub aliquo Principe. Triplicem autem hierarchiam distinguit S. Dionys. lib. de cælesti hierarchia c. 3. Prima, & principalis, & omnium exemplar est summa, & ineffabilis potestas Trinitatis; aduerte tamen, quod in diuinis non datur propriè hierarchia, quia Diuinæ Personæ sunt omnes æquales in potestate: quare hierarchia sic propriè describitur: Est rerum sacrarum, & rationabilium ordinata potestas in subditis debitum retinens Principatum, hierarchia autem est sacer Principatus, quia componitur ex his nominibus græcis, idest hieras, quod est sacrum, & arcos, quod est Princops. Secunda reperitur propriè in natura Angelica, & tertia in natura humana, de quâ hic non quærimus. Prima ergo hierarchia appellatur supercælestis, quia est Diuinarum Personarum, non quod in Diuinis Personis sit ordo præcipiendi.



di, sed ordo principiandi, quo videlicet. Pater est à nullo, Filius à Patre, & Spiritus S. ab utroque. Secunda dicitur celestis. Tertia dicitur subcelestis, siue humana, & ecclesiastica.

Not. 2. Quod secundum Gregorium *Ordo Angelicus dicitur multitudo celestium spirituum, qui inter se aliquo munere gratia simulantur, sicut, & naturalium donorum participatione conueniunt.* Vnde considerare oportet, quod ordinum distinctio fundamentum habet ex natura, dispositionem ex gratia, & complementum ex gloria. Quare in Dæmonibus est ordo quantum ad naturam, quia ut dicit D. Dionys. lib. de Diuinis nominibus, naturalia in Demonibus remanserunt integra, sed obscurata per malitiam; ac proinde in ipsis est quædam prælatio, ut tradunt Magister, Alenf. D. Bonau. D. Thom. & alij communiter; filij namque tenebrarum imitari conantur, & si falsò, & imperfecte filios lucis; Cæterum hæc coordinatio, & prælatio non est ex Diuina institutione positiua, sed solum permissiua, cum sit à Principe tenebrarum instituta ad perniciem Animarum, & infestationem Ecclesiæ. Vnde eleganter D. Bonau. in 2. d. 6. art. 3. q. 2. ait. *Nulla ibi manet iuris obligatio, sed solum maleuolens consideratio.*

Concl. in Cælesti Republica dantur tres hierarchiæ, & nouem ordines, seu chori, & vnaquæque hierarchia continet tres ordines, seu choros. Hæc est omnium Theologorum contra quosdam hæreticos negantes Angelorum hierarchias. Prob. conc. quò ad 1. part. auctorit. SS. Patrum, & præsertim D. Dionys. qui in lib. de cælesti hierarchia fateretur huiusmodi doctrinam recepisse à D. Paulo suo præceptore, quam doctrinam deinde omnes Patres, tam Græci, quam Latini amplexi fuere.

Prob. etiam auct. Ecclesiæ, quæ iam ab antiquo enumerat varios Angelorum ordines in officio omnium Sanctorum. Prob. 3. auct. S. Scrip. quæ meminit ordines Seraphinorum Ezech. 10. Cherub. ad Ephes. 1. dominationum, Principatum, potestatum, & virtutum: ad Coloss. 1. Thronorum: ad Thesal. 4. Arcang. & Daniel. 10. ubi quidam Angeli dicuntur custodire Regna, & nationes, & ad Rom. 8. & alibi sæpè, ergo dantur varij ordines Angelorum. Prob. ratione Angelorum merita in via fuerunt ineq-

qualia : ergo , & gloria . Tum quia decet terrenum Regem habere multos ministros collaterales in varios cætus , & ordines distributos ; ergo à fortiori hoc decet Regem Cœlestem , ergo in Cœlesti Republica dantur hierarchiæ , & ordines , seu chori Angelorum .

Prob. 2. pars auct. D. Dionys. qui primus omnium tradidit partitionem naturæ Angelicæ in hierarchiam supremam , mediam , & infimam ; quæquidem partitio recepta deinde fuit ab omnibus Sanctis Patribus , & à scholasticis ; ergo ex communi sententia Patrum , & scholasticorum , & perpetua traditione , habemus , dari in Angelis tres hierarchias . Prob. etiam ratione . Nam in triplici diuersitate sunt operationes hierarchiæ Angelorum , quæ secundum Dionys. in lib. de cœlesti &c. cap. 6. sunt purgare , & purgari , illuminare , & illuminari , perficere , & perfici : ergo huiusmodi operationes ostendunt tres esse hierarchias : antecedens patet , quia supremæ hierarchiæ Angelorum , à solo Deo purgantur , illuminantur , & perficiuntur , & hi Angeli deinde purgant , illuminant , & perficiunt Angelos mediæ hierarchiæ , communicando eis nouas notitias , quibus carebant . Angeli pariter secundæ hierarchiæ sic purgati , illuminati , & perfectionati rursus purgant , illuminant , & perficiunt Angelos infimæ hierarchiæ , qui deniquè purgant , illuminant , & perficiunt homines . Insuper ostenditur , & declaratur , quomodo hierarchiæ diuiduntur in choros , seu ordines , & quomodo inter se ordinantur . Prima hierarchia dicitur supræma , eò quia componitur ex spiritibus alijs præstantioribus , qui dicunt habitudinem ad Deum , veluti assessores intimi Cœlestis Regis , à quò immediatè purgantur , illuminantur , & perficiuntur , & isti supræmi Principes partiuntur in tres ordines , seu choros , nempe Seraphinorum , Cherubinorum , & Tronorum ; Seraphim interpretatur ardor , vel incendium charitatis ; Cherubin interpretatur plenitudo scientiæ ; Troni , dicuntur , eò quia in ipsis Deus placidiori modo quiescit ; ideoquè dicuntur sedes Dei ad recipiendos in se , vt loquitur D. Dionys. Diuinos fulgores , & in alios transfundendos . Secunda hierarchia appellatur media respiciens statum præfecturæ generalis , & constituitur ex Dominationibus , Principatibus , & Potestatibus

secun-

secundum D. Greg. & Ambros. estò D. Dionys. loco potestatum ponat virtutes. Dicuntur Dominationes, quia dominatum quemdam particularem in inferiores exercent circa Regimen Ecclesiæ, & hominum præsidendo inferioribus, & ordinando, quæ sunt agenda. Principatus sic dicuntur, quia speciali modo assistunt principibus, & regibus, nec non inferiores Angelos instruunt de eorum tutela, & eruditione in rebus pertinentibus ad eorum salutem. Potestates sic nominantur, quia insigni pollent potentia, quâ malorum Angelorum reprimunt insultus, ne hominibus noceant in corporalibus, vel spiritualibus. Tertia hierarchia infima ministerijs particularibus deputata componitur ex virtutibus, Archangelis, & Angelis; virtutes sic dicuntur, quia magnifica, prodigiosa, & miraculosa opera solent perficere. Archangeli sic nuncupantur, quia sunt nuncij speciales, & maiores, quàm Angeli; tum quia præfunt custodiæ Regnorum, & Prouinciæ. Angeli tandem sic vocantur, quia sunt nuncij minores, minora nunciando, & isti præfunt custodiæ hominum. Vnde secundum aliquos carent particulari nomine, & solum communi vocabulo Angelorum appellantur. Prima hierarchia comparatur statui contemplatiuorum, ac proindè in ea sunt tres gradus secundum tres actus contemplationis. Secunda hierarchia comparatur statui prælatorum, & Tertia hierarchia statui actiuorum, de quibus videri possunt commentatores D. Dionys. & etiam D. Bonau. in 2. sent. & alibi, cum Doctor Seraphicus in suis operibus agat de Theologia Mystica, ad quam spectat hæc materia.

Arg. 1. cont. conc. probando quod in Angelis non sunt plures hierarchiæ. Hierarchia idem est ac sacer Principatus; sed vnus tantum est summus Princeps omnium, ergo vna tantum hierarchia.

Resp. argument. benè probare, quod detur tantum vna hierarchia, si attendatur vnitas summi Principis, sed non sequitur, quin sint plures secundum distinctas multitudines alio, & alio modo gubernationem Principis recipientes.

Arg. 2. In humana natura est tantum vna hierarchia; ergo, & in natura Angelica est tantum vna.

Resp. neg. cons. concesso ant. & ratio est: quia omnes homi-

homines sunt eiusdem speciei, & simili modo recipiunt gubernationem summi Principis; non sic autem est de Angelis.

Arg. 3. Hierarchia importat principatum, & praelationem, sed in Angelis non potest esse praelatio; ergo neque Principatus. Prob. min. Vbi est praelatio, est etiam subiectio, & seruitus, & disparitas; sed in Angelis non habet locum neque seruitus, cum sint omnes liberi, neque disparitas cum omnes æque videant Deum in gloria: ergo in Angelis non est praelatio.

Resp. conc. mai. & neg. min. ad prob. dist. mai. vbi est praelatio propriè nimirum potestas coercendi subditos, est seruitus, conc. mai. Vbi est praelatio impropriè, idest potestas imperandi alijs sine cupiditate, & superbia dominandi, sed quædam ciuilis dominatio excellentior, neg. mai. Itaque in Angelis est quoddam regimen, seu praelatio ciuilis, superiores dominando inferioribus; qualis praelatio fuisset etiam inter homines innocentes, si status innocentie sterisset. Quare hanc dominationem, & politiam agnouit, & docuit D. August. in domibus iustorum, dicens lib. 19. de ciuit. Dei c. 14. *Non enim iusti domandi cupiditate imperant, sed providendi omnia. Hoc naturalis ordo præferibit, ita Deus hominem condidit;* & loquens de muliere in statu innocentie inquit: *Mul. ex fuisset subdita dilectionis potius, quàm conditione.* Similiter in Angelis est disparitas naturæ, gratiæ, & gloriæ, vt patet ex dictis.

Quæres 1. Vtrum Angeli sint numero finiti, vel infiniti.

Resp. Quod variant Doctores; nam alij putant esse numero infinitos in nixi doctrinæ Nisseni lib. de Opificio hominis, dicentis: *Angelorum copias esse numero infinitas; & infra, Ad infinita propè millia esse diffusas.* Alij putant esse numero finitos; at non conueniunt in numero assignando. Quidam censent Angelos esse plures omnibus creaturis corporeis, tam in specie, quàm in indiuiduis consideratis. Quidam arbitrantur, Angelos ita se haberi ad homines quoad numerum, vt nonaginta nouem ad vnum, desumpta proportionem ex parabola centum ouium. Quidam opinantur Angelos sic se habere, vt nouem ad vnum, secundum aliam parabolam dragmarum decem. Quidam denique homines, & Angelos æquali numero esse. Sunt etiam, qui putant

tot homines ad æternam felicitatem esse prædestinatos, quot Angeli lapsi sunt. Itaque dicendum cum communi Theologorum sententia, Angelos non esse numero infinitos, sed finitos, in maxima tamen multitudine, cum passim S. Script. ingentem numerum indicet, & præsertim Daniel. 7. *Milia millium monstrabant ei, & decies milles centena milia assistebant ei;* & Apocal. 5. *Audisti vocem Angelorum multorum, & erat numerus eorum milia millium.* Quot autem sint Angeli incertum est, solus Deus, qui illos condidit, nouit numerum eorum. Nihilominus noster Frassen probabile putat, Angelos numero plures esse, quam species corporeæ, & præstantiorum specierum indiuidua, quàmuis probabilius censeat, numerum Angelorum excedere multitudinem hominum, qui sunt, fuerunt, & futuri sunt; quàm sententiam probat auct. SS. Patrum, & deniquè hac ratione communi Theologorum. Singulis hominibus à Deo deputatur Angelus Custos ex infimo ordine; ita quod vnusquisquè hominum, qui fuerunt à mundi primordio, & ad finem vsquè futuri, perculiarem suum habuerit, aut habiturus sit Angelum. Immo légimus in reuelatione Sanctæ Brigittæ lib. 4. cap. 11. tot esse in illo infimo ordine Angelos; vt ex illo plusquam decem singulis hominibus in custodiam deputari possent. Verùm hæc ratio videtur supponere tanquam certum, Angelos deputatos ad custodiam hominum, qui ex hac vita migrarunt, non deputari postea ad custodiam aliorum hominum, qui nascuntur, quod mihi non satis probatur.

Quæres 2. An singuli Angeli propria habeant nomina.

Resp. Verisimilius videri singulos, quibusquè Angelis à Deo assignata fuisse propria nomina, non quidem vt per illa ab alijs Beatis cognoscantur, vt docet S. Greg. homil. de centum ouibus, sed vt inter loquendum, illis nominibus vtantur beati; nam post diem tremendi Iudicij alij Beati de alijs, & de Angelis loquentur: ergo verisimilius apparet, quod vnusquisquè Angelus habeat proprium nomen: & quod de Angelis bonis dicimus, etiam de malis iudicandum.

Cæterum Sanctorum Angelorum tantum septem sunt, quorum nomina memorantur à scriptoribus catholicis, & sunt isti, Michael, Gabriel, Raphael, Uriel, Salatiel, si-

uè Sealtiel, Iehudiel, & Barachiel. Quare præter ista nomina, nec vsurpanda, nec inuocanda sunt alia; cum nec ex S. Scrip. nec ex Sanctis Patribus habeantur; vt videre licet apud Frassen t. 2. d. 2. art. 1. q. 1. in fine.

Quæres 3. Quando Angeli fuerunt creati.

Resp. cum Magistro sentent. d. 2. D. Bonau. 2. p. 1. art. 2. q. 3. cum D. Thoma, Scoto, & omnibus ferè scholasticis, Angelos esse creatos, non ante mundum, sed simul cum mundo; ita euidenter colligitur ex Concil. Lateran. & refertur in capite firmiter de Sanctiss. Trinitate. *Simul ab initio temporis utramque de nihilo condidit creaturam, Angelicam, & mundanum, ac deinde humanam.*

Dices. Nulla fit mentio in Genesi de Angelorum creatione, ergo &c. Resp. Angelos tacitè esse compræhensos nomine Cœli, quò significauit Moyses tam continens, quàm contentum: prout tradunt Patres, & Theologi.

Quæres 4. An sit adeò certum, Angelos esse creatos simul ab initio temporis, vt oppositum sit saltem erroneum in fide.

Affirmant Ferrariens. Cano, Molina, & quidam alij, & maxime ob auctoritatem Concil. cit. quò videtur definitiue procedere; cum in confessione fidei, quæ incipit: *Firmiter credimus, & simpliciter confitemur*, vno contextu subiungat verba supra relata. Nec refert; quòd D. Thomas p. 1. q. 61. expressè neget, oppositum esse erroneum, præcipue, vt ait, ppter sententiam Gregorij Nazianzeni, nam oportet dicere, vel D. Thom. non meminisse huius decreti, vel ipsum ignorasse; etiam si tunc esset adhuc satis recens, & per Greg. IX. iam tum radactum in corpus iuris, vt præclare aduertit Herinx part. 2. tract. de Angelis. Nihilominus, etsi conc. ob sua fundamenta, & ob communem omnium consensum sit indubie præferenda, nec videatur amplius posse sine temeritate negari; oppositum tamen ab erroris nota vindicant Doctores passim, sinè, quia Concil. Lateran. id solum dixerit ex communi doctrina incidenter non definiendo; cum hoc ad Scopum illius non spectaret, siuè quia explicari aliqualliter posset, quòd scilicet, Deus Angelicam, & humanam creaturam condiderit simul, id est pariter; idque non ab æterno, sed ab initio temporis, Angelicam scilicet, in quodam sui temporis, ini-



tio, similiter & mundanam, estò non vnico, & eodem-  
vtramquè. Ita noster Herinx loc. cit.

Quæres 5. Vbi fuerint Angeli creati.

Resp. Angelos probabilius fuisse creatos in Cælo Empe-  
reo: ita communis Theologorum sententia, cum Magi-  
stro. Alens. D. Thoma, D. Bonau. sic pariter videntur  
docere Sancti Patres, qui videri possunt apud Doctores  
modernos. Immò consonat hæc sententia S. Scrip. signifi-  
canti in varijs locis, Angelum è Cælo cecidisse, seu esse  
inde expulsum; vt Isaias 14. *Quomodo cecidisti de Cælo Lucifer,  
qui mane oriebaris?* Luca 10. *Videbam Sathanam cadentem sicut  
fulgur de Cælo;* & Apocal. 12. vbi describitur prælium ma-  
gnum, factum in Cælo.

### DISPUTATIO III.

*De intellectu, & voluntate Angelorum.*

#### QVÆSTIO I.

*Vtrum Angelus intelligat per suammet substantiam,  
vel per potentiam a substantia distinctam.*

**N**OT. 1. Quodd apud omnes Doctores Catholicos certum  
est Angelos cognitione intellectuali esse præditos,  
sed incertum est de principio cognitionis, idest per quid  
Angelus intelligat. Quidam volunt (omisso comentato-  
re, qui 12. meta. affirmat, in substantijs separatis essentiam,  
& operationem non esse quid distinctum) vt Durandus in  
2. d. 3. q. 5. quòd licet intellectio, quà Angelus intelligit  
alia à se sit realiter distincta ab eius substantia, illa tamen,  
quà intelligit se ipsum, est prorsus indistincta. Alij, vt  
Thomistæ, contendunt principium intellectiuum Angeli  
esse realiter distinctum ab eius essentia, cum per ipsos sit  
purum accidens.

Verum Scotus, cum sua schola, docet potentiam intelle-  
ctiuam, & volitiuam, tam Angeli, quam Animæ esse distin-  
ctam formaliter tantum ab eorum essentia, vt alibi osten-  
sum est.

NOT. 2. Quodd, vt traditur in lib. de Anima; duplex in-  
tellectus Animæ distinguitur, nempe agens, & patiens,  
seu

seu possibilis, vel passibilis. Intellectus autem agens duobus modis dici potest. Primo latè, prout est facultas quomodocumquè actiua, siuè productiua suorum actuum, siuè specierum, seu habituum intellectualium, & in hoc sensu nemo Theologorum negat, esse in Angelis intellectum agentem. Secundo strictè, quatenus est facultas solum, & immediatè productiua specierum intelligibilium in intellectu possibili illis carentibus, siuè abstrahendo species illas à phantasmatè, siuè aliter agendo. Similiter intellectus possibilis ex opposito duobus modis intelligi potest, vel pro quacumquè potentia passiuà receptiua, & sic dicitur passiuus, quatenus recipit suos actus; vel pro facultate, quæ, vt tradit Arist. lib. de Anima, cap. 4. sit prius nuda potentia in genere intelligibilium, & deinde fiat omnia intelligibilia per susceptionem specierum, vel Verbi mentis.

I. Concl. Angelus non intelligit per suam substantiam, sed per facultatem, seu potentiam, à sua substantia formaliter distinctam; quæ dicitur intellectus, & hæc eadem conclusio currit de voluntate.

Prob. conc. quoad 1. part. D. Dionys. lib. de Cœlesti hierarchia c. 11. distinguit in Spiritibus virtutem à substantia, vnde sic loquitur. *Intra omnes Diuina mentes cœlesti ratione sua diuisa sunt in essentiam, in virtutem, & actionem*: Idem docet D. Aug. lib. 6. de Trin. & etiam D. Anselm. in lib. de casu Diaboli: ergo &c.

Prob. ratione. Etenim duobus modis fieri posset, vt Angelus intelligeret alia extra se per suam substantiam, vel quia substantia Angeli suppleret vicem speciei, respectu cuiusquæ obiecti; vel quia in ea, tamquàm in obiecto cognito, viderentur omnia alia obiecta; sed neutrum dici potest: non primum, quia substantia Angeli, non est vniuersalis representatio omnium obiectorum: nequè secundum, quia licet substantia Angeli posset esse medium cognitum, ducens in aliquam cognitionem Dei, & fortè aliorum effectuum, quos ipsa virtute continet, non tamen in cognitione aliarum rerum naturalium, quia non est causa illarum, nec eas eminenter continet; ac proinde non est sufficiens principium ex parte obiecti ad eas cognoscendas. Secunda pars conc. probatur ex dictis alibi; sicut enim omnes passionès, proprietates, & potentia emanant

nant ab essentia, ita non distinguuntur ab ipsa realiter, sed formaliter tantum, & consequenter realiter cum ipsa identificantur.

II. Concl. In Angelis admittendus est intellectus agens, & patiens, propriè dictus: hæc est Scoti in 2. d. 3. q. 11. & sic ab ipso probatur. Omnis actiua potentia, quæ absquæ imperfectione tribuitur naturæ inferiori, non est deneganda naturæ superiori; sed intellectus agens in hominibus, qui sunt natura inferiores Angelis, verè admittitur etiam à Thomistis, ergo ab ipsis non est denegandus Angelis. Prob. min. Maxima est perfectio in qualibet natura, quod habeat in se virtutem, & principium, quod possit sibi acquirere conuenientem perfectionem, sed intellectus agens est principium, quod homo potest assequi notitiam, & scientiam, quæ est eius perfectio: ergo perfectionis est in homine habere intellectum agentem, ergo, & in Angelis.

Resp. Thomistæ mai. arg. esse quidem veram de perfectione simpliciter, non verò de illa, quæ solum ponitur ad supplendam imperfectionem; vnde cum intellectus agens in hoc sensu ponatur in homine, non sequitur, quod sit admittendus etiam in Angelo.

Contra. Qua ratione admittitur intellectus agens in homine, eadem admittendus est in Angelo; eo quia, & si Angeli habeant species sibi concreatas; tamen rerum omnium, maximè singularium notitiam sibi congenitam non possident; ac proindè, vel eam acquirere possunt, & sic egent intellectu agente, vel si non possint, sequitur quod Angeli sint deterius conditionis, quàm homines; Tum, quia actio, quæ agens superioris ordinis præuenit operationem agentis inferioris, non aufert ab eo potentiam actiuam, respectu suæ operationis; ergo, quàmuis Deus concreasset Angelo omnes cognitiones; attamen perfectionis est, quod retineat suas potentias, vt patet etiam de Christo, in quo erat intellectus agens, estò haberet scientiam omnium rerum, cart. 59. Confirmatur ex Macedo: vide infra cart.

Prob. 2. à Scoto ratione ipsa, qua D. Thomas oppositum conclusionis stabilire nititur, quam Scotus deducit in oppositum conclusionis D. Thomæ. Obiectum adæquatum intel-

intellectus Angelici, vel est quid singulare, vel quid vniuersale per prædicationem; adeo ut complectatur sub se omnia prorsus intelligibilia. Non primum, quia res singularis creata, quantumvis perfecta nequit continere formaliter, vel eminenter omnia intelligibilia ab Angelo: Non secundum, quia sequeretur res materiales, & corporeas. V. g. Cælos, & elementa, non posse ab Angelo cognosci, nulla enim potentia versatur circa id, quod non continetur sub obiecto suo adæquato. Si autem primum admittant Thomistæ, cum sensibilia, & materialia non sint de se proximè, & actu intelligibilia, quia non sunt obiecta proportionata facultati, purè intellectuali, oportet ad ea percipienda, quòd Angelus habeat intellectum agentem, quòd mediante species à rebus ipsis materialibus excipiat, ac per easdem materialia cognoscat, si aliunde earum cognitionem non habeat.

Arg. cont. 1. conc. Angeli sunt puri actus, & intellectiui essentialiter: ergo nihil distinctum possunt recipere, per quod intelligant. Resp. dist. ant. Sunt puri actus excludentes compositionem physicam, conc. excludentes formam spiritualem, qualis est intellectio, neg. ant.

Arg. 2. Angelus est intelligens actu; ergo intelligit per suam substantiam: patet consequ. quia ideo Anima non intelligit per suam substantiam, quia est intelligens solum in potentia, vt potè corpori coniuncta.

Resp. neg. conf. Natura enim intellectualis tripliciter se haberi potest ad suam intellectionem. Primò, ita ut sit intelligens solum in potentia. 2. quod sit intelligens, sed per actum distinctum ab ipsa. 3. per actum, qui sit eadem natura intelligentis. 1. & secundo modo competunt Animæ, & Angelis. 3. modo soli Deo competit, qui est actus purus.

Arg. cont. 2. conc. Intellectus agens, & possibilis ita nominantur, & solum distinguuntur per comparationem ad phantasmata; sed in Angelis non sunt phantasmata, ergo nequè admittendus est intellectus agens, & possibilis.

Resp. neg. mai. Nam oportet, quòd Angelus in cognitione rerum materialium recipiat species ab illis, & deducat ad statum spiritualitatis. Vnde patet, quòd non solum per comparationem ad phantasmata ponitur intellectus agens,

sed etiam per alias rationes, vt ostensum fuit in probatione conc.

Arg. 2. Intellectus possibilis est agens, ergo non sunt distinguendi vlllo modo, maximè in Angelis, intellectus possibilis, & agens, patet consequentia, quia intellectio est actio; ergo intelligere est agere; ac proinde intelligens est agens. Resp. neg. conf. ad prob. dicitur, quòd intellectio non est actio de genere actionis, sed actio de genere qualitatis; quàmuis scilicet actio accipiatur pro actu producto, & non pro trasmutatione productiua.

Arg. 3. Actio immanens est in agente, sed intellectio est actio immanens, & est in intellectu possibili, ergo intellectus possibilis est agens. Resp. Actio immanens est in agente, eo quod fiat in agente, propriè loquendo de agente, neg. mai. eo quod non terminetur ad aliquem terminum productum in esse reali, tanquam ad passum conc. mai. & concessa min. negatur consequ. ob rationem assignatam.

Arg. 4. Intellectus possibilis elicit intellectionem, sicut voluntas volitionem, sed voluntas est agens respectu volitionis, ergo pariter intellectus possibilis est agens respectu intellectionis. Resp. ad mai. quòd intellectus possibilis passiuè elicit intellectionem, intellectus autem agens, actiuè; elicere autem conuenit, tam principio actiuo, quam passiuo, sed diuersimodè, videlicet vni actiuè, alteri passiuè; ita Nicolaus de Nise ad 3. q. intellectus humani; ex quò patet discrimen inter voluntatem, & intellectum.

Quæres. An intellectus Angelicus sit discursiuus ita vt ex rebus cognitis alias ignotas agnoscere valeat.

Resp. affirmatiue ex Scoto, q. 4. & 5. prol. & in 2. d. 1. q. 1. d. 7. vbi asserit, non videri probabile Angelis esse denegandum omnem prorsus discursum cont. D. Thomam, & Thom. p. 1. q. 58. art. 5. qui opinantur intellectum Angelicum non esse discursiuum, ita ut procedat à principijs ad conclusiones, seorsim eas intelligendo.

Prob. Scot. sic. Ideo Angelus non esset discursiuus, quia non haberet virtutem deducendi conclusiones ex præmissis, ex hypothesi, quòd conclusiones non essent ipsi notæ; vel quia omnes conclusiones ipsi fuissent notæ ab innitio suæ creationis; vel deniquè, quia saltem habitualiter eas

nouisset ab ipso exordio suæ formationis: sed nullum istorum rectè potest affirmari; ergo &c. Non quidem primum; esset enim imperfectio in Angelo, si non haberet virtutem colligendi ignotum ex cognitis; nequè secundum, eo quia falsum est, quod Angelus omnes conclusiones actu simul intellexerit, alias infinitas ferè cognouisset virtute naturali, cum infinitæ conclusiones ex rebus creatis inferre possint, quod implicat in intellectu creato. Nequè tandem tertium; quamuis enim Angelus omnia habitualiter nouisset ab initio, vel per habitum, vel per species diuinitus ei inditas, non tamen inde sequeretur, quòd non esset discursiuus; sicut à pari homines non minus forent discursiuus, estò agnoscerent omnes conclusiones per species sibi à Deo inditas, vt constat de Anima Christi. Quod si opponantur à Thomistis autoritates SS. Patrum, & signanter D. Dionysij, & D. Bernardi, qui videntur tradere, Angelos sine discursu intelligere.

Resp. Sanctos Patres tantum velle, Angelos non intelligere modo humano, sed independenter à materia, & à phantasmatibus, nequè cum labore, & difficultate, vt homines scientias comparare; ex quò patet, Angelos reuerà proficere posse in scientia.

## QVÆSTIO II.

*Vtrum ad res cognoscendas indigeat Angelus  
rationibus cognoscendi.*

**N**Ot. 1. Quòd ratio cognoscendi, aliquando est ipsa essentia rei cognitæ, vt patet in cognitione intuitiua; aliquando autem est aliud ab essentia rei, & tunc verè, & propriè dicitur species intelligibilis, quòd si interdum dicatur habitus, hoc solum est, quia habet modum formæ permanentis, non de facili deletibilis: habitus enim, propriè dictus, generatur ex actibus. Species autem intelligibilis diuiditur in speciem impræssam, & expræssam. Prima sic describitur: est virtualis similitudo alicuius obiecti, effectiuè concurrens cum intellectu ad cognitionem producendam, de qua plura diximus in disp. de visione beatifica, querendo: An sit possibilis species impræssa Diuinæ



essentiæ ad eam intuitiue attingendam. Species expressa est terminus internus cognitionis, qui in intellectu dicitur verbum mentis, in imaginatione phantasma; quod quidem Verbum est Imago expressa ipsius obiecti cogniti.

Not. 2. Quodd omnes Theologi conueniunt, in Angelis fuisse concreatas saltem species rerum vniuersalium, etiam præstantiorum indiuiduorum, quæ Deus, vel formaue-  
rat, vel formaturus erat. Siquidem hæc veritas apertè de-  
ducitur ex S. Scrip. quæ Ecclesiast. cap. 17. affirmat, quod  
Deus primos parentes repleuerit disciplina intellectus,  
scientia, spiritus, & sensu repleuerit cor eorum. Quare  
si homines Angelis inferiores huiusmodi dona à Deo rece-  
perunt, iure meritò eadem, & potiora donata fuisse An-  
gelis, asserere debemus; audiamus quid dicatur de Lucife-  
ro in Ezechiel. 28. *Tu cherub signaculum similitudinis, plenus sa-  
piencia, & perfectus decore in delicijs Paradisi Dei fuisti. Tu Cherub  
extensus, & protegens, perfectus in vijs tuis à die conditionis tue,  
donec inuenta est iniquitas in te:* quæ in sensu allegorico à San-  
ctis Patribus de Principe rebellium Angelorum interpræ-  
tantur. Cæterum huiusmodi specierum infusio non est  
dicenda naturalis, quasi natura Angelorum illas exigit,  
estò species ipsæ naturalium rerum sint in substantia natu-  
rales, quia Angelus potuisset sua facultate acquirere rerum  
cognitiones, ac proindè sibi species comparare: sed talis  
infusio potius dicenda est gratuita, quàmuis fundata in li-  
bertate Dei, & congruentia desumpta ex statu perfecto, in  
quò Angeli fuerunt creati.

I. Concl. Angelus indiget speciebus impræstis ad cogni-  
tionem abstractiuam rerum possibilem, aut præterita-  
rum, aut futurarum, aut non sufficienter præsentium.

Prob. à Scoto in 2. d. 3. q. 10. Intellectus humanus eget  
speciebus ad rerum possibilem, & non debite præsentium:  
ergo, & intellectus Angelicus. Conseq. patet, quia non  
est maior ratio de vno, quam de alio; immò fortassè faci-  
lius apparet, quod intellectus humanus non indigeat spe-  
ciebus, cum possit ipse determinari per species phantasti-  
cas, quod in intellectu Angelico assignari non potest.

Prob. 2. Omne obiectum debet influere in potentiam,  
& eam determinare ad cognitionem, vel per se, vel per  
aliquid aliud, illud repræsentans, sed res illæ, abstractiue  
cogno-

cognoscendæ nequeunt per se ipsas mouere intellectum, cum non sint realiter existentes, nec ipsi debitè præsentès: ergo Angelus eget speciebus ad illas agnoscendas; & hæc eadem ratio militat de rebus absentibus. Quod enim Angeli res corporeas existentes videre non possint in quacumquè distantia, insinuat S. Scrip. pluribi, & maximè Iob cap. 1. *Circuui terram, & perambulauit eam &c. Nunquid considerasti seruum meum Iob?* & Matt. 12. *Et ueniens inuenit eam uacantem, Scopis mundatam & ornatam, tunc vadit, & assumit septem alios spiritus nequiores se, & intrantes habitant ibi.* Quarè etiam ex Doctrina Sanctorum desumitur, Animas in Lymbo, Purgatorio, aut Inferno, naturaliter ignorare, quæ hic aguntur; ac proinde necessarium fuisse, aut esse, eas instrui, siuè à nouiter aduenientibus, siuè à spiritibus bonis, vel malis; & hoc non nisi ob distantiam, quæ impedire potest huiusmodi notitiam. Similiter, quod Beati in Cælo intelligant præces nostras refertur in reuelationem Diuinam in Verbo, aut extra Verbum. Vnde historiæ referunt, Dæmones inuicem nunciare, quæ in diuersis orbis partibus contingunt. Itaque res debent esse in proportionata distantia, ad hoc ut Angelus eas cognoscere valeat, & intueri.

Verùm his non obstantibus Malderus q. 55. art. 2. citans D. Thomam censet, Angelos etiam malos posse intueri rem quantumcumquè distantem, ac proinde dum volunt aduertere posse videre quid per totum mundum fiat, estò à loco se Angelos non moueant, nisi diuinitus impendantur. Quod si Animæ Defunctorum, & Dæmones nesciant, quæ à nobis fiant, dicit cum Ferrariensi, prouenire non ex locorum distantia, sed ex Diuina ordinatione. Ex qua doctrina inferri potest, qualiter Animæ Sanctorum etiam naturaliter intelligant præces ad se directas. In quam sententiam inclinat etiam noster Herinex, dicens sic in parte sum. Theol. & planè mirum foret, oculum intellectualem, qui per corpora opaca non impeditur; naturaliter videre, non posse in locis subterraneis, quæ aguntur super terram, cum oculus corporeus videre possit Sydera, tam imenso spatio distantia.

II. Concl. Angelus non indiget speciebus impræssis ad res præsentès, siuè spirituales, siuè materiales intuendas, dum.

90  
dummodo sint debite approximata, est Scoti in 2. d. 3. q. 10. & est communis.

Prob. Species ponitur ad supplendas vices obiecti, vel absentis, vel non potentis per se mouere potentiam: sed tam spiritualia obiecta, quam materialia possunt per se immediate mouere potentiam intellectiuam Angeli; ergo Angelus non indiget &c.

Confirmatur. Angelus intuetur ipsas species intelligibiles seu impræssas sine alia specie, alioquin daretur processus in infinitum, ergo pariter potest Angelus, sine speciebus intueri alia obiecta, siue spiritualia, siue materialia.

Arg. cont. 1. conc. Nihil imperfectius re materiali potest esse perfectio Angeli, sed species rei materialis est imperfectior ipsa re materiali, ergo talis species non potest esse intellectui Angelico ratio cognoscendi.

Resp. dist. mai. perfectio entitativa, seu essentialis, conc. mai. perfectio accidentalis, qualis est species, nego. Tertia conc. vide infra cart. 60.

Arg. 2. Angelus habens species plures, quero, vel necessario fertur in obiecta illarum specierum, vel non, non primum, quia sequeretur, quod semper esset in actuali, & necessaria intellectione, quasi infinitorum obiectorum, ergo secundum, ergo ad res intelligendas, de quibus species habet, debet determinari per aliquid aliud, distinctum à speciebus; subsumo min. sed illud aliud determinatiuum posset ipsum intellectum determinare, tam seclusis speciebus, quam præsentibus ipsis, ergo &c.

Resp. quod intellectus non necessario fertur in obiecta, quorum habet species, quando species illæ ipsi intellectui debite non representantur, & in eo non relucent actu, veluti imagines rerum, sed solum, quando in ipso relucent, & debite representantur, quia cum intellectus sit facultas naturalis, etiam naturaliter operatur circa obiecta, debite sibi proportionata, vt patet etiam de oculo, & sic pariter respondet ad omnia, quæ in argumento subduntur.

Dices. Species possent esse debite propositæ intellectui, & omnes relucere, & sic omnia intelligere, sed hoc videtur absurdum, ergo &c.

Resp. quod Angelus potest conuertere suum intellectum, modo ad vnam speciem, modo ad aliam, & sic intueri

tueri, modò vnum obiectum, & modò alterum. Non enim Angelus est deterioris conditionis, quàm sit homo, qui, vt experimur, potest pro suo libito in se excitare species alterius, & alterius obiecti, estò species deindè determinent intellectum ad cognitionem talis obiecti.

Arg. 3. Intellectus noster cognoscit aliqua, sine speciebus; intelligit enim res Spirituales, relationes, entia rationis, quorum sicut nullum datur phantasma, ita nullum dari potest species, ergo, cum intellectus Angelicus sit magis actiuus, omnia intelligere potest sine speciebus.

Resp. neg. antecedens. Nam res Spirituales à nobis intelliguntur, quòd prædicata communia, vel propria ex communibus, quorum etiam in intellectu nostro dantur species, vt docet Scotus in p. d. 3. q. 2. §. dico. Vbi sic ait: Imprimens intellectui nostro speciem vnius vniuersalis, in illo quoquè causat speciem vniuersalioris, etiam transcendentium. Similiter relationes reales cognoscuntur per species suorum extremorum, & entia rationis, ab intellectu ficta instar entium realium, cognoscuntur per proprias species extremorum.

Arg. 4. Species est eiusdem rationis cum eo, cuius est species, ergo non oportet speciem ponere.

Resp. dist. antecedens, quatenus est imago repræsentans illud, conc. quòd sit eiusdem rationis; ita ut obiectum possit se habere in ordine ad potentiam, sicut species; si loquamur de cognitione abstractiua, neg. ant. Ita què species dici potest eiusdem rationis in repræsentando obiectum, cuius est imago.

Contra. Præsentia obiecti est causa speciei, & non è contra, ergo si prima repræsentatio in intellectu Angelico non est per speciem, superfluum est ponere speciem.

Resp. dist. ant. In cognitione intuitiua, conc. abstractiua neg. Abstractiua enim cognitio obiecti habetur per speciem, iam receptam eiusdem obiecti.

Quæres. Vtrum Angelus cognoscat se ipsum sine specie.

Resp. Affirmatiuè, cum Scoto in 2. d. 3. q. 8. Ratio, assignata est superius; èd quia species tantum ponitur ad supplendum absentiam obiecti, vel in defectum eius; cum igitur substantia ipsius Angeli sit præsens intellectui eiusdem

dem Angeli, etiam in ratione obiecti intelligibilis, non est necesse ponere speciem; secus autem in cognitione abstractiua. Idem est dicendum de anima separata, estò coniuncta corpori nequeat se intuitiue cognoscere.

Quæres 2. An Angelus naturaliter cessare possit ab omni cognitione.

Resp. Angelus non potest cessare ab omni cognitione, posset tamen à sui ipsius cognitione, aut etiam Dei: ratio est, quia intellectus Angeli est causa necessaria; ac proinde, positis quæ ad agendum exiguntur, necessario agit, & intelligit; nequè subditur intellectus imperio voluntatis, saltem quò ad euidencia; vndè solum subiacer indirectè, quatenus voluntas, vel diuertit ad alia considerata, vel obiectum remouet, non tamen omnia obiecta remouere potest, quòd si id concedamus, saltem se ipsum amouere nequit. Quòd autem cessare possit à cognitione sui ipsius, & etiam Dei.

Prob. quia, & si substantia Angeli sit ipsius intellectui obiectum, præsens semper, & proportionatum, tamen simpliciter posset velle tot alijs per intellectum intendere, vt vis intellectiua exhausta simul se extendere non posset ad ipsummet Angelum; hoc idem à fortiori asserendum de cognitione Dei.

Cæterum si Angelus esset solus, & nudatus omni specie, necessario se intelligeret, cum nullum aliud obiectum tunc habere posset.

Quæres 3. Vtrum Angelus decipi possit in rebus agnoscendis.

Resp. affirmatiue. Potest enim Angelus connaturaliter ex signis ineuidentibus, aut testimonio alterius fallibili aliquid cognoscere. Hac ratione Angeli mali frequenter decipiuntur, dum inordinati amoris, aut odij ducti affectu absolutè præbent assensum, vel dissensum ijs, quæ sunt incerta, vel tantum verosimilia. Verùm Angeli boni omnis inordinati affectus expertes, ne in verisimilibus decipiantur, non iudicant absolutè ea esse, aut non esse, ea fore, vel non fore; sed tantum iuxta verisimilitudinis gradum: ea verosimilia esse, vel non esse, fore, vel non fore. Accedit insuper Diuina prouidentia, eos ratione status beatifici præseruans ab omni errore, dirrigendo eos in  
actus

93  
actus veros, aut diuertendo à falsis, vel subtrahendo con-  
cursum; ità ex communi sententia discurrit noster He-  
rinx in disp. de Angelis.

### QVÆSTIO III.

*Vtrum Angelus cognoscat quidditates creatas, per di-  
stinctas rationes, vel per vnā rationem possit  
plura intelligere; itaut Angelus superior per  
pauciores, ac vniuersaliores intelligat.*

**N**ot. 1. Quòd quæstio præsens non intelligitur de  
quidditatibus, essentialiter subordinatis, quales sunt  
gradus metaphysici à generalissimo vsquè ad infimum spe-  
cificum, in plura singularia per plures differentias indiui-  
duales diuisibilem; cum ista se habeant, vt superius, & in-  
ferius, & in inferiori contineantur actualiter, & essentia-  
liter gradus omnes Superiores; estò probabile sit, vnum  
quodquè per propriam speciem intelligi posse: probabi-  
lius tamen Scotistæ passim tenent cum Scoto in p. d. 3. q. 2.  
§. quinto, dico. Magis, & minus vniuersale posse per ean-  
dem speciem cognosci; sed quæstio est de pluribus rebus,  
seù quidditatibus disparatis, siuè sint numero, siuè specie,  
aut etiam genere distinctæ. Insuper quæstio agitur de  
speciebus, à Deo infusis, non verò de speciebus, ab obiecto  
productis. Tum quia negant Thomistæ tales species esse  
Angelo acquisibiles ab obiectis; Tum quia gratis conce-  
dunt huiusmodi species, ab obiecto productas, debere com-  
mensurari singulis obiectis; secùs autem discurrunt de  
speciebus à Deo infusis, dum putant esse altioris ordinis;  
ac proindè specificè differre ab acquisitis, quia, aiunt, de-  
scendere à Deo, & ab Ideis Diuinis; & sic posse vnā spe-  
ciem esse rationem repræsentandi plura perfectè, & distin-  
ctè, vt infra magis patebit.

Not. 2. quòd in ha celebri controuersia quattuor repe-  
riuntur opiniones. Prima est Henrici de Gandauo. quol.  
5. q. 14. dicentis, Angelum cognoscere creaturas per vnum  
habitum scientialem, ipsi infusum, includentem essentia-  
liter relationes ad omnes quidditates existentes, & possi-  
biles; itaut intellectus non possit capere istam qualita-  
tem,



tem, nisi capiat seibile ab ipso dante habitum, & si infinitæ species essent causandæ, omnes posset intellectus Angelicus perfectè cognoscere per talem habitum; & alia plura habet pro confirmatione suæ sententiæ, quæ videri possunt in Scot. in 2. d. 3. q. 10. ubi etiam eam Doctor impugnat pluribus rationibus, inter quas hæc est præcipua... Vbi pluralitas concludit perfectionem intensiue, infinitas concludit infinitatem intensiuam; sed si secundum ista res cognoscitur perfectè, aliqua virtus intensiua requiritur ad cognoscendum; ergo si cognoscantur infinita, vel non tot, quin plura, ille habitus erit infinitus, quod est impossibile.

Confirmatur, quia talis habitus, seu species esset proxima causa infinitarum cognitionum, seu non tot, quin plurium, & hæc ratio valet etiam contra Thomistas, ponentes in supremo Angelo vnicam speciem, qua omnia intelligit.

Secunda opinio est D. Thomæ, consentis vnā speciem repræsentare posse plura obiecta disparata, tum numero, tum etiam specie, vel genere distincta; immò posse plura, & plura in infinitum. Quare gratis concedunt, producibilem esse à Deo speciem repræsentatiuam infinitorum obiectorum, saltem synchategorematicè, & quod superior Angelus, quia per pauciores species intelligit, habet species vniuersaliores, & plura repræsentantes, quam Angelus inferior: contra quas opiniones insurgit Scot. sic. Quicquid est ratio perfectè cognoscendi aliqua plura, est aliquis primi obiecti, in quò perfectè continentur illa cognoscibilia: sed nulla talis ratio vna potest esse in Angelo respectu omnium quidditatum creaturarum, ergo &c. mai. patet primò exemplo, quia essentia Diuina est primum obiectum cognitum, & ratio essentiæ est vna, respectu essentiæ cognitæ, per quas cognoscuntur omnia obiecta secundaria, quæ per proprias rationes cognoscuntur: secundò, prob. eadem maior duabus rationibus. Prima est. Non potest esse vnitas in posteriori essentialiter, nisi sit vnitas in priori essentialiter; sed ratio cognoscendi in intellectu creato est posterior obiecto cognito; quia obiectum per se istam rationem mensurat, ergo necesse est, vnum esse obiectum, quia est eius mensura, si mensuratum sit vnum.

Prob.

Prob. 2. Nihil est ratio cognoscendi aliud perfectè, nisi sit propria ratio eius formaliter, vel istam rationem contineat virtualiter, sed non potest esse vna propria ratio formalis, & plurium: ergo erit vna continens proprias rationes plurium virtualiter; ac proinde obiectum eius, eadem ratione continet virtualiter ista plura obiecta; nam, quando aliquid est ratio cognoscendi plurium obiectorum, obiectum illius rationis primæ continet perfectè obiecta istarum plurium rationum: min. patet; quia nulla vna entitas potest esse in superiori creato, quæ contineat perfectè, & eminenter omnia, quæ continentur in omnibus inferioribus; ergo nulla vna ratio intelligendi potest esse perfecta ratio cognoscendi omnes quidditates creatas.

Thomistæ non satis conueniunt in respondendo rationibus Scoti. Vnde cum eorum responsiones sint infirmæ, immò nullius solutionis, vt videri potest in Mastroio disp. de Angelis q. 7. vbi illas fusè recitat; idè pergo ad probandum non posse dari speciem, quæ plures disparatas quidditates repræsentare valeat.

Prob. Species est naturalis, & expressa obiecti similitudo, ergo fieri non potest, vt vna, & eadem species, & similitudo disparatas quidditates, puta hominem, & plantam, & lapidem repræsentet; ac proinde non poterit vna, & eadem species esse similitudo plurium quidditatum, & ex consequenti Angeli, qui sunt superiores, non intelligent per pauciores, & vniuersaliores species.

Confirmatur, quia ex opposita sententia sequitur posse dari speciem tantæ perfectionis in repræsentando, quantæ perfectionis est Essentia Diuina in repræsentando. Ponatur, quòd aliquis Angelus supremus de facto intelligat per duas tantum species, tunc producaturs alius Angelus perfectior, iste intelliget per pauciores species, nempe per vnam, quæ erit ratio intelligendi infinita intelligibilla, infinita, inquam, singularia, & infinitas quidditates à Deo producibiles, sed hoc est manifeste absurdum: ergo &c. Deindè creatur à Deo alius Angelus perfectior, tunc iste, cum sit perfectior omnibus, intelliget per suam Essentiam, & sine vlla specie omnes quidditates creatas, sed hoc est impossibile. quia id soli Diuinæ essentiæ competere potest; ergo &c.

Tertia opinio est neutralium, qui estò cum Thomistis conueniant in priori puncto de vniuersalitate specierum in repræsentando plura, negant tamen quòd possint repræsentare infinita syncategorematicè, siuè non tot quin plura, vel specie, vel numero distincta.

Cæterùm quidam alij admissa vniuersalitate specierum in vtroque sensu, adhuc negant Angelos, quò perfectiores, eò per simpliciores, & perfectiores species intelligere; ità Ariaga, & plures alij, immò obseruat Rada, ipsos Thomistas valdè inter se discrepare in explicatione suæ sententiæ. Quarè contra istam opinionem militant eadem rationes, superius allatæ contra Thomistas, idèò &c. Quarta deniquè opinio est Scoti, & Scotistarum in 2. d. 3. q. 10. Aureoli maioris, qui negant positionem Thomistarum, & etiam possibilitatem, vt tactum est in superioribus rationibus; vnde sit.

I. Concl. Nequit dari habitus scientialis, nec species repræsentatiua infinitorum obiectòrum, siuè non tot, quin plurium: est Scoti, vbi supra, & satis remanet probata ex dictis &c.

II. Concl. Nec vna species potest esse ratio Angelo distinctè cognoscendi plures quidditates disparatas, etiam si non infinitas: est Scoti loco cit. pro cuius probatione præter ea, quæ adducta sunt, adhuc prob. Species est similitudo, & imago naturalis repræsentans prototypum, ergo si prototypa sint contraria, & disparata, cuiusmodi sunt quidditas hominis, & lapidis, nullo modo potest eadem species; seu similitudo vtrumquè repræsentare. Idem enim esset, ac si vnam, & eandem imaginem hominis, & leonis fingeremus.

Nec valet respondere veram esse consequentiam de speciebus acquisitis, non verò de infusis; quæ cum sùnt superioris, & altioris ordinis possunt plura repræsentare. Non valet, inquam, eò quia species altioris ordinis nequit continere virtualiter omnes inferiores species, sed eminenter tantum, hoc est per excessum perfectionis; ac proinde nequit vna species infusa plura disparata repræsentare.

III. Concl. Estò darentur species in repræsentando vniuersales, tamen Angelus superior non intelligeret per pauciores, & vniuersaliores: Est Scoti, loc. cit. 5. argumenta  
alte-

alterius opinionis contra Thomistas, qui vt loquitur Mastrius, ad oppositum tuendum, mirabilia effitiunt semper diuinando: sed omiſſa prolixitate Mastrij in discurrendo, breuitatis gratia sic probatur. Species ratione perfectioris potentia, in qua est, repraesentare non potest vniuersalius; eadem enim species in Angelo non repraesentabit plura, ac in Anima, seu in Angelo infimo, ergo Angelus superior non intelligeret, etiam admissa vniuersalitate specierum, per pauciores species: prob. ant. Demus vnum principium esse rationem cognoscendi tres conclusiones, v.g. animal rationale, ex quò infertur, hominem esse sensibilem, & risus; & beatitudinis capacem, sed huiusmodi non esset ratio in Angelico intellectu intelligendi plures conclusiones, quam tres; ergo à simili, nec vna species erit ratio repraesentandi quattuor quidditates in Angelo; si est ratio repraesentandi solum duas in intellectu hominis; sed sequitur tantum, quòd eadem species repraesentabit clarius, iuxta maiorem perfectionem intellectus; & hoc sufficit ad saluandum, quòd quanto magis creatura Deo appropinquatur, eò perfectius operatur, & intelligit; non verò quòd per pauciores species Angelus perfectior Deo magis appropinquans, intelligat; quæ quidem perfectio potius resunderetur in speciem, quam in Angelum. Tum quia sequeretur secundum hanc opinionem deueniri posse ad summum Angelum, qui per suam substantiam intelligeret, quòd improbatum fuit supra.

Arg. pro opinione Henrici. Si in intellectu Angelico non poneretur habitus scientialis, sequeretur, quòd intellectus ille esset in potentia essentiali ad illum habitum habendum; ac proinde in ipso generari poterit ex frequentatis actibus, sed hoc est vilificare intellectum Angelicum, ergo ponendus est habitus scientialis concreatus à Deo. Mai. quoad primam partem patet: quia intellectus Angeli est capax talis, vnde si esset denudatus, posset generari ex frequentatis actibus; Angelus enim potest habere frequentatos actus. Prob. etiam sequela mai. quia tunc quoad actum primum non esset perfectus, sed potentialis, & imperfectus, sicut intellectus noster, quòd absurdum est dicere de intellectu Angelico.

Resp. neg. seq. mai. quia tunc intellectus est in poten-

ria essentiali, quando est in potentia ad actum primum, id est, quando est denudatus specie intelligibili, quæ requiritur simul cum intellectu ad cognitionem producendam. Quare, ponendo in Angelo species concreatas cum communis sententia Theologorum non est admittendus habitus scientialis.

Ad illud, quod tangitur de cognitione habitus in intellectu Angeli: resp. Scotus dupliciter; primo negat generationem talis habitus, & rationem assignat; quia habitus non generatur in naturaliter, siue in summe determinatis ad vnum, sicut in graui per quoscumque descensus non generatur habitus descendendi; generatur igitur habitus solum in potentijs indeterminatis ad actum per frequentationem actuum; Angelus autem est summe habilitatus ad intellectionem. Resp. 2. Nos posse concedere habitum posse generari in intellectu Angelico; ad rationem contra hoc, nempe quod intellectus Angelicus tunc esset in potentia essentiali, id est ad actum primum, & ad actum secundum, negat consequentiam; nam habitus fit ex frequentatis actibus secundis; actus autem secundi præsupponunt primum, & consequenter non esset in potentia essentiali.

Arg. 2. auct. D. Dionysij de diuin. nom. cap. 7. vbi ait *Quod connexio vniuersi consistit in hoc, quod supremum inferioris coniungitur cum infimo superioris*; sed sic est, quod supremus nature humanæ est esse cognoscens promptè per habitum scientialem, ergo infimus Angelus debet cognoscere per habitum scientialem, ergo in vnoquoque Angelo ponendus est habitus scientialis.

Resp. Scotus, veram esse Doctrinam D. Dionysij, vbi illud, quod ponitur supremum in inferiori, non repugnat superiori; at habere talem habitum scientialem repugnat superiori; quia in nobis est perfectio, supplens imperfectionem, sicut generare, sentire &c. quæ tamen non ponuntur in Angelis.

Arg. 3. A Thomistis cont. 1. conclus. Non repugnat per cognitionem creatam cognosci omnia possibilis, quia etiam in sententia Scoti talis cognitio non esset infinita, vt probabiliter docet Scotus de Anima Christi; ergo nec repugnat, quod detur vna species, habens virtutem con-



97  
currendi ex parte obiecti ad eam cognitionem; quia ad  
huc minor est perfectio speciei, quam illius cognitionis  
actualis.

Resp. neg. assumptum, & licet Scotus teneat Animam  
Christi videre omnia possibilis, hoc tamen docet, non  
quod Anima per actum beatificum videat immediate om-  
nia obiecta secundaria, sed quod in Verbo ei omnia pos-  
sibilia repræsentantur. Quod si Aduersarij contendant,  
posse Beatum videre omnia possibilis in Deo vnico actu ex  
vi ipsius visionis, id eadem prorsus ratione, negamus, qua  
negatur de specie impressa. Vide disp. part. 3. disp. de  
scientia Christi.

Arg. 2. Nulla est repugnantia, quod tot illa multitudo  
syncategorematica per vnam speciem repræsentetur,  
quia totum illud obiectum est finitum simpliciter; ergo  
per finitam repræsentari potest.

Confirmatur. Nam potest aliquis intellectus habere  
principium repræsentatiuum infinitarum rerum, saltim in  
potentia, idest non tot, quin plurium sicut de facto. Ani-  
ma Christi per scientiam infusam habet principium co-  
gnoscenti omnes cogitationes Angelorum, & hominum  
per totam æternitatem; sed non possunt simul actu dari  
infinitæ qualitates, siue non tot, quin plures; ergo omnino  
vna sola qualitas, seu species intentionalis poterit repræ-  
sentare plura etiam infinita.

Resp. neg. assumptum, cum eius confirmatione. Etenim,  
cum multitudo syncategorematica non sit quid creatum,  
ac determinatum, vt traditur in Physicis, sed indetermina-  
tum; & confusum, nequit dici totum illud obiectum esse  
simpliciter finitum; Tum quia in tali obiecto nullus est  
terminus perfectionis finitæ. Ad confirmationem patet  
quid sit dicendum.

Arg. 3. Non maior repugnantia apparet, quod vna spe-  
cies habeat virtutem concurrendi loco diuersorum obie-  
ctorum, quam vna, & eadem potentia possit concurrere  
ad plures actus diuersos; sed vnus intellectus ex parte po-  
tentie concurrat ad omnes actus, etiam syncategoremati-  
cè infinitos, ergo sic etiam potest ad eos concurrere vna  
species loco obiecti.

Resp. neg. paritatem, & ratio est; quia vt optime dis-



currit Lycherus in 2. d. 3. q. 10. istæ perfectiones, nempe cognitiones tot obiectorum, vel cogitationum non requirunt aliam, & aliam perfectionem in intellectu, cum ea; quæ sufficit ad vnâ intellectionem, sufficiat etiam ad cognitionem alterius in ratione potentiæ. Si autem intellectus supplere deberet causalitatem, alicuius obiecti, sicut supplet species, de necessitate exigeretur in intellectu maior perfectio.

Arg. 4. Sicut per speciem impressam, vel saltem expressam creatam repræsentatur Deus, obiectum infinitum, vt docet Scot. in 2. absque eo, quod inferatur in ea infinitas simpliciter, sed solum infinitas secundum quid, idest in repræsentando; ita etiam per speciem finitæ virtutis repræsentari poterit infinita multitudo, nedum indiuiduorum, sed etiam specierum; non enim apparet maior ratio de vna, quam de alia; immo plus est repræsentare Deum, quam infinita obiecta creata: ergo &c.

Resp. Lycherus in 2. d. 3. q. 9. quod non est par ratio; quia aliud est repræsentare infinitum sub ratione, qua infinitum est; & aliud est repræsentare infinita obiecta; primo modo non oportet, quod species sit infinita, & maxime dum repræsentat velatè, & in ordine ad actum talis potentiæ, vt in sequenti quæstione ostenditur. 2. autem modo exigitur, quod species sit infinita ob rationem assignatam. Resp. 2. neg. paritatem; quia species repræsentans D. essentiam in cognitione abstractiua velatè, nequè est infinita in genere entis, quia species vniuersaliter deficit ab entitate obiecti, nequè in proprio ordine intentionali, seu in genere repræsentatiui; cum non repræsentet essentiam Diuinam, quantum est de se repræsentabilis; secus autem est in proposito de specie infinita obiecta repræsentante; licet enim ex eorum infinita multitudine non cresceret species in perfectione in eodem genere, & ordine perfectionis cum obiectis repræsentatis, quia species semper deficit ab entitate obiecti; cresceret tamen in suo ordine intentionali arithmetice, seu quantitatiue, quia esset illis adæquata secundum proportionem repræsentantis ad repræsentatum. Vnde sit maxima. Quando aliquod repræsentat plura, quorum quodlibet exigit specialem perfectionem in repræsentante, tunc repræsentans infini-

ta debet esse infinitum in perfectione, e. g. species repræsentans Aquilam, Leonem, Hominem Angelum &c. debet continere in se virtualiter, seu eminenter perfectiones omnium illorum obiectorum in esse intelligibili.

Arg. cont. 2. conc. Nulla apparet repugnantia, quod species creata, quatenus est quædam participatio Idearum Diuinarum, ac proinde Diuinæ essentia, repræsentet plura: ergo talis species est admittenda &c.

Prob. ant. Virtutes, dispersæ in inferioribus causis, vniuntur in causa superiori; sed species sunt quædam virtutes complentes actiuitatem potentia intellectiua: ergo possibile est virtutem in inferioribus speciebus dispersis, quales sunt species ab obiectis acquisita ita vni in specie à Deo infusa, vt possit illa repræsentare plura obiecta disparata. Accedit etiam, quod vnica visione videmus campum, plantas, animalia, & alia, quæ in eo sunt; ergo vnica species poterit plura disparata repræsentare.

Resp. neg. ant. ad prob. neg. assumptum in maiori, & dicimus, tunc assumptum esse verum, quando ex vnitatem virtutis sequitur, quod perfectius, aut citius habetur effectus, quod in proposito non contingeret; Angelus enim per vnā speciem, nec citius, nec perfectius intelligeret, v. g. decem obiecta, quàm per singulas species infusas illa decem obiecta repræsentantes. Ad illud, quod additur de vnica visione, dicendum breuiter, quod singula obiecta immittunt species proprias, per quas fit visio, estò simul collecta integrent quodammodo vnā totalem visionem.

Arg. cont. 3. conc. auct. D. Dionys. dicentis cap. 12. de Angelica Hierarchia. *Angeli superiores habent scientiam vniuersaliorem, quàm inferiores*; ergo Angeli superiores habent species magis vniuersales, quàm inferiores.

Resp. Scotus. Quod D. Dion. ibi per scientiam, & cognitionem vniuersaliorem non intelligit cognitionem, habitam per species vniuersaliores, sed scientiam limpidiorem, & intensiorem; nam alia translatio, loco huius verbi (vniuersaliorem) habet totalitatem scientia, idest perfectiorem.

Arg. 2. Virtutes dispersæ in causis inferioribus vniuntur in causa superiori, ergo Angelus Superior per pauciores species intelligit; ant. prob. nam sensus communis co-

gnoscit plura obiecta, repræsentata in sensibus externis per proprias species: ergo per vnicam speciem &c.

Resp. Fauent. Quod illud Axioma valet in causis primarijs, non verò in secundarijs, quales sunt species. Vel dicitur quod valet in virtutibus, quæ sunt vnibiles in causa superiori, quod in proposito non contingit. Quare docet Scotus in 2. q. 10. quod aliæ sunt virtutes actiue, quarum vnitas non pendet ex vnitate obiecti, vt calor frigus, & similia, & hæ quidem vniuersaliter vniri possunt, in virtute altioris ordinis, quia vnitas caloris non pendet ab vnitate subiecti, circa quod operatur, neque ex virtute caloris producti, quia vnitas prioris non pendet ab vnitate posterioris, sed è contra. Aliæ verò sunt virtutes, quarum vnitas necessario pendet ab vnitate sui obiecti, eo modo, quo vnitas posterioris pendet ab vnitate prioris, & sic se habent species intentionales, cum ab eo dependeant, sicut mensuratum à mensura, & hæ adunari nequeunt in vna virtute altiori, nisi detur aliquod obiectum, sibi correspondens, vt supra dicebamus.

Neque exemplum de sensu communi verum est in sententia nostra, cum Scotus neget, sensum communem per vnam speciem ea omnia cognoscere, quæ sensus externi per plures cognoscunt, sed per distinctas species, vt patet lib. de Anima, cognoscit illa.

Arg. 3. Angelus cognoscit omnes species figurarum, & numerorum possibilium, sed non cognoscit singulas illas differentias singulis speciebus, aliàs in Angelo essent infinitæ species actu; ergo cognoscit illas per species vniuersaliores. Resp. neg. Assumptum: falsum est enim Angelum cognoscere actu simul omnes species numerorum, sed potest successiue illas cognoscere, non quidem per species vniuersales, sed per distinctas species, quæ si sint finitæ habet illas concreatas; si verò infinitæ non habet omnes concreatas, sed aliquas, & cæteras à rebus accipit.

◆◆◆◆◆

◆◆◆◆◆

*Vtrum Angelus habeat notitiam naturalem  
distinctam Essentie Diuinæ.*

**N**Ot. 1. Quodd perspicuum satis est, Angelos, cum sint longè perspicaciores hominibus, viribus naturæ, citrà Dei reuelationem Deum cognouisse, sed in præsentì queritur de medio, quo existentes in via, Deum cognouerunt, de quo tres extant opiniones. Altera Henrici quodl. 3. quæst. 1. vbi tenet Angelum nullam habere cognitionem distinctam Dei, seu Essentie Diuinæ, sed solum confusam, qualem habemus nos.

Altera est D. Thomæ p. 1. quæst. 56. art. 3. qui tribuit Angelis mediam Dei cognitionem inter Beatam, & eam, quam nos per Creaturas acquirimus, dicentis, quodd Angelus per se, quatenus est Imago Dei, cognoscit ipsum Deum.

Tertia est Opinio Scoti in 2. dist. 3. quæst. 9. existimantis, Angelos, in via existentes, habuisse distinctam notitiam Dei per speciem, ipsi à Deo concreatam, repræsentantem Diuinam Essentiam, non adæquatè, & simpliciter, quantum est repræsentabilis, sed in comparisonem ad talem actum, vt magis patebit infra.

Not. 2. Quodd vt habet Scotus in responsione ad primum Henrici, species tripliciter potest intelligi adæquata; primo modo, quodd sit adæquata in entitate. 2. quodd sit adæquata secundum proportionem repræsentantis ad repræsentatum absolutè; 3. secundum proportionem, non absolutè, sed per comparisonem ad actum talem (licet non secundum entitatem) tamen ista est perfectibilis, sicut illa est perfectiua, & ista repræsentat quantum est repræsentabilis in comparisonem ad talem actum. Primo modo vniuersaliter, nullum per se repræsentans (quodd est ratio repræsentandi, & non cognitum) adæquatur illi, quodd repræsentat, vt patet de albedine, & de specie albi. 2. modo aliqua ratio repræsentat per adæquationem, sicut species perfectissima albi repræsentat illud album. 3. modo quæcunque albi species etiam in oculo cæcutiente, licet non ita perfectè repræsentet album, sicut esset repræsen-

tabile, tamen perfectè representat illud per comparationem ad actum sequentem, quia ita perfectè representat, sicut requiritur ad habendum talem actum circa obiectum. Ad propositum igitur dico, quòd nulla species per adæquationem potest representare Essentiam Diuinam, (loquitur hic Scotus de noticia abstractiua) primo modo, nec 2. modo, sed 3. modo comparandò ad Intellectum creatum aliquo modo potest habere speciem, quæ scilicet ita perfectè illam Essentiam representet, sicut actus talis intellectus attingit; hæc Scotus.

Not. 3. ex Scoto In Reporr. quòd Imago dicitur dupliciter primo modo, sicut species in oculo dicitur species, imago visibilis. 2. modo, sicut Imago Herculis, & hoc modo imago ducit in cognitionem illius, cuius est, numquam tamen per signum cognoscitur signatum, nisi prius cognoscatur signum, & esse signum talis rei; ac proinde oportet prius cognoscere istam rem, cuius est imago, quàm imaginem; aliàs non plùs cognosceretur signatum, quàm prius; ex quò inferretur non subsistere opinionem Thomistarum dicentium, Angelum cognoscere Deum per se ipsum, quatenùs est Imago Dei.

Not. 4. Quòd principium alicuius effectus dupliciter dicitur naturale; primò quando ex viribus naturalibus attingitur effectus, vt intellectus sua virescente attingit obiectum, illud cognoscendo. 2. dicitur naturale, quia est concreatum, & de ratione alicuius status; in quo sensu iustitià originalis, concessa à Deo homini in statu innocentie, dicebatur naturalis. Vnde cognitio Angelorum in via de Deo per speciem concreatam dicitur naturalis, quia erat de ratione illius status, & dicitur etiam supernaturalis, quatenùs non erat, nec esse poterat ex viribus naturalibus, sed à Deo solo, quàmuis non sit principium actus gratuiti, & gloriosi, non enim est ordinis supernaturalis, sicut gratia, & gloria, sed ordinis naturalis.

Concl. Probabilissimum est, & rationabile Angelis Victoribus concreatam à Deo fuisse speciem, qua Deum cognoscere potuerant distinctè: est Scotti, & Scottistarum: prob. ex Scot. Dico igitur breuiter ad quæstionem, quia non habemus regulam de intellectu Angelico, nequè enim possumus attribuere illi omnem perfectionem, quæ est in

intellectu simpliciter, nequē tantum Imperfectionem, quæ est in intellectu nostro, quia rationabile est illi attribueri omnem perfectionem, quæ convenit intellectui creato, & nulla repugnantia occurrit, quod intellectus creatus habeat talem cognitionem per speciem distinctè repræsentantem Diuinam Essentiam; tamen non intuitiue, ergo rationabile est talem notitiam Angelis concedere. Quod autem talis species sit ponenda persuadetur sic à Scoto. Beatitudo naturalis Angeli excedit naturalem beatitudinem hominis in statu innocentie: sed homo in tali statu habere potuit aliquo modo cognitionem distinctam de Deo, ergo multo magis Angelus: sed cognitio distincta nequit haberi nisi per distinctum repræsentatiuum, ergo Angelus potuit habere speciem distinctè repræsentantem Diuinam essentiam, & consequenter volitionem summi boni distinctè, quod est maior beatitudo.

Persuadetur 2. à Scoto, sic: Aliquis raptus videns transitoriè Diuinam essentiam, cessante illo actu videndi, potest habere memoriam obiecti, & hoc sub ratione distincta, sub qua erat obiectum visionis, licet non sub ratione præsentis actualiter: ergo dari potest species hoc modo Diuinam essentiam abstractiue repræsentantem: prob. assumptum per raptum D. Pauli, qui recordabatur eorum, quæ viderat iuxta illud ad Corint. *Scio hominem in Christo ante annos 14. fuisse in Corpore &c. & audiui arcana Dei, quæ non liceo homini loqui.*

Persuadetur etiam Doctrina D. Aug. lib. 4. super Gen. cap. 3. ubi inquit: Angelos in statu innocentie, & in via habuisse cognitionem matutinam creaturarum, & vespertinam; & vocat matutinam cognitionem creaturarum in verbo non intuitiue, sed abstractiue cognito per aliquam speciem creatam, quia tunc non erant beati, & inter beatitudinem naturalem, & supernaturalem intercessit aliqua morula; appellat autem cognitionem vespertinam cognitionem creaturarum in proprio genere; ergo admittenda est in Angelis talis species.

Arg. 1. cont. conc. Quod distinctè cognoscitur, cognoscitur secundum propriam rationem formalem, qual ponitur in esse proprio essentiali, & quidditatiuo; sed Deus nequit per speciem cognosci in esse proprio, & quidditatiue



tiuo, quia cognosceretur sub ratione Deitatis; ergo Angeli nequeunt distinctè Deum per speciem cognoscere.

Resp. dist. mai. quod distinctè, & adequatè cognoscitur, & simpliciter, cognoscitur sub ratione propria, & essentiali conc. si non adæquatè, & simpliciter, sed tantum quantum potentia cognoscens capere potest; nego.

Contra. Si Angelus posset habere distinctam, & quidditativam cognitionem Dei, sequeretur, quod posset etiam intueri Deum; cum cognitio intuitiva sit notitia propria, & quidditativa: sed hoc est hæreticum; ergo &c.

Si dicatur quod ad cognitionem intuitivam non solum requiritur, ut cognoscatur secundum propriam quidditatem, sed etiam secundum propriam existentiam, & præsentiam, ut vult Scotus, hoc non impedit, quin illa cognitio per quidditatem sit intuitiva, quia existentia non est separabilis à quidditate, nec quidditas ab existentia, ac proinde nequit intelligi vnum sine altero, & idem dicendum de præsentia; est enim Deus præsens omnibus rebus: ergo &c.

Resp. neg. seq. mai. quia talis cognitio non est simpliciter perfectissima, sed secundum quid tantum, & in comparatione ad talem actum. Deinde quando dicitur quod non potest haberi cognitio distincta, & quidditativa, quin cognoscatur existentia actualis ac præsentia illius ratione identitatis; concedimus, quod existentia non est separabilis à quidditate Dei, & similiter præsentia; ex hoc tamen non sequitur quod sit cognitio intuitiva, quia existentia, & præsentia potest repræsentari abstractivè per speciem etiam absente objecto, ut patet, e.g. de Roma existente, quæ per speciem repræsentatur in eo, qui Romam viderat.

Cæterum ad illud quod tangitur de præsentia dicimus quod duplex est Dei præsentia, alia in genere ubi, & sic Deus per suam immensitatem omnibus rebus est præsens; alia in ratione objecti, & per propriam essentiam, & sic Deus non est præsens habenti speciem repræsentantem Divinam essentiam.

Contra. Absentia objecti nihil impedit, quin cognitio sit intuitiva, & beatifica, quia absentia, vel præsentia nihil varjat in ipsa visione, dummodo intueatur Angelus

gelus essentiam obiecti existentis, ergo repugnat &c. ant. prob. dato, quod eclypsis esset beatitudo Astrologi, eamque videret per propriam speciem eius representantem, ipsam perfecte, licet fieret in alio emispherio, attamen esset beatus in visione illius; ita in proposito dicendum de specie representante Diuinam essentiam.

Resp. neg. ant. quia visio beatifica consistit in cognitione clara Diuinæ essentiae, non in cognitione per representatiuum, quæ regulariter semper est imperfectior visione intuitiua; licet enim aliquis videat figuram Herculeam, distinctè Herculem representantem, non tamen ita perfecte videt Herculem, sicut si ipsum Herculem intuitiue videret; & sic paret quomodo non est idem videre eclypsim per speciem, ac intuitiue.

Arg. 2. ab Henrico. Omnis propria ratio intelligendi aliquod obiectum per adæquationem, representat illud obiectum; sed nulla species vel essentia creata potest adæquatè representare Diuinam essentiam; quia finiti ad infinitum nulla est proportio: ergo &c.

Resp. transeat maior: & dist. min. adæquatè, & absolute conc. secundum quid, & in comparatione ad actum, neg. min.

Contra. Species creata vnius rei magis assimilatur alteri rei creatæ, quàm Deo; quia vtrumque finitum; ergo talis species distinctiùs representat creaturam, quàm Deum, & per consequens non est propria ratio distinctè cognoscendi Deum, nec etiam in comparatione ad actum.

Resp. dist. ant. in entitate, & in essendo, conc. ant. in ratione proportionis, quæ est representantis ad representatum, neg. ant. Vnde docet Scotus, quod similitudo naturalis in essendo non est per se ratio representandi vnum respectu alterius; quia hoc album quantumcunque simile alteri albo, non est ratio representandi illud; species autem, quæ multò minus est in entitate naturali similis huic, est illius representatiua.

Arg. 3. Vnum quodque cognoscitur per suam similitudinem, sed Angelus est similitudo, & imago Dei, ergo Angelus Deum cognoscit per seipsum, scilicet per suam essentiam.

Confirmatur, quia, si Angelus intelligeret Deum per

speciem, sequeretur, quod illa species esset magis imago, quam Angeli, quod est contra D. August. lib. 14. de Trinit. cap. 8. ubi tradit, quod *Es aliquod est imago Dei quo participat eius: esse potest*; ergo &c. Resp. dist. min. dissimulata mai. Angelus est imago Dei, quatenus ratio cognoscendi, neg. min. quatenus res cognita; conc. min. Ad confirmationem dist. seq. mai. esset species magis imago Dei, ut res cognita, neg. ut ratio cognoscendi conc. Itaque si spectemus Angelum, & speciem in ratione entis, & ut effectum, certum est quod Angelus est magis imago; at si consideremus illa, ut rationem cognoscendi, species est magis imago in ratione representationis.

Arg. ulterius. Si illa species esset in intellectu vnus Angeli posset Angelus alius illam in eo videre; & sic naturaliter habere distinctam cognitionem Dei: sed hoc videtur absurdum, ergo. Resp. dist. mai. posset illam videre tanquam rem cognitam in ratione entis, conc. tanquam rationem cognoscendi Deum, neg. Vide hoc idem argumentum in disp. de visione beatifica, & alia plura, quæ faciunt ad vberiores doctrinam; & clariorem intelligentiam huius quæstionis, hæc confirmatio cum sequentibus rationibus reponenda est in quæst. 1. disp. 3. post improbationem responsionis Thom. ad prob. primam secundæ conclusionis, car. 47.

Confirmatur ex Macedo tom. 2. collat. 3. diff. 4. Intellectus patiens indiget, non solum speciebus inditis, sed promptis, & expeditis ad operandum, per quas reponatur in act. primo; sed hæc opera est ab intellectu agente; ergo est necessarius: ant. patet, quia non satis est habere species inditas ad operandum, ut fiat certa, & expedita operatio, ut contingit in memoria, quæ cum sit custos specierum indiget excitatione, ut recorderetur; ita & intellectus, esto habeat species congenitas, non potest per se eligere, & determinare has, vel illas ad operandum, cum præsertim in sententia D. Thomæ passiuè se habeat intelligendo; nam omnia fit; non facit teste Arist. Insuper. Impressio speciei ex parte principij ante intellectionem, & expressio eiusdem sunt res distinctæ, quia impressio speciei est ex parte principij; expressio ex parte termini: impressio est actio, expressio est passio, impressio est ab alio, & est quid transiens,

sens, expressio est quid immanens in uno; & est tota intellectus, agentis, & propria.

Præterea. Intellectus agens ponitur, ut species acceptas à sensibus depuret, & ad statum imaterialitatis traducat, & hæc ratio est Achilles Thomistarum, sed in intellectu angelico, ultra species ingenitas aduenit multa multitudo specierum de nouo, quales sunt contingentium, præsertim actionum liberatum; vt infra dicitur, euentuum futurorum, & illas, quas continue recipiunt in mutuo colloquio Angelorum, quas non habent cum loquuntur, ergo ob has necessarius est intellectus agens, qui eas debet formare, preparare ad vsum intelligendi, quæ subministratio specierum est in actu primo ante secundum, atque adeo propria intellectus agentis.

Quod autem solent reponere eas species de nouo aduenientes produci à Deo connaturaliter in intellectu angelico (quod tamen difficile est credere) nihil prodest, quia illa productio specierum non est tota præparatio; & adhuc superest exhibitio, & applicatio earum ad intelligendum, quæ munia non spectant ad intellectum patientem, cuius est solummodo actus intelligendi secundus, ita discurret Macedo. Hæc 3. conc. reponenda est in quæst. 2. disp. 1. de intellectu Angeli post secundam conclusionem cap. 50.

III. Concl. Per species concreatas non possunt Angeli cognoscere complexiones contingentes; ac proinde ab illis species accipiunt. Est Scoti in 2. d. 3. q. 11. 8. Responsio deo. Prob. Hæc complexio e. g. Petrus docebit eras; est contingens, vt possit esse, & non esse: vel igitur cognoscitur ab Angelo antequàm sit, determinatè, aut non determinatè: si primum non cognoscitur vt contingens: Si secundum requiritur alia ratio cognoscendi præter species illas concreatas; ergo &c.

Confirmatur. Quia illa species repræsentat tantum illas terminos Petrus docebit; non autem contingentiam illorum; ergo non potest per illas haberi cognitio contingentiae, quæ solum cognoscetur, cum in re ponetur. Nisi fortè velis dicere Deum reuelare etiam suum decretum liberum de rei futuritione; quod sane nimio plus est, inquit Macedo, quàm quod debetur Angelo.

Præterea, Species Angelis concreatæ non sunt perfectæ.

Idiores in repræsentando Ideis Diuinis; sed istæ non repræsentant complexiones contingentes; siue contradictorias certò, ac determinatè; ergo multò minus species istæ eas repræsentabunt; mai. pat. min. prob. Quia Ideæ Diuinæ antecedunt actum voluntatis Diuinæ; sine quo nullum est futurum contingens determinatum. ergo Idea non repræsentat &c.

Adde; quod posita locutione Angelorum (quæ nefas est negare) incredibile videtur dari species congenitas omnium; quæ per totam æternitatem ad diuicem loqui possunt. Nam locutio est omninò libera, & de pluribus, & quasi infinitis secretis cordium; quæ non omnibus loquentes patere volunt; quomodo ergo species illæ congenitæ seruiant ad hanc voluntariam, & secretam locutionem. Certè cum ea, de quibus possunt loqui sint infinita; aut Deus non prouidit Angelis, non dando; aut si dedit, infinitas prouidit. Vtrum sit incredibile; quæ Maccedo, Thomistæ iudicent; certè vtrumquè videtur incredibile.

#### QVÆSTIO VI.

*Vtrum Angelus sua naturali vi cognoscere valeat  
illa quæ sunt secreta Cordium.*

**N**ot. 1. quod intellectus Angelicus, & humanus habent idem obiectum adæquatum, quamuis vñus alio perspicacior perfectius intueatur obiectum; vnde Anima separata; & Angelus agnoscere possunt quodlibet obiectum creatum positum in totum natura; obiectum enim Angeli secundum naturalem rationem est ens finitum, & limitatum; sicut & intellectus Animæ separatæ; ut alibi dictum est.

Not. 2. Quod per secretum cordis aliqui intelligunt tam cogitationes internas mentis, quam etiam volitiones ipsas, quæ sunt operationes voluntatis. Alij verò intelligunt tantum operationes voluntatis, siue affectum voluntatis: de cogitationibus autem distinguunt; potest enim cogitatio duobus modis considerari; vno modo secundum substantiam; & quatenus est præcisè intellectus operatio;



nulla habita relatione ad voluntatem: secundo modo quatenus prouenit ex affectu, & imperio voluntatis in primo sensu volunt, non esse secreta cordium, sed in secundo sensu tantum.

Not. 3. Quod in hac questione sunt duæ opiniones, prima est Alens. p. 2. q. 26. memb. 3. quam sequuntur D. Thom. D. Bonau. Ricard. & omnes ferè recentiores tam Thomistæ, quam neutrales, qui asserunt ita firmiter Angelos cognoscere non posse secreta cordis vel Angeli, vel hominis, ut contendant esse de fide. Angles in floribus Theologiz, concedit, Angelum posse naturaliter cognoscere omnes cogitationes nostras naturales, quæ à voluntate, non pendent, & actus voluntati subiectos, quos voluntas aliquando sine deliberatione, & libertate habet, qui dicuntur à Theologis, motus primò primi; non verò actus, qui à voluntate deliberatè pendent. Secunda opinio est Scoti in 2. d. 9. q. 2. in solutione primi argumenti principalis, quam confirmat 4. d. 10. q. 8. in solutione 3. arg. principalis quomodocumque sumatur secretum cordis, siue pro cogitatione mentis, siue pro volitione, siue affectione voluntatis Angelum posse cordis secretum agnoscere. Verum discrepant inter se Scotistæ; nam aliqui tenent, Scotum de facto negare Angelos cognoscere secreta cordium, siue bonos, siue malos; & in hoc sensu amplectitur ab Ocham, Gabrielle, Maiore, & à multis Scotistis. Alij verò perpendentes Scotum negatem in 4. loco cit. Dæmones de facto cognoscere secreta cordium, & mysteria gratiæ, quia hoc illis Deus non permittit, ne ingentia mala hominibus inferrent; censent Angelos bonos secundum mentem Scoti, non solum posse, sed de facto cognoscere secreta cordium; Dæmones autem posse, sed de facto hoc illis Deum denegare.

I. Concl. Non est de fide, Angelos reuerà cordium secreta (supposito generali concursu Dei) ultribus proprijs cognoscere non posse: hæc est contra quosdam Neutericos, & signanter contra Suarez, Arlegam, & contra quosdam recentiores Thomistas.

Prob. generali principio Theologorum. Quod expresse non traditur à S. Scrip. nec explicitè in Euangelio continetur nec diffinitur in Concilijs, nec à Sanctis Patribus,



nec ab Ecclesia, quo ad doctrinam autenticam clare docetur, non est dogma fidei, vel articulus, spectans ad fidei substantiam; sed Sanctos Angelos viribus naturalibus non posse penetrare secreta cordium nullibi in S. Scrip. traditur, nec in Concilijs diffinitur, nec ab aliquo Sancto autentico docetur, sed solum hoc expressè negatur de facto de Angelis malis; sic enim habemus in Auctore de Ecclesiasticis dogmatibus apud Aug. cap. 61. *Internas Animæ cogitationes Diabolum non videre, certi sumus*, ergo non est error in fide asserere, Angelos posse &c.

II. Concl. Angeli, spectata eorum vi naturali, possunt cognoscere secreta cordium quomodocumque summantur; de facto tamen soli Angeli boni ea cognoscunt.

Probatut Conclusio quoad primam partem. Actus huiusmodi interni, ut semel sunt actus elicit, sunt obiecta proportionata intellectui Angelico; sunt enim actiones ordinis naturalis, aut qualitates naturales pertinentes ad ordinem vniuersi, sicut alia entia naturalia; ergo Angelus poterit illa cognoscere.

Confirmatur quia ista secreta sunt naturaliter intelligibilia ab ipso Angelo eliciente; ergo à quolibet alio pariter intelligibilia sunt; eo quia omnis Angelus intra spheram suæ actiuitatis omne intelligibile naturaliter concludit; ac proinde quidquid est intelligibile ab uno, erit, & à quolibet intelligibile.

Prob. 2. ex Scot. Quilibet Angelus naturaliter intuetur substantiam alterius siue Animæ, siue Angeli, & proprietates eius naturales; ergo poterit intueri etiam cogitationes, & volitiones in esse reali actuali positas; conf. patet, quia si potest naturaliter intueri principium, poterit pariter intueri effectus in tali principio contentos; etenim irrationabile videtur, quod aliquod creatum intelligibile, non supernaturale, nec ordinis Diuini, nullum intellectum creatum, habeat, cui sit proportionatum, & debitum.

Respondent Thomistæ primæ rationi Scoti; quod secreta cordium sunt obiectum proportionatum per modum actus primi, & sub ratione possibilium esse ordinis naturalis; non verò per modum actus secundi, & quoad existentiam, cum sic importent libertatem, & esse sub domino Angelis elicientis, sine cuius consensu nequeunt ab alio

alio videri : & in hoc sensu moraliter loquendo sunt altioris ordinis nempe liberi, qui est veluti medium inter ordinem naturalem, & supernaturalem, ac proinde non pertinere ad ordinem vniuersi, ad quem solum naturalia simpliciter pertinent,

Ad Confirmationem negant paritatem per eandem rationem assignatam, idest, quia ea sunt sub imperio Angeli elicentis, & non alterius. Deinde respondent secundæ rationi Scoti, dicendo, disparem esse rationem de essentia, voluntate, & intellectu Angeli in se, & de his, vt sunt in actu secundo. Siquidem illa pertinent ad ordinem naturalem, hæc autem non; & exindè Suarez, & Ariaga negant, secreta cordis esse ab Angelo cognoscibilia, quia de illis non habet species, cum habeant species solummodo de rebus naturalibus, cuiusmodi non sunt secreta cordium.

Resp. Io: à S. Thoma, quod actus voluntatis non sunt naturalis ordinis, ac proinde non sunt de consideratione vniuersi, quia solum actus determinati sunt aliquid pertinens ad integritatem vniuersi.

Resp. Recentiores Neuterici, secreta cordium non posse ab Angelo cognosci naturaliter, non propter physicum aliquem excessum altioris ordinis, sed ob aliquod impedimentum in genere moris, quod ita explicat Amicus, vt refert Mastrius disp. 2. q. 8. art. 2. n. 147. quia creatura intellectualis non solum habet physicum, sed etiam morale dominium supra suos actus, ac proinde protest pro suo libito celare alijs scientiam de suis secretis.

Verum nulla resp. ex supra recitatis satisfacit, eò quia sic respondendo petunt principium; hoc enim est, quod quærimus; quare solum res naturales sunt obiectum proportionatum intellectus Angelici, & non liberæ, quæ etiam in actu positæ, & liberè elicitæ habent pariter entitatem ordinis naturalis. Neque hic est sermo de actibus voluntatis, vt continentur in eius virtute indifferenti, & possunt ab ea produci, & non produci, quia, cum vt sic non habeant esse determinatum, per speciem repræsentari nequibunt, sed loquimur de ipsis in esse positis, qui vt sic habeant esse determinatum; & dicuntur liberi solum per denominationem extrinsecam. Cæterum nec resp. Amici soluit Scoti rationes, immò sic respondendo venit in no-

stram sententiam, quia etiam nos assignamus causam moralem excludendi scientiam aliorum de secretis. Itaque stando rationibus philosophicis probabilior est nostra sententia, quid autem de facto reuera contingat, nobis per Scripturam non est notum.

II. Pars Conclusionis patet ex dictis.

Arg. cont. primam Conclusionem auctoritatibus Sac. Scrip. quæ ubique declarat pertinere ad Deum solum secreta cordium noscere. Legitur enim 3. Reg. cap. 3. *Tu noli soli solus cor omnium futurum hominum*. Psal. 43. *Nonne Deus requirit ista? ipse enim nouit abscondita cordis*; & Psal. 2. *Scrutans cor da, & renos Deus*. Matth. cap. 9. *Cum uidisset Iesus cogitationes eorum*; Et in actibus Apostolorum cap. 1. *Tu Domine, qui corda nosti omnium*; & alibi sepè & hoc idem docent SS. PP. ergo &c. Resp. Scot. in solutione ad secundam, expendens illud Sac. Scrip. solus Deus nouit abscondita cordis, quod intelligitur vniuersaliter de omnibus videlicet cordium secretis, præsentibus, præteritis, & futuris. Secundò ex propria perfectione, & independenter, adeo ut impossibile sit impediri eius cognitio. Tertio solum Deum cognoscere secreta cordium tamquam iudicem vniuersalem, quo quidem modo nullus alius cognoscere potest; & hæc explicatio quadrat optime præcitatis Scrip. locis, ut patet bene consideranti.

Sed instat Vasquez. Scriptura, & PP. ita attribuunt Deo cognitionem secretorum cordis, ut euidenter inferatur soli Deo competere ergo &c. Resp. friuolam esse hanc instantiam, cum explicatio allata sit conformis etiam SS. PP. & S. Scrip. etsi non placeat Suarez, nec ipsi Vasquez.

Arg. cont. secundam conclusionem; Angelus etiam si admittatur cognoscere actus internos alterius Angeli, & hominis quod ad esse absolutum, non tamen eos cognoscit quoad esse respectuum, & tendentiam in obiectum; cum non cognoscat ipsum obiectum ut volitum, sed sic est, quod ad cognitionem secretorum cordis exigitur, ut cognoscantur obiecta etiam secundum esse respectuum, & tendentiam, ergo Angeli non cognoscunt secreta &c. Maior patet ex dictis alibi; eo quia intellectio, & volitio ab Angelo visæ sunt ei veluti ratio cognita tantum, seu obiectum cognitum, non autem ratio cognoscendi; ergo nequit

quit Angelus cognoscere secreta cordis quoad esse respectuum, videt namque Angelus cognitionem, volitionem, sed non videt quid cogitemus, quid amemus, & ad quem finem tendat nostra cognitio, ac volitio, quæ siquidem soli potentiae elicienti sunt ratio cognoscendi.

Resp. dist. mai. videns cogitationes alterius distinctè, & specificè, non videt saltem abstractiue obiectum illius, nego; non videt intuitiue obiectum, concedo: ex hoc tamen nequit inferri, Angelum non agnoscere cogitationes nisi secundum esse absolutum, vt eleganter discurrit Mastrius in hac quæstione n. 261. & n. 250. Vel resp. non videre respectum actuale, sed aptitudinalem.

Arg. 2. Admissa hac sententia, sequitur, quod frustra in Angelis poneretur locutio, quia sic omnis interna cogitatio vnius Angeli posset sciri ab alio Angelo, sed hoc videtur absurdum, ergo non est admittenda talis sententia, Resp. ex Scot. in 2. d. 9. q. 2. admissa nostra sententia solum sequi locutionem non esse ita necessariam, ac si vnus Angelus non videret internum conceptum alterius; non autem esset locutio frustranea, quia auditio, vt docet Scotus est perfectio quædam liberaliter communicata Angelo audienti ab Angelo loquente; ad hoc enim potissimè est instituta locutio in loquentibus intellectiuis, vt sibi inuicem liberaliter communicent conceptus suos.

Arguunt Recentiores, & signanter Iesuitæ tali pacto: Ex hac sententia sequuntur absurda in vita politica, si tollatur secretum cordis; ergo cum intellectualis natura ordinetur ex sui conditione ad vitam politicam; naturale etiam est, vt possideat secreta cordis iuxta exigentiam suæ naturæ. Resp. neg. assumptum, quia secretum cordis ex natura rei datur tantum respectu hominis, & pro statu isto ob membrorum corpulentiam, vt tradunt D. Greg. & D. Aug. &c. Cæterum negatur, vitam politicam ex sui natura petere secretum cordis; nam sine perturbatione adhuc vita politica duceretur; & fortè melius, quàm modò, si nullum daretur secretum cordis, vt Socrates aiebat. Itaque secretum cordis pertinet ad vitam politicam pro statu isto, quatenus videlicet ob naturæ lapsæ imperfectiones melius est vnum hominem alterius ignorare secretum cordis, quàm scire.

*Vtrum Angeli naturaliter cognoscere valeant effectus supernaturales, & mysteria gratiæ.*

**N**OT. 1. Quòd effectus supernaturales sunt in duplici genere; alij dicuntur supernaturales quoad substantiam, & sunt illi, qui transcendunt omnem facultatem, & potentiam naturalem creaturæ, & à solo Deo fieri possunt; sic vnio hypostatica, visio beatifica, gratia santificans, & huiusmodi. Alij dicuntur supernaturales tantum quoad modum, & sunt illi, qui simpliciter fieri possunt à causis naturalibus, estò non cum talibus circumstantijs; nam à priuatione ad habitum non datur regressus, sic mortui resurrection, visus restitutio, & similia; vt etiam explicatum fuit in disputatione de visione beatifica. Quæstio igitur præsens non est de effectibus supernaturalibus secundi generis, nempe quoad modum; constat enim tales effectus ab Angelis certò, ac euidenter cognosci, immò & ab hominibus, nimirum mortuum resurrexisse, cæcum illuminatum fuisse &c. quia huiusmodi effectus secundum suam entitatem sunt naturales, ac proinde naturaliter cognoscibiles, sed quæstio procedit de effectibus primi generis: an certò, & intuitiue Angelus eos agnoscere valeat.

Not. 2. ex Scoto quol. 14. quòd obiectum primum intellectus Angelici, vel humani ex natura potentiæ secundum naturalem attingentiam est præcisè ens limitatum ad se, vel ad alterum limitatum; nam entitas limitata, quæ est essentialiter ad alterum illimitatum, non est naturaliter intelligibilis ab intellectu creato; sicut nec terminus sine quò nec ipsa intelligi potest sub proprio conceptu. Qua ratione notant quam plures Scotistæ excipienda esse ne dum mysterium Trinitatis, sed etiam mysteria prædestinationis, reprobationis, glorificationis, & damnationis cuiusuis rationalis creaturæ: & insuper quæcumque alia creata respectum pro formali dicentia ad Deum sub ratione Deitatis, vel sub aliqua ratione solùm cognoscibili ex reuelatione, aut ad liberam D. voluntatis dispositionem, qualia sunt Verbi incarnatio, iustificatio impij per infusionem gratiæ, glorificatio, opera de condigno vitæ æternæ, & similia.

Not.

Not. 3. Quodd circa hanc quæstionem versantur duæ opiniones. Prima est D. Thoma 1. p. q. 57. art. 5. existimantis effectus supernaturales secundum substantiam, qui dici solent mysteria gratiæ, non posse ab Angelo naturali virtute, seclusa reuelatione diuina, euidenter, & sub proprio conceptu cognosci, sed ad summum arguitiue tantum: ratio, quia cognitio effectus huiusmodi cum sit superioris ordinis non est debita intellectui creato secundum naturalem attingentiam, cuius obiectum non est ens supernaturale, sed naturale. Secunda est Scoti in 4. d. 10. q. 8. vbi loquens de præsentia Corporis Christi in Eucharistia ostendit eam naturaliter posse cognosci ab Angelo: & in solutione ad 3. principale indiffinitè docet mysteria gratiæ, ex quo posita sunt in effectû, posse etiam à dæmonibus agnosci, nisi de facto à Deo impedirentur. Verum Doctor, prout passim aduertunt Scotistæ, non tenet hanc sententiam in tanta vniuersalitate, sed cum quadam exceptione, vt in sequenti conclusione ostenditur.

Conc. Aliqui effectus supernaturales pertinentes ad gratiæ mysteria, supposito iam primo miraculo, quod sint à Deo producti, vt ab Auctore supernaturali, & supra omnem naturæ exigentiam, possunt ab Angelo distinctè, & euidenter cognosci; aliqui verò non, sed solum supernaturaliter, & media reuelatione. Hæc reuera est Scoti, & Scotistarum, & etiam Nominalium. Prob. Conc. quod ad primam partem. Mysteria gratiæ supernaturalia, tam quoad modum, quam quoad substantiam continentur intra latitudinem entis creati: ergo Angelus sua naturali vi illa potest attingere. Consequentia patet, quia ens limitatum est obiectum adæquatum intellectus Angelici, & aliundè nil obstat, quin Mysteria gratiæ attingantur; non quidem supernaturalis entis maior perfectio obstat, quia aliquod gratiæ Mysterium est imperfectius substantia Angeli, quæ tamen attingitur ab intellectu Angelico. Neque diuersitas ordinis, quia obiectum, & potentia non oportet, quod sint eiusdem ordinis; cum potentia sit Spiritualis, & substantialis, obiectum verò sepe materiale, & accidentale. Neque tandem obstat supernaturalitas, cum illa non attendatur nisi per ordinem ad potentiam effectricem talis effectus supernaturalis. Vnde superna-



turalitas vnius corporis positi in duobus locis circumscriptiue sine dubio perciperetur ab Angelo.

Prob. Conc. quoad secundam partem. Angeli non cognoscunt euidenter, & intuitiue mysteria Incarnationis, decreta Dei libera, iustificationem peccatoris, acceptationem bonorum operum, & similia: ergo Angelus non omnia mysteria gratiæ agnoscere valet. De mysterio Incarnationis patet per illud ad Ephes. c. 9. *Sacramentum absconditum à Deo*; de Decretis pariter liberis patet per illud ad Rom. cap. 11. *Quis enim cognouit sensum Domini? aut quis consiliarius eius fuit?* De cæteris patet maximè in sententia Scoti, docentis Angelos sine reuelatione non posse cognoscere remissionem peccati, iustificationem, & alia huiusmodi, quia gratia non iustificat hominem physicè, & ex natura rei, sed tantum moraliter, & ex ordinatione Diuina.

Arg. cont. primam partem conclusionis. Cognoscibilitas sequitur entitatem; sed gratia santificans v. g. est entitas supernaturalis, ergo solum supernaturaliter cognosci potest. Resp. ex Scot. conc. mai. & dist. min. quod ad fieri, concedo; quoad cognosci postquam facta est, nego. Gratia namque posita in esse, & quilibet alius habitus infusus, & ipsum lumen gloriæ cognosci potest ab Angelo in ratione entis, licet non in ratione gratiæ santificantis, vt supra indicauimus.

Arg. 2. Angelus nequit naturaliter acquirere species à supernaturalibus; ergo neque cognoscere entia supernaturalia. Resp. neg. anr. Nam quodcumque ens limitatum positum in esse, & intellectui Angelico præsens est obiectum proportionatum, ac proinde cognoscit illud intuitiue sine specie, vt resolutum fuit in quæstione de specie Angelica; immò etiam si obiectum sit supernaturale, est tamen ei naturale species immittere, & potentiam mouere.

Arg. 3. Angelus si naturaliter intuetur mysteria gratiæ: ergo & actum beatificum alterius, quod non videtur admittendum, quia esset naturaliter beatus.

Resp. dist. cons. videret actum beatificum quoad entitatem absolutam, seu in genere entis, concedo; quoad respectum terminantem ad obiectum beatificum, nego; quia respectus non attingitur sine cognitione termini, ac proinde non cognoscitur respectus ad Deum, cum ipse natu-

raliter non cognoscatur, vnde non sequitur, quod esset naturaliter beatus; sola namque visio actus beatifici quoad entitatem absolutam nequit beatificare; Itaque actus vitalis, cum possit permanere, destructo etiam obiecto, potest videri, non viso respectu actuali ad ipsum obiectum.


Cont. Angelus naturaliter cognoscit illum actum esse, non quaecunque cognitionem, sed beatificam; ergo infert, necessariò habere obiectum beatificum, ergo beatur per talem cognitionem. Resp. dist. ant. cognoscit intuituè, nego ant. arguituè, & abstractuè concedo. Quare non sequitur, quod Angelus per talem visionem sit beatus, cum ad hoc exigatur visio intuitiva.

Ex dictis infertur primo Thomistas non modestè loqui, dum Scoti sententiam temerariam appellant, ac fidei parum consentaneam. Etenim neque S. Scrip. neque SS. PP. contra nostram sententiam reclamant, imò est consona, rationi, Angelicis perfectionibus, & Doctrinæ SS. PP. & S. Scripturæ. Secundo infertur, quod Angelus naturaliter videre potest existentiam Corporis Christi in Sacramento Eucharistiæ, habitus Theologicos Fidei, Spei, & Charitatis. Prob. primo, quia de cæteris constat ex dictis, Anima Christi nouit naturaliter se esse vbicunque est, ac proindè nouit se esse in Eucharistia, & modum, quo ibi existit; non enim est possibile, quod cognoscat, se esse in Eucharistia, & non cognoscat modum, quo ibi existit; quod gratis concedit etiam Vasquez, estò neget Angelum non cognoscere mysteria gratiæ: ergo à fortiori Angelus noscere valet existentiam Corporis Christi in Eucharistia. Insuper cognoscere potest etiam modum existendi quantitatis sine subiecto in eodem Sacramento; siue enim ille modus existendi sit negatiuus, siue sit positiuus, & specialis modus subsistendi à Deo superadditus, eò quia nulla apparet impossibilitas, tam ex parte obiecti, quam ex parte potentiæ: sed de hoc latè in part. 4. tract. 2. de Sacramento Eucharistiæ.

Quæres. Quid dicendum sit de Dæmonibus postquam amiserunt statum viæ.

Resp. Quòd Diabolus, vt communiter docent Theologi, & SS. PP. fuit impeditus à cognitione aliquorum circa aduentum Christi, & circa eius dignitatem, & fructum.

aduentus ipsius Christi ; & hoc speciali Dei prouidentia ; vt putat Scotus in 4. d. 10. q. 6. §. ad arg. ex doctrina D. Aug. dicentis lib. 9. de Ciuitate Dei : *Christus tantum innotuit Diabolo, quantum voluit ; & tantum voluit, quantum oportuit.* Quare censent aliqui, vt Delcadil, & Lorca, impeditam esse notitiam Dæmonis non solum per subtractionem concursus, sed etiam per effectiōem aliorum effectuum, qui occultarent Christi diuinitatem, diuertendo mentem Dæmonis, ne consideraret illos effectus, qui eius Diuinitatem ostenderent, vt habetur etiam in homil. de partu Virginis. Verū postquā Christus Dominus prædicauit, & fecit signa, & miracula in confirmationem suæ doctrinæ, Diabolus cognouit esse Christum, & verum Filium Dei, sic tradit communis sententia Patrum, quāuis inter se sit dissidium de qualitate huius scientiæ. Quidam enim vt D. Hieron. Chrysostomus, Beda, & D. Thom. 3. p. q. 44. art. 1. existimant, hanc Dæmonis notitiam non esse omninō certam, sed ex suspitione ortam, quod dissidium componit noster Delcadil tom. de Angel. cap. 4. diff. 4. vbi sic habet: fortē componitur hoc dissidium ex dictis à num. 80. Quare dicimus, quod speciali Dei prouidentia fuit impedita Dæmonis cognitio, ne Christum perfectē agnoscerent, quod si non fuisset impedita, habuisset certam de Christo notitiam ; habebat enim sufficiens principium cognoscendi oracula Prophetarum de Christo Domino ; vnde Io. 5. *Scrutamini scripturas &c. illa sunt, quæ testimonium perhibent de me.* Immo ex Scrip. veteris testamenti agnoscere potuissent Iudæi Christi diuinitatem, vt docet glosa ordinaria super prædicta verba. *Per ipsas me Deum intelligere potestis, si diligenter aduertatis ;* & in nouo testamento sunt apertiora testimonia de Christi Diuinitate ; vt Io. 8. *Ego de supernis ;* & cap. 10. *Ego, & Pater vnum sumus :* ac proinde nisi impeditus fuisset intellectus Dæmonis, habuisset certam scientiam, de Messia in lege promisso. Idem videtur docere Scot. in 3. d. 21. q. 1. in fine questionis.



## QVÆSTIO VII.

121

*Vtrum Angelus sua naturali virtute cognoscere  
possit futura contingentia.*

**N**ot. Quod futura contingentia sunt triplicis generis : quædam enim necessario proueniunt ex causis naturalibus determinatis, vt motus Corporum Cælestium, & cursus Astroꝝ; immò etiam omnes euentus naturales, qui in his inferioribus fiunt, siuè à Cælorum influxu, siuè ab alijs causis naturalibus. Alia sunt futura, quæ non necessario, sed vt plurimum ex suis causis sequuntur absque dependentia à libero arbitrio; vt sanitas ex tali medicina &c. Alia denique sunt futura, quæ prorsus contingentè, & à causis liberis fiunt; his prænotatis, sit.

I. Concl. Futura, quæ habent causam determinatam, & infallibilem, cuiusmodi sunt, quæ attenduntur pænes motum corporum superiorum, in quibus est determinatio, & omnis impedimenti remotio, possunt ab Angelo certitudinaliter sciri; est communis, & signanter D. Bonau. in 2. q. 3. p. 2. & patet. Nam Angeli possident scientiam mirabilem, & vniuersalem scientiam causarum naturalium, & consequenter effectuum, qui in ipsis continentur, ergo &c. Tum quia si homines in Astronomia periti prædicunt certitudinaliter motus Cælorum, eclypsim &c. à fortiori Angelus, qui in cognitione non patitur ingentes difficultates, quas nos experimur; maiori certitudine, ac perfectiori modo cognoscet talia futura, habentia causam necessariam, & infallibilem.

II. Concl. Futura, quæ habent causam determinatam, sed fallibilem, estò plerunque sic contingat, non cognoscit certitudinaliter Angelus: hæc pariter est communis, eamque sic probat D. Bonau. vbi supra. Ideò habent causam determinatam, quia intentio naturæ mouet ad vnum determinatè, ideò fallibilem, quia multiplicitè potest occurrere impedimentum, vtpotè ager seminatus, si terra pinguis est, & bona dispositio superiorum corporum afferret pinguem fructum; non tamen ita certitudinaliter sciri potest ab Angelo, sicut futura habentia causam infallibilem.

III. Concl.

III. Concl. Futura contingentia à causa libera dependentia nequit Angelus virtute naturali certò scire, sed solum coniecturas, seu arguitivè. Hæc constat ex S. Scrip. & præsertim ex illo Isaia. *Annunciata, quæ ventura sunt, & scelamus quia Dñs est vobis*: ideoque D. Bonau. loc. cit. ait: cum talia prædicuntur, prædictio dicitur diuinationis, quia talis est actus diuinus. Hinc Tertull. Apologet. cap. 20. *Testimonium Diuinitatis, veritas diuinationis*; at quia Dæmones, subdit D. Bonau. superbi maximè desiderant honorari vt Deus, maximè conantur ostendere, hanc vim se habere, vt patet ex Ariolis, aruspiciis, responsis per Idola &c. Ratio conclusionis est, quia huiusmodi futura non possunt ab Angelo præsciri in se ipsis; cum in se ipsis non sint determinata, neque in se existant; nec etiam in causa, quia ipsa pariter est indifferens, & indeterminata, quam indeterminationem nequit Angelus agnoscere; cum non cognoscat, nec id, quod ipsemet est acturus, antequàm aliquid facere proponat. Quare vt tradunt D. Bonau. D. August. & comuniter Doctores, Diabolus non præscit suum casum; ergo multò minùs potest similia de alio Angelo, vel homine præscire. Secunda pars Conclusionis patet signanter de Dæmonibus; qui estò non videant nostras cogitationes cordis, tamen plerùmque eas agnoscunt ex coniecturis, ex signis externis, ex hominis complexione, nec non ex alijs effectibus, nisi à Deo impendantur ob nostrum bonum, & salutem Animæ &c.

Aduertendum, quod diximus in conclusione futura, contingentia; secus autem de præteritis, quæ sicut potuerunt sciri præsentia, sic in nostra sententia eorum recordari possunt Angeli; alioquin spectando præteritionem, præterita sunt tam ignota Angelo, quam futura, cum neutra mouere possint intellectum Angelicum, ad quam motionem exigitur obiectum existens. Verùm Thomistæ aliter discurrunt, dum putant, Angelos omnia, & præterita, & præsentia, & futura intelligere per species congenitas; vnde non est eis facile respondere, si interogentur: per quam speciem cognoscat Angelus futura, quando ei reuelantur. Nam dicere, quod cognoscunt per eandem speciem, per quam cognoscunt eadem, vt præsentia, & præterita, est concedere Angelum posse

naturali virtute cognoscere talia futura antequam sint, quod sibi ipsis contradicit. Quamvis Caspensis in tract. de Angel. Thomistam agens respondeat, futura non esse intra latitudinem obiecti naturalis intellectus Angelici, saltem quoad modum, ac proinde non sequi, Angelum futura præscire.

Arg. cont. tertiam Concl. Astronimi, & Mathematici percursum astrorum præcognoscunt, & prædicunt multa futura, quæ in multis vera sunt: ergo si maior est intelligentia in Angelis tam bonis, quam malis, videntur, posse præcognoscere futura. Resp. ex D. Bonau. quod Astronimi, & Mathematici si dicunt frequenter vera, hoc faciunt coniecturando, siuè secundum leges astrorum, siuè secundum diabolica commercia; primo modo quando dominatur Stella, quæ habet impræssionem super diuersos humores, disponit secundum hoc hominem, ad diuersos mores, & affectiones; secundo modo nempe secundum commercia Diabolica, vt quando volunt vi astrorum ultra procedere, quam scire possunt, tunc nisi Diabolus adesset, ita frequenter falsum, sicut verum dicerent; nunc autem cum toto auxilio Dæmonum frequenter falsa prædicunt, & decipiuntur, sed tanta est Dæmonum astutia, quod ita sciunt occultare fraudem suam, vt ostendant errorem, siuè defectum fuisse in Astronimo considerante, non in aere, aut Diabolo assistente. Itaque tam Astronimi, quam Dæmones præsciunt huiusmodi futura ex coniecturis minoribus, vel maioribus, cum Angelus sit longè hominibus perspicacior, & scientificus.

Adde, quod Deus in vindictam impiæ curiositatis consulentium interdum permittit, quod Dæmones, vel Magi vera prædicant, vt aduertit D. August. lib. 2. de Doctrina Christiana.

## QVÆSTIO VIII.

*Vtrum Angeli ad inuicem loquantur, & quomodo loquantur.*

**N**Ot. 1. Quòd locutio est manifestatio conceptus mentis facta ab Angelo alteri Angelo; quæ quidem locutio



tio mentalis competit mirabili modo etiam Deo; Verùm diuersa ratione, vt obseruat D. Greg. lib. 2. moral. cap. 5. *Aliter, inquit, loquitur ad Angelos Deus; aliter Angeli ad Deum, aliter Deus ad Sanctorum Animas. aliter Deus ad Diabolum, aliter Diabolus ad Deum; & quibusdam interpositis subdit. Deus, ergo Angelis loquitur, cum eis voluntas eius intima videnda manifestatur; Angeli autem, & Anima loquuntur Deo per sua desideria; vnde Propheta. Desiderium cordis eorum audinit auris tua. Ceterum quod Angeli inuicem loquantur est de fide; vnde dicitur Isaia 6. *Seraphim clamabant alter ad alterum, & dicebant: Sanctus, Sanctus, Sanctus; ita Frassen.**

Not. 2. Quodd difficillimum est reperire, & penetrare modum, quem tenent Angeli ad inuicem loquendo, hinc tot capita, tot sententiæ. Quidam putant, loquutionem Angelicam inter ipsos perfici mediantibus signis materialibus, & sensibilibus in aere, in Cœlo, vel in alio corpore Angelis proximo formatis; ita Durand: sed hæc opinio non est tolleranda, inquit noster Herincx; eò quia incredibile est, spirituales substantias ab huiusmodi signis dependere, adeò vt sine illis loqui non possint; sequeretur enim quod si res corporeæ, & sensibiles non essent creatæ, non possent Angeli ad inuicem loqui, quod est manifestum absurdum. Alij vt Greg. Marsilius, quos sequitur Molina, opinantur, Angelos indigere signis, saltem spiritualibus, quibus inuicem loquantur; at nec ista subsistere potest, eò quia illa signa, vel essent naturalia, & hoc dici nequit, quod non apparet, quæ signa naturalia ista essent; tum quia deberent esse publica, & communia omnibus, ac proinde non posset Angelus alteri loqui nisi alijs audientibus: Vel essent signa ad placitum, & ex instituto, & sic ad eorum institutionem prius debuissent Angeli conuenire, & his signis potius, quàm alijs alligare significationem talis, & talis conceptus mentalis; quod siquidem fieri debuit per aliquam loquelam iam inter Angelos practicatam; ergo frustra excogitatur alius modus loquendi. Alij censent, quod fiat locutio per actum reflexum super actum directum prius habitum, quo mediante se explicet habere huiusmodi conceptum de tali, & tali re, ita Vasquez, Amicus, & alij recentiores: sed nec ista quadrat; nam omnis vera locutio nequit esse actus purè immanens, sed

sed debet esse ad extra causans aliquod in audiente, quo excitetur ad audendum, si ad alia esset intentus, sed actus reflexus est actus immanens, ut gratis concedunt ipsi aduersarij; ergo locutio non fit per actum reflexum; mai. patet à proportionem vocalis loquutionis inter homines &c. Alij existimant, Angelos loqui per hoc, quod loquens vellet alterum scire suum conceptum, hoc enim fit pro loquentis arbitrio respectu istius, vel istorum tantum, cui, vel quibus Angelus loquens intendit manifestare suum conceptum: excitatur etiam alter audiens ad intelligendum, & causatur in intellectu audientis, seu gignitur species conceptus manifestati, vel ipsummet conceptum loquentis obiectiue, ut vult Ocham, coëfficere cognitionem sui in audiente; ita communiter recentiores, quam ex parte amplectitur etiam noster Herincx, dum eam vocat valde probabilem, & facilem, quamuis non sit improbabilis doctrina Scoti, ex quo apparet, quod tam insignis Scotista aliquo modo recedit ad sententiam Scoti; Nihilominus etiam ista opinio, quæ videtur esse omnium Thomistarum improbat; etenim illa simplex volitio, seu ordinatio conceptus propriæ ad alterum est actus liber voluntatis, & locutio Angelica non est actus voluntatis, sed intellectus; hinc à Theodoro to scribente super illud Apost. 1. ad Corint. cap. 13. *St linguis hominum &c. Appellatur intelligendi vis, per quam, non qua sensu, sed intelligentia percipiuntur, manifestantur*: ergo &c.

Præterea illa simplex ordinatio, seu volitio, qua vult Angelus manifestare alteri suum conceptum, nequit excitare audientem, ergo &c. Prob. Excitatio necessariò debet fieri per aliquod immutans intellectum Angeli, qui debet audire, ut in nobis contingit, sed illa ordinatio conceptus ad alterum nil causat in intellectu audiētis, cum nec conceptum ipsum, nec speciem eius in ipso realiter producat; ergo illa ordinatio, seu volitio non potest dici locutio.

Concl. Modus locutionis quo vtuntur Angeli fit vel per productionem ipsius mei conceptus in audiente, vel per causationem speciei abstractæ ab obiecto, de quo fit locutio; Ità Scot. in 2. d. 9. q. 2. & præter Scotistas secundam partem tenent D. Bonau. Ocham, Aureol, Gabriel, & ex Thomistis Zumel, Pesantijs, Auersa, Suarez, & alij.

& alij. Prob. Concl. rationibus, quibus confutata remanent aliorum opiniones, & insuper probatur sic. Loquens intellectualiter intendit deducere eum, cui loquitur in cognitionem rei, de qua fit locutio, ergo si possit tanquam causa totalis sine vlllo medio illam cognitionem producere in audiente, reuerà censendus est, eam producere, sed sic se habet Angelus loquens; ergo &c. Probat. min. Scotus. Intellectus Angeli loquentis cum specie intelligibili obiecti concurrentis ad sui notitiam est causa effectiua adæquata sufficiens ad producendam talem notitiam in quocunque intellectu debite approximato; sed intellectus Angeli audientis est capax talis cognitionis recipiendæ; ergo tunc intellectus Angeli causare potest in intellectu alterius Angeli talem cognitionem, vel speciem talis obiecti manentis in ipso Angelo loquente. Prob. mai. Doct. Illud, quod sufficienter est in actu primo, respectu alicuius effectus, potest illum causare in receptiuo proportionato approximato, sed Angelus habens notitiam habitualement alicuius obiecti est sufficienter in actu primo ad causandam intellectionem illius; ergo &c.

Aduerte, quod ratio fundamentalis Scoti non debet accipi in tanta vniuersalitate, quasi velit, quod omne principium productiuum effectus in se, sit etiam productiuum in alio, sed solum quando principium producens, & passum recipiens effectum productum, inuicem proportionantur; adeo vt vnum sit susceptiuum effectus alterius eiusdem ordinis, & rationis.

Cæterum quod Angelus audiens sit capax talis receptionis, patet, quia vnus Angelus ab altero illuminatur, vt dicitur in sequenti quæstione, sed illuminatio fit per receptionem notitiæ impressæ ab Angelo illuminante: ergo in intellectu Angelico est capacitas receptionis notitiæ alienæ, & speciei impressæ, vt magis monstrabitur in solutione argumentorum. Nota quod locutio potest esse intuitiua cognitio rei, & abstractiua; intuitiua actus intellectus manifestati; abstractiua obiecti illius actus; non enim obiectum intuetur, sed per speciem cognoscitur abstractiue, vt docet Mastrius disp. 2. n. 301.

Arg. 1. Non apparet quomodo Angelus loquens possit Angelo audienti imprimere suam intellectionem, vel speciem,

ciem, ergo &c. Prob. ant. vel Angelus loquens est intra intellectum Angeli audientis, dum imprimitur, & hoc non; alioquin ei illaberetur intus, quod est proprium Dei; vel est distans localiter ab Angelo audiente; & tunc pariter nequit aliquid imprimere eius intellectui; cum intellectio, vel species deberent transire per medium, quod non apparet possibile, cum sint accidentia spiritualia, quæ nequeunt per media corpora transire, eisque inhaerere: ergo non apparet, quomodo Angelus loquens possit audienti imprimere notitiam, vel speciem obiecti.

Resp. neg. ant. ad eius probationem dicendum, quod Angelus utroque modo potest audienti imprimere suam intellectiōem, vel speciem; & si primo modo imprimat, non tamen debet illabi, illapsu soli Deo proprio, qui in hoc consistit, quod Deus omnem rem in se, & sub suo dominio contineat eo modo, quo explicatum fuit in questione de immensitate; sed illabitur aliq. illapsu convenienti etiam creaturis, nimirum constituendo se intus præsentem, & immutando intellectum alterius, qualiter obiecta illabuntur necessario intellectui; dum in eum immittunt suas species. Si autem secundo modo fiat, intellectiōis, vel speciei impressio fit sine transitu per medium, quod non est capax ob sui immaterialitatem talium accidentium spiritualium; sed tunc agit indistans, quæ siquidem actio indistans de facto datur ut probatur in physica; essetque in tali casu præsens, & immediatus passo non per contactum Mathematicum, ut ita loquar (proportione servata) sed per contactum virtutis, quatenus producit terminum in intellectu audientis.

Arg. 2. Intellectio Angeli loquentis imprimenda Angel. audienti est actus vitalis, sed actus vitalis in fieri; & conservari dependet à suo principio vitali; ergo nequit imprimi in audiente. Resp. neg. min. Nam ad hoc ut aliquis actus dicatur vitalis, sufficit, quod per eum aliqua potentia dicatur tendere vitaliter in obiectum, & quod talis actus ab aliquo principio vitali eliciatur, siue hoc sit potentia, à qua primo elicitur actus, siue à potentia recipiente, aliàs Deus non posset infundere speciem, seu notitiam aliquam in intellectu creato, siue humano, siue Angelico.

Arg. 3. Vnus Angelus nequit alteri imprimere suam volitionem; quia alias posset Angelus malus imprimere Angelo bono peccatum, quod est manifestè absurdum; ergo &c. Resp. Delcadillus cum Lich. in 2. d. 9. q. 2. concedendo totum; & deinde affert alias instantias, quæ mihi videntur multum vrgere nostram conclusionem: ideo resp. neg. ant. ad illud, quod subditur; aliter posset Angelus malus bono imprimere peccatum, dist. in genere qualitatis, conc. in genere moris, neg.

Cæterum pro vberiori doctrina, & fundamento nostræ sententiæ obseruandum ex Macedo in hac quæstione, quod duæ sunt actiones; vna intellectio vitalis, & immanens; altera transiens, & non vitalis, quæ producit aliam conceptum similem primo immanenti intra proprium intellectum; & declaratur hoc exemplo speciei relictæ ex eodem conceptu: actio, per quam ista species relinquitur in memoria, producitur immediatè à conceptu intellectiōis, & tamen non est vitalis; potest ergo à conceptu vitali, & vitaliter producto, procedere actio non vitalis.

Si dicatur. Aliud est producere in se ipso actum non vitalem, aliud extra se ipsum, & in alieno intellectu.

Resp. Macedo, quod hæc obiectio est inanis, quia quando actio natura sua non est vitalis, concomitanter non est immanens, ac proinde abit in transiensem; & probatur à paritate de potentia visiva, & de phantasia: nam oculus format suam visionem, & deinde illæ species mittuntur in sensum communem, & hic eas mittit in phantasiam, & phantasia in intellectum agentem, qui est potentia spiritalis; ergo &c. Vnde formatur sic Argumentum. Non est minus difficile mittere speciem in potentiam alterius ordinis superioris, idest spiritalis intra idem subiectum, quam mittere speciem eiusdem ordinis in subiectum eiusdem ordinis spiritalis, sed phantasia hoc efficit respectu intellectus agentis, ergo, & intellectus Angelicus idem efficiet respectu intellectus alterius Angeli.



## QVÆSTIO IX.

*Vtrum Angelus illuminare possit alium Angelum, & quomodo.*

**N**ot. 1. Quod illuminatio est species quædam locutionis ei superaddens doctrinam, & quasi magisterium. Unde est locutio, qua vnus Angelus manifestat alteri veritates ignotas, & excellentes à Deo acceptas. Quare Angelos ab Angelis illuminari est constans Theologorum sententia, desumpta ex SS. PP. signanter Dion. lib. de Cœlest Hierarchia cap. 3. & 4. (contra Durand. dicentem omnes illuminari immediatè à Deo) vbi superiores vocat inferiorum præceptores, & duces. Verùm & si ordinarium sit, & recto ordini consonum, vt Angeli inferiores illuminentur à superioribus iuxta Damasc. lib. 2. de fide cap. 3. hoc tamen non est ita necessarium ex natura rei, vt interdum oppositum contingere nequeat, vt docet Scotus d. 9. q. 2. Similiter censendum non tantum Angelos inuicem illuminare, sed frequenter illuminare etiam homines beatos, & suo modo etiam viatores; & fortassè etiam B. Virgo de multis illuminat Angelos, cum sit illorum Domina, & Regina.

Not. 2. Quod illuminatio Angelica, sic à Scot. describitur: Est quædam locutio de vero perfectiua in esse secundo: dicitur locutio, quia omnis illuminatio est locutio, sed non è contra; quia locutio est de re aliqua, siue perfectiua intellectus audientis, siue non perfectiua; dicitur de vero, non quod sufficiat ad illuminationem manifestatio cuiuscunque veritatis, sed fieri debet de re à Deo reuelata Angelo superiori, & ignota Angelo inferiori; dicitur denique perfectiua in actu secundo quia, cum omnis notitia sit perfectiua intellectus; notitia, quæ dispensatur ab Angelo superiori inferiori, perficit intellectum Angeli taliter, vt eam Angelus nec vi naturali, nec per species sibi congenitas acquirere valeat, ideoque dicitur in actu secundo. Insuper ad maiorem intelligentiam obseruandum, quod D. Dion. enumerat tres actus hierarchicos, nempe purgationem, illuminationem, & perfectionem; qui quidem actus coincidunt cum illuminatione.



ne, quæ dicitur purgatio, quatenus expellit ignorantiam, seu negationem scientiæ; illuminatio, quatenus per illam occulta manifestantur, sicut per lumen corpale colores; & denique perfectio, quatenus perficit intellectum Angelicum scientia quadam eminentiori.

Concl. Illuminatio Angelica non fit per productionem alicuius luminis siue naturalis, siue supernaturalis in intellectu illuminati, sed per productionem cognitionis naturalis prius habitæ ab Angelo illuminante; hæc inferitur ex quæstione antecedenti, ac ipsoinde ex Scot. in 2. d. 9. quæst. 2. & etiam D. Bonau. eamque Scotistæ omnes tenent contra Thomistas.

Prob. breuiter illuminatio est vera locutionis species, & solum addit respectum reuelationis factæ ab Angelo illuminante de re, circa quam fit locutio: sed locutio fit per productionem cognitionis actualis, vel per speciem obiecti impressam in Angelo audiente, ergo & illuminatio ita fieri debet.

Arg. auctoritate D. Aug. in Enchirid. cap. 58. vbi dicit: *Nihil de hac re, hoc est de illuminatione certum esse*, ergo non est certum apud SS. PP. Angelos superiores illuminare inferiores. Resp. Delcadil. cum Vasquez, quod D. August. non vidit opera D. Dion. quæ diu manserunt suppressa; idcirco Gregorius magnus, qui post, tempora D. August. floruit (nam D. August. teste Belar. lib. de Scrip. Eccles. obiit anno 433. Gregorius verò anno 604.) sententiam Dion. ex aliorum relatione de Angelorum illuminatione meminit.

Arg. 2. Omnia, quæ decursu temporis reuelantur Angelis, pertinent ad eorum statum beatitudinis; ergo à solo Deo immediatè reuelantur: Conf. patet, quia solus Deus est causa beatitudinis, tam essentialis, quam accidentalis.

Resp. neg. ant. De multis enim illuminantur; præsertim Angeli custodes, quæ pertinent ad nostram beatitudinem essentialem, aut accidentalem; neque est incōueniens, quod Angeli superiores aliquo modo cooperantur ad actus, qui pertinent ad beatitudinem inferiorum; & tunc Deus se habet vt causa principalior; nam constat, ad diuinam prouidentiam spectare, vt plura Deus faciat per suos ministros, quibus demandata fuit, vel custodia hominum, vel aliorum.

*Virum Angeli gaudeant vera libertate, atque  
usu liberi arbitrij.*

**N**ot. 1. quod voluntas est appetitus cum ratione liber, fluens ab essentia Angeli, vel Animæ; vnde vt dogma fidei est habendum, in Angelis esse talem appetitum liberum, seu voluntatem; tum quia sic S. Scrip. nos docet; & tradunt SS. PP. tum quia sunt spiritus excellentiores Animabus, quæ pariter sunt præditæ potentia volitiua; tum quia potentia intellectiua rectè infert potentiam volitiuam; & certè manifestum absurdum esset, cognoscere bonum, & pulchrum, & non posse illud amare, & in eo quiescere.

Not. 2. ex Scot. quol. 16. quod triplex est libertas; alia est libertas essentialis, qua voluntas, cum ex sua intrinseca ratione sit indifferens, & indeterminata, censetur semper ex se liberè actum suum elicere, & in obiectum tendere, estò ab extrinseco moueatur, & determinetur. Alia est libertas contrarietatis, seu specificationis, qua voluntas potest in aliquod obiectum tendere, vel in oppositum; idest velle obiectum, vel nolle; amare, vel odire idem obiectum. Alia libertas contradictionis, seu exercitij, qua voluntas potest actum elicere, vel non elicere, idest velle. & non velle; de qua libertate alibi dictum est.

Not. 3. Quòd liberum arbitrium sic communiter à Theologis describitur: Est facultas actiua cum indifferencia contradictionis, & contrarietatis ad operandum, ita vt positis omnibus prærequisitis ad agendum possit agere, & non agere; vel agere hoc, vel agere oppositum. Hinc patet descrimen inter libertatem simpliciter, & libertatem arbitrij; libertas enim simpliciter est indifferens ad necessitatem, & contingentiam quare voluntas Diuina, quæ liberè producit Spiritum S. & liberè producit creaturas, has producit contingenter, seu libertate liberi arbitrij, illum necessariò: at libertas arbitrij respicit tantum contingentiam, quia liberum arbitrium duo importat, idest liberum, quod pertinet ad voluntatem, & arbitrium, quod pertinet ad intellectum, qui est vt arbiter, & iudex,

ostendens quid sit faciendum, & quid non: quod non potest esse, nisi respectu contingentium; nullus enim propriè arbitrat de omnino necessarijs, aut de impossibilibus.

I. Concl. Voluntas Angelica gaudet vera libertate; est de fide, vt indicaui in 1. not. & patet de merito Angelorum quod siquidem exigit veram libertatem; alioquin neque mererentur; neque demerentur.

II. Concl. Voluntas Angelica ex sui natura non est determinata ad eliciendum semper aliquem actum, etiam in communi, seu disiunctiue, sed liberè potest ab omni actu cessare: Est communis sententia Theologorum contra quosdam. Prob. quia nihil assignari potest, vel obiectum, vel cognitio, vel aliquod aliud, quod ipsam voluntatem, vt potè indifferentem, determinet ad habendam semper aliquam actionem; ergo non est determinata ad eliciendum semper aliquem actum, sed liberè cessare potest &c.

Confirmatur. Eò quia hoc est conformius naturæ libertatis, ac perfectò dominio super suos actus. Dupliciter autem potest Angelus ab omni actu voluntatis cessare; primò per puram omissionem; 2. positiue volendo, & imperando sibi cessationem ab omni actu, ac proinde transacto isto actu imperante cessare debent omnes alij. Neque in voluntate ista deest sufficiens bonitas motiua; quæ siquidem bonitas esset exercitium libertatis, seu alius finis Angelo notus. Ex quo infertur à fortiori contra nonnullos, Angelos non necessariò diligere se ipsos, aut Deum, vt finem naturalem; imò id verum est, etsi necessariò deberent habere semper aliquem actum sub disiunctione. Tum quia non semper actu necessariò cogitant de se ipsis, vel de Deo; tum quia, & si necessariò cogitarent, non apparet tamen vnde determinarentur ad actum dilectionis, cum ipse Angelus habeat bonitatem limitatam, & Deus estò habeat infinitam, non tamen ab Angelis Viatoribus est clarè visa, quod exigitur ad voluntatem necessariò determinandam; vt dictum est in disp. de beatitudine.

III. Concl. Voluntas Angelica non est immutabilis, sed potuit actum semel elicitum non ponere, aut positum retractare. Est Scoti in 2. d. 7. q. 1. & in 4. d. 46. q. 4. & aliorum communiter contra Thomistas, & fauent nostræ conclusioni aperta testimonia SS. PP. nempe Nazianz. Greg.

Hieron. Isidori, Damasc. & aliorum: ac nobis sufficiant verba D. Fulgentij de fide ad Petrum cap. 3. *si possibile esset, ut humana natura, postquam à Deo aversa bonitatem perdidit voluntatis, ex se ipsa rursum habere potuisset, multo possibilis hoc natura haberet Angelica; sed naturæ humanæ id possibile est Dei auxilio: ergo &c.*

Prob. Concl. ratione. Sicut voluntas Angelica initio est indifferens ad amplectendum aliquod obiectum, vel non amplectendum; ita non apparet ratio cur similis in differentia deinceps non remaneat in Angelo, quemadmodum etiam remanet in nobis: ergo &c.

Præterea. Angeli de facto mutarunt voluntatem, nempe mali, qui cum cæteris aliquo tempore fuerunt boni, & Deum amarunt. Immò quotidie tam boni, quam mali Angeli mutant suas voluntates, mali siquidem dum desinunt tentare, videntes tentationes potius prodesse, quam obesse, boni dum deserunt, quos à vitijs renocare studuerunt. Adde quod ista immutabilitas, quatenus ad actus malos esset maxima imperfectio voluntatis Angelicæ: Quare obstinatio Dæmonum, loquendo de negatiua; seu de non penitentia saluari, non est referenda in immutabilitatem voluntatis Diabolicæ, sed in defectum Diuinæ gratiæ; ut cum Fulgentio sentit Scotus, de quo latè agitur inferius in disputatione de peccato Angelorum, ubi rigorosè examinabitur etiam opinio Thomistarum, & adducentur eorum rationes, & argumenta.

Quæres 1. An in voluntate Angelica dentur habitus naturales morales.

Resp. affirmatiuè, eò quia eadem ratione, qua admittuntur in nobis, admittendi sunt in Angelis; cum eadem principia reperiantur in nobis, & in illis, videlicet facilitatio ad actus naturaliter difficiles, quales sunt v. g. subiici alteri præsertim inferiori, offensus remittere &c. & maior propensio ad quoslibet actus, puta ad diligendum alios Angelos, ad Deum naturaliter amandum. Insuper Angelus exercere potest actus temperantiæ, fortitudinis, iustitiæ, quæ sunt virtutes morales, ergo &c. patet ant. quia hoc dicit perfectionem in Angelo, non quidem reprimendo passiones sui proprii appetitus, sed volendo, ut passiones in homine reprimantur, & homo fiat fortis, & temperans;

rans; ergo potest Angelus elicere aliquos actus morales; ac proinde admittendæ sunt in Angelis virtutes morales? ita Scotus in 2. d. 29. q. vnica, & Scotistæ passim signanter Herincx, Fraßen, & alij.

## DISPVATIO IV.

*De loco, motu, & mensura durationis Angelorum.*

### QVÆSTIO I.

*Vtrum Angelus sit in loco.*

**N**Ot. 1. quod variant SS. PP. & Scholastici differendo de loco Angelorum; nam quidam, vt Basil. lib. de Spiritu Sancto cap. 16. putans, Angelos esse corporeos, dicit esse in loco, & à loco circumscribi. Alij verò negant, Angelos esse in loco, ita S. Greg. Nysen. in lib. 1. cont. Eunomium. Scholastici pariter discordant; nam Durandus opinatur Angelos, aut esse vbique aut nullibi esse, quæ sententia à Scholis iam pridem exulata est, vt obseruat Fraßen. Alij autem censent, Angelos esse in loco, sed diuerso modo à corpore, vt infra patebit.

Not. 2. ex Scot. in 2. d. 2. q. 6. quod corporibus ad veram loci determinationem sex conditiones exiguntur. 1. esse in loco; 2. esse in loco actuali; 3. esse in loco determinato, & æquali; 4. esse in loco commensuratiuè; 5. esse in loco determinatiuè hoc, vel illo; 6. esse in loco naturaliter, vel violenter. Quatuor primæ conueniunt corpori, vt corpus est. 5. conuenit ipsi ab agente. 6. conuenit ipsi in quantum est corpus naturale: hæc Scot. notat tamen Fraßen, quod tres tantum ex recensitis conditionibus videntur requiri per se, & intrinsicè ad rationem loci, & locati formalem. Prima quod sit realis, & actualis præsentia locati ad locum, sine qua nec res corporeæ, nec spirituales verè dici possunt alicubi existere. 2. vt res locata quantum ad substantiam, & entitatem suam terminetur, & finiatur ambitu ipsius loci. 3. vt hæc determinatio ad locum fiat per rationem formalem vbificationis; ratio autem formalis, yt docet Scotus in 4. d. 10. q. 3. sumitur du-

pliciter: primo propriè pro ratione formali proxima, quares dicitur formaliter talis; sic albedo dicitur ratio formalis, qua paries dicitur albus: 2. fundamentaliter pro ratione remota, qua res denominatur talis; sic albedo vnius parietis est ratio formalis fundamentalis similitudinis, quam vnus paries habet ad alterum. Vnde in vbificatione ratio formalis existendi in loco proxima est respectus rei locatæ ad locum; fundamentalis verò, & remota est illa, in qua fundatur talis respectus, qualis in corporibus est quantitas; in substantijs autem spiritualibus est ipsa substantia.

Not. 3. Quod aliquid esse in loco contingit tripliciter; 1. modo præsentialiter tantum; & sic Deus per suam immensitatem est vbique: 2. præsentialiter, & diffinitiuè, & sic Angeli, & Animæ sunt præsentialiter in loco, sed ita hic, vt non possint esse naturaliter in pluribus locis adæquatis: 3. præsentialiter diffinitiuè, & circumscriptiuè; & sic res materiales, quantitatiuæ, & corporeæ sunt in loco; vt explicatur etiam in lib. phys. ad quos &c. Insuper aduertendum, quod nec substantiæ spirituales, nec corporeæ sunt necessariò in loco; potuissent namque à Deo creari, nullo loco creato; neque sunt in loco naturaliter, prout, ly, naturaliter opponitur violento; quia sic essent in aliquo loco violentè, sed sunt in loco neutraliter, & indifferenter.

Concl. Angeli neque nullibi sunt, neque vbique, sed in aliquo certo, & determinato loco, & quidem diffinitiuè, sed non circumscriptiuè. Hæc videtur communis apud Theologos quoad omnes partes eius, prima pars aperte colligitur ex S. Scrip. vt patebit in probatione secundæ partis. Quare inter articulos à Stephano Episcopo Parisiensi damnatos numeratur iste, nempe, quod Angelus, vel Anima nusquam est.

Prob. ratione. Quia si Angeli essent nullibi, hoc maxime esset propter eorum spiritualitatem, ratione cuius dicerentur penitus separabiles, & independentes à spatio verò, vel imaginario, sed hæc ratio non obstat, quin dicantur esse in loco; cum ipse Deus, & si summè spiritualis sit reuerà vbique non tantum per præsentiam, sed etiam per potentiam, & essentiam, ergo &c.

Prob.



Prob. 2. pars 1. ex S. Scrip. quæ docet, Angelos esse in loco sic, vt non sint in alio, & signanter Apocal. 12. *Locus eorum non est amplius inuentus in Cælo*; & loquitur de Angelis malis. Docet pariter, Angelos moueri localiter, ac proinde esse præsentés vni parti vniuersi, & non alteri. Ita Zacchariæ cap. 2. *Eccce Angelus, qui loquebatur mecum, egrediebatur in occursum eius, & dixit ad eum, curte, loquere ad puerum istum.* Ita Iob. cap. 1. Sathan ait: *Circumui tatiā, & perambulauit eam*: Ita Tobix cap. 5. Raphael Angelus dixit: *Omnia itinera eius frequenter ambulant.* Quæ omnia in sensu proprio, & litterali accipienda sunt; maximè, quia nulla apparet ratio ad tropos confugere; in quo sensu intelligunt etiam SS. PP. & præsertim Basil. Damasc. Theod. Greg. & alij, quos numerant Recentiores Doctores.

Prob. 3. pars; videlicet, quod Angeli sint in loco, non quidem circumscriptiue sed diffinitiuè, & incircumscriptiue. Prob. Angelus ex dictis est in loco, sed non modo quantitatio; ergo modo spiritali, idest præsentialiter, & totus in toto, & totus in qualibet parte loci; sicuti Anima in corpore, sed sic esse in loco est esse diffinitiuè, & incircumscriptiue, ergo Angelus est in loco non dimensionaliter, & quantitatio modo, sed præsentialiter diffinitiuè.

Arg. 1. auctoritate SS. PP. quod Angelus non sit in loco. Boetius ita: *Communis animi conceptio, in cor, & alia in loco non esse.* Item D. August. lib. 9. q. 20. inquit. *Deus non est in loco, quia non est corpus.* Resp. Scotus. Boetius intelligit, quod non sunt in loco, sicut est corpus, & idem intelligit D. August.

Arg. 2. Locus ex Aristotile est vltima superficies corporis continentis, immobilis prima, sed nullum corpus continet Angelum; quia continens debet esse actualius contento, & corpus non est actualius Angelo, ergo Angelus non est in loco. Resp. diff. min. circumscriptiue concedo min. diffinitiuè, nego. Ad id, quod additur de actualitate continentis, resp. cum Scoto, quod verum est de continente per modum causæ, non verò de continente per modum loci, ita vt locatum reperiatur totaliter intra locum, quatenus Angelus penetratiue est intra partem illius corporis, cui præsens est.

Arg. 3. Omne locatum habet situm, sed situs competit soli corpori quantitativo; ergo Angelus nequit esse in loco. Resp. dist. mlu. locatum circumscriptiuè, concedo; locatum diffinitiuè, cuiusmodi est Angelus, nego min.

## QVÆSTIO II.

*Vtrum Angelus sit in loco per suam essentiam, vel per operationem, vel per aliquid aliud.*

**N**ot. 1. Quodd hæc quæst. dupliciter intelligi potest; 1. quod substantia Angeli non sit in loco, idest non sit præsens loco secundum se, sed sola operatio Angeli sit in loco; per quam operationem Angeli substantia sit in loco; 2. quod substantia Angeli sit in loco, idest præsens loco, sed ratio fundamentalis sit operatio transiens, itaut circumscripta operatione ab Angelo, eius substantia non possit esse in loco. In utroque sensu à Thomist. videtur amplecti cum D. Thoma p. 1. q. 75. art. 7. vbi asserunt Angelum esse in loco per operationem præcisè, & lib. 3. contra gentes cap. 69. D. Thom. docet, quodd omne, quodd est in loco, vel in re quacunque aliquo modo contingit ipsam; res enim corporea est in aliquo, sicut in loco per contactum quantitatis dimensiuè; res autem incorporea in aliquo esse dicitur per contactum virtutis, idest operationem, ac proinde operatio est ratio formalis essendi in loco.

Not. 2. quod Vasquez vt aliquid noui adinueniret, opinatur vt refert Caspensi. in tract. de Angelis; quod ratio, ob quam Angelus est in loco, est modus vnionis Angeli ad corpus, ratione cuius dicatur esse distans, vel propinquus alijs corporibus. Verum hic nouus modus non videtur habere solidum fundamentum; eo quia iste modus vnionis superfluous est ad talem effectum; nam intima præsentia, & in distantia substantiæ spiritualis cum corporali rectè intelligi potest sine tali vnione; cum Deus sit intimè præsens omnibus creaturis, estd non sit illis vnitus. Et quamuis similis vnio reperiatur inter Animam rationalem, & corpus, ea tamen non requiritur ob intimam eius præsentiam, sed vt informet corpus. Vnde signum est quod ista vnio non sit ratio præsentia, sed præsentia præ-

supponitur ad vnionem; cum Anima prius natura sit præsens corpori, cui est vnienda: ergo &c.

I. Concl. ad mentem Scoti. & Scotist. in 2 d. 2. q. 6. ratio formalis fundamentalis, quare Angelus est in loco non est eius operatio, sed eius substantia limitata. Prob. 1. ex Scot. loc. cit. vbi ait: Quod contraria sententia sit quidam articulus damnatus ab Episcopo Parisiensi; etsi dicatur, quod excommunicatio non transeat Mare, vel Diocesim subdit Doctor: si tamen fuit articulus condemnatus, & articulus hæreticus, vbique est condemnatus, sicut hæreticus non autem Diocesani tantum, sed etiam auctoritate Papæ extra de hæresi. cap. ad abolendum: Vel saltem sententia est suspecta, quando in aliqua Vniuersitate est damnata. Hæc Scotus; & deinde subdit: Alij nolentes verbo suspecto vti, Angelum videlicet esse in loco per operationem, dicunt, ipsum esse in loco per applicationem eius ad locum. Ita Goffred. quol. 8. q. 13. quem dicendi modum multi ex Thomistis sequuntur. At hic dicendi modus coincidit cum priori. Non enim videtur applicatio posse intelligi aliquid esse, nisi sit actus primus, vel actus secundus; non actus primus vt clarè patet, neque secundus immanens, qualis est intellectio, & volitio Angeli, quia sicut existentia Angeli abstrahit à loco, ita & operatio intrinseca, aut talis applicatio est actio transiens, & sic redit in idem, quod prima opinio tenet.

Prob. 2. auctoritate S. Scrip. & præsertim Luc. cap. 2. vbi dicitur *Missus est Angelus ad Mariam, & ingressus dixit*: ergo prius ingreditur, & fit præsens, quam loquatur; & Matth. 4. *Accesserunt Angeli, & ministrabant ei*; ergo prius fuerunt Christo præsentes, quàm ei ministrarent.

Nec valet. Respondere cum Caiet. Angelos esse quidem prius præsentes, quàm operentur, sed præsencia inadæquata, & inchoata, quam Thomistæ præsentiā ordinis appellant; non valet inquam, quia ad veram, & adæquatam rationem præsentiæ, solum requiritur, quod reuera Angelus totus sit hic, quod non alibi, hoc enim præstat præsencia, ergo &c. Prob. 3. à Scot. prius est esse, quàm operari; ergo prius est esse in loco, quàm operari in loco: sed posterius non potest esse causa prioris, ergo operari in loco non est causa cur Angelus sit in loco.

Confirmatur hæc ratio. Nam, si Deus cum sit infinitus, & infinitæ virtutis, non agit circa aliquod passum, nisi sit illipræsens, à fortiori Angelus agere nequit in aliquod, nisi sit ei præsens per suam essentiam, & hæc ratio videtur esse ad hominem contra D. Thomam, qui tenet, Deum esse præsentem, ubi operatur. Prob. vltimò. Admissa hac opinione, sequerentur multa inconuenientia. Primum, quidem, quia Angelus transiens de Cælo in Terram, nullam operationem habendo in medium, transiret per medium, & non esset in medio. Secundum Angelus aliquando immò frequenter nullibi esset, quia posset non operari. Tertium Angeli Beati non essent in Cælo Empyreo, & Angeli mali non essent in Inferno, quia non potest assignari, quid operentur boni in Cælo, & mali in Inferno, quod pugnat contra fidem, ergo non est admittenda Thomistarum opinio. Resp. cum D. Thoma, Thomistæ, quod nullum est inconueniens, Angelos aliquando nullibi esse, eò quia sunt in loco per operationem, & metaforicè; unde D. Thomas quol. 6. art. 3. ait. Nihil prohibet, Angelos non esse in loco, si voluerint. Ad vltimum resp. Caiet. quòd Angeli in Cælo, & in Inferno habent aliquam operationem nobis occultam.

Verùm hæc responsio non est argumenti solutio, sed mera euasio, vt patet. Neque cæteræ responsiones quadrant, nam cum Angelus sit pars aliqua vniuersi, debet esse intra vniuersum, ac proinde alicubi; non quidem ad modum corporis, sed spiritus: ergo nequit Angelus non operans nullibi esse. Tum quia entitativa præsentia vnius rei ad aliam connotans negationem distantie vnius ab alio in creatis admitti debet, cum Deus per suam immensitatem sit intimè præsens omnibus rebus, & Anima rationalis corpori, quod informat, ergo Angelus pariter per suam substantiam immediatè fundare potest entitativam præsentiam ad aliquod corpus, quod respectu illius habeat rationem loci continentis.

II. Concl. Ratio formalis proxima, per quam substantia spiritualis constituitur in loco est præsentia localis propria, & intrinseca Angelo, perrinens ad predicamentum ubi, & per motum locatam productam. Hæc pariter videtur Scoti, & patet ex dictis; nam Angelus est in loco

per præsentiam sibi inhærentem, & non per solam simultatem cum loco; sed sic esse in loco est quidam modus, qui dicitur ubi, præter locum, & locatum, quo formaliter constituitur in loco iuxta suum esse, ergo ratio formalis, per quam Angelus est in loco, est præsentia, seu præsentia-ritatis respectus.

Prob. 2. Impossibile est, motum proprium esse non productum aliquo termino; omnis enim motus realis includit veram, & realem actionem, ac proinde productionem termini, sed quando Angelus descendit de Cælo in Terram, velle contra verè, & intrinsicè mouetur in se ipso; ergo ille motus verè recipitur in ipso Angelo, ergo necessariò producit aliquem terminum; nullus autem alius excogitari potest præter ubi, ergo ubi producit per motum localem.

Arg. 1. cont. 1. conc. Per quendam articulum Parisiensem substantia non est ratio essendi in loco, ergo falsa conclusio. Resp. dist. ant. Substantia ut sic præcisa à finita, & infinita, concedo: substantia finita, & limitata, nego: Articulus ergo loquitur de substantia, quatenus præscindit à finita, & infinita; hoc enim modo competeret etiam substantiæ infinitæ esse in loco, quod est manifestè falsum.

Contra. Substantia quatenus limitata, & finita, non addit nisi negationem perfectioris entitatis, seu infinitatis; sed negatio nequit esse fundamentum relationis realis, cuiusmodi est præsentia diffinitiva: ergo &c.

Resp. neg. mai. assumptum. Quàmvis enim finitas, & infinitas soleant explicari per negationes, attamen dicunt pro materiali quid positivum. Vnde negatio infinitatis dicit entitatem finitam in creatis; negatio finitatis, & limitatis dicit in Divinis entitatem infinitam in genere entis.

Cæterum demus etiam, quod dicat solam negationem; attamen tunc fundaretur, non super negationem formaliter, sed super negationem fundamentaliter, hoc est super fundamentum talis negationis, ac proinde, ly, quatenus limitata, sumeretur non reduplicatiuè sed specificatiuè.

Arg. 2. nequit substantia spiritualis fundare relationem ubificationis; ergo seclusa operatione Angelus non est in loco. Prob. ant. Si substantia Angeli fundaret relationem ad locum determinatum, vel illam fundaret, ut substan-

tia, vel vt talis substantia; non primo modo quia sic omnis substantia, etiam infinita esset in loco; neque secundo, quia ratio formalis substantiæ Angelicæ, nil aliud formaliter denotat, nisi substantiam spiritualem totalem, & adæquatam, nullum ordinem dicentem ad corpus: ergo substantia Angeli per se præcisè nequit fundare relationem ad locum.

Resp. nego ant. ad probationem dicitur, quod substantia Angelica fundat relationem, non quidem, vt substantia, nec quatenus substantia Angelica, sed quatenus substantia est hic, & non alibi, & hoc modo dicit ordinem ad tale spatium, seu locum.

Arg. 3. Res, quæ vere dicitur vbicari, & locati, debet tangere locum secundum Arist. 4. phys. sed Angelus seclusa operatione, non potest tangere locum; ergo Angelus est in loco per operationem. Prob. min. Ex Arist. non datur nisi duplex contactus, nempe mathematicus, & virtualis: sed Angelus contactu mathematico nequit tangere locum, cum sit expers quantitatis; ergo tangit illum contactu virtutis, qui fit mediante operatione.

Resp. conc. mai. & neg. min. Ad probationem dicitur, quod præter contactum mathematicum, & virtutis, datur tertius, qui dicitur entitativus consistens in immediata vnione vnus ad aliud, ita vt inter vtrunque nullum intercedat spatium, & talis contactus est inter Angelum, & locum, & se se realiter vbicantem in vero loco, & hic contactus reduci potest ad contactum quantitatis per essentiam, quæ dicitur quantitas perfectionis.

Arg. 4. Si Angelus esset in loco per suam substantiam, sequeretur, Angelum semper debere esse in loco æquali; quia est in loco ratione substantiæ, quæ semper est eadem, & inuariabilis; sed hoc est falsum: ergo &c. Prob. seq. mai. Idè corpus semper occupat spatium æquale, quia ratio occupandi est quantitas; quæ nisi varietur, vel per rarefactionem, vel per condensationem, semper est in æquali loco: ergo &c. Resp. neg. seq. mai. ad probationem dicitur non esse eandem rationem de substantia Angeli, & de corporis quantitate, cum inter ea sit euidentis discrimin;

licet enim in vtraque sit determinata capacitas tanti spatij, vel loci, attamen capacitas substantiæ Angelicæ, ita



immediatè sub imperio ipsius Angeli quoad occupationem tanti, vel tanti spatij intra propriam spheram; non sic vero se habet quantitas respectu loci, & hoc ratione suæ extensionis, quæ necessariò occupat locum, secundum quod est extenta.

Dices. Anima rationalis est tota in toto, & tota in qualibet parte, & tamen non potest ad libitum modo informare corpus totum, modo solam partem; ergo nec Angelus habet in sua potestate esse in loco, modo maiori, modo minori. Resp. neg. paritatem, & ratio disparitatis est, quia ut aduertit, Rada; quantitas perfectionis in Angelo respectu illius vnionis cum loco, habet duo; Primum est, quod ex propria entitate, & modo quo vnitur non repugnat ipsi indifferenter vniri toti loco, & parti eius. Secunda est, quod illa vnio est terminus operationis liberæ ipsius Angeli, idest motus localis. Vnde ratione suæ quantitatis, & suæ operationis liberè potest Angelus esse in æquali, & in minori loco: Defectu primi, quantitas non potest esse nisi semper in loco æquali; & defectu secundi Anima rationalis non habet in sua potestate informare nunc totum corpus, nunc ipsius partem; est enim determinata ab agente extrinseco ad corpus informandū, ac proinde non cadit sub imperio voluntatis eius. Contra si illa vnio est terminus operationis liberæ ipsius Angeli, ergo Angelus est in loco per operationem; quia motio localis eiusdem Angeli ad locum est operatio extrinseca, nec sine ea potest esse in loco. Resp. dist. conf. est in loco per operationem, hoc est effectiuè se mouet ad locum conc. formaliter, neg. conf. Aliud enim est adducere se in locum per motionem localem, aliud est esse formaliter in loco; hoc pertinet ad rationem formalem essendi in loco, illud ad causam effectiuam, de qua hic non loquimur.

Arg. cont. 2. Concl. Ille relationes propinquitatis, & indistantiæ, non sunt relationes reales intrinsecè, sed solum denominationes extrinsecè nihil ponentes in Angeli substantia; sicut columnam esse dexteram, nihil ponit in ipsa; ergo substantia Angeli non fundat relationem præsentia, adeo ut dici possit vbificata.

Resp. neg. esse solum denominationes extrinsecas; eo quia nulla denominatio extrinseca potest de nouo adue-

nire vni extremo, nisi fiat mutatio intrinseca in alio per formam intrinsecam in ipso receptam, à qua extrinsecè denominatur aliud; sit idem exemplum de columna, quæ dicitur dextera à parte dextera animalis, si antea carebat tali denominatione, & postea eam acquirit, necesse est, vt animal mutetur saltem localiter, vt talem denominationem tribuat; & absque illa mutatione implicat dari talem mutationem.

### QVÆSTIO III.

*Vtrum Angelus sua naturali, virtute possit esse in loco quantumcunque minimo.*

**N**ot. 1. Quod extra controuersiam videtur esse, Angelos non posse semper maiorem locum occupare, sed habere vbi determinatum quoad magnitudinem, quod ex communi sententia docuit Scotus in 2. d. 2. q. 6. Natura enim Angelica sicut est limitata quoad esse, ita coarctatur quoad operationes; ac proinde etiam quoad extensionem suæ substantiæ in ordine ad locum, ita vt non possit se ad maiorem reducere, quia tandem se reducere posset, quantum esset ex sui natura, ad locum infinitum, si esset possibilis talis locus.

Not. 2. Quod pro intelligentia præsentis quæstionis faciunt, quæ docentur in physica agendo de continuo, vbi agitur: An continuum componatur ex diuisibilibus, vel indiuisibilibus, & pariter. An continuum sit diuisibile in partes infinitas &c. Quare illuc vos mitto, impræsentiarum solum aduerto, quod per diuisibilia intelliguntur partes proportionales, seu non determinatæ, & non signabiles, quæ rursus in minores, & minores diuidi possunt; secus autem de partibus eiusdem quantitatis, seu magnitudinis, quæ etiam appellantur signabiles, & determinatæ; per indiuisibilia verò intelliguntur indiuisibilia mathematica, qualia sunt puncta, lineæ, & superficies, quæ nullas partes habent ex eo capite, quo indiuisibilia sunt. Vnde excluduntur ab hac ratione indiuisibilia physica, quæ dicuntur minima naturalia, vt oculus pulicis, cuspis actus, & similia, quæ indiuisibilia sunt, non quia care-

ant partibus, in quas saltem mente distribui possent sed quia talis diuisio ab agente naturali fieri nequit; his prænotatis sit.

I. Concl. Angelus sua naturali virtute potest semper ad minorem, & minorem locum se reducere, immò & ad punctum. Est Scot. in 2. d. 3. q. 9. quamuis inclinet fortasse magis ad oppositum, vt infra patebit; & hanc partem amplectuntur quam plures Scotistæ recentiores, vt Gaudelus, Mastrius, Fras. Herlincx, & alij.

Prob. 1. Angelus per suam substantiam ex dictis est in loco fundamentaliter per suam substantiam liberè applicatam loco, ergo pro suo libito poterit se ad minorem, & minorem intra suam spheram comprehensum se restringere, & tandem etiam ad punctum. Conf. patet, quia Angelus est entitativè spiritualis. Tum quia Angelus dum est in loco, est totus in toto, & totus in qualibet parte loci, etiam proportionali, sed non dependet ita ab vna parte loci adæquati, quin possit se restringere ad aliam, ac proinde ad minorem, & minorem in illo loco adæquato comprehensam, & etiam ad punctum; ergo hoc potest. Quod autem possit esse in puncto, suppono, quod punctum sit quid reale à parte rei probatur speciali quoque ratione. Angelus existens in loco sibi adæquato, est totus in toto, & totus in qualibet parte quantumcunque minima, & indiuisibili; non enim videtur aliqua repugnantia, quod indiuisibile spirituale sit in indiuisibili materiali, ergo Angelus existens in loco, existere potest, immò de facto existit in puncto. Verùm Scotus in hoc est problematicus, vt infra &c.

Arg. cont. conclusionem auctoritate Scoti, quæ suadet probabilitatem, oppositæ sententiæ sic. Quidquid potest esse in vno æqualium, potest esse, & in alio, si ibi figuratio non repugnet, vt tradit Euclides propositione 35. sed Angelo nulla figuratio loci, in quo est, repugnat, ergo si potest esse in vno æquali, poterit etiam esse in alio; & consequenter si potest esse in quadrato quantumcunque paruo, & stricto, poterit etiam esse in quadrangulo quantumcunque longo, isti quadrato æquali, quod est absurdum; eo quia tunc vnus Angelus posset esse simul in Cælo, & in Terra cum tantum valeat quadratum in quadrangulum extendi.

Resp.

Resp. Mastrius, & alij quod si Angelus potest se actiue locare in quadrato v. g. palmari, poterit etiam se locare in quadrangulo, quia est idem prorsus spatium, quod erat conclusum in quadrato; cum vnum ab alio non differat in quantitate, sed sola figuratone; & licet verum sit, non posse quadratum per compressionem laterum protendi in longitudinem maiorem, & maiorem in infinitum, nisi respectu partium illius quadranguli, procedendo per partes indeterminatas, sed per partes determinatas; nam ex Aristotile motus localis 6. phy. fit per acquisitionem partium determinatarum non proportionalium; hæc Mast. disp. 2. de Ang. q. 3. n. 93. §. Denique argumentum &c. Resp. Frassen cum Poncio, negando; Angelum posse esse in quadrangulo &c. quia ex quadrato quatuor pedum, non potest naturaliter fieri vllus quadrangulus, qui possit protendi à terra ad cœlum; hæc enim protensio fieret per partes determinatas, quæ sunt finitæ. Itaque ratio adducta de quadrato &c. non est necessaria, sed solum probabilis, alioquin Scotus non esset in hac quæst. problematicus.

Arg. 2. alia ratione Scoti. Si Angelus posset esse in loco semper minori, & minori, sequeretur, Angelum esse infinitæ virtutis, sed sequela est falsa, ergo, & oppositum.

Resp. dist. mai. seu seq. mai. Sequeretur Angelum habere virtutem infinitam synchategorematicè, conc. mai. cathegorematicè, nego mai. Itaque nullum apparet inconueniens admittere infinitatem synchategorematicam in potentia loco motiua Angeli, cum similis potentia in eo admittatur ex parte intellectus; potest enim per omnem æternitatem elicere, seu producere intellectiones novas, & novas, ac proindè in infinitum synchategorematicè.

Verum, quia Scotus, vt supra innuimus, in hac quæstio. ne est problematicus, idcirco placet mihi ad ingenij exercitationem ponere opinionem oppositam conclusioni, quam tenet Io. Bassolius Scoti Discipulus fidelissimus, & sequuntur Vulpes, Faber, Herman, & alij, & nouissimè propugnat doctissimus Macedo tom. 2. de loco Angelorum collat. 1. diff. 4. sect. 6. Quare conclusio opposita superiori conclusioni est ista. Angelus non potest se locare in loco paruo, idest minori, & minori in infinitum: hæc conclusio euidenter probatur duabus rationibus Scoti addu-

Etis in parte argumentatiua pro altera opinione. Prima, quidem est mathematica de quadrato, & quadrangulo. 2. est Philosophica de virtute infinita Angeli, vt supra &c. Vnde contendit Macedo contra Mastrium supradictas rationes Scoti esse necessarias, & non probabiles, vt putat Mastrius; immò Macedo arbitratur Scotum in hac quaestione, non esse problematicum, sed quidquid sit de hoc, veniamus ad rationes. Siquidem prima ratio existimatur à Macedo necessaria, appellando illam necessariam, & demonstratiuam mathematicè, & subdit consuluisse Doctores Mathematicos in Accademia Patavina doctissimos, videat ergo Mastrius, quo iure dicat, Scotum non necessarias, sed tantum probabiles rationes asserre. Ita Macedo, qui pergens ad secundam rationem, ostendit, eam esse idoneam, & efficacem tali ratiocinatione.

Si Angelus posset esse in loco semper minori, potest etiam noscere omnes partes continui proportionales, & virtuales, easque habere in numerato, & velle in illis esse, & poni in illis actualiter, non dico simul, sed successiuè, & in infinitum; sed hæc arguunt in Angelo virtutem infinitam, ergo &c. Mai. est certissima; nam vt Angelus constituatur liberè in certo loco, necesse est illud distinctè nosse, ac velle. Prob. min. Nosse partes infinitas, easque cogitatione explicare est infinitas species intellectuales exprimere rerum distinctarum, ac infinite tendere explicando, ac exprimendo, Quod ex duplici capite arguit infinitam virtutem, tum cognoscendo, tum explicando, quæ sunt implicitè, ac virtualiter tantum in continuo, quod non potest creatura; cum illæ sint occultæ, sed solus Deus, ergo non est in potestate naturali Angeli illas partes per cognitionem suam naturaliter discernere, ac determinare, procedendo in infinitum &c.

Nec opponat Mastrius, illud continuum esse rem simpliciter finitam quia facile rejicitur respondendo. Verum est actu esse finitum, & quoad partes actuales; non esse tamen finitum potentialiter, seu quoad partes proportionales. Vnde oritur impossibilitas in Angelo, qui, vt in illis se locet, debet easdem distinctè cognoscere, & in actu ponere, tum cogitando, tum exequendo; quæ quidem partes hoc modo sumptæ sunt in re, & actu progrediendo in in-

finitum plures, ac plures, atque adeò Infinitæ, transeundo de statu potentiali, & synchategorematico in statum actualem, & cathegorematicum. Immo sequitur ex hac suppositione, Angelum, cognitis illis partibus, & vbicatis, posse sustinere illas omnes, vbicando omnes, & ita habere infinita vbi correspondentia illis partibus, & vltius eas iam explicatas, conseruare.

Quod si respondeat Mastrius, omnes istas efficere vnam præsentiam totalem, & adæquatam, finitam. Refuto dicendo, iam tunc esse illam præsentiam totalem, & adæquatam continui, mutatam in actuales præsentias infinitas; quemadmodum, & partes potentiales continui certi, & adæquati transierant in partes actuales re, & numero distinctas. Iam vero illa alia responsio, quod omnes hi effectus sint in se finiti, quamuis sit falsa, non aufert difficultatem argumenti, quia sepè ad effectus finitos requiritur virtus infinita, vt patet de vacuo, cuius inductio cum sit, quid finitum, arguit tamen virtutem infinitam.

Vnde oritur, & altera probatio, quam innuit Scotus. Si Angelus potest se facere præsentem locis in infinitum minoribus, posset esse in loco quantumcunque magno, nam qui potest facere vnum infinitum, potest etiam, & aliud, sed virtus Angeli potest facere vnum infinitum ponendo se in locis in infinitum minoribus: ergo poterit etiam facere alterum infinitum, collocando se in loco maiori in infinitum; hæc Macedo.

Cæterum si loquamur de potentia Dei, videlicet, an per potentiam Dei Angelus possit esse in loco minori, & minori, ne dum Macedo, sed etiam Doctores communiter id concedunt. An verò Angelus possit esse in puncto, vel non. Resp. Scot. non videtur ratio necessaria, nec ad vnam partem, nec ad aliam, quia licet Angelus sit indiuisibilis; non habet tamen indiuisibilitatem limitatam, sicut punctus. Nec fortè repugnat sibi esse in puncto, quia nullum inconueniens videtur ex hoc inferri; nam si dicatur, quod Angelus non posset moueri localiter, nisi spatium esset ex punctis; resp. quod potest immediatè ex loco punctuali ferre se in continuum, cuius continui punctus est terminus; hæc ad mentem Scoti.



*Vtrum Angelus sua naturali virtute possit esse simul in pluribus locis.*

**N**Ot. Quod locus Angeli alius est adæquatus, alius inadæquatus, vt supra explicatum fuit; inadæquatus autem, alius est continuus, & alius discontinuus, seu diffusus e. g. supposito quod hæc schola sit locus adæquatus Angeli, quæritur. An sua naturali virtute esse possit in illo angulo, & in illo alio diffuso, & distante, sed intra spheram loci adæquati absque eo quod sit in medio.

I. Concl. Angelus sua naturali virtute non potest esse in pluribus locis adæquatis, benè tamen supernaturaliter: hæc est communis. Prob. quoad 1. part. auctoritate D. Damasc. docentis cap. 33. quod Angeli, dum sunt in Cœlo, non sunt in Terra; & è conuerso, ergo &c.

Prob. ratione oppositum videtur includere repugnantiam, ergo &c. Prob. ant. Ille locus dicitur adæquatus alicuius locati, qui neque excedit locatum, neque exceditur à locato, sed si Angelus posset esse in duobus locis adæquatis, essent illa loca adæquata, & inadæquata; adæquata, vt supponitur; inadæquata, quia locatio vnius non impediret locationem alterius, quæ omnia repugnant; ergo Angelus sua naturali virtute nequit esse in pluribus locis, vt opinantur Thomistæ, & quidam alij.

Prob. 2. Nam sicut Angelus habet limitatam essentiam simpliciter, ita & in ordine ad locum, quem occupare potest proportionatè ad spheram suæ actiuitatis, est limitatus; sed vnus solus locus adæquatus est proportionatus Sphæræ actiuitatis Angeli, ergo non plura loca adæquata, sed vnum tantum potest Angelus sua virtute occupare.

Prob. 2. pars. De facto per diuinam potentiam Corpus Christi est simul in pluribus locis adæquatis, quia plures fiunt consecrationes in diuersis altaribus: immò tunc est in Cœlo, & in Sacramento; ergo Angelus pariter per diuinam potentiam potest esse in pluribus locis adæquatis.

II. Concl. Angelus sua naturali virtute nequit esse in pluribus locis inadæquatis discontinuis, & diffusis. Ita plures Scotistæ; quàmuis Scotus hoc reliquerit indeci-

sum in 2. d. 2. q. 7. vbi inquit. Sed an in duobus locis discontinuis posset esse, quorum nec vnus, nec alter esset sibi adæquatus, dubium est, nec videtur ratio necessaria pro, nec contra, est tamen contra Thomistas.

Prob. 1. SS. Patres communiter negant, Angelos naturaliter posse hic, & ibi esse, atque operari, quod tamen præstare possent, si possent esse in pluribus locis inadæquatis discontinuis intra tamen spheram suæ actiuitatis contentis; & signanter hoc tradit D. Damasc. lib. 2. de fide cap. 3. ergo &c. Prob. 2. Natura Angeli etiam quo ad loca inadæquata discontinua videtur esse limitata, sicut alię creaturæ, vt patet de Anima rationali, quæ partes discontinuas corporis non potest informare, nisi etiam informet intermedias; ergo nec Angelus potest &c.

Præterea. Fundamentum Thomistarum, asserentium oppositum, desumptum ex operatione Angeli simul in pluribus locis inadæquatis non subsistit, vt ostensum est superiùs; nam operatio non est ratio Angelo essendi in loco, sed eius substantia, ergo &c.

Addo aliam rationem. Ideo Angelus non potest esse simul in pluribus locis adæquatis sua naturali virtute, quia non habet in sua potestate replicationem, & multiplicationem suæ presentię in pluribus locis, sed si posset naturaliter Angelus esse in pluribus locis inadæquatis, haberet in sua potestate replicationem suæ præsentię, ergo sicut non potest eam replicare in pluribus locis adæquatis, ita nec in locis inadæquatis.

Arg. cont. 2. conc. Tota ratio, ob quam nullum corpus potest esse in duobus locis, etiam partialibus discontinuis, est, quia corpus est quid continuum, & dependens à loco, at non sic se habet Angelus in ordine ad locum, ergo &c. Resp. in mai. vnā solam rationem assignari, quare corpus non potest esse in pluribus locis inadæquatis; est etiam alia ratio, quia corpus ob suam limitationem ita determinatur ad vnum locum, vt esse nequeat in alio naturaliter, & hæc habet locum, etiam in Angelis, estò non militet alia de quantitate continua.

Contra. Angelus est in loco per liberam applicationem suæ substantię ad locum, ergo nihil impedit, quin possit illam applicare duobus locis inadæquatis distinctis, & di-

stantibus. Resp. neg. conf. eo quia Angelum totum locum sibi adæquatum occupare, vel solum vnam partem, nulla apparet repugnantia, cum inde non sequatur esse in pluribus locis, sicut sequeretur, si Angelus posset se ponere in duabus extremitatibus loci, non verò in medio, vt in probatione conclusionis satis ostensum est.

Quæres. Vtrum plures Angeli possint esse in eodem loco simul tempore.

Resp. ex Scoto, quod cum pars negatiua, quam tenent D. Bonauentura, Ricard. D. Thom. & alij, non sit ita clara, & certa; immò affirmatiua videatur verior, & probabilior, potius dicendum est, Angelos plures simul tempore posse in eodem loco esse. Prob. Scot. 1. quia Angeli non habent quantitatem, ergo non apparet, vnde possint impediri &c.

Confirmatur quia Lucæ cap. 8. habetur in eodem homine fuisse vnam integram legionem Dæmonum, quæ quidem legio apud Romanos includebat sex millia, sex centos, & sex milites.

Prob. 2. ex opposito sequeretur, inquit Scotus, vnum Angelum non posse v. g. descendere de Cælo in Terram per lineam rectam; si in eadem linea esset alius Angelus, nisi iste cederet loco. Tum quia in obsessis Angelus, & Anima sunt in eodem corpore; ita discurrit Scotus in 2. d. 2. q. 8. §. in ista quæstione; saltem problematicè vt aduertit noster Dealcadil. in tom. de Angelis, quam sententiam recipiunt etiam alij extram nostram Scholam, vt Ocham, Mollina, Vasquez, Suarez, &c.

Dices cum D. Bonau. Angelus est quædam pars vniuersi, ergo in toto debet habere aliquem ordinem, ergo vnusquisque Angelus habet suum determinatum locum.

Resp. dist. ant. Est pars vniuersi quoad determinatam entitatem, & perfectionem, conc. ant. quoad situm, & locum, nego &c.

Dices cum Ricardo. Quæ existunt in eodem loco, necessariò se penetrant, sed Angeli nequeunt se penetrare; ergo neque possunt esse in eodem loco. Min. prob. ab in-conuenienti. Si enim Angelus posset se cum alio Angelo, vel cum anima penetrare, posset esse intra substantiam illius, ac proinde esse in illo per illapsum præsens, quod.

15

August. Beda, & alij iudicant impossibile. Resp. Vulpes, maiorem esse solam veram de his, quæ sunt in loco circumscriptiue, nam ratione quantitatis expellunt aliud naturaliter, supernaturaliter autem se penetrant; Vnde Angelus esset in alio per illapsum eo modo, quo paulo prius dictum est.

## QVÆSTIO V.

*Vtrum Angelus possit se mouere localiter?*

**N**OT. 1. Quod motus localis est relatio ipsius mobilis, quatenus tendit ad præsentiam loci, seu quatenus ad talem, & talem superficiem mouetur; hæc autem relatio, vt aduertit Faber, in motu locali est extrinsecus adueniens, & reducitur ad passionem, licet alij motus sint relationes intrinsecus aduenientes, & ratio est, quia illa relatio vbi, siue præsentialitatis in passio ad mouens non est necessariò in illo, etiam positis extremis in esse. Veldici potest, & fortasse melius, quod motus localis est relatio intrinsecus adueniens, sicut alij motus, si consideretur quatenus est habitudo mouentis, non ad mobile, sed ad formam inductam in mobili, quæ est vbi; illud enim vbi non potest esse sine illo mouente, licet possit esse sine illo mobili; & hæc doctrina videtur conformis Scoto in 4. d. 13. q. 1. §. ad huius autem difficultatem.

NOT. 2. Quod duplex est motus localis, nempe successiuus, & instantaneus. Primus est ille, in quo acquiritur pars post partem. 2. verò est ille, in quo acquiritur terminus ad quem in instanti, & absque successione. Successio autem in motu ex duplici causa prouenire potest; vel ex diuisibilitate motus; vel ex diuisibilitate spatij; & vna causa se sola est sufficiens ad successionem motus; quare dato, quod mobile sit successuum, etsi spatium sit indiuisibile, vt punctus, adhuc poterit moueri successiue; quia vna pars mobilis prius pertransibit illud spatium, deinde alia pars; quod si spatium solum sit successuum, & mobile indiuisibile prius pertransibit vnâ partem spatij, deinde aliam, & sic erit continuatio motus.

Concl. Angelus per principium sibi inexistens, & indi-

finctum ab Essentia potest se mouere de loco ad locum, motu continuo. Est Scoti in 2. dist. 2. q. 9. cont. Durandum, negantem omnem verum motum in Angelis, & contra Thomistas asserentes motum Angelorum esse solum motum æquiuocè, & abusiue. Prob. quoad primam partem 1. ex S. Scrip. quæ pluribi apertè tradit, Angelos se mouere, & signanter Matth. cap. 4. vbi sic habetur: Et ecce accesserunt Angeli, & ministrabant ei; cap. 28. *Angelus enim Domini descendit de Cælo, & tenuit lapidem*; Et Luc. cap. 1. *Et ingressus Angelus ad eam dixit &c.* & infra; *discessit ab ea Angelus*. Prob. etiam auctoritate SS. PP. præsertim Ambrosij dicentis lib. de Spiritu Sancto cap. 10. *Angelus uero cum loco diffiniatur; potest locum acquirere, & deferre*. Et S. Hieron. Epist. 55. docentis; quod *Dæmones toto vagantur Orbe & ex coaritate omnia ubique præsentibus sunt*; & ita tradunt communiter SS. PP. Prob. ratione. Animæ separatæ possunt exercere veros motus locales, vt patet de anima Christi, quæ descendit ad inferos; ergo etiam Angeli eosdem exercere possunt; sunt enim perfectioris entitatis, ac proindè perfectioris actiuitatis.

Prob. quoad secundam partem. Inter duo vbi sunt plura vbi intermedia: sed Angelus potest mouere se per omnia illa vbi, non quidem motu instantaneo, sed continuo, & successiuo; ergo motu continuo successiuo potest mouere se de vno loco ad alium. Min. patet, quia Angelus potest esse per suam substantiam virtualiter quanta in vno vbi quantitatio, & de illo ad aliud pergere ergo &c.

Arg. 1. cont. 2. part. conc. Motus est actus entis in potentia ex Arist. 3. phy. subiectum enim recipiens est potentiale, & vbi est actus, seu perfectio eius; sed vbi nequit esse perfectio Angeli; quia omnis perfectio alicuius debet esse nobilior eo, cuius est perfectio: ergo Angelus nequit se mouere motu proprio, & continuo successiuo.

Resp. conc. mai. & dist. min. Non est perfectio essentialis, conc. min. non est perfectio accidentalis, nego: licet enim Angelus sit nobilior, tamen, vt docet Scot. non est inconueniens, quodcumque causatum, quantumcumque perfectum, cum sit finitum, & aliqua careat perfectione, esse capax alicuius perfectionis accidentalis, vt etiam dicebamus paulò ante de intellectione,

Arg. 2. Nullum indiuisibile moueri potest; sed Angelus est indiuisibilis: ergo &c. min. patet, mai. prob. ex Arist. 6. phy. vbi sic docet. Quod mouetur partim est in termino à quo, & partim in termino ad quem; sed indiuisibile, cum non habeat partes, non potest ita se habere: ergo &c.

Prob. mai. Quando aliquod est totaliter in termino ad quem, iam est mutatum, ergo indiuisibile moueri nequit.

Resp. neg. mai. & min. primæ probationis, & dist. min. secundæ probationis indiuisibile non habet partes virtualiter, nego: non habet partes extensiuas quantitatiuè, concedo: Estò enim Angelus sit indiuisibilis; tamen vt docet Scot. loc. cit. occupat locum diuisibile, cum non sit in loco punctuali; vnde sicut est in loco diuisibili, ita potest diuisibiliter se mouere. Immo dato etiam, quod Angelus esset semper in puncto, non tamen sequitur quod non posset se mouere continuè, eo quia posset moueri per puncta sibi succedentia continuè, adeout, in nullo illorum, esset nisi indiuisibiliter; ac proinde mouebitur continuè quàmuis sit indiuisibilis; & hoc patet de sphaera, quæ super planum mota describit lineam; licet non tangat planum, nisi in puncto; Itaque indiuisibile moueri potest successiue, quia ad hoc sufficit, vel diuisibilitas mobilis, vel spatij diuisibilitas.

Arg. 3. Successio in motu prouenit ex resistantia, vel mobilis ad motorem, vel medij ad mobile, vel medij ad motorem; sed nulla istarum reperitur in Angelo: ergo &c. min. patet, nam medium non resistit Angelo, neque vt motori, neque vt mobili, cum medium sit corporeum, Angelus verò spiritualis; neque mobile resistit sibi met maiori; ergo nulla adest resistantia, ac proinde nulla est ponenda in eo successio.

Resp. quod in maiori non assignantur omnes rationes, ob quas potest esse successio in motu, quare præter assignatas, ponenda est etiam limitatio virtutis agentis; nam cum termino à quo ad terminum ad quem sint plura intermedia vbi, neque possit virtus Angeli facere, & per transire illa simul, nec peruenire ad terminum, nisi transeundo per medium, ideoque Angelus nequit statim peruenire ad locum distantem, nisi per motum continuum successiuum.



*Vtrum Angelus transire possit de extremo ad extremum, non transeundo per medium.*

**N**ot 1. ex Scot. in 2. d. 2. q. 11. quod motus instantaneus est duplex, alius includens totam realitatem motus, & est, quando per illum motum instantaneum acquiritur totum id, quod per successionem, non successivum haberetur: alius includens realitatem termini motus, & est quando per motum instantaneum solum habetur id, quod terminasset, & absolvisset motus successivus; ut in motu locali terminus est ultimum ubi acquisitum. Exemplum de primo moueatur subito ab A. ad B. & simul habeat omnia ubi intermedia, & sic Angelus nequit transire de extremo ad extremum motu instantaneo; potest tamen Angelus motu instantaneo includens realitatem termini ad quem &c.

Not. ex Scot. in 2. d. 2. q. 12. quod duplex est medium intercedens inter duo extrema, de quorum vno Angelus potest recedere ad alterum; aliud participans, seu communicans cum extremis, & aliud non communicans cum extremis: primum est illud, quod est compactum ex parte vnius, & alterius extremi, v. g. si medium sit spatium bipalmare, tunc inter vtrumque palmum designari potest palinus medius, non quidem ab vtrisque distinctus, & cum eis non communicans, sed ex semipalmo vtriusque compactus, & cum vtrisque communicans. Aliud quod est compactum ex extremis v. g. si spatium medium sit tripalmare, primus, & tertius palmus dicuntur extrema, medius verò dicitur non communicans; inter quæ media, nempe communicans, & non communicans reperitur hæc differentia; quod primum cum fiat per diuisionem secundum partes proportionales non mediat actu, sed potentia; secundum verò cum fiat per diuisionem secundum partes æquales non communicantes, actu mediat, & facit actu distare latera; ac proinde ordo inter loca extrema per media ista, non est eiusdem rationis; nam inter illa est ordo potentialis, inter ista actualis.

1. Concl. Angelus si moueatur ad locum distantem per

medium non participans habet, naturaliter loquendo; transire per medium, non in instanti, sed in tempore; secus autem supernaturaliter. Est Scoti in 2. d. 2. q. 9. quem sequuntur præter Scotistas, Ocham, Gabriel, Suarez, Vasquez, & alij contra Thomistas asserentes, Angelum posse in instanti se transferre de vno loco ad alium distantem; quia est in loco per operationem.

Prob. Concl. ex Scoto. Ordo præfixus ab Auctore naturæ seruari debet à quocumque agente inferiori, sed à Deo, qui est auctor naturæ præfixus est talis ordo, videlicet, vt non fiat transitus ab extremo ad extremum, nisi transeundo per medium ergo &c.

Confirmatur quia si Angelus naturaliter posset transire de extremo ad extremum quantumcunque distans non transeundo per medium, ergo transire posset ad extremum quantumcunque distans, quod non videtur competere eius finitæ virtuti; ergo &c.

Tum quia tenetur Angelus seruare ordinem præfixum ab Auctore naturæ etiam in alijs; non enim potest Angelus ex quolibet facere quodlibet; ergo teneatur seruare pariter talem ordinem in ordine ad locum.

Prob. Concl. quoad secundam partem nempe Angelum per potentiam Diuinam posse motu instantaneo, seu discreto transire de extremo ad extremum distans; quia nulla apparet impossibilitas, nam si quotidie transit in instanti Corpus Christi de Cælo in Terram sub speciebus panis, dum Sacerdos terminat prolationem verborum consecrationis, vt fides docet, à fortiori dicendum est de Angelo.

II. Concl. Angelus potest in instanti motu indiuisibili pertransire ab extremo ad extremum immediatum, non transeundo successiuè per medium participans, seu quod est aliquid vtriusque extremi. Prob. potest Angelus existens in media parte sui vbi adæquati, illa non relicta, collocare se in instanti in altera parte loci sibi adæquati, ergo pari ratione existens in loco v. g. bipalmari sibi adæquato poterit relinquere in instanti illum, & statim se collocare in alio loco bipalmari immediato; & ratio euidens est, quia Angelus non habet partes, secundum quas sit commensuratiue in loco, sicut corpus, sed cum sit totus in toto, & totus in qualibet parte loci, non est necess-

se,

se, quod successiue deferat priorem locum adæquatum, & successiue alium locum acquirat. Itaque Angelus transire valet de vno extremo ad alterum, transeundo media participantia, seu communicantia, quæ non sunt actu, sed potentia ordine naturæ, & non durationis, hoc est prioritate naturæ, & non temporis.

Arg. cont. 1. part. conc. primæ. Datur aliquod corpus, puta, sol, qui in instanti agit illuminando totum aerem, nec prius tempore producit lumen in parte viciniori, quam in remotiori, ergo à fortiori potest Angelus in instanti transire de vno extremo ad aliud; maior enim ratio apparet de Angelo, quam de sole,

Resp. ex Scot. neg. paritatem; & ratio est quia, quando agens habet totum passum pro subiecto sibi adæquato, potest, si sit talis virtutis, immediatè, & in instanti agere in totum passum, quemadmodum euenit in sole, qui respicit totum aerem ab ipso illuminatum, vt passum sibi adæquatum; hoc tamen non reperitur in Angelo respectu loci distantis.

Arg. 2. Transire per medium est proprium rerum corporarum, ergo Angeli cum sint absoluti à legibus loci possunt non transire per medium, ac proinde in instanti se transferre ad locum distans. Resp. neg. assumptum antecedentis; nam transire per medium, non solum est corporum, sed etiam Angelorum, qui estò sint absoluti à legibus loci circumscriptiui, non tamen à legibus loci diffinitiui.

Contra. Si Angelus esset alligatus talibus legibus, hoc non esset, nisi quia Deus talem ordinem præfixit: sed hic ordo non apparet, habere locum in Angelis; vnde enim hoc constat? ergo solum gratis dicitur, eò vel maximè, quia cum Angeli sint longè perfectiores creaturis corporis, petunt sic haberi respectu loci, vt non dependeant à medio, ergo &c. Accedit etiam, quod si esset talis ordo à diuina voluntate, non repugnaret Angelo, immò connaturale esset eius perfectioni transire de loco ad locum, non transeundo per medium; etenim, ablato ordine diuinæ voluntatis, posset iuxta suam vim naturaliter transire; ergo, & modo, cum de tali lege nullibi constet.

Resp. conc. mai. & neg. min. ratio namque finitatis, & limitationis in Angelo operatur, vt ipse nequeat transire  
de

de vno loco ad alium, & apertè ostendit, talem ordinem eis in esse. Cæterum, quando dicit Scotus esse ordinem præfixum à diuina voluntate, non est intelligendus in hoc sensu, quasi talis ordo sit veluti lex positiua, pendens solummodo à libera diuina voluntate, adeout ablata tali lege, connaturale esset Angelo transire de vno ad alium locum absque transitu per medium; sed in hoc sensu Scotus est locutus, idest huiusmodi ordinem esse à Deo præfixum, attentis rerum naturis, vt patet legenti textum ipsius: itaque iste ordo est ab auctore naturæ, iuxta exigentiam ipsius naturæ, & non est à Deo tanquam à legislatore.

Arg. 3. Angelus potest se mutare ad libitum, & in instanti, vt dicitur in 2. conc. ergo & ad locum distantem.

Prob. consequ. Angelus per Scotum potest ordine naturæ pertransire media participantia; ergo pari ratione ordine naturæ pertransire poterit media non participantia.

Confirmatur quia, vel Angelus, dum ab vno loco extremo sibi adæquato transit ad alium locum, vtrunque simul attingit, vel prius vnum attingit, & posteriùs alterum; non primum, vt probat Scotus; ergo æquè poterit Angelus transire per loca media participantia, & non participantia. Resp. neg. conf. ad probationem dicitur quod non eodem modo se habent media participantia, & non participantia; ista enim sunt actualiter, illa verò potentialiter, ac proindè ordine naturæ pertransire potest Angelus participantia ordine naturæ, & sic patet quid sit dicendum ad confirmationem.

Dices. Potest Angelus transire à primo puncto prioris extremi ad vltimum punctum posterioris non transeundo media spatia ordine durationis, sed naturæ: ergo &c.

Resp. neg. Angelum posse ab vno puncto prioris ad alium posterioris pertransire, quia spatium medium non est quid compositum ex vtroque puncto, cum illa sint indiuisibilia.



*Vtrum Mensura Angelorum sit Æuum.*

**N**ot. 1. Quòd mensura sic ex Scot. 2. d. 2. q. 3. describitur: Est certificatio quædam quantitatis ignotæ per quantitatem magis notam; quæ quidem descriptio intelligitur tam de quantitate molis, quam virtutis. Quare mensura, alia est perfectionis, alia causationis, alia cognitionis, alia denique durationis. Mensura perfectionis est illa, qua res vna perfectior cæteris notificat perfectionem aliorum in eodem genere iuxta illud Phy. 1. meta. cap. 3. In vnoquoque genere est vnum, quod est mensura cæterorum in eodem genere. Mensura causationis dicitur id, quod aliud causat, sic 9. meta. scibile dicitur mensura scientiæ quam causat. Mensura cognitionis est certificatio illa, qua per quantitatem accidentalem alicuius entis magis notam innotescit quantitas alterius entis minus nota; talis mensura est quantitas nota e. g. vlna, qua ignota quantitas panni innotescit. Denique mensura durationis est certificatio, qua alterius entis existentia, & duratio innotescit.

Not. 2. quod durationis mensuræ tres solent communiter assignari, tum à Theologis, tum à Phylos. nimirum, æternitas, æuum, & tempus. Siquidem duratio se habet ad ista tria, vt genus ad suas species. Duratio autem pro formali sic describi potest. Est negatio defitionis rei, cuius est duratio; & pro materiali, est ipsa res durans, seu exilens. Æternitas ex Boetio est interminabilis vitæ, tota simul, & perfecta possessio; ly interminabilis denotat carentiam principij, & finis, ly tota simul, non habere partes; perfecta, idest necessaria, & simpliciter indeficiens. Æuum est mensura rei non deficientis, potentis tamen deficere; quia Angelus e. g. posset à Deo non conservari. Tempus est mensura rei formaliter successiuæ continuæ deficientis.

Not. 3. Quòd tam tempus, quàm æuum possunt considerari dupliciter vno modo pro duratione intrinseca rei, & sic, in quolibet motu est suum tempus, & in quolibet Angelo est suum æuum, idest propria existentia durans;

alio

alio modo pro mensura extrinseca; & sic motus primi nobilis mensurat omnes motus inferiores, & vnus motus particularis, puta horologii, potest mensurare motum alterius; & ita pariter Angelus supremus dicitur mensura æuiternorum, seu Angelorum inferiorum, immò quilibet Angelus alio superior dicitur mensura sui inferioris. Quare ita tria inter se differunt, nempe, æuum, æuiternitas, & æuiternum; nam æuum dicit tantum durationem illam, quæ mediat inter æternitatem, & tempus ubi solutè; æuiternitas importat durationem, quatenus refertur ad æternitatem; æuiternum denique dicitur res, quæ tali æuuo mensuratur, vt Angelus, sicut dicitur temporale, quod tempore mensuratur. Itaque æternitate mensuratur Deus, æuiternitate Angelus, & tempore motus, seu res successiua.

I. Concl. Euum sumptum pro mensura intrinseca est mensura Angeli, sed improprie, Prob. 1. pars. Mensura debet proportionari naturæ; vnde ait Arist. 10. meta. mensuram debere esse vnigenam; sed natura Angelica est media inter Deum, & cæteras creaturas inferiores ipsa: ergo nequit ei competere mensura, neque Dei, nec creaturæ temporalis; ergo media: sed hæc est æuiternitas, seu æuum, ergo Angeli mensura est æuiternitas, seu æuum.

Prob. 2. pars. Æuum intrinsicè nil aliud est, quam existentia Angeli, formaliter modaliter ab eius essentia distincta; sed mensura proprie dicta debet esse aliud à mensurato, & notius eo; nec non alias mensuræ conditiones habere, pura quod sit, vel excedens, vel excessa, vel æqualis, vel inæqualis, quas non habet æuum, ergo æuum non dicitur proprie mensura, si intrinsecè sumatur.

Ex qua conclusione infertur, quod si duratio Angeli sumatur pro mensura intrinseca, tot sunt æuua, quot æuiterna; eo quia quilibet Angelus sua propria existentia durat, & tam diu durat, quam diu existit.

II. Concl. Æuiternitas est mensura extrinseca, & propria Angelorum. Prob. Nam aliud genus mensuræ nequit existentiam Angelorum mensurare, ergo æuiternitas est mensura. Prob. ant. discurrendo per reliquas mensuras; non enim Angelo competere potest æternitas, cum soli Deo competat, neque tempus; ergo remanet, quod sit æuiternitas, quæ est media.



III. Concl. Mensura Angelorum idest æternitas non importat durationem successiuam. Est Scoti in 2. d. 2. q. 3. cont. D. Bonau. cuius opinionem, etsi Scotus adducat, & proprijs rationibus muniat præter rationes D. Bonau. tamen eam non tenet. Prob. concl. 1. auct. D. Dion. de diuinis nominibus cap. 10. dicentis: *proprietas animi esse æternam semper, secundum totum metiri*; & D. August. lib. 83. q. q. ponentis discrimen inter æuum, & tempus per hoc, quod æuum est stabile, tempus autem mutabile.

Prob. ratione. In ente successiuo est aliud, & aliud nunc, seu instans; & vnum post aliud: at in æternitate non est aliud, & aliud nunc cum fluxu; ergo in æternitate non est duratio successiua. Patet cons. quia essentia, & existentia Angeli est ens verè permanens, spirituale, indiuisibile, & actu simul totum consistens; ergo &c.

Arg. 1. cont. 1. conc. probando, quod æuum non sit mensura Angeli auctoritate D. Aug. dicentis super gen. ad litteram. *Deum mouere creaturam spirituales per tempus*; ergo æuum non est mensura Angeli, sed tempus.

Resp. D. Aug. se ipsum explicare dicendo, Deum mouere creaturas spirituales per tempus, esse per affectiones mouere, quo ad naturam verò mensurari æuuo. Vel resp. D. Aug. loqui de tempore latè sumpto, quatenus se extendit etiam ad æuum.

Arg. Mensura realiter distinguitur à mensurato; sed duratio est mensura rei, quæ durare dicitur, ergo distinguitur realiter à re, ergo Angeli mensura distinguitur realiter ab eius essentia, & existentia. Prob. mai. nam tempus differt à motu, quia mensurat ipsum; tum quia quantitas permanens est realiter distincta à substantia, quam mensurat; ergo & æuum distinguitur ab Angelo realiter.

Resp. dist. mai. mensura extrinseca, concedo: mensura, quæ intrinsecè est duratio ipsius rei, neg. mai. duratio namque latè dicitur mensura, cum sit ipsa permanentia rei, & sic patet quid dicendum sit ad probationem geminatam; tempus enim est mensura extrinseca motus, quod si sumatur motus pro ipso tempore, tunc est duratio intrinseca ipsius temporis. Vnde in plus se habet motus, quam tempus, vt docet Scot. in 4. d. 48. q. 2. §. ad questionem; motus enim se habet ad tempus, quatenus genus ad

ad species; valet enim dicere, est tempus, ergo est motus; sed non è contra.

Arg. contra 3. c. conc. probando quod æternitas importet successionem. Ibi est prius, & posterius, ibi est successio; sed in æternitate est prius, & posterius; ergo in ætuo est successio, ac proinde mensura Angeli importat successionem. Prob. min. Deus à principio Mundi potuisset creare vnum Angelum post alium, sicut modo potest creare alios Angelos, & sicut successiue creat Animas rationales; sed hoc arguit successionem in mensura Angeli; ergo &c. Resp. neg. mai. ad probationem conc. mai. & dist. 1. arg. min. arguit successionem in existentia Angeli, neg. min. arguit successionem inter vnum, & alium Angelum, conc. min. Nam existentia vnus fuisse prius, & existentia alterius posterius; exinde tamen non sequitur esse successionem in existentia Angeli.

Contra. Si responsio esset vera, ergo prius esset posterius, & è contra quod est impossibile. Præterea Angeli vt docet Scot. in prima morula fuerunt creati, in secunda fuit illis infusa gratia, in tertia alij meruerunt bene operando, alij demeruerunt peccando; sed hæc omnia fuerunt in æternitate; ergo in ipsa datur successio.

Resp. neg. quod ex nostra allata responsione sequatur prius esse posterius; solum enim sequitur esse prius, & posterius in ordine ad diuersas productiones Angelorum; non verò quod in ipsa eorum existentia sit successio. Ad illud autem de morulis videtur dicendum, vel numerari illas secundum tempus imaginarium, vel per respectum priorem, & posteriorem ad æternitatem, vel esse diuersa nunc æui. Nihilominus quomocumque ponatur nunc, quàm infertur, esse successionem in Angeli existentia.

Arg. 2. Angelus est in æternum duraturus; ergo habebit durationem in infinitum, ergo si ipse duratio non sit successiua, sed tota simul, erit duratio ipse actu infinita; sed hoc est manifestum absurdum, ergo &c.

Resp. conc. ant. cum 1. seq. & neg. vltima sequela. Etenim vt docet Scot. ad hoc vt esset aliquid infinitum, propter coexistentiam, quam posset habere cum infinito tempore, deberet coexistere omnibus partibus infiniti temporis. Quare sicut illud tempus non esset infinitum,

nisi quatenus includeret infinitas partes; ita id, quod ipsi coexisteret, non foret infinitum, nisi pariter coexisteret omnibus eius partibus; hinc patet nullum sequi absurdum.

Arg. 3. Angelus potest à Deo annihilari circumscripto tempore. Quæro igitur, in quo nunc annihilaretur? Non in nunc temporis, quia illud non esset; neque in nunc æternitatis formaliter, ut patet; neque in nunc æui, quia illud nunc æui manet vnum, & idem per Scotum, ergo in eodem nunc æuierit, & non erit, quæ sunt contradictoria. Adde, quod Deus, anihilato Angelo, postea posset alium Angelum producere, sed tunc prius, & posterius non mensurarentur per comparisonem ad tempus nostrum, ergo per æuum, ergo in æuo datur prius, & posterius, ac proinde successio.

Resp. Scot. quod Angelus posset annihilari in eodem nunc æui negatiuè, si habeat nunc, idest indiuisibile, & differens ab eius existentia; suum enim nunc deficeret secum, absque eo quod Angelus deficiat in alio nunc æui: si autem suum nunc non differat ab existentia Angeli, sed sit ipsa eius existentia, tunc intelligitur annihilari cum æternitate, non tamen cum tota ratione præsentia litatis æternitatis, quia sic æuum adæquaret æternitatem, quod est impossibile, ut in quæstione de æternitate dicitur.

Vel resp. in tali casu annihilari Angelum per comparisonem ad tempus imaginarium; sicut enim si Deus modo crearet Angelum, diceremus hunc Angelum non tantum temporis durasse, quantum Angelum creatum in principio Mundi, & hoc in ordine ad tempus nostrum; ita sublato tempore reali, remaneret comparatio ipsius Angeli ad tempus imaginarium; & sic resp. etiam ad id, quod additur de annihilatione, & creatione noui Angeli, cum hoc tamen, quod nunquam inferri possit, successionem locum habere in existentia Angeli, seu in æuitate.

QSS QSS  
QSS QSS

## QVÆSTIO VIII.

*Vtrum operationes Angelorum mensurentur aeo,  
vel tempore discreto.*

**N**Ot. 1. Quòd operationes Angelorum sunt in triplici differentia; nam quædam sunt immanentes, sed generabiles, & corruptibiles, non solum potentia, sed actu, vt intellectiones, & volitiones omnes liberæ; quædam, sunt immanentes sed incorruptibiles, vt visio, & fruitio beatifica, & dilectio, & amor supernaturalis. Quædã sunt operationes transeuntes, vt sunt motus localis, operationes, quas habere posset incorporibus assumptis, & similia; de quibus omnibus est contentio inter Doctores, & præsertim inter Thomistas, & Henricum ex vna parte, & inter Scotum, & Scotistas ex altera.

Not. 2. Quòd Henricus quol. 18. q. 8. D. Thomas p. 1. q. 10. art. 5. in responsione ad primum, & Thomistæ communiter, quibus consentit Suarez in meta. disp. 50. sect. 7. ponunt quoddam tempus discretum compactum, ex pluribus instantibus correspondentibus singulis actionibus primi Angeli; vnde illud spatium, in quo durat cognitio Angeli, dicitur instans huius temporis discreti; & sicut illa cognitio est indiuisibilis, ac permanens, ita pariter illud instans temporis discreti, quod sibi correspondet, est indiuisibile, & permanens. Insuper dicunt Thomistæ instantia huius temporis discreti differre ab instantibus temporis nostri, quod est mensura primi mobilis, quia illa possunt coexistere tempori nostro diuisibili; cum possit vna intellectio Angelica durare per vnum diem; ac proinde instans mensurans eam coexistit tempori vnius diei; instantia vero nostri temporis, cum sint indiuisibilia non permanentia, nequeunt coexistere alicui parti temporis. Quare, cum in Angelis sint diuersæ cogitationes naturales sibi inuicem succedentes, opinantur Thomistæ cum Henrico, tempus discretum componi ex spatiis correspondentibus Angelorum cogitationibus.

Ratio autem ponendi tale tempus est, quia sicut ali- quod est in se, ita habet mensuram sibi correspondentem; cum igitur cogitationes Angelorum non mensurentur

æternitate, neque æuo; quod est mensura rei indefectibilis; neque tempore nostro; assignanda videtur alia mensura illis proportionata, quæ est tempus discretum; quod sic describi potest ad mentem Henrici: Tempus discretum est quantitas discreta constans ex pluribus nunc indiuisibilibus, ordinatim sibi succedentibus absque vlla continuatione; & idem docent Thomistæ, atque solum addit Caiet. Tempus discretum non esse quantitatem predicamentalem, sed transcendentalem, ac proinde multum diuersum ab oratione, & numero; vt aduertunt communiter cum Scoto eius interpretes.

Not. 3. Quod Thomistæ assignant aliam mensuram actibus beatificis Angelorum, opinantes, mensurari æternitate participata; quid autem sit huiusmodi æternitas, non satis conueniunt Thomistæ, & alij Doctores. Quidam aiunt, vt Caiet. quem sequuntur multi ex Recentioribus, quod æternitas participata non est distincta ab æternitate, quæ mensurat esse Dei, sed eandem esse; solumque differre in hoc, quod æternitas, quatenus primò mensurat Deum, ac eius operationes, dicitur æternitas absolutè; quatenus verò secundariò mensurat ea, quæ participant diuinum esse, dicitur æternitas participata.

Alij volunt esse distinctam ab æternitate Dei, ac proinde esse æternitatem inferiorem, & differre inter se tanquam perfectius, & imperfectius.

I. Concl. Non est admittendum tempus discretum mensurans operationes immanentes, generabiles, & corruptibiles Angelorum. Est Scoti 2. d. 2. q. 4. vbi inquit: nullum apparere fundamentum ponendi tale tempus, & probat sic. Quæ habent vniformem modum manendi, dum manent, habent mensuram eiusdem rationis, licet vna diutius maneat, quam altera, sed cognitio Angeli, dum manet, habet eundem modum manendi cum existentia Angeli: ergo habet mensuram eiusdem rationis, ergo cognitio Angeli mensuratur non tempore discreto, sed æuo. Resp. Caiet. hæc maximam esse veram solum cum hac additione, idest, quæ habent eundem modum manendi intrinsecum, & respicientem naturalem durationem rei. Verum hæc responsio nullius est momenti. Nam mensura vt habet Arist. 10. metaph. debet esse ynigenea

mensurato, quæ vnigenitas, & vniformitas mensuræ ad mensuratum non recipit modum essendi mensurati aptitudinalem, vel naturalem, sed modum manendi actualiter; quod autem res, quæ manet sit supernaturalis ordinis, vel naturalis impertinens est ad rationem mensuræ rei durantis.

Præterea arg. Scotus improbando positionem temporis discreti. Concedunt sic philosophantes magnam multitudinem temporum; sequeretur enim, quod quilibet Angelus haberet suum tempus discretum, quia vnus potest continuare cognitionem suam cum die nostro, & Angelus alius potest suam continuare cum dimidio diei; Angelus tertius cum hora &c. & ita vnus Angelus habebit quatuor instantia sui temporis discreti, dum alius habet vnum instans. Imò sequitur, quod in quolibet Angelo erunt duo tempora discreta, quia quilibet poterit continuare intellectionem suam, non continuando volitionem, & ita habebit duo instantia volitionis, & vnum tantum intellectionis.

II. Concl. Omnes operationes Angelorum immanentes, siuè beatificæ, siuè non mensurantur æuo. est Scoti in 2. d. 2. q. 3. contra Thomistas. Prob. concl. hac Scoti maxima. Quæcunque existentia actualis, inuariabilis, hoc est, cui repugnat, vt secundum ipsam sit variatio, seu fluxus, vel acquisitio partis post partem, mensurantur æuo; sed talis est existentia operationum immanentium, siuè beatificarum, siuè generabilium, & corruptibilium; ergo &c. Neque æternitas participata, qua volunt Thomistæ mensurari actus beatificos, quales sunt visio, & fructio Dei, est ponenda, quia nulla apparet necessitas: imò nec probabilis ratio, cum non benè explicetur quid sit, & coincidat cum æuo, secundum explicationem, quam passim faciunt Thomistæ. Quare potius erit quæstio de nomine, vt rectè notat Dealgadil. in tract. de Angelis.

III. Concl. Transseuntes Angeli, vt mouere Coelum, a calore in corpore assumpto, & similia, mensurantur tempore nostro. Conclusio da se est clara; quia huiusmodi actiones sunt successiue, sicut nostræ; ergo si nostræ mensurantur tempore, etiam illæ Angeli; non enim apparet maior ratio de illis, quàm de istis.



Arg. cont. 1. concl. Naturales Angeli operationes sunt instantaneæ, hoc est quælibet fit in instanti nostro, & aliæ sibi inuicem succedunt sine aliqua continuatione, & maxime, quando tales operationes sunt disparatæ; ergo spatia, quæ correspondent operationibus naturalibus Angeli, mensurantur tempore discreto.

Resp. conc. ant. quoad hanc partem, nempe, quod operationes naturales Angeli fiant in instanti, negamus tamen mensurari tempore discreto; bene tamen mensurantur æuo, vt probatum est supra &c.

Arg. cont. 2. concl. Omnis forma mensuratur tempore, quæ continuè, & successiuè acquiritur; sed intellectio Angeli successiuè acquiritur, & continuè; ergo &c. mai. patet, minor. videtur esse Scoti in 1. d. 3. q. 7. & in 2. d. 42. docentis Angeli intellectiōem posse intendi, & remitti.

Resp. conc. mai. & dist. min. Intellectio Angeli acquiritur successiuè, ita vt acquiratur vnus gradus post alium absque vllō termino, quo continuentur illi gradus, conc. min. successiuè, ita vt non solum vnus gradus acquiratur post alium, sed etiam continuè, hoc est continuentur illi gradus aliquo termino communi, vt motus, neg. min. Quare ad hoc, vt aliquod mensuretur tempore non sufficit, quod acquiratur successiuè, sed requiritur continuatio, quæ non habet locum inter gradus cognitionis, cum ipsi sint indiuisibiles. Itaque erit acquisitio vnus gradus in vno nunc æui, alterius in alio nunc æui &c.

Dices. Ergo etiam qualitates corporeæ, & materiales, puta, albedo, caliditas, & huiusmodi mensurabuntur æuo in ipsa intensiōe, & alteratione, quod est falsum: ergo nec intellectio mensuratur æuo, quia non apparet maior ratio de ista, quam de illis.

Resp. neg. conf. illatam ex nostra responsiōe: dispar namque est ratio de qualitate materiali, & de spiritali operatione Angeli; siquidem caliditas est in subiecto extenso, ideoque acquiritur partibiliter, & diuisibiliter continuè; nam motus proprie causatur ex Arist. & Scoto in 2. d. 2. q. 9. & quol. 11. ex diuisibilitate, vel subiecti mobilis, vel spatij; aded vt partes, talis diuisibilis verè continuentur alio, & alio indiuisibili; intellectio verò est indiuisibilis, & in se, & in subiecto.

Arg.

Arg. probando actus beatificos mensurari æternitate participata, Visio beatifica est immutabilior, & altioris ordinis, quam substantia ipsius Angeli; ergo mensuratur perfectiori mensura, ergo æternitate participata. Ant. patet; quia visio beatifica procedit ab intellectu informato Diuina Essentia, tamquam specie intelligibili. Tum quia Angelus, est non varietur secundum substantiam, variatur tamen secundum accidentia; at visio beata nullo modo variatur: ergo &c. Resp. neg. conf. Est enim quid accidentale ad diuersificandam mensuram, quod res mensurata creata sit magis, aut minus perfecta in entitate, in mutabilitate, aut in alio; sed sufficit, quod eius existentia sit permanens. Nec refert, quod sit altioris ordinis, dummodo eodem modo se habeat, ac res inferioris ordinis in existentia, & modo existendi.

Dices, Visio beatifica est à lumine gloriæ, & terminat ad obiectum Diuinum; ac proinde est participatio quædam Diuinæ essentiæ; ergo mensuranda est æternitate participata. Resp. conf. ant. negamus tamen ob id esse variandam mensuram; æternitas enim participata coincidit cum æuo. Itaque ex dictis inferitur, ne dum operationes immanentes naturales, & beatificas mensurari æuo, sed etiam omnes substantias materiales, & corruptibiles quoad primum esse, quod per generationem accipiunt, mensurentur instanti temporis, & pariter quoad vltimum esse, quod admittunt per corruptionem, mensurantur instanti temporis; & ratio est, quia illæ mutationes substantiales fiunt in instanti temporis; post illud autem instans, quia sunt in facto esse, mensurantur æuo; eò quia sunt reuera permanentes, & habent eundem modum manendi: sed hæc ad Philosophos spectant, apud quos obseruanda est præsertim illa doctrina, quam tradit Scotus in 2. d. 2. q. 3. §. ad primum dico; ubi agit de fluxu formæ generabilis, & corruptibilis, & in reportatis repetit breuiter eandem doctrinam sic. Existentia actualis rei creatæ potest intelligi quinque modis. Primò alia est existentia actualis, quæ est ipsius fluxus, vel formæ, in quantum actu est in fluxu. Secundò est existentia alicuius quæ nec est fluxus, nec forma actu sub fluxu, sed tamen illa natura nata est esse sub fluxu, sicut calor in esse quieto.

Tertio est existentia rei, quæ nec est actu sub fluxu, nec nata est esse sub fluxu, habet tamen aliquid annexum ratione cuius potest esse sub fluxu, quia secundum illud annexum potest esse per se fluxus, vt forma substantialis ignis, si est in indiuiuibili, ipsa nequẽ actu, nequẽ potentia est fluxus, tamen ratione qualitatum annexarum potest acquiri per fluxum, & deperdi. Similiter exemplum de substantia Cœli, & motu annexo. Quarto est existentia rei, quæ nec actu est sub fluxu, nequẽ potentia secundum se, nec ratione annexi; tamen illa existentia non est sempiterna: sicut intellectio Angeli. Quinto est existentia rei, quæ nullo istorum modorum est sub fluxu, & est sempiterna, vt existentia Angeli, qui tantum mensuratur æuo; sicut fluxus, & forma vt actu sub fluxu tantum mensuratur tempore. De tribus igitur existentijs intermedijs videndum, qua mensura mensurantur, & postquam Doctor examinauit opiniones de tribus existentijs intermedijs, ita in fine quæst. 1. dist. 2. lib. 2. Rep. concludit. Dico igitur, quod nulla existentia rei permanentis inuariabilis mensuratur nisi æuo; & de forma, quæ nata est variari potest sustineri primus modus dicendi, vel secundus; quos vide loc. cit. Et cum dicitur, quod eadem existentia mensurabitur nunc æuo, nunc tempore. Dico quod non: quia non est eadem existentia in fluxu, in actu, & existentia vniformis, cum actu non est sub fluxu. Et paulò superius instans sibi ipsi tali pacto. Cuius primum esse mensuratur instanti temporis, & esse habitum mensuratur tempore; respondet, verum esse; cuius primum esse per se mensuratur instanti temporis, non autem cuius primum esse per accidens mensuratur instanti temporis. Non enim est eadem ratio, si sit immediatè à Deo, quia sicut conseruat creaturam sine mutatione, vel motu præcedente, sic producit: & sicut conseruatio non mensuratur instanti temporis, sic nec primum esse sic produci. Nota, quod Doctor loquitur hic de forma ignis, de qua vide &c.



## DISPUTATIO V.

*De gratia, merito, & demerito, nec non de peccatis, & pœnis Angelorum.*

## QVÆSTIO I.

*Vtrum Angeli in primo instanti suæ creationis gratiam sanctificantem receperint.*

**N**OT. 1. Quòd quàmuis Deus potuerit creare Angelos in beatitudine supernaturali, quæ consistit in visione, & fruitione Diuinæ essentiae; nihilominus eos de facto non creauit: licet aliqui, sine tamen fundamento existiment, Angelos à suæ creationis exordio perfectæ Diuinæ essentiae visione, non quidem permanente, sed transiente fuisse donatos; ita vt saltem per non nulla temporis instantia omnes Angeli, tam boni, quam reprobī habuerint beatitudinem supernaturalem. Verā tamen sententia Theologorum est, Angelos fuisse creatos in beatitudine naturali tantum, quæ consistit in vltima perfectione, quam Angelus solis naturæ viribus sibi comparare potest per excellentissimas operationes intellectus, & voluntatis, hoc est per cognitionem Dei, vt summi boni, & per amorem Dei super omnia; quod deducunt Scholastici ex S. Scrip. & præsertim ex sententia Ezech. c. 28. *Tu signaculum similitudinis, plenus sapientia, & perfectus decore, in delitijs Paradisi Dei fuisti; & paulò infra: Perfectus in vijs tuis à die conditiōis tuæ; nec non ex SS. Patribus interpretantibus, ly in delitijs Paradisi, pro beatitudine naturali.*

NOT. 2. Quòd gratia est donum supernaturale, quod à Deo gratuito datur Angelis, & hominibus, & omnis alijs gratiæ diuisionibus, de quibus latè agetur (Deo dante) in tractatu de gratia; pro nunc gratia diuiditur in gratiam gratis datam, & in gratiam gratum facientem. Prima est quoddam donum, quod datur hominibus potiùs ad salutem aliorum, quàm eorundem hominum, & sunt illæ, quæ numerantur ab Apost. in Epist. ad Corint. cap. 12. *Alij datur sermo sapientiæ, alijs sermo scientiæ, alijs operatio virtutum &c.* quæ dona cum non iustificent habentem, stare poss.

possunt cum peccato mortali. Secunda est, quæ datur vni-  
cuique ad propriam salutem; & partitur in gratiam gratum  
facientem per modum auxiliij actualis, quo e. g. quis exci-  
tatur à peccato, & ad bene operandum; & in gratiam per-  
manentem, & per modum habitus, quæ iustificat haben-  
tem illam, & reddit eum Deo gratum, atque regni coele-  
stis hæredem; in præsentī quæstione non loquimur de gra-  
tia gratis data, neque de gratia actuali, sed de gratia san-  
tificante.

Not. 3. Quodd circa quæstionem sic explicatam sunt duæ  
sententiæ. Quidam censent, Angelos in primo instanti,  
quo fuerunt creati, non recepisse à Deo gratiam sanctifi-  
cantem. Alij ex opposito existimant, Angelos in primo  
instanti gratiam recepisse. Vtraque opinio est probabilis;  
adeo vt D. Bonau. Scotus, & quam plures Scotistæ sint in  
hac re problematici; non enim ratio conuincens apparet,  
quæ cogat magis ad vnā, quàm ad aliam partem; nihilo-  
minus affirmatiua videtur probabilior, in quam etiam ma-  
gis Inclinat Scotus; ideò sit.

Concl. Angeli omnes fuerunt creati cum gratia habitua-  
li sanctificante. Ita Scot. in 2. d. 5. q. 1. D. Thomas, & Tho-  
mistæ, & Recentiores ferè omnes. Prob. 1. auctoritate S.  
Scrip. Iudas Apost. in sua canonica Epist. sic tradit. *An-  
gelos verò, qui non seruauerunt suum principatum &c.* vbi no-  
men græcum, pro quo vulgata transtulit (principatum)  
significat etiam originem, & ideò Iansenius, & alij inter-  
pretantur iustitiæ statum, in quo conditi sunt; & in Eze-  
ch. cap. 28. *Perfectus in vijs suis à die conditionis tuæ, donec inuen-  
ta est iniquitas in te.*

Prob. 2. ratione. Deus rebus omnibus in prima produ-  
ctione dedit seminales quasdam rationes in ordine ad pro-  
prios effectus naturales, & proprios fines, vt experientia  
demonstrat in animalibus, & plantis: sed gratia habitualis  
comparatur ad gloriam, sicut seminalis ratio in natura ad  
effectum naturalem; ergo consonum est rationi, vt Deus  
creaturis intellectualibus ad gloriam ordinatis dederit in  
primo instanti suæ creationis gratiam habitualement sancti-  
ficantem. Prob. 3. Adamus conditus est in gratia ex cap.  
7. Ecclesiast. *Deus facit hominem rectum*, idest iustum, & San-  
ctum, quod videtur definitum à Trident. sess. 6. in decre-

ro de peccato originali, ubi dicitur *Adamus per peccatum sanctitatem, & iustitiam, in qua constitutus fuerat, amissio*, ergo idem potiori iure dicendum est de Angelis.

Arg. 1. auctoritate S. Scrip. legimus in Iob. cap. 4. *Deus in Angelis prauitatem reperit*; in hebræo habetur, in Angelis suis non posuit laudem, vel lucem; sed gratia, & iustitia in. Sacris litteris appellatur lumen, & lux, iuxta illud primæ Epist. Petri cap. 2. *Locauit eos in admirabile lumen eius*; & S. Paulus plerumque iustos appellat filios lucis, dicens. *Eratis aliquando tenebra, nunc autem lux in Domine*: ergo Angelus ab initio non habuit gratiam sanctificantem.

Confirmatur per D. August. lib. 1. de Gen. ad litteram cap. 9. dicentem; *Angelicam creaturam primò factam fuisse informem, & Cælum dictam, deinde formatam fuisse, & lucem appellatam*. Resp. quod licet præfatus textus Iob interpretetur de laude, vel luce, tamen nõ obest nostræ conclusioni. Siquidem significauit Angelos non habuisse laudem, vel lucem consumatam, & perfectam, quam habent Angeli beati, qui ob id ab eodem Iob. cap. 3. dicuntur *Astra matutina Deum laudantia*. Ad D. Aug. dicitur circa hanc rem fuisse dubium, ac proindè vtramque opinionem aliquando sequutus est. Vel dicimus D. Aug. affirmare Angelos fuisse prius informes, quam formatos prioritate naturæ, non temporis.

Arg. 2. Gratia est medium inter naturam, & gloriam: ergo debuerunt Angeli prius creari in statu naturæ puræ, & deindè gratia ornari, qua beatitudinem benè operando, promerent. Resp. conc. ant. & neg. consl. quia sicut prius homo fuit creatus non in statu naturæ puræ, sed in gratia; ita potiori iure decuit creare Angelos in statu non puræ naturæ, sed gratiæ.

Arg. 3. Deus nihil frustra operatur, sed gratia Angelis in primo instanti frustra collata fuisset; tunc enim non potuissent cum ipsa deliberare; nec consequenter meditante gratia operari. Resp. neg. assumptum. Nam gratia in primo instanti collata sanctificabat naturam Angelicam, & constituebat ipsam in actu primo ad merendum; sicut de facto plures Theologi tenent eos inuissè in primo instanti.

Quæres. An sicut Deus potuisset Angelos creare in  
bea-



beatitudine supernaturali ; sic pariter potuisset, illos creare in miseria pœnæ, quæ non supponit culpam.

Resp. Scotus. Non videtur contradictio, quod in primo instanti pœna aliqua Angelicæ naturæ infuisset ; ac proindè potuit etiam immediatè à Deo dari pro primo illo instanti, sicut & beatitudo. Nulla, inquam, quantum ad hoc assignari potest repugnantia ; non quidem physica, quia omnis oppositio physica, quæ in primo instanti esset inter Angelum, & pœnam, esset pariter in sequentibus instantibus, quæ nulla fuit. Non etiam moralis repugnantia ; nam si aliqua, maximè quia dedeceret Deum punire absque culpa, tam grauitè, puta pœna, quam de facto patiuntur Dammati ; sed ex hoc capite non repugnaret ; quia cum Deus sit Dominus vitæ, & mortis creaturæ, potest prohibito ipsius statum immutare. Quod Scotus confirmat auctoritate D. Aug. lib. 3. de libero arbitrio dicentis. *Si Deus ab initio fecisset hominum in pœna, non esset propter hoc vituperandus Deus, nec iniustus ; ergo &c.*

Quæres 2. An Angelis sit infusa gratia in primo instanti dependenter à propria dispositione.

Resp. Rem esse planè incertam. Quare variant circa hoc Doctores : Quidam putant gratiam Angelis infusam fuisse dependenter à propria dispositione, quorum fundamentum est, quia sic videntur tradere nonnulli SS. Patres ; tum etiam quia in illo instanti habebant liberum arbitrium, potuitque Deus in eodem instanti conferre illis auxilium actuale, tam ex parte intellectus, quàm ex parte voluntatis ad actus fidei, spei, & charitatis ; quæ quidem virtutes supponuntur infusæ pariter in primo instanti ; ergo elicere potuerant Angeli in primo instanti actum amoris erga Deum : & sic per ipsum tanquam per propriam dispositionem recipere gratiam sanctificantem. Quod si dicatur in primo instanti defuisse sufficientem libertatem, quia ad hanc requiritur indifferentia voluntatis ad operandum, & non operandum, quam non potest intelligi habuisse Angelos in illo primo instanti.

Resp. ad libertatem sufficientem, non esse necessarium, ut voluntas prius duratione reali sit indifferens ad operandum, sed sufficit, quod prius, natura præcedat cum tali indifferentia.

Verum Alij existimant impossibile, quod Angeli in primo instanti receperint gratiam per præuiam dispositionem, & probant primò auctoritate D. Basilij super illa verba psal. *Verbo Domini Cæli firmati sunt*, scribentis sic. *In prima constitutione, & quasi quadam conspersione sua substantia insitam habuerunt sanctitatem*: & D. Aug. aientis in lib. 12. de Ciuitate Dei. *Simul in eis, & condens naturam, & largens gratiam*; ergo &c. non ex propria dispositione præuia &c. Tum quia Angeli in primo instanti acceperunt sine præuia dispositione alia dona spiritualia, ergo etiam donum gratiæ sanctificantis. Tum quia non est possibile, Angelum habuisse in eodem instanti omnia, quæ ad merendum requiruntur. Etenim requiritur in primis ex parte intellectus concursus speciei infusæ representantis Deum, deinde formatio cognitionis de Deo; postea ex parte voluntatis concursus auxilij supernaturalis excitantis, & adiuuantis, vt pio affectu voluntas Angeli in Deum moueretur, & denique productio ipsius affectus dilectionis supernaturalis, quæ omnia postulant saltem instans reale; ergo debuissent non in primo, sed in secundo instanti recipere per propriam dispositionem gratiam iustificantem.

Neque fingenda sunt hic varia instantia naturæ contenta in vno instanti reali, eo quia ad positionem actus non sufficit instans naturæ, vt docet Scotus, sed exigitur instans reale; non enim causa operatur in instanti naturæ, sed vel in instanti æui, vel temporis; ergo in vnico instanti est impossibile intelligere naturam secundum se conditam, deindè voluntatis libertate se disposuisse ad gratiam, & denique eam recepisse: actiones enim mensurantur, vt supra ex Scoto statuimus, vel instanti æui reali, vel temporis: instans autem naturæ, seu naturæ prioritas, nil aliud importat in proposito nisi præsuppositionem potentiæ causalis ad actum eliciendum, cuius elicitio nequit fieri in instanti naturæ, sed reali, vel æui, vel temporis. Neque obstat, nobilius esse, gratiam habere cum propria dispositione, quàm per Dei liberalitatem. Vel quia Angeli instar adultorum sanctificati sunt. Non obstat, inquam, nam Angelus in illo primo instanti nequit habere huiusmodi dispositionem, benè tamen si diceremus, vt quidam probabiliter censent, Angelos recepisse gratiam, post

post primum instans creationis. Cæterùm Angeli non instat aduulorum, sed paruulorum à Diuina liberalitate sunt iustificati; sistendo in hac sententia.

Instabis consentaneum est naturæ rationali, quæ amicitiam inire prærendit cum aliquo, vt præuio, & mutuo consensu tam ineat, sed Angeli per gratiam sanctificantem incunt cum Deo amicitiam; ergo præuio mutuo consensu, qui rationem dispositionis habeat, Angeli incunt amicitiam cum Deo. Resp. Si Angelus in primo Instanti elicere posset huiusmodi præuium consensum, conc. mai. si nequeat in primo instanti, neg. Alioquin dicendum est, non in primo, sed in secundo instanti eos recepisse gratiam, quod mihi magis probatur, supposito, quod receperint gratiam dependenter à propria dispositione. Quæ autem sit mens Scoti, non satis deprehendi potest, hinc diuersæ opiniones inter Scotistas; nam aliqui amplectuntur affirmatiuam; alij oppositam; & hæc mihi magis placeat ob rationes supra allatas, estò sit contra D. Bonau. D. Thomam, Frassen, & alios Scotistas, Henricx autem videtur dubius. Itaque probabile est, asserere, Angelos conditos esse in primo instanti cum gratia sanctificante, atque ad illam se minimè disposuisse, non ob voluntatis defectum, sed ob impossibilitatem instantis, in quo nequeunt elici plures actus à potentia libera, quæ postulat aliquod durationis tempus in suis actibus ponendis.

Neque auct. Conc. Trid. paulò superiùs adducta de homine in statu innocentie, & in gratia constituto, cogit à fortiori asserere, Angelum in primo instanti gratiam recepisse; eò quia, vt obseruat Doctiss. Macedo cum Vasquez.

Aliud importat conditum, & aliud, constitutum; nam conditum importat creationem; constitutum autem esse, non significat conditum esse, sed ordinatum esse. Quare in Concilio solum vt certum definitur, Adamum antequàm peccaret, iustitiam, & Sanctitatem habuisse.

Quæres 3. Quo sensu Patres, & Theologi asserant, Angelis esse infusa dona gratiæ proportionate ad naturalia.

Resp. Non esse intelligendos SS. PP. & Theologos in hoc sensu, nempe, quod in natura fuerit aliqua dispositio præuia ad ipsam gratiam, & eiusdem meritoria, vel de condigno, seu de congruo; quia hoc sapit Pelagianismum,

num, sed ita intelligendi sunt, videlicet, quod Deus ex mera voluntate sua, & liberalitate, voluerit Angelis perfectioribus conferre maiorem gratiam habitualement, & ob id illis etiam gratis dederit maiora auxilia præuenientia, & adiuuantia, quibus perfectius se disponere possent ad gratiam. Quæ tamen doctrina, vt notat Herincx cum Maldero, non est ita certa, quin dici possit Deum donasse omnibus Angelis æqualem gratiam, æqualia auxilia; nam hoc etiam affirmare est probabile, & dictis Sanctorum conforme.

## QVÆSTIO II.

*Vtrum Angeli meruerint beatitudinem supernaturalem priusquam eam recepissent.*

**N**ot. 1. Quodd meritum generaliter acceptum sic describi potest. Est opus bonum præmio aliquo dignum; siue illud præmium à Deo, siue ab homine conferendum. Vnde meritum sic generaliter sumptum est quid commune ad meritum politicum, & Theologicum. Politicum est opus, cui de iustitia distributiva debetur præmium, adeò sic merenti fiat iniuria, si tale præmium non redderetur: Theologicum autem est opus moraliter bonum exigens aliquo modo compensationem præmij alicuius à Deo conferendi, & hæc est conformis doctrinæ Scoti in 1. d. 17. q. 2. & in 3. d. 18. Diuiditur communiter hoc meritum in meritum de condigno, & in meritum de congruo, quam etiam diuisionem docet Scotus in 4. d. 14. q. 2. Meritum de condigno est illud, quod ex iustitia inducit obligationem ad reddendum præmium, supposito tamen pacto diuino, & ob condignitatem, quæ in tali opere bono, & meritorio reperitur. Quid autem sit meritum de congruo, non satis clarè describitur, nec satis conueniunt Doctores inter se; communiter dicunt; esse opus moraliter bonum exigens solum ex quadam congruitate compensationem aliquam, à Diuina liberalitate præstandam; At huiusmodi explicatio numquam mihi placuit; quia sic dum homo peccator à gratia actuali excitatus, elicit actum attritionis, sequeretur quod Deus non teneretur, nisi titulo congruen-

gruentiæ acceptare talem actum, & ei conferre gratiam mediante Sacramento, si non sit actus perfectæ contritionis. Verùm, quia hæc materia tractatur in p. 3. tract. de gratia; idcirco dabo hic descriptionem tantum, quæ est talis. Meritum de congruo prout condistinguitur à merito de condigno, non enim hic loquimur de merito de congruo latè sumpto, est illud, quod, & si supponat pactum diuinum, non tamen inducit obligationem ad reddendum præmium ex iustitia, sed solum ex debito liberalis promissionis diuinæ, seu fidelitatis.

Not. 2. Quòd alius est status viæ, alius status in termino viæ; primus competit omnibus hominibus, & Angelis, dum sunt viatores, idest in statu merendi, & demerendi. Secundus competit etiam comprehensoribus, quales sunt Beati, & Animæ Purgatorij, quoad meritum, ac demeritum, & damnatis, qui pariter nec possunt mereri, nec demereri amplius. Quare ad merendum, & demerendum, requiritur status viæ tam in Angelis, quàm in hominibus; eadem namque ratio militat de illis, ac de istis.

Not. 3. Quòd duratio viæ Angelorum explicatur à Theologis per quasdam determinatas morulas; est autem morula quoddam nunc æui, correspondens alicui parti temporis nostri. Variant tamen Doctores circa numerum morularum. D. Thomas, & Varro Scoti Magister ponunt duas, in quarum prima putant omnes Angelos fuisse creatos in gratia, & meruisse; in altera verò bonos recepisse præmium beatitudinis, & malos ad pœnas æternas fuisse damnatos. Magister sentent. tres morulas ponit, hac tamen explicatione, quod in prima omnes Angeli sint creati in puris naturalibus; in 2. bonos meruisse, & malos peccasse; in 3. omnes fuisse in termino, boni in beatitudine, & mali in tormentis. Alij ponunt quatuor; sed communis, & magis recepta sententia ponit tres tantum, hoc pacto. In prima omnes fuerunt creati in gratia actuali, & habituali, in 2. aliqui Angeli meruerunt, alij de meruerunt; in 3. boni fuerunt beatificati, & mali in æternum damnati; Ita Scotus in 2. d. 5. q. 2. Scotistæ, & Recentiores.

Not. 4. Quòd circa hanc quæstionem fuit sententia Magistri sent. dicentis, Angelos non meruisse beatitudinem,  
ante-

antequàm accepissent, sed postquàm illam acceperunt; sicut Miles dicitur mereri equum per opera non facta, sed fienda. Quæ sententia ait Scotus absurda est; si enim propter opera præuisa quis diceretur mereri, sequeretur, gratiam non esse gratiam; ex eo namque inquit Scot. 2. d. 5. q. 1. quod aliquis præuideatur benè vsurus accepto, non meretur accipere illud. Tunc enim posset homo mereri primam gratiam, quia præuidetur à Deo dante, benè vsurus ea, & tunc gratia non esset gratia, quia esset ex meritis, licet non positis in effectu, tamen præuisis, ergo Angelus non meruit beatitudinem, si tantum habuit eam propter bonum vsu præuisum ipsius in obsequendo circa electos. Cæterùm D. Thomas docet Angelos in primo instanti recepisse beatitudinem, quam doctrinam sic explicat Caspensi. in tract. de Ang. disp. 6. sect. 6. Nam licet tunc facta fuerit aliqua mutatio in Angelis bonis, non ideo multiplicanda sunt instantia, quia iuxta communem modum loquendi Theologicum, solum habetur ratio vnius actus principalis perseverantis per totam illam durationem, qualis fuit dilectio Dei. Quare iste Doctor censet, positionem plurium instantium, seu morularum spectare ad modum loquendi.

Concl. Angeli de facto meruerunt beatitudinem priùs tempore, quam eam fuerint adepti. Est Scot. 2. d. 5. q. 1.

Prob. sic à Scoto. Omnis natura consequitur suam perfectionem per operationem propriam; sed perfectio, & finis cuiuslibet creature rationalis est beatitudo, quæ soli Deo est naturalis, ergo Angelum debet eam consequi per propriam operationem. Finis autem consequendus per operationem, vel est per causam faciendus, vel per causam promerendus; seu ut loquitur Scotus: Omnis operatio ducens in finem, vel est factiua finis, quando scilicet finis non excedit virtutem operantis, ut medicatio respectu sanitatis; vel est meritoria finis; quando scilicet finis excedit virtutem operantis, sed beatitudo, quæ est finis excedit omnem virtutem effectiuam Angeli, ergo eam non potest adipsi, nisi per operationem meritoriam. Tum quia natura Angelica est capax merendi beatitudinem, sicut homo, & etiam magis, ergo qua ratione homo consequitur beatitudinem, eadem ratione potest Angelus.



Prob. 2. Principium meriti non cadit sub merito, cuius est principium, ideo non meremur primam gratiam per opera præcedentia ipsam; sed omnia opera subsequētia beatitudinem, oriuntur aliquo pacto ex beatitudine, tanquā ex principio, vel illam saltem ut priorem supponunt: ergo Angeli per huiusmodi opera non meruerunt beatitudinem.

Prob. 2. pars nempe, quod Angeli prius tempore &c. Non potest voluntas simul, & semel esse in eo statu, in quo velit obiectum mutabiliter, & contingenter, & etiam immutabiliter, & necessario, sed si Angeli eodem tempore, quo beatitudinem merentur, eam acciperent, sequeretur eos velle idem obiectum mutabiliter, & immutabiliter, contingenter, & necessario; ergo &c. mai. patet, quia duo actus omnino oppositi non possunt simul ab eadem facultate procedere; min. pariter est clara; nam ut quis mereatur, debet esse in statu, ut non sit ita determinatus ad actum, quin habeat libertatem, non solum essentialē, sed etiam contradictionis, quod in casu nostro non haberetur; ergo &c.

Arg. 1. cont. concl. quoad primam partem. Angeli propter beneficia, quæ impendunt hominibus, & mundo, aliquid merentur, sed non merentur nouum præmium, ergo merentur illud, quod à principio receperunt, id est beatitudinem; mai. patet, quia Christus in hac vita mortali meruit, quāuis esset comprehensor; ergo similiter Angeli. Resp. Angelos mereri, non quidem beatitudinem essentialē, vel aliquem eius gradum, sed accidentalem tantum, ut Theologi docent non solum de Angelis, sed etiam de Animabus. Ad id, quod adducitur de Christo; dicimus non esse parem rationem; fuit enim Christus ut Redemptor aliquāliter dispensatus, & licet esset beatus ab instanti suæ conceptionis, ac proinde perfectè vnitus cum Deo secundum affectionem iustitiæ, ut cum Scoto loquar, non tamen secundum affectionem commodi, cum esset corpore passibilis; ideoque non currit eadem ratio.

Arg. 2. Rex potest dare militi arma propter bonum usum, quem sperat ab eo; ergo, & Angeli potuerunt promereri sibi gloriam per opera subsequētia. Resp. neg. paritatem; nam latum est discrimen inter arma, quæ solent  
in

in præmium dari spe futuri meriti, & inter gratiam; bonus enim vsus armorum tribuitur dexteritati, & industriæ militis, non verò armis; & talis dexteritas supponitur in milite, etiam secluso dono, estque digna ex se illis armis, quibus vtatur in seruitium regis; non sic autem se habet gratia militi Christi donata, vt ex dictis liquidò patet.

Quæres 1. Per quid Angeli meruerunt suâ beatitudinem.

Resp. meruisse per actus virtutum Theologicarum fidei, spei, & charitatis. De actibus fidei patet per illud Abacuc cap. 2. *In fide ex fide viuunt*; & addit Apost. ad Hebræos cap. 11. *Sine fide impossibile est placare Deo*, ergo cum Angeli essent iusti, & Deo placuerint, actus fidei elicuerunt. Quem admodum etiam homines per actus fidei formatæ Deo placent. Et quod dicitur de fide, à fortiori dicendum est de spe, & de charitate; constat enim Angelos bonos tempore, quo præliabantur cum dracone, & cum Angelis eius, Deum amasse, & in eo spem suam reposuisse.


Quæres 2. Quamdiù durauerit Angelorum via.

Resp. Doctores circa hoc multum variare. Quidam enim putant durasse tota prima die creationis Mundi, quando Deus diuisit lucem a tenebris, in qua diuisione recognoscunt fuisse separatos Angelos bonos à malis. Alij volunt durasse vsque ad secundum diem, quando Deus creauit firmamentum, & diuisit aquas, quæ sunt supra firmamentum ab ijs, quæ sunt infra. Alij censent perdurasse vsque ad diem sextum, quo adhuc Deus dixit Gen. 1. *Veni Domine cuncta, quæ fecerat, & erant valde bona*. Alij aliter discurrunt; vnde res est planè incerta. In hoc tamen conueniunt doctores, viam Angelorum fuisse valde breuem, & rationem assignat Scotus in 2. d. 5. q. 1. tum ob perfectionem potentiarum Angelicarum, & auxiliij supernaturalis, tum ob absentiam impedimentorum in spiritibus ad operandum de se expeditissimis. Ad magnitudinem, namque præmij non requiritur diuturnitas temporis, vel multitudo meritorum, sed potius requiritur vnum meritum intensum, quàm centum millia remissa; & in eis, inquit Scotus, fuit motus meriti valde intensus.

Quæres 3. An in mora illa, quæ intercessit inter peccatum Diaboli, cuiusque damnationem, potuerit ipsum pænitere, & per pænitentiam resurgere.

Resp. Duas esse opiniones; & ambas probabiles. Prima est negatiua, quæ videtur communis apud Doctores, cui plurimum fauet S. Damasc. lib. 2. de fide cap. 4. dicens: *Quod hominibus mors, hoc Angelis lapsum existisse*. Post lapsum enim preclusa iam est illis omnis resipiscendi facultas, quæ, namque, & hominibus postquam ex hac vita inigrarunt; & D. Fulgent. lib. de fide ad Petrum cap. 3. dicit, *Quod bonam voluntatem sic amiserunt Angeli, cum haberent, ut amissam, desineps habere non possint*; & idem tradunt D. Aug. Greg. & alij. Quarè iuxta hanc opinionem potuisset malus Angelus demereri durante adhuc statu viæ post primum lapsum, committendo noua peccata, à quibus liberum ei erat abstinere, estò à commissis non posset per pœnitentiam resurgere.

II. Opinio est affirmatiua, cui fauet apertè D. Basil. & Rubertus lib. 1. de victoria Verbi dicit. *Aliud datur intelligi, quod non ita. imò in initio peccati de Cælo proiectus fuerit, sed ipsum quoque expectauerit patientia Dei*; ipse autem secundum duritiam suam. & cor impœnitens iram sibi thesaurizauit: & hanc defendit Scotus, Gabriel, & alij, & inter Recentiores extra nostram Scholam Malderus, Et quidem hæc opinio est magis consona rationi; cum hoc exigit status viæ, & sit meriti capax, qui demeriti; ideoque sicut peccantes Angeli poterant demerita augere, sic etiam tollere, & bene augendo mereri. Quoad Patres in contrarium allegatos, non solum possunt adduci alij Patres in re non reuelata, sed etiam explicari possunt de lapsu Dæmonum consumato, seu in termino. Cæterum constat satis ex consensu Patrum, & Ecclesiæ, neminem ex Angelis peccantibus de facto per pœnitentiam resurrexisse ad statum gratiæ, & habetur in Epist. 2. Petri cap. 2. *Deus Angelis peccantibus non peperit*; quæ assertio, velut indefinita æquiualeat vniuersali, vt tradunt Doctores.



*Vtrum de potentia Dei possit creari aliqua creatura intellectualis ex sui natura impeccabilis.*

**N**ot. ex Scot. secundum mentem SS. PP. quod creaturæ intellectuali nequit convenire impeccabilitas per naturam, sed solum per gratiam. Gratia autem non potest esse naturalis, aut connaturalis, seu coessentialis creaturæ intellectuali, licet enim sibi concrearetur gratia, tamen gratia semper esset gratia, & nunquam ei naturalis, idest de natura sua, vel necessario consequens naturam, quod sic probat Scotus in 2. d. 23. q. 1. ubi hanc quæstionem ex professo agit. Quandocumque aliqua duo sic se habent, quod vnum eorum de ratione sua est perfectiū, & alterum est perfectibile, nunquam potest alterum eorum sic crescere in sua entitate essentiali, quod sit alterum essentialē, vel ipsum vnitivē includat, ut patet de materia, & forma, de subiecto, & accidente; nam ob limitationem perfectibilis, impossibile est ipsum essentialiter, & per identitatem includere suam perfectionem. Quæ Doctrina est valde notanda, quia pluribus difficultatibus inferuit.

Concl. Nequit Deus de sui potentia facere voluntatem creatam impeccabilem per naturam, benè tamen per gratiam. Hanc Conclusionem fatetur Scot. in 2. d. 23. q. 1. §. ad quæstionem tenere magis ob expressas auct. oritates SS. PP. quàm propter rationes; inter quos est D. Anselmus, qui in lib. cur Deus homo Discipulo quærenti, quare non potuit Deus facere creaturam rationalem impeccabilem, ait: *Quia non potest ipsam facere Deum*. D. Aug. in lib. cont. Maximum dicens; *cuicunque præstatur ut peccare non possit non est hoc propria natura, sed gratia*; & D. Hieron. in tract. de filio prodigo dicens: *Solus est Deus, in quem peccatum cadere non potest*: ergo &c.

Prob. Scot. ratione. Omnis voluntas, in qua non necessario coniunguntur appetere commodum, & rectè appetere, potest appetere rectè, & non rectè: sed in nulla voluntate creata potest coniungi illa necessario; ergo nulla voluntas creata per naturam potest esse impeccabilis. Min. patet, quia nulla voluntas potest appetere rectè ex hoc so-

lo, quod appetit, nisi voluntas primi entis; mai. est similiter plana; quia ex quo necessariò illa duo non coniunguntur, vnum potest ab alio separari.

Dices. Voluntas potest creari talis, quæ ex hoc, quod appetit, rectè appetat, & potest creari in tali natura, quod non possit appetere, nisi conformiter regulæ suæ, & per consequens in appetendo, siuè ex hoc, quod appetit, non poterit non rectè appetere, sicut nec Regula eius.

Contra. Omnis Voluntas, sicut potest sibi velle commodum, sic videtur quod potest velle eo modo, quo esset sibi maius commodum, si sic inesset sibi, qui quidem modus non est ordinatus à Deo, vt suppono, & per consequens voluntas appetens commodum sub tali modo, quo esset sibi maius, vel summum commodum, non conformabitur regulæ suæ. Tum quia omnis voluntas, quæ non est sua regula, nec necessariò est conformis regulæ suæ, potest deficere in rectitudine; sed omnis voluntas creata derelicta naturæ suæ, est talis, vt patet; ergo omnis voluntas creata potest deficere. Quod autem à Deo possit fieri voluntas creata inpeccabilis per gratiam, patet de immaculata Deipara, nedum præseruata ab originali culpa, vt piè creditur, & tenet Ecclesia; pro cuius articulo propugnauerunt Scotistæ, nec decertare desistit nostra Seraphica Religio, vt veluti fidei articulus definiatur; nedum, inquam, à peccato originali, sed etiam ab omni culpa actuali, tam veniali, quam mortali, vt definitum fuit à S. Conc. Trid. sess. 6. can. 23. Itaque de fidè tenendum est, Deum posse per gratiam creare naturam inpeccabilem.

Arg. 1. cont. conc. Deus potest facere aliquod corpus, quod non potest deordinari à motu suo; ergo similiter potest facere aliquem spiritum, qui non poterit deordinari à motu suo, sed hic erit inpeccabilis, ergo &c.

Resp. ex Scot. neg. paritatem: non enim est simile de corpore, & spiritu intellectuâli, quia cum corpus non habeat libertatem, non potest deordinare deordinatione culpabili, sicut spiritus. Neque potest esse corpus, cui repugnet ex aliquo intrinseco difformiter moueri; licet hoc non sit in sua potestate naturali, & sic nulla potest esse voluntas libera, cui repugnet inordinatè se ipsam mouere.

Arg. 2. Deus potest facere voluntatem aliquam, quæ necessariò tendat in aliquod bonum, puta finem; ergo facere poterit, quod necessariò ista voluntas tendat in finem, & in omne ordinatum ad illum finem; ergo Deus facere posset voluntatem creatam impeccabilem. Ant. patet per Aug. lib. 3. de Trinitate, dicentem: *Omnes velle necessariò beatitudinem*; conf. prob. eadem enim necessitate qua aliquid tendit in finem, tendit & in ea, quæ sunt ad finem.

Resp. neg. assumptum in ant. eò quia nulla voluntas vult necessariò summum bonum, siue in vniuersali, siue in particulari apprehensum. Ad illud D. Aug. dicitur, quod omnes naturali inclinatione, non verò actu elicitò velint omnes, beatitudinem, saltem secundum rationem vniuersalem. Quare dato etiam, quod voluntas necessariò vellet finem, non tamen sequitur, quod necessariò vellet ea, quæ sunt ad finem, cum in eis non sit tanta ratio bonitatis, vt in fine.

Arg. 3. auctoritate D. Ansel. dicentis: *Quod posse peccare non est pars libertatis, neque libertas*; sed quod non est de essentia alicuius, potest à Deo, saltem si est absolutum, fieri sine illo; ergo liberum arbitrium esse sine potentia peccandi non includit contradictionem: ergo &c.

Resp. dist. mai. & simul auctoritatem D. Ansel. posse peccare non est pars libertatis, vt sic, idest quatenus est communis voluntati creatæ, & increatæ, conc. voluntati creatæ neg. mai. Vnde posse peccare in ordine ad voluntatem creatam, stat dupliciter; vel quod possit præcisè in peccatum, quod est carentia rectæ circumstantiæ debitiæ, & sic non est libertas, nec pars libertatis; vel quod possit in actum, cui annexa est deformitas, ex sic est benè pars libertatis creatæ:

Arg. 4. Deus potest facere naturam impeccabilem per gratiam; ergo per naturam quoque: ant. patet, conf. prob. Deus potest facere in creatura quid quid non repugnat limitationi creaturæ: sed non repugnat creaturæ limitatæ, quod Deus creet aliquam creaturam, in qua vnitiuè contineatur perfectio charitatis, vel gratiæ: ergo si Deus potest facere voluntatem creatam impeccabilem per gratiam, potest etiam eam facere impeccabilem per naturam.

Resp. conc. ant. & neg. conf. ad probat conced. mai. &



*Vtrum Angeli potuerint peccare in primo instanti suæ creationis.*

**N**ot. Quòd in hac quæstione versantur duæ opinion-  
nes, vna Thomistarum, altera Scoti, & Scotistarum.  
Prima negat, Angelos potuisse peccare in primo instanti  
creationis, & probat 1. sic ex D. Thom. p. 1. q. 63. art. 5.  
operatio, quæ simul incipit cum esse rei, est ei ab agente, à  
quo habet esse, sicut moueri sursum inest igni à generante.  
Vnde si aliqua res habet esse ab agente deficiente, quod  
possit esse causa defectiua actiua actionis, poterit in 1. in-  
stanti, in quo incipit esse, habere defectiuam operatio-  
nem; sicut si tibia, quæ nascitur clauda ex debilitate semi-  
nis, statim incipiat claudicare. Agens autem, quod An-  
gelos in esse produxit, scilicet Deus, non potest esse causa  
peccati; Vnde non potest dici, quod Diabolus in primo  
instanti suæ creationis fuerit malus. Hæc D. Thomas.

Prob. 2. Prima cognitio Angeli fit per species congeni-  
tas à Deo, repræsentantes quidditates rerum, quarum co-  
gnitio est speculatiua; sed ad peccatum requiritur cogni-  
tio, seu iudicium practicum dictans: hoc est faciendum,  
vel non; & tale iudicium non potest haberi nisi à Deo, vt  
motore speciali applicante intellectum ad illud, & effi-  
ciendo respectu illius, quod facit respectu aliorum subse-  
quentium; ergo in primo instanti, non potuit Angelus  
peccare; redundasset enim in Auctorem ipsum, nempe  
Deum. Aliæ rationes Thomistarum adducentur in parte  
argumentatiua, ideoque sit ad mentem Scoti.

Conclusio. Angeli absolute, & secundum se peccare,  
potuerunt in primo instanti. Est Scot. in d. 5. q. 2. &  
Scotistarum, quem sequuntur quam plures Recentiores.  
Prob. 1. Voluntas Angeli in primo instanti creata est in  
suo esse perfecta, idest in perfecta libertate arbitrij, & vsu  
rationis, non minùs, quàm in secundo instanti; ergo sicut  
potuit peccare in secundo instanti, ita in primo.

Prob. 2. Angelus in sui prima creatione accepit omnes  
species impressas, & instrumenta intelligendi, vt nihil ex-  
pectandum esset ad intelligendum; ergo potuit etiam in  
actum

reduceretur in Deum, specialiter applicantem ad primum dictamen regulatiuum illius, talis actus non esset liber, quia non regularetur per dictamen, seu iudicium practicum, quod esset in potestate voluntatis Angelicæ, sed quod à Deo solo applicante produceretur: ergo &c.

Resp. Gonet. in tract. de Angelis, quod talis actus non esset liber omninò idest quoad specificationem simul. & exercitium, esset tamen liber quoad exercitium, & hoc putat sufficere. Insuper addit, quod licet primum dictamen regulatiuum voluntatis Angelicæ non sit in eius potestate simpliciter, & quoad eius incæptionem, est tamen in eius potestate secundùm quid, & ex parte obiecti, etiam quoad continuationem, quod sufficit ad libertatem exercitij. Verùm quanti valoris sit ista responsio, nemo non videt: in primis fatetur non esse omninò liberum, & deinde addit esse completè liberum ob continuationem, ac proinde fatetur non subsistere propriam opinionem, dum putat, operationem meritoriam esse verè meritoriam, sed non esse verè liberam à principio, sed per continuationem actus.

Præterea omnes fatentur plus requiri ad benè operandum, quàm ad male operandum; *Bonum enim*, vt inquit D. Dion. *ex integra causa*, malum autem ex quocumque defectu, ergo si potuit bene operari in primò instanti, à fortiori peccare potuit, & maximè peccato omissionis, quod committitur absque actu positiuo voluntatis. Quare supposito, quod in primo instanti habuerit præceptum de diligendo Deo super omnia, potuisset omittere actum dilectionis Dei, ergo &c.

Arg. 1. à Thomistis cont. nostram concl. Angelus non habet primum velle à se, sed ab alio: at Angelus non potest peccare per velle habitum ab alio, & non à se: ergo prima volitio ipsius, cum sit ab alio, nequit esse peccaminosa. Prob. mai. ex S. Ansel. de casu Diaboli cap. 13. ubi ait. *Si primum velle à se habet, aut hoc est volens, aut nolens; si volens, igitur illud non est primum velle, si nolens idem sequitur, quia aut illud velle, noluit illud igitur voluit illud non esse, igitur aliquid voluit, ergo peccatum, quod esset in primo instanti, non posset esse à voluntate; ac proinde deberet esse à Deo, hoc autem repugnat, ergo. Respond. negando mai.*

mai. nam, vt docet Scotus, voluntas, posito obiecto, & alijs requisitis potest velle quando, & quoties occurrat occasio, siue primò, siue deinceps, alioquin esset processus in infinitum, nisi haberet à se primum velle, & maximè quia velle est actio immanens, & vitalis, quæ non potest esse ab alio, nisi ab ipsa voluntate, concurrente causa prima in suo ordine. Ad illud D. Anselmi. Resp. Scotus eum explicando, vt aduertit Macedo, eò quòd supposuit Angelum, tamquam nudam substantiam carentem potentia volitiua, quod vocat instrumentum, & idcirco accepta à Deo voluntate, primum velle etiam accepisse censet.

Arg. 2. Si Angelus peccaret in primo instanti, necessario peccaret, sicquè peccaret, & non peccaret; sed hoc est absurdum; ergo &c. patet seq. mai. quia si in primo instanti peccauit, non potuit non peccare; ergo necessariò peccauit; Prob. hæc conf. Etenim si potuit non peccare, aut potentia, aut actu, aut potentia cum actu; non primum, quia Angelus non fuit ante illud instans, quod supponitur primum suæ formationis; neque secundum, quia in ipso instanti primo, quo peccauit, non potuit non peccare, & ideo per illam potentiam non potuit non peccare; ergo necessariò peccauit.

Resp. Scotus neg. 1. seq. ad cuius prob. dicit, quòd voluntas Angeli peccans in primo instanti, potuit reuerà non peccare potentia ante actum, non quidem prioritate temporis, sed naturæ; nam ipsamet voluntas ex se, vt concipitur prior actu, quem producit, est indifferens, & potens ad illum producendum, vel non producendum.

Arg. 3. Ad peccandum requiritur libertas, sed libertas est solummodo respectu futuri, & non præsentis instantis; ergo in primo instanti Angelus peccare non potuit. Prob. min. Ad libertatem, quam postulat peccatum, requiritur plena deliberatio cum discursu, & cognitione perfecta obiecti, præcepti, & aliarum circumstantiarum, sed hæc omnia non possunt haberi vnico instanti; ergo in primo instanti Angelus non potuit peccare.

Resp. conc. mai. & nego min. ad cuius prob. negatur min. eo quia omnia adducta in vnico instanti possunt in Angelo reperiri; quare sufficit sola prioritas naturæ; sicut enim sol in primo instanti sui esse illuminat aerem, ita, &

Angelus potest in primo instanti suæ creationis agere per operationem instantaneam, & maximè, quia Angelus, cum sit perspicacissimus in suo discursu, non indiget tempore. Itaque Angelus in primo instanti potuit habere discursum, non quidem formalem, qui sit per plures actus distinctos procedendo à principijs ad conclusionem, sed per discursum virtualem; quatenus vnus actus æquiualeat iudicio, & discursui formali; vt etiam alibi dictum est.

Arg. 4. Prima cognitio intellectus Angelici fit per species congenitas repræsentantes quidditates rerum, quarum cognitio est speculatiua non practica: sed ad peccandum non sufficit cognitio speculatiua, quæ sistit in sola intuitione rerum, sed exigitur cognitio practica, quæ dicitur iudicium practicum: ergo Angelus in primo instanti non potuit peccare.

Resp. neg. mai. cognitio namque prima potest esse speculatiua, & practica; vnde docet Scotus, quod ad peccandum non requiritur alia cognitio, quam illa, qua cognoscitur obiectum esse bonum bonitate vtili, vel delectabili, aut illud esse prohibitum; certum est autem, quod huiusmodi cognitionem habere potuit Angelus pro primo instanti, tam facilè, quàm pro quocumque alio sequenti. Cæterum omnia argumenta adducta contra nostram sententiam retorqueri possunt contra Thomistas, asserentes, Angelum in primo instanti mereri potuisse.

Arg. vlt. Actio creaturæ non potest esse in instanti; ergo Angelus non potuit peccare in primo instanti. Ant. prob. ex Arioist. 6. Phys. vbi sic habet; Si qua virtus moueret in instanti, maior moueret in minori, quod tamen est impossibile, ex quo sic formatur argumentum. Omni virtute creata potest esse alia maior, ergo si virtus creata Angelorum potest peccare in instanti, aliqua maior poterit peccare in minori mensura.

Resp. quod Arist. intendit probare, motum non posse fieri in instanti, quia si fieret in instanti per maiorem velocitatem mobilis posset fieri in minori mensura, quam sit instans; Ita exponit Auerroes, cui consonant Licherus, & Macedo. Itaque argumentum nil ad propositum probat.

*Vtrum primum peccatum Angeli fuerit Superbia :*

**N**OT. 1. Quòd Angeli plura peccata commiserunt, puta amoris inordinati sui ipsius, præsumptionis de donis naturalibus sibi concessis, concupiscentiæ, vnionis hypostaticæ, inuidiæ erga homines, iræ, & blasphemiæ erga Deum, nec non peccatum scandali in seductione aliorum Angelorum; etenim non solum Lucifer, qui inter Angelos rebelles fuit primus in seducendo alios Angelos, sed etiam alij Angeli cæteros ad peccandum suadebant. Quod nam autem horum omnium fuerit primum, non satis conueniunt Doctores. Aliqui tenent cum nostro Alensi 2. part. q. 93. S. Bonau. in 2. d. 5. art. 1. q. 1. Primum Angelorum peccatum fuisse superbiam propriè dictam. Alij cum Scoto in 2. d. 6. q. 2. asserunt primum peccatum Angeli fuisse amorem ordinatum sui ipsius, qui dicitur luxuria spiritualis, vt inferius magis patebit.

NOT. 2. quod duplex est actus voluntatis, scilicet velle, quo acceptat obiectum conueniens, & nolle, quò refugit disconueniens : & insuper duplex est velle; nempe velle amicitiae, quod est respectu obiecti, cui volumus bonum; & velle concupiscentiæ, quod est respectu obiecti, quod volumus alicui amato. Vnde docet Scot. quod omne nolle præsupponit aliquod velle; à nullo enim refugit voluntas, nisi quia illud non potest stare cum aliquo, quod acceptatur à voluntate, quod etiam docuit D. Ansel. in lib. de Casu Diab. quare omne velle concupiscentiæ præsupponit aliquod velle amicitiae; id enim, quod est volitum, siuè amatum per amicitiam, cui videlicet volumus bonum, est quasi finis respectu concupiti. Hinc sequitur, quod actus inordinatus voluntatis simpliciter primus est velle amicitiae, & non concupiscentiæ.

NOT. 3. Quòd prima concupiscentia inordinata in Angelo fuit respectu beatitudinis, quia concupiscentia inordinata non processit primò ex affectione iustitiæ; ex ea enim nullum procedit peccatum, sed processit ex affectione commodi, quia secundum Ansel. *Omnis actus voluntatis elicitus, aut elicitur secundum affectionem iustitiæ, aut secundum affectum*

*affectionem commodi* : maximum autem commodum, quod est beatitudo, maximè appetitur à voluntate non sequente regulam iustitiæ.

Not. 4. Quòd superbia potest sumi dupliciter, scilicet propriè, & impropriè. Superbia propriè dicta est appetitus inordinatus propriæ excellentiæ. Superbia impropriè dicta, seu radicalis est amor inordinatus sui ipsius, qui rectè à Scoto nominatur luxuria spiritualis, quo vocabulo Scotus expressit vim delectationis perceptæ ex fruitione pulchritudinis cum maxima voluptate, quæ cum sit venerea, teste Cicerone, eam per translationem ad Angelorum sua pulchritudine fruendum voluptatem accommodavit. Nec impropriè locutus est Scotus, vt putant nimis inconsideratè quidam ex Thomistis, inter quos numerandus est Gonet. in tract. de Angel. cum à latinis Auctoribus latinè sapientibus ad voluptates animi luxuria transferatur, vt apud Tibullum Romanum, apud Liuium, & apud Catholicon est videre.

Concl. Primum Angeli peccatum fuit amor inordinatus amicitie sui ipsius; radicaliter verò, seu concomitanter dici potest superbia. Est Scot. in 2. d. 6. q. 2. vbi sic discurret. Actus primus inordinatus voluntatis Angeli fuit simpliciter primum velle amicitie voluntatis eius, qui voluit bonum; hoc autem obiectum non fuit Deus, quia non potuit Deum inordinatè ex intentione amare amore amicitie: Nam Deus est tale amabile, quod ex sola ratione sui, vt obiectum est, dat completam rationem bonitatis actui perfectè intenso, nec est verisimile, quod aliquod aliud à se nimis intensè dilexerit actu amicitie. Tum quia inclinatio naturalis magis inclinat ad se, quàm ad aliquid aliud creatum sic amandum; Tum quia non videtur, quod aliquid aliud creatum à se sic intellexerit, sicut se; ergo primus actus inordinatus fuit actus amicitie respectu sui ipsius. Ita Doctor &c. Prob. 1. Concl. auct. D. Aug. docentis lib. 14. Ciuit. Dei cap. vlt. *Duos amores adificasse duas ciuitates, Ciuitatem Dei, adificauit amor Dei vsque ad contemptum sui, Ciuitatem Diaboli amor sui vsque ad contemptum Dei*; vbi ly ædificare accipitur pro initiali, seu prima operatione; ergo primum peccatum Luciferi fuit amor inordinatus sui ipsius, à quo cæpit primum edificium Ciuitatis Diaboli, Prob.



Prob. 2. ex Scot. loc. cit. Primus actus peccaminosus Luciferi non fuit aliqua nolitio, vt omnes fatentur, dum asserunt primum peccatum Angeli fuisse peccatum commissionis, & non omissionis; & est ratio, quia omnis nolitio præsупponit volitionem, vt tactum fuit supra, ergo primus actus peccaminosus fuit aliqua volitio; sed hæc volitio non fuit amor concupiscentiæ, nam hic præsупponit aliquem amorem amicitiae; ergo hæc volitio fuit aliquis amor amicitiae; subsumo alteram min. sed hic amor amicitiae non tendebat in Deum, vt obiectum, alioquin non fuisset peccaminosus, neque tendebat in proximum, quia inclinatio naturalis primò est ad se; ergo fuit amor amicitiae sui ipsius inordinatus, seu Philautia, seu quædam luxuria spiritualis reducibilis ad peccatum luxuriæ, & non superbiæ.

Prob. 3. quo ad eandem primam partem. Illud est primum peccatum, quod est propius naturæ, & quod in ea, quasi radicem habet, sed nihil est propius naturæ, quam se amare. sibi complacere, se fouere, in se delectari: Vnde Apost. vitia hominum enumerans primum posuit. *Erunt homines amantes semetipsos*, ergo primum peccatum in Angelis fuit amor sui.

Prob. 4. Quæ sunt absoluta præcedunt ea, quæ referuntur ad alios; sed amor sui est quid absolutum, superbia est quid relatiuum ad alios, ergo posterior est superbia, quam amor sui. Paret quia prius est se nosse, ac magni æstimare, quam referre hanc æstimationem sui ad alios, ac ijs velle præferri.

Prob. conc. quoad 2. part. Etenim, etsi istum amorem inordinatum, quo Lucifer primo peccauit, habuerit primò in ordine ad se ipsum, ac proindè vt talis dici nequeat superbia, quæ est appetentia excellentiæ super alios, tamen Lucifer habendo talem amorem inordinatum erga se ipsum; statim se se extulit super alias creaturas intellectuales ambiendo earum supremum dominium, ac æqualitatem Dei, vt dicemus in sequenti quæstione, ergo radicaliter, & concomitanter tantum, talis amor inordinatus nuncupari potest superbia.

Arg. 1. contra 1. part. conc. Sic S. Scrip. & SS. Patres aperte docent primum Luciferi peccatum fuisse superbiam;

biam; ergo non fuit amor inordinatus, seu luxuria spiritualis. Prob. ant. In Eccl. cap. 10. dicitur; *Initium omnis peccati est superbia*; & in Tobia cap. *In superbia impietate initium omnis perditio*; & ex Patribus signanter D. Athan. in tract. de Virg. ait: *Superbia ipsum in inferiores abissi partes precipitant*, ergo &c.

Resp. neg. ant. Ad prob. explicatur ant. S. Scrip. & SS. Patres solum volunt, quod superbia, propriè dicta sit peccatum principale, propter quod Lucifer fuit damnatus, estò ordine perpetrationis non sit primum; non tamen excludunt amorem inordinatum. Vel dicitur, quod loquuntur de superbia radicali, ex qua ortum duxit etiam superbia propriè dicta.

Arg. 2. Ille amor inordinatus Angeli non fuit sine aliqua relatione præcellentie ad alios, nam vel eo amavit se, æqualem se faciendo ipsi Deo; vel amavit se ambiendo prælationem super omnes creaturas rationales: sed quocumque modo explicetur ille amor inordinatus, semper est formaliter superbia, quia est cum relatione ad alium; ergo primum peccatum Angeli fuit superbia.

Resp. neg. mai. nam ille amor inordinatus Luciferi in hoc consistebat, quod seipsum amauerit plus æquo contra regulam Diuinæ legis, & charitatis, æstimando suam perfectionem, tanquam sublimem, & sibi sufficientem, adèd vt in ea constitueret suum vltimum finem, absque vlla relatione expressa ad Deum, aut ad alias creaturas, quibus præferri vellet.

Arg. 3. Potest quis complacere de intrinsecis suis perfectionibus absque peccato, quia peccatum habet pro obiecto malum; sed istæ perfectiones non sunt malæ, ergo in Lucifero complacentia, seu amor sui non fuit peccatum, ac proindè non peccauit primo amando se inordinato amore. Resp. dist. mai. Potest quis complacere inordinatè, & ordinatè sine peccato de perfectionibus intrinsecis, conc. mai. inordinatè, & immoderatè contra legem Diuinam, sine peccato, neg. mai. Nam vt dicit D. Aug. lib. 83. q. 30. *Maxima perversitas est frui utendis, & uti fruendis*. Itaque Lucifer complacuit sibi in suis naturalibus dotibus inordinatè, & cum excessu, ponendo in suo decore vltimum finem, quod est frui utendis,

Arg. 4. Auctorit. D. Ioannis in sua epist. *Omne, quod est in mundo, aut est concupiscentia carnis, aut concupiscentia oculorum, aut superbia vitæ*; sed Angeli non peccauerunt concupiscentia oculorum, nec concupiscentia carnis; ergo peccauerunt superbia vitæ, ac proindè primum peccatum fuit superbia. Resp. D. Ioannem loqui de hominibus mundi, & ideo dicit in mundo, quare sub isto ternario non comprehenduntur Angeli. Ni velimus dicere cum aliquibus, Angelos peccare potuisse etiam concupiscentia carnis, & oculorum, non quidem in se ipsis, sed optando homines sensualiter peccare. Vel dicimus, peccatum Angeli, nempe amorem inordinatum sui ipsius reduci posse ad concupiscentiam oculorum; Oculo namque sui intellectus perspicacissimo inspiciendo suam nobilitatem, & pulchritudinem sibi nimis inordinatè complacuit oculo altero, nempe voluntatis, quæ saltem in propriè dici potest oculus, quatenus suo amore propendit in obiectum, sicut oculus sua visua tendit in obiectum.

## QVÆSTIO VI.

*Vtrum Angelus reuerà peccauerit appetendo æqualitatem Dei.*

**N**ot. 1. ex Scot. in d. 9. q. 1. Quòd duplex est volitio. Simplex scilicet, & sub conditione, vel sub alijs terminis; alia efficax, alia inefficax. Prima est illa, quæ eligit media conducentia ad finem volitum, & hoc modo infirmus sumit medicinam ad sanitatem recuperandam. Secunda est volitio complacentiæ tantum, & hæc potest esse etiam rei impossibilis, vt tradit Arist. in 3. ethi. quæ quidem complacentia sufficit ad meritum, aut demeritum; quia licet volitum sit impossibile, attamen potest voluntas ei consentire pleno consensu.

Not. 2. quod in hac quæstione sunt duæ opiniones. Prima Thomistarum, & aliorum dicentium, Angelum non potuisse appetere æqualitatem Dei per æquiparantiam, hoc est, esse similem Deo in natura; quia naturali cognitione nouit hoc fuisse impossibile, sed per similitudinem tantum, quæ in hoc consistit, vt docet S. Thomas,

prima parte q. 63. art. 3. quod Angelus appetijt esse similis Deo, quia appetijt vt finem vltimum beatitudinis id, ad quod virtute suæ naturæ poterat peruenire, auertens suum appetitum à beatitudine supernaturali, quæ est ex gratia Dei, & deindè subdit ipse D. Thomas hanc aliam explicationem: Vel si appetijt, vt vltimum finem illam Dei similitudinem, quæ datur ex gratia, voluit hoc habere per virtutem suæ naturæ, non ex Diuino auxilio secundum Dei dispositionem. Secunda opinio est Scoti in 2. d. 6. q. 1. loc. cit. & Scotistarum, nec non aliorum extra nostram Scholam, asserentium, Angelum potuisse appetere æqualitatem Dei per æquiparantiam in natura Diuina; immò doctissimus Macedo ostendit de mente Scoti, Angelum de facto appetijisse esse Deum de quo infra redibit sermo.

Conclusio. Angelus potuit appetere æqualitatem Dei per æquiparantiam, voluntate inefficaci, seu conditionata; immò probabile est de facto peccasse appetendo esse æqualem Deo. Est Scoti loc. cit. Prob. pimò nostra concl. quoad primam partem auct. Sac. Scrip. & præsertim Isaia cap. 14. *In Cælum conscendam* (loquitur in Persona Luciferi) *Super astra cæli exaltabo solium meum, similis ero Altissimo &c.* & Ezech. cap. 28. *Elevatum est cor tuum, & dixisti Deus ego sum, & in cathedra Dei sedi.* Quæ quidem verba absquè dubio spirant arrogantiam Luciferi anhelantis æqualitatem Dei; ideoque Michael Angelus contra Draconem præliando exprobauit tantam eius temeritatem, dicens: *Quis ut Deus,* At ly, quis, substantiam sonat, & non similitudinem in beatitudine, vt Thomistæ opinantur; & deducitur ex ijs, quæ scripsit D. Paul. ad Philip. de Christo æquali Patri æterno secundum Diuinitatem. *Non rapinam arbitratus est, esse se æqualem Deo.*

Quare meritò in hoc sensu præfatæ scripturæ intelliguntur à S. Greg. Nazian. dicente in quodam carmine de Lucifero. *Dùm Deus esse cupit, tota caligine totus obrutus est;* à S. Greg. Mag. à D. Ioan. Chrysost. & à Magistro sent. qui in 2. d. cit. sic habet. *Lucifer postquam creatus est eminentiam naturæ & profunditatem scientiæ suæ perpendens in suum Creatorem superbiuit in tantum, quod etiam Deo se æquare voluit, ut in Isaia: In cælum conscendam &c. Similis quidem esse voluit, non per imitationem, sed per æqualitatem potentia; ergo &c.*

Prob. 3. Potest dari in homine odium Dei, vel in Angelo malo; vt in psal. *Superbia eorum, qui te oderunt, ascendit semper*: sed in odio Dei includitur quod est prorsus impossibile, hoc est non esse Dei; nam qui Deum odit, Dei destructionem intendit, ac proinde Deum non esse; ergo qui potest appetere Deum non esse, potest etiam appetere loco illius Deum esse. Bonum enim apprehensum mouet quocumquẽ modo sumatur, siuẽ vt possibile, siuẽ vt impossibile, quia semper repræsentat vt bonum, & considerantem delectat. Prob. 4. Ex desiderio obiecti impossibilis potest oriri, imò & sæpè oritur delectatio culpabilis: sed in hac est peccatum independenter à possibilitate, vel impossibilitate illius; ergo licet illa æqualitas sit impossibilis, non est impossibilis complacentia, & delectatio de illa, ac si esset possibilis: Sit exemplum de muliere desiderante esse Papam. Quis enim prohibet infimæ mulierculæ desiderare talem dignitatem, & de ipsa sibi complacere, ac si esset possibilis? & vltèrius progrediendo contra Deum obmurmurare, quod ob legem à Deo conditam non sit ei possibile ad tantam dignitatem ascendere.

Prob. tandem ad hominem. Non erat satis ad cupiditatem luciferi satiandam similitudo illa à Thomistis assignata beatitudinis ex principijs naturæ viribus obtinendæ; ergo appetiuit aliquid maius, idest diuinitatem. Ant. prob. Quia lucifer desiderauit aliquid sibi proprium, & non commune cum alijs, sed illa beatitudo erat alijs communis, ergo optauit aliquid proprium, hoc est, dominari, & præesse more diuino, quod suadetur ex principatu, quod gerit apud inferos. Vndè in Euangelio dicitur: *Princeps huius Mundi*. &c. ergo &c. Cæterum quod de facto Angelus peccauerit appetendo Diuinam naturam patet ex S. Scrip. & SS. Patribus allatis supra, nam aperte indicant, luciferum voluisse esse Deum. Ego sum vt Deus. Quare Scotus sic concludit. Incæpit malitia Dæmonis ab immoderato amore sui, quatenus non erat maximum peccatum, & consumabatur in odio Dei, nolendo esse Deum, quod est maximum peccatum &c.

Arg. 1. contra conc. Angelum esse æqualem Deo dicit contradictionem, ergo non habet rationem entis, & per consequens nec rationem bonitatis, ac proinde appetibilis.

lis. Resp. disting. conf. Quoad complexionem extremorum conc. conf. quoad extrema complexionis, neg. conf. licet enim complexio sit quid chimericum, non tamen est quid chimericum æqualitas ipsa Dei, sed reuera est summum, & infinitum bonum, & per consequens appetibile saltem voluntate conditionata, & complacentiæ.

Contra. Talis æqualitas Diuina in Angelo est prorsus impossibilis; ergo non est obiectum appetibile. Resp. disting. ant. est prorsus impossibilis, quoad assecutionem, conc. quoad appetibilitatem, & complacentiam, nego: potest namque quis amare, & delectari etiam de eo, quod est impossibile, & maximè sub conditione, si esset possibile.

Contra. Ista conditio non efficit, quod impossibile transeat ad statum possibilitatis, quia nihil talis conditio ponit in esse, ergo &c. Resp. disting. ant. In re, conc. ant. In esse obiectiuo, seu apprehensiuo, neg. ant. Nam hoc modo apprehenditur impossibile, tanquam possibile.

Arg. 2. nemo potest appetere suum non esse, sed ex appetitione æqualitatis naturæ cum Deo sequitur appetitio proprii non esse, quia si creatura esset Deus, non posset esse creatura; ergo non potuit appetere Angelus æqualitatem Dei. Resp. disting. mai. Directè conc. Indirectè, neg. mai. Tunc enim Angelus appetendo æqualitatem Dei præscindebat à suo non esse, & amabat in se habere Diuinam naturam. Resp. 2. disting. mai. Nemo potest appetere suum non esse, simpliciter transeat mai. suum non esse quod quodammodo transit in esse perfectius, & nobilius, nego. Itaque Lucifer appetendo æqualitatem Dei, non sui destructionem appetebat, sed excellentiam sui esse, si possibile foret, non volitione efficaci, sed simplici affectu.

Contra. Voluntas, vt possit etiam simplici affectu appetere rem, velut sibi conuenientem, non sufficit absoluta comprehensio bonitatis rei in se, sed requiritur comparatiua notitia de bonitate, & conuenientia eiusdem in ordine ad se appetentem: at implicat, Angelum comparatiua notitia apprehendere Dei æqualitatem, vt sibi bonam, & conuenientem, quia sic appeteret directè suum non esse; ergo &c. Resp. neg. mai. Quia per conditionem appositam (si foret possibile) suspenditur impossibilitas, vel



impossibilitas, quæ est inter esse Dei, & Angeli, & sit sub tali hypothese vtrumque possibile; ac proinde aptum ad terminandum simplicem voluntatis affectum. Quare Angelus appetendo se esse Deum, apprehendebat etiam se permanere, quia ex vi conditionis appositæ obiectum sic apprehensum non est sui destructivum, sed perfectivum, & licet conditio non tollat à parte rei, tollit tamen impossibilitatem in intentione, & obiectivè. Nam conditio appositæ, vt tradunt Logici, suspendit impossibilitatem terminorum, & facit illos sub tali hypothese subsistere, vt si peccator diceret. Vellem non offendisse Deum, si esset possibile, quod sufficit etiam ad meritum. Vnde D. Aug. amore æstuans in Deum in hæc verba prorumpebat, vt refert noster Macedo tom. 2. Coll. in hac quæst. *Si ego Deus essem, ac tu non esses, mallem te Deum esse, quam me, translata enim in te Divinitate.*

Arg. ultimo. Si Angelus huiusmodi peccatum commisit, vel hoc fecit ex ignorantia, vel ex passione; vel ex electione: sed nullo ex his modis, ergo &c. Assumptum prob. per partes. Non ex ignorantia, cum enim ista sit pœna, Angelus ante culpam eam habere non poterat. Non ex passione; quia in ea integritate nulla erat causa illius; neque ex electione, quia non datur electio respectu impossibilium ergo &c. Resp. Angelum peccasse ex ignorantia negatiua, ex passione, sumpta passione pro amore inordinato, & ex electione pro volitione deliberata, & plena consequente plenam apprehensionem intellectus; non verò pro electione, quæ dicitur volitio mediorum ad finem assequendum, quæ quidem electio sequitur conclusionem syllogismi practici, & in hoc sensu sumitur ab Arist. in 3. Eth.

Dices. Impossibile nequit amari, ergo &c. Resp. disting. ant. In ordine ad assecutionem conc. ant. in ordine ad amorem, & simplicem complacentiam, neg. ant.



## QVÆSTIO VII.

*Vtrum Angeli mali sint in malo obstinati, & unde  
proueniat talis obstinatio.*

**N**ot. 1. Quodd variæ sunt opiniones Doctorum circa præsentem quæstionem. Prima fuit Origenis, quam refert D. Thom. 1. part. q. 64. art. 2. asserentis omnem voluntatem creatam tam Beatorum, quam damnatorum esse flexibilem in bonum, siue malum, excepta tamen voluntate Christi; quæ quidem opinio est hæretica. Secunda est D. Thom. loc. cit. qui, assignata obstinatione Angelorum malorum, docet causam talis obstinationis esse immobilitatem, & inflexibilitatem voluntatis eorum circa actum, quem voluntariè, & determinatè semel elicuerunt. Hæc enim, inquit D. Thomas, est natura Angelorum, ut ubi semel vni parti determinatè adhæserunt, non possunt in alteram flecti; à qua sententia non longe abest Henric. Gand. quol. 8. q. 11. affirmans, idè Angelum esse immutabilem ab actu, quem semel elicuit, quia voluntas separata ita profundè immergit se obiecto, ut ab eo remoueri nequeat. Tertia est Aureoli asserentis, hanc obstinationem prouenire ab habitu quodam vitioso, quem Deus producit in voluntate damnatorum in pœnam suorum delictorum, ratione cuius nullum bonum opus facere valent. Quarta est Ocham in 2. d. 9. contendentis obstinationem illam oriri ex eo, quod aliquis actus in Angelo damnato admittatur, qui non est in eius potestate. Vnde infert, quod Deus totaliter, & immediatè causet aliquem actum in voluntate Angeli mali. Vltima deniquè est Doct. Subtilis in 2. dist. 7. q. 1. docentis obstinationem Dæmonum, & aliorum damnatorum prouenire ex denegatione diuini auxiliij ad resipiscendum, & ex peruersa damnatorum voluntate, ex qua sequitur quædam praua affectio, & consequenter quædam immobilitas in malo.

Not. 11. pro maiori intelligentia nostræ sententiæ, quodd ultra bonitatem naturalem volitionis, quæ sibi competit ratione suæ entitatis, datur triplex bonitas moralis: Prima est bonitas ex genere, quæ competit volitioni ex eo, quod transit super obiectum sibi conueniens secundum di-

tamen rectæ rationis, & dicitur bonitas ex genere; quia habet aliquid de genere moris, & est potentialis, ac contrahibilis per quamcumquē aliam circumstantiam moralem. Secunda est bonitas virtuosa, seu ex circumstantia, & competit volitioni, quæ elicitur cum omnibus circumstantijs debitis secundum rectam rationem. Tertia est bonitas meritoria, siuē gratuita, quæ conuenit actui, ex eo quod præsupposita duplici bonitate iam dicta, elicitur secundum inclinationem charitatis, vel gratiæ.

Not. 3. Quod huic triplici bonitati opponitur triplex malitia. Prima est malitia ex genere, quando scilicet actus transit super obiectum disconueniens, vt odire Deum. Secunda est malitia, quæ provenit ex aliqua circumstantia deturpante, & deordinante actum, licet transeat super obiectum conueniens, vt amare Deum ob malum finem. Tertia est malitia demeritoria, & est quando actus est contra legem Diuinam. Quælibet istarum autem malitiarum potest accipi contrariè, & priuatiuè respectu suæ bonitatis. Tunc verò priuatiuè accipitur, quando priuat tantum ipsam bonitatem, & tunc accipitur contrariè, quando ponit ultra carentiam bonitatis aliquid positium repugnans tali bonitati. Quarè malitia ex genere contrariè accepta, & priuatiuè in primo membro diuisionis conuertuntur; vnde sicut inter priuationem, & habitum non est medium respectu subiecti susceptibilis, ita bonum ex genere, & malum ex genere sunt contraria immediata, eò quia actus necessariò debet transire super obiectum, quod necessariò est, vel conueniens, vel disconueniens. In secundo verò membro malitia priuatiuè accepta, & contrariè non conuertuntur; potest enim aliquis actus carere aliqua circumstantia debita; & tamen non elicitus circumstantia repugnanti, quæ redderet actum vitiosum, puta. si quis det elemosinam non propter Deum, quia non considerat, nec tamen intendit aliquem finem indebitum. In tertio etiam membro potest esse actus malus priuatiuè, ita quod non eliciatur ex gratia, & tamen non erit demeritorius, sed erit bonus in genere moris; & sic in 2. & 3. membro potest esse actus indifferens, qui est si sit malus priuatiuè; non tamen est malus contrariè.

I. Concl. Voluntas Dæmonum, & aliorum damnatorum

rum ita est in malo obstinata, ut nunquam ad statum iustitiae, & gratiae redire valeant. Hæc est de fide definita in quinta Synodo, & in 6. actione; & in Concil. Lateran. sub Innoc. III. cap. firmiter; ubi decernitur de reprobis, quod cum Diabolo poenam æternam recipiant. Eandem veritatem tradunt Sancti Patres, nec non Theologi, & signanter D. Bonau. in 2. d. 7. art. 1. q. 1. ex S. Damasc. lib. 2. de fide cap. 4. ubi ait. *Quod est Angelis casus, hoc est hominibus mors*; sed homo post mortem nequit recuperare bonam voluntatem, & rectam, quam amisit in vita, ergo neque Angelus malus.

II. Concl. Ratio formalis, ob quam Dæmones, & damnati non possunt resipiscere non est inflexibilitas, vel immobilitas voluntatis eorum, nec ullus habitus vitiosus causatus à Deo in voluntate necessitans ad malum; neque actus à Deo immediatè productus in voluntate damnatorum. Hæc est contra opiniones superius recensitas. Prob. quoad primam partem auct. D. Damasceni lib. 2. de fide cap. 3. docentis, *Angelum esse sententia ratione mutabilem, & secundum propositum vertibilem*; ergo &c.

Prob. ratione voluntas Angelorum post factam semel electionem mali non redditur naturaliter inflexibilis ad bonum; ergo ex hac ratione in Angelis non est admittenda obstinatio; Prob. ant. Voluntas ex sui natura libera non amittit, sed semper retinet suam naturalem libertatem respectu sui actu eliciti, quantum est ex vi potentiae, & actus; neque per illius positionem amittit potestatem circa illum; cum semper sit prior natura illo, & causa illius in conseruando, ergo per actum, quem liberè elicit, nō redditur inflexibilis, nec impotens ad cessandum ab eo.

Prob. 2. specialiter contra opinionem Thomistarum refutando eorum fundamenta sic ex Scoto. Ideò voluntas Angelica foret immobilis in actu, quem semel elicit quia nimirum appetitus eius proportionari debet potentiae cognitiuæ, sed potentia intellectiua Angeli apprehendit immobiliter, & sine discursu omne obiectum, at hoc fundamentum est falsum, ergo & id, quod infertur ex ipso. Mai. est Thomistarum. Prob. min. à Scoto sic. Primò quidem, quia falsum supponunt, quod intellectus sit sufficiens motor voluntatis; non enim potest aliter intelle-

ctus mouere voluntatem ad actum, nisi quatenus proponit ei obiectum sub ratione boni, & mali, aut quatenus ad illam propensionem sequitur imperium aliquod practicum determinans voluntatem ad prosecutionem boni, vel ad fugam mali, sed antè primum peccatum proponebat voluntati obiecta illa, circa quæ operabatur sub ratione boni delectabilis, & mali inhonesti; nec sequebatur aliquod imperium potius in ordine ad prosecutionem boni delectabilis, quam ad fugam mali inhonesti; alioquin omnes Angeli determinarentur ad malè agendum, quia æqualiter omnibus proponebat intellectus huiusmodi obiecta sub talibus rationibus, & similia iudicia practica in omnibus sequebantur, ergo intellectus non est sufficiens motor voluntatis, adeò vt eam determinet necessariò ad bonum, vel ad malum.

Conf. Angelus malus in primo instanti habuit gratiam, ergo in illo instanti benè operatus est; ergo si sit immobilis, vt volunt Thomistæ, debuit semper perseuerare in operatione bona. Prob. prima conf. quia si in primo instanti non haberet operationem bonam, idest amorem Dei super omnia, peccaret mortaliter, maximè in sententia Thomistarum asserentium, Creaturam rationalem teneri ad amandum Deum super omnia in primo instanti vsus rationis, sed in illo primo instanti non habuit Angelus malus peccatum mortale, quia tunc erat ornatus gratia santificante, ergo habuit amorem Dei, ac proinde si voluntas Angeli in prima electione est immobilis, [necessariò semper benè debuit operari, hoc autem consequens est falsum, ergo & ant: idest voluntatem ex sui natura non esse vertibilem. Nec valet responsio Thomist. & signanter Gonet, dicentis, rationes superiùs allatas militare contra electionem ab Angelo factam, & regulatam per iudicium incompletum, & imperfectum, non autem de electione præsupponente iudicium perfectum, & completum, quam distinctionem putat esse sufficientem, vt ipse testatur in suo Compendio Theologico tract. 7. de Angelis ad soluenda omnia, quæ possunt obijci contra suam sententiam. Et sic soluit illam de Dæmone non certò cognoscente Christum, & subdit, Angelos quoquè, qui peccauerunt, mutasse priorem voluntatem, in qua creati sunt,

sunt, quia ille primus actus fuit à speciali Dei motione, & applicatione; ac proinde iudicium illud, & electio ipsum consequens non fuerunt plenè libera, sed libera solum quoad exercitium, & necessaria quoad specificationem.

Non valet inquam hæc responsio. Etenim electio, siue præsupponat iudicium perfectum, & completum, siue imperfectum, semper est in perfecta libertate quoad potentiam, aded ut voluntas quæcumque creata possit elicere volitionem, vel nolitionem, vel vtriusque suspensionem, cum iudicium perfectum non compleat libertatem voluntatis, neque in eliciendo suum actum ei cooperetur. Itaque nostræ rationes manent in suo robore. Cæterum dum opinatur, primum actum habitum ab Angelo in illo primo instanti, non esse totaliter à voluntate, sed à speciali Dei motione, ac proinde non esse plenè liberum non rectè opinatur, ut supra ostensum fuit.

Prob. 2. pars conc. Deus nequit creaturæ infundere actum intrinsicè malum, vel habitum ad illum inclinantem, qualis esset ille actus, vel habitus odij Dei, alias sequeretur, quod Deus esset auctor peccati, quod est impium dicere; ergo obstinatio Angeli non habet radicem in aliquo actu, vel habitu vitioso à Deo ei infuso.

Præterea dedecet Deum infundere creaturæ sui ipsius odium, sicut repugnat, Deum infundere alicui actum peccaminosum; ergo assignanda est alia causa obstinationis Angeli mali in malo, quæ non faciat redundare vllum defectum in Deum.

III. Concl. Radix, & causa obstinationis Angelorum damnatorum præcisè, & formaliter est denegatio Diuini auxilij necessarij ad respiscendum, ex qua sequitur praua affectio voluntatis eorum; qua unusquisque damnatorum immobiliter adhæret fini peruerso, & sic obstinatio prouenit partim à voluntate, partim à denegata gratia, non diuisim, sed coniunctim. Prob. conc. ex discursu, quem habet Scorus loc. cit. Si enim illa obstinatio voluntatis malæ sit à Deo, inquit Scorus, ergo ista malitia erit à Deo, & sic Deus est causa peccati; si autem, & à voluntate, videtur, quod ipsa possit ex se resilire ab ea, sicut ipsa potuit ex se illud male velle. Quæ enim virtute mouet se ad aliquid,



quid, eadem quiescit in illo, & æqualiter potest se retrahere ab illo, & mouere in aliud magis inclinans, quale est oppositum illud, ergo necessum est, vt ab vtroque illa proueniat, Hec Scotus.

Prob. 2. Nam SS. Patres assignant carentiam Diuinæ gratiæ denegatæ ratione status damnationis pro causa obstinationis Angelorum malorum, & præsertim D. Damasc. lib. 2. de fide cap. 18. dicens. *Angelos scđo esse incapaces penitentia, & consequenter recessus ab obstinatione, quia carent gratia necessaria ad debitum modum penitendi*: & D. Greg. lib. 2. moral. cap. 3. ait: *Deus apostatam Angelum nunquam ad penitentiam vocat*: idem docet etiam D. Fulgent. lib. de fide ad Petrum cap. 3. ergo obstinatio malorum Angelorum ortum habet tanquam à radice à carentia gratiæ denegatæ ratione status damnationis.

Arg. 1. contra 3. conc. auct. D. Dyonis. dicentis in lib. 4. de Diuinis nominibus, in Dæmonibus manere naturalia integra, ac proindè liberum arbitrium integrum, ergo non necessariò sunt in malo obstinati. Resp. conc. auctorit. D. Dyonis. non tamen liberum arbitrium Angeli mali sufficit ad recedendum à malo, sed requiritur gratia Dei.

Arg. 2. Intellectus Dæmonis aliquod verum intelligere potest, ergo & voluntas eius potest aliquod bonum velle. Paritas currit, quia sicut nullus intellectus est ita auersus, quin possit intelligere aliquod verum, maxime prima principia; ita nulla voluntas est adeò auersa ab vltimo fine, quin possit illum velle: pat. conf. Quia dicit Arist. 3. Eth. Omnis malus ignorans; ergo non potest esse malitia in voluntate, nisi si error in intellectu voluntatem regulante.

Resp. neg. paritatem. Ratio est, quia intellectus cogi potest ad assentiendum propter euidentem veritatem; at voluntas cogi nequit à bonitate finis, seu obiecti. Ad illud Arist. dicimus intelligendum esse de ignorantia approbationis, quatenus non approbat bonum, dum sequitur malum, non verò de ignorantia propriè dicta.

Arg. 3. Nullum violentum est perpetuum, sed obstinatio Angeli mali in malo est quid violentum, ergo &c. Prob. min. auctoritate D. Damasc. dicentis: *malitiam esse contra naturam*, ergo non necessariò, nec perpetuò conuenit alicui naturæ intellectuali. Resp. maxima assumpta in mai-

valet in naturalibus, non autem in causis partim naturalibus, partim liberis, & ratio est dicit Scotus, quia in agentibus merè naturalibus, cessantibus impediementis, redditur ad dispositionem naturalem, non prohibente actione violenta; non sic verò se habet voluntas damnati, quæ cum sit in termino secundum legem ordinariam, nequit se sola cessare à malo. Ad prob. respondet Scotus, peccatum esse contra inclinationem naturæ idest contra illum actum, qui natus est elici conformiter inclinationi naturali, non tamen contrariatur ipsi voluntati.

Arg. 4. Si Dæmones, & damnati necessariò velint malum, sequitur, quod semper sint in actu malè volendi; sed hoc videtur absurdum, quia in infinitum augeretur malitia, & consequenter semper cresceret pœna, adeò vt sicut numquàm erunt in termino malitiæ, sic numquàm habebunt terminum pœnæ.

Conf. Si posset augeri pœna, & malitia semper in damnatis, similiter posset augeri bonitas, & præmium in beatis: sed consequens est absurdum, sequeretur enim, quod beati numquàm forent in termino beatitudinis; ergo &c.

Resp. Scotus s. ad aliud dico. Quod habitu existente perfecto, vel in summo, quantum potest perfici in tali subiecto, vel secundum terminum sibi præfixum à Sapientia Diuina, omnes actus sequentes nihil augent, sed tantum procedunt ex habitu iam generato: quemadmodum actus Angeli boni non augent habitum charitatis eius, nec effectiue, nec meritorie, quia illa est in termino, vel secundum naturam habitus, vel secundum capacitatem subiecti, vel saltem secundum terminum sibi præfixum à Deo; sed omnes illi actus procedunt ex plenitudine illius habitus sic perfecti; ita in proposito perfectio istius habitus est in termino secundum regulam Diuinæ sapientiæ, quæ non permittit, eos crescere in malitia intensiua, & ideo actus sequentes tantum se habent, sicut effectus habitus mali, & non sicut causæ agentes.

Per idem ad illud de pœna; quia sicut præmium substantiale in primo instanti, in quo Angelus aliquis est beatus, est determinatum; neque ex tunc crescit, quia actus boni, qui sequuntur, non sunt meritorij, licet sint boni; ita etiam in Angelo damnato, in primo instanti suæ

dam-

damnationis determinatur ad certam pœnam, quæ non crescit intensiue, nec tamen erunt mali actus eius, quos elicit, impuniti, sicut nec boni Angeli boni actus erunt irremunerati: Illi quidem boni actus includuntur in primo actu, quia procedunt ex perfectione actus beatifici, sed quantum ad accidentale præmium, quod possunt habere quilibet actus est sibi præmium; ita etiam isti actus mali, quos elicit damnatus includuntur in prima pœna, sibi certitudinaliter determinata, & quilibet, sicut posset habere pœnam accidentalem, & propriam, habet seipsum pro pœna. *Iussisti Domine*, inquit D. Aug. lib. confess. & c. *ut sis sibi pœna omnis peccator*. Potissima enim, & maxima pœna est priuatio maximi boni, qualis est formaliter in actu malo malitia culpæ peccatorem auertens à Deo: Crescit ergo pœna eorum in infinitum extensiue, sicut & malitia, & neutrum intensiue.

Et si obiecias, quia secundum malum est actus demeritorius, ergo correspondet sibi propria pœna. Resp. etsi concedi posset esse culpa, non tamen propriè demeritoria, quia non elicitur à viatore, cuius solius est mereri, & demereri; qui magis propriè potest dici esse actus damnatorius, siue damnati; sicut ex alia parte actus Beati, licet sit acceptabilis Deo, non tamen propriè est meritorius, sed magis actus beatificus, vel Beati, vel ex beatitudine procedens. Hæc Scotus.

Arg. ult. Deus cum sit causa vniuersalis, & prima nequit de potentia ordinaria denegare concursum causis secundis quoad effectus naturales, & ut Auctor gratiæ causis liberis auxilia sufficientia ad benè agendum; ac proinde tenetur concurrere cum damnatis, tam quoad actus naturales, quàm quoad actus bonos; ergo voluntas damnatorum non necessariò est in malo obstinata, siue sit Angelica, siue humana.

Resp. conc. primam partem ant. & neg. secundam partem, nempe tenetur concurrere cum damnatis &c. de lege ordinaria; nam lex ordinaria Diuinæ Sapientiæ quantum ad creaturam rationalem beatificandam, & puniendam decernit, non dare auxilia ijs, qui sunt in termino, ut pat. ex S. Scrip. & præferrim Eccles. cap. 11. *Ubi cumquæ considerat legem, sibi erit*, idest in quacumquæ voluntate ho-

mo, seu Angelus decesserit in illa permanebit, Isaia cap. 66. *Ignis eorum non extinguitur, & uermis eorum non morietur;* & Matt. cap. 25. *Ebunt ibi in supplicium aeternum iusti autem in vitam aeternam,* ex quibus regulis S. Scrip. Scot. in 2. d. 7. q. 1. §. ad propositum ergo applicando, concludit cum D. Aug. lib. 21. de Ciuit. Dei cap. 23. & 24. quod certum est, Deum nunquam daturum eis gratiam: secundum hoc ergo est impossibile, eos bene velle, quia impossibile est Deo de potentia ordinaria eis gratiam dare, & alia auxilia iuxta leges præfixas.

Quæres pro complemento quæstionis. An Angeli mali, & alij damnati possint velle aliquod bonum morale.


Resp. Scot. in Report. lib. 2. d. 7. q. 3. §. ad 3. quæst. vers. Vel sustinendo. Quod Angelus non potest habere actum perfectum bonum moraliter circa quodcumque obiectum, quod, ex quo habet actum malum circa illud obiectum, respectu cuius remanet in actu deformi elicito continûe, non potest habere actum contrarium circa idem. Sequendo secundam ait. Secundò dico secundum opinionem, quæ ponit, quod Angelus non remanet continûe in peccato in actu elicito deformi, sed tantum habitualiter, & actu in reatu; dico tunc, quod Angelus malus potest habere bonum velle ex genere, vt diligere se, & vltra actum bonum completè, & formalitèr secundum omnes circumstantias, quas ratio dictat. Quod probat iisdem rationibus; quibus id probauerat in scriptis Oxionens. censet tamen Doctor primam illam viam esse probabiliorè. Verùm de facto, ait esse probabile, quod secundum hanc potentiam non exeat in actum propter vehementem malitiam. Ità perspicuè in 2. d. 2. q. vn. Scriptò Oxionensi.

Itaque de mente Scoti breuiter responderi potest cum distinctione. Si loquamur de potestate physica, & remota morali, negari nequit in Dæmone illam reperiri, cum in ijs manserit natura, & quæ concomitantur, & sequuntur naturam. Datur ergo in Angelo intellectus, voluntas libera, quæ est radix, & principium moralitatis, ac proinde manet principium cum sua potestate radicali ad operandum bonum. Si autem loquamur de potentia proxima, & expedita, dicendum, quod Dæmones propter difficultates ortas ex statu damnationis, moraliter loquendo,

do, non videntur posse exercere actus bonos: hoc tamen non est non posse, sed difficile posse, cum qua difficultate stat simpliciter posse.

Dicerent Thomistæ oppositum tenentes, contra nostram sententiam. Si qui actus bonus posset dari in Dæmonibus esset naturalis, quo e. g. aut cognoscunt Deum, aut credunt, aut dolent de pænis suis, aut compatiuntur alijs; sed his admissis nihil honesti, & boni agit, ergo non potest benè agere moraliter nisi in genere. Min. prob. Quia illi actus, & si natura sua non sint inordinati, imò naturales, & indifferentes ex specie, tamen in individuo in genere moris nequeunt esse boni, imò mali esse debent, quia carent recto fine, etiam virtuali; quod patet; quia illa auersio à fine ultimo imbibitur in omnibus operationibus Dæmonis, ac proinde omnes praua intentione deturpantur.

Resp. conc. mai. & neg. min. cum sua prob. Eò quia illi actus boni, vel indifferentes ex obiecto possunt, & esse, & reddi boni per directionem mediatam ad vltimum finem per intentionem finium particularium, qui cum honesti sint, & virtuosè virtualiter tendunt ad vltimum finem, ad quem spectat, & à quo emanat omnis bonitas, & honestas. Quare rectè inferitur, quod ad hoc vt actus moralis sit bonus non requiritur intentio bona positua formalis, nec intentio vltimi finis, nec relatio ad ipsum, sed satis est ad finem honestum proximum, qui reducat ad finem vltimum virtualiter, talis est compassio quædam, & commiseratio naturalis &c. naturaliter orta ex tormento. Quod posset comprobari parabula Epulonis commiserantis suos fratres, ne in illum locum tormentorum irent: quæ vtuntur Scotus, & Scotistæ; vnde sic ad P. Abraham exclamabat. *Rego ergo te Pater, vt mittas Lazarum in domum Patris mei; habeo enim quinque fratres vt testetur illis, ne & ipsi veniant in hunc locum tormentorum;* Luc. cap. 16. & pro hac responsione faciunt ea, quæ habentur in disp. 4. q. 9. de actibus humanis.



*Quomodo Angeli mali ab igne infernali cruciuntur.*

**N**OT. I. Quòd duplex est damnatorum pœna; nempe pœna damni, & sensus. Prima consistit in perpetua carentia visionis beatificæ, & in expoliatione omnium donorum gratuitorum, idest gratiæ sanctificantis, gratiæ, quæ datur per modum auxilij, & aliorum donorum supernaturalium, & dicitur pœna damni, quia damnum irreparabile infert creaturæ damnatæ. Secunda consistit in afflictione causata ex præsentia obiecti disconuenientis, idest ignis infernalis, vel alterius cruciantis creaturam damnatam; & dicitur pœna sensus, quia obiectum crucians in se est obiectum sensibile, & corporeum; tum quia consistit in inflictione mali positiui, quæ communiter vocatur pœna sensus, quatenus contradistinguitur à pœna damni, quæ est priuatiua. Vtraquæ pœna puniuntur spiritus damnati, estò sensu careant, vt tradunt vñanimi consensu Sancti Patres, & Theologi omnes.

Verum grauis difficultas est: quomodo ignis cum sit corporeus agat in spiritus, hinc quot capita, tot sententiæ. Quidam, vt Albert. Egidius, D. Bonau. D. Thom. & alij opinantur, Angelos cruciari per solam phantasiam, qua apprehendunt ignem, vel aliud genus tormenti, vt sibi disconueniens, & nocium. At hæc opinio videtur difficilis captu. Etenim, vt arguit Scot. in 4. d. 44. q. 2. ubi agit de Inferno. Vel illa apprehensio Angelorum malorum de igne, vt sibi disconuenienti est vera, vel falsa; si vera; oportet assignare modum illius disconuenientiæ, qui tamen assignari nequit; cum ignis de sui natura non sit offensiuus spiritus, ac proindè nec disconueniens: neque in ratione obiectiua, quia obiectum, vt obiectum, est potius conueniens potentiæ intellectiue. Quod si apprehensio sit falsa, sequitur, quòd non ab igne, sed à falsa apprehensione cruciuntur; quod est absurdum, *Quia sicut nullus falsa opinione est beatus, ita nullus est falsa opinione miser* ex D. August. Alij cum Henrico de Gand. putant, Deum imprimere in damnatis, quemdam habitum, seu quamdam qualitatem, qua mediante reddantur capaces ignei ardoris,



ris, vel alterius qualitatis tormentatiuæ. Verùm nec ista placet Scoto; ideoque contra eam insurgit; arguendo sic. Illa qualitas impressa Angelis damnatis, vel esset qualitas corporea, vel spiritualis; sed neutra est, ergo &c. Prob. min. Non enim est corporea, quia sicut qualitas corporea cruciatiua ignis nequit recipi in substantia spiritali, ita nec illa qualitas à Deo producta. Neque spiritualis; eo quia per illam passum, nempe Angelus non redditur magis proportionatum agenti corporeo, idest igni, quàm erat prius, ergo ista qualitas à Deo in damnatis impressa non esset corporea, neque spiritualis ac proinde nihil.

Alij, vt Suarez, Malonius, Arriaga, & quamplures Recentiores volunt, ignem infernalem torquere spiritus damnatos producendo in eis quandam qualitatem spirituale naturæ eorù repugnantem, seu sedantem eos, ex qua sedatione Angeli afficiuntur summa tristitia. At neque iste modus nouus speculandi subsistit; Tum quia ignis corporeus nequit à Deo eleuari, vt producat in Angelis huiusmodi qualitatem spirituale; alioquin, posset etiam oculus eleuari ad videndum spiritum, ac proinde Deum, quod improbatum fuit in tract. de vis. beatifica. Tum quia non apparet ex quo capite illa qualitas spiritualis potest esse repugnans Angelicæ substantiæ cum eam non destruat, vel corrumpat, sicut facit qualitas materialis dolorifica in sensu, & tanto minus, quomodo eam sedare possit; cum dotes naturales nequeat deturpare, neque dona vlla supernaturalia expellat; ea namque omnia ob primum peccatum amiserunt Angeli, ergo gratis dicitur, immò configitur talis qualitas; Quare missis, & confutatis aliorum opinionibus sit.

Conclusio ad mentem Scoti. Angeli damnati torquentur ab igne infernali per hoc, quod ad illum sint diuino decreto ita alligati, vt ab eo se se liberari nequeant, ex qua alligatione cognita, & nolita tristantur vehementer. Ita Scotus in 4. d. 44. q. 2. & est etiam D. Thomæ quoad primam partem. Verùm priusquàm ad probandam conclusionem deueniamus; Aduertendum ex Scoto loc. cit. vbi etiam agit de igne infernali, qui post diem Iudicij cruciaturus est homines malos in Anima, & in corpore; quod du-

duplex est immutatio corporis, vna realis, altera intentionalis. Realis immutatio dicitur quando terminatur ad formam realem, eo modo, quo forma realis distinguitur contra intentionalem; sicut albedo, vel calor dicitur forma realis; non autem species, vel intentio caloris, vel albedinis in medio, aut in organo. Intentionalis dicitur, quæ terminatur ad formam intentionalem, qualis est species rei sensibilis, vel actus sentiendi. Vnde ignis circa corpus sensitivum habet immutationem realem, cum ipsum realiter calefaciat, & immutationem intentionalem, cum immutat sensum, vel organum, vel totum coniunctum ex sensu, & organo ad speciem caloris, & ad sensationem, ad quam sequitur dolor. Differunt tamen istæ duæ immutationes, quia realis est semper uniuoca, intentionalis verò semper æquivoca. Secundò quia realis nunquam causat dolorem sine intentionali, vt patet in ligno calefacto, & intentionalis sine reali, vt patet, cum aliquis frequenter dolet super aliquo obiecto tristabili, & sibi disconuenienti. Cæterum pro maiori claritate nostræ sententiæ placet asserere huc discursum Scoti respondentis ad quæstionem. An spiritus maligni crucientur ab igne infernali.

Ad quæstionem dico, inquit Scotus, quod secundum August. de Ciuit. Dei lib. 14. cap. 15. dolor carnis tantummodò est offensio animæ ex carne, & quædam ab eius passione dissensio; sicut Animæ dolor, qui vocatur tristitia, est ab his rebus, quæ nobis nolentibus accidunt. Ex hoc apparet, quod dolor est passio consequens apprehensionem euentus alicuius obiecti noliti. Primum dolorem non oportet quærere in spiritibus, siue in Angelis, siue in Animabus separatis, sed secundum, qui est tristitia existens in voluntate ex apprehensione existentie obiecti disconuenientis secundum rationem; vel oportet ponere obiectum, quod statim ostendatur, vt disconueniens per rationem, & tamen positum. Vel si non potest statim ostendi, vt disconueniens, nisi à ratione errante, quia non esset disconueniens Michaeli, oportet inuenire ibi obiectum, disconueniens secundum rationem, & nolitum, & tamen positum. Dico autem quod ignis ille est obiectum sic disconueniens, & hoc dupliciter. Primò vt detinens spiri-

tum diffinitiuè: secundò vt immutans obiectiuè: De primo nullum corpus, vt locans est locatio disconueniens maximè spiritui. Vndè si Michael cuicumque corpori esset ex præcepto diuino coniunctus localiter diffinitiuè, etiam perpetuò, & hoc apprehenderet; nullo modo apprehenderet, vt disconueniens, nec vt materiam tristitiæ; ergo ad habendam tristitiam de igne detinente oportet, vt inueniatur primò ratio noliti: Sic Angelus malus habet nolle detineri perpetuò ab igne, & specialiter sub ista ratione ex sententia Diuina, vel voluntate Diuina illic effectiuè detinente, & ad istud nolle sequitur affectio commodi, secundum quam appetit liberum vsum potentia, propter quam nunquam vellet detineri. Promouet autem superbia, propter quam appetit vti propria potestate. Consumat inuidia, propter quam nunquam vellet detineri. Istud nolle præcedit detentio, & apprehensio detentionis. Isto autem nolle, licet inordinate posito in voluntate eius, sequitur apprehensio certa istius noliti euentus; & ex hoc tandem tristitia. Sed si quæras: an illam tristitiam effectiuè causet ignis detinens. Respondeo. Ignis non detinet spiritum effectiuè, sed solum formaliter, quia nihil præter Deum potest Angelum contra eius voluntatem alicubi detinere effectiuè, nisi esset Angelus superior. Ignis tamen effectiuè illum contristat, eo quod ipse odit, non solum, quod detineatur à Deo in igne, sed etiam formaliter detentionem ignis. Quare & ista ipsum contristat, & ex consequenti ipse ignis, cum sit obiectum tristabile; & sic cruciatur spiritus, quia maximè tristatur, & in hoc sensu diximus, ignem esse instrumentum Dei in cruciando, quia Dæmon principalius odit detineri in igne ex voluntate Diuina, quàm detineri formaliter ab igne.

Deindè Doctor explicat, qualiter ignis vt obiectum immutans contristat; consimiliter quoad aliquod dicendum est primò. Intellectus enim Angeli determinatur perpetuò ad intensè considerandum ignem in ratione obiecti. Secundo apprehendit istam detentionem ad talem considerationem. Tertiò odit, & sicut prius istud odium oritur ex affectione commodi, ex quo vult quodcumque obiectum, prout sibi delectabile fuerit considerare nunc hoc, & nunc illud, & promouetur ex superbia, qua  
vult

vult ut intellectiva sua secundum imperium voluntatis propriæ, & consumatur ex invidia, propter quam odit determinari à Deo ad aliquam considerationem unicam. Quartò sequitur apprehensio non considerationis nudæ, sed apprehensio certa euentus huius considerationis intensæ, & perpetuæ, & ex hoc tandem tristitia; quæ quidem detentio non est ab igne, sed à Deo. Vnde molestius est Angelo, ex eo quod intellectus eius sic detineatur in hac consideratione, quàm quod detineatur diffinitiuè in igne. Hæc Doctor loc. cit. paucis immutatis breuitatis gratia. Cæterum licet ex dictis satis probata remaneat nostra conclusio; nihilominus probatur amplius scholastico, sed breui discursu; & quidem primò auctoritate Sacræ Scripturæ quæ pluribi pœnam ignis infernalis torquentis Dæmones explicat per modum alligationis, & detentionis, sic Apoc. cap. 20. *Apprehendit Angelus Draconem (qui est Diabolus, & Satanas) & ligauit eum per annos mille, & misit in abyssum*. Sic in 2. Petri cap. 2. *Angelis peccantibus Deus non pepercit, sed rudentibus (idest vinculis, vel catenis inferni) detractos in tartarum tradidit cruciandos*. Sic pariter in Epistola canon. Iudæ, dicitur: *Angelos verò, qui non seruauerunt suum principatum &c. vinculis æternis sub caligine reseruantis*, ergo Angeli damnati torquentur ab igne vero, & reali per alligationem ad illum.

Prob. 2. auct. SS. PP. docentium, Angelos damnatos teneri penalitèr per ignem corporeum, quod idem est ac alligari, & præsertim S. Greg. lib. 4. Dialogorum cap. 28. Quomodo rem incorpoream tenere ignis corporeus possit? sic respondet. *Si uiuentis hominis incorporeus spiritus tenetur in corpore, cur non post mortem, cum incorporeus sit spiritus, etiàm corporeo igne teneatur?* Deindè subdit. *Teneri autem spiritum per ignem dicimus, ut tormento ignis videndo, atque sentiendo puniatur*, ergo ignis infernalis detinendo spiritus damnatos in sensu iam explicato intentionaliter cruciat.

Prob. 3. ratione. In nostra sententia optimè concipitur qualiter ignis infernalis verè torqueat Angelos malos per productionem vehementis tristitiæ; nam cum alligatio eorum ad ignem sit violenta quædam detentio, idè obiectum maximæ tristitiæ, & afflictionis in illis spiritibus damnatis consurgit: similiter in nostra sententia sal-

natur veritas locutionis SS. PP. dicentium, ignem inferna-  
lem vrere, calefacere, concremare, & deuorare Dæmones ;  
quia, etiam si ignis in eos non agat physicè, agit tamen in-  
tentionaliter actione adeò vehementi, vt in eis producat  
tantam passionem tristitiæ, & doloris in Animo, seu vo-  
luntate, quantum cruciatum, & dolorem produceret in  
illis, si essent corporei ; ergo Angeli mali torquentur ab  
igne infernali ab eis nolito perpetuò alligati diuino de-  
creto, contra quod diabolica rabie irascuntur, & dolent .

Arg. 1. cont. Concl. Sententia Scoti non differt à Sen-  
tentia D. Thomæ ponentis, Angelos puniri, & cruciari ab  
igne, ex eo quod illum apprehendunt, vt obiectum dis-  
conueniens ; quare cont. Scotum retorqueri possunt eæ-  
dem rationes : ergo &c.

Resp. Scotum multum differre à D. Thoma ; Siquidem  
Scot. impugnando opinionem eius solum desiderabat, qua  
ratione apprehendebat ignem vt obiectum sibi disconue-  
niens ; idcirco Scotus præter apprehensionem, addit noli-  
tionem Angeli mali, ex qua nolitione intensa oritur affli-  
ctio vehemens ; & hæc videtur vera mens Scoti .

Arg. 2. Ex hac sententia Scoti sequitur, omnes Angelos  
malos æqualiter cruciari, quod est falsum, cum sit cont. D.  
Aug. lib. 12. de Ciuit. Dei. Resp. ex Scoto in 4. dist. cit.  
sequel. quoad detentionem in loco igneo, conc. sequel.  
quoad apprehensionem veri, & nolitionem obiecti, neg.  
nam vnus habet intensiorem apprehensionem, & nolitio-  
alio, ac proinde tristitia maiori, vel minori.

Arg. 3. Apprehensio, seu intellectio obiecti est delecta-  
bilis, non molesta ; ergo illa apprehensio ignis potius de-  
lectabit Angelos, quàm cruciabit. Resp. dist. ant. Ap-  
prehensio simpliciter ; & absoluta, conc. apprehensio, &  
nolitio simul, neg. abhorret namquæ Angelus ignem tan-  
quam diuinæ Iustitiæ Instrumentum .

Arg. 4. Angelus quando cognoscit, & immutatur, & af-  
fligitur, non caret libertate ; ergo potest cessare ab actu, &  
cruciatu, ac proinde non patietur intensè, nec perpetuò,  
quod est falsum. Resp. dist. ant. habet libertatem physi-  
cam remotam, conc. proximam, neg. non enim est in po-  
testate Angeli non apprehendere, non nolle, quia præsen-  
tia obiecti cogit ad accipiendam immutationem per ap-  
pre-

prehensionem, & cognitionem illius, immiffa à Deo specie ignis, tum quia Deus non concurrit, vt poffit Angelus damnatus fe retrahere, feu ceflare à tali apprehenfione, & nolitioe.

Arg. 5. Si tota pœna Dæmonum in detentione, & formali, & obiectiua confifteret, fequeretur, quod Dæmones ab inferno exeuntes, & per aerem, vel per terram volitantes, non torquerentur, quia nec formaliter, nec obiectiue detinerentur: fed confequens eft falſum, ergo & ant.

Reſp. cum Beda, qui ſup. cap. 3. Epift. Iacob. ſic habet: *Vbiunque, vel in aere volitant, vel in terris vagantur, ſine detineantur, ſuarum ſemper ferunt ſecum tormenta flammarum inſtar fabricantis.* Itaque Dæmones vbiunque reperiuntur, pœnas ignis infernalis patiuntur. Cæterum, an omnes Angeli mali detrufi ſint in infernum, dubium eſt apud SS. Patres; quorum quidam aſſerunt: alij negant, cenſentes, plures in aere, & plures in terra commorari. Hoc ſuppoſito ſecundum communioſorem ſententiam Theologorum, grauis difficultas oritur inter Doctores, an Dæmones in aere, & in terra commorantes, pœnis inferni puniantur; & quidem meritò dubitatur; cum quam plures Theologi, & Patres, vt Irenæus, Hilarius, Iuſtinus Martir, Aug. & Oecomenius, quibus conſonant, Maldon. Suarez, Heriquez, & interpretes ſuper illud Mathei 8. *Veniſti ante tempus torquere nos,* dubitent: Immo etiam D. Thom. p. 1. q. 74. a. 4. tractat de hac re, nec damnat hanc ſententiam, ſed tantum ait, vt refert Macedo coll. 5. diff. 4. ſect. 2. certius, & melius eſt dicere eos torqueri, Quidam alij ſentiunt, eos cruciari, ſed minus, quàm cruciabuntur poſt diem iudicij, in quâ ſententia eſt Caletanus, Maldonatus, & Layman p. 5. tract. 9. cap. 14. de exorcifmis; & Bellar. ait, eos ante diem iudicij non torqueri, his præciſis verbis apud Macedo. Nulla re eos magis torqueri, quàm commemoratione futuri iudicij; & latè diſputat in lib. de beatitud. cap. 6. Ratio eſt, quia Dæmones extra inferos vagantes multa faciunt, quæ cum illo ſummo ſupplicio ſtare non poſſunt; tentant, illudunt, fallunt, mimos agunt, iocantur, & furos, & delicias faciunt, quæ nemo in ſummis doloribus conſtitutus facere, aut ferre poteſt, de qua controuerſia nihil hætenùs ab Eccleſia eſt deſinitum, quare mo-



net idem Macedo, quod prudenter agit, qui suum iudicium suspendit, & rem fatetur, se ignorare.

## DISPUTATIO VI.

*De potentia Angelorum tam bonorum, quam reproborum.*

### QVÆSTIO I.

*Vtrum Angeli sua naturali virtute corpus assumere valeant.*

**N**ot. 1. Quòd duplex potentia potest esse in Angelis: Altera immanens actiua: & altera executiua. Prima est ipsa voluntas Angeli volentis. 2. est facultas saltem formaliter distincta à voluntate, qua mediante operatur, quod vult, subordinatur tamen hæc potentia ipsi voluntati: Huius duplicis potentie ex natura rei inter se distinctæ rationem assignat Bassol. q. 4. Prolog. art. 2. Quia si Angelus sola voluntate aliquid mouet, non posset impediri, cum actus voluntatis non admittat impedimentum; sed per agens fortius, seu per Angelum superiorem impediri potest in suis operationibus externis; ergo potentia executiua est distincta formaliter à voluntate: Immò refert ex Bassolio Vulpes, esse errorem damnatum tanquam hereticum ab vniuersitate Parisiensi, asserere, Angelum voluntate mouere Cælum: sunt autem, qui oppositum tenent, censentes, Angelos sola voluntate externè operari: Videri potest de hac re Vulpes tom. 1. p. 2. disp. 16. art. 1. & Nyse 1. p. de potentia executiua Dei.

Not. 2. Quòd diuersi generis sunt corpora, quæ possunt assumi ab Angelis: quædam enim sunt aerea, & formata ex aere, non quidem puro, sed concurrente materia alicuius vaporis terrei, vel aquei; vt docet D. Bonau. in 2. art. 2. q. 2. Itaque formant corpora ex vaporibus, exhalationibus, cæterisque mixtis de facili resolubilibus, & habent quandoquæ figuram animalis, quandoquæ hominis; sicquæ apparent oculis hominum quantitatiua, figurata, & colorata, vt reuerà sunt, estò per variam positionem, & luminis

nis effusionem apparere possint alterius figuræ, quàm à parte rei sint, vt etiam in nubibus contingit. Quædam sunt corpora mortua, tam animalis quam hominis; unde, permittente Deo, Angeli mali assumunt cadauera, non quidem iustorum, sed reproborum, quibus median- tibus exercent diuersas operationes, quæ videntur homi- nis viui esse potius, quàm cadaueris.

Not. 3. Quòd diuersis modis potest esse talis assumptio, vel per informationem; ità quod sicut Anima, sic Ange- lus informet corpus; vel per vnionem hypostaticam assu- mendo corpus, & terminando substantiam, scù humanæ naturæ personalitatem, vel per assistentiam, quatenus moueat Corpus; vel vt motor intrinsecus; & ad hanc as- sumptionem requiruntur tres conditiones. Prima vt An- gelus existat in Corpore, neque extrà illud occupet spa- tium, vt colligitur ex Scot. 2. vt existat in Corpore assum- pto tanquam motor in mobili. 3. vt Angelus vtatur tali corpore, tanquam instrumento ad se manifestandum, de- fectu cuius Angelus mouens Cælum non dicitur illud as- sumere; nec Dæmon corpus humanum quod possidet, estd illud agitet; nec Angelus assumpsit fauces, & linguam. Asinæ Baal cum illam mouit ad loquendum, eo quia in his euentibus boni, & mali Angeli non intendunt se manife- stare per illa corpora, nec facere, vt appareant tanquam propria, & referant eorum personam, quod ad istam ter- tiam assumptionem est prorsus necessarium.

I. Concl. Angeli, siuè boni, siuè mali, nec propria vir- tute, nec de potentia absoluta Dei possunt assumere cor- pora, ea sicut Anima informando. Est Scoti, & Scotista- rum quodlib. 9. vbi Doctor ex professo hanc quæstionem tractat, & sic prob. Illud, quod est per se simpliciter subsi- stens non potest esse forma materiæ; sed Angelus est per se simpliciter subsistens; ergo &c. mai. pat. min. prob. An- gelus est perfectus in specie perfecta, immò in perfectiori, quam sit aliqua species substantiæ materialis, sed species materialis, quæ est imperfectior Angelica, est in actu vl- timo, hoc est, non ordinabilis per se ad aliquem actum vl- teriorem, alioquin posset esse processus in infinitum; est per se subsistens, ergò multo magis Angelus est per se subsi- stens. Prob. 2. quod est tota quidditas, neque naturali-

ter, neque de potentia Dei absoluta potest esse pars; sed Angelus est tota quidditas ex sui natura; ergo nequit esse pars, ac proinde nequit esse actus, seu forma corporis, alioquin esset pars.

Prob. 3. quidquid potest esse ratio, seu forma substantialis, hoc sibi competit immediate per essentiam suam, & potest dare actum simpliciter ipsi materię; at cui repugnat esse hunc actum materię præcisè, repugnat sibi per rationem propriam: ergo &c. quare omnes istę rationes probant tam primam, quam secundam partem positę conclusionis, ideoque non oportet alias addere.

II. Concl. Angeli, siuè boni, siuè mali nequeunt assumere corpus mediante vnione hypostatica. Est Scoti in 3. d. 1. q. vbi querit: Vtrum persona humana possit terminare dependentiam, non solum proprię naturę, sed etiam alterius naturę non personatę persona propria; & resoluit negativè loquendo de potentia naturali; Problematicè autem procedit loquendo de potentia Dei absoluta: Vndè eadem rationes, quę adducuntur à Scoto pro illa resolutione, faciunt etiam pro probatione nostrę Conclusionis; in hoc enim eadem ratio militat de personalitate Angeli, ac hominis, itaque me remitto ad ea, quę Scotus in 3. ne sim nimis prolixus, & ad tradita in part. 3. tract. de Incarnat.

III. Concl. Angeli, siuè boni, siuè mali sua vi naturali assumere valent corpora sublunaria, tam aerea, quam bruta, & humana: hæc est communis sententia Theologorum, Prob. de facto ad posse tenet consequentia: sed de facto plures Angeli corpora assumpserunt eo modo, quo dictum est in 3. not. ergo &c. Prob. min. ex S. Scrip. vbi referuntur varię apparitiones Angelorum in corporibus assumptis, vt constat de Angelis, qui apparuerunt Abrahamę, & Tobię, Loth, B. Virgini, nec non alijs hominibus iustis, ergo &c.

IV. Concl. Angelus non potest efficere operationes vitales in corporibus assumptis: est communis apud omnes.

Prob. Operatio simpliciter, & propriè vitalis debet procedere à principio vitali intrinseco, & in supposito animato recipi; sed operationes, quę ab Angelis fiunt, non procedunt à principio, seu à supposito vitali intrinseco; ne-

que

que in eo recipiuntur ; ergo Angeli nequeunt in corporibus assumptis vitales operationes elicere .

Itaque remanet, Angelos solum posse exercere omnes illas operationes vitæ, quæ eliciuntur mediante motu locali corporis, quales sunt motus progressionis, spirationis, palpebrarum, & similia, quæ proueniunt à principio vitali intrinseco, sed non semper .

Arg. cont. 1. conc. quoad 2. part. Substantiæ spirituali non repugnat informare formaliter corpus, seu esse actus formalis materiæ : sed Angelus est substantia spiritualis ; ergo &c. Resp. dist. mai. Substantiæ spirituali incomplete, qualis est Anima rationalis, conc. mai. Substantiæ complete, qualis est Angelus ; neg. mai.

Arg. 2. Informare materiam est esse actus materiæ, sed Angelus est actus perfectissimus : ergo &c. min. par. quia est forma simplex . Resp. conc. mai. & dist. min. est actus quidditatiuus, & perfectissimus, quatenus non ordinatur ad ulteriorem actum, conc. est actus ordinabilis, tanquam pars ad materiam informandam, & ad faciendum aliquod totum, neg. min.

Arg. 3. Si Angelus non posset informare materiam, hoc esset, quia est simpliciter subsistens, sed talis subsistentia non obstat quo minus Angelus informet corpus : ergo &c.

Confirmatur ; nam subsistentia, cum sit quid realiter distinctum ab ipso Angelo, potest per Dei potentiam separari, ergo saltem de potentia Dei potest Angelus informare Corpus . Resp. ex Scoto, quod ratio potissima, quare Angelus non potest informare Corpus est, quia est tota quidditas, & non pars quidditatis, cuiusmodi est forma ; subsistentia autem est ratio à posteriori, & à medio, seu à loco extrinseco .

Quæres 1. An Angeli possint producere substantias, tam spirituales, quam materiales, etiam ex subiecta materia .

Resp. cum D. Bonau. D. Thoma, & Scoto negatiue ; non possunt producere substantiam spirituales, quia ex nullo capite hoc potest deduci, substantia enim spiritualis producit per creationem, quæ Angelo non competit, ut ostensum est in disp. 1. de Creatione, ergo &c. neque substantiam corpoream, quia estò Angelus sit illa perfectior, tamen non sequitur eam produci posse ; non enim

omne perfectius continet virtualiter imperfectius; siquidem planta est perfectior auro, homo bruto, & tamen neutrum potest producere id, quod est imperfectius: tum quia semper ad præsentiam alterius substantiæ corporeæ producitur substantia: quare mira, quæ ad præsentiam Angeli fiunt, non excedunt potentiam loco motiuam idest applicando actiua passiuis; & hoc modo censent Doctores, Dæmones in Ægypto adiuuasse magos producendo Serpentes, nam videmus quotidie ex putri materia generari Serpentes, Ranas, atque cætera alia imperfecta: quid igitur mirum, Angelum, qui est ingenij perspicacissimi, applicando actiua passiuis animalia imperfecta quandoque produxisse? nisi dicere velimus cum D. Bonau. p. 2. d. 8. art. 1. q. 3. potuisse Dæmones, quædam ex ijs signis factis in Ægypto præstigiando, seu oculis illudendo, patrasse; puta, adducendo aliundè veros Dracones, sicque loco virgæ substituendo Serpentes, absque eo quod quis præstigia aduerteret. Verum prima responsio, vt rectè notat Herincx est magis consona litteræ S. Scrip. & in eo sensu intelligitur etiam à D. Aug. q. 21. in Exodum. Vide D. Bonauent. de modis ludificandi.

Quæres 2. Quænam sunt illa mirabilia, quæ Angeli efficere possunt applicando actiua passiuis.

Resp. Quòd cum Angeli optimè cognoscant virtutes, & proprietates causarum materialium, & in qua proportionè, loco, & tempore debeant applicari, vt suos effectus causent, plura operari possunt; & præsertim reduci possunt ad sequentia. Primo possunt ignem citissimè è suo loco elementari portare, & applicare ad comburendum domum, agros, segetes &c. iuxta illud Iob. cap. 1. num. 16. *Ignis Dei decidit è cælo, & cæctas oues pueros què consumpsit.* Secundo possunt immittendo vehementes ventos ædificia, plantas, & alia diruere, diuellere, vt habetur pariter in Iob eodem cap. *Repentè ventus vehemens irruit à regione deserti, & concussit quatuor Angulos domus &c.* Tertio possunt excitare tempestates, in mari, vel commouendo aquas maris ab imo, vel magnos ventos immittendo. Quarto possunt causare magnos terremotus, agitando exhalationes in terræ visceribus inclusas. Quinto possunt in humano corpore causare morbos, conturbando humores, somnia, mouendo

phantasmata, dolores, distrahendo compages, & conexiones membrorum. Sexto valent multos morbos sanare, applicando herbas, & medicinas, quarum virtutes optimè callent; & similiter operari quidquid vi herbarum, gemmarum, lapidum, animalium &c. fieri potest. Septimo quælibet corpora ex vno loco transferre ad alium, res præsentès subito è conspectu nostro subtrahere, absentes citissimè facere præsentès. De quibus Scotus in 2. d. 8. q. vnica.

Quæres 3. An Angelus mouere, vel transferre possit corpus quantumcunque magnum.

Resp. ex Scoto, quod Angelus mouere potest de loco ad locum, quod non improporcionabiliter excedit ipsius virtutem motiuam, ita in 2. d. 8. in fine.

Quæres 4. An Angelus possit alium Angelum localiter mouere, vel inuitum retinere.

Resp. affirmatiuè ex Scoto in 4. d. 44. q. 2. §. ad questionem; & ratio est, quia sicut in hominibus fortior detinere potest alium hominem inuitum, si sit minoris fortitudinis; sic pariter Angelus superior, cum sit naturæ nobilioris, ac proindè maioris virtutis, poterit detinere Angelum inferioris virtutis etiam contra eius voluntatem.

Quæres 5. quomodo Angelus moueat alia à se: An videlicet imprimendo in illis impulsus, vel per voluntatis imperium tantum.

Resp. Doctores tam nostræ Scholæ, quam extrà inter se discrepare. Pilosus, seu Vulpes putat impossibile, Angelum causare in corpus, vel in aliud, quod intendit mouere, qualitatem quandam, quæ vocatur impulsus, & addit, Angelum non posse directè, sed tantum indirectè mouere, seu causare impetum in Corpus idest applicando actiua passiuis; rationem assignat, quia ille impulsus non esset maior actiuitate potentiæ motricis ipsius Angeli, qui illum recipit; tum quia impulsus est qualitas corporalis omnino diuisibilis, ergo non est effectus Angelo proportionatus, neque recipi potest in Angelo moto; quare concludit, Angelum mouere alia à se per imperium suæ voluntatis, sicut voluntas mouet potentiam loco motiuam, & alias sibi subditas non imprimendo aliquam qualitatem,



rem, seu impulsus. Dealcadil. sententiam oppositam, defendit in tract. de Angelis cap. 8. disp. 4. dub. 4. & probat à paritate. Sicut homo mouendo aliquod Corpus imprimit in eo impulsus, ita pariter suo modo imprimit Angelus impulsus mouendo Angelum, vel corpus; Et solutione rationum sententiæ negatiuæ comprobat suam responsionem. Itaque ad primam respondit, quod omnibus admissis, nullo modo probaretur impossibilitas impulsus recepti in Angelo.

Resp. 2. neg. assumpt. primæ rationis, quia Angelus directe potest impulsus imprimere in Angelo, vel in Corpore. Resp. ad 2. negatiuè quia sicut Angelus mouens superat actiuitatem Angeli moti, ita impulsus ab illo impressus superat eius actiuitatem, cum sit instrumentum illius, quod substituitur loco causæ partialis; ac proinde habet tantam virtutem, quanta est proportionata Angelo mouenti. Ad 3. resp. neg. ant. nam impulsus non est diuisibilis determinatè, nisi quatenus recipitur in subiecto diuisibili; sicut patet de motu locali, qui de se, neque est diuisibilis, neque indiuisibilis in ordine ad id, quod mouetur.

Dices: ergo Angelus producendo qualitatem impulsus, produceret aliquod accidens, quod non videtur concedendum. Adhanc instantiam respondeo, quod sicut homo proijciendo lapidem producit in lapide impulsus, ita Angelus se habet ad impulsus impressum in corpore moto: quare si homo non producit vllum accidens, nec producet Angelus: si producit, tantò magis Angelus producere illud valet. Cæterum non est concedendum, Angelum producere accidens independenter à subiecto, seu illa, quæ ipsum subiectum consequuntur, sed applicando actiua passiuæ, vt supra dictum est.

Quæres 6. An Angeli in corporibus assumptis possint generare homines.

Resp. ex hactenus dictis pat. responsio; quia cum Angelus nequeat in corpore assumpto exercere operationes vitales, consequens est, quod nec generare actiue, nec passiuè valeat, cum vtraque actio sit vitalis.

Cæterum difficultas est, an Dæmon possit generare accipiendo semen hominis, & in femine matricè illud immitte-

re. Ad quam difficultatem respondet D. Bonau. in 2. dist. cit. quod ex Dæmone incubo, & fœmina: potest aliquando homo nasci absque alio actu vitali generationis ex parte dæmonis; potest namque dæmon semen humanum in somnijs decisum conseruare, ac tanta celeritate asportare, vt vitales spiritus, quamuis tenuissimi, non dissipentur, & tempore conuenienti, & apto copulam habere cum fœmina apta, & disposita ad generationem; quo casu illius prolis, non dæmon, sed homo ille censendus est Pater, cuius semen erat: Verùm ex homine incubo, & dæmone sucubo fœmam fœminæ rappresentante, nequit proles nasci, quia in vtero materho plura requiruntur, tum ad corporis organici formationem, tum ad fœtum nutriendum, quæ à Dæmone in corpore assumpto præstari non possunt; quare cum historiæ narrant ex Dæmone sucubo filios aliquando natos, censendum est, vel veros alterius fœminæ fœtus aliunde sublato, suppositos fuisse, vel certè ab alio dæmone corpore assumpto fuisse prolem e mentitam.

## QVÆSTIO II.

### De Custodia Angelica.

*Vtrum Angeli boni à Deo mittantur, & deputentur ad Custodiam hominis, & quid operentur.*

**N**Ot. 1. Quòd Angeli à Deo mittuntur in ministerium, vt pluribi habetur ex S. Scrip. & præsertim ad Hæb. 1. *Omnes sunt administratores spiritus in ministerium missi propter eos, qui hereditatem capiunt salutis*; Et hoc pluribus de causis decet diuinam Prouidentiam. Prima est manifestatio Diuinæ potentix, Sapientix, & bonitatis. Secunda manifestatio dilectionis Angelorum erga homines. Tertia tutela Angelica super homines. Quarta Animarum nostrarum purgatio, intellectus illuminatio. Quinta inflammatio affectus per Angelos causanda. Sexta pertractatio cum hominibus de aliquo secreto diuino reuelando, vel speciali negotio peragendo.

Not. 2. quod, etsi Angeli mittantur à Deo, tamen non semper immediatè, sed ex ordinatione Dei aliquando in-

feriores Angeli mittuntur à Superioribus, vt tradit communis opinio Theologorum: Et pat. ex S. Scrip. Zaccariæ cap. 2. vbi vnus Angelus dicit alteri, curre, & loquere ad puerum istum: & Danielis 8. *Audinis Propheta vocam veri, seu Angelis* (quem veteres hebræi putant fuisse Michaelē teste Hieronymo) *intēr Vlāi dicentis Gabriel, fac intellē, ore visionem istam* Cæterum, An ad functiones, seu ministeria, exequenda mittantur Angeli ex omnibus ordinibus, seu Hierarchijs, dubium videtur; Scoto in 2. d. 10. q. vnica, quem sequuntur plures recentiores extra nostram Scholam, & colligitur ex Patribus, nempe, ex Cirillo, & Bernardo, probabilior videtur sententia affirmatiua; licet aliter sentiant Aleff. D. Bonau. & D. Thom.

I. Concl. Per Diuinam Prouidentiam demandata est Angelis specialis cura, & custodia hominis, qui est principalis pars mundi. Hæc conclusio sic generaliter posita, est de fide, vt notant, præsertim Herincx, & Caspens. & habetur expressè in S. Scrip. & præsertim in, Gen. c. 19. vbi narratur, Angelos duxisse Loth de periculis incendiij Sodomæ; & Gen. c. 48. Iacob ait. *Angelus, qui eripuit me de cunabulis malis*; & in psal. 90. *Quoniam Angelis suis Deus mandauit de te*, &c. & in alijs S. Script. locis.

II. Concl. Omnibus hominibus mundi, & non solum prædestinatis à Deo deputati sunt Angeli Custodes. Est sententia SS. Patrum, & Theologorum. Prob. 1. Custodia Angelica continetur in latitudine auxilij sufficientis ad salutem; homo enim de se est insufficiens ad resistendum Dæmoni, sed auxilium sufficiens est commune etiam reprobis; cum enim Deus permittat eos tentari à dæmone, consequenter debet illis protectionem, & defensionem sufficientem præbere; ergo nedum hominibus prædestinatis, sed etiam reprobis deputantur Angeli Custodes.

Confirmatur; quia licet talis custodia in reprobis non habeat effectum meriti vitæ eternæ, nisi pro aliquo tempore, attamen per illam retrahuntur à multis, vel maioribus malis; tum quia hæc custodia redundat in bonum prædestinatorum; per illam enim arcentur Dæmones instigantes reprobos, ne electis noceant, quantum eorum peruersitas cupit.

III. Concl. Probabile est, Principibus, Regibus, & omni-

nibus Prælatiſ à Deo deputari duos Angelos Cuſtodes ; alterum ad eorum ſalutem ; alterum ad rectam gubernationem. Perſuaderi poteſt ; quia ſicut duplici egent prudentia, & rectitudine, nempe ad propriam ſalutem, & ad aliorum gubernationem, ita duplici indigent gubernatore, & Angelo ; cum hoc tamen diſcrimine, quod vnus eſt inferioris ordinis, alter verò qui datur ad rectè gubernandum eſt ſuperioris ordinis : Immò etiam Regnis, Prouincijs, comunitatibus, & Eccleſijs dantur Angeli tutelares. De primis prob. per illud Daneliſ cap. 10. *Præcepſi Regni Perſarum reſiſtis mihi viginti, & vno diebus ; & ecce Michael vnus de principibus primis venit in adiutorium mihi Cum ego egraderer, apparuit Princeps Græcorum &c.* De reliquis patet per SS. Patres, & Theologos, quos nimis longum eſſet afferre.

IV. Concl. Probabile eſt ſingulis rerum ſpeciebus ſingulos Angelos præeſſe. Prob. 1. generaliter ex D. Aug. lib. 83. qq. q. 79. indefinitè loquente. *Vnaquaque res viſibilis in hoc mundo habet Angelicam poteſtatem ſibi præpoſitam.* Prob. 2. de rebus in particulari, nam de Orbibus Cœleſtibus, & Aſtris in Iob: cap. 9. habetur: *Sub quo currantur qui portant Orbem.* De partibus Mundi in Apoc. cap. 7. ſic. *Vidi quatuor Angelos ſtantes ſuper quatuor Angulos terra tenentes quatuor ventos terra, ne flarent :* Et cap. 14. agitur de Angelo, qui habebat poteſtatem ſupra ignem : & cap. 16. fit mentio de Angelo aquarum ; & idem eſt de alijs Elementis, & ſpeciebus myſtorum, & à fortiori de ſpeciebus animalium, ſaltem perfectorum, & ita ſentiunt poſt Originem, & alios Patres, D. Thom. Herincx Fraſſen : & alij.

Ex hæcenus dictis colligitur 1. quod omnes Sancti, etiam in gratia confirmari, immò & Immaculata Deipara (excepto Chriſto) habuerunt Angelum Cuſtodem.

Prob. 1. de Sanctis ; etenim omnes ad obtinendam ſalutem egebant opportunis inſpirationibus, & illuminationibus, ac pijs affectionibus ; nec non amotione occaſionum peccandi ; quæ omnia Deus præſtare ſolet per Angelos Cuſtodes. Prob. de Dei genitrice. Ità enim ſentiunt SS. PP. & præſertim D. Bernardus, & S. Ambr. qui putant, Angelum Cuſtodem eius fuiſſe Gabrielem. Idem tenet Vgo Viſtorinus ; tum quia decebat, Matrem Dei, non tantum vno Angelo Cuſtode, ſed pluribus eſſe cuſto-

ditam, & vt ità dicam, vallatam. Prob. de Christo; nam vt docet D. Bon. & etiam Alenf. Custodia à Deo instituta fuit ob defectum, & indigentiam Custoditi; Christus autem, & ratione vnionis hypostaticæ, & ratione essentialis beatitudinis, quam à primo instanti suæ Conceptionis habuit, nullam indigentiam habebat, nullumque defectum admittere poterat. Cæterum verum est, habuisse Angelos administrantes, vnde dicitur; *Accesserunt Angeli, & ministrabant ei.* Colligitur 2. quod etiam nostri Protoparentes, nempe Adam, & Eva in statu innocentiae habuerunt Angelos, qui eos custodiebant; licet enim ille status esset felicissimus, poterant tamen à iustitia originali nostri Parentes cadere, vt de facto ceciderunt in peccatum comedendo pomum à Deo vetitum.

Quæres 1. Quando incipiat, & desinat Custodia Angelica.

Resp. Quàmuis aliqui Doctores censeant, custodiam Angelicam incipere ab instanti natiuitatis, vt etiam videtur significare D. Hieron. qui tamen explicatur ab ortu animæ secundum Herinck: Verosimilius tamen est, incipere ab instanti animationis fœtus in vtero, & durare vsque ad mortem. Ita Scotus in Report. D. Bonau. Herinck, Gabriel, Suarez contra D. Thom. Vasquez, & alios: ratio est, quia huiusmodi custodiam à tempore animationis fœtus postulat, tum dignitas Animæ; tum quia fœtus statim atque animatur, expositus est multis periculis; ergo probabilius est dicere tunc incipere custodiam, quando incipit indigentia, ob quam est instituta: tum quia licet fœtus animatus in vtero, non censeatur esse Persona diuersa à matre, nihilominus reuerà est alia Anima, aliud corpus, alia persona; ac proinde exigit alium Angelum Custodem à custode matris eius. Quod autem perduret vsque ad mortem, est apud omnes compertum; & licet SS. Patres, & Scriptura aliquando indicent, Angelum deferere peccatorem obtinatum; nihilominus solum volunt, Angelos tutelares aliquando remittere aliquo modo de sua custodia, propter prauitatem custoditi; non verò cessare pœnitus à custodia.

Quæres 2. Quæ sunt beneficia, quæ nobis impendunt Angeli Custodes.

Resp.

Resp. Varia, & multa esse munera, & beneficia, quæ Angeli conferunt; & reduci possunt ad sex genera. Primum est auertere, seu amouere externa pericula, tam animæ, quam corporis. 2. est animum excitare, & mouere, tum ad operandum bonum, tum ad cauendum malum. 3. coercere Dæmones, ne tam grauiter tentent; vel ne tot prauas cogitationes immittant, aut occasiones peccandi afferant. 4. offerre Deo, vel præsentare orationes illorum, quos custodiunt, & vt colligitur ex pluribus locis S. Scrip. & signanter Tobix 12. & Apoc. 4. pro nobis assidue orare; licet enim omnes Angeli pro nobis assidue orent, Angelus tamen Custos peculiari cura, & quasi ex officio hoc præstat. 6. deniquè, corrigere, & punire homines suæ curæ commissos, quando iuxta ordinem Diuinæ prouidentix fuerit expediens; vt constat ex S. Scrip. & ex historijs Sanctorum, & Sanctarum.

Quæres 3. An Angeli mali à Lucifero deputentur ad homines tentandos, & perdendos.

Resp. Herincx hoc esse incertum; credibile tamen est deputari, tum quia ita sentiunt post Originem Magist. Sent. D. Thomas, & passim Scholastici; tum quia id consonat prauæ luciferi voluntati, qui nedum contra nos, sed etiam contra Deum militare nititur, emulando instar Simiæ Diuinitatem, quam impiè ambiuit.

### QVÆSTIO III.

*De infestatione malorum Angelorum contra homines.*

**N**OT. 1. Quod proprium, & quasi præcipuum ministerium Dæmonis est homines impugnare, & ad peccandum inducere, adeout velut per antonomasiam vocetur tentator; qua ratione dicitur homicida ab initio Ioannis 8. quia seducendo nostros Protoplastes, occidit Euam, & per eam Adamum cum tota posteritate. Quod quidem ministerium est ab ipso Dæmone tanquam Auctore; a Deo autem solum tanquam permittente, & rectè ordinante, qui nouit etiam malis optimè vti; mouentur autem Dæmones ad tentandum nos, partim ex malitia odij, vt homines ab obedientia Dei, quem odio habent, auertant;



partim ex superbia, quæ diabolus nititur habere suos ministros ad impugnandum, sicut Deus habet suos ministros ad auxiliandum; partim ex invidia erga bonum, & salutem nostram, & partim ex ipsorum hominum pigritia, & ignorantia.

Not. 2. Quod Dæmonum alij dicuntur aerei, alij aquei, alij terrestres, alij subterranei. Aerei dicuntur, qui (teste Trithemio) Deo permittente per aerem volitantes aerea semper turbant, tonitrua, tempestates, & magnos ventus concitant, & ita pariter discurrendum est de alijs, nempe aqueis &c. De subterraneis custodientibus thesauros; de terrestribus illudentibus homines diuersis formis, & figuris spectrorum; Perspectum enim significatur aliquis insolitus naturæ maleficiatæ effectus, qualis esset, e.g. figura deformis composita ex varijs animalium speciebus, quomodo aliquando apparebat D. Antonio, & D. Francisco.


Concl. Certissimum est, malos Angelos infestare homines varijs modis, & præcipuè tribus, nempe, vel in figura spectrorum terrendo homines, vel eos alliciendo, vel corpora obsidendo, vel varijs ludificationibus dementando, vt ipsos in peccaminosas actiones venerationis, ac Idolatriæ cultus inducant: est comunis, & signanter D. Bonau.

Prob. 1. pars. Angeli mali pollent admiranda naturali celeritate, potentia loco motiua, atque potentia operatiua, adeò vt possint se immiscere rebus sensibilibus, & hominibus, nec non Brutis; & sic varia spectra componere, vt etiam tradit D. Aug. lib. 83. q. ergo malus Angelus infestat homines in figura spectrorum eos terrendo.

Prob. 2. pars auctorit. S. Scrip. quæ huius infestationis exempla refert, vt Lucæ cap. 11. vbi narratur Christum, eiecisse Dæmonem mutum obsidentem corpus eiusdem hominis, & Marci vbi habetur, Christum imperasse cuidam Dæmoni obsidenti hominem.

Prob. 3. pars de illusionem. Angelus malus inuidus, & dolosus multipliciter illudere potest sensus humanos. Et quidem primò efficiendo, vt obiectum visibile aliàs absens appareat esse præsens; quod præstat, vel fortiter mouendo spiritum similitudine illius obiecti informatum in organo Imaginationis; vel similitudines visibilium, quæ sunt in organo imaginationis, faciendi illas multiplicari

mediantibus subtilibus vaporibus vsque ad sensum eom-  
mūnem, vel certè faciendo in aere talem dispositionem .  
Secundò efficere potest , & solet illusiones quasdam pro-  
curando, vt res præsens pœnitus lateat visum, quod præ-  
stat operando extra Corpus nostrum aliquod impedimen-  
tum in medio obstans, ne species à re præsentī possit trans-  
mitti ad visum . Tertiò assumendo varia corpora, & ex eis  
varias visui præstando, itaut videns putet esse verum cor-  
pus; idest vera mulier, verus homo, estò non sit &c. Quar-  
tò mutando, & mouendo species, & phantasmata, easque  
potentiæ cognitiuæ representando; & per hoc imagi-  
nationem ad ea conuertendo, deindè verò per immissio-  
nem fumorum spiritus vitales ita variando, & perturbando,  
vt apparere videantur diuersæ figuræ, quæ à parte rei  
non extant . Quintò efficiendo, vt obiectum visibile ap-  
pareat diuersi coloris, dum nimirum procurat interposi-  
tionem alicuius vaporis, vel sanguinei, vel colerici, vel  
malancholici in organo visus, & sic obiectum visum iudi-  
catur esse eiusdem coloris. Sextò, figurando varia som-  
nia de rebus futuris, aut etiam præsentibus, quæ deindè  
personæ simplices sumunt, & tenent pro quibusdam,  
reuelationibus veris. Septimò. In varijs diuinationi-  
bus, sortibus, incantationibus, maleficijs, magijs, præsti-  
gijs, & alijs diabolicis artibus quosdam peruersos homi-  
nes instruendo. Item ex Idolis, & simulacris diuinando,  
futura vaticinando, quibus, dum homines adhibent, si-  
dem, in graui peccata superstitionis labuntur: Insuper  
cultum diuinum, adorationes, genuflexiones, Sacrificia,  
& alia huiusmodi ab hominibus exigendo; quæ omnia  
sunt grauissima peccata idolatriæ. Quapropter nobis opus  
est rogare assidua oratione Deum, & Angelos Custodes, vt  
ab omni dolo, & Dæmonum tentationibus liberare di-  
gantur, præbendo nobis vires spirituales, vt eis resistere  
valeamus; & gratiam, ac lumen Spiritus Sancti, quo per-  
lustrati benè viuendo, ad Societatem Ciuium supernorum,  
perduci mereamur in sæcula sæculorum. Amen.



# TRACTATVS SECVNDVS DE HOMINE,

A C

## HOMINIS VARIIS STATIBVS.

**H**ominem Angelo paulò inferiorem esse testatur apertè S. Scrip. in Psal. 8. dicens. *Minuisti eum paulò minùs ab Angelis.* Hinc Nazianz. vocat hominem alterum Angelum, & Crhysoft. Angelum terrestrem appellat. Quapropter, completo tractatu de Angelis, agendum est in hoc 2. tract. de homine, qui inter creaturas secundum locum obtinet. Verùm quia de partibus hominis, nempe Corpore, & Anima, ex quibus componitur, egimus in libris Physic. & in lib. de Anima, ubi etiam plura tradita fuerunt de potentijs, tum corporeis, tum spiritualibus; nec non de passionibus, & affectibus; vnum tantum videtur superesse, videlicet, vt de varijs statibus, in quibus homo est, vel fuit, vel esse potuit, breuiter differamus; hoc est, de statu Innocentiæ, de statu naturæ lapsæ, & de statu naturæ puræ ideò sit.

### DISPVATIO I.

#### *De statu Innocentiæ.*

#### QVÆSTIO I.

*Vtrum homo creatus fuerit à Deo extrà Paradisum terrestrem.*

**N**Ot. 1. Ex D. Aug. lib. 8. in Genesi, quod de Paradisi terrestris entitate, & veritate tres quasi generales sunt sententiæ; vna est eorum, qui tantummodò corporaliter Paradisum intelligi volunt. Alia eorum, qui spiritualiter tantum: 3. eorum, qui vtroque modo Paradisum

sum accipiunt, & corporaliter, & spiritualiter; Primæ sententiæ sunt omnes ferè Theologi scholastici. Secunda fuit Origenis lib. 4. Periarchon c. 2. ubi plura coaceruans exempla earum rerum, quarum in Scrip. S. non est querenda vera, & realis historica narratio, sed sola mystica, & spiritualis intelligentia, inter cæteras Paradisum voluptatis collocavit; cui sententiæ mihi videtur subscribi noster Georgius Venetus in illo insigni libro intitulato: Armonia mundi. 3. est multorum SS. Patrum, qui litteralem Paradisi historiam admittentes, eam etiam in mysticum sensum traducunt ad interiores, & sublimiores intelligentias rerum spiritualium, & cœlestium assequendas; quare sententia Origenis taxatur à Sanctis Patribus velut erronea: etenim nulla est ratio recedendi à sensu litterali, & historico, cum eodem modo sit intelligenda plantatio Paradisi terrestris, ac commissio peccati Adæ, & Eux, vt communiter tradunt Theologi.

Not. 2. Quòd nomen Paradisi terrestris non intelligitur totus terrarum orbis, quem incolimus, vt volunt plures Recentiores, & signanter noster Pineda lib. 1. Monarch. Eccles. c. 6. & Abrahamus Ortelius in sua Tabula Geographiæ, opinantes, Paradisum voluptatis à Moyse descriptum esse totum hunc terrarum orbem, suæ conditionis initio pulchritudine, fertilitate, amenitate, ac delicijs exuberantem; fontem verò, qui Paradisum voluptatis irrigabat, esse Oceanum à Philosophis appellatum fluuiorum omnium Parentem; sed intelligitur locus aliquis particularis constitutus in certa quadam parte huius orbis. Quænam autem sit ista pars, non satis conueniunt Doctores; probabilius tamen existimatur, situm esse in confinibus Misopotamiæ, & Arabiæ orientalis; quod colligitur non obscure ex S. Scrip. dicente. *Plantauerat autem Deus Paradisum voluptatis.* Hebraica legit; Plantauerat autem Deus Paradisum in Edem, sed Edem in Syriæ, vel Mesopotamiæ finibus fuisse, ex eadem S. Scrip. colligitur 4. Regum c. 19. de quo latè commentatores, seu interpretes S. Scrip. in Genesi.

Concl. Probabilius est, Adamum extrà Paradisum formatum fuisse, Euam autem in Paradiso: 1. pars est omnium SS. Patrum, eamque perspicuè indicat S. Scrip. Genesi c. 2.

vbi de creato homine ait. *Tulit ergo Dominus Deus hominem; & posuit illum in Paradiso voluptatis, ut operaretur, & custodiret illum & cap. 3. Emisit eum Dominus Deus de Paradiso voluptatis, ut operaretur terram, de qua sumptus est: ergo si positus fuit in Paradiso, & expulsus de Paradiso ad terram, de qua sumptus est, extra Paradisum creatus fuerat. 2. pars controuertitur à Doctoribus, nam Ioseph lib. 1. antiquitatum censet creatam fuisse extra Paradisum. In eadem sententia est Tertullianus lib. 2. aduersus. Marcionem. Verùm prob. nostra sententia, tum ex S. Scrip. ex qua colligitur Deum creasse Euam ex costa Adami in Paradisum iam translata; tum auct. S. Ambrosij lib. de Paradiso c. 4. vbi sic ait. *Aduerte, quia extra Paradisum vir factus est, & mulier intra Paradisum.**

Quæres 1. Quid, & qualis sit Paradisi terrestris situs.

Resp. diuersas sententias esse de situ Paradisi. Etenim, quidam cum D. Damasc. censent illum esse omni terra excelsiorem; immò Rupertus arbitratur esse Cœlo proximum. At D. Basil. vult in media aeris regione collocatum esse. Alij è contra cum Peter. lib. 3. in Genes. disp. de Parad. q. 2. probabilius existimât Paradisum in planitie aliqua situm esse. 3. sententia media inter sententias recensitas contendit Paradisum, nequè ita esse demissum, vt in planitie aliqua jaceat, neque ita sublimatum, vt altiores montes transcendat, sed positum esse in suprema huius infimæ regionis aeris parte. Et hæc videtur communior, & probabilior, vt norant Recentiores.

Quæres 2. cuius magnitudinis, & amenitatis sit Paradisus.

Resp. 1. Auctores inter se discordare. Aliqui enim putant esse extensum per spatium ita ingens, vt videatur incomprehensibilis, ita S. Athanas. Sinaita homil. 9. in Genesi. Nonnulli affirmant, tantæ magnitudinis esse, quanta est vna ex principalioribus terræ partibus, puta Asia, Affrica, seu Europa, vel America. Verùm vtraque sententia à Recentioribus reiicitur, eò quia tanta Paradisi magnitudo, & speciositas non posset vlllo pacto in terra latere, maximè, cum his nostris temporibus totus orbis circumnauigetur, nisi assentiri velimus quibusdam mathematicis asserentibus, adhuc maiorem mundi partem

non esse detectam. Itaque est incertum, sicut & alia, quæ de Paradiso traduntur; Cæterum rationabile videtur fuisse tantæ magnitudinis, quantum postulabat domicilium Adæ, & omnium posterorum qui, supra mille, & mille annos in statu Innocentiæ vixissent; tum ob status perfectionem, tum ob esum ligni vitæ de quo infra redibit sermo. Resp. 2. quod Paradisus terrestris erat amenissimus, & iucundissimus, ita vnanimi consensu docent SS. PP. inter quos breuitatis causa audiat solus Damasc. lib. 2. de fide c. 11. ubi ita Paradisum delineat. Quia verò Deus plasmaturus erat hominem ad imaginem, & similitudinem suam, tanquam quemdam Regem, & Principem vniuersæ terræ, & eorum, quæ in ea sunt, præstruxit ei quamdam veluti regiam, in qua diuersans, beatam, & ex omni parte felicem deduceret vitam, & ipsa est Diuinus Paradisus Dei manibus in Edem plantatus, lætitiæ, & voluptatis omnis promptuarium; Edem enim voluptas interpretatur. In oriente verò omni terra excelsior collocatus est, optima temperie, & aere subtilissimo, atque purissimo splendidus, plantis semper virentibus insignis, odoris suauitate refertus, plenusque lumine, vniuersæ sensibilibus venustatis, & pulchritudinis, superexcellens intelligentiam. Diuinus profectò locus, ac dignus eius, qui ad imaginem Dei creatus est incolatus.

Quæres 3. An Paradisus adhuc extet.

Resp. ob incertitudinem rei Doctores in duas sententias abire: Quidam enim affirmant; alij negant. Verum affirmatiua videtur probabilior, & posset sic probari. Sententia illa probabilior apparet, quæ traditur à SS. PP. sed SS. Patres docent Paradisum adhuc subsistere ergo &c.

Prob. min. ex Irenæo, quem S. Epiphan. hæresi 24. Sanctissimum, priscumque Theologum, & successorem Apostolorum appellat, affirmat Enoch, & Eliam translatos fuisse in Paradisum, & habetur expressè Eccles. 44. *Enoch placuit Deo, & translatus est in Paradisum, ut des gentibus penitentiam*. Tum quia Scrip. S. narrat, de Paradiso terrestris quatuor egredi flumina, nempe Phison, Geon, Tigris, & Euphratem, de quibus post diluuium non semel fit mentio in Scripturis: ergo &c. Cæterum opposita opinio non caret sua probabilitate, ob cuius studium consulantur In-



terpretes S. Scrip. & Theologi recentiores; quæ quidem opinio negatiua intelligenda non est de Paradiso quoad locum simpliciter, constat enim, vt ex communi docet Henrincx non perijſſe, ſed de Paradiso quoad amenitatem, & delitiam.

## QVÆSTIO II.

*Vtrum Anima ſint à Deo creata, vel ſint productæ ex traduce.*

**N**OT. 1. Quòd titulus quæſtionis ſic eſt intelligendus, videlicet; An, ſicut humanum corpus ex ſemine à parentum corpore deciſo, & in muliere recepto, formatur, ità etiam Anima filij ex parentis Anima continua propagatione traducatur. Tradux autem ſic deſcribi poteſt. Eſt productio rei animatæ ab alia per deciſionem partis à producente; quæ quidem deſcriptio poteſt eſſe communis, tam productioni ſeminali ſecundum corpulentam ſubſtantiam, quàm productioni ſpiritali, ſi admitteretur, quæ non eſt admittenda, vt infra dicetur, Animam ex Anima traduci.

NOT. 2. ex D. Bonau. in 2. d. 18. art. 2. q. vn. quod circa Animæ formationem tres ſunt ſententiæ principales. Quidam enim Philoſophi dixerunt Animam formari ab intelligentia, paritate deſumpta a corpore, quatenùs, ſicut corpus cœleſte concurrit ad productionem humani corporis, ſic intelligentia ad productionem Animæ. 2. ſententia fuit, quod Animarum productio fiat per traductionem, quemadmodum caro ex carne traducitur, & ſicut ab vna candela accenduntur multæ; ſic ab vna Anima per ſui communicationem abſque ſui diminutione viuificantur multa corpora. In qua ſententia fuit aliquando etiam D. Auguſt. contra D. Hieronymum, vt liquido conſtat ex comment. ſuper Genef. & in lib. 3. de lib. arbitrii. c. 21. & lib. de Anima, & eius origine cap. 1. & 2. Verùm tandem hanc dubitationem depoſuit in lib. de Eccl. dogmatibus c. 14. vbi affirmat, Animas hominum non eſſe ab initio creaturas intellectuales natas, ſed à Deo creati, atque infundi, formato iam corpore, vt viuat in vtero ho-

homo ex Anima constans, & corpore, & hæc est tertia sententia, quam vnanimi consensu à multis retroactis sælis tenuerunt, & omnes Theologi scholastici, & Ecclesiæ Doctores, iuxta quam sit.

Concl. Animæ omnes rationales, siuè primorum parentum, siue posterorum à Deo immediatè creantur, & in corpus organizatum infunduntur, dum creantur, & oppositum asserere, hoc est Animas produci per propagationem, vel fieri ex traduce, videtur D. Thomæ, & Vasquez hæreticum, vt videre est in 1. p. q. 118. art. 2. Magist. sentent. Alphonso à Castro lib. 2. aduersus hæreses, & omnibus recentioribus, vt eleganter, & erudite obseruat Macedo tom. 2. collat. 6. diff. 3. ad minus est error in fide; quod deducunt ex Concil. Bracharensi c. 6. & Lateran. sub Leonè X. c. 8. & Vien. sub Clemente V. relato cap. 5. *de Trinit. & fide catholica s. porro, & cap. firmiter de sum. Trinit.*

Prob. conc. ratione, ex D. Bonau. in 2. d. 18. q. 2. Si Anima rationalis, cum sit substantia per se existens, & incorruptibilis habeat materiam, & formam, cum ergo producitur; aut producitur ex materia præiacente, aut simul cum ipsa producitur sua materia, si simul, ergo necesse est, vt producat ex nihilo, ergo à solo Deo; si producitur ex materia præiacente: quæro de illa materia; aut est corporalis, aut spiritalis; si corporalis, ex ea non potest fieri Anima, si spiritalis, aut habet formam, aut non, quomodo potest esse in rerum natura sine forma, cum omne esse sit à forma, si habet, ergo, vel erit Angelus, vel Anima, non Angelus; constat: ergo Anima, sed ex eodem non fit idem numero, ergo ex ea non potest fieri Anima.

Arg. cont. conc. Non apparet vlla implicantia, quod vna substantia spiritalis aliam ex se producat: ergo non apparet implicantia, quod Anima rationalis fiat ex traduce. Prob. conseq. ant. enim patet; nam D. Bonau. Ricard. Aureolus, & alij docuerunt, esse possibilem materiam spiritualement. Sicut ex materia corporea traducitur, mediante semine, corpus; ità ex materia spiritali videtur posse traduci Anima ex Anima, per quamdam virtutem spiritualement ad instar virtutis seminalis, ergo &c.

Resp. neg. primum ant. ad cuius probat. negatur conf. & negatur pariter, eius probatio deducta à paritate semi-

nalis propagationis: maximum enim est discrimen inter materiam corpoream, & spiritualem, si tanquam possibilis admittatur. Siquidem spiritus, cum sit immortalis, non eget propagatione, quemadmodum est necesse ponere in corporibus, ad hoc, ut conseruetur species in indiuiduis: tum quia, ut discurret D. Bonau. nequit excogitari modus possibilis huiusmodi translationis. Quod si admittatur modus possibilis, queri potest; an etiam in Angelis sit possibilis eiusmodi transductio; quod, quàm sit absurdum, nemo non videt.

Arg. 2. Vis generatiua principaliter residet penes Animam: ergo cum homo generet hominem, & generatio consistat in productione sibi simili in natura, principalius producit Animam, quam carnem, ac proinde, si caro est ex carne multò magis Anima erit ex traduce.

Resp. ex D. Bonau. dist. ant. residet principalius penes Animam per modum mouentis, & agentis, conc. ant. per modum termini producti, adeo ut Anima respiciat Animationis productionem, eamque efficiat, nego ant. Respicit namque vis generatiua corpus principaliter, tamquam illud, ex quo producit: quia verò decisio fieri potest à corpore, & non ab Anima, hinc est, quod ordinatur ad productionem corporis humani, & non Animæ rationalis.

### QVÆSTIO III.

*Vtrum homo reuerà factus fuerit de limo terræ,  
& Eva de costâ Adæ.*

**N**Ot. 1. Quòd elementa non manent formaliter in mixto secundum substantias, seu formas substantiales, eò quia forma substantialis, seu elementaris nata est constituere suppositum per se subsistens in genere substantiæ. Vnde si in eodem mixto essent elementa secundum suas formas substantiales, in ipso essent plura supposita; Quare corpus humanum, cum sit corpus mixtum, dicitur esse compositum ex elementis, non tanquam ex partibus suis, sed ut compositio dicitur naturalis conuenientia mixti cum suis elementis, quæ quidem conuenientia mixti cum suis elementis non est elementi ad elementum, sicut color

Ior medius, puta rubor, dicitur componi ex extremis, quia cum ipſis habet naturalem conuenientiam, non verò tanquàm ex partibus, imò rubor eſt æque qualitas ſimplex, ac colores extremi, ſecùs autem de coloribus mixtis ab extrinſeco agente.

Not. 2. Quòd non eſt neceſſe quatuor elementa concurrere ad compositionem mixti, immò fieri poteſt mixtum ex vnico elemento, aut ex duobus tantum, nam Genef. 1. dicitur. *Producant aqua reptile*, & Genef. c. 1. *Formauit Deus hominem de limo terræ*, quàmuis tale corpus dicatur compoſitum quatuor elementis. Vndè limus terræ componitur, vt notant Doctores, ex aqua, & terra. Neque elementa manent in mixto ſecundùm ſuas qualitates, quia non poteſt manere accidens naturaliter ſine ſuo proprio ſubiecto, ſed manent ſecundum qualitates conſimiles ob dominium talis qualitatis; dicitur enim aliquando elementum prædominari in mixto, ſicut in corpore humano dicitur terra dominari, quia in ipſo dominatur grauitas, quæ eſt qualitas moriua localiter conueniens terræ. Itaque elementa, vt docet Scotus in 2. d. 15. dicuntur manere, vel eſſe in mixto virtualiter, eo quia forma ſubſtantialis mixti virtute ſua continet formas elementares, quemadmodum Anima intellectiua continet virtualiter Animam ſenſitiuam, & vegetariuam.

Not. 3. quod dum S. Scrip. narrat formationem Eux ex coſta Adæ, hoc non eſt intelligendum allegoricè, vel parabolicè, vt perperàm expendit Caiet. ſed in ſenſu hiſtorico, & literali. Neque eſt credendum, quod ſola coſta Adæ fuerit ſufficiens ad formandum corpus Eux inſtatura perfectæ, ſicut à Deo formatum fuerat corpus Adæ, ſed aliundè fuit ſuppleta reliqua materia, quæ ad tale opus erat neceſſaria. Nihilominus dicitur, Euam ex coſta eſſe formatam, quia aſſumptio coſtæ eſt magis notabilis, & ſingularis, ac proindè principaliter intentæ; idque ob ſignificationem myſterij, videlicet, vt myſterio deſignetur, quod Eccleſia ſumit à Chriſto principium. Vndè Apoſtolus ad Ephes. c. 5. *Sacramentum hoc magnum eſt, ego autem dico in Chriſto & Eccleſia*, ad quod myſterium non pertinebat reliqua materia, etſi maior coſta ipſa.

I. Concl. Adam fuit creatus ex terra, ei immixta aqua, & hoc

& hoc quidem conuenienter vt ostendit Alensis, & D. Thom. Prob. conc. auct. S. Scrip. Gen. c. 2. dicentis. *Formauit igitur Deus hominem de limo terre, & inspirauit in faciem eius spiraculum vitæ*. Quibus verbis explicat in primis materiam, ex qua corpus hominis factum est, nempe limum terræ, quem Deus in productione eius idcirco adhibere voluit, vt tam humili sui principij vtilitate confundere-  
tur, & suæ originis consideratio esset, vt ait Basil. salutare quoddam amuletum aduersus quodcunque peccatum. Deindè formam eius declarat, dum subdit; inspirauit in faciem eius spiraculum vitæ, vbi hebraica lectio spiraculum vitarū, quo indicari videtur triplex vita, quam Anima rationalis tribuit corpori, nempe vegetatiua, sensitiua, & rationalis, qua vegetamus, sentimus, & intelligimus.

II. Concl. corpus mulieris est factum de costa Adæ, non quidem secundum rationem seminalem, sed tanquam ex materia ex qua, cum suppletionem tamen reliquæ materiæ, vt dictum est supra. 1. pars est communis, quia costa nullo modo se habuit in ordine ad corpus Eux tanquam ratio seminalis, quæ, vt alibi dictum est, habet virtutem partialem producendi effectum animatum. 2. pars videtur de fide, vt tradit doctissimus noster Castro in lib. cont. hæreses hæresi 6. vbi eruditè confutat opin. Origenis, & Caiet. asserentium textum S. Scrip. intelligi tantum spiritaliter, & in mysterio, & secundum Caiet. in sensu parabolico. Prob. igitur Concl. ex S. Scrip. quæ c. 2. Genes. narrat hystoricè formationem Eux, ac proindè hystoricè est intelligenda; *Et edificauit Dominus Deus costam, quam tulit de Adam in mulierem*. Subditque Adam: *Hoc nunc os ex ossibus meis, & caro de carne mea*; ergo &c.

Nec fauet Caiet. quod Genes. c. 1. dicatur *Masculum, & feminam creauit eos*: Quia non additur, quod simul fuerint creati. Tum quia, sicut Adam non fuit creatus creatione strictè accepta, sic pariter nec Eua. Constat etiam manifestè ex S. Scrip. quod Deus non statim simul cum Adamo produxit Euam, vicut fecerat, producendo alias species Animalium. sed ex homine iam producto eam eduxit, ac formauit ex eius costa. Et hoc quidem congruenter; tum vt homo cognosceret se ordinari ad nobilior opus vitæ, quod est intelligere, non verò ad generationem, & propa-

gationem, cui mulier deferuit; tum etiam, ut in hoc quædam dignitas hominis seruetur, ut, sicut Deus est principium totius vniuersi, ita etiam homo esset principium totius speciei iuxta illud Act. c. 17. *Deus fecit ex uno omne genus hominum.*

Arg. cont. 2. conc. à Caiet. Si Eua fuisset formata à Deo ex costa desumpta ab Adamo, sequeretur, Adam fuisse monstruosum, utpotè prius vna costa abundantem, vel saltem postea vna carentem, sed hoc videtur absurdum ergo &c. Resp. ex D. Thom. D. Bonau. & Scot. neg. sequentiam, & ratio est, quia, licet prius abundauerit vna costa, eique superflua; fuit tamen necessaria ipsi, tanquam principium totius generis humani instar seminis, ac proinde non erat absolutè superflua, nec reddebat ipsum monstruosum. Quare ablata costa, fuit apertura carne consolidata, ut indicat S. Scrip. dicens *Et repleuit carnem pro ea*; quicquid dicant Catherinus, Perer; & alij opinantes pro costa ex qua fuit formata Eua, fuisse à Deo loco illius alteram costam productam, quæ quidem opinio non cohæret S. Scrip. & minus secundum lectionem, seu textum, hebraicum, qui tantum sonat, & clausit carnem pro ea ut rectè aduertit Herincx.

#### QVÆSTIO IV.

*Vtrum Adæ fuerit à Deo donata iustitia originalis.*

**N**Ot. 1. Quòd varia fuerunt foeliciissimi status Innocentiæ priuilegia. 1. & præcipuum fuit, quod! Adam in statu gratiæ, & iustitiæ originalis Deus creauit, ut expressè tradit Conc. Trid. sess. 5. in decreto de pecc. origin. can. 1. ubi ait; *Adam peccando amisit sanctitatem, & iustitiam, in qua constitutus fuerat, & colligitur ex S. Scrip. Eccles. 7. Fecit Deus hominem rectum.* 2. Priuilegium, seu donum Adæ concessum in statu Innocentiæ fuit, quod intellectus eius fuit plenitudine scientiæ perfusus; nam de primis parentibus dicitur Eccl. 17. *Disciplina in colloquii repleuit illos, creauit illis scientiam spiritus, sensus impleuit cor eorum, & mala; & bona ostendit illis.* Idem colligitur ex eo, quod S. Scrip. narrat, Adam imposuisse nomina animalibus, hoc autem peritè



facere non potuisset, nisi ipsorum naturas, & proprietates rectè cognouisset. Neque solam notitiam rerum naturalium habuit Adam, sed etiam supernaturalium, præsertim mysterij Trinitatis, & Incarnationis &c. immò Scot. 2. d. 3. q. 9. vt aduertunt plerique Scotistæ ponit in primis Parentibus speciem Diuinæ Essentiæ, eo modo, quo probabiliter ponit in Angelis; ponit tamen in Angelis speciem perfectiori modo, quàm in Adamo, de qua quidem specie impressa satis egimus in tract. de Angelis. 3 Priuilegium Adamo concessum in sua creatione est, quod tunc eius voluntas omnibus virtutibus infusis, tam moralibus, quàm Theologicis fuit condecorata. Siquidem sic postulabat status ille Innocentiæ, in quo omnes Animæ vires disponendæ erant ad Deum perfectè cognoscendum, & amandum. Vnde D. August. ad Cathecum. c. 2. loquens de Adamo in statu Innocentiæ, ait, *Quod tunc erat pudicitia armatus, temperantia composcens, claritate splendidus &c.* 4. Priuilegium erat, quod Protoparentes gaudebant pleno, & dispotico dominio super omnia animantia, vt constat ex S. Scrip. Genes. 2. *Et præsit piscibus maris, & volatilibus cæli, & Bestiis, omniq; reptili, quod mouetur in terra;* Et certè conueniens erat, vt qui solus ratione, & prudentia erat, & qui dominabatur dispoticè appetitui sensitiuo, dominaretur etiam inferioribus creaturis, quæ propter ipsum fuerant creatæ. 5. Priuilegium fuit immunitas ab omni errore, & deceptione, nam error, & deceptio sunt defectus, seu miseræ naturæ corruptæ, non integræ. Quare D. Aug. lib. 3. de lib. arbitr. c. 18. ait. *Approbare falsa pro veris, ut error innotus, non est natura instituta hominis, sed pœna damnati.* Nequè Eua à Serpente fuit decepta, dum erat innocens, quia, licet illa seductio mulieris non præcesserit peccatum operis, subsequuta tamen est peccatum internæ elationis iuxta D. Aug. Thom. Scotum &c. 6. Priuilegium fuit immunitas ab omni egritudine, dolore, & tristitia, eò quia ille foelicissimus status erat veluti quædam inchoatio beatitudinis cœlestis, in qua non solum est omnium bonorum affluentia, sed etiam carentia omnium malorum, & immunitas: idèq; erat immortalitate dotatus. Qualiter verò cum corpore consistere poterat immortalitas, disputabitur infra,

Not. 2. Quòd Doctores non satis conueniunt in expli-  
cando, quid sit, & in quo consistat iustitia originalis.  
Henric. de Gand. quolib. 6. q. 11. putauit iustitiam origi-  
nalem fuisse quamdam naturalem rectitudinem humanæ  
voluntati insitam, per quam poterat ipsa voluntas princi-  
pari appetitui sensitiuo, ac illum, quò vellet, flectere.  
Verùm hæc opinio vt falsa, & improbabilis rejicitur à  
Scoto, asserente, iustitiam originalem, esse donum super-  
naturale, cui consonant cæteri Theologi. Thomistæ dis-  
sentiant, nedum à Scoto, sed etiam inter se. Quidam enim  
cum Scoto lib. 1. de natura, & gratia c. 5. censent, iusti-  
tiam originalem fuisse ipsammet gratiam sanctificantem,  
primis parentibus concessam. Quidam verò cum Caieta-  
no volunt, esse quoddam donum supernaturale à gratia,  
& charitate sanctificante prorsus distinctam: at aliorum  
opinionibus omisiss, sit.

I. Concl. Iustitia originalis erat distincta realiter à gra-  
tia, ac proinde diuersa à gratia sanctificante. Est Scoti in  
2. d. 29. vbi sic discurrit. Quod si iustitia originalis fuerit  
aliquod donum supernaturale, non tamen oportet, quod  
sit principium merendi. Se enim habet ad gratiam, quæ  
est principium meriti, sicut excedens, & excessum; exce-  
dens quidem, quia fini vltimo coniungit firmitus volunta-  
tem, quàm gratiam; ita enim coniunxit secundum ali-  
quos, quod non patiebatur secum aliquod peccatum ve-  
niale; charitas autem compatitur. Vel secundum prædi-  
cta saltem ita coniunxit, quod faciliùs, & delectabiliùs  
erat ei pati ab aliqua tristitia inferiori, quam alicui dele-  
ctationi inferiori acquiescere, recedendo à delectatione  
finis. Istam fælicitatem non facit gratia, cum qua stat  
præparata ad malum, & difficultas ad bonum. Sed excedit  
gratia in hoc, quia ipsa coniungit fini, vt bono superna-  
turali, & vt supernaturale per meritum attingendo tale  
bonum; non sic istud donum, sed tantum coniungebat illi  
bono, vt conuenienti, & delectabili, hæc Scot. loc. cit.  
Itaque gratia gratum faciens perficit hominem in ordine  
ad finem supernaturalem, non autem in ordine ad finem  
naturalem, neque ad naturalem integritatem, & perfe-  
ctionem hominis; & hoc præstabat iustitia originalis.

Prob. 2. Si iustitia originalis non esset à gratia distincta,

sequeretur, quod Adam per poenitentiam, & nobis per Baptismum redderetur illa iustitia originalis, sed consequens est falsum: ergo &c.

II. Concl. Iustitia originalis adæquatè sumpta non erat vnus, & simplex habitus, sed complexio omnium habituum, quibus homo idoneus reddebatur ad exercendas expeditè, & perfectè omnes actiones naturæ suæ conuenientes. Est Scoti loc. cit. vbi subdit. Si dicatur quod ipsa potentia inferior ex parte sui delectabiliter obedat rationi, tunc videtur, quod oporteat aliquid ponere in potentia inferiori, quo sic delectabiliter feratur in delectabile voluntatis. Non enim videtur, quod ex natura illius potentiae esset delectabiliter auelli à suo delectabili, nec etiam erat ex natura sua in quantum est inferior voluntate, delectabiliter auelli à suo delectabili ab ipsa voluntate; quia iste ordo essentialis manet nunc, & tamen nunc non est talis delectatio. Oportet enim ponere in singulis potentijs appetitiuis singula dona; ita quod quælibet per suum donum delectabiliter moueretur à voluntate, & ipsa voluntas per donum suum delectabiliter moueret se ad potentias inferiores, & si essent talia plura dona, potissimum tamen fuit iustitia originalis, quæ fuit in voluntate. Hæc Scotus. Itaque in speculatio intellectu continebat omnes scientias speculatiuas rerum omnium, quæ naturaliter sciri possunt ab homine, estò proficere potuisset in cognitione singularium, complexionum, & in scientia experimental. In intellectu practico omnia continebat, quæ ad rectam politiam, seu gubernationem sunt necessaria, & maxime prudentiam, & insuper artes, quæ vsum habent ingenuum, ac liberalem, & honestam oblectationem, qualis est agricultura, Musica, Arithmetica, ars pingendi, & huiusmodi. In voluntate duo erant habitus, alter erga Deum, nempe religionis, alter erga proximum, nimirum iustitiæ secundum omnes partes eius. Et denique in appetitu sensitivo, qui duplex est scilicet irascibilis, & concupiscibilis erant virtutes morales. Etenim naturale est, vt potentiæ perficiantur per suos habitus, & sic est modus naturalis, quo singulæ potentiæ perficiuntur, vt idoneæ, & expeditæ sint ad suas perfectas functiones obeundas; idcirco iustitia originalis omnes præ-

prædictos habitus continebat in gradu perfectissimo, & heroico.

Arg. 1. cont. 2. conc. à P. Gonet. qui in Compend. theol. contendit iustitiam originalem non distingui à gratia sanctificante, nisi secundum diuersa munera. Gratia habitualis, & capitalis in Christo, & gratia habitualis, & sacramentalis in nobis non distinguuntur realiter, sed sunt vnus simplex habitus diuersa nomina recipientia ob diuersa munera ergo sic pariter iustitia originalis, & gratia sanctificans in Adamo erant idem habitus secundum rem, esto multiplex secundum munera. Resp. neg. ant. quoad vtramque partem, nam in nostra sententia, tam gratia habitualis Christi distinguitur à gratia capitis, quam gratia sanctificans à gratia Sacramentali: gratia enim capitis, radicaliter fundatur in vnione hypostatica, quæ Christum constituabat personam dignissimam, & quam consequabatur velut proprietas gratia habitualis. Gratia pariter Sacramentalis distinguitur à sanctificante, eo quia gratia Sacramentalis est quoddam auxilium actuale, quod datur tali, vel tali tempore, prout exigit finis cuiusque Sacramenti, & sicut Sacramenta sunt diuersa ita etiam ista auxilia sunt diuersa prò diuersis finibus, ad quos Sacramenta ordinant hominem. Itaque negatur assumptum in antecedente.

Arg. 2. à Molin. disp. 27. de opere sex dierum, & 1. authorit. Eccles. c. 7. vbi dicitur: Deus fecit hominem rectum, & non nisi per originalem iustitiam, tres causantem in illo subiectiones, nempe primam rationis Deo; secundam virium superiorum inferioribus; tertiam corporis Animæ: ergo iustitia originalis includit in se gratiam sanctificantem. Resp. dist. conf. concomitanter, & ex Diuina dispositione, conc. conf. formaliter, & ex natura rei, adeo vt gratia secundum rem sit iustitia originalis, neg. conf.

Cont. Arg. ab eodem. Iustitia originalis non est virtus cardinalis, cuius munus est reddere vnicuique quod suum est, sed est habitus reddens hominem iustum ergo iustitia originalis necessariò includebat gratiâ formalem.

Confirm. sublati alijs supernaturalibus virtutibus, nempe fidei, spei, & Claritatis, nullum aliud in primis

Parentibus remaneret donum supernaturale, quo Deo fini supernaturali subessent, ergo nec remaneret sine illis iustitia originalis ergo est idem cum gratia.

Resp. neg. assumptum, quia cum iustitia originalis sit complexio habituum moralium, sequitur, quod sit etiam iustitia, quæ est virtus moralis, seu cardinalis. Quare concedimus reddere hominem iustum, quia Deo subiectum, non quia Deo specialiter gratum, vel amicum. Ad confirm. dicimus, quod remaneret iustitia originalis, data hypotesi, quod Deus de potentia absoluta tolleret habitus prædictos, quæ redderet hominem iustum, quia subiectum Deo, & coniungeret Deo, tanquam fini conuenienti, & delectabili, vt ex Scoto dictum est suprâ.

Cont. peccatum originale solum dicit carentiam iustitiæ originalis, sed in illa carentia includitur pœna damni, & gratiæ priuatio ergo in ipsa iustitia originali includebatur debitum vitæ æternæ radicum in gratia sanctificante, ac proinde coniungebat Deo tanquam vltimo fini per meritum attingendo. Resp. transeat mai. & dist. min. concomitanter ex ordinatione diuina includebat penam, & reatum, ac gratiæ priuationem, conc. min. de formali, & ex natura rei, nego. Resp. 2. dist. mai. peccatum originale solum dicit carentiam iustitiæ originalis latè sumptæ, vt comprehendit etiam gratiam sanctificantem, conc. mai. strictè sumptæ, neg. mai. Erant igitur in statu innocentie ita connexæ iustitia, & gratia, vt neutra posset amitti de potentia ordinaria sine altera, vt indicat Conc. Trid. in Decret. de pecc. orig. exinde tamen non sequitur, quod iustitia originalis, & gratia secundum rem sint pœnitens idem.

## QVÆSTIO V.

*Vtrum homo, si status innocentie perseverasset, fuisset immortalis.*

**N**OT. 1. Quid mortale dicitur id, quod est aptum natum, siue potens mori; immortale ex opposito dicitur per negationem mortalitatis, quæ quidem negatio dupliciter intelligi potest; vno modo negans aptitudinem, siue potentiam moriendi, & sic immortale idem est, quod

non potens mori; alio modo neg. actum solum moriendi, & sic immortale idem est, quod potens non mori Vnde homo secundum diuersos status diuersimodè se habet ad posse mori, & non posse. Est enim triplex status naturæ humanæ, vt dicit Hugo lib. de Sacram. 1. est status nature institutæ, in quo poterat homo mori, & non mori: 2. est status naturæ lapsæ, in quo potest mori, sed non potest non mori: 3. est status naturæ glorificatæ, in quo homo non potest mori.

Not. 2. quod duplex est causa in genere mortis in homine, vel intrinseca, vel extrinseca; Prima est duplex, quia, vel corrumpitur ab intrinseco per actionem mutuam contrariorum inter se, & intra corpus, vel propter actionem intensam vnus intrinseci in aliud, vel corrumpitur propter defectum alterius contingentem, idest ex subtractione alimenti, & huiusmodi: primo modo accidit corruptio naturalis in animatis, non propter actionem elementi in elementum, quia in mixto, vt tactum est supra, non manent elementa formaliter, ac proinde nec eorum qualitates, sed propter actionem vnus partis organicæ in aliam partem, corrumpendo ipsum, vt corpus fiat indispositum, & inhabile ad animationem: ista autem actio ponitur caloris naturalis in humidum radicale &c. hæc Scot. in 2. d. 19. q. 1. vbi diffusè discurret, & s. quid de causâ extrinseca corruptiua? resp. dico, quod illa est duplex, vel scilicet propter dispositionem contrariam continentis, vel propter violentiam illatam ab aliquo extrinseco. Primo modo contingit dupliciter; quando vno modo continens directè corrumpit contentum, vt ignis corpus, quod continet; alio modo quando non directè corrumpit, sed prohibet illud, quod est necessarium ad vitam, cuiusmodi est aqua prohibens inspirationem, & terra &c. est etiam continens corrumpens, sed non ita subito, vt aer regionis intemperatæ: à prima, & secunda corruptione fuissent immunes homines, stante innocentia vniuersaliter in omnibus, quia tunc non exposuissent se periculis, aliter essent nocentes, nec vnus alij intulisset violentiam, cum vterque fuisset innocens.

Nec etiam fuisset ibi corruptio ex tertia causa, quia in Paradiso fuisset aer temperatissimus. Sed quid de corru-



ptione violenta? Dico, quod illa potest fieri, vel ab homine, vel ab Angelo malo, vel à bestia, siue animali quocunque. Dico igitur, quod à nullo animali recepissent nocumentum, stante innocentia, quia omnia animalia fuissent homini mitia, & amicabilia; vel saltem non inimica, nec ab Angelo malo, quia Deus conseruasset eum, non quia non potuisset corpus innocentis scindi, & diuidi à malo Angelo, cui obediunt corpora inferiora iuxta illud Iob. cap. 41. *Non est potestas, qua ei valeat comparari, & etiam ab alio malo homine, si non fuisset innocentia vniuersalis, sed Deus innocentem conseruasset.* Hæc Scot. loc. cit.

Not. 3. Quod circa hanc quæst. diuersi sunt modi dicendi. Primus fuit Pelagij, qui inter alios suos errores dicebat, Adam omnino fuisse moriturum, siue peccaret, siue non peccaret, nec mortem fuisse in homines per peccatum introductam, quod, cum sit apertè contra S. Scrip. in Conc. Mileuit. fuit damnatum cap. 1. vbi sic habetur. *Si quis dixeris, Adam mortalem factum, ita vt siue peccaret, siue non peccaret, moreretur non peccati merito, sed necessitate natura, anathema sit*; 2. fuit Michaelis Baij, qui asseruit, in statu innocentia fuisse à Deo conditum hominem immortalem per naturam, sicut Angelus, & Anima rationalis, quæ quidem propositio cum alijs damnata fuit à Pio V. & postea à Gregorio XIII. & tandem ab Urbano VIII. 3. modus dicendi est D. Thomæ q. 97. art. 1. quod homo fuisset immortalis propter aliquam qualitatem supernaturalem traditam Animæ in statu illo, quæ conseruasset corpus à corruptione, & hæc dicitur esse illa iustitia originalis; ita refert Scot. in hac q. 6. alia ratio. Verùm subdit. Non tamen video, quod illa qualitas posset facere, quod tale corpus non pateretur à contrario, & sic tantum potuisset pati, quod fuisset mortuum, nec aliquid morti repugnans necessariò includebatur in innocentia; 4. modus est Molinæ, qui in opere sex dierum, opinatur, qualitatem quamdam corpoream fuisse Adæ per totum corpus infusam, qua mediante, reddebatur incapax læsionis, sicut corpora gloriosa conseruari dicuntur per dotem intrinsecam impassibilitatis, & rationem assignat, quia Deus non tribuit similes effectus permanentes, ac diu per se duraturos per

solam suam extrinsecam voluntatem, sed proportionato modo per secundas causas; sed possibilis est aliqua physica qualitas tribuens corporibus illam repugnantiam, ergo &c. Confirmatur, quia corpus gloriosum fit immortale per qualitatem intrinsecam illi statui accomodatam: ergo pariter corpus Adæ in statu innocentiae, erat immortale per qualitatem intrinsecam. Cæterum nequè hic nouus modus opinandi habet solidum fundamentum. Etenim illa qualitas siuè spiritualis, siuè corporalis ponatur, impedire non potuit, quòminus posset homo gladio interfici, aquis suffocari, non enim fuisset corpus impenetrabile, sicut est corpus gloriosum, cuius immortalitas in nostra sententia, vt docet Scot. in 4. d. 49. q. 13. seu impassibilitas refundenda est in Deum, qui intimo influxu temperamentum Beati perpetuò sic conseruat, vt omnibus causis, tum internis, tum externis, siuè corruptiuis, siuè afflictiuis concursus denegat: fuisset nihilominus Adam impassibilis, ac proinde instar Beati per diuinum influxum, sed diuerso modo, nam Beati sic conseruantur à Deo, vt mori non possint, Adam verò erat immortalis, quia non debebat mori, seu poterat non mori: estò posset etiam mori, vt rectè notat D. Aug. 22. de Ciuit. Dei c. vlt. & cum eo discurrit eleganter noster Herincx p. 2. disp. 3 q. 3. Itaque ista immortalitas non proueniebat in Adamo ob aliquam qualitatem, sed per intimum diuinum influxum conseruatuum temperamenti, & per lignum vitæ &c.

Concl. Adam in statu innocentiae erat immortalis, non quidem ex sui natura, sed ex beneficio Conditoris, & priuilegio. Vnde D. Aug. ait *Hominem esse immortalem, non ex natura conditione, sed ex beneficio Conditoris*. Est Scoti loc. cit. & patet ex dictis contra Balum, & insuper quoad. 1. part. probat. ratione. Omne agens physicum in agendo repatitur, & sic per continuam actionem debilitatur, & tandem consumitur; sed calor naturalis sic se habet respectu humidi radicalis; ergo tandem per actionem in humidum radicale, & in nutrimentum oppositum, conuertendo illud in substantiam aliti, tandem fuisset debilitatus, & consumptus, ergo &c. Nec valet dicere, fuisse factam restaurationem caloris, & humidi naturalis per esum ligni vitæ, de quo dicitur habuisse virtutem reddendi hominem im-

mortalem, etiam post peccatum, quare *Deus expulit Adam de Paradiso, ut habetur Genes. ne forte extenderet manum suam, & sumeret de ligno vite, & comederet, & viveret in aeternum.* Non valet, inquam, eò quia talis restauratio non poterat fieri, nisi per conuersionem ligni in substantiam aliti, ac proinde in tali conuersione fuisset repassio agentis, idest caloris naturalis in lignum, quod conuersum in substantiam, non esset tantæ virtutis, vt totaliter posset calorem naturalem, & humidum radicale restaurare; ergo tandem oportuisset ipsum corpus defecisse; exemplum de vino potest esse idoneum ad hoc declarandum, quod conuertent in se aquam, tamen replicatis vicibus, destruitur vinum. Adde cum Peterio lib. 3. in Genes. Si arbor vitæ vim habuisset conseruandi vitam hominis per infinitum tempus; ergo illa vis fuisset otiosa, & superflua, quia homo in statu innocentiae non semper in terris erat permanfurus; sed vt dicit Scot. fuissent innocentes tempore definito translati à Deo in cœlestem Paradisum, priusquàm corpora eorum fuissent alterata alteratione improporcionata Animæ rationali ipsum informante, & hæc translatio fuisset facta de omnibus hominibus, non simul, sed successiue iuxta natiuitatem prioris, & posterioris.

Prob. Concl. quoad 2 partem. Est veritas de fide definita in symbolo Diospolitana; vt refert D. Aug. de gestis Pelagij c. 11. & habetur expressè in Scrip. *Per unum hominem (ait Apost.) peccatum in hunc mundum intrauit, & per peccatum mors, & ira &c* & in lib. Sapient. *Quoniam creauit Deus hominem inexterminabilem;* vbi græca lectio sic habet; *Deus creauit hominem incorruptibilem, sed huiusmodi incorruptibilitas non erat ei insita à natura; ergo à Deo, qui mortem ei minatus est, dicens. In quocumque die comederis ex eo, morte morieris.* Eandem veritatem tradunt Sancti Patres, inter quos D. Fulgent. lib. de Incarnat. c. 12. sic habet. *Nisi precessisset in peccato mors Animæ, numquàm corporis mors in supplicio sequeretur;* ergo per peccatum spoliatus Adam fuit priuilegio immortalitatis, ac proinde ex beneficio conditoris, vt ait D. Aug. non naturæ conditione erat Adam immortalis. Prob. etiam breui ratione. Omnis proprietas naturalis semper sequitur subiectum suum; sed ista immortalitas non remansit in homine post peccatum ergo &c.

Arg.

Arg. 1. quod homo non poterat mori, etiam si perman-  
 sisset in æternum hic in terris. Deus expulit Adam, ne  
 comederet lignum vitæ, & viueret in æternum, vt supra  
 tactum fuit: ergo sic post peccatum pariter lignum vitæ  
 vim habebat conseruandi hominem immortalem per to-  
 tam æternitatem. Resp. ex Scot. & ex doctrina SS. PP. ly,  
 æternum, non sumi pro æternitate, sed per longum tem-  
 pus, idest lignum vitæ vim habebat conseruandi homi-  
 nem, etiam post peccatum per longum tempus.

Arg. 2. quod homo in statu innocentie esset mortalis,  
 non obstante iustitia originali quia, hac non obstante,  
 corpus hominis in illo statu erat passibile passione immu-  
 tatiua ergo erat mortale. Resp. dist. ant. erat passibile  
 passione immutatiua perfectiua, sed neque abiectiua con-  
 uenientis, neque læsiua subiecti, cuiusmodi est receptio  
 speciei intelligibilis, conc. ant. erat passibile passione læ-  
 siua, aut afflictiua subiecti, cuiusmodi esset notabilis con-  
 sumptio humidi radicalis, aut excessiua diminutio ca-  
 loris naturalis, neg. ant. Vndè quàmuis fuisset in illo statu  
 aliqualis consumptio humidi radicalis, non fuisset tamen  
 abiectiua conuenientis, neque læsiua, neque afflictiua su-  
 biecti, nempe corporis innocentis.

## QVÆSTIO VI.

*Vtrum si status innocentie perseuerasset, filij nati fuis-  
 sent in iustitia confirmati, & omnes soli electi.*

**N**OT. 1. Quòd genus humanum in statu innocentie  
 fuisset propagatum per veram copulam coniugalem,  
 & hoc videtur de fide, vel saltem oppositum est error, vt  
 aduertit Castro contra hæreses, quem docuerunt Armeni,  
 asserentes, Adam, & Euam, si permansissent in iustitia, non  
 coituros vnquam, nec humanam speciem propagandam  
 per commixtionem viri cum foemina, immò etiam qui-  
 dam SS. PP. vt Greg. Nissenus, Damasc. & Chryso st. exi-  
 stimarunt homines in statu innocentie fuisse multiplica-  
 tos, vel per creationem, vel alio modo nobis ignoto; id-  
 que putabant, quia videbatur eis irrationabile admittere  
 in illo statu innocentie carnales commixtiones, quæ li-  
 bi.

bidinem, & turpitudinem sapiunt: verum, vt docent communiter D. Bonau. in 2. & alij Theologi, nulla fuisset turpitude, quia non ob inordinatum libidinis motum, sed solum ob prolis propagationē coiuiſſent, & delectatio ſequens coitum non fuisset quaſita, ſed potiùs paſſa, de qua multiplicatione eſt textus peſpicuus in Genef. c. 2. Dixit Deus hominibus, vti cæteris Animalibus. *Creſcite, & multiplicamini.* Vndè D. Aug. de pecc. origin. retractans ſententiam, cui aliquando adhæſerat, ait. *Neque ob aliam cauſam Viro adiutorium, non alius Vir, ſed ſæmina facta eſt &c.*

Not. 2. Quòd Adam erat nedum caput phyſicum totius generis humani, ſed etiam morale. Quare data fuit à Deo ipſi iuſtitia originalis hac conditione, vt docet Scot. cum alijs, quod ſi ſeruauit illam, ſibi donatam donata fuisset & poſteris, non per transfuſionem, ſeu per propagationem, ſed à Deo: ex quo factum fuit, vt Adam amiſſerit pro ſe, & pro omnibus ſuis filijs iuſtitiam originalem ob peccatum de eſu pomi vetiti. An verò ſi violauit Adam aliud præceptum, amitteret iuſtitiam originalem, variant doctores; quidam probabiliter negant, in tali caſu Adam fore amiſſurum iuſtitiam originalem; Alij verò, quibus aſſentior, aſſerunt, eò quia, ſicut peccatum mortale cum ſtatu innocentie componi nequit, ſic Adam peccando mortaliter in alio etiam genere peccati, cecidiſſet ab innocentie ſtatu.

Not. 3. ex Scot. in 2. d. 20. q. 1. quod duplici modo dici poteſt confirmatus aliquis in gratia. Primo confirmatione, qua quis ita in iuſtitia perſiſteret, vt peccare non poſſet; eo modo, quo creaturæ peccare non poſſe conuenire non repugnat, & hæc confirmatio ſolis Beatis competit, nec viatori cuiumquæ competere poteſt, ac proinde nec filijs in ſtatu innocentie. 2. dicitur aliquis confirmatus confirmatione minùs perfectæ, qua viator ita in iuſtitia permanet, quod nec peccat, nec ynquam peccabit, licet peccare poſſit; cum prima confirmatione nullum peccatum ſtare poteſt; cum ſecunda verò eſt compoſibile peccatum veniale; multi enim, & præcipuè Apoſtoli in terris degentes, fuerunt confirmati in gratia, qui tamen venialiter peccauerunt, excepta Immaculata Deipara, iuxta illud D. Ioan. *ſi dixiſſemus, quod peccatum non habemus, ipſi nos ſeducimus.*

Not.

Not. 4. Quòd duplicem sensum habere potest secunda pars quæstionis. Primus est; an omnes, qui nati fuissent in statu innocentiae, essent electi, & prædestinati; an potius fuissent inter electos aliqui reprobi. 2. sensus est, an soli illi, qui modo sunt electi, nascerentur; an verò alij diuersi. Quoad primum sensum putant aliqui, quod tunc nati etiam fuissent Ij, qui de facto damnantur, ita vt Deus ante præuisionem peccati decreuisset omnes istos nascituros, quorum aliqui essent salui, ex diuina gratia, aliqui damnati, vel omnes damnarentur. Ita Arriaga, Suarez lib. 5. cap. 10. qui quidem Doctores ducuntur quibusdam coniecturis, quæ sunt remotissimæ, vt videri potest apud Mastrium in 2. d. 4. q. 2. præcipuæ autem sunt istæ. Primo vt ostenderetur liberalis donatio beneficiorum Dei, quæ istis, & non illis impenderetur. 2. vt ostenderetur libertas humani arbitrij, & dependentia eiusdem à diuina gratia, & sic de iustitia, quæ omnia videntur gratis excogitata &c.

I. Concl. Si Adam innocens stetit, ipsius posterij confirmati fuissent in gratia non quidem ab initio suæ natiuitatis, sed postquam primam tentationem vicissent. Est Scoti in 2. d. 2. q. 1. conc. intelligitur de secunda confirmatione, non verò de prima, & in hoc sensu prob. auct. D. Ansel. lib. 1. cur Deus homo, vbi ait. *In illa iustitia, in qua erant primi homines constituti, videtur, quod si vicissent, vt non peccarent tentati, ita confirmarentur, cum omni propagatione sua, vt peccare ultra non possent; ergo fuissent confirmati &c.*

Prob. ratione. Constat plures homines post lapsum fuisse à Deo in gratia confirmatos: ergo multo magis fuissent confirmati filij Adæ, si iustitiam ipse primò seruasset; si enim postulabat ille sælicissimus status innocentiae. Quod autem Filij Adæ non fuissent confirmati in gratia ratione status innocentiae, & quasi iure hæreditario, patet ex doctrina Scoti, qui sic habet loc. cit. Cum enim illa iustitia sit donum supernaturale ex mera liberalitate diuina, esset datum proli, sicut fuit datum parenti, qui, si primæ tentationi restitissent, in illa iustitia confirmatus fuisset, & denique inquirens Doctor, fuisset ne filius confirmatus ab exordio suæ natiuitatis? Resp. dico quod non, quia filius non recepiſſet perfectiorem iustitiam, hoc est non fuisset



fuiſſent melioris conditionis nati, quam Pater; ſed Pater potuit eam perdere, & perdidit, ergo, & filius; nec etiam illa iuſtitia neceſſitabat eos ad benè agendum: ergo &c.

Confirm. quia meritum Adæ non fuit tantum quantum meritum Chriſti; ſed Chriſtus his non meretur, id eſt filijs Adæ donum confirmationis ſtatim conferendum; ergo nec Adam illud meritis fuiſſet ſuis filijs in ſtatu innocentiae, & hæc ratio videtur militare contrà D. Thom. qui, vt refert Macedo exiſtimauit donum iuſtitiae originalis, ſi Adam non peccaſſet, fuiſſe transfuſum merito ipſius Adæ; videndus eſt Maced. in t. 2. coll. 6. diff. 4. ſect. 2.

II. Concl. In ſtatu innocentiae ſoli electi fuiſſent nati, qui modo naſcuntur, ac proinde nullus reprobus locum habuiſſet in ſtatu innocentiae. Eſt Scoti in 2. d. 20. q. 2. & eſt communior, & probabilior. Prob. conc. quoad 1. partem auct. D. Greg. ſent. 4. moral. c. 36. ubi ait. *Si Parentem priuſ nulla peccati rubigo corrupiſſet, nequaquam ex ſe filios gehennæ generaſſet*; ergo in ſtatu innocentiae ſoli electi nati fuiſſent. Prob. rat. per peccatum Adæ totus ille ſtatus periit, ergo per illius innocentiam totus penitus, ac integer ſtare debebat. Prob. 2. a proportionem inter propagationem naturæ, & transfuſionem gratiæ, ſeu iuſtitiae; Sicut ab vno parente tota natura traducta eſt in poſteros, ita & iuſtitia videbatur transfundenda, ſic Deo ordinante, vt vna alteri reſponderet; ergo &c.

Prob. 3. & deſumitur à pacto Dei cum homine, quod huiusmodi videtur fuiſſe, vt ſi Adam obediret, omnis eius poſteritas ſaluaretur, ſecus tota damnaretur, ſicut accidit per peccatum. Prob. 4. & deſumitur à differentia huius ſtatus, & à confuſione vtriuſque ſtatus; quia, ſi in eo ſtatu eſſent peccata mortalia priuatorum; eſſet neceſſarius mediator, & redemptor, & gratia redemptoris, quæ conditio eſt propria huius ſtatus præſentis, non alterius. Quare ſequitur confuſio vtriuſque ſtatus. Accedunt auct. SS. PP. quæ idem apertè tradunt: ergo &c. Prob. conc. quoad 2. partem cont. Thom. opinantes, non eoſdem electos, qui modo naſcuntur, fuiſſe naſcituſ in ſtatu innocentiae, quorum fundamentum adducetur in parte argumentatiua. Prob. Scot. per illam celebrem doct. quam Scoti interpretes latè expendunt in primo agendo de prædeſt.

dest. Omnis ordinate volens post volitionem finis, immediate vult illud, quod est immediatius, vel proximius fini: Deus est volens ordinate ergo primò vult seipsum, vel bonitatem suam tanquam finem. 2. vult bonum creaturæ rationalis vltimatum, quod est communicatio beatifica, suæ bonitatis creaturæ tali, & postea vult gratiam, quæ ordinatur ad beatitudinem huius, vel ad fruitionem eius, & posterius vult istum Beatum, vel beatificabilem esse, nasciturum à tali parente, quod esse supponitur gratiæ. Cum ergo prius sint determinati beatitudini, quam quod nascantur à talibus parentibus, per quoscunque parentes nascantur, ex quo habent rationem posterioris huiusmodi parentes non poterunt variare determinatos beatificandos à voluntate Diuina, quin iidem numero nascantur. Et hæc ratio directè militat contra Thomistas, ponentes prædestinationem fieri antè præuisionem meritorum, vt hic tenet Scot. Cæterum si teneatur, quod prædest fiat ex præuisione meritorum, vt in 1. p. ego ipse tenui cum Frassen, & alijs recentioribus Scotist. aliter est discurrendū.

Arg. cont. 1. Conc. probando, quod in statu innocentie fuissent posteri nati, & ab exordio confirmati in iustitia. Meritum bonum est efficacius, & potentius malo, ac peccato ex Dion. c. 4. de Diu. Nomin. sed peccatum Adæ fuit causa, vt filij eius peccatores nascerentur; ergo meritum ipsius bonum esset causa, cur nascerentur iusti, & in gratia confirmari. Resp. Scot. dist. mai. meritum bonum est efficacius malo, quatenus per conversionem bonam efficacius Deo reconciliamur, quam mala antecedentia reconciliationem efficacia ad impediendum, conc. mai. quatenus bonum posset magis deseruire ad iustificationem aliorum, quàm malum ad eorum iniquationem, neg. mai.

Arg. 2. Si vnum oppositorum est alicuius oppositi causa, & suum oppositum erit causa similis effectus; sed peccatum Adæ est causa, cur filius nascantur iniusti: ergo iustitia eiusdem fuisset causa, cur filij nascerentur iusti iuxta maximam. Sicut oppositum ad oppositum, ita propositum in proposito.

Resp. Scot. si illa duo opposita essent à causa vniuoca, scilicet bonum iustitiæ originalis, & peccati malum, argumentum concluderet. Sed dico, quod illa regula fallit

in omnibus, vbi vnum oppositorum potest produci à causa vniuoca, & alterum tantum à causa equiuoca. Exemplum. Qualitas corporalis potest generare qualitatem corporalem, vt calor calorem; non autem qualitas incorporealis qualitatem incorporealem, qualitas enim incorporealis immediatè à Deo creatur, & sic patet resp. ad formam argumenti. Cont. Adæ posteri antè superatam tentationem habuissent idem donum supernaturale ad repugnandum peccato, quod eis fuisset concessum post superatam tentationem: ergo etiam antea fuissent confirmati. Conf. patet: ant. prob. donum confirmationis de quo agitur, nihil aliud est, quam illud diuinum beneficium, quo posset caueri peccatum, quoties se se offerret occasio peccandi: sed huiusmodi donum haberent homines ante deuictam primam tentationem, ex hypothesi, quod primam vicissent, ergo ante tentationem superatam habuissent idem donum, quod postea.

Resp. neg. ant. ad cuius probationem dicendum, quod illud donum confirmationis non fuisset diuinum beneficium quodcunque, quo caueri posset peccatum, sed fuisset tale auxilium, quod ex natura sua vim infallibilem haberet remouendi mortaliter voluntatem à peccato, quàmuis physicè peccare potuisset. Quod quidem donum non fuit concessum Adæ ab initio, sed donatum illi fuisset, sicut etiam eius posteris post deuictam primam tentationem.

Arg. cont. 2. conc. quoad 1. part. nempe quod in statu innocentiae non essent iidem electi, qui post lapsum nascuntur prob. sic contra doctrinam Scoti adductam in probatione conc. illa beatitudo non determinatur danda à Deo creaturae in abstracto, sed alicui certo, & determinato indiuiduo: at non potest certum indiuiduum determinari, nisi vt est talis numero, ac proinde à determinatis parentibus; ergo hi debent esse inuariabiles, & vt tales praesupponi ad praedestinationem, & sic ruit ratio Scoti adducta pro probatione conclusionis.

Resp. conc. mai. & neg. min. quoad illam partem, nimirum; ac proinde à determinatis parentibus; non enim oportebat determinare parentes, qui possent etiam variari, non variato effectu. Quare diximus in Philosophia, eundem

dem effectum posse produci à pluribus causis totalibus diuisim, licet non coniunctim, vbi adduxi etiam probationem theologicam spectantem ad hanc concl. & ratio est quia diuersitas effectus non attenditur penes causam efficientem eiusdem speciei, sed à partibus constituentibus, quæ cum possent constituere hominem tam in statu innocentie, quam naturæ lapsæ, sequitur, quod iidem electi nascantur modò, qui nati fuissent tunc. Essent enim eadem Anima, idè corpus, idem semen idem indiuiduum. Videatur quæstio cit. ne dicta repetendo, labamur in prolixitatem.

Arg. 2. cont. aliam partem conc. nempe, quod in statu innocentie non essent nati reprobi, & quidem auct. Scot. qui de hoc videtur valdè dubius. Scot. igitur in hac quæst. dicit sic. Pater potuit eam perdere, idest iustitiam, & perdidit: ergo & filius, quibus verbis indicat Doctor, quod sicut Pater potuit perdere, & perdidit, ita filius potuit, & perdidisset, sed ob amissam iustitiam originale homo fit peccator, & per consequens reprobus: ergo in illo statu fuissent etiam peccatores, & reprobi, vel saltem pœnitentes.

Resp. cum Macedo tom. 2. coll. 6. diff. 4. sect. 4. vbi latè discurret, tenendo ad mentem Scoti, quod si Adam non peccasset, nec eius posterì peccassent. Vnde expendens auct. Scoti, ita loquitur. Video illa verba (ergo, & filius) posse, ac liberè intelligi diuisiuè quoad partem potentie peccandi, vt sit sensus; ita etiam filius potuit perdere, non autem copulatiue, ita vt sit sensus. Ita etiam filius potuit, & perdidit, sicut Adamus, qui vtrumque habuit, idest posse peccare, & non peccare. Et quidem satis hoc est ad sensum loci, cum præsertim addat Scot. Nec enim illa iustitia necessitabat eos ad benè agendum; igitur mens Scoti erat adstruere libertatem, ad quam satis est potentia peccandi. Vndè illud; ergo & filius; quadrat in posse perdere: hæc Macedo, & denique confirmat suam expositionem hac alia auct. Scoti, qui in respons. ad 2. arg. dicit; concedo quod reprobi non fuissent nati, quia omnes nati seruassent iustitiam, non quia non seruare non potuissent &c.

*Vtrum Adam in statu innocentie potuisset peccare venialiter, priusquam peccasset mortaliter.*

**N**Ot. Quòd in hac celebri quæst. extant duæ famosæ opiniones. Altera est Alens. quem sequuntur D. Bonau. & D. Thom. cum suis, asserentes primum peccatum Adæ in statu innocentie non potuisse esse veniale; ratio, quia, vt ait D. Thom. in 2. d. 21. q. 2. art. 3. & in 1. 2. q. 89. art. 3. talis erat primi status rectitudo, vt superior pars rationis Deo subijceretur, cui subijcerentur inferiores vires, quibus subijceretur corpus: ita quod prima subiectio erat causæ secundæ, & sic deinceps. Manente autem maneret effectus. Vnde sicut quamdiù homo erat subditus Deo, nihil in corporis partibus contingere poterat contrarium Animæ, ita etiam nihil in viribus Animæ contingere poterat, quod superior ratio non ordinaret in Deum: quod autem rectè ordinatum est, veniale peccatum non est, & ita veniale peccatum in primo statu contingere non poterat, sicut nec mors, nisi prius ordo mentis ad Deum tolleretur, quod sine peccato mortali contingere non poterat; hæc D. Thom. qua ratione vtuntur Thomistæ recentiores, & signanter Gonet. in Compend. theolog. Altera est opinio Scoti, & Scotistarum in 2. d. 21. q. 1. §. dico ergo, vbi sic docet. Adam potuit, non tantum exercere actum deordinatum contra præceptum, sed etiam contra consilium tantum, vt non faciendo maxime expedienda, vel faciendo aliqua retardatiua, licet non faceret directè contra præceptum necessarium ad salutem. Insuper respondendo rationi principali D. Thomæ §. ad 2. ait. Estò quod verum sit, quod in inferioribus viribus non potuerit fuisse deordinatio, nisi præfuisset in superioribus, tamen dico, quod non omnis deordinatio in virtute superiori est peccatum mortale, nam levis motus per surreptionem de opinione aliqua circa articulos fidei est deordinatio in portione, & virtute superiori; nam potest esse circa tale obiectum, quod non potest considerari nisi per virtutes superiores, vt Deum esse Trinum, & Vnum, & tamen non omnis motus levis est sibi peccatum mor-

mortale, licet in superiori virtute sit grauius peccatum, quam in inferiori, vt patebit d. 24. hæc Scot. ergo de mente Scoti Adam peccare potuit primò venialiter, quàm mortaliter. Ideo fit.

Concl. Non solum de possibili, sed etiam de facto Adam, & Eva primò peccauere venialiter, quàm mortaliter.

Prob. quoad 1. p. sic. Vbicunque datur integra, & iusta libertas cum indifferentia ad vtramque partem, datur etiam potestas ad malè, vel benè agendum quomodocunque ad omnem actum virtutis, & peccati: sed in statu innocentie ita se habebat libertas Adæ: ergo dabatur potestas ad omne peccatum, ac proinde ad peccatum veniale.

Confir. ab inconuenienti. Si defuisset homini talis potestas, non habuisset meritum in vitando peccato veniali, sed in mortali tantum, quod certè videtur absurdum.

Confirm. Potens in materiam grauem peccare, potest etiam peccare in materiam leuem. Si enim Adam poterat mentiri cum iuramento, quare non poterat mentiri sine iuramento, ergo si Adam peccare poterat mortaliter, sicut de facto peccauit, à fortiori poterat peccare venialiter.

Prob. 2. donum iusticie originalis non coniungebat perfectiùs vltimo fini, quam gratia confirmationis in alijs: sed cum gratia confirmationis stare potest peccatum veniale, vt testatur D. Ioan. *Si dixerimus, quod peccatum non habemus. ipsi nos seducimus*: ergo &c. Resp. Thomistæ, & præsertim Gonet. tom. 2. compend. theol. quod peccatum, veniale non repugnabat Adæ ex parte libertatis, sed ex ratione status Innocentie, & hoc ab intrinseco; nam ex natura, & conditione status repugnabat homini quæuis miseria, tristitia, & pœna, & proindè quodcunque peccatum veniale, ad quod sequuta fuisset pœna, tristitia, & culpæ miseria.

Contra. Nihil assignari potest in statu innocentie intrinsecum, vel extrinsecum, quod esset incompatible cum peccato veniali, seu quod Adamum impediret ad venialiter peccandum. Non quidem intrinsecum, quia spectata libertate hominis, non repugnat ei posse venialiter peccare; neque aliquid extrinsecum; hoc enim solum esset Diuina prouidentia, quæ decreuisset in eo statu ita disponere, vt nunquam Adam peccaret venialiter, nisi prius pec-



casset mortaliter ; sed hoc gratis dicitur ; nam si Diuina Prouidentia non disposuit seruare hominem sine peccato mortali ; ergo nec sine veniali . Tum quia , admissa prouidentia tali , quæ in S. Scrip. non habetur , nec ex ea deducitur , ergo potuisset adhuc homo venialiter peccare , quia talis prouidentia non ademisset homini libertatem , sed ad summum , quod non exiret in actum peccaminosum venialiter : ergo potuit peccare venialiter .

Prob. Conc. quoad 2. p. & primò auct. S. Scrip. quæ c. 3. Genes. narrans tentationem , & lapsum Euæ , irà habet. *Serpens callidior cunctis animantibus terra, dixit ad mulierem ; eni praecepit vobis Deus, ut non comederetis de omni ligno Paradisi? cui respondit mulier. De fructu lignorum, quæ sunt in Paradiso, voscimus: de fructu vero ligui, quod est in medio Paradisi praecepit nobis Deus, ne comederemus. & ne tangeremus illud, ne fortè moriamur.* Ex quibus verbis perspicuè deducitur ( inquit Macedo t. 2. ) duobus modis verba Dei Euam peruertisse : primò per additionem , cum dixit , ne tangeremus . 2. per diminutionem , per illud , ne fortè &c. Deus namque non praecepit eis , ne tangerent , neque sub dubio comminatus est eis mortem , sed absolutè , vt clarè patet in textu S. Scrip. ergo peccauit sic mentiendo , non mortaliter ergo venialiter . Fauet D. Aug. nostræ sententiæ , qui in lib. 21. super Genes. ita discurret . *Nec arbitrandum est , quod esset hominem deieciurus , nisi præcessisset in Anima hominis quadam elatio comprimenda : ly deieciurus continet rem , vt aduertit Macedo ; loquitur enim de futuro Adæ peccato , & ly quædam elatio , significat culpam leuem , & lib. 14. de Ciuit. ait. Quomodo verum eris , Adam non est seductus , sed in expertus Diuina severitatis , in eo falli potuit , vt veniale crederet esse commissum .* Quid clariùs &c.

Arg. 1. cont. 1. p. Concl. Ille status erat integer , ordinatus , & coniunctus fini vltimo , sed peccatum veniale erat quædam deordinatio à recta illa integritate , & directione ad finem intra eundem statum ; ergo peccatum veniale , stante statu innocentiae , non erat possibile , quia esset status integer , & non integer , quod dicit contradictionem . Resp. conc. maj. & dist. min. erat quædam deordinatio peccatum veniale , itaut auerteret ab vltimo fine , cui erat coniunctus ; neg. min. itaut esset retardatium

tuum ad exercendos actus intensos virtutis, & faceret aliquo modo tepescere, conc. min. at id non repugnat, vt dictum est supra.

Cont. Si hæc vera essent, sequeretur, quod etiam Beatus peccare posset venialiter: sed conf. est falsum, ergo & ant.

Resp. neg. sequelam, cò quia status innocentiae erat status medius inter statum naturæ glorificatæ, & naturæ lapsæ, ac proindè poterat sine destructione sui admittere peccatum veniale.

Arg. 2. Si Adam potuisset primò peccare venialiter, illud peccatum, vel fuisset ab eo commissum per surreptionem, vel per suggestionem, vel per deliberationem, vel per passionem, non primo modo, quia surreptio provenit ex appetitus fomite, & sensus, qui tunc non erant in homine; non 2. quia Diabolus non suggereret per tentationem, quod nouerat posse stare cum integritate illius status in opinione Scoti non 3. quia cum voluntas esset recta, & coniuncta ultimo fini, non admitteret leuem deordinationem: non 4. quia cum tunc non esset pugna sensus, & appetitus sensitiui, non fuisset peccatum, ergo cum nullo ex istis modis potuisset Adam peccare peccato veniali, non peccasset primò venialiter. Resp. quod Adam potuisset peccare venialiter aliquo genere peccati rarò tamen, quia non erat status Beatorum, sed viatorum, ac proindè aliquis leuis defectus capax. Quare concedimus, quod Adam non potuisset peccare ex concupiscentia, seu fomite, potuisset tamen per suggestionem Diaboli; potuit enim tentari leuiter, & peccare, vt serpens infernalis per leuia ad grauias parentes traheret. Poterat etiam peccare deliberatè, vel mentiendo, vel dicendo verbum iocosum, vel quid simile. Cæterum de peccato passionis distinguitur: vel de passione, quæ est effectus fomitis, & in hoc sensu non admittimus in Adamo peccatum veniale, vel de passione, idest affectu immoderato voluntatis erga aliquid, & sic admittimus &c. Quæro enim à Thomistis; si Deus præcepisset sub culpa leui esum pomi, an potuisset tale præceptum transgredi, si sic ergo potuit venialiter peccare &c.

Arg. 3. Illud peccatum veniale, vel esset remissibile vel irremissibile; sed neutrum est dicendum ergo &c. Prob.

min. Non irremissibile, quia si peccatum mortale fuit remissibile, tanto magis veniale, ergo fuit remissibile, ergo opus foret aliquo remedio, vel sacrificio, vel Sacramento; ac proinde per redemptorem, & per gratiam remissionis, quæ non esset propria illius status. Deinde deberetur, ei pœna, & satisfactio, quæ erat aliena ab illo statu. Tandem si in peccato veniali homo decederet, iret ad purgatorium, quæ consequentiæ sunt omnes absurdæ, ergo &c.

Resp. conc. esse peccatum remissibile, & ad consequ. resp. illud peccatum non indigere mediatore, seu redemptore, quia esset leue, & modis proportionatis deleteretur, nempe per actum feruentioris amoris Dei, vel per salutiferam detestationem, vel per sacrificium aliquod, quibus non caruisset ille status ad Deum colendum: 2. dicimus, admittendo aliquam pœnam leuem, qualis est detestatio culpæ, sed per modum transeuntis, sicut culpa non diu perseuerasset in voluntate Adæ. Nequè potuisset mori in peccato veniali, cum immortalitas consisteret cum culpa leui; ac proinde Purgatorium à Thomistis excogitatum, euanescebat cum suis rationibus.

Quæres 1. An homines in statu innocentiae mox geniti habuissent perfectum usum membrorum.

Resp. ex Scot. in 2. d. 20. q. 3. quod homines tunc non habuissent mox nati perfectum usum membrorum, sed habuissent, ut modo infantilem ætatem; alioquin maternus uterus, nec illos caperet, nec sine miraculo ex illo egredi potuissent, quod in operibus naturæ non admittitur à Scoto d. 14. Report. Itaque crescerent paulatim per nutrimentum sibi necessarium. Cæterum an habuissent motum progressiuum, si non perfectum vnde quaque, saltem conueniens teneræ ætati? Alij affirmant, alij negant: sententia affirmatiua magis mihi placet, eamque docet Alensis, cui fauet D. Aug. Et certè videtur consentaneum perfectioni illius status, in quo apparet, quod non fuisset inferioris conditionis cæteris animalibus, quæ etiam nunc in lucem edita, mox progrediuntur, ad vbera materna currunt, nutrimentum sumunt, & vocem emittunt &c.

Quæres 2. An in illo statu homines mox nati, immò & in Utero habuissent usum rationis.

Resp. affirmatiuè ex Scot. qui in quolib. 14. art. 2. & in 1. d. 3.

1. d. 3. q. 3. existimat, statum istum in nobis esse pœnam, non naturalem. Vndè describens præsentem statum naturæ lapsæ, dicit, quod est stabilis permanentia legibus Diuinæ sapientiæ firmata in pœnam originalis culpæ, vt etiam non obscure indicat D. Aug. lib. 15. de Trinit. cap. vlt. vbi ait. *Qua causa est Anima mea, cur acie fixa lucem ipsam videre, non possit; nisi utique infirmitas? Quis sibi eam fecit, nisi iniquitas? Ex qua doctrina rectè infertur infantes habuisse etiam in Vtero conceptos vsum rationis. Etenim vsus rationis in nobis impeditur ætate infantili ob dependentiam partis intellectiua à parte sensitua, seu à phantasmatibus.*

Quæres 3. An homines somno indiguissent in eo statu?

Resp. affirmatiuè sicut indigebant cibo, ne deficerent, sic & somno, ne sensus fatigarentur. Ità Scot. D. Thom. & consonant D. Aug. Quare in S. Scrip. habetur, quod Deus immisit Adamo soporem, realem scilicet, & verum somnum, vt aduertit Herincx; estò extasi coniunctum. Verùm an in somno fuisset perfecta mentis, & rationis vigilia, dubium videtur: fortasse illa non defuisset, & maxime inhærendo sententiæ de independentia potentiæ intellectiua à phantasmatibus.

Quæres 4. An nostri parentes creuissent in illo statu in scientia.

Resp. affirmatiuè ex Scot. in 2. crescere namque potuit scientia primorum parentum studio, & industria iuxta illud Ecclesiast. 17. *Consilium, & cor dedit illis excogitandi*. Similiter scientia experimentalis creuit ipso vsu, sicut, & scientia futurorum, puta eclypsum, tempestatum anni &c.

Quæres 5. An in statu innocentia nascerentur tot fœminæ quot masculi.

Resp. affirmatiuè ex Scot. d. 20. q. 2. qui ex tex. Genes. deducit in illo statu fuisse tot fœminas, quot viros, quia in illo statu omnes ex æquo generationi operam datent, iuxta præceptum illud: *Crescite & multiplicamini, & replete terram*. Quare vna tantum fuisset vnus viri vxor, sicut Christus Matth. cap. 19. insinuare videtur; nam si plures fuissent viri, oportuisset vxorem diutiùs viuere, & suo viro translato, alium necessariò ducere, & sic pariter si plures fuissent fœminæ. Cæterùm recentiores, vt appa-

reat aliquid noui adinuenisse, non putant improbabile, quod vel plures homines, vel plures fœminæ forent in illo statu. Ita etiam opinatur inter alios noster Poncius.

Quæres 6. An homo innocens dominium habuisset in alios homines.

Resp. ex D. Bonau. in 2. d. 44. art. 2. q. 2. & Ricard. de Mediauilla, quod dominatio tripliciter accipi potest; vno modo largissimè, idest quatenus aliquis dicitur dominus rei, qua vtitur pro sua voluntate, & hoc fuisset in statu innocentiae; alio modo minùs large, nempe pro potestate imperandi alteri homini, & talis dominatio, seu praelatio pariter fuisset in illo statu, puta in viro respectu mulieris, in patre respectu filiorum &c. 3. modo propriè, nimirum pro potestate coercendi subditos; subditum autem coerceri includit aliquid fieri contra eius voluntatem, vel contra eius inclinationem, vel ipsum pro aliquo malo puniri, quæ conuenire non possunt, nisi homini in statu naturæ corruptæ, non autem integræ; vnde inquit D. Bonau. *Hac dominatio inest homini secundum culpa punitionem, non secundum naturæ institutionem.*

## DISPVATIO II.

*De statu naturæ lapsæ, & de statu naturæ puræ.*

### QVÆSTIO I.

*Vtrum primum peccatum nostrorum Parentum fuerit superbia.*

**N**ot. 1. quod multiplex est naturæ status; alius est naturæ integræ, seu innocentiae, & est conditio naturæ humanæ cum iustitia originali, & omnibus priuilegijs, quæ ipsa complectitur, vt supra dictum fuit: Alius est status naturæ lapsæ, seu corruptæ, & est conditio naturæ humanæ iustitia originali priuatæ, & Adæ peccato vitiatæ: Alius est status naturæ reparatæ, & est conditio naturæ humanæ, cui per Christum iustitia, seu gratia restituta fuit: Alius est status naturæ puræ, & est conditio naturæ humanæ, consideratæ in puris naturalibus absque gratia, &

peccato, ex suppositione sic creatur quoad corpus, & Animam, de cuius possibilitate infra disputabitur.

Not. 2. quod paruo temporis spatio in Paradiso transacto, Diabolus inuidia plenus accessit ad tentandum Euam, & quidem sub forma serpentis, vt perspicue narrat S. Scrip. veri animalis, ac proinde omnia, quæ ibi narrat de serpente, in sensu litterali intelligenda veniunt. Quare sententia Caiet negantis intercessisse serpentem; sed per serpentem intelligi ipsum Diabolum, est plusquam temeraria, vt aduertit noster Herincx p. 1. de tentat. Euæ, vbi etiam notat non esse probandum, quod sentit Cyrillus, etsi probabile censeat Arriaga disp. 44. quod non fuerit serpens verus, sed fictus, seu apparens tantum, cum hoc repugnet aperte Scrip. & Patribus.

Not. 3. quod est aliqua differentia inter tentationem hominis integri, & lapsi; tentatio enim hominis integri, sicut & Christi solum fuit quædam externa suggestio peccati, ad quam peragendam assumpsit Diabolus externam speciem. Neque enim poterat homo interius tentari à carne, cum esset perfecte subiecta spiritui; neque etiam à suggestionem Diaboli imaginationem interiùs commouentis, cum pariter vis imaginatiua subijceretur rationi adeò perfecte, vt nulla operatio, vel motus inferiorum potentiarum rationem ipsam præuenire possent; ac proinde Dæmoni non patebat aditus ad interiora, aut ad prauas cogitationes inferendas, vel motus sensualitatis excitandos. Secus autem euenit in tentatione hominis lapsi, quem Dæmones tentare possunt, & tentant exteriùs, vel interiùs, vt in tract. de Angelis disp. 6. fuit tactum; his prænotatis, sit.

I. Concl. Primum Euæ peccatum mortale videtur fuisse inordinatus sui ipsius amor, quo superbe diuinam excellentiam appetijt. Est Scoti in 2. d. 21. q. 2. Prob. 1. auct. D. Aug. qui lib. 14. de Ciuit. Dei cap. 13. tria videtur tradere; primum esum fructus vetiti non fuisse primum Euæ, & Adæ peccatum: secundum, quod illa interior deprauatio fuerit per internam complacentiam in suis perfectionibus: tertium, quod ex illa complacentia proruperunt in affectum superbiam, audiendo illud eritis sicut Dij, & deinde peccauerunt edendo pomum vetitum.



Prob. 2. auct. Scoti loc. cit. vbi ostendit primum peccatum mortale, tam Eux, quam Adæ non fuisse actum formalem superbiæ; dicit ergo sic. Si desiderium illud, quo Eva appetiuit similitudinem Dei fuisset superbia, maxime fuisset illa species superbiæ, quæ dicitur præsumptio: sed hoc est falsum, quia præsumptio est amor concupiscentiæ, quo quis cupit præcellere alijs, eisque præesse, sed hunc amorem præcedit inordinata complacentia, seu amor inordinatus sui ipsius. ergo &c.

II. Concl. Primum Adami peccatum fuit inordinatus amor suæ vxoris. Est Scoti in 2. d. 22. q. 2. vbi sic discurret pro probatione suæ assertionis. Dico quod in genere sunt duo actus voluntatis, nolle, & velle; in nolle autem non potest consistere peccatum, vt dictum est supra, sed in velle. Est autem velle duplex; idest velle amicitiae, & velle concupiscentiæ, seu commodi, qui est propter alium, & ita, quod amatur amore amicitiae, magis amatur, quam quod amatur amore commodi, vt docet Arist. 1. post, propter quod vnum quodq; tale &c. Primum autem peccatum Adæ non fuit ex immoderato amore sui, sicut fuit primum peccatum Angeli; Angelus autem per essentiam suam intelligit se primo, & homo prius intelligit alia, quam se, & vtitur obiecto sensibili in sui cognitione; primum ergo peccatum hominis non potuit esse immoderatus amor sui, eo quia noluit eam contristare, quam credebatur sine suo solatio contabescere, & à se alienatam omnino interire, hætenus Scot. ergo de mente Scoti Adæ primum peccatum non fuit amor concupiscentiæ, seu libidinis, sed amor amicitiae vxoris suæ.

Arg. cont. 2. conc. Glos. Aug. super illud verbum Psal. Quæ non rapui, tunc exolvebam, dicit, quod Adam, & Eva rapere voluerunt diuinitatem, & perdiderunt felicitatem: sed appetere diuinitatem videtur fuisse amor amicitiae sui ipsius, & deinde complacere suæ vxori: ergo primum Adæ peccatum non fuit &c.

Resp. ex Scot. loc. cit. s. ad argum. Dico quod Adam non appetebat æqualitatem Dei directè, & formaliter, sed tantum interpretatiuè, & indirectè, & sic omnis peccans secundum quod dicit Ansel. de casu Diaboli vult rapere æqualitatem Dei, immò vult esse maior Deo in eo, quod

quod voluntatem suam vult præferri voluntati diuinæ; non obediendo voluntati eius, & hoc est solum interpretatiuè, ac proindè solum indirectè, & interpretatiuè, & non directè, & formaliter appetiuit æqualitatem Dei. Vndè non sequitur primò peccasse alio peccato, quam peccato amoris inordinati amicitia erga suam vxorem.

Quæres 1. An primi parentes lapsi fuerint etiam in hæresim. Resp. Plures ex SS. PP. non obscurè tradere partem affirm. & præsertim D. Ambr. Epist. 33. ad Marcellinum, in qua adducit Deum ad Adam alloquentem sic. *Agnescis te nudum, quia bona indumenta fidei perdidisti*, & Prosper. lib. contr. Collat. c. 9. *Perdidit Adam fidem, perdidit continentiam, perdidit charitatem*: quibus subscribit Fulgent. lib. 2. de Incarnat. c. 22. ubi de Adamo ait; *Perdidit fidem, perdens fidem, perdidit protectionem diuinam, scriptum est enim. Qui non credit Deo, non protegetur à Deo*: idem tradit D. Aug. lib. 14. de Ciuit. Dei; & plures alij apud Frassen tract. 3. disp. 3. qui quidem Doctor consentit Patribus, si de muliere agitur, non de Adam; immò adducit D. Bonau. in 1 d. 11. q. 1. qui negat etiam Euam fuisse in hæresim lapsam; respondens enim Bonau. ad primum ait. Non est concedendum mulierem peccato infidelitatis peccasse, nisi infidelitas accipiat valdè largè; & quidem in hoc sensu arbitror loquutos fuisse SS. PP. non verò de infidelitate rigorosè accepta, quæ est idem cum hæresi.

Quæres 2. Vtrum peccatum Adæ fuerit grauius peccato Eux. Resp. grauitas alicuius peccati deprehenditur, vel ex eo, quod opponitur maiori bonitati, sicut odium Dei dilectioni eius: vel ex eo, quod pluribus præceptis prohibitum est, vt occidere hominem grauius est, quam non obseruare ieiunium ab Ecclesia indictum, quia illud est de iure naturæ, & diuino, hoc autem de iure positiuo humano. Vel deniquè ex conditione personæ: non primo modo fuit peccatum Adæ grauius, quia non fuit directè contrà maximum, & grauissimum præceptum. Diliges Dominum Deum tuum, nequè contrà præceptum de diligendo proximo: non secundo modo, quia usus illius fructus non erat de se malus, sed malus, quia prohibitus à Deo ad experiendum eorum obedientiam. Peccatum autem Eux fuit sine dubio grauius in se consideratum, quia

Eua

Eua voluit vsurpare ſibi diuinitatem, vt dicit D. Aug. Vnde habens auiditatem diuinæ ſcientiæ, fuit ſeducta, vt inquit Apoſtolus. *Eua fuit ſeducta, Adam vero non fuit ſeductus*; Inſuper fuit cauſa, quare Adam peccauit, ergo Eux peccatum in ſe, & formaliter grauiffimum fuit. Quare remanet, peccatum Adæ fuiſſe grauius peccato Eux ex circumſtantia accidentalī, nempe ex conditione perſonæ. Tradita enim fuit Adæ iuſtitia originalis pro ſe, & ſuis filiis, tanquam digniori, fortiori, circumſpectiori, vt ait D. Aug. t. 2. de merit. ita quod ſi eam perderet, pro ſe, & tota poſteritate perderet. Itaque peccatum Adæ fuit ſiquidem grauiffimum ex conditione perſonæ, & maximi mali, quod peccando, intulit toti poſteritati. Ita Scot. in 2. d. 21. q. 2.

Quæres 3. Vtrum Adam peccauerit ex ignorantia.

Reſp. omiſſis varijs ignorantie acceptionibus, de quibus agetur in tract. de Act. human. ſi Deus dabit vires. Adam non peccauit ex ignorantia erronea, quia error non præceſſit peccatum ipſius, adeout crederet factum illud eſſe bonum, aut bonum ex illo ſequi; nam, vt ait Aug. approbare vera pro falſis, eſt naturæ lapſæ non inſtitutæ. Deinde non eſſet in eo ignorantia facti, neque iuris: ſciebat enim, veſci fructu illo eſſe contra præceptum expreſſum à Deo eis datum, quod quidem præceptum vocant Theologi legem primordiale. Itaque fuit in eo ignorantia circumſtantiarum conſ. quantum ad grauitatem culpæ, & pænæ: putabat enim veniale, quod erat mortiferum, exiſtimabat etiam, ſe conſequi facile poſſe ſui peccati remiſſionem, nec credebat, quod Deus eſſet ita grauitè puniturus tale delictum, vt tota poſteritas ad pœnam mortis, tum corporis, tum Animæ damnaretur. Ità Scot. in 2. d. 22. q. vn.

Quæres 4. Quanto tempore noſtri primi Parentes manſerint in Paradifo terreſtri.

Reſp. non diù durauit primæui ſtatus ſœlicitas, quia citò inuidia Diaboli, vt habetur Sapient. 2. *mors introiuit in orbem terrarum*: quanto autem tempore ſteterint, incertum eſt. Quidam enim putant ſex horarum ſpatio, vel vna die ad ſummum; Alij nihilominus, & merito, inquit noſter Herincx, paulò ampliùs extendunt, quod inſinuant Sancti Patres, & hiſtoria S. indicat, narrans facta, & geſta

ante peccatum, quæ omnia tam breui tempore vix fieri potuissent. Vndè aliqui ad tres; alij ad sex; alij ad quadraginta, alij ad triginta dies incolatum Adæ in Paradiso extendunt. Cæterum verisimilior apparet opinio, quæ asserit, plures dies in Paradiso, stetit, & fortasse octo diebus, quasi sexta feria creatus, redeunte sexta feria, lapsus sit, & è Paradiso expulsus, & relegatus in hac lacrymarum valle. Verum quam huius terræ partem primò incoluerint nostri Parentes, imò peremptores, vt cum D. Bernard. loquar, probabiliùs videtur incoluisse illam terræ plagam, quam postea Iudæa, & Palestina dicta est. Ita ex vetustissima hebræorum traditione affirmat S. Basil. relatus à Frassen. tom. 2. tract. 3. disp. 3. art. 2.

Quæres 5. An primi parentes egerint pœnitentiam, & saluati sint. Resp. Adam pœnituisse, est de fide ex sap. c. 10. Hæc illum, qui primus formatus est à Deo Pater orbis terrarum, cum solus esset creatus, custodiuit, & eduxit illum à delicto suo; immò, & indubitatum est ex vnanimi patrum, & Theologorum doctrina ipsum esse saluatum, adeout Irenæus Epiphan. Aug. & alij referant inter hæreses Tatiani, quod contradixerit saluti Adæ. Vndè concludit Herincx cum Arriaga, quod huic doctrinæ nihil desit, vt sit de fide maximè cum in eam tota iam olim Ecclesia conspirasse videatur, sitque perpetua quædam traditio in Ecclesia de ieductione primi Parentis per Christum ex limbo Patrum, & tradit etiam Leo IX. cap. hi duo de consecrat. dist. 1. Similiter de pœnitentia, & saluatione Euxæ tradunt D. Aug. Ansel. & alij Patres passim, & Theologi omnes, quod etiam ad perpetuam traditionem reducit Estius disp. 23. §. 10. & ad hoc facit etiam, quod Deus non maledixerit Euxæ, immò promiserit semen ex muliere nasciturum, quo aliquando contereretur caput Serpentis, qui eam ad transgressionem Diuinæ legis induxerat, vt habetur Genes. cap. 3.



*Vtrum quilibet secundum legem communem propagatus, ab Adam contrahat peccatum originale.*

**N**ot. 1. Quòd peccatum vt sic est transgressio diuinæ legis. Diuiditur autem peccatum, veluti in suas species, non quidem physicas, sed morales, primò in peccatum actuale, & habituale. Actuale est transgressio voluntaria diuinæ legis vel humanæ ordinantis hominem ad finem supernaturalem. Habituale est transgressio eadem legis diuinæ, vel humanæ iam præterita, adhuc tamen moraliter permanens, instar effectus habitualis, quod à Theologis, & à SS. PP. vocari solet reatus. Peccatum habituale subdiuiditur in originale, & personale: originale est illud, quod tota Adæ posteritas (excepta Dei immaculata genetrice) contraxit origine, & propagatione naturali, quatenùs transgressio Adæ legis primordialis censetur etiam esse nostra ob continentiam moralem nostrarum voluntatum in voluntate primi parentis. Personale est transgressio, quam vnusquisque propria voluntate, & non aliena committit. Hinc patet, quod tam actuale, quam habituale sub diuidi potest in mortale, & veniale, de quibus latè (Deo dante) agetur in tract. de peccatis.

Not. 2. Quòd aliquid potest dici alteri voluntarium dupliciter, nempe physicè, & moraliter: Primo modo est in ordine ad propriam voluntatem aliquid volentem: Secundo modo est in ordine ad voluntatem alterius, in quo propria voluntas moraliter continetur, sic voluntas Curatoris, & Tutoris moraliter censetur esse voluntas pupilli, aut minoris, vt habetur l. cum plures §. quæ bona fide ff. de administrat. & perit. Tut. Insuper voluntas filiorum, impuberum censetur in iure contineri moraliter in voluntate patris: adeout possit pro eis testari, non tantum in bonis, quæ ab ipso testatore accipiunt, sed in omnibus, quæ aliundè acquisiuerint l. sed si plures §. ad substitutos ff. de vulgari, & pupill. substit.

Not. 3. Quòd ad hoc vt peccatum originale dicatur, & sit hominibus voluntarium voluntate capitis, non requiritur, quod ipsi voluntatem, & consensum suum quoad

conseruationem, vel amissionem iustitiæ originalis in Adamum transtulerint, sed sufficit, quod Deus constituens Adamum caput nostrum naturale, & morale, posuerit in illo omnium nostrum voluntates: potuit namque Deus, tamquam supremus Dominus iure suo absque nostro consensu statuere, vt voluntas Adæ esset voluntas nostra quoad conseruationem, & amissionem iustitiæ originalis; non quidem quatenus personæ singulares sumus, sed quatenus sumus partes, & membra totius multitudinis hominum, de quo est exemplum in humanis, & ciuilibus respectu Principis in ordine ad communitatem sibi subditam, & signanter in legibus paulò superiùs adductis.

Not. 3. quod inter hæreticos, qui negauerunt existentiam peccati originalis, primus fuit Rufinus, à quo, vt refert Frassen, Pelagius hunc pessimum errorem accepit, & multiplicauit in plures, qui reduci possunt ad quinque propositiones 1. affirmabat, Adamum sibi soli nocuisse. 2. Infantes nullam in sua propagine contrahere culpam, & pœnam ex parte Adæ. 3. Baptismum non esse necessarium hominibus ad remissionem peccatorum, sed solum vt ipsi Christo renascantur, & ius obtineant ad regnum æternum. 4. morbos, mortem, & cæteras naturæ humanæ calamitates non esse peccati originalis pœnas. 5. concupiscentiam, nec esse malum pœnæ, nec culpæ, sed ipsius naturæ bonum, ac conueniens; immò necessarium ad humani generis propagationem incentiuum: huiusmodi hæreticales errores iam pridè sepultos, renouarunt Anabatistæ, Armeni, Albigeneses, quibus adhæsit etiam Petrus Abaillardus, vt refert D. Bernardus epist. 108.

Concl. catholica. Quilibet homo secundum legem communem propagatus, ab Adamo contrahit peccatum originale. Pluribus S. Script. locis nituntur Theologi hanc veritatem catholicam statuere, sed vt prolixitatem vitemus, afferam illud Apost. ad Roman. 5. quod est præcipuum, & quo frequenter vtitur Aug. contra Pelagianos. *Per unam hominem peccatum in hunc mundum intrauit, & per peccatum mors, & ita in omnes homines pertransiit, in quo omnes peccauerunt*; ex quibus verbis sic potest formari argumentum. Per vnum hominem intrauit in hunc mundum quoddam peccatum, quod omnes homines fecit peccato-

res,



res, & morti subiectos, sed huiusmodi peccatum non potest esse actuale, cum etiam infantes sint morti obnoxij, & sæpè moriuntur, antequam aliquid boni, vel mali propria voluntate faciant, ergo est originale. Resp. Pelagiani, vt hoc apertum testimonium euaderent, illud interpretando de transitu peccati Adæ in posteros, non per originem, sed per imitationem. Verùm D. Aug. huic euasioni tripliciter aditum peræcludebat in lib. de peccat. meritis, & remis. 1. quidem, quia sic potius in Diabolo nos peccasse diceremur; prius enim Dæmon peccauit, & peccandi exemplum nobis præbuit: 2. quia pueri in conceptione, antequam Adamum imitari possint, in iniquitatibus sordere dicuntur: 3. quia Apost. docet ita peccatum Adæ traduci ad posteros, sicut iustitiam Christi ad regeneratos. At hæc non per solam imitationem, sed per veram in illo regenerationem redundat in homines: ergo peccatum Adæ non transit in posteros per solam illius imitationem, sed per originem, & propagationem, vt definiuit Trid.

Prob. etiam ratione theologica. Christus est Redemptor omnium hominum, ac proindè non solum adultorum, sed etiam paruulorum iuxta illud Paul. 2. ad Corinth. 5. *Christus pro omnibus mortuus est*: Sed redemptio præsupponit seruitutem peccati: ergo &c. 2. ratio desumitur ex necessitate Baptismi, tam quoad adultos, quam quoad paruulos: 3. ratio ex necessitate moriendi, & ex innumeris calamitatibus, & miserijs, quas vnusquisque nostrum etiam ab incunabulis experitur. Vndè Eccles. cap. 40. *Grane iugum super filios Adæ à die exitus de ventre matris eorum usque in diem sepulture.*

Prob. denique ex Scot. in 2. d. 32. sic. Quicumque ab Adamo propagatus caret iustitia originali, quam à Deo acceperat posteris traducendam, & peccato originali maculatur: sed sic se habent omnes Adæ posterij, nisi speciali priuilegio præueniantur: ergo quicumque ab Adamo propagatur, contrahit peccatum originale.

Arg. 1. cont. conc. à Pelagianis, afferentibus illud Chrysost. homil. ad Neophitos. *Infantulos, baptizamus quàmuis, non sint coinquinati peccato, vt eis addatur sanctitas, adoptio, & fraternitas Christi*; ergo &c. Resp. D. Aug. hoc intelligendum esse de peccato proprio, & personali actu

contracto, non verò de alieno, & originali, & addit, D. Chrysost. non fuisse sollicitum exprimendi hunc sensum, quia disputans in Ecclesia catholica non se aliter intelligi arbitrabatur, tali quæstione nullus pulsabatur, vobis (nempe Pelagianis) non dum lites antecedentibus, securius loquebatur.

Arg. 2. Pelagius, & Iulianus apud Aug. lib. 2. de nuptijs, & lib. 4. contra Iulian. lib. 3. cap. 24. Non peccat iste qui nascitur, non peccat iste, qui genuit, non peccat ille, qui condidit, per quas igitur rimas inter tot præsidia peccati fingis ingressum? Resp. D. Aug. *Quid quæris lasentem rimam, cum habeat aperissimam ianuam? Per unum hominem, ait Apost. per unius delictum, ait Apost. per unius inobedientiam, ait Apost. quid quæris amplius, quid quæris apertius, quid quæris inculcatis?*

Arg. 3. Omne peccatum est voluntarium, adeo ut non sit peccatum, nisi sit voluntarium ex D. Aug. sed peccatum originale in infantibus non est voluntarium: ergo &c. Patet mai. min. prob. Voluntarium est illud, quod est à principio intrinseco cum cognitione: sed peccatum originale in paruulis non est à principio intrinseco, sed ab extrinseco: ergo non est voluntarium.

Resp. conc. mai. & neg. min. ad probat. Resp. dist. voluntarium physicè conc. voluntarium moraliter, nego: non enim est necesse, quod hoc secundo modo procedat à principio intrinseco proprio, & ex propria cognitione, sed satis est, ut procedat à principio intrinseco Adæ, quod est aliquàlter intrinsecum nobis, quatenus Adam est principium naturæ humanæ, & caput nostrum, non solum naturale, sed etiam morale.

Arg. 4. ex Apost. ad Roman. 5. ubi sic, *Regnauit mors ab Adam usque ad Moysen, etiam in eos, qui non peccauerunt in similitudinem prauaricationis Adæ*: sed hoc intelligitur de peccato originali; ergo &c. Resp. D. Aug. lib. 1. de peccat. meritis: sensus Apostoli est, quod mors regnauerit etiam ante legem scriptam, seu tempore Moysis in illos etiam, qui non peccauerunt actualiter, ut peccauit Adam.

Arg. 5. Ezechiel. cap. 18. *Filius non portabit iniquitatem Patris*: ergo filij Adæ portare non debent iniquitatem patris Adæ. Resp. Ezechiel. intelligendum est de peccatis pa-

rehtum personalibus, quæ in filios non transfunduntur; nec filij puniuntur ob peccata parentum, nisi peccando eorum praua exempla sequantur, cum parentes non gerant personam capitis totius generis humani, vti Adâ &c.

### QVÆSTIO III.

*In quo consistat ratio formalis peccati originalis.*

**N**Ot. 1. quod est ita difficile comprehendere peccati originalis naturam, vt ipse D. Aug. in lib. de moribus Eccles. c. 22. fateatur, se non posse eius naturam perfectè penetrare. *Nihil enim (ait) hoc peccato antiquius, ad prædicandum nequius, nihil est ad penetrandum secretius.* Ex quo fit, vt Doctores in varias sententias abeant; nam aliqui hæretici, vt Lutherani, & Calvinistæ asseruerunt peccatum originale consistere in fomite, ac concupiscentia, contra quos stat definitio Trident. dicentis sess. 6. *Manere in baptizatis concupiscentiam, vel fomitem; hac S. Synodus fatetur, & sentit.* Matth. autem Illyricus auctor hæreticorum, qui dicuntur Centuriani, somniauit peccatum originale esse ipsam substantiam Animæ peccato Adæ substantialiter vitiatam, & ex imaginæ Dei, quâ in creatione acceperat, in imaginem Diaboli transformatam, contra quam heresim pugnant SS. PP. & signâter D. Aug. super Psal. 62. *Iniquitas ipsa non est substantia; non enim iniquitas est natura, quam formauit Deus.* Et Origenes putauit esse aliquam maculam contractam ab Anima, antequam infundatur corpori; quod est error in fide, quem SS. PP. ac Theologi semper impugnarunt, & reijcierunt. Alij, vt Arimin. Gabriel, Gulielmus &c. esse putarunt quandam qualitatem morbidam ex corruptione appetitus carnalis in ipsam Animam deriuatam: at hæc opinio videtur continere absurda; nam sequeretur Deum esse auctorem peccati, quia esset auctor talis morbidæ qualitatis simul cum natura. Tum quia nequit sufficienter explicari quid sit ista morbida qualitas; non enim est corporal, quia sic non posset maculare substantiam spiritua-lem; neque spiritualis, quia appetitus carnalis non potest producere aliquid spirituale: ergo &c. Quæ autem sit mens Scoti de peccato originali, variant Scotistæ. Quidam

dam contendunt Scot. sensisse, peccati originalis rationem formalem consistere in priuatione, seu carentia iustitiæ originalis debitæ, quatenus iustitia originalis complectitur etiam gratiam sanctificantem, & ita videtur cum intellexisse Maftrius in 2. disp. 4. q. 5. de peccato origin. vbi miratur, & quasi reprehendit cæteros Scotistas aliter de mente Scoti sentientes. Fundamentum præcipuum Maftrij est definitio ipsiusmet peccati originalis, tradita à Scoto, nempe quod sit carentia iustitiæ originalis, non qualitercunque, sed debitæ. Vnde dupliciter potest accipi iustitia debita, subdit Scot. vno modo, quia in se accepta, & actione accipientis amissa; alio modo, quia accepta in alio, & actione alterius amissa: primo modo peccatum actuale est iniustitia, & carentia iustitiæ, secundo modo originale; immò vbicunque loquitur de peccato originali, semper ipsum explicat nomine priuationis iustitiæ. Verùm aliter sentiendum est de mente Scoti, vt infra cum Macedo, Herincx, Frassen, Herrera, & alijs Scotistis ostendetur.

Not. 2. quod Thomistæ cum S. Thoma 1. p. q. 95. art. 1. & signanter Gonet. t. 3. compend theol. tract. 5. de peccatis s. 5. dicunt consistere in priuatione iustitiæ originalis quantum ad primum eius effectum, idest quatenus per eam voluntas humana subdebatur Deo, vt est voluntaria nobis in voluntate Adæ. Etsi dicatur, quod priuatio iustitiæ originalis est pœna peccati originalis, vt expresse docet etiam D. Thom. art. 5. vbi sic ait. Subtractio originalis iustitiæ habet rationem pœnæ, sicut etiam subtractio gratiæ: ergo in illa nequit consistere culpæ originalis essentia. Resp. Gonet. loc. cit. priuationem iustitiæ originalis quantum ad primum eius effectum, qui est subijcere mentem Deo, vt vltimo fini, non esse pœnam peccati originalis, sed potius rationem formalem constitutiuam illius; quantum verò ad effectus secundarios, qui sunt subiectio Corporis ad Animam, & appetitus inferioris ad superiorem, esse pœnam; hæc ille.

Not. 3. quod materiale peccati originalis est concupiscentia habitualis, sicut enim actualis peccati materiale est actualis conuersio ad bonū commutabile, & formale auersio à bono incommutabili, ita & peccati habitualis (quale

est peccatum originale) formale est auersio habitualis à Deo, & materiale est conuersio habitualis ad bonum creaturæ, ac proinde est ipsamet concupiscentia habitualis, idest intellectus, voluntatis, & appetitus sensitiui proxima dispositio ad actus repugantes rectæ rationi.

I. Concl. Peccatum originale secundum suam rationem formalem nequit consistere in priuatione iustitiæ originalis quomodocunque acceptæ. Est contra communem opinionem Thomistarum. Prob. 1. Peccatum originale est culpa verè, & propriè dicta, sed priuatio iustitiæ originalis quomodocunque acceptæ non potest dici culpa; ergo nec peccatum originale. Mai. constat ex Conc. floren. in decr. Eugenij, vbi agens de Baptismo, ait. *Huius Sacramenti effectus est remissio omnis culpa originalis, & actualis.* Min. prob. ex D. Thom. q. 21. art. 2. vbi docet, quod culpa est actus malus scienter, & liberè admissus, ergo &c.

Prob. 2. Priuatio iustitiæ originalis est pœna inflicta hominibus ob peccatum originale; ergo non potest esse ipsum peccatum originale; ac proinde nequit peccatum originale consistere in tali priuatione. Nec valet respondere cum Gonet. vbi supra, cum hac distinctione de priuatione iustitiæ quoad primum effectum, & quoad secundum, non valet, inquam; eò quia nulla culpa est efficienter à Deo, sed priuatio iustitiæ originalis, seu gratiæ, qua ipsi Deo subijcebatur Anima (hic enim est primus effectus) est à Deo, qui, sicut solus poterat conferre illud donum, ita etiam auferre potest, & abstulit ob demeritum; ac proinde in pœnam peccati facta est talis subtractio: ergo etiam quoad primum effectum iustitia originalis est pœna peccati originalis, & non peccatum.

II. Concl. Peccatum originale filiorum Adæ est ipsummet Adæ peccatum, manens in ipsis moraliter, quatenus omnes in eo, tanquam in capite peccauerunt. Hæc videtur Frassen, Macedo, & alijs pluribus Scotistis vera, & germana sententia Scoti in 2. d. 33. q. vnic. vbi cum dixisset, vt aduertit Scholiastes, originale peccatum esse priuationem iustitiæ originalis, subdit: non est tamen priuatio vllius doni habitualis, sed rectitudinis debitæ in esse per modum termini exactu secundo in voluntate causata, & generatione transfusa; vnde non formaliter, sed

sed causaliter priuat habitibus; hanc doctoris sententiam amplectuntur Pichius controu. 1. Chatarinus in sum. doctri. de pecc. origin. Salmeron in cap. 5. ad Rom. disp. 45. vbi addit hanc sententiam debere esse omnium Catholicorum, nam ita apertè loquutus est D. Paul. vt qui hunc sensum ex eius verbis non eliciunt, planè delirare videantur; eamque tuentur plures recentiores, quos refert, & sequitur Martinonus disp. 20. sect. 5. Prob. insuper, quod hæc sit germana mens Scoti vt videre est ipsum Doct. in 2. d. 29. q. vn. §. potest dici afferens discrimen inter eum, qui creatus in puris naturalibus, careret gratia; & eum, qui conditus in gratia peccaret, & careret gratia, ex eo quod ille non esset debitor iustitiæ, hic autem esset, ait: Et si neutri conferatur visio Dei, vni tantum est carentia visionis pœna, alij non est. Reus enim priuatur ea propter reatum peccati, alter autem priuatur ex conditione naturæ. Ex quibus verbis patet priuationem iustitiæ originalis esse coniunctam cum reatu culpæ, quam transfudit Adam, nec enim in paruulis alius reatus esse potest, & §. quantum ad 3. sic discurret. Ista persona, quia naturaliter est filius Adæ, idè debitor est iustitiæ originalis, datæ à Deo ipsi Adæ pro omnibus filiis, & caret ea, ergo habet peccatum originale. Quarè Mayron. Scoti discipulus in 2. d. 31. q. vn. sic ait ad mentem Scoti. Peccatum originale est formaliter reatus obligationis ad pœnam damni proueniens per propagationem à primo Parente, in quo fuit peccatum actuale: ergo peccatum originale secundum Scotum non consistit in sola priuatione, & carentia iustitiæ originalis, sed in aliquo positiuo interuenienti in homine, nempe morale, & aliquo modo voluntario, ratione cuius contraxit debitum, quod tenetur soluere. Itaque consistit, & in priuatione iustitiæ originalis, & in debito, seu reatu contracto in primo Parente, in quo omnes eramus, tanquam in capite, ac proinde in eo omnes demeruimus illam iustitiam; hætenus pro mente Scoti; qui plura desiderat, videat interpretes, & signanter Macedo, qui latè ostendit mentem Scoti in t. 2.

Prob. igitur conc. Peccatum videlicet originale consistere in reatu transfuso in filios Adæ; velut debito hæreditario, qui quidem reatus nos constituit peccatores ad modum



dum formæ habitualis permanentis in nobis: prob. Inquam, & 1. auct. Trid. dogmatizantis sess. 5. in Decr. de pecc. origin. vbi sic tradit. *Adamum inquinatum per inobedientiam peccatum, & peccatum in nos transfudisse*; Et mox: *peccatum, quod origine vnum est, & propagatione transfusum omnibus, idest vnicuique proprium*. Postea damnat eos, qui dicunt paruulos nihil ex Adam trahere originalis peccati, & denique docet, reatum originalis peccati remitti in Baptismate. Quæ verba Conc. immò totum decretum nec verbum quidem facit de priuatione iustitiæ, & gratiæ, sed omnia sonant inquinamentum, transgressionem, offensam, præuaricationem, peccatum, reatum; & insuper obseruanda sunt verba, quibus damnat negantem, tolli totum id, quod veram, & propriam peccati rationem habet; sed illud dicit tantum radi, aut non imputari, ergo Trid. dogmatizat reperiri in posteris, Adæ verum peccatum, sed non actuale, ergo habituale originale.

Quæres, quomodo intelligenda sint illa verba Concilij, nempe vnicuique proprium. Resp. esse in hoc sensu intelligenda, scilicet, quod sit cuiuslibet proprium, quatenus posteri simul cum natura, quam propagatione accipiunt, contrahunt illud moraliter, quantum ad omnes effectus, qui tribuuntur ipsis, non minus quàm si ipsimet actualiter cum Adamo peccassent, & quod sit cuiuslibet proprium, quatenus quemlibet constituit peccatorem independentem ab alio. Prob. amplius auctorit. D. Anselmi lib. 1. de Concept. Virg. cap. 27. *Per peccatum, quod originale dico, aliud intelligere nequeo in ipso infantibus, nisi factam per inobedientiam Adæ iniustitiam debitam nuditatem, per quam omnes sumus filij iræ*. Vbi Scotus. Ista ratio peccati originalis prob. ex hoc, quod peccatum formaliter est iniustitia, igitur & tale peccatum talis iniustitia: iniustitia autem non est nisi carentia iustitiæ debitæ: ergo peccatum originale est nuditas iustitiæ originalis cum respectu, & connexionione cum peccato Adæ, in quo erat reatus contractus à posteris, & sic semper Scot, loquitur, idest cum relatione, & respectu ad Adæ peccatum, quod in posteros fuit transfusum.

Prob. postremò ratione. Illud est verum peccatum quod homines facit filios iræ, & vindictæ, sed hoc non fit per solam carentiam gratiæ: ergo per reatum permanentem moraliter

liter in posteris: tum quia illa carentia est pœna; ergo debet ei correspondere culpa, ergo in posteris est propriè culpa.

Arg. 1. à Thomist. cont. 1. conc. auct. D. Ansel. loc. cit. dicentis. *Per peccatum originale aliud intelligere nequeo, nisi iustitiæ debitæ nuditatem.* D. Dionys. lib. de ecclesiast. Hierarch. c. 2. appellantis *Peccatum originale statum dissimilitudinis hominis cum Deo*, nempe supernaturalis consistentis in carentia gratiæ; & deniquè Concil. Trid. sess. 5. can. 2. ubi dicit, *Peccatum originale esse mortem Animæ*, sed hæc omnia sonant priuationem gratiæ; ergo priuatio gratiæ est ratio formalis peccati originalis. Resp. Sanctos Patres, & Concil. Trid. loqui causaliter, & non formaliter, idè mors, & nuditas non sunt formaliter peccatum originale, sed causare priuationem gratiæ, quæ est mors Animæ.

Resp. 2. Dionys. intelligendum esse de dissimilitudine actuali, & habituali; nam homo tunc est dissimilis actualiter à Deo, quandò malè operatur, habitualiter verò, vel per amissionem habituum supernaturalium, vel per dissimilitudinem habitualis peccati, qualis est in paruulis ob peccatum originale in eos transfusum. Similiter D. Ansel. nomine iustitiæ debitæ intelligit rectitudinem actua-lem subiectionis mentis ad Deum, seu conformitatis ad legem diuinam, quam estò paruuli habere nequeant physicè, moraliter tamen in Adamo habuerunt, ac proindè habitualiter, quod est idem dicere ac peccatum originale.

Arg. 2. peccatum originale formaliter, & essentialiter consistit in eo, quod primò tollitur per Baptismum; sed per Baptismum per se primò tollitur priuatio iustitiæ originalis; ergo peccatum originale consistit in carentia iustitiæ. Resp. dist. mai. quod primò tollitur per Baptismum formaliter, con. causaliter, & consequenter, nego; priuatio namque iustitiæ tollitur consequenter.

Arg. cont. 2. conc. Si peccatum originale est ipsum peccatum Adæ, sequitur posteros mereti eandem pœnam; sed conf. est falsum, quia Adam præter pœnam damni, meruit pœnam sensus, quam pœnam non incurrunt infantes decedentes in peccato originali; ergo &c.

Resp. neg. sequelam mai. & ratio est, quia Adam physicè, & propria voluntate peccauit; eius tamen posteri solum moraliter, & voluntate aliena. Quare maius est vo-

Iuniarium peccatum Adæ physicum, quam morale, ac proinde dignitas ad poenam est maior.

#### QVÆSTIO IV.

*Qualiter, & in quo transfusum fuerit  
peccatum originale.*

**N**Ot. Quòd variæ sunt Doctorum sententiæ circa præsentem quæstionem. Etenim quidam, vt Magister sentent. in 2. d. 31. Greg. Arimn. Gabriel, & alij ibidem docent peccatum originale traduci per qualitatem morbidam humano semini inexistentem, aut infectionem realem illi superadditam instar seminis leprosi, cui inest quedam corruptio, quæ est proprium lepræ; at hæc opinio rejicitur communiter à Theologis, eò quia caro nequit infici vlla qualitate, quæ sit peccatum, cum non sit illius capax, ac proinde, estò inficeret Animam, non posset tamen inficere ipsam tali infectione, quæ esset peccatum: ergo hæc opinio nequit subsistere: tum quia corporeum nequit agere in spiritum, adeout physicè aliqua macula morali, cuiusmodi est peccatum, deturperetur. Alij cum Alens. p. 2. q. 105. memb. 4. putant Animam vitari, non quod in carne hæreat peccatum propriè dictum, sed quod caro iustitia originali spoliata, concupiscat aduersus spiritum, Animamquè deorsum inclinet, ac proinde distortam, & obliquam efficiat. Cæterum neque ista sententia ita intellecta subsistere potest. Si quis enim crearetur ex nihilo in puris naturalibus, haberet huiusmodi imperfectionem, quia subijceret motibus concupiscentiæ, quibus nunc agitatur: ergo talis concupiscentia nequit esse ratio, quare peccatum originale traducatur in posteros.

**I.** Conc. Peccatum originale non alia ratione traducitur, nisi quia homo ex Adamo per seminalem propagationem vltima communi generatur; hoc tamen modo, quod Anima ipso instanti conceptionis, quo in corpus organizatum infunditur, & homo Adæ filius naturalis constituitur, contrahit consequenter peccatum originale; hæc est germana sententia Scoti in 2. d. 31. q. vn. vbi sic docet, Anima contrahit peccatum originale mediante carne, non ita quod

quod caro, quasi per qualitatem quamdam causatam in ea causet istud peccatum originale, sed ex hoc quod caro concupiscibiliter seminatur, ac ex ipsa formatur corpus organicum, cui infunditur Anima, constituens personam, quæ est filius Adæ, idè debitor iustitiæ originalis, datæ à Deo ipsi Adæ pro omnibus filiis, & caret ea: ergo habet peccatum originale; contrahitur igitur illud peccatum in carne, in quantum est naturalis ratio, & ex hoc debet habere iustitiam, qua per peccatum Adæ caret: fauet Trid. sess. 6. c. 3. ubi ait, *Sicut rana homines, nisi ex semine Adæ propagati nascerentur, non nascerentur iniusti, cum ea propagatione, per ipsum dum concipiuntur, propriam iniustitiam contrahunt.* Insuper probari potest conc. ex dictis suprâ. Constat enim omnes posteros Adæ, idè contrahere peccatum originale, quia omnes in eo, quierat caput naturale generationis, & morale gratuitorum donorum peccauerunt: ergo ratione propagationis carnalis vnusquisque contrahit peccatum originale.

Dices. Sancti Patres vnanimi consensu videntur tradere concupiscentiam carnalem Animam inficere peccato originali: ergo traducitur per illam in posteros Adæ.

Resp. SS. PP. solum velle, quod commixtio carnalis, quæ sine motu concupiscentiæ non fit, sit conditio sine qua paruuli non contrahunt peccatum originale, quia aliter non descenderent ab Adam naturali via generationis.

II. Conc. Omnes, & soli Adæ posteri, quia via naturali generationis ab eo descendunt inficiuntur peccato originali, nisi speciali Dei priuilegio ab ea lege communi eximantur; quemadmodum piè creditur factum in Deipara Immaculata; cuius solemnitatem vniuersa Ecclesia celebrat; & maximè Seraphica nostra Religio, quæ non cessat promouere piam sententiam ad definitionem de fide, respectu cuius videtur esse in proxima dispositione, adeo ut sperare possimus, quod citò, si Deo placuerit, Ecclesia ad maiorem Deigenitricis gloriam, ac fidelium deuotionem tantam rem sit actura. Hæc ex 1. concl. constat.



*Vtrum pec peccatum originale, non solum natura humana fuerit spoliata gratuitis, sed etiam in naturalibus vulnerata.*

**N**OT. 1. quod natura rationalis habet sibi congenitam, non solum capacitatem, sed etiam inclinationem ad bonum honestum, quod inter tria bona est principale. Hæc autem inclinatio duplex distingui solet, vna remota, seu radicalis, quæ est ipsius Animæ substantia; Alia proxima, quæ reperitur in potentijs, & facultatibus, ex quibus operationes oriuntur: potentiæ autem illæ sunt præcipuè intellectus, & voluntas; appetitus enim sensitivus tantum participat aliquid rationis ob intimam conjunctionem cum parte superiori rationali. Verum inclinatio harum potentiarum est diminuta ob peccatum originale in ordiue ad bonum honestum; ista autem diminutio potest intelligi dupliciter; primò intrinsecè, & ex parte subiecti, itaut aliquid naturalis entitatis sit diminutum: 2. ex parte termini solum, quatenus superuenientibus aliquibus impedimentis, potentia remouetur, & impeditur à consecutione termini idest boni, ad quod propendebat.

NOT. 2. Quod per iustitiam originalem omnes inferiores Animæ vires erant rationi subditæ, & ipsa ratio Deo. Vnde cum per peccatum ablata fuerit originalis iustitia, omnes vires Animæ remanserunt quodammodo destitute proprio ordine, quo naturaliter ordinantur ad virtutem, & ipsa destitutio, seu deordinatio dicitur naturæ vulneratio; sicut enim vulnus in corpore tollit ordinem, discontinuando carnem à carne; ita in Anima est vulnus ob carentiam ordinis, & conformitatis partis inferioris ad partem superiorem. Itaque in quantum ratio destituitur suo ordine ad verum, est vulnus ignorantie, sumptæ, non pro carentia scientiæ, sed pro difficultate ad scientiam acquirendam. In quantum voluntas destituitur ordine ad bonum, est vulnus malitiæ, quatenus importat pronitatem ad malum. In quantum irascibilis destituitur suo ordine ad arduum, est vulnus infirmitatis, quæ notat debilitatem ad bene agendum. In quantum verò  
vis

vis concupiscibilis destituitur suo ordine ad delectabile moderatum, est vulnus concupiscentiæ, quæ significat pronitatem ad concupiscendum immoderatè id, quod est delectabili sensui: quæ quidem vulnera à peccato mortali actuali magis augentur, vt experimento comprobatur.

Concl. Natura humana per peccatum originale non solum est spoliata donis gratuitis, sed etiam est in naturalibus læsa, & vulnerata: Est Scot. in 2. d. 35. q. 1. & omnium ferè Scotistarum. Prima pars patet ex hæcenus dictis.

Prob. ergo secunda pars, de qua est controuersia; quam plures namquæ sentiunt naturam non remansisse vulneratam, sed solummodò gratuitis spoliatam. Prob. inquam, secunda pars, & quidem primò auct. Conc. Trid. sess. 5. in Decreto de pecc. orig. vbi sic habetur: *Propter istud peccatum irruisse nos in potestatem Diaboli, totumquæ hominem secundum corpus & Animam in deterius esse mutatum* quæ verba ponderans, & expendens noster Macedo t. 2. collat. 8. diff. 2. sect. 2. vbi plura congerit ad hanc partem probandam, docet, quod duo sunt animaduertenda; primum lapsum in potestatem Diaboli: secundum hominem in deterius mutatum esse; hoc secundum non rectè comparatur ad statum innocentie, cum nihil mali in eo esset, sed ad statum puræ naturæ, in quo habet locum comparatio deterioris status naturæ lapsæ; Nec enim quadrare potest comparatiuus, vbi non est locus positiui, nam vbi non est locus mali, non potest esse locus deterioris. Quare cum dicunt Concilia hominem mutatum esse in deterius per peccatum, non potest esse sensus, mutatum fuisse de statu innocentie in statum peccati; quia in statu innocentie nullum erat malum, vel fuit. Itaque comparatio fieri debuit inter puræ naturæ statum, & naturæ lapsæ.

Prob. etiam auct. S. Scrip. nempe Psal. 37. *Non est sanitas in carne mea à facie ire tue, non est pax ossibus meis à facie peccatorum meorum* & Psal. 40. *Sana Animam meam quia peccauit tibi*; Super quæ verba ait D. Aug. *Nihil sanari si nihil sit infirmum nil vulneratum nil debilitatum*. Prætercà Patres confirmant hanc veritatem, comparando peccatorem homini illi, qui descendens ab Ierusalem in Iericho incidit in latrones, qui cum spoliauerunt, & plagis impositis reliquerunt semiuivum; Quare oppositum huius redolet Pelagia.



gianismum ex Conc. Araus. can. 10. ubi definiuit: *Liberum arbitrium non fuisse per preuicationem Ada extinctum, sed attenuatum*. Prob. ratione. Peccatum non est solum aduersum gratiæ, & statui supernaturali, sed etiam naturali lumen, & rationi, quo tollitur ordo vt harmonia naturaliter instituta rationis, & boni; ergo hac sublata per peccatum originale natura læditur, & vulneratur; ant. est D. Aug. lib. 3. de libero arbit. cap. 13. & D. Thomæ p. 2. q. 71. art. 2. Prob. 2. Si omnes miseriæ, tam Animæ, quam corporis, quæ nobis insunt per peccatum, essent homini naturales, certè misserrimus futurus esset status ille puræ naturæ, qui potius naturæ impuræ, & vitiatæ dicendus foret; ego cum status sint diuersi, diuersa etiam fuisset conditio naturæ puræ, ac proindè melior.

Conf. Eò quia si status puræ naturæ non foret melioris conditionis, sequeretur, quod nihil interesset inter naturam puram, quæ fuisset, vt ita dicam sui iuris, & non sub potestate Diaboli, & peccati, & natura sub potestate Diaboli, & peccati: sed hoc est manifestum absurdum. Non enim est credibile, quod Deus creasset naturam, tam miseram, & vitiatam, & pronam ad malum, & auersam à bono, sicuti modò nascitur, ac proindè, ne hoc manifestum absurdum admittatur, dicendum est, naturam humanam per peccatum non solum spoliata donis gratuitis, sed etiam in naturalibus vulneratam mansisse; & ita præter Doct. & SS. PP. citatos, tenent quamplures alij.

Arg. cont. 2. p. concl. Culpa est in genere morali, non physico, & maximè peccatum originale, quod est carentia iustitiæ originalis; ergo nihil omnino tollere potest de naturalibus, & physicis principijs, & proprietatibus naturæ, vt etiam apparet in Angelis, quorum naturalia remanserunt integra etiam post peccatum, ergo per peccatum natura non læditur. Resp. 1. iuxta distinctionem assignatam in 2. notabili, idest intrinsecè, conc. extrinsecè, neg. Resp. 2. ex Scot. in 2. d. 35. q. 1. quod, qui vulneratur, nihil sui amittit, sed tantum continuitas soluitur, & per hoc redditur minus habilis ad operationes suas; Natura igitur integra manet, vt dicit D. Dyon. lib. de diu. nominibus, vulnerari tamen dicitur, quando fit inhabilis ad actum rectum, qualis facta est per peccatum, per quod

soluta est rationis, & sensualitatis continuitas, ex quo fit, ut ratio tendat in vnum, & sensualitas in aliud.

Arg. 2. Inordinatio, & pugna inter se partium Animæ, & rebellio inferiorum aduersus superiores est naturalis, orta ex ipsa natura potentiarum, & obiectorum, ergo remota iustitia originali, naturaliter redibat, & manebat etiam in statu puræ naturæ, ergo per peccatum non est vulnerata. Confirm. Quia concupiscentia, quæ libido dicitur, & est capitalis pœna, naturalis est homini, qui cum carne, & ex appetitu pulchritudinis, & generandi oritur, naturaliter mouetur ad concupiscendum; sic pariter de concupiscentia spirituali philosophandum est; accenditur enim ira, Inuidia, superbia ex amore proprio, quo nihil magis naturale homini; ergo &c.

Resp. dist. ant. diuersitas ex obiecto, & commotio ex potentijs esset naturalis in statu puræ naturæ, conc. ant. pugna, & rebellio, & tanta inordinatio, quantam reliquit in nobis peccatum originale, neg. ant. & sic ad confirmationem dicitur, quod radix concupiscentiæ, libidinis, quæ est ipsa diuersitas, & dissonantia appetituum, vna, & eadem esset in vtroque statu, sed formalis pugna, & inordinatio fuisset multò minor in statu puræ naturæ propter inclinationem ad bonum magis expeditam, & rationem minus obscuratam, & naturalem subordinationem appetitus ad rationem.

Arg. 3. Mors est pœna peccati originalis, ut patet ex S. Scrip. sed mors est æquæ naturalis homini in statu naturæ puræ, quia est à principijs intrinsicis naturæ; ergo &c.

Resp. conc. ant. Siquidem mors est naturalis hominis ab intrinseco; negamus tamen eiusdem fore doloris, & pœnæ, ac modo est; fuisset enim in illo statu naturæ puræ vita felicior, mors tranquillior; idquæ ex eo patet, quod natura humana nunc est sub tyrannide Diaboli nos torquentis in pœnam peccati, à quo in sua origine natura in statu puro libera extitisset. Cæterum solent Aduersarij nobis opponere plures Ss. PP. quibus maiorem numerum opponere possumus; ut videre est apud Doctores, qui de hac quæstione diffusè disputant explicando sequitur cæteras pœnas, quæ nobis ex peccato originali insunt.

*Vtrum paruuli decedentes in peccato originali puniantur pœnis inferni.*

**N**Ot. Quodd licet omnes Doctores catholici conueniant, paruulos cum solo originali peccato ex hac vita migrantes, damnandos esse pœna damni, & perpetua carentia Diuinæ visionis, discordant tamen, an paruuli puniantur aliqua pœna sensus, & vermis, idest pœnæ interioris tristitiæ, & afflictionis. Hinc prima sententia asserit, paruulos puniri vtraque pœna, nempe damni, & sensus, idest pœna ignis, & vermis æterni, mitius tamen, quam adultos damnatos. Ita Greg. Arim. in 2. d. 3. & noster Florentinus Conrius Archiep. Thuamensis in tract. edito ad calcem operis Iansenij de statu paruulorum &c. Secunda opinatur, nulla pœna ignis, & sensus fore puniendos; pœnam tamen vermis, seu tristitiæ passuros de amissione beatitudinis æternæ. Ita Abulens. super cap. 21. Matt. Bellarm. lib. de statu peccati cap. 6. & alij. Tertia affirmat, paruulos sic migrantes priuari quidem æternâ Dei visione, & fruitione, habituros tamen post diem iudicii quamdam beatitudinem temporalem; Terram namque veluti Paradisum terrestrem habitabunt pleni sapientia, & virtutibus moralibus instructi; nec non etiam Angelorum consortio, & apparitionibus recreandi: Ita Cathar. lib. de statu par. Albert. Pich. controuers. de peccato originali, quam sententiam probabilem putat Salmon in cap. 5. ad Rom. At noster Macedo eam censurat, eò quodd faueat Pelagianis. Quarta sententia denique docet, paruulos in peccato originali decedentes carere visione beatifica, & omni naturali beatitudine, non tamen cruciari vlla pœna sensus, aut vermis. Ita Scot. cum Magist. sent. in 2. d. 33. D. Thomas ibidem q. 1. art. 1. & 2. D. Bonau. ibidem art. 2. q. 1. & Scorist. Recent. sit ergo.

Concl. Iuxta mentem D. Bonau. & Scoti. Paruuli in peccato originali decedentes nullam patiuntur pœnam sensus, nec vermis, seu conscientie remorsus. Prob. ex D. Bonau. qui loc. cit. sic docet. Alia positio mitior, quæ magis concordat pietati, fidei, & iudicio rationis, quod

quia

quia paruuli, decedentes cum originali carent iustitia, & Spiritus S. gratia, quæ est pignus hæreditatis æternæ, priuantur in æternum Dei visione; quia verò in carne fuit feditas, ideò ponuntur in loco vili, vt potè infernali (supple in Lympo) sed quia non habuerunt in se actualem delectationem peccati, nec in spiritu, nec in carne, ideò non sentient pœnam ignis accerbitatem. Hæc Seraph. Doctor. Prob. 2. auct. D. Aug. dicentis in lib. de baptismo paruulorum, quod pœna illorum paruulorum sine baptismo decedentium est mitissima. Item auct. D. Ansel. &c.

Prob. ratione 2. pars. Nam secundum Aug. de Ciuit. Dei. Tristitia est de his rebus, quæ nobis nolentibus accidunt, sed paruuli non inuitè, nec inuoluntariè sustinent statum, alioquin murmurarent contra diuinam dispositionem; ac proinde haberent inordinatam voluntatem, quod videtur absurdum; sententia namque diuina, dispositum est, quod vbicunque ceciderit lignum, ibi erit, vt dicitur Eccles. cap. 15.

Præterea. Si tristerentur ob carentiam beatitudinis, cum non habeant spem, eam assequendi (est enim illis impossibilis) haberent pœnam grauissimam inter pœnas damnatorum idest tristitiam, & desperationem; quod non videtur admittendum.

Arg. cont. 2. part. conc. D. Fulgent. de fide ad Pet. c. 27. à Scoto relatus sic docet, firmissime tene; & nullatenus dubites, eos; qui sine baptismi sacramento transeunt ex hac vita, æterni ignis supplicio puniendos; ita & D. Aug.

Resp. D. Bonau. Quòd Aug. loquitur excessiue ad destruendam hæresim Pelagianorem, qui dicebant, paruulos illos nullam habere culpam, & ita nullam pœnam. Quia, sicut secundum Arist. lib. 2. Eth. Via deueniendi ad medium, est aliquo modo ultra medium procedere versus extremum; & dat exemplum de virga curua dirigenda: Sic frequenter SS. Patres disputando contra hæreses excessiue locuti sunt, deuiantes ad illud extremum, vt reducerent hæreticos ad medium; & ita multum ponderandum, est contra quos hæreticos Sancti sint locuti. Sic idem Aug. loquens contra Arium videtur quasi declinare ad Sabellium, & è contra.

Arg. 2. Paruuli habebunt corpora passibilia; ergo pati

poterunt ab igne, vel alio actiuo; ac proinde pati poterunt etiam pœna interiori, idest famis, & sitis.

Resp. neg. ant. & conf. Quia sicut corpora damnatorum ab igne pariuntur, & non dissoluentur ita corpora paruulorum ex diuina dispositione erunt impassibilia; adeout nec intus, nec extra patiantur, estò id non habeant ex dote impassibilitatis.

Arg. 3. In paruulis fomes erit non extinctus; ergo poterunt habere concupiscentias inordinatas, & appetere delectabilia, propter quorum subtractionem poterunt tristari, ac proinde puniri pœna interiori. Resp. neg. ant. Quia fomes, sicut in eis nullum motum inordinatum suscitauit in vita ista, ita nec ibi &c.

Arg. 4. Paruuli tunc habebunt vsum rationis, ac proinde agnoscere poterunt naturam suam ordinatam ad vitam æternam, ergo ex carentia illius poterunt tristari.

Resp. dist. 2. p. ant. naturam suam esse ordinatam ad beatitudinem in vniuersali, conc. in particulari; neg. ant. ratio, quia cognitio beatitudinis in particulari non est homini possibilis, nisi supernaturaliter eleuetur. Itaque, vel non dabitur eis talis cognitio, ne sit illis ad tristitiam, quam non meruerunt habere; sicut meruit paganus, cui cedit cognitio beatitudinis in particulari ad pœnam. Vel si paruulis detur talis cognitio; non ob id tristabuntur, quia contenti erunt de suo statu, scientes Deum de se ipsis ita disposuisse, neque se suo actu illam beatitudinem demeruisse.

Arg. 5. existens in puris naturalibus haberet idem damnum; ergo paruuli cum peccato originali debent habere aliquam aliam pœnam; alioquin culpa remaneret impunita. Resp. neg. ant. Eò quia desiderium naturale non causat tristitiam: nisi sit electiuum, sed hoc non videtur, inquit Scot. ponere per se istum magis punitum, quàm illum. Ideò dici potest, quod alter punitur, & alter non. Alter siquidem est debitor iustitiæ, & alter non; & ideò alter priuatur visione Dei, quia damnatus, alter verò non. Tamen de facto nunquam erit aliquis in puris naturalibus, quia Deus naturam rationalem semper perducit ad finem, propter quem illam fecit; si non fuerit ex parte ipsius creaturæ impedimentum, vel defectus.

## QVÆSTIO VII.

*Verum sit possibilis status naturæ puræ.*

**N**ot. 1. quod duo dicit natura pura, nempe naturam, & eius puritatem. Natura siquidem includit essentiam, & quæ naturaliter ei debentur: puritas verò excludit omnia indebita, seu ab essentia connaturaliter non postulata; quæ duplicis generis esse possunt; quædam enim perficiunt hominem in ordine ad finem sibi connaturalem, & operationes ordinis naturalis, vt donum integritatis naturalis, de qua supra: alia in ordine ad finem supernaturalem, vt dona gratiæ, quæ hominem supernaturali obiecto vniunt.

Not. 2. quod, an status ille sit possibilis, non solum secundum Dei absolutam potentiam, sed etiam secundum potentiam ordinariam, hoc est, quatenus operatur Deus iuxta eorum inclinationem, quamplures recentiores negant, statum naturæ puræ esse possibilem, & aiunt, contrariam sententiam Manicheismum redolere, atque esse vnum ex capitalibus erroribus Pelagij à D. August. impugnatis. Verùm huiusmodi statum esse possibilem de potentia Dei absoluta vix potest in dubium reuocari; cum Deus dona supernaturalia liberè largiatur creature intellectuali iuxta illud D. Aug. *Erat Deus in Angelis condens, naturam, & largiens gratiam*. Igitur est D. voluntatis Decretum, quod homo ad finem supernaturalem eleuetur. Quare difficultas solum videtur esse de potentia ordinaria, & hoc sensu negatur à nonnullis Recentioribus cum Iansenio. His tamen non obstantibus sit.

Concl. Possibilis est status naturæ puræ, nedum de potentia Dei absoluta; sed etiam de potentia ordinaria. Hæc quoad vtramque partem est Scoti in 2. d. 28. q. vn. vbi ait. Potuit enim aliquis esse in puris naturalibus, tam sine gratia, quàm culpa; ergo hæc nullo modo sunt opposita immediatè, sed dari potest status medius, qualis est status puræ naturæ. Eandem sententiam docet D. Thom. cum omnibus ferè suis Discipulis; & signanter 1. 2. q. 113. art. 2. ad quæst. vbi sic ait. Licet homo antequàm peccet, potuerit esse sine gratia, & sine culpa, tamen post peccatum non...



non potest esse sine culpa, & clariùs quæst. 4. de malo art. 1. ad 4. Prob. ratione, Deus vtendo potentia sua ordinaria solùm tenetur conferre creaturis, quæ sunt connaturaliter illis debita, & iuxta connaturalem illarum exigentiam, & inclinationem, sed dona gratiæ, & gloriæ nulli creaturæ intellectualem sunt connaturaliter debita; cum illa non respiciant potentiam eius naturalem, sed obedientialem tantum; ergo Deus potuit etiam de potentia ordinaria producere creaturam intellectualem sine illis donis supernaturalibus; ac proinde in statu naturæ puræ.

Confirmatur omnis creatura est naturaliter, & ex sua origine Dei seruus; quod in creatione, & creatoris dominio fundatur; sed seruus non est naturalis hæres Domini sui, vt habetur Gen. 21. ergo nulla creatura quantumcunque pura, & innocens in sua origine ex sui natura exigit dona gratiæ, & gloriæ. Tum quia homines etiam innocentēs, & Angeli sunt Filij Dei tantum adoptiui; ergo non iure natiuitatis, sed assumptione gratuita vocantur ad beatitudinem, velut ad hæreditatem. Tum quia sequeretur, quod gratuita dona non essent gratuito donata; si Deus non posset alio modo disponere de creaturis intellectualibus, quod videtur manifestum absurdum.

Prob. denique ex definitione Pontificum Pij V. Greg. XIII. & Urbani VIII. damnantium varias propositiones Michaelis Baij; inter quas 22. erat ista, *Humana natura sublimatio, & exaltatio in consortium Deitatis debita fuit integritati primæ conditionis, & proinde naturalis dicenda est, & non supernaturalis*: per consortium Diuinæ naturæ, vt aduertit Frassen, non aliud intelligit, quàm quod habetur per gratiam sanctificantem, vt colligitur ex alijs eius propositionibus; & clariùs eius mentem explicat propositio 79. in qua dicitur, *Falsa est Doctorum sententia, primum hominem potuisse à Deo creari, & institui sine iustitia naturali*: Priùs autem dixerat Baius, naturalem iustitiam illam esse, in qua creatus est primus homo; ergo &c.

Atq. 1. cont. conc. Creatura rationalis creari nequit à Deo; nisi cum voluntate ordinata ad ipsum Deum amandum, & diligendum, sed talis amor non potest haberi sine gratia Dei; ergo &c. Resp. dist. mai. Amore naturali, vel supernaturali: conc. ad amandum Deum amore supernaturali nequit creari: neg. mai.

Arg.

Arg. 2. Implicat, vt homo in eo statu creetur, in quo suam perfectam beatitudinem, quam naturaliter appetit, obtinere non possit, aliàs frustra esset talis appetitus; sed homo in statu naturæ puræ beatitudinem suam perfectam assequi non posset; cum illa consistat in clara Dei visione, ergo status naturæ puræ implicat. Resp. dist. mai. Implicat quoad finem naturalem, seu beatitudinem naturalem, conc. quoad beatitudinem supernaturalem, neg. huiusmodi autem beatitudo naturalis ex communi sententia Theologorum consistit in perfecta, & suaui contemplatione Dei, vt Auctoris naturæ; quæ non esset intuitiua, sed abstractiua à creaturis emendicata, maximè à separatis substantijs. Vnde talis contemplatio esset radix amoris naturalis erga Deum super omnia inefficaciter tamen, seu imperfectè, cum quo posset consistere vitium, seu peccatum philosophicè acceptum; vt alibi indicatum est.

Cont. Visio beatifica est naturaliter debita creaturæ rationali, cum sit eius vltimus finis; ergo Deus non potest eam homini denegare absque culpa, & peccato ipsius.

Resp. ant. esse falsum, & aduersari Sac. Scrip. & SS. PP. oppositum docentibus; quia vt dictum est etiam in disp. de visione beatifica, & beatitudine, non est homini conaturalis, nec debita iuxta illud David. *Gratiam, & gloriam dabit &c.*

Arg. 3. Implicat naturæ rationali status ille, qui & peccatum excludat, & adiunctam habeat impotentiam acquitendi, rectitudinem, & virtutem exercendi: sed status puræ naturæ excludit peccatum, vt supponitur; ergo ille status implicat. Resp. dist. mai. Implicat status ille naturæ rationali, qui excludit peccatum theologicum, neg. mai. peccatum philosophicum, & exercitium virtutis in ordinem ad finem naturalem, qualem solum intendebant etiam Gentiles, conc. mai.

Arg. 4. Ille status non est conueniens, nec de potentia Dei ordinaria possibilis, in quo homo non posset diligere Deum super omnia: sed hoc non posset præstare in statu puræ naturæ, quia ad hoc indiget homo auxilio supernaturali; ergo talis status de potentia Dei ordinaria non est conueniens, ac proindè non possibilis.

Resp. nonnulli neg. assumptum in maiori; nam posset

homo in illo statu diligere Deum super omnia, vt auctorem naturæ cum speciali auxilio ordinis naturalis, quod Deus illis concederet, quotiescunque præceptum dilectionis Dei vrgeret, sic exigente D. prouidentia suauitate, quæ nunquam impossibilia præcipit. Verùm hæc responsio videtur confundere statum naturæ puræ cum statu naturæ integræ; eò quòd status naturæ puræ, vt patet ex dictis, excludat omne auxilium speciale etiam ordinis naturalis. Vnde resp. conc. mai. & neg. min. Etenim homo in statu naturæ puræ absque speciali auxilio naturalis ordinis, sed solo lumine naturali, ac generali Dei concursu diligere posset Deum super omnia, quemadmodum fortasse dilexerunt Deum quidam Philosophi gentiles; quamuis talis amor super omnia non foret efficax, & perfectus; ideoque admitteret peccatum philosophicè sumptum, vt proximè indicauimus, & clariùs, Deo fauente, ostendetur in tract. de gratia actuali.

## A P P E N D I X

### De cæteris operibus sex dierum.

**P**ostquàm in superioribus disputationibus, ac tractatibus egimus de natura angelica, creatura purè spiritali, nec non de homine, creatura partim spiritali, partim corporali; restat differere de creatura merè corporea, nempe de materia, de elementis, de terra de Cœlis, de plantis de Animalibus &c. non quidem supra dictorum omnium naturam, proprietates, qualitates; virtutes &c. inuestigando, atque speculando, sed solum de tempore, & ordine, quo præfata creata fuere; nec non de quibusdam peculiaribus circumstantijs, & accidentibus. Eò vel maximè, quod in Philosophia de ijs omnibus tractatur; quatenùs Philosophus considerat rerum naturas, & proprietates &c. & in S. Scrip. nempe in Genesi cap. 1. per sacros Interpretes fusè expenduntur ea, quæ pertinent ad veram creationis intelligentiam, & ordinem: Qua de re vnica disputatione præsentem appendicem absoluerè ad nostrum institutum satis apparet, ideoque sit.

DIS-

## QVÆSTIO I.

*Vtrum materia prima fuerit creata informis:*

**N**OT. 1. Quòd, licet Arist. & quamplures, alij Philosophi putauerint, Mundum hunc visibilem creatum, fuisse ab æterno; nihilominus secundum catholicam veritatem mundus non ab eterno, sed in tempore est creatus, quæ quidem veritas apertè traditur in Sac. Scrip. Genes. cap. 1. his verbis. *In principio creauit Deus Cælum, & terram;* quæ verba à SS. PP. & à Concilijs explicantur de principio temporis, Vnde D. Basilius, D. Ambros. exponunt. In principio vniuersitatis rerum, seu temporis, idest, vt notat noster Doctiss. Io. de la Hyè in Biblia maxima; in, & simul cum primo instanti à quo tempus vniuersum fluere cæpit; & Concil. Lateran. cap. firmiter dogmaticè loquens, ait. *Creator omnium inuisibilium, & inuisibilium spiritualium, & corporalium, sua omnipotentia virtute simul ab initio temporis, utramque de nihilo condidit naturam spiritualem; & corporalem;* Eandem veritatem tradunt, & comprobant Doctores Scholastici; & signanter Alenf. in p. 2. D. Bon. in 2. d. 12. q. 3. D. Thomas in p. 1. q. 44. qui latè hanc materiam pertractant.

NOT. 2. quod de materiæ primæ creatione, entitate, existentia, potentia &c. satis in physicis dictum est; vnde impræsentiarum solum mouetur quæstio de materia; an videlicet creata fuerit informis, vel formata; circa quam diuersæ referuntur sententiæ à D. Bonau. in 2. d. 12. q. 3. a. 2. Quidam namque voluerunt, quod materia illa diceretur Chaos propter formarum multitudinem, & contrarietatem, quæ erant in partibus materiæ, ita quod illæ partes non distinguebantur ab inuicem, secundum loca determinata; nec ita proportionaliter inuicem iungebantur, vt ex eis resularet aliquod mixtum completum; & idè erat ibi quædam permixtio, non proportionis, sed confusionis. Sed iste modus, inquit Doct. Seraph. ponendi potius est poeticus quàm philosophicus, quia magis sequitur imaginationis fictionem; quam rationem. Alij opinati

sunt, vt refert noster Rich. in 2. d. 12. art. 1. q. 6. quod tota materia infra Cælum Empyreum fuit creata sub vna forma completa; & de illo corpore vno facta fuerunt per interualla sex dierum, quæ Gen. 1. narrantur facta: sed hoc, ait Rich. est phantasia irrationabilis, quia hoc esset ponere corpora elementaria, & corpus quintum facta ex corpore sexto; Alij dixerunt, materiam creatam fuisse sub formis completis; sed omnia corpora infra Cælum Empyreum à sua creatione simul fuerant confusa. Verùm hæc opinio ex eod. D. est irrationabilis; quia cum aliqua corpora inter se confundantur, manētia tamen de formis completis mutuò diuidunt se in partes multas. Denique alij, vt D. Bon. Rich. Scot. existimant materiam illam productam fuisse sub aliqua forma; quæ non erat forma completa, ac proinde nec materiæ præstabat esse completum; Vnde sit iuxta hanc communem, & receptam sententiam.

Concl. Materia prima in sua creatione non fuit omnino informis, sed fuit formata quadam forma imperfecta, quæ materiæ appetitum non expleret, sed esset dispositio quædam ad vltiores formas recipiendas. Prima pars patet ex traditis in Philosophiâ; vbi vnanimis Philosophorum catholicorum sententia docet materiam naturaliter non posse sine vlla prorsus forma substantiali, nec quidem per instans temporis, existere; ergo materia non fuit à Deo creata informis; idest omni forma spoliata. Pars 2. prob. & explicatur. Si materia naturaliter nequit existere sine aliqua forma absoluta substantiali, consequens est, quod tunc fuerit informata forma substantiali; non quidem forma quadam rudi, obscura, generali, & comuni corporeitatis, ita vt tantum esset in potentia ad omnes particulares formas suscipiendas; vt putat Abolensis in expositione primi cap. Gen. sed quadam forma substantiali, naturâ tantum posteriori ipsamet materia; siquidem fuit materia, vt docet Scot. in 2. producta cum vna forma absoluta completa in se, incompleta tamen respectu materiæ, habentis appetitum ad omnes possibiles formas, veluti ab obiectum adæquatum; & quia isti appetitus multiplicantur ad multiplicationem terminorum, idest formarum, ided iuxta Scotum fuerunt cum ipsa materia concreatæ diuersæ formæ respectiuæ, quæ sunt appetitus actuales ad diuersas formas.

Con-

Confirm. ex D. Aug. lib. 1. Genes. contra Manichæos. c. 7. *Informis illa materia.* ait Aug. *quam de nihilo fecit Deus, appellata est primò cælum, & terra, non quia iam hoc erat, sed quia hoc esse poterat.* Nam & cælum scribitur esse factum; quemadmodum, si semen arboris considerantes, dicamus, ibi esse radices, & robur, & ramos, & fructus. & folia, non quia iam sunt, sed quia inde futura sunt; Itaque ex D. Aug. ex materia prima creatum fuit die secundo Cælum; tertia die terra, & omnia alia; quemadmodum modo ex eadem materia transeunti de vna forma ad alias, fiunt, & generantur plura composita substantialia.

Arg. 1. cont. conc. Primæ formæ, quæ insunt materiæ, sunt formæ elementares, vt patet, quia vltra illas non est resolutio, nisi ad primam materiam; ergo si materia illa aliquam formam habuit corporalem, videtur, habuisse elementarem, sed elementares sunt plures; sunt enim equæ primæ; ergo simul habuit omnes formas.

Resp. ex D. Bonau. quod maior est vera de formis, quæ dant materiæ esse completum; non autem de illa forma, quam habebat materia informis; cum non daret ei esse completum, ideoque talis forma incompleta, tam formas simplices, quàm compositas, quæ esse completum tribuunt, præcedebat, vel præcedere poterat.

Arg. 2. Materia illa cum esset imperfecta habebat aliquem appetitum; aut ergo ad vnā formam, aut ad plures: Si ad vnā, ergo videtur, quod cum Deus compleuerit appetitum eius, debuerit dare vnā solam formam corporalem; si ad plures; ergo cum multi formitas appetituum veniat ex multi formitate dispositionum; & hæc ex multi formitate formarum; videtur quod illa materia condita fuerit sub formarū diuersitate. Resp. ex D. Bon. & ex Scot. Materiā habuisse appetitum ad omnes, & singulas formas; non tamen inde sequitur, habuisse plures formas; tum quia, vt ostensum est in physicis, duæ formæ substantiales non subordinatæ sunt impossibiles in eadem numero materia simul; tum quia materiæ appetitus est ad omnes formas suscipiendas eo modo, quo naturaliter est possibile; est autem naturaliter impossibile vnā, & eandem numero materiam omnibus simul formis informari; quicquid sit de potentia supernaturali, de qua in Philosophia &c.



Arg. 3. Constans est sententia secundum positionem Sanctorum, quod lux à Deo producta faciebat noctem, & diem, sed non poterat facere diem, nisi esset corpus transparent, & illuminabile; neque noctem, nisi esset corpus opacum, quod umbram produceret, ergo videtur quod in prima conditione materia in quadam sua parte fuerit transparent, & in quadam opaca; & ita, quod haberet in se formas diuersas. Resp. ex D. Bonau. Quod non erat ibi perfecta opacitas, nec perfecta transparentia, erat tamen in diuersis partibus materiae, secundum quod conditor ordinauerat ex eis diuersas formas producere, aliquis diuersus dispositionis modus, qui non ponebat diuersitatem formarum. Sicut si intelligatur quod aliquod corpus in vna parte sit rarius, & in alia magis compactum, salua formae unitate; sic intelligi debet in illa materia, quae formam habebat maximè ad multa possibilem; vt in sequenti quaest. magis patebit.

Quæres 1. An tota mundi machina fuerit producta in instanti, vel in paruo tempore, vel spatio sex dierum.

Resp. Quod D. Aug. cum nonnullis alijs Doctoribus sensit; omnia fuisse creata in instanti; absque temporis intervallo. Quare Aug. lib. 1. cap. 3. tom. 3. voluit, quod per Cœlum intelligeretur natura spiritalis informis; & quia lux respondebat Cœlo, per ipsam lucem spiritualem, Angelicam naturam formatam dixit, intelligi ad litteram; per diem verò intelligi ipsam considerationem angelicam; per septennarium dierum, septemplex considerationem, & per vespeream diei considerationem creaturæ, quia creatura est sicut tenebra; per manè autem reductionem ipsius cognitionis creaturæ in suo genere proprio, ad cognitionem, quæ est in summa luce, & ad laudem ipsius Dei. Itaque per illos sex dies, quos S. Scrip. numerat, non intelligit D. Aug. aliquos dies reales, sed distinctas cognitiones Angelorum, quibus diuersa rerum genera creaturarum istis sex diebus nouerunt; quæ quidem cognitiones dicuntur partim vespere, quatenus tendebant ad res creatas in proprio genere cognoscendas, partim verò manè, quatenus distincta cognitione in Verbo (quæ matutina dicitur) attingebantur: vt latè referunt antiquiores, & Recentiores Theologi. Verum dicendum cum sententia com-

communiter recepta mundi productionem fuisse factam spatio sex dierum; prout apertè testatur S. Genesis; qui dies indubiè litteraliter sunt intelligendi; cum nil cogat nos in sensu mystico dies illos intelligere, ac explicare; Vnde Recentiores Theologi obseruant; D. Aug. posuisse illam expositionem tanquam probabilem, non verò assertiue illam pronunciasse; prout se explicat in lib. 4. Gen. ad litt. c. 27. & 28. Immo lib. 2. retract. c. 24. loquens de libris scriptis in Genes. ait. *In quo opere plura quasita, quam inuenta sunt, pauciora firmata; cetera uerò ita posita, velut adhuc requirenda sint.*

Quæres 2. An Mundi productio facta fuerit tempore verno, vel autumnali. Resp. Doct. in hoc non conuenire. Quidam enim, vt noster Lyran; Abulensis, & alij censent mundum fuisse productum tempore autumnali; quorum fundamentum est. Quia omnes arbores in creationis exordio erant fructibus onustæ; ac proinde videtur probabilius dicendum illud tempus fuisse autumnale, quo fructus abundant. Alij autem contendunt auctoritati plurimorum Patrum nisi, Mundi creationem tempore verno peractam fuisse; & Adam fuisse creatum die 23. Martij; & consequenter Deum rerum creationem incepisse die 18. eiusdem mensis; idque videtur valde congruum, & rationabile, ad hoc vt creationi corresponderet recreatio, seu reparatio mundi lapsi, facta per Christi passionem tempore verno. Cæterum quænam opinio ex istis sit probabilior, seu magis consona veritati, nouit Deus, qui cuncta condidit.

## QVÆSTIO II.

*Vtrum lux primo die facta, faceret diem, & noctem?*

**N**ot. 1. Quòd textus S. Genesis narrans opera primo die à Deo producta ita loquitur. *In principio creauit Deus Cælum, & terram. Terra autem erat inanis, & vacua, & tenebra erant super faciem abyssi; & Spiritus Domini ferebatur super aquas. Dixitque Deus fiat lux, & facta est lux.* Per Cælum, & terram Moyse voluit totum hunc mundum corporeum nobis significare; quasi summarie ponendo ante oculos

opificium vniuersi mundi; & deinde per sex dies particulatim opera distinxit, & explicauit. Ita sentiunt D. Crysof. homil. 2. in Gen. D. Aug. pluribus in locis, & alij. Item per Cælum Moyses intellexit naturam Angelicam; vt placet D. Aug. per terram autem materiam informem omnium corporum: ita vt Deus à principio duo condiderit, alterum propè se, idest naturam Angelicam, alterum propè nihil, idest materiam primam; vt alibi dictum est de mente D. Aug. Insuper per Cælum, & Terram significauit materiam primam, ex qua constant omnia corpora, sed primò, & principaliter Cælum, & terram; qua ratione D. Aug. his nominibus eam appellauit, & signanter lib. 12. Confess. c. 7. 19. & 20. denique per Cælum significauit nobis Moyses Cælum Empyreum tantum ratione suæ nobilitatis, & excellentiæ maximè diuersum à cæteris Cœlis; & per terram materiam primam informem; & habentem solummodò quandam formam corporis, vel corpulentam quandam massam, quæ totum illud vacuum, quod est inter Cœli empyrei ambitum, occupabat, & implebat; ex qua deinceps corpora omnia composita, & formata sunt, vt supra indicauimus, & citantur pro hac sententia Theodoret. D. Basil. Beda, & alij.

Cæterùm de terra sermonem reassumens dicit sacer textus: *Terra autem erat inanis, & vacua*; quibus verbis explicatur qualis fuerit terræ status in Mundi exordio; Erat siquidem inanis, & vacua, idest sine luce, sine vlllo ornatu, & decore, vacua hominibus, animalibus, & plantis, non distincta in montes, colles, & valles; & ex omni parte ex altissimis aquis cooperta, quasi chaos quoddam inane, rude, & indigestum, vt passim notant Doctores; adeout rectè appelletur à D. Aug. lib. 1. contra Manichæos materia prima, quia terra inter omnia elementa minus est speciosa, & incompressa ob elementorum omnium commixtionem; eandem pariter vocat abyssus, & tenebræ erant super faciem abyssi, quia confusa erat, & commixta, specie distincta carens: & denique eadem vocatur aqua; super quam ferebatur Spiritus Domini, sicut superfertur, ait cum D. Aug. Magister sent. fabricandis rebus voluntas artificis. Et Cornel. à lapide ex communi sic explicat illa verba: Et tenebræ erant super faciem abyssi: puta super aquas, &

molem aquarum, quæ quasi abyssus terram operiebant, se sequè porrigebat vsque ad Cælum empyreum; abyssus enim vocatur id, quod fundo caret, siue profundum sine fundo habet; & ut ait Eustachius: *Abyssus est aqua nimia infinitum habens profundum*. Porro faciem hebræi vocant superficiem tam extimam, quàm intimam, quasi dicat: tota terra, & abyssus hæc aquarum nihil omninò habebat lucis, quia tenebræ est carentia lucis pro formali sumpta, quo sensu tenebre non sunt factæ; pro materiali autem, idest pro re luce carenti, dici potest, quod tenebræ sunt factæ.

Not. 2. ex Scot. in 2. d. 13. ex D. Bonau. & Ricard. dist. 1. 3. art. 1. q. 3. quod lux non est forma substantialis; nulla siquidem talis forma est sensu perceptibilis, sed est accidentalis forma, sensu perceptibilis; hoc est visibilis. At pro intelligentia auct. Patrum, & rationum notat D. Bon. quod sicut lux incorporata est principium coloris in ipso corpore terminatum, qui quidem color est accidens, & passibilis qualitas, & sensu percipitur, sic etiam lux in corpore luminoso est principium cuiusdam fulgoris, qui ad modum coloris est accidens; & mediante quo luminosum corpus à sensu apprehenditur; & secundum hoc dupliciter potest lux accipi; vno modo dicitur lux ipsa forma, quæ dat esse corpori lucido, & à quo luminosum corpus principaliter est actiuum; sicut à primo mouente, & regulante. Alio modo dicitur lux esse fulgor, qui est circa corpus luminosum, qui consequitur existentiam lucis in tali materia, & qui etiam est sensus obiectum, & operis instrumentum; & sic est accidentale complementum; ac proinde in hoc sensu lux est accidens; & ab ipsa oritur lumen, seu radius; & recipitur in medio, quod illuminantur unde lumen in medio non habet principium materiale ex quo, sed potius originale, à quo fuit, & ad quod etiam redit, cū in medio desinit esse; sicut dicitur de similitudine.

Concl. lux primo die creata diem, & noctem per localem circuitum faciebat, non verò per radiorum emissionem contractionem, ut putarunt Patres Græci; qui asseriebant per talem emissionem, & contractionem radiorum diem, & noctem facere, non per virtutem propriam, sed per specialem ordinationem diuinam. Prob. 1. pars, quæ est Doctorum, & Patrum latinorum. Virtuti naturali  
possi-

possibilis est, quod lux illa diem, & noctem faciebat suo motu, sicut sol sua facit actione; illa siquidem lux intelligitur facta fuisse, ubi nunc est sol, ait Seraph. Doct. & ex illa formatus creditur esse sol; ergo si vices solis gerebat rationabilius apparet instar solis diem, & noctem per localem motum circularem fecisse. Quare respectu vnius, & eiusdem Emispherij lucem, & diem, successiuè faciebat. Etenim per existentiam eius in vno hemispherio dies in illoratur, & nox in hemispherio opposito propter umbram partis materiæ grossioris creatæ, ubi modo est Terra, de qua parte materiæ terra postmodum facta est; vt tradit noster Richard.

Confirmatur ex S. Scrip. narrante Deum diuidisse lucem à tenebris, ergo fuerunt simul lux, & tenebræ; sed si lux faceret diem, & noctem per emissionem, & retractionem radiorum, cum non sint simul missio, & retractio, non esset simul lucis, & tenebrarum diuisio. Insuper S. Scrip. dicit, quod lux illa faciendo diem, faciebat vespere, & manè; sed si sola radiorum missione fieret dies, & sola contractione fieret nox, nunquam esset vespere, & mane, sed semper esset clarus dies, vel obscura nox; ergo cum hæc minus consonent S. Scrip. dicendum est, illam lucem facere diem, ac noctem per motum circularem, & non per emissionem, & contractionem radiorum, quibus rationibus remanet probata, tam prima, quam 2. pars conc.

Arg. cont. conc. Illa lux ex D. Aug. lib. 11. de Ciuit. cap. 10. fuit substantia angelica ad creatorem conuersa; ergo huiusmodi lux non faciebat diem, & noctem per localem circuitum. Resp. Quòd D. Aug. vt supra indicauimus in expositione sex dierum dissentire videtur ab alijs Doctoribus, qui commuiter oppositum asserunt. Siquidem illa expositio est allegorica, non litteralis; quam non recipiunt Theologi &c.

Arg. 2. Si illa lux faciebat diem, & noctem per localem circulationem, aut incæpit moueri ab oriente, aut ab alio loco: non ab oriente, quia tunc primus dies fuisset materiæ, quod falsum videtur, cum materiæ sit tempus inter noctem præcedentem, & clarum diem sequentem; nulla autem nox præcesserat primam diem: Tum quia si ex oriente; videtur quod primò fecerit mane, & postea ves-

pera ; quod est contra Scrip. dicentem : *Factum est vespere, & mane*. Si ab alio loco ; idest ab occidente ; ergo videtur, quod lux cæpit in occasu, hoc autem est inconueniens, ergo &c. Resp. ex D. Bonau. & Rich. quod illa lux incæpit moueri à puncto orientis, vel ab illa parte versus orientem, ad quam iam deuenisset per motum, si ab instanti creationis materiæ creata fuisset, & moueri incæpisset ; comprehendendo illud tempus, quod fluxit ab instanti creationis materiæ vsque ad creationem lucis sub prima die ; Cæterum quod attinet ad illud mane, & vespere ; respondet Seraph. Doct. cum Magistro senr. quod mane dicit finem præcedentis noctis ; & ex hoc dicit quandam obscuritatem, propter hoc, quod non tantum dicit diei initium ; immò dicit noctis consumationem. Et quia in prima lucis formatione non præcesserat nox, sed statim lux incæpit secundum suam totam potestatem illuminare, & ideo dicitur dies ille cæpisse à plena luce ; reliqui autem dies mane habuerunt, & vespere, quarum quisq; à suo mane incipiens vsque ad alterius diei mane tendebat.

### QVÆSTIO III.

*Quid intelligitur per firmamentum secunda die factum.*

**N**Ot. Quòd historia S. Genesis sic habet c. 1. *Dixit quoque Deus fiat firmamentum in medio aquarum, & diuidas aquas ab aquis : Et fecit Deus firmamentum, diuisitque aquas, quæ erant sub firmamento ab his quæ erant super firmamentum & factum est ita &c.* Porro firmamentum, secundum nominis ethymologiam, teste D. Hieron. significat expandere, distendere, & distendendo firmare, ac solidare rem aliquam, quæ prius fluida erat, & rara, & sic aqua densata in Cælos vocatur latinè firmamentum. Quod nam autem Cælum intelligatur per firmamentum variant Doctores, & Patres. Etenim Beda, Theodoret. & alij volunt, intelligi solum Cælum stellatum, seu octauam Spheram Cœlestem ; alij autem aliter sentiunt, & præsertim Recentiores, ideò sic.

Conc. Per firmamentum intelligitur non solum Cælum stellatum, sed etiam omnes orbes illi vicini, tam inferiores,



res, quàm superiores vsque ad Empyreum. Prob. 1. auct. SS. PP. signanter. D. Aug. Ruperti, Hieron. & aliorum, vt videre licet apud recentiores Theologos, nec non apud S. Scrip. Interpretes. Prob. ratione ex S. Scrip. deducta, quæ nomine firmamenti appellat etiam aeris regiones, dicens volucres volare supra firmamentum, nam vbi latina versio habet. *Producant aqua reptile animæ viventes, & volatile super terram sub firmamento.* Hebraicus textus habet; & *volatile volat in superficie, vel super faciem firmamenti*; ergo &c. Superest ostendere distinctionem omnium orbium, motuum firmamenti, pluralitem &c. sed hæc omnia in Philosophia traduntur, ideòque ad illam studentes mitto.

#### QVÆSTIO IV.

*Vtrum Cœlum crystallinum sit de natura aquæ.*

**N**ot. Quoddam Doctores catholici conveniunt, esse supra firmamentum Cœlum aquarum, seu crystallinum, at valde discordant in hoc, nempe. An illæ aquæ super Cœlos sint spirituales, vel corporales, an sint eiusdem naturæ cum istis sublunaribus &c. ex quo fit, quod Doctores in diuersas sententias abeant. Quidam dixerunt quod illæ aquæ, quæ sunt super Cœlos non sunt aquæ corporales, sed spirituales, intelligendo per illas aquas ipsam naturam Angelorum. Verum hæc opinio, ait Richard. est falsa; vnde, quia D. Aug. hanc sententiam aliquando tenuisse videbatur lib. 13. Confess. eam retractat lib. 2. retract. c. 6. dicens sic. *Quoddam dixi firmamentum factum, inter spirituales aquas superiores, & corporales inferiores, non satis consideratè dictum est; res autem in abscondito est valde.* Alij putauerunt, illas esse aquas corporales, & eiusdem naturæ cum istis aquis inferioribus, & per firmamentum, de quo ibi loquitur scriptura, intelligebant aerem medium inter aquas istas inferiores, & aquas suspensas in nebulis in loco nubium; dicentes aerem in Scriptura Cœlum vocari, cum dicitur: Volucres Cœli, & istum aerem etiam dicebant esse firmamentum, quia intervallum eius diuidit inter quosdam vapores aquarum, & istas aquas, quæ corpulentius in terris fluunt. At neque hæc opinio consistere potest;

test; Nam Scriptura testatur, illas aquas esse super firmamentum, quod secundo die factum est, & in quo quarta die luminaria facta sunt, hic autem aer tertia die factus est, nec in ipso stellatæ positæ sunt. Alij existimarunt, illas aquas esse corporales eiusdem naturæ cum istis, & esse super firmamentum, quod secundo die factum est. Cuius opinionis videtur fuisse D. Aug. vt patet lib. 2. super Genesim; qui videtur velle, vt refert Rich. quod sint ibi quasi vaporaliter suspensæ ad modum, quo videmus eas super istum aerem inferiorem in loco nubium, nec tendunt ad inferiora, sicut nec istæ, quàm diu vaporaliter suspensæ sunt. Itaque clarè patet quod in hac quæstione, inquit D. Bonau. propter diuersitatem positionum, & debilitatem rationum vix potest aliquid certum dici, sed ex quadam proprietate, & coniectura ex diuersis positionibus potest eligi vna quædam sobria, quæ inter fidem, & rationem incedat, quasi quadam media via. Sit igitur ad mentem Doct. Seradhici.

Concl. Supra firmamentum est Cælum crystallinum, quod de natura aquæ dicitur propter transparentiam, & frigiditatem virtuales, non verò quod sint ibi veræ aquæ.

Prob. ex D. Bon. Credendum est, opificem summum corpora mundi optimo ordine ordinasse, & in tali ordinatione, non solum considerasse finis vtilitatem (vt aiunt quidam sustinentes supra firmamentum esse veras aquas; inter quos est etiam Cornel. à lapide loc. cit.) sed etiam perfectionis dignitatem: at aquæ non sunt talis perfectionis, vt supra firmamentum collocentur, ergo non videtur verum elementum aquæ super firmamentum Deum collocasse; cum per naturam sit minus nobile, ac proinde dicendum potius, quod aquæ, quas dicit S. Scrip. esse super firmamentum, non habent naturam, & speciem aquæ elementi, censentur tamen aque nomine propter conuenientiam in aliqua proprietate. Vnde sicut aqua ista habet tres proprietates, nempe perspicuitatem, frigiditatem, & grauitatem; ita illæ aquæ sunt perspicuæ, ac proinde habent naturam receptiuam luminis, & quodammodo retentiuam, sicut experientia patet in aliquibus lapidibus, qui de nocte non videntur per se, nisi ponantur in aqua. Sunt pariter frigidæ, diuersa tamen ratione, nam istæ inferio-

res sunt frigida formaliter, illæ verò virtualiter tantum, etsi utræque sint frigida effectiue. Verum quantum ad grauitatem simpliciter differunt, quia aquæ super firmamentum nullo modo sunt graues, nec appetunt deorsum.

Arg. cont. concl. ex S. Scrip. habetur, aquas esse super firmamentum, & supra Cœlos, idque videtur dicere literaliter procedens, dum etiam illa, quæ narrat, sensu literaliter, intelligenda veniunt, ergo super firmamentum est verum aquæ elementum: ant. patet. Dicitur enim Daniel. c. 3. *Benedicite aqua omnes, quæ super Cœlos sunt*, & Psal. 148. *Laudate eum Cœli Cœlorum, & aqua omnes, quæ super Cœlos sunt &c.* Resp. ex D. Bon. Quod nomen aquæ, tripliciter in S. Scrip. in primaria rerum distinctione accipitur. Aliquando pro informi materia; vt ibi. *Spiritus Domini ferebatur &c.* Aliquando pro natura transparenti, & luminis retentiu; vt ibi. *Fiat firmamentum in medio aquarum.* Aliquando pro ipso elemento aqueo; vt ibi. *Congregantur aquæ in locum unum &c.* & sic patet responsio ad argumentum, ac proinde secundum Scripturam, & Sanctorum auctoritates super firmamentum veræ sunt aquæ.

Arg. ratione. Aqua ratione sui subtilitatis potest eleuari, vt sit supra aerem, ergo maiori subtilitate poterit amplius eleuari; ergo si omne corpus est diuisibile in infinitum; si adsit potentia diuidentis, poterit aqua tantum diuidi, & subtiliari, quod supra firmamentum poterit naturaliter consistere; ergo &c. Resp. quod non valet talis argumentatio, aqua eleuari potest, vt sit super aerem, ergo maiori subtilitatione amplius eleuari potest, quia vt supra inuimus cum Doct. Seraph. corporam mundi ordinantur secundum mai. & min. nobilitatem, & insuper ordinantur sub, & supra secundum mai. & min. subtilitatem; quæ eorum naturæ competit: cum igitur aqua secundum propriam naturam non sit aëre subtilior, & rarior, & tantò minus igne, hinc est, quod aqua nunquam adeò poterit rarefieri, & subtiliari, vt sit super aerem. Tum denique quia habentium eandem naturam idem est locus, vt patet; ergo idem est locus huius aquæ, ac totius aquæ, ac proinde si aliqua aqua est naturaliter intra terram, tota aqua erit in eodem loco, ergo in terra, & non super firmamentum sunt aquæ congregatæ.

*Qualiter congregatæ sint aquæ, & terra germinauerit  
herbam virentem, & facientem fructum &c.*

**N**ot. 1. Quodd hic consequenter describitur opus tertiæ diei, quo distincta sunt elementa, quæ distinctio facta est, vt dicit noster Sapientissimus Liranus super cap. 1. Gen. quod aqua prius producta in forma substantiali; vt paulò superius dictum est, accepit nunc à Deo debitam densitatem, & sic occupauit minorem locum, aeris spatium dimittendo; & per hoc quod virtute diuina factæ sunt concauitates in terra, vbi recepta est pars aquarum, & sic apparuit pars terræ discooperta aquis ad habitationem hominum, & animalium; & sic fuerunt elementa distincta in locis sibi debitis; hoc est, quod dicitur congregentur aquæ &c. congregationesque aquarum maria loquitur his verbis Scriptura, ait Lyran. more hebraici sermonis, quo vocatur mare, non solum Oceanus, sed quælibet congregatio magna aquarum, secundum quod in Euangelio frequenter nominatur Mare Tyberiadis, & mare Gallileæ, & tamen non est nisi quidam lacus, vnde & in Euangelio vocatur stagnum Genezareth Luc. 5.

Not. 2. Quodd non satis conueniunt SS. Patres circa congregationes aquarum. Siquidem Basil. Ambros. & alij censent aquas diuina virtute fuisse collectas in tumorem instar montis, & effecisse maria, vt arida posset apparere terra, & consequenter opinantur, mare de facto esse altius terra; ac proinde posse naturaliter inundare totam terram; nisi à Deo continuo miraculo intra suos limites contineretur. Verum probabilior apparet opinio D. Aug. Scoti, & aliorum asserentium, mare nequaquam esse altius terra; cui sententiæ fauet Scriptura in psal. 23. *Ipse super maria fundauit eum*; sed de hoc in libris de Cælo, & mundo agitur &c.

I. Concl. Hæc die tertia aquæ à Deo ita reductæ fuerunt in maria, in alueos, & cavitates, vt quandam inter se retinerent colligantiam, & communicationem, vel visibilem, vel occultam. Hæc est communiter recepta; & signanter traditur à D. Diony. Basil. Ambros. præter quam plures Scholasticos, & S. Scrip. expositores. Et quidem de  
visi-

visibili colligantia patet ex mappis Cosmographicis, ubi  
cernitur Oceanus colligatus versus Septentrionem cum  
Mari Germanico, & Baltico; versus occidentem cum ma-  
ri Pacifico; versus Meridiem cum Mare Aetiopico, ver-  
sus orientem cum mari Mediterraneo, Adriatico, Indico  
&c. Cum mare Caspio pariter, teste Basilio continuatur  
per meatus subterraneos, quod ex hoc deducitur. Nam  
etsi ingentia flumina in illud mare Caspium se exonerent,  
nunquam tamen extendat, eò quia tantum aquæ reijciat  
per subterraneos canales in Oceanum, quantum recipit  
ab illis fluminibus: Idem dicendum est de alijs maribus,  
& lacubus, ab Oceano seiunctis. Hinc patet visibilis, &  
inuisibilis colligantia, & communicatio aquarum. Simi-  
liter hac tertia die facti sunt montes, & valles, nec non  
varij hiatus, & cauitates in terra; omnes pariter a lueos,  
tum maris, tum fluminum, in eosque mare, & flumina se-  
gregauit.

II. Concl. Hac tertia die terra germinauit, non actiue,  
vt putant Caiet. & Burgensis; sed passiue, Proib. hæc conc.  
quæ est communis. Etenim D. Aug. docet, quod terra  
produxit actu herbam virentem, plantas, & fructus &c.  
id autem naturaliter non potuit producere actiue; quia  
vt modo videmus, terra paulatim procedit ad productio-  
nem herbarum plantarum, & tempore, non autem momen-  
to, & instanti; siquidem natura progreditur ab imperfecto  
ad perfectum temporis spatio. Itaque materiam tantum  
tunc in prima rerum creatione ministravit, Deo se solo  
effectiue, & subito producente omnia germina, & plan-  
tas, easque iustæ, & perfectæ magnitudinis, vt inter alios  
docet D. Thomas. Iam autem terra etiam effectiue con-  
currit ad germina; maximè si seminibus sit imbuta: Vnde  
per illa verba Scrip. *Cuius semen in semetipso sit iuxta genus suum*  
datur intelligi in terra latere omnis generis virtutes semi-  
nales à Deo hac die insertas; ex quibus nascuntur terræ  
nascencia plantarum, ac omnium herbarum; & idem di-  
cendum est de arborum semine; nempe hac die Deum fæ-  
cundasse tali semine terram.



*Qualiter luminaria die quarta à Deo facta sint nobis in signa, & tempora.*

**N**OT. 1. Quodd S. Scrip. sic describit opera quarta die facta. *Dixit autem Deus fiant luminaria in firmamento Cæli, & diuidant diem, ac noctem; & sint in signa, & tempora, & dies, & annos &c.* & in recapitulatione operum diuinarum Scriptura sic dicit. *Igitur perfecti sunt Cæli & terra & omnis ornatus eorum.* In quibus verbis, vt docet D. Thomas, triplex opus intelligi potest; nempe opus creationis, per quod Cælum, & terra producta leguntur, sed informia, & opus distinctionis, per quod Cælum, & terra sunt perfecta, siue per formas substantiales attributas materiæ omnino informi, vt Aug. vult, siue quantum ad conuenientem decorem, & ordinem, vt alij Sancti dicunt. Et his duobus operibus additur ornatus; distinctio autem aliquorum maximè manifestatur per motum localem, quo ab inuicem separantur, & idcò ad opus ornatus pertinet productio illarum rerum, quæ habent motum in Cælo, & in terra. Sicut autem de tribus fit mentio in creatione, nempe de Cælo, aqua, & terra. Et hæc tria etiam formantur per opus distinctionis trium dierum; prima enim die Cælum; secunda die distinguuntur aquæ; tertia die fit distinctio in terra maris, & aridæ; sic in opere ornatus; prima die, quæ est quarta, producantur luminaria, quæ mouentur in Cælo ad ornatum ipsius. Secunda die, quæ est quinta, Aues, & pisces ad ornatum mediæ elementi, qui habent motum in aere, & aqua, quæ pro vno habentur. Tertia die, quæ est sexta producantur animalia, quæ habent motum in terra ad ornatum ipsius.

NOT. 2. Quodd non sunt idem Astronomia, & Astrologia, licet vna ordinetur ad alteram. Astronomia siquidem velut theorica ordinatur ad Astrologiam, quæ ad praxim tendit. Itaque, etsi tam Astronomia, quam Astrologia versentur circa astra, tamen cum aliter, & aliter circa illa versentur, non parum inter se differunt. Astronomia namque velut theorica, & speculatiua agit de astris in vniuersali, nempe de eorum quantitate, mensura, distan-



ria de eorum situ, motu, & cursu, de aspectibus, de Eclypsi, de Polis, & Emispherijs, de Epiciclis, retrogradationibus, deaccessibus, & recessibus; & de alijs similibus ad astra, & eorum motus pertinentibus. Astrologia vero (loquimur hic de naturali) velut practica agit de astrarum effectibus, proprietatibus &c. ostendit namque Astrologia primò tempora ad plantandum, seminandum, & scindendum apta. Secundò abundantiam, vel caritatem futuram. Terriò ventus, tempestates, terremotus, pestilentias naturales, tam in hominibus, quàm in iumentis, & alia id genus. Vnde ab Astrologia appellationem accipiunt Astrologi, ab Astrologia verò genalitica, quæ est pars Astrologiæ ex hora, aut die natiuitatis cuiusque mores diuinantis; quam veteres vocabant Mathematicam, Neuterici vero Iudiciariam; vt obseruat noster Ignatius Lupus in comment. super edicta Inquisit. p. 3. lib. 18. dicuntur Astrologi Genalitici.

Not. 3. quod circa Cœlorum, ac astrarum signa fuit opinio Stoicorum, & hæreticorum Priscillianorum qui putarunt, quòd Cœli, & astra nos compellant tam ad bonum, quàm ad malum, ac proinde esse signa infallibilia nostrarum operationum, neque nos posse contra eorum influentiam, aut impulsum operari; Vnde huiusmodi vim Cœli, & astrarum vocare solent fatum. At hæc opinio est falsa, & hæretica. Alij affirmarunt, Cœlos, & astra nullum influxum in nos habere, neque mediatè, neque immediatè, immò Deum nihil agere per causas secundas, sed omnia præcisè per se ipsum operari, quæ opinio vt falsa reiicitur à D. Thoma contra Gentiles lib. 3. & à Scoto in 2. d. 14. p. 3. vbi ostendit stellas ex sui natura influere, & operari in corpora nostra, ex qua operatione Anima ad bonum, aut ad malum aliqua propensione tendit, cum nostra voluntas nata sit condelectari sensui. Alij denique docent contra primam opinionem corpora cœlestia nullam imponere coactionem, seu necessitatem nostræ voluntati, & contra secundam, corpora cœlestia in hæc sublunaria influere, ac proinde etiam in corpora nostra habere influxum, & inde participatiuè Anima trahit aliqualem inclinationem ad bonum, vel ad malum, quæ tamen inclinatio nullam prorsus ponit coactionem, vel necessitatem: & hæc

hæc est opinio vera, & catholica, quam vnanimi consensu tradunt SS. PP. & Theologi omnes, iuxta quam ponuntur sequentes conclusiones.

I. Concl. Luminaria sunt posita à Deo nobis in signa, & tempora, & dies, & annos, quod D. Bon. in 2. d. 14. in dub. litteralibus dub. 4. sic explicat. Dicendum, quod illud verbum dupliciter habet exponi secundum quod duplex est usus signi. Signum enim, & est ad significandum, & est ad distinguendum. Si primò accipitur, tunc est sensus, quod illa luminaria facta sunt in signa, idest in significationem futurorum, & variationem temporum, ac dierum, & annorum, ut variatio temporum attendatur in mutatione quantum ad calorem aeris, & frigus, variatio dierum quantum ad lumen, & tenebras, variatio annorum quantum ad renouationem horum duorum, & sic dicuntur corpora cœlestia esse in signa, non quorumlibet futurorum, sed eorum, quorum ipsa sunt quodam modo causa, sicut imbrum, & ventorum iuxta D. Damascenum, vel etiam eorum, per quæ præsignant D. providentia, sicut eorum, quæ aduenient in iudicio iuxta illud Lucæ 21. *Erunt signa* &c. Aliorum autem, quæ sunt à libero arbitrio non sunt signa institutione diuina, sed potius ad illa signanda trahit humana fictio, & fallacia diabolica.

Si autem secundo modo accipitur (pergit idem Seraph. Doct.) videlicet ab actu distinguendi, tunc est sensus. Sint in signa quasi in distinctiones temporum, & dierum, & annorum. Distinctio temporum fit, quia quatuor sunt tempora anni, ver, & æstas, autumnus, & hyems, quæ distinguuntur per motum solis in Zodiaco, prout ad nos accedit, & à nobis elongatur. Distinctio verò dierum fit similiter per eundem motum, quia modo dies crescunt, modo decrescunt; Aliquando dies sunt maiores noctibus, aliquando minores, secundum quod per illum motum duplex accipitur solstitium, nempe æstiuale, & hyemale, & duplex equinotium, idest vernale, & autumnale. Sunt etiam motus in distinctione annorum secundum seruationes illius motus Solis in obliquo. Similiter suo modo Luna est in significationem temporum, & annorum, & dierum, apud Iudæos, maxime quantum ad solemnitates, sicut apud Christianos est Sol, sicut dicitur in-

**Ecclesiastico c. 43.** *A luna signum diei festi.* Si autem quæ-  
 tur, quare Ecclesia magis accepit festa sua secundum solem,  
 quam secundum Lunam, exceptis duobus, prolixa est hu-  
 ius quæstionis determinatio, & planè inueniri potest in  
 lib. Augustini ad Ianuarius. Hæc quantum ad præsens  
 sufficiat dicere, quod quia Sinagoga in tenebris noctis am-  
 bulabat, & minuenda erat, idè à luminari, quod nocti  
 præest, & quod innuitur in consumatione, accipiebat sua-  
 rum solemnitatum distinctionem. Quia verò Ecclesia  
 iam ambulabat in lumine; ideo magis menses computat,  
 & dies solemnes secundum motum Solis, quàm Lunæ; ex-  
 cepto solo Paschate, & per consequens Pentecostes. Pas-  
 chalis enim solemnitas non solum celebratur in com-  
 memoracionem resurrectionis præteritæ, sed etiam in præfi-  
 gurationem resurrectionis futuræ, & in hoc Ecclesia quo-  
 dam modo est conformis Sinagogæ, vnde festiuitatem il-  
 lam obseruat à Luna non iudaizando, sed potius illam  
 futuram solemnitatem, quam expectat, secundum quod  
 sibi competit, præsignando. Hactenus Doct. Seraph.

**II. Concl.** Luminaria cælestia non sunt signa eorum, quæ  
 ab humano libero arbitrio dependent, neque luminarium  
 cælestium impressiones in hominibus morum diuersitatem  
 causant necessariò, sed dispositiuè tantum, contingenter,  
 & remotè. Hæc est de fide, & sic à Seraph. Doct. proba-  
 tur. Mores hominum, & euentus futurorum à sideribus  
 causari, dupliciter intelligi potest, aut necessariò, aut suffi-  
 cienter, aut dispositiuè, & contingenter; si primo modo  
 dicitur, sic non tantum est falsum, immò & hæreticum, &  
 diabolicum figmentum, quia repugnat Christianæ Reli-  
 gioni, repugnat sensui, repugnat rationi: Christianæ Re-  
 ligioni, quia est contra veritatem fidei, & honestatem  
 morum, quia tollitur meritum, præmium, & peccantis  
 culpa in sidera refunditur, & licentia malefaciendi sine  
 reprehensione conceditur. Repugnat sensui. Quia sen-  
 sibili experientia in eadem constellatione conceptos, &  
 natos videmus diuersificari in moribus, & euentibus, &  
 naturalibus proprietatibus, vt patet de Iacob, & Esau, qui  
 simul concepti, & nati, & tamen in omnibus his sunt di-  
 uersificati. Apparet etiam, quia in constellatione eadem  
 nascitur filius Regis, & filius Rustici, nascitur etiam ho-  
 mo,

mo, & Asinus, nascitur fœmina, & masculus, qui nec communicant in moribus, nec in euentibus, nec in naturalibus proprietatibus, vt probat. etiam D. Greg. in homil. Epiphaniæ sic: *Fateri Mathematici solent &c.*

Repugnat tandem rectæ rationi, dum superioribus præponit inferiora, & in se implicat contradictoria, dum homini præponit astra, quæ est creatura dignissima, vt testatur etiam Arist. & recta ratio dictat, hominem esse finem omnium, quæ sunt, hinc ait D. Greg. *Vitam quippe hominum solus, qui creauit, conditor, administrat; non enim propter stellas homo, sed propter hominem stellæ factæ sunt.*

Si autem dicatur mores hominum à dispositionibus, & influxibus siderum variari dispositiue, & contingenter, sic potest habere veritatem, quia nec rationi, nec fidei repugnat. Planum est enim, quod dispositio corporis varia multum facit ad variationem affectionum, & morum. Animæ, vt plurimum enim Anima complexionones corporum imitatur. Vnde cholericus sunt iracundi, & sanguinei sunt benigni, & melancholici sunt liuidi, & phlegmatici sunt pigri; hoc autem non est necessariò; Anima enim suo corpori dominatur, maximè quando est adiuta gratia Dei; multos enim videmus cholicos, mansuetos, & melancholicos benignos. Quoniam igitur virtus corporum cœlestium operatur ad mixtionem, & qualitatem complexionum; hinc est, quod per consequens operatur quodam modo ad qualitatem morum, valde tamen de longinquo: plus enim facit ad qualitatem complexionis virtus nature inferioris; quàm virtus sideris. Vnde D. Aug. lib. 5. de Ciuit. in solutione cuiusdam quæstionis de fratribus duobus, qui simul infirmabantur, & curabantur, vnde hoc esset, magis commendat responsionem Hippocratis Philosophi, quam Astronomi. Ille enim respondit, quod hoc erat propter similitudinem complexionis, hic autem respondit; quod erat propter identitatem constellationis. Melius ergo respondit Philosophus, quia causam reddit magis propriam, & magis propinquam. Itaq; sidera sunt tantum causa insufficiens, remota, & contingens, quæ de facili impeditur, maximè quoad mores.

Arg. 1. ex D. Aug. qui lib. 5. de Ciuit. ait, quod fatum est vis positionis siderum, quæ existente, quando quis con-

cipitur, vel nascitur, cognoscitur qualis futurus sit, ergo; regimen vitæ, & diuersitas morum pendet à virtute siderum. Resp. D. Bonau. quod D. Aug. accipit fatum secundum æstimationem Philosophorum, qui vocant fatum vim positionis siderum, & constellationum, secundum quam cuncta necessario eueniunt in his inferioribus, & sic fatum nihil est, prout ostendit idem Aug. qui volens de medio tollere equiuocationem fati loc. cit. dicit. Si quis fatum vocat ordinem causarum, quem Deus instituit, cum hoc sit verum, scientiam teneat, & linguam corrigat, quia secundum communem vsum accipitur, sicut Mathematici accipere consueuerunt.

Arg. 2. Arist. in lib. de elementorum proprietatibus dicit, quod regna vacua facta sunt, & terræ depopulatæ sunt ad coniunctionem duarum magnarum stellarum nempe Iouis, & Saturni: sed hoc non esset, nisi bella, & lites hominum ex astris penderent, ergo &c.

Resp. D. Bonau. quod illud verbum Philosophi non tribuit aliquid sideribus, quàm quandam dispositionem ad tales effectus, ex quibus bella generantur; ex motione enim alicuius humoris potest aliqua affectio in Anima excitari, quam tamen non necesse est ponere, quia Anima potest eam reprimere, vt docuit etiam Astronomiæ Princeps Ptolemæus; *Sapienter Dominabitur astris*; sed quia multi sunt infecutores passionum, quibus possent dominari, se ipsos subiiciunt: hinc est, quod multi se subiiciunt impressionibus astrorum; & ideo frequenter Astrologi vera prædicunt, maximè circa homines animaliter viuentes, non autem circa spiritualiter sapientes. Igitur certissimum est Astrologos ex astrolabio, aut inspectione astrorum non posse cognoscere prælia, lites, & id genus similia; nam oporteret, quod talia in astris velut in suis causis præluerent: at iam ostensum est astra non esse eorum, quæ pendunt ab humano lib. arb. causam nec mediatam, nec immediatam; non enim ageret possunt in potentias rationales, vt docent omnes theologi, & signanter D. Bonau. & Scot. in 2. d. 36. art. 2. q. 2. esto concedant remotè.

Arg. 3. Ad vniuersitatis ordinem spectat, & ad perfectionem regiminis, vt nihil casu fiat respectu D. prouidentia: ergo si Deus regit ignobilia per nobilia, inferiora per  
sup-

311

superiora, videtur, quòd nihil in terris fiat, quod à stellarum virtute, & influentia non procedat; prout experientia ipsa, aiunt Astrologi, id ostendit in mortibus Regum per cometæ apparitionem. Resp. ex D. Bonau. quòd perfectio Vniuersi non exigit mores hominum regia ab astris; cum perfectè regantur à D. providentia per modum dominantis supremi, ac proinde nil euenire potest casu, vel fortuitò. Quod autem attinet cometam, dicit Doct. Seraph. cum D. Damasc. quod cometa prout significat mortem Regum non sit natura, sed diuino iussu: vnde concludimus cum D. Bonau. quòd Astrologi in ijs, quæ sunt liberi arb. frequenter dicunt falsa, sicut & vera; & licet aliquando vera videantur dicere, hoc contingit vel casu, vel diabolico instinctu; nam diabolus, vri dicit D. Aug. in huiusmodi diuinationibus libenter se immiscet.

## QVÆSTIO VII.

*Vtrum conuenienter descripta sint opera  
quintæ, & sextæ diei.*

**N**Ot. Quòd Scrip. S. ita describit opera quintæ diei: *Dixit etiam Deus producat aqua reptile Anima viuens; & volatile super terram sub firmamento Cæli. Creauitque Deus Cæta grandia &c.* Et deinde describens opus sextæ diei: ait. *Dixit quoque Deus producat terra animam viuentium in genere suo;* idest animalia viuentia secundum omnes species suas, iumenta, & reptilia, & bestias terræ &c. Hinc oritur difficultas. An Animæ huiusmodi animalium à primordio productorum, productæ sint ex nihilo, an ex aliquo. Non videtur posse dici primum, quia si sic pertinerent ad opus creationis, & non ad opus ornatus. Tum quia non videretur conuenienter dictum, quod aqua, & terra producerent ea. Nec videtur posse dici secundum; quia si sic; huiusmodi animæ poterant educi de potentia materiæ, & cum iam præcessissent corpora cœlestia agentia, & fountia, sequeretur, quod productio huiusmodi animarum non esset proprium Dei, quod apparet inconueniens; cum primaria omnium rerum productio soli Deo pertinere videatur, quæ difficultas in 2. conc. infra ponenda resoluetur.



I. Concl. Conuenienter descripta sunt opera quintæ, & sextæ diei. Prob. Quæ fiunt, vel disponuntur à sapientia infinita Dei, conuenientissimè fiunt, & sapientissimè disponuntur; sed opera quintæ, & sextæ diei sunt facta, & disposita à sapientia Diuina, vt apertè textatur Sacer textus; ergo &c.

II. Concl. Animæ Brutorum animalium non sunt productæ omninò de nihilo; nec sunt de ratione seminali, quæ nondum erat in elementis; sed de ratione primordiali, & obedienciali inditis à Deo elementis mundi. Ita Nicol. de Nyse cum D. Aug. quàmuis alij aliter sentiant. Prob. & explicatur conc. Alia namque est ratio seminalis, alia est causalis, alia primordialis, alia obediencialis. Ratio seminalis dicitur qualitas actiua existens in semine; ratio causalis dicitur virtus actiua agentis; ratio primordialis dicitur potentia à primordio indita elementis mundi, ad hoc vt ex ipsis fierent corpora mixta: ratio denique obediencialis dicitur potentia cuiuscunque creaturæ ad sustinendum influxum diuinæ voluntatis, & potentiæ; ergo si in elementis non fuit ratio seminalis, sed primordialis; consequens est, quod nec productæ sint Animæ omninò de nihilo, nec ratione seminali, sed primordiali, & obedienciali, ac proinde sunt à Deo, & ab elementis quadam ratione peculiari.

Arg. cont. I. concl. pisces, & aues componuntur ex quatuor elementis, & in eis maximè dominatur terra, corpora namque illorum naturaliter mouentur ad terram, ergo non conuenienter dicuntur producti fuisse ex aquis.

Resp. conc. ant. & neg. conf. Pisces siquidem, & aues cum dicuntur fieri ex aquis, intelliguntur fieri ex quatuor elementis, quia sumitur ibi aqua generaliter pro natura elementari.

Arg. 2. Sicut pisces mouentur in aquis, sic aues in aere, ergo sicut pisces sunt ex aquis, ita aues ex aere; ergo non conuenienter dicuntur producti ex aqua.

Resp. vt supra. Nam aqua sumitur pro natura elementari, ex qua pariter constant Aues, sicut pisces.

Arg. 3. In Genesi cap. 2. sic habetur; *Formati igitur de humo cunctis animantibus terræ, & uniuersis volatilibus Cælis*; ergo de terra producta sunt animantia terræ; & volatilia, & non

de aquis. Resp. quod nomine humi hic comprehenditur etiam aqua tanquam elementum crassum, quod cum terra vnum constituit globum, prout sumitur in principio capituli.

Arg. 4. Multa sunt animalia venenosa, & nociua homini, sed nihil homini noxium produci debuit ante peccatum ipsius hominis; ergo non conuenienter producta sunt huiusmodi animalia sexta die ante productionem hominis.

Resp. dist. mai. Post peccatum sunt multa animalia homini venenosa, & nociua conc. ante peccatum neg. mai. Nam citra peccatum bestiae sua feritate, & veneno non nocuissent hominibus: Immo ipsa quoque venenata in se bona, & pulchra sunt, & ad medicinas, aliosque vsus humanos; sic enim ex vipera fit theriaca &c. vt sapienter discurret D. Aug. lib. de Gen. contra Manichæos cap. 16. Quare etsi etiam inter ipsas feras, & bestias sit naturalis antipathia, v.g. inter ouem, & lupum; ex hominis tamen inobedientia factum est, quod vna bestia alteri sit in cibum; ac proinde ad naturalem institutionem pertinere, vt omnes bestiae vescantur herbis, vt indicatur Gen. 1. ita Herinex, & Pererius cum communi; etsi Cornelius à lapide cum nonnullis oppositum teneat; nempe ex naturali antipathia, lupum v.g. mortem fuisse illaturum oui, cum per peccatum hominis nihil circa naturam animalium sit immutatum.

Quæres 1. Quid intelligatur per cete grandia.

Resp. quod hebraica vox significat, dracones marinos; idest belluas marinas. Nam Draconum nomine vt notat Herinex, etiam grandes pisces appellari, patet ex Psal. 73. & 148. & Ezechiel. 32. Expressit autem Interpres Cete grandia, quia in ijs maximè cernatur prodigiosa magnitudo: Sunt enim adeò magni, vt dum fluctibus supernatant, quasi insule, aut montes appareant iuxta D. Basil. & Ambros. Et Plinius lib. 9. cap. 3. relatus ab Herinex scribit in Mari Athlantico, seu Indico esse balenas quaternorum iugerum, idest. 960. pedum, & anguillas in Gange Flumine indico trecentorum pedum.

Quæres 2. An animalia imperfecta sint creata sexta die.

Resp. cum Herinex; quod animalium imperfectorum, quædam nascuntur ex commixtione seminum diuersæ speciei;

cici; v. g. mulus, leopardus, & similia, quæ quotidie oriri possunt noua ex noua aliarum, & aliarum specierum commixtione; vnde in Aphrica quotidie noua nasci monstrantur iuxta illud vulgatum. *Semper aliquid noui affert Africas*; & hæc animalia non debuerunt sexta die produci, sed sufficienter creata censentur potentialiter. Accedit commixtionem hanc esse adulterinam, & præter naturam, ideòque vetitam Iudeis leuit. cap. 19. Quædam autem nascuntur ex putrefactione. De quibus plures censent non esse primitus producta, nisi potentialiter; quod saltem de vermibus hominem infestantibus, & similibus, quæ de corporibus animalium præsertim mortuorum gignuntur omnino dicendum est; *absurdum enim apparet* ait D. Aug. lib. 3. de Gen. ad litt. cap. 14. *ista esse animalibus concreta.*

Quæres 3. An reuera Deus post Vniuersi productionem cessauerit ab omni opere, vt significare videtur Moyses cap. 2. his verbis. *Compleuitque Deus opus suum, quod fecerat, & requieuit die septimo ab vniuerso opere, quod patrarat.*

Resp. D. Bonau. quod duplex est vniuersi perfectio: vna secundum esse permanens, alia secundum esse decurrens. Prima attenditur in completa existentia principiorum, & completo numero specierum, quæ quidem species naturam generis participant secundum rectam, ac ordinatam intentionem naturæ. Secunda verò perfectio consistit in productione eorum, quæ per tempora decurrunt, & sibi ipsis consequenter succedunt, ex cuius successionis ordinatione resultat quædam vnitatis pulchritudo, & perfectio. Quoniam igitur secundum primam perfectionem Deus vniuersum in sex diebus adesse produxit, scilicet quantum ad completam existentiam principiorum, & quantum ad completum numerum specierum, ideò dicitur requieuisse ab omni opere, quod patrarat. Quia verò continuè operatur ad rerum successionem per propagationem, indiuiduorum multiplicationem: ideò dicitur operari vsque modo. Et D. Thomas respondendo quæstioni, an consumatio operum Dei facta fuerit septimo die ait. Quod completio naturæ est duplex. Vna per integritatem partium Vniuersi; & hæc pertinet ad sextam diem. Alia per operationem ipsarum partium vniuersi, & hæc pertinet ad septimam diem &c.

# TRACTATVS TERTIVS

319

D E

## ACTIBVS HVMANIS.

DISPVATIO I.

*De principijs elicitiuis actus humani :*

QVÆSTIO I.

*Vtrum intellectus sit principium elicitiuum actus humani, adeout voluntas sine illustratione intellectus nequeat elicere actum volitionis.*

**N**OT. 1. Quòd alia sunt principia allcitiua, & alia elicitiua : prima sunt, quæ alliciunt voluntatem ad volendum, & sunt tria, nempe bonum finis, & beatitudo, de quibus alibi aliqua tacta sunt : posteriora sunt, quæ concurrunt, vt actus humanus eliciatur ab homine. Istorum autem principiorum alia dicuntur indirectè elicitiua, quatenus non influunt physicè causando actum humanum, & alia sunt elicitiua directè formaliter, & causaliter ; & sic sola voluntas dicitur causare actus humanos. Insuper inter principia indirecta, alia sunt intrinseca, vt intellectus, qui proponit obiectum voluntati, vt circa illud operetur, & appetitus sensitivus, qui aliqualiter mouet, & compellit voluntatem, vt bonum sensibile prosequatur. Alia sunt extrinseca, quæ licet sint extra agens, tamen concurrunt aliquo modo ad actiones illius, sic sunt Deus, Angeli, Cœli, & astra, de quibus infra.

NOT. 2. Quòd actus humanus non sumitur hic pro qualibet hominis actione ipsi, & brutis communi qualis est deambulatio, visio, nutritio &c. neque pro qualibet actione soli homini competenti, qualis est discursus in somnijs, vel per inaduertentiam, vel ex surreptione, sed sumitur

pro

pro sola actione libera, ac deliberatè elicità, vel imperatà à voluntate, quæ sic communiter describitur: Actus humanus est actus voluntatis, seu omisio eius deliberatè procedentis cum cognitione finis. Qui quidem actus dicitur esse moralis sumpta denominatione à moribus. Quare actus humanus, seu moralis diuiditur in bonum, & malum; tunc est bonus, quando est conformis dictamini recto, ac legibus diuinis, tunc verò malus, quando discordat à ratione, & à diuinis legibus, loquendo in sensu theologico, vt ad præsens spectat, nam de bonitate morali simpliciter agunt Philosophi in libris Ethicorum.

Concl. Intellectus est principium indirectum, & intrinsecum, sine cuius illustratione, & motione voluntas nequit suos actus elicere. Hæc est communis. Prob. ex axiomatibus ab omnibus receptis. Ignoti nulla cupido. Nil amatum, nisi præcognitum. Voluntas non fertur in incognitum. Vnde D. Aug. ait: *Inui, a ama o possumus, incognita nequaquam*, & D. Bonau. 2. d. 25. q. 6. *Nequaquam enim possumus ama o nisi cognoscamus*; ex qua sententia liquido patet, quod falsò D. Bonau. tribuitur, docuisse in Theologia mystica, amorem perfectissimum, quem vocant extaticum, posse elici sine obiecti cognitione; sed de hoc aliquid infra dicetur. Prob. 2. Voluntas non potest agere, nisi obiectum sit illi præsens in ratione obiecti, sed nequit obiectum in ratione obiecti, idest boni, esse præsens, nisi ab intellectu cognoscatur sub tali ratione: ergo &c.

Prob. 3. Voluntas suo obiecto nullum esse tribuit, sed sola propensione in illud rēdit; ergo obiectū semper præsupponitur in intellectu secundū esse obiectiuum, seu cognitum.

Arg. contra conclusionem. Si obiecti cognitio exigetur maximè ad illuminationem voluntatis, quæ tendere nequit in obiectum incognitum, sed voluntas non potest illuminari, quia de sui natura est potentia cæca, ergo obiecti cognitio non exigitur. Resp. conc. mai. & dist. min. voluntas non potest illuminari per se, quasi percipere valeat obiectum instar intellectus, conc. non potest illuminari identicè, hoc est quatenus voluntas identificatur cum intellectu cognoscente, nego minorem; intellectus namque cognoscendo obiectum, illud proponit voluntati, & in hoc sensu illuminat voluntatem, quæ

nequit acceptare, vel respuere obiectum, nisi prænoscatur.

Cont. arg. Si obiecti cognitio est necessaria ad inchoationem volitionis non est tamen necessaria ad eiusdem continuationem; ergo voluntas potest aliquo modo tendere in obiectum absque præuia actuali cognitione: patet ant. ex doctrina, quam tradunt Theologi mysti de contemplatiuis, qui, dum extatico amore inflammantur, non aduertunt suum intellectum aliquid de Deo cogitare. At hæc instantia tangit specialem difficultatem, quæ exigit responsionem sapientialem, & prolixam, ideoque opus est quæst. sequentem instituere.

## QVÆSTIO II.

*Vtrum Anima possit Deum actualiter diligere sine aliqua præuia cognitione intellectus, vel sensus.*

**N**ot. 1. Quòd huic quæstioni occasionem dedit D. Dionys. qui in sua theologia mystica cap. 1. iubet in sapientia mystica derelinquere omnes sensus, & omnes intellectuales operationes, & ignotè consurgere ad amandum Deum; non tamen excludit in homine fidei cognitionem, immò eam supponit, accedentem enim ad Deum oportet credere, eandem doctrinam Dionysij refert, & approbare videtur D. Bonau. cap. 7. Itinerarij mentis in Deum.

Not. 2. Quòd in Anima nostra duplex est modus apprehendendi Deum, secundum duplicem potentiam. Primus est per potentiam intelligendi. Secundus est per potentiam amandi; vnde per intellectum apprehendimus veritatem, & per voluntatem attingimus Dei bonitatem, & secundum hoc duplex est via excellentiæ, vna in intellectu, quæ dicitur contemplatio; alia in affectu, quæ dicitur ardor amoris, & prima significatur per Rachelem pulchram, & secunda per Mariam Magdalenam ardentem secundum expositionem nostri cruditi, & deuotissimi Patris Antonij de Monelia in commentarijs super theologiam mysticam D. Dionys.

Not. 3. Quòd duobus modis formari potest contemplatio



tio, vno modo ascendendo ab inferiorioribus ad superiora, alio modo descendendo à superioribus ad inferiora. Similiter duplex est modus attingendi ad amorem Dei ardentem. Alter scholasticus, qui est per modum inquisitionis, & eleuationis, ascendendo ab inferioribus vsque ad summum principium. Alter mysticus, & secretus, idest, quando Anima omnia sensibilia, & intelligibilia derelinquens à summo incipiens, vnitur ipsi Deo per flammigerum, & ardentissimum amorem. Ita extaticus Monelia loco citato.

Not. 4. Quod in theologia mystica aliter se habent proficientes, aliter perfecti; Nam perfecti omni cogitatione dimissa ad vnionem Dei dilecti per ardentissimum amorem consurgunt iuxta id, quod docet D. Dionys. Proficientes autem postquam sunt à vitijs per humilitatem, & contritionem purgati, & per studium orationis illuminati, præuia mediatione, vel cogitatione paulatim in Dei amore igniuntur: his prænotatis sit.

Concl. In mystica Theologia, quæ à D. Dionys. & à Monelia appellatur sapientia Christianorum, amor cognitio nem præcedit. Hæc est Antonij de Monella in Commentarijs Theologiæ mysticæ D. Dionis. & probat primò sic. Anima in Ecclesia militanti recipiens suas perfectiones à Deo, imitatur Ecclesiam triumphantem, sed ordo seraphim, qui interpretatur ardentes, vel amantes prius recipiunt, & abundantius suam perfectionem à Deo, quàm Cherubim, qui dicuntur plenitudo scientiæ; ergo Anima in mystica Theologia potest prius recipere perfectionem suæ voluntatis scilicet amorem, quam perfectionem sui intellectus scilicet notitiam, ergo potest esse amor sine cognitione. Prob. 2. Anima rationalis potest prius recipere à Deo influentiam in illa potentia, quæ est Deo propinquior, quam in illa quæ est Deo remotior, sed voluntas per amorem disposita est Deo propinquior, quam intellectus, ergo prius potest in sua potentia volitiua Dei amorem recipere, quàm in suo intellectum Dei cognitionem, ergo potest esse amor sine cognitione.

Prob. 3. auct. D. Dion. qui in 7. de Diuin. nōmīn. vocat istam sapientiam irrationalem, amentem, & stultam; ergo ista sapientia non dirrigitur præuia ratione, vel mente,

re, vel cogitatione; ergo ipsa prius est in voluntate per amorem, quam in intellectu per cognitionem, ergo &c.

Confirm. Nam Psalmista dicit *Gustate & videte quam suavis est Dominus* ergo prius est gustus voluntatis, quam visio intellectus, ac proinde prius amor, quam cognitio. Vnde secundum D. Bonau. hæc est regula generalis in mystica Theologia, quod primò oportet habere practicam, quam Theoricam, idest vsum exercitij in corde, quam ipsius rei, vel eorum, quæ dicuntur habere notitiam, ergo prius potest esse amoris gustus, quam visionis, vel cognitionis intuitus. Exemplum videmus, inquit Monelia, quod in Pontis fabricatione à principio supponuntur ligna ad ipsum sustentandum, quia adhuc debilis est, sed, solidata muri structura, ligna cuncta submouentur, & abijciuntur, ita in proposito &c.

Arg. cont. conc. Ecclesia militans imitatur triumphantem, ergo Anima volens ad diuinum amorem per contemplationem consurgere debet imitari supremam Hierarchiam Angelorum contemplantium, & amantium; sed in illa primò sunt troni, secundò Cherubim, tertio Seraphim, ergo Anima, quæ vult ascendere, primò debet esse quiescens sicut tronus, secundò illuminata sicut Cherubim, tertio inflammata sicut Seraphim, ergo ante amorem præcedit cognitio, & illuminatio. Resp. conc. mai. cum seq. & dist. min. Via scholastica, & ascensionis concedo: Via mystica, & descensionis, nego min.

Arg. 2. Anima per amorem consurgere volens imitari debet mentes beatas; sed mentes beatæ prius vident diuinam bonitatem, quam ament, ergo Anima prius debet intelligere &c. Resp. neg. paritatem, & ratio est, quia ideo in beatis intellectio, & cognitio præcedit amorem, eo quod in eorum intellectu non cadit aliquod impedimentum, cum videant Deum sicuti est. At intellectus viatoris etiam si desuper illuminetur, tamen Deum modo finito, & limitato apprehendit; ac proinde omnis nostra cognitio est obscura, & impura; vnde D. Dionys. iubet in mystica consurrectione ad Deum omnem cognitionem excludi, quia etsi Deus sit totus desiderabilis, non tamen est totus comprehensibilis, vt ostensum est in quæstione de incomprehensibilitate Dei in disp. de visione beatifica part. 1.

Arg.

Arg. 3. Sensus noster prius apprehendit aliquid antequàm appetat illud ergo vis rationalis nostra prius aliquid apprehendit, antequàm voluntas amet, ergo prius est cognitio, quam amor. Confirmatur auct. D. Aug. *Inuisa diligere possumus, incognita nequaquam*: & etiam auctoritate S. Scrip. nam psalmista dicit. *In meditatione non exardescet ignis*, ergo antequàm Anima in dilecti amore inardescat, debet de dilecto præmeditari, & cogitare, ergo &c.

Resp. veram esse mai. de sensu, non vero de vi rationali, quæ duplici modo Deum per amorem attingere potest, nempe secundum modum communem, & scholasticum, & secundum modum singularem, & mysticum. Ad auct. D. Aug. dicitur, quod mystica Theologia præsupponit cognitionem fidei, & ipsius Dei, licet in actu consurrectionis non consideret. Ad illud Psalmi, dicitur intelligi de proficientibus, qui prius opus habent de Deo meditari, antequàm amore inardescant; non autem de perfectis in Dei amore ardentissimè habituaris.

Cæterùm si maturè ponderemus rationes allatas pro, & contra colligere possumus modum componendi præsentem controuersiam inter Theologos speculatiuos, & mysticos. Etenim meo videri asserunt mystici, quod dum Anima extatica vnitur obiecto diuino per ardentissimum amorem; intellectus actualiter non reflectit super talem contemplationem, quia quodammodo absorbetur ab actu perfectiori, nempe ab amore, non tamen excludunt cognitionem, immò, exigunt cognitionem Dei per fidem; Itaque dicerem virtualiter præcedere semper, imò & actualiter cognitionem, quàmuis Anima extatica non reflectat tunc super suam contemplationem: eò quia si in beatis prius est notitia seu visio beatifica, quàm amor beatificus, à fortiori in viatoribus præcedere debet cognitio præuia obiecti diuini amati, hoc tamen discrimine, quod in beatis voluntas fruendo Deo, non impedit intellectum, quin eliciat visionem sibi correspondentem; in viatoribus verò non sic, cum intellectus in intelligendo dependeat à phantasmatis, vel si independenter à sensibus illustreretur à diuino lumine, tamen impeditur aliquo modo eius perfecta actio intellectionis, reflexionis, ab amore, cuiusui Deo adhaeret, & in Deum spiritualiter transfor-

transformatur. Amor enim est vis transformatiua amanti in amatum, vt habet communis axioma Philosoph. Theologicum, idq; prouenit, ex eo quod in intelligendo dependemus à phantasmatibus, quæ percipi nequeunt nisi intellectus ad illas conuertatur. Secus autem de intellectu beato, qui cum non sit sensibus alligatus, independenter à phantasmatibus intelligit, & intuetur obiectum infinitum, & beatificum.

Quæres. An voluntas possit plus amare, quàm intellectus intelligat. Resp. quod, si ly plus importet extensionem obiectorum, voluntas planè nequit plura obiecta amare, quam intellectus intelligat, iuxta axioma commune; inuisa amare potest, incognita nequaquam, at si ly plus importet intensiorem actus, indubiè potest voluntas circa obiectum remissè cognitum tendere actu intensiori.

### QVÆSTIO III.

*Vtrum intellectus moueat voluntatem per aliquod imperium, vel per simplicem cognitionem, vel per iudicium.*

**N**OT. I. Quòd in quacumque potentia, quæ potest habere actiones voluntatis, requiritur duplex motio, seu determinatio ad agendum. Prima fit ab obiecto conuenienter proposito; secunda fit in nobis à voluntate, & in brutis ab appetitu, inter istas autem motiones hæc intercedit differentia, quod motio obiecti dicitur quoad specificationem; actus enim ab obiecto sumit speciem, & determinationem, posterior verò motio dicitur quoad exercitium, seu quoad efficientiam, nam exercitium operis semper prouenit, vel quia facultas vult se applicare ad illud, vel quia causa superior applicat illam, & per concursum vtriusque aliquid efficiunt. Ex quo patet, quod intellectus mouet, & determinat voluntatem quoad speciem, quia proponit obiectum, at voluntas mouet, & determinat se quoad exercitium in generæ causæ efficientis, mouet autem intellectum, & potentias inferiores per applicationem, quia ita sunt institutæ à natura, vt obediunt voluntati.

Not. 2. quod Thomistæ præter simplicem apprehensionem, iudicium, & discursum addunt quartum, quem vocant actum imperij distinctum à cognitione, & iudicio, & explicant his verbis, fac hoc, vel non facias hoc; ac proinde dicunt, voluntatem per hunc actum determinari quoad exercitium. Verùm iste quartus actus sine fundamento videtur poni; cum actus intellectus adequati diuidantur in tres actus, vt docent Philosophi. Alij verò opinantur, quod, licet non detur in intellectu imperium distinctum à cognitione, admittendum tamen est quoad practicum iudicium, à quo hic, & nunc voluntas determinetur quoad exercitium, adeòut ipsa non possit non operari, quia habet tale iudicium necessariam connexionem cum voluntate.

Not. 3, quod duplex iudicium communiter solet poni in intellectu, speculatiuum scilicet, & practicum. Primum consistit in sola contemplatione obiecti, v. g. dum intellectus iudicat, virtutem esse honestam, vitium verò turpe; & huic iudicio correspondet in voluntate amor simplicis complacentiæ, vel displicentiæ odium. Secundum consistit in directione voluntatis, & est duplex, nempe iudicium practicum simpliciter, & vniuersale, quod dicat simpliciter voluntati, bonum esse amandum, & malum fugiendum, & iudicium practice practicum, seu particulare, quo intellectus iudicat, & dicat voluntati, hic, & nunc, pensatis omnibus circumstantijs, tale bonum esse prosequendum, & istud adhuc diuiditur in absolutum, & conditionatum, vt si quis recuperare vult sanitatem, debet medicinam sumere &c.

I. Concl. Intellectus mouet voluntatem, tum quoad speciem, tum quoad exercitium, non physice, sed moraliter. Hæc est Scoti in secundo quoad omnes quatuor partes. Prob. prima, & tertia pars. Illa facultas aliam ad operandum mouet, & allicit ad agendum, quæ illi proponit obiectum, vel prosequendum, vel fugiendum, etsi ei non proponeretur non ageret, sed compertum est, id ab intellectu præstari voluntati, quia, vt supra ostensum fuit, voluntas non tendit in incognitum: ergo &c. Ex quo constat, intellectum mouere voluntatem quoad exercitium, seu quoad elicitionem actus, qui enim mouet ad obiectum.

obiectum possidendum, mouet pariter ad actionem, quæ tale obiectum obtineri potest; Hæc tamen motio non est physica, sed moralis, & dicitur etiam remota, cum non determinet proximè voluntatem ad agendum, sed ipsa voluntas se proximè mouet, ac proinde physice se determinat quoad exercitium. Prob. 2. pars, moueri quoad specificationem est moueri ad exercendum actum diuersæ speciei ab alio, sed intellectus mouet voluntatem ad diuersos actus specie distinctos, puta, amoris, vel odij, auaritiæ, vel liberalitatis ergo &c.

Prob. 4. pars. Intellectus nullo modo est causa efficiens, & physica actionum voluntatis, ergo non potest ipsam mouere physice influendo in voluntatem, vel in eius actionem. Prob. ant. Posito causæ partialis physice operantis influxu, ponitur & effectus, sed, posita intellectus motione, non ponitur necessariò operatio voluntatis, quia, positis quibuscumque ad agendum requisitis, voluntas adhuc remanet indifferens ad agendum, vel non agendum: ergo concludendum est quod intellectus non mouet voluntatem physice, sed solum moraliter, quatenus ei ostendit obiectum, & dicat, quid, & quomodo circa ipsum agendum, vel non agendum sit.

II. Concl. Voluntas moueri potest per quodlibet iudicium siue speculatiuum, siue practicum; vniuersale, & particulare: Est Scoti in 2. dist. 7. quest. 1. Prob. quoad 1. part. Si aliquod iudicium ad hanc motionem non esset sufficiens, maximè speculatiuum; sed hoc sufficit, ergo &c. mai. patet; nam per iudicium speculatiuum non minus voluntas mouetur, quàm per quodlibet aliud, min. prob. de qua est difficultas. Faciliùs voluntas mouebitur ad aliquem actum per solum iudicium speculatiuum, quàm moueatur per iudicium oppositum, quod à tali actu eam auerit eliciendo, sed voluntas moueri potest ad aliquem actum, etiam præmisso iudicio opposito, ergo voluntas moueri potest per iudicium speculatiuum: maior est clara, quia, etsi voluntas per iudicium speculatiuum non moueatur ad actum expressè, non tamen ab eodem eliciendo aueritur, & dissuadetur, at per iudicium oppositum ab eodem actu ponendo diuertitur. Prob. min. Experientia constat; quod propositis duobus obiectis bonis, quorum vnum hq-



neſtum eſt, parti autem inferiori non arridens; aliud turpe, ſed eidem parti conueniens, experientia, inquam, conſtat, ſæpius voluntatem eligere turpe, honeſto relicto, iuxta illud: Video meliora, proboque, deteriora ſequor. Hinc homines contra propriam conſcientiam plerumque peccant, dum aliud ſuadet rectum dictamen rationis, aliud libera voluntas eligit, & amplectitur.

Prob. 2. Appetitus ſenſitiuus ſufficienter mouetur per ſolius phantaſiæ apprehenſionem, quia phantaſia non eſt iudicatiua, ſed ſolum apprehenſiua, ergo à ſimili ſufficiens erit apprehenſio alicuius boni, aut mali, ad hoc vt intellectus moueat voluntatem.

III. Concl. Non datur imperium, ſeu iudicium practicum in intellectu, quo poſito determinetur voluntas quoad exercitium; hæc ſequitur ex dictis in 1. & 2. conc. contra Thomiſtas, eamque docet Scotus in 2. diſt. 25. q. 1. cui ſubſcribuntur quamplures Recentiores.

Prob. Hoc imperium, ſeu iudicium practicum, vel eſt naturale, vel liberum; ſi eſt liberum datur proceſſus in infinitum; ſi eſt naturale pugnat cum libertate, ergo non eſt admittendum. Prob. ant. quoad 1. part. Etenim, ſi eſt liberum, debet eſſe liberum imperatiue à voluntate; intellectus enim non dicitur liber niſi radicaliter, quatenus proponit obiecta indifferentia, ergo illa volitio, quæ determinat intellectum ad illud imperium, vel erit ex alio priori iudicio imperante, vel non; ergo datur proceſſus in infinitum inquirendo de illo priori iudicio, an ſit liberum.

Prob. quoad ſecundam partem. Potentia libera eſt, quæ poſitis &c. poteſt agere, & non agere, è contra naturalis poſitis requiſitis ad agendum, non poteſt non agere, ſed poſito illo imperio efficaciter impulſiuo, non poteſt voluntas non agere, tollitur enim indifferentia illius; ergo tale iudicium pugnat cum libertate, ergo non eſt admittendum.

Arg. cont. 1. Concl. Voluntas ex dictis eſt potentia cæca, ergo percipere nequit res ab intellectu propoſitas, & proinde intellectus non mouet voluntatem.

Reſp. diſting. conſ. Percipere nequit per intellectum, & operationem cognitiuam conc. conſ. per indentificationem cum potentia cognoſcente, & per ſubordinationem,

nem, quæ est inter appetitiuam, & cognoscitiuam, nego. Voluntas enim non recipit aliquid in se ex eo, quod intellectus ei proponit obiectum, sed illa operatur circa illud per tendentiam, & propensionem, vel per fugam.

Arg. prob. quod intellectus agat physicè in voluntatem. Potentia subordinans insuit physicè, & efficaciter in potentiam subordinatam, sed voluntas est subordinata intellectui: ergo &c. Resp. neg. suppositum in mai. Nam efficientia moralis sufficit ad saluandam subordinationem, vt patet de domino respectu sui serui.

Dices. Intellectus complet actiuitatem voluntatis, quæ est causa realis sui actus, ergo physicè concurrit. Resp. dist. ant. complet actiuitatem voluntatis, quatenus eius operatio, seu intellectio est conditio sine qua non agat voluntas, conc. ant. in ratione causæ physicæ, nego; Quia sic se habet tanquam causa moralis, ostendendo, dictando &c.

Arg. Voluntas non potest tendere in aliquod obiectum, nisi sub ratione conuenientis, neque illud respuere, nisi sub ratione disconuenientis; sed sic tendere est agere modo morali, & ex iudicio practico; ergo voluntas non per quodlibet iudicium moueri potest.

Resp. conc. mai. & disting. min. Agere modo morali est agere ex iudicio practico, vel formaliter, vel virtualiter, conc. min. formaliter semper neg. min. Siquidem clara, & euidens obiecti apprehensio, vt conuenientis, vel disconuenientis est iudicium virtualiter practicum, quia, æquè euidenter obiectum voluntati exhibet, ac exhiberet iudicium ipsum practicum formaliter, cum ab ea obiecti apprehensione iudicium accipiat omnem suam euidenciam, & claritatem.

Arg. 2. Arist. dicentis in 3. de Anima quod intellectus speculatiuus non mouet voluntatem: ergo &c.

Resp. dist. ant. non mouet æquè directè, & efficaciter, ac iudicium practicum, concedo: indirectè, hoc est quatenus non solum speculatur, sed etiam prout speculatur aliquod obiectum conueniens, & disconueniens neg. Aristot. intelligendus est in secundo sensu, non verò in primo.

Quæres 1. An Deus de potentia absoluta possit producere in voluntate actum, puta, amoris alicuius obiecti absque cognitione eiusdem obiecti.

Resp. posse Deum in sententia Scoti, vt dictum fuit in disp. de beat. p. I. producere actum in potentia vitali, ac proinde etiam in voluntate in genere entitativo, seu qualitatis. An verò possit voluntas circa obiectum operari absque præula, vel aliqua cognitione, respondent communiter Doct. negatiue. Ratio est. Quia sic posset aliquis sine vlla cognitione benè agere, & malè, mereri, & demeri. Tum quia nequit intelligi, quomodo voluntas tenderet in obiectum, si necessariò præexigit, quod ab intellectu obiectum ostendatur, sine qua ostensione est impossibile voluntatem circa illud operari. Quare si Deus faceret, quod voluntas ageret in obiectum, quod non cognosceret intellectus, illud non esset prorsus ignotum, in hoc enim casu Deus se solo produceret notitiam obiecti, non quidem vt actum vitalem, qui est à principio coniuncto, sed in genere tantum qualitatis.

Quæres 2. An voluntas prauè determinetur, vel peccet ratione alicuius præcedentis erroris in intellectu.

Resp. Quod licet voluntas possit velle, & nolle contra rationem, seu contra dictamen rationis ex vi suæ plenæ libertatis. Nihilominus nunquàm in peccatum labitur, quin in intellectu præcedat aliquis defectus, seu inconsideratio motiuorum, quæ si adessent, voluntas se abstineret ab operatione peccaminosa, & praua. Nam multoties voluntas peccat, reclamante conscientia, & sine falsa enuntiatione cognoscendo malitiam obiecti, ergo defectus est inconsiderantiæ. Siquidem si quis attentè consideraret tot, tamque vrgentes rationes, planè non peccaret, estò posset, non obstante tali consideratione, peccare; Quare meritò ait Arist. lib. 3. cap. 3. Eth. Omnis peccans est ignorans iuxta illud Prouerb. cap. 14. *Errant, qui operantur malum.*

#### QVÆSTIO IV.

*Vtrum appetitus sensitivus moueat immediatè voluntatem.*

**N**Ot. 1. Quodd appetitus sensitivus rationalis, de quo hic agitur est duplex, nempe concupiscibilis, & irasci-

scibilis, primus fertur in bonum delectabile, secundus in bonum arduum. Vterque habet duplicem actum, nimirum prosecutionis, quo prosequitur bonum sensibile; & fugæ, quo malum sensibile refugit. Appetitus concupiscibilis habet sex passiones, seu proprietates, & sunt amor, odium, desiderium, & fuga, gaudium, & tristitia. Appetitus verò irascibilis, quinque, & sunt spes, desperatio, audacia, timor, & ira. Qui quidem appetitus non sunt inter se contrarij, immò irascibilis datur in adiumentum concupiscibilis, ad hoc vt possit bonum arduum assequi, & malum generosè respuere.

Not.2. Quòd intelligi potest duobus modis, sensum mouere voluntatem, idest vel directè, vel indirectè; tunc dicitur aliquod mouere directè, quando immediatè, & absque vlllo medio mouet, tunc autem indirectè, quando non immediatè, sed mediatè, & per aliud mouet, quod etiam militat de obiecto in ordine ad intellectum, prius enim obiectum mouet potentiam internam, seu phantasiam, quàm intellectum &c.

Concl. Appetitus sensitivus mouet voluntatem indirectè. Est communis, est tamen contra doctissimum Frassen, qui in sua Philosophia opinatur, sensum mouere voluntatem, nedum indirectè, sed etiam directè, adeout voluntas ad phantasmatum præsentiam moueatur circa talia obiecta independentè à qualibet intellectus illustratione, & operatione. Prob. nostra conc. auct. Sac. Scrip. quoad 1. part. nimirum appetitum mouere voluntatem. Sapient. c. 3. *Corpus, quod corrumpitur, aggrauat Animam*. Daniel. 13. *Concupiscentia subuertit cor tuum*: D. Paul. ad Galatas; *Caro concupiscit aduersus spiritum, & spiritus aduersus carnem*, & denique Iacob. cap. 1. *Vnusquisque tentatur à concupiscentia sua abstractus, & illeſus &c* idem docent SS. Patres, & experientia quotidiana in nobis comprobatur. Vnde D. Paul. de hoc conquerens aiebat. *Non quod volo bonum, hoc ago, sed quod odi malum, hoc facio*. Quibus verbis apertè testatur, quod pars sensitiva Animæ multà bona impedit, quæ elidere vellet pars rationalis.

Prob. conc. quoad 2. part. Potentiæ inferiores diuersi ordinis nequeunt per se, & directè mouere superiores; sed sic se habet appetitus sensitivus respectu voluntatis; et eo

appetitus sensitivus non mouet per se, & directè voluntatem. Tum quia voluntas est potentia spiritualis, appetitus sensitivus potentia materialis, quæ essentialem habet ordinem ad potentias superiores, vt sensus externus ad intellectum qui non potest ab eo immediatè moueri.

Arg. Frassen. Nulla potentia potest mediare inter appetitum sensitivum, & voluntatem præter intellectum; sed appetitus sensitivus inducit frequenter voluntatem ad aliquem actum sine interuentu intellectus; ergo appetitus sensitivus per se, & directè mouet voluntatem. Min. prob. Nam voluntas elicit plures actus secundum inclinationem appetitus sensitivi absque vlla media illustratione intellectus, vt constat de primis motibus, iræ ergo &c. Resp. neg. min. Ad probat. neg. suppositum ant. quia licet in primis motibus non adsit iudicium perfectum rationis, est tamen in intellectu aliqualis cognitio, quæ non est sufficiens, vt actio sit propriè libera.

Cont. Primi motus procedunt ex simplici apprehensione, in qua non est iudicium; ergo &c. Resp. conc. ant. ex hoc tamen non sequitur, quòd non adsit aliqualis cognitio de illis in intellectu, ac proinde in voluntate aliqualis motio subitanea in obiectum subitò propositum.

Contra vrget Frassen. Voluntas sæpè sæpius se auertit à dictamine intellectus dictantis aliquod malum non esse faciendum, & tamen sequitur id, quod ei proponit concupiscentia; ergo pro tunc mouetur directè à concupiscentia.

Resp. conc. ant. & neg. conf. eò quòd, licet voluntas se auertat à dictamine recto, non tamen se auertit à communi dictamine intellectus ostendentis voluntati obiectum sub vtraque ratione idest boni, & mali, estò enim malum non habeat rationem boni honesti, habet tamen rationem boni delectabilis respectu concupiscentiæ.

## QVÆSTIO V.

*Vtrum voluntas moueatur ab aliqua causa extrinseca ad suos actus eliciendos.*

**N**Ot. Quòd quinque sunt causæ extrinsecæ, à quibus nostra voluntas potest moueri ad agendum, nempe  
Deus,

Deus, Angeli, astra, obiectum, & finis: de Deo, & Angelis, nec non de obiecto alibi ostensum est quid sentiendum sit. Verum quia Deus consideratur à Metaphisico ut est omnium entium primum, & præstantissimum; & à Phisico, ut est primus motor, & auctor; & denique à Theologis speculatiuis ut auctor gratiæ, & gloriæ, à Theologis verò moralibus consideratur Deus quatenus est principium externum actionum humanarum. Quare Deus dici potest causa actionum humanarum dupliciter; primò in genere causæ finalis, quatenus scilicet est earundem actionum finis vltimus voluntatem alliciens ad sui consecutionem per amorem, & fruitionem; 2. in genere causæ efficientis, vel concurrendo physice ad omnes voluntates sicut ad actiones etiam agentium naturalium, ut in physica dictum fuit agendo de prima causa: vel concurrendo tantum moraliter, hoc est alliciendo voluntatem ad operandum suasionibus, inspirationibus, & de hoc concursu agitur hic.

I. Concl. Deus mouet voluntatem moraliter ad actus supernaturales, & meritorios, hæc est omnium Catholicorum. Prob. 1. auct. S. Scrip. D. Paulus ad Philipenses 2. *Deus est, qui operatur in nobis velle, & perficere.* Ioan. c. 6. *Nemo potest venire ad me, nisi Pater traxerit eum.* Et Ioan. c. 14. *Sine me nihil potestis facere.* Prob. ratione, & breuiter, quia de hoc latè agetur in tract. de gratia. Inter potentiam, & actum requiritur proportio; sed non est proportio inter vires naturales potentiæ volitiuæ, & actus supernaturales; ergo ut voluntas sit capax eliciendi tales actus debet necessariò eleuari per auxilium aliquod supernaturale, quo mouetur, excitatur ad operandum supernaturaliter, & meritoriè eleuatur. Constat enim, quod Deus præuenit voluntatem per bonas inspirationes, concurrat cum illa, ad actiones meritorias per habitus infusos, & per auxilia specialia, & denique causat in corpore, & in phantasia tales dispositiones, ut voluntas suauiter moueatur. Cæterum obseruandum, quod in hac probatione includitur etiam concursus Dei, ut Auctor gratiæ, & gloriæ, non solum moralis, ut indicatur per inspirationes &c. sed etiam effectiuus. Si quidem per specialia auxilia, & per habitus infusos concurrat effectiuè Deus cum voluntate ad actus supernaturales eliciendos,

II. Concl.



II. Concl. Angeli nequeunt directè mouere voluntatem, sed solum indirectè, vt in tract. de Angelis ostendimus. Quare breuiter sic probatur. Si Angeli mouerent voluntates nostras directè, vel illas mouerent contra naturam, vel secundum naturam. Non primo modo, quia tunc cogeretur voluntas, quæ, vt infra dicetur, nec à Deo cogi potest. Neque secundo modo, quia motus naturalis alicuius rei est tantum à suis naturalibus principijs, aut à generante, hoc est ab Auctore eius, qui naturam dedit, vnde dicit Arist. 8. Phis. c. 4. Grauius à generante mouentur. Tum quia si effectiuè, & directè Angeli mouerent voluntatē essent velut causæ partiales volitionis humanæ, hoc autem est manifestè falsum, quia sola causa prima cum secunda concurrat, ergo &c.

III. Concl. Corpora cœlestia solum indirectè mouere possunt nostras voluntates, nullo autem modo necessitare. Hæc est omnium Theologorum contra hæreticos Priscillianistas, & contra Stoicos Philosophos, putantes, voluntatem humanam fatali quadam necessitate subijci impressionibus, & influentijs Syderum. Prob. Concl. quoad 1. p. Nullum corporeum directè potest physicè influere in spirituale, sed syderum influxus sunt corporei, & voluntas humana est spiritualis, ego &c. Tum quia vt dictum est de Angelis, actus, qui alicui rei est naturalis, non potest esse à principio extrinseco. Prob. quoad 2. p. Si voluntas non mouetur, neque moueri potest directè à corporibus cœlestibus, multò minùs poterit moueri ab illis certò, & infallibiliter; alioquin, si certò moueretur ab influxu Cœlorum, esset necessaria connexio inter impressionem corporum cœlestium, & nostras voluntates, quod damnant S. Scrip. & determinationes Concil. & SS. PP. & leges Ecclesiast. & Ciuiles, vt infra videbimus aliqua tangendo de Astrologia iudiciaria. Tum quia necessitare, non possunt nisi commouendo temperamentum, sed talis temperamenti commotio, & alteratio allicere quidem potest, non verò voluntatem necessariò ad actum impellere, ergo &c. Itaque remanet semper salua libertas voluntatis, quæ sicut potest resistere appetitui sensitiuo, veluti causæ proximiori, à fortiori resistere poterit Astrorū influentijs, quæ sunt remotiores iuxta dictum Ptolomei Astronomiæ Principis.

*Sapiens dominabitur Astris.*

Arg.

Arg. 1. cont. 1. conc. Si Deus moueret voluntatem per inspirationem, & auxilia supernaturalia, læderetur libertas voluntatis; sed hoc non est admittendum; ergo &c.

Resp. neg. seq. mai. Nam voluntas potest pro libito suo acceptare, vel respuere huiusmodi auxilia iuxta doct. Conc. Trid. sess. 6. can. 4.

Arg. 2. Concil. Arausicanum 11. anathematizat eos, qui docent Deum expectare voluntates nostras; sed hoc verificaretur, si Deus efficacissima quadam præmotione illam non præueniret, ergo &c. Resp. Deum nos sua gratia excitante præuenire, ac proinde non expectare nostras voluntates, non verò præmouere.

Arg. cont. 3. conc. prob. quod corpora cælestia directè agant in hominis voluntatem sic. Cæli agunt physicè, & directè in Dæmones, qui sunt substantia spiritualis nobilior anima rationali; ergo possunt agere directè, etiam in Anima. Ant. prob. experientijs. Prima est, quod Dæmones secundum lunæ incrementum inuadunt quosdam homines; qui ob id lunatici dicuntur. Secunda Dæmones à maleficis euocati certò syderum aspectu promptius accurrunt. Tertia denique est qua patet Dæmones allici, & arceri quibusdam plantis, vel figuris, sub recto quodam sydere fabricatis: ergo &c.

Resp. neg. ant. & pariter probationes allatas ex experientijs, cum nullo modo probent in Dæmones directè, & physicè agere. Vnde ad 1. resp. quod duæ sunt causæ cur Dæmones secundum stellarum aspectum solent homines vexare, prima quidem, vt opera Dei, & creaturas, tamquam maleficij participes dedecore afficiant. Secunda, quia in corporibus hominum nil producere possunt, nisi applicando actiua passiuis, quare obseruant tempus, in quo actiua, & passiuia sunt magis disposita ad producendos eos effectus, quos intendunt, cumque actiua, & passiuia mutantur pro diuersis aspectibus syderum, inde fit, quod Dæmones sub quibusdam aspectibus astrorum magis homines diuexent. Vnde fit, quod crescente luna magis afficiantur lunatici. Ad 2. resp. quod Dæmones promptiores accurrunt sub certis constellationibus, quia sciunt, tunc materiam esse magis dispositam ad illos effectus producendos. Vel quia huiusmodi artificio conantur homines

nes decipere, ipsis suadendo aliquod numen stellis in esse. Ad 3. resp. Dæmones non allici, neque arceri herbis, lapidibus, vel alijs sublunarijs, quasi physicè in Dæmones agant, sed quia sunt signa, ad quorum præsentiam accurrere debent ex pacto inito cum maleficis.

## QVÆSTIO VII.

*Vtrum licitum sit Astronomis ex astrorum aspectibus futura prænuntiare.*

**N**Ot. quod Astrologi solent diuidere præcognitionem futurorum, in physicam, & artificiosam; physicam vocant, quæ à natura, seu à rerum naturalium consideratione deriuatur: Artificiosam verò, quæ non ex præfagijs naturæ, sed ex altioris alicuius substantiæ spiritualis irradiatione descendit. Insuper artificiosam diuidunt iuxta duplicem rationem naturæ spiritualis, nempe in Diuinam, & Demoniacam; priorem appellant Prophetiam, & posteriorem diuinationem, aut oraculum. Præterea diuidunt physicam in eam, quæ pendet à natura cœlesti, & vocatur Astrologia, seu Astronomia; & in eam, quæ ab inferioribus corporibus emanat, & hanc pro varia inferiorum corporum appellatione, varijs quoque nominibus appellari solet, vt Pyromantia ab igne, Negromantia ab aere, Hydromantia ab aqua, Geomantia à terra, Physionomia à toto corpore humano, Metoposcopia à fronte, Chyromanria à manu, Augurium à cantu, & garritu Auium, Auspicium à motu, & volatu. Quamvis autem vanitas, & superstitio sit in his omnibus; ac proinde in Astrologia iudiciaria, contra quam ex veteribus signanter D. Aug. inuehitur lib. 2. super Genes. cap. 17. & 5. & de qua infra ponetur conclusio specialis, ostendunt S. Scrip. & leges Ecclesiasticæ.

I. Concl. Peritus Astrologus, seu Astromantius multoties potest benè pronosticare de inclinationibus hominis natiuis, seu naturalibus in generali, nempe, quod sit lasciuus, iracundus, liberalis &c. Tale autem iudicium de humanis actionibus est in rigore incertissimum. Prima pars est communis, & probatur ex supradictis; eò quia

Sydera habent influxum, & vim alterandi sensus appetitum, organa corporea, sed intellectus in intelligendo dependet à sensibus, quibus corruptis, seu alteratis, alteratur, & deprauatur intellectus, vt patet in freneticis, & lunaticis, & similiter voluntas est prona ad sequendam inclinationem appetitus alterati: ergo si Astrologus rectè callet constellationem hominis, potest rectè illam in vniuersali prædicere. Prob. 2. pars. Quamuis sæpè contingat voluntatem sequi inclinationes appetitus alterati à Cœlo, tamen pro sua libertate potest resistere iuxta illud *Gen. cap. 3 Sub te erit appetitus tuus, & tu dominaberis illius.*

Cæterum adhuc prædictæ prædictiones vniuersales de moribus hominum sunt vanæ, & nullius firmitatis, quia complexio, & inclinatio appetitus non solum pendent à Syderibus tanquam a causa inadæquata, & remota, sed etiam à genitoribus, & à temperie loci, nedum Regni, & Oppidi. sed etiam loci proximi, vbi homo nascitur, quæ, cum sint causæ, & circumstantiæ proximiores, modificant influxum astrorum ad imprimendas singulates qualitates in corpore humano. Præterea Demus Sydera esse causas adæquatas, peto; an à Deo sit reuelata Astrologis virtus, & influentia cuiusque Astri, & quando, se impediunt in suis influxibus? Dicunt sibi constare experimento.

Contra vel per ascensum in Cœlum, & hoc non; vel per effectus; sed neque hoc, quia quotidie experimur duos homines cum diuersis moribus nasci, sub eodem Climate, & loco, hora, & puncto, imò, & ab eodem Patre, & Matre eodem concubitu, vt testatur Srip. de illis gemellis Fratribus scilicet Esau, & Iacob: & hæc est vera causa propter quam falluntur quotidie prognostici de ventis, pluuijs, in quantitate, in quando, & qualitate &c. Deinde demus, Astrologos perfectè callere Syderum proprietates, figuras, aspectus, & positiones, quare solum obseruant natiuitatis horam, non verò tempus, quo formatur Corpus, & punctum, quo animatur? Quæ omnia, etiam si attendantur diligenter, nequeunt penetrari.

II. Concl. Vanissima, & stultissima est diuinitio futurorum euentuum liberorum ex astris, siue vt nudis signis, siue etiam vt causis, ac proinde Astrologia iudiciaria est meritò damnata, Prob. 1. ex S. Scrip. Ierem. cap. 10. *non*

*in vias gentium nolite discere, & à signis Cœli nolite metnere quæ  
timent gentes.* Et Isai. cap. 44. similia habentur, & D. Paul.  
ad Gallatas cap. 4. scribebat. *Dies observatis, & menses, &  
tempora, & annos, timeo, ne foris sine causa laboraverim in vobis.*  
Eandem Doctrinam damnant, & reprehendunt SS. PP. &  
signanter D. Aug. lib. 2. super Gen. c. 12.

Prob. 2. Hoc genus Astrologiæ tanquam impium dam-  
natur in iure canonico, in Concilijs, & noulisimè in motu  
proprio Xisti V. incip. *Cœli, & Terra*, & in iure Ciuili Co-  
dice de maleficijs, & Mathematicis, & olim a Senatu Ro-  
mano damnatum fuit, quàmuis, tunc esset gentilis; & ita  
fenserunt etiam Cicero lib. 2. de diuinatione, & Gellius  
lib. 4. Noctium atticarum cap. 1. Quare mortaliter pec-  
cant 1. qui profitentur Astrologiam iudiciariam, seu ar-  
tem diuinatorem effectuum liberi arbitrij in particulari,  
siue præteritorum, vt de furtis, & similibus, siue futuro-  
rum. Secundò qui legunt, seu audiunt alios legentes li-  
bros de hac materia tractantes.

Tertio peccant qui Astrologos consulunt, aut Magos  
de actionibus humanis in particulari, ratio est, quia hæc  
omnia sunt contra S. Scrip. SS. PP. & motum proprium  
Pontificis, qui tantum approbat vsum Astrologiæ circa  
etia, nempe circa Agriculturam, Nauigationem, & Medi-  
cinam in vniuersali; in particulari enlm sunt periculosa  
etiam similia iudicia contra motum proprium, vt com-  
muniter tradunt Theologi, exempli gratia: hic infirmus  
conualebit, hæc nauis salua ad portum perueniet, vt rectè  
discurrit Caspensis tom. 1. tract. de act. humanis.

Arg. cont. 2. conc. Isaias cap. 3. 4. alt. *Complicabuntur  
sicut liber Cœli*; & Apocal. cap. 6. *Cœlum recessit sicut liber in-  
uolutus*: quæ Scripturæ videntur significare, Cœlum esse  
velut librum conscriptum litteris Astrotum, in quo etiam  
futura libera legi possunt. Quod clariùs exprimitur in li-  
bro cuius titulus. Narratio Iosephi, in quo Iacob dicitur  
fuisse locutus filijs, *Vidi in tabulis Cœli, quæcunque vobis, &  
filijs vestris uentura sunt.* Resp. ad Scrip. cum Lyrano, quod  
Cœli in fine mundi complicabuntur, quia deinceps Astro-  
logi, ac Ethnici ijs vri non poterūt velut libro pronostico.  
Vel resp. 2. cum nostro Adam Sasbout, quia in fine mundi  
desinet hic motus, & ordinarius vsus Cœlorum, ac influen-

tia, non aliter, quàm libro vti definimus, cum eum compilamus, seu claudimus. Ad illum librum de Ioseph dicit Herinex, quod est apocriphus, & fabulosus.

Arg. 2. Scrip. tradit, quod astra sint in signa, & tempora, & dies, & annos, ergo &c. Resp. quod sunt in signa, & tempora, idest quatuor anni tempestatum, item plantationis, sementis &c. In signa dierum scilicet naturalium, artificialium &c. Tum etiam in signa in ordine ad agriculturam, nauigationem, & medicinam in vniuersali, vt supra in appendice de cæteris operibus.

Dices Astrologi multa vera prædicunt: ergo dicendum habere veram scientiam, ac proinde posse facere pronostica etiam de ijs, quæ dependent ab hominum voluntatibus.

Resp. ex D. Aug. loc. cit. Quod si Astrologi iudicarij aliquid veri dicunt, est, vel ex Dæmonis suggestione, vel ex pacto explicito cum illis inito, vel implicito, & generali, quod cum antiquis Mathematicis factum fuit.

Resp. 2. Quia cum multa prænuncient, ex illis aliquid casu euenit, tum quia occulta D. prouidentia permittit in pœnam scelerum, & culpabilis curiositatis. Vnde Ioan. Picus Mirand. testatur ex 130. prædictionibus cuiusdam Mathematici de mutatione auræ, se tantum septem post adhibitam diligentem obseruationem, deprehendisse veras; ac proinde Ioannes Echius homil. 3. Dominicæ secundæ post Epiphaniam meritò dixerit. Accepta alicuius Astrologi practica, loco pluuiæ ponito serenitatem, & è conuerso, elapso anno totidem, aut pluries videbis, te dixisse veritatem, quam practicum illum; & hinc fit, quod singuli ferè variant inter se in suis diuinationibus, & denique eruditus Ioannes Porta in opusculo Physionomiæ cælestis in proæmio, ita de se ipso scribit. Ipse ab incunte pueritia adeo feruenti desiderio ad eam perdiscendam ferebar, satis enixè, curiosèque eius secreta peruestigando; at postquam summorum Procerum iussu, & catholicorum sententijs sublata est, quantò eam prius ardore conquirebam, tantò postea toto animo exhorruì, & ex mente eliminaui. Cumque alio iudicio examinarem, quàm prius didiceram, tandem comperi Astrologiam non nisi fictam, & imaginariam esse scientiam; hætenus Porta in Astrologia versatissimus, cui sententiæ omnes catholici Astrologi sub-



subscribi coguntur. Videnda est quæstio 6. disp. vnica in tract. de operibus sex dierum, vbi plura habentur, quæ faciunt pro hac quæstione.

## DISPVATIO II.

*De actibus voluntatis in genere, idest. De voluntario, & inuoluntario.*

### QVÆSTIO I.

*Quid sit voluntarium.*

**N**Ot. 1. Quodd indubiè datur in nobis principium liberum actuum humanorum, qui sunt imputabiles ad laudem, & vituperium, ad gloriam, & pœnam; non enim nostra voluntas operatur, quia est talis natura, sicut ignis, sed quia vult, & appetit operationem, adeout possit agere, & non agere, & agere contrarium. Ita definitur in pluribus Concilijs, & signanter in Concil. Trid. sess. 6. can. 5. & 6. contra Lutherum, & eius seguaces, negantes in nobis liberum principium, & asserentes operationes nostræ voluntatis tam bonas, quam malas produci à Deo sine coefficientia, & cooperatione nostra, ac proinde absque laude, & vituperio. In hoc etiam errore erant Mathematici studentes Astrologiæ iudiciariæ, de quibus supra &c.

Not. 2. Quodd, estò aliquando confundantur ad inuicem isti termini, nempe liberum, & voluntarium, & spontaneum, attamen multum inter se differunt secundum magis, & minus; nam omne liberum est voluntarium, & omne voluntarium est spontaneum, non verò è conuersò. Siquidem spontaneum competit etiam rebus inanimatis, vnde dicit ignem spontaneè sursum volare, & lapidem deorsum. Voluntarium competit solis animalibus, siue ratione prædictis, siue non, vnde brutum dicitur voluntariè appetere cibum, & currere ad ipsum, & homo sibi conuenientia inquirere; liberum autem seu libertas solis agentibus ratione præditis, idest hominibus, Angelis, & Deo competit.

Not. 3. Quodd dupliciter accipi potest voluntarium, nempe

nempe imperfectè, & perfectè; primo modo est id, quod conuenire potest etiam Brutis. Vnde quando Arist. 3. Eth. describit voluntarium, dicens, est id cuius principium est in ipso agere cognoscente singula, in quibus est actio, intendit comprehendere etiam illud voluntarium, quod procedit à potentia appetitiua ex præuia cognitione sensitua. Voluntarium autem perfectum est idem cum voluntario libero, & dici potest illud, quod procedit à voluntate, & præuia cognitione intellectiua.

Præterea non sunt idem voluntarium propriè, & volitum; nam voluntarium debet esse principiatiuè, seu effectiue à voluntate, volitum non sic; homicidium enim sine ullo influxu, & notitia commissum, in quo quis sibi complacet, non est ei voluntarium, tamen est obiectiue volitum. Et quidem in hoc sensu etiam processio Filij diuini est obiectiue volita, estò non sit voluntaria principiatiue, sicut est processio Spiritus Sancti. E contra non omne voluntarium est directè, aut reflexè volitum; nam actus aliarum potentiarum à voluntate imperati, sunt ita voluntarij, vt simul sint expressè voliti. His prænotatis sit.

Concl. Benè describitur, seu definitur voluntarium, strictè sumptum, seu perfectum sic: Est id, quod procedit à principio intrinseco cum perfecta cognitione finis, & circumstantiarum. Dicitur à principio intrinseco, quod in proposito est intelligendum non de principio passiuo, sed actiuo, quia voluntarium est effectus à voluntate procedens, dicitur cum præuia cognitione intellectiua &c. quia ad rationem voluntarij perfecti, & strictè sumpti præexigitur scientia, seu notitia obiecti, finis, & circumstantiarum; alioquin si operans ignoret aliquam circumstantiam, quæ ad actionem concurrere debet, illa actio non esset completè voluntaria v.g. Si quis occidit hominem ignorans esse Patrem, vel Clericum &c.

Quæres. I. Quotuplex sit voluntarium, seu quomodo diuiditur. Resp. Quod primò diuiditur in voluntarium voluntate propria, & in voluntarium voluntate aliena, cuiusmodi est peccatum originale, quod ab Adamo trahimus. Diuiditur secundò in voluntarium necessarium, & liberum libertate indifferentiæ, seu contingentiæ, quæ in materia morali stat simpliciter pro libertate. Volunta-

rium necessarium est, quod non procedit ab appetitu indifferenti ad volendum, vel non volendum, & sic amor increatus, quo Deus amat se, & processio Spiritus Sancti dicitur voluntarium necessarium. Similiter actus, seu motus necessarij voluntatis, qui dicuntur motus primò primi, dicuntur voluntarij necessariò. Diuiditur tertio voluntarium in directum, & in indirectum, cum voluntario directo confundi solet voluntarium explicitum, seu expressum, & in se, cum voluntario indirecto confunditur voluntarium implicitum, & in causa; sic volitio respectu volentis ebrietatem est directe, explicitè, & in se volita, rixæ autem, & homicidium, quæ ex ebrietate, secutura prævidentur sunt voluntaria indirectè, implicitè, & in causa, quæ etiam dici possunt voluntaria interpretatiuè, quia sunt volita non expressè in se, sed in alio; in alio, inquam, in quo continetur, vel ex quo sequitur. Primo modo est interpretatiuè voluntarium sacrilegium furanti calicem consecratum, incestus &c. 2. modo est voluntarium homicidium commissum ab ebrio sciente, se esse rixosum in ebrietate, & pronum ad verbera, & cædes &c.

Cæterum vt aduertit noster Herincx p. 2. tract. 2. de lib. arb. Voluntarium interpretatiuum aliquando sumitur pro eo, quod adesse præsumitur ex aliquo signo externo, siue positiuo, siue negatiuo v. g. ex aliqua taciturnitate iuxta illud, qui tacet consentire videtur, & hoc habet locum in foro externo. Aliquando etiam non pro voluntario, quod de facto est, sed prudenter interpretamur futurum, si adesset, & sciret is, cuius consensus desideratur, & in hoc sensu Religiosus, superiore absente, & inscio, interdum aliquid facit, vel recipit, rationabiliter putans gratum fore superiori, si sciret, & consensus peti posset.

Quæres 2. Quomodo omissio possit dici voluntaria.

Resp. omissio rectè dici potest voluntaria, eum ipsa suo modo à voluntate, seu à principio intrinseco cum cognitione dependeat, & quidem non solum, quando adest expressa volitio omittendi, sed etiam quando voluntas purè omittit; Vndè potest aliquid esse voluntarium sine omni actu voluntatis, & maximè in nostra Scholâ admittente puram omissionem liberam, & est sententia magis communis, de qua in tract. de peccatis.

Quæ-

Quæres 3. An, vt omiffio cenfeatur voluntaria, requiratur præceptum, feu obligatio faciendi id, quod omittitur.

Resp. Ad hoc vt omiffio fit voluntaria nullum requiritur præceptum, fed fufficit potestas operandi, & non operandi præmiſſa debita cognitione requiſita. Ita Herincx ex communi ſententia Scotiſtarum, & multorum extra noſtram ſcholam, vt Caſpenſ. tom. 1. in tract. de actibus humanis, Vaſquez, Montefinos, Salas, & aliorum; & quidem patet reſponſio ex manifeſtis exemplis. Nam qui ieiunat feria 4. quando eſus carnis permittitur, ſine dubio voluntariè, & cum merito abſtinet à carnibus, quia ad hoc vt illi actus, qui ſunt in noſtra potestate, ſint voluntarij, nullum requiritur præceptum, ſed ſatis eſt potestas operandi &c. & ſic ceſſatio audiendi Sacrum die feriata.

## QVÆSTIO II.

*Vtrum violentia cauſet inuoluntarium, & an voluntas poſſit pati violentiam.*

**N**ot. 1. Quòd quatuor ſunt cauſæ inuoluntarij, nempe violentia, metus, concupiſcentia, ſeu paſſio vehemens, & ignorantia. Sicut enim voluntarium cauſatur ex duplici principio, nimirum ex voluntate, ſeu appetitu operante, qui eſt principium intrinſecum, & ex cognitione dirrigente; ita oportet, quod oppoſitum eius, ſcilicet, inuoluntarium cauſetur ex oppoſitis principijs, & proueniet, vel ex eo quod operatio proueniat à principio extrinſeco, vt contingit in his, quæ ex violentia, aut metu ſunt; vel quia tollitur, ſeu ligatur, aut turbatur cognitio, ſicut fit per ignorantiam, concupiſcentiam, & paſſionem. Ceterum inuoluntarium vt ſic poteſt deſcribi tali pacto: eſt illud, quod procedit à principio intrinſeco, hoc eſt à voluntate, ſed aliqualiſter contra eius inclinationem. Vnde ſi voluntas abſolutè aliquod repudiat; vt fornicatio abſolutè repudiata, omnibus conſideratis, à Virgine etiam minis perterrita dicitur inuoluntarium ſimpliciter; ſi autem non abſolutè reſpuit, ſed ob aliquam rationem acceptat, tunc dicitur inuoluntarium ſecundum quid, vt proſectio mercium facta à mercatore metu naufragij, quæ in ſe con-

considerata displicet, quatenus autem est euasiva naufragij, & saluatiua vitæ propriæ, placet.

Not. 2. Quod violentum ab Arist. 3. Eth. cap. 1. sic definitur: Est id, quod est à principio extrinseco, passo non conferente vim: quod non debet intelligi purè negatiuè, sed etiam positiuè, idest contranitente passo, seu contra passû inclinationem, vt exponit Scotus in 2. dist. 18. q. vntc. Ex quo intelligitur, quod hæc quatuor, nempe necessarium, violentum, coactum, & inuoluntarium, quæ interdum confunduntur, inter se differunt secundum diuersas formalitates, quas exprimunt. Necessarium enim dicitur prout opponitur contingentî, seu indifferenti, & importat determinationem ad vnum excludendo facultatem ad oppositum. Violentum includit quidem eandem necessitatem, & dererminationem ex parte eius, qui patitur violentiam, sed addit supra necessarium, quod sit à principio extrinseco; nam à principio intrinseco, & proprio nihil violentatur, estò possit aliquid fieri necessario, & tamen esse à principio intrinseco vt patet in brutis, & in motibus primò primis. Coactum videtur coincidere cum violento, sed in rigore loquendo, coactum solum opponitur spontaneo, seu voluntario, ac proinde solum inuenitur in cognoscentibus; violentum verò etiam in rebus inanimatis, vt patet de lapides rursus projecto. Inuoluntarium interdum sumitur pro coacto, aut violento, sed tamen latius patet, quia potest contingere quod aliquod sit inuoluntarium non solum ratione violentiæ, sed etiam ratione ignorantia, & ex defectu cognitionis, vt infra ostendetur.

I. Concl. Violentia causat inuoluntarium simpliciter; patet, quia facit, quod opus non sit ab intrinseco; sed ab extrinseco renuente voluntate; tum quia sicut violentia repugnat naturali, & facit contra naturale in carentibus appetitu, sic in præditis appetitu facit contrauoluntatem.

II. Concl. Voluntas potest pati violentiam, vel coactionem in actibus aliarum potentiarum, quibus nata est, & solet imperare, ac proinde tales actus erunt inuoluntarij simpliciter. Patet conc. quia contra voluntatis inclinationem potest ab extrinseco applicari v. g. manus ad tangen-

gendum, & oculos ad videndum &c. sed huiusmodi actus sunt inuoluntarij; ergo &c. Tum quia, etsi spectentur istæ potentiæ secundum particulares inclinationes, non patiuntur vim, cum concurrant ad actum sui perfectiorem, sunt tamen actus simpliciter violenti respectu hominis, cum sint contra eius voluntatem, quæ est supremus, & vniuersalis appetitus suppositi, seu personæ, cui cæteræ potentiæ subordinantur. Insuper quod dictum est de actibus positiuis dicendum etiam est de violenta omissione illorum. Sic enim potest voluntas violentari in auditu, visu &c. Si enim videre, audire velit homo, & impediatur facere istas actiones, tunc violentiam patitur. Quamuis ipsæ potentiæ in se spectatæ violentiam non patiuntur: nam oculus, & sic de cæteris non petit videre nisi obiectum propositum; ac proinde si alter impediat, claudendo palpebras, ne videat obiectum, non fit contra inclinationem oculi, sed ad summum ipsius hominis.

III. Concl. Voluntas potest pati violentiam in actibus negatiue, non verò positiue. Ita communis Theologorum opinio; licet Thomistæ asserant, in rigore non pati violentiam voluntatem, si impediatur, ne in actum exeat, quia omnis creatura habet inclinationem ad obediendum Deo. Prob. conc. quoad 1. part. Potest Deus denegare concursum voluntati, quæ est parata ad actum eliciendum; sicut ignis in fornace Babilonis fuit à Deo impeditus per denegationem concursus, ne tres illos pueros combureret; ergo voluntas negatiue potest pati violentiam, cum hoc sit contra eius desiderium.

Prob. 2. pars. Actus eliciti dicuntur illi, qui producuntur à voluntate tamquam à principio intrinseco, actus verò coactus est, qui producitur à principio extrinseco, vt in definitione allata de violento; sed vnus, & idem actus nequit esse à principio intrinseco, & extrinseco; ergo &c.

Confirmatur. Quia voluntatem cogi positiue est ipsam elicere actum contra suam inclinationem, sed hoc videtur impossibile, quia idem actus esset volitio, & nolitio ergo &c. sic enim vellet nolens, & è contra.

IV. Concl. voluntas potest pati violentiam etiam in ijs, quæ potest recipere, quando ipsa renuat ea riceper. Prob. Potest Deus voluntati repugnantem infundere habitus alios,



quos, siue naturales, siue supernaturales, sed in tali casu pateretur violentiam; ergo &c. patet min. quia licet voluntas ad huiusmodi habitus habeat inclinationem naturalem; repugnat tamen per elicitam, quæ præponderat, & sufficit, vt voluntas cogi censeatur. Similiter posset Deus se solo infundere amorem in voluntate nolenti, & quantum est ex se renitenti, sed talis actus esset inuoluntarius, & violentus, ergo &c.

Arg. cont. 1. concl. Violentum debet esse ab extrinseco, vt dictum est, passio non conferente vim; sed nulla creatura potest Deo resistere, ergo &c. Resp. disting. min. efficaciter, & victoriosè, vt quidam aiunt, conc. min. inefficaciter, quatenus creatura conatur ad oppositum ex sui natura, neg. min. vt patet in lapide moto sursum &c.

Arg. 2. Creaturæ naturali inclinatione Deo obediunt; ergo nulla est motio in creaturis à Deo, quæ sit contra inclinationem illarum, ac proinde nulla violentia.

Resp. dist. ant. In executione propriarum operationum, & in ijs, quæ sunt supra naturam, non tamen violenta in ordine ad ipsas; conc. ant. in ijs, quæ sunt contra earum inclinationem nego; Nam, licet quælibet Creatura sit in potentia obedienciali Dei, hoc est, Deum posse de illa facere quicquid non repugnat, attamen in ijs, quæ sunt contra naturæ propriæ inclinationem dici nequit habere naturalem inclinationem, sed potius obedire diuinæ voluntati, cum qua obedientia consistere potest violentia, vt patet de lapide, si Dei virtute tendat sursum; & de aqua calefacta.

Arg. cont. 3. concl. quoad 1. part. Potentia non patitur violentiam in cessatione ab operatione, quando non præcedunt omnia requisita ad operandum, sed concursus primæ causæ cum secunda est vnum requisitum particulare ad agendum; ergo si talis concursus non adest, non patitur violentiam causa 2. Resp. dist. mai. si non præcedunt, nec desiderantur omnia requisita conc. mai. quando verò desiderantur, & haberi non possunt, tunc est violentia. Vnde cum voluntas desideret concursus Dei ad agendum, & nequeat illum habere; tunc dicitur pati violentiam.

Arg. cont. 2. p. concl. videlicet voluntatem non posse pati violentiam in actibus elicitis, & placet mihi vt i quibusdam argumentis desumptis ex meo penu, quos in me-

dium disputationis habitæ Pisauri in Eccl. PP. Augustia-  
 norum produxi, inuitatus ad huiusmodi thesim im-  
 pugnandam, & sic arguebam. Non repugnat, volunta-  
 te me cogi negatiuè, ergo non repugnat cogi positiuè, idest  
 in actibus elicitis, conf. patet, quia non apparet maior ra-  
 tio de vno, quam de alio, ergo &c. Resp. neg. conf. ad  
 probationem, negatur pariter ant. maior enim ratio repu-  
 gnantiæ apparet, si ponatur violentia in actibus elicitis,  
 quàm in denegatione concursus ad impediendum actum à  
 voluntate eliciendum,

Contra. Si maior ratio appareret de violentia &c. hoc  
 maximè esset, quia læderetur libertas voluntatis; sed per  
 violentiam negatiuam æquè læditur, ac per positiuam,  
 voluntas; ergo si admittitur vnum, & alterum est admit-  
 tendum, Prob. min. Idèd læditur voluntatis libertas,  
 quia habet perfectum dominium super suos actus; sed  
 æquale dominium habet super actus eliciendos, qui per  
 denegationem diuini concursus impediuntur, & in actus  
 elicitos, ergo æqualiter læditur voluntatis libertas &c.

Resp. conc. mai. & neg. min. Ad probationem transeat  
 maior, & neg. min. ratio est, quia voluntas maius domi-  
 nium habet, ne actus elicitus sit à principio extrinseco,  
 quam per denegationem concursus impediatur, ne exeat  
 in actum; hoc enim fit per solam suspensionem, illud au-  
 tem fieret per productionem actus à principio extrinseco,  
 qui quidem actus esset simul, & semel à principio quoque  
 intrinseco, ac proinde esset volitio, & nolitio, quod re-  
 pugnat.

Contra. Non minus repugnat lapidem per vim ascen-  
 dere sursum, quàm voluntatem producere actum contra  
 sui inclinationem; sed lapis nedum per potentiam Dei,  
 sed etiam per potentiam creatam ascendit sursum; ergo  
 & voluntas per diuinam potentiam producere poterit  
 actum sibi contrarium. Prob. min. quia ascensus in lapide  
 est contra eius inclinationem, & hoc non obstante natu-  
 raliter, idest per vim naturalem tendit sursum, quare er-  
 go talis violentia in lapide est naturaliter possibilis, & in  
 voluntate non erit supernaturaliter possibilis?

Resp. neg. mai. & ratio est, quia dum lapis ascendit sur-  
 sum, non habet alium motum impossibilem cum illo,

puta motum deorsum; at voluntas si cogeretur ab extrinseco haberet actum, qui simul esset volitio, & nolitio, quod est impossibile; esset quidem volitio, quia à principio intrinseco voluntatis emanaret talis actus; esset autem nolitio, quia nolens vellet, quæ sunt euidenter incompossibilia.

Contra. Potest Deus cogere voluntatem ad actum continuandum, ergo etiam potest absque ulla repugnantia, cogere ipsam ad actum eliciendum. Prob. conf. Continuatio actus est continua productio ipsius actus, sed talis productio esset violenta absque eo quod esset idem actus volitio, & nolitio; ergo &c. Resp. conc. ant. & neg. conf. ad probat. conc. mai. & neg. min. Siquidem aliud est, voluntatem, etsi reluctantem, exire in actum, quem nollit, & aliud est continuare, seu conseruare actum iam positum; nam quàmuis voluntas vellet ab illo actu cessare, & non posset, imò cogeretur illum continuare, attamen non esset violentus, sed voluntarius, sicut à principio fuit productus voluntariè; secus autem de actu primò, producendo, respectu cuius voluntas adhuc gaudet sua libertate, & dominio.

Cæterum aliter respondent Thomistæ, & Augustiniani, qui pariter sunt Scholæ Thomisticæ; quod si in aliquo discordant à Thomistis, se habent meo videri velut scientia subalternans, & subalternata. Itaque responderent, in nulla creatura posse poni violentiam simpliciter, quia quælibet creatura habet inclinationem naturalem ad obediendum Deo; ac proinde non pati violentiam simpliciter, sed secundum quid. Verùm contra talem responsionem sic arguebam. Actus elicitus; data hypothesi, quod violenter elici posset, esset contra propriam, & naturalem inclinationem eliciendi actum oppositum, ergo non obstante naturali inclinatione obediendi Deo in actibus elicitis pateretur voluntas violentiam positivam simpliciter. Inclinationis namque naturalis non est quid realiter distinctum ab ipsa natura, sicut actus elicitus; ac proinde esset ex duplici capite violentus, & quidem primò, quia esset contra voluntatem, secundò quia opponeretur inclinationi naturali.

Petes, si Deus determinaret voluntatem reluctantem ad actum

actum aliquem eliciendum, ille actus esset nē voluntarius, an violentus supposito, quod hoc posset à Deo fieri.

Resp. Quod in tali casu esset dicendus voluntarius simpliciter, & absolutè, quia emanaret à principio intrinseco, violentus verò secundum quid, seu inuoluntarius, partim, quia voluntas determinatur, partim quatenus voluntas antecederet illum absolutè noluit. Hæc posui in gratiam studentium; quibus non est ita facile in hac materia inuenire argumenta. Amplius prosecutus fuissē argumentum, nisi breuitas, cui studeo, me admonuisset.

### QVÆSTIO III.

*Vtrum ea, quæ fiunt ex metu sint voluntaria, vel potius inuoluntaria.*

**N**ot. 1. Quòd metus sic ab Arist. 2. phys. c. 5. describitur. Est animi turbatio, orta ex cognitione imminētis mali, quod aut mortem, aut molestiam inferre potest; & coincidit cum illa, quæ traditur ab Vulpiano l. 1. ff. ex eo, quod metus causa: est instantis, vel futuri periculi causa mentis trepidatio: ex qua descriptione patet, quod id dicitur metu fieri, quod declinandi, & vitandi malum fit; dicitur mentis trepidatio, quia metus oritur ex imaginatione periculi futuri, maximè imminētis; dicitur instantis, quia pericula valde remota non timentur, neque mentem ita perturbant, dicitur instantis, & futuri, quia non dum euenit, & per hoc differt metus à tristitia, & dolore, quia hæc sunt causata à malo presenti.

Not. 2. quod metus alius dicitur concussiuus, alius incussiuus alius reuerentialis; de quibus latè agunt Iuristæ, & Canonistæ. Insuper diuiditur metus in intrinsecum, & extrinsecum. Intrinsecus dici solet ille, qui non incutitur à causa libera, sed naturali, vt metus mortis proueniens ex periculosa infirmitate, vel ex alio graui periculo. Metus verò extrinsecus dicitur ille, qui procedit à causa extrinseca libera, idest ab homine ad extorquendum consensum alicuius rei, quod fieri potest; etsi aliquando non licitè: & hoc dupliciter talis metus incuti potest, vel iuste, vel iniuste; tunc iuste incutitur, quando v. g. Episcopus

copus excommunicationem minatur Titio, nisi Bertam ducat, cum qua sponsalia valida contraxit; vel iudex cogit ad ducendam foeminam ab ipso defloratam. Iniuste autem incutitur, si quis v. g. velit aliquem interficere, nisi pecuniam ei det, vel in Matrimonium consentiat, vel nisi fiat Religiosus, quæ omnia sunt illicita, & irrita, vt iura declarant.

Not. 3. Quod metus ab extrinseco incussus, alius est metus cadens in virum constantem, alius cadens in virum inconstantem. Primus causatur à malo prudenter, & honestè præferendo illi malo, quod ob metum fit, nam vir constans, vt talis est, est vir probus, & agens secundum virtutem, quæ dicat præferendum esse malum maius malo minori, & hic metus dicitur grauis, ad quem reducuntur metus mortis, mutilationis, perpetui carceris, vel diuturni, seruitutis, stupri, amissionis status honorifici, & bonorum, nempe diuitiarum, vt habetur C. de ijs, quæ metu fiunt cap. cum dilectus; sic etiam metus infamiæ, metus reuerentialis tam in ordine ad se, quam Parentes: Secundus contra est ille, quo maius malum, & maius inconueniens eligitur ad vitandum minus malum, & dicitur, metus levis, & cadens in virum non fortem, & inconstantem. Cæterum metus attendendus est etiam penes personam, cui incutitur, nam foemina, & etiam aliqui homines foeminis similes in animi fortitudine, possunt interdum et iam à metu mali levis, vel non tam grauis induci ad aliquod agendum, quod non agerent, de quo etiam in tract. de matrim. p. 4.

I. Concl. Ea, quæ fiunt ex metu, siue timore mali imminentis sunt per se loquendo absolutè, & simpliciter voluntaria, imò libera; sed inuoluntaria secundum quid.

Prob. conc. quoad 1. part. ex Doctrina communi, tam Scotistarum, quam Thomistarum, & D. Bonau. Illud remanet simpliciter voluntarium, quod examinatis omnibus circumstantijs, volumus, sed qui ex metu graui aliquid facit, quod tamen non faceret, si cessaret ille metus, vt patet de mercatore, qui ex vna parte suas considerans pretiosas merces, & ex alia videns periculum naufragij, non aliter euitabile, nisi illas in mare proijciendo, de facto volens eas proijcit, ergo quæ fiunt ex metu sunt sim-

pliciter voluntaria. Hoc tamen est intelligendum hac conditione, quod talis metus non absorbeat omnem usum rationis, quia in tali casu non essent voluntaria simpliciter. Prob. 2. pars, & confirmatur 1. Quod est volitum efficaciter, & absolute, & est nolitum tantum inefficaciter, & conditionate est voluntarium simpliciter, & inuoluntarium secundum quid; at opus factum ex metu est volitum efficaciter, & absolute, quia fit de facto, & nolitum inefficaciter tantum, & conditione, ut patet in exemplo allato de projectione mercium, ergo quæ fiunt ex metu sunt inuoluntaria secundum quid, & voluntaria simpliciter, ac proinde mixta ex voluntario, & inuoluntario.

II. Concl. Quando opus metu factum est inuoluntarium secundum quid, metus per se, & proprie loquendo non causat hoc inuoluntarium, sed tantum improprie, & per accidens. Ratio est, quia metus potius est causa voluntarij, cum sit ratio, ob quam voluntas moueatur, & absolute velit opus facere. Quare per accidens dici potest causa inuoluntarij, quatenus causat opus, quod, secluso metu, non causaret opus, quod est contra eius inclinationem.

Arg. cont. 1. conc. Quæ fiunt à principio extrinseco tollunt voluntarium, ut dictum est supra; sed quæ fiunt ex metu sunt à principio extrinseco, ut patet de mercatore, &c. ergo metus tollit voluntarium simpliciter, ac proinde sunt simpliciter inuoluntaria. Resp. dist. mai. Quæ fiunt ex metu sunt à principio extrinseco comouente, conc. mai. eliciente, neg. mai. sola enim voluntas est principium eliciens, estò commoueatur à metu &c.

Arg. 2. Matrimonium, & votum solemne sunt inualida si fiant ex metu, ergo ea, quæ fiunt ex metu non sunt voluntaria simpliciter. Ans. est certum ex cap. Locum, & ex cap. Veniens de sponsalibus; & de voto solemni ex Trid. sess. 25. de regularibus; consequentia constat, nam omne matrimonium, & votum simpliciter voluntarium debet esse validum, ergo cum declarentur inualida, signum est, quod non sunt simpliciter voluntaria.

Resp. conc. ant. & neg. cons. ad probationem dist. ant. Omne matrimonium, & votum simpliciter voluntarium debet esse validum per se loquendo, & attento iure naturali, concedo; per accidens, & stando iuri positivo Eccle-



fastico, nego; Poteſt enim Eccleſia conſtituere quaſdam conditiones, ſine quibus votum, vel matrimonium non ſint valida, eſtò ſint ſimpliciter voluntaria, inter quas vna eſt, quod non fiat ex metu graui profeſſio Religioſa, etſi fiat, ſit inualida, & ſic pariter de matrimonio.

Arg. 3. cont. 2. part. Quando quis metu pœnarum inferni legem obſeruat, talis obſeruantia nihil habet inuoluntarij, aut diſplicitiæ, alioquin eſſet mala, & vitioſa, quod repugnat Trid. ſeſſ. 6. Can. 8. ergo quæ ſunt ex metu non includunt inuoluntarium ſecundum quid, ſeu non ſunt mixta ex voluntario, & inuoluntario.

Reſp. conc. ant. & neg. conſ. & ratio eſt, quia metus cauſat quidem inuoluntarium ſecundum quid, quando obiectum, quod per metum eligitur, eſt malum ſecundum ſe, & ſolum quoad vitandum maius malum habet rationem eligibilis, ſicut in exemplo de proiectione mercium. Si verò obiectum, quod per metum eligitur non eſt malum ſecundum ſe, ſed abſolutè bonum, voluntas non habet actum nolitionis circa ipſum. Vnde cum obſeruatione mandatorum Dei ſit per ſe bona, & nullo modo mala, etiam abſtrahendo à periculo gehennæ Inferni, hinc ſit, quod talis obſeruantia ex metu pœnarum operata, nihil habet inuoluntarij, & diſplicitiæ iuxta doctrinam Trident. loc. cit. de quo in tract. de pœnit. p. 4.

#### QVÆSTIO IV.

*Vtrum concupiſcentia cauſet inuoluntarium.*

**N**Or. 1. Quod multipliciter poteſt accipi concupiſcentia, aliquando accipitur iuxta S. Scrip. ſenſum, non ſolum pro inordinatione appetitus ſenſitiui, ſed etiam intellectus, & voluntatis, quatenus per peccatum originale fuerunt deſtituti iuſtitia originali, ac proinde mouentur auerſiue, vel conuerſiue ad obiecta repugnantia, & diſconuenientia rectæ rationi, & legi æternæ. Aliquando ſumitur pro appetitu ſenſitiuo, & in hoc ſenſu ſic poteſt deſcribi; Eſt potentia animæ ſenſitiuæ proſequens bonum ſenſibile, & fugiens huiusmodi malum; quæ quidem potentia non eſt in ſe vitioſa, ſed ſolum quatenus

spoliata iustitia originali dicit inordinationem, & prout  
tatem habitualement, aut actualement ad obiecta disconuenien-  
tia rationi rectæ. Quare sic accepta diuiditur in habi-  
tualement, & in actualement. Concupiscentia habitualis est  
proxima dispositio appetitus sensitui ad actus rationi re-  
pugnantes; unde pro appetitu sensituo intelligitur tam  
concupiscibilis, quam irascibilis. Concupiscentia verò  
actualis est motio actualis appetitus sensitui rectæ ratio-  
ni repugnans. Concupiscentia autem actualis, alia est  
ant. alia conf. Concupiscentia ant. est motio appetitus  
sensitui, alliciens voluntatem ad motionem conformem  
suæ motioni, & dicitur ant. quia antecedit omnem actum,  
tam internum, quam externum voluntatis, ad quem allie-  
cere intendit. Consequens est motio inordinata appeti-  
tus sensitui deliberata, orta ex præuio actu voluntatis, &  
de hac concupiscentia actuali, tam antecedenti, quam  
consequenti intelligenda venit quæstio.

Not. 2. Quod Theologi considerantes diuersas motio-  
nes concupiscentiæ, & Animæ rationalis potentiarum,  
docent operationes humanas alias esse plenè deliberatas,  
alias semiplenè deliberatas, alias penitùs indeliberatas;  
operatio prorsus indeliberata dicitur motus primò pri-  
mus, in quo nullum est peccatum, nec quidem veniale;  
operatio semiplenè deliberata dicitur motus, seu actus  
secundò primus, & in hoc est peccatum veniale; ex quo  
colligitur, quod motus primò primi præueniunt omni-  
modam deliberationem voluntatis, tam plenam, quam  
semiplenam, actualement, scilicet, & virtualement; motus au-  
tem secundò primi præueniunt plenam deliberationem,  
non verò semiplenam. Cæterum deliberatio nil aliud est,  
quam rationis aduertentia super qualitate actuum Animæ  
id est bonitate, malitia, & indifferentia.

I. Concl. Concupiscentia non facit inuoluntarium, sed  
voluntarium auget. Prob. Si concupiscentia faceret inuo-  
luntarium, ergo quod fieret ex motu concupiscentiæ non  
esset voluntarium, sed multa fiunt ex motu concupiscen-  
tiæ, quæ sunt voluntaria, ergo ipsa non tollit rationem  
voluntarij, seu non causat inuoluntarium. Prob. min.  
Omne peccatum est voluntarium, & ita voluntarium,  
quod si non esset voluntarium, non esset peccatum, ut do-

et D. Aug. sed multa peccata ex concupiscentia procedunt, ut patet ex S. Scrip. quæ passim prohibet, & damnat actiones ex concupiscentia peractas, tanquam peccaminosas, ut Eccles. 18. Post concupiscentias tuas non eas. Daniel. 13. Concupiscentia subvertit cor tuum; & ad Rom. cap. 9. Non regnet peccatum in vestro mortali corpore, ut obediat concupiscentiis vestris, ergo multa voluntaria fiunt ex concupiscentia.

Prob. 2. Quod non tollit cognitionem finis, & inclinationem ad finem, ut finis est, non facit inuoluntarium, sed concupiscentia, de qua loquimur, neutrum tollit, non enim loquimur hic de concupiscentia, & irascentia, quæ ita est vehemens, ut absorbeat pænitus usum rationis; ergo &c. Prob. 2. pars. Voluntarium est id, in quod voluntas inclinatur, ergo illud est magis voluntarium, ad quod magis inclinatur voluntas, sed voluntas per concupiscentiam magis inclinatur ad obiectum prosequendum, ergo concupiscentia auget voluntarium, min. patet experientia, ideo &c.

II. Concl. Concupiscentia, estò augeat voluntarium, minuit tamen liberum. Prob. libertas consistit in indifferentia ad amplectendum obiectum ab intellectu propositum, adeo ut quanto maior sit indifferentia, tanto maior sit libertas, sed indifferentia minuitur per concupiscentiam, quia trahit taliter voluntatem ad amorem obiecti propositi, ut non nisi cum maxima difficultate resistere valeat, ut experientia comprobatur, quando quis tentationibus, & motibus concupiscentiæ agitur. Quare D. Paul. ad Romanos aiebat. Non quod volo bonum, hoc ago, sed quod odi malum, hoc facio, & ibidem. Video legem in membris meis repugnantem &c. ergo &c. Hinc merito docent Theologi peccata commissa ex vi concupiscentiæ esse minus graua, quam commissa ex malitia, quia concupiscentia perturbando rationem, minuit libertatem.

Arg. 1. cont. 1. conc. Quod minuit cognitionem, minuit etiam voluntarium, sed concupiscentia minuit cognitionem, ergo & voluntarium, ac proinde illud non auget. Resp. dist. min. Quod minuit cognitionem dimi-  
nuit voluntarium ex parte conditionis concedo, ex parte inclinationis, & propensionis voluntatis, nego. Vnde

quan-

quando dicitur in concl. à concupiscentia augeti voluntarium, non loquimur de voluntario magis perfecto, quod maiorem exigit cognitionem, sed de voluntario prout dicit maiorem propensionem voluntatis; & in hoc sensu explicata coincidit, cum sententia dicente, à concupiscentia minui voluntarium, quia diminuitur cognitio, non verò in ordine ad naturalem inclinationem, immo & ad actum elicitum ipsius voluntatis.

Arg. cont. 2. concl. Concupiscentia auget voluntarium ex dictis, ergo auget liberum, & non diminuit. Prob. 1. conf. quod auget genus, auget speciem, quicquid est in genere est in speciebus, in quibus genus includitur, sed voluntarium est indifferens ad voluntarium necessarium, & contingens, ergo si concupiscentia auget voluntarium, auget & liberum. Resp. neg. 1. conf. & min. probat. Quia voluntarium non diuiditur in voluntarium necessarium, & contingens, tanquam in duas species, sed tanquam subiectum in diuersa accidentia, sicut ergo accidentia subiecti, ipso immutato, possunt diminui, & augeti, sic liberum, quod est accidens respectu voluntarij, poterit diminui, non diminuto voluntario.

Resp. 2. Quod auget genus, auget speciem, secundum rationem communem, & genericam concedo, secundum rationem specificam, & propriam nego. Sicut ergo concupiscentia auget voluntarium, quia auget spontaneitatem, & inclinationem voluntatis, in quo consistit ratio voluntarij, sic auget quoque voluntarium, seu spontaneitatem voluntatis in voluntario libero, non vero auget indifferentiam, quæ est ratio specifica voluntarij liberi, imò aliquantulum lædit indifferentiam.

Quæres. An ea, quæ fiunt ex concupiscentia sint aliquando voluntaria secundum quid.

Resp. affirmatiue; & ratio est, quia etiam si concupiscentia mirabili quadam sympathia voluntatem ad amplectendum obiectum, tamquam per se amabile, trahat, nec ordinariè reperiatur affectus actualis in contrarium, prout sæpè inuenitur in metu, nihilominus peccatores tali passionem vehementi agitati sentiunt magnas molestias, & conscientie remorsus, ob quos desiderant à concupiscentijs, etiam dum illas sequuntur, liberari, & maxime quando

ob concupiscentiam expletam illis conuenit, graua etiam huius uitæ mala tollerare. Ita Hieronim. part. 2. & idem cum communi sententia Doctorum tradit, de habitibus prauis in peccatoribus, qui indubiè minuunt libertatem eius, in quo reperiuntur, vt experientia comprobatur &c.

## QVÆSTIO V.

*Verum ignorantia cauſet inuoluntarium.*

**N**ot. 1. Quòd ignorantia quatuor modis accipi poteſt, & totidem diuidi. Primò ratione ſui. 2. ratione obiecti. 3. ratione ſubiecti. 4. ratione actus. Ignorantia in ſe conſiderata eſt triplex, nempe negatiua, poſitiua, & priuatiua; Ignorantia negatiua eſt quædam neſcientia de aliquo obiecto in ſubiecto non apto hic, & nunc: Talis eſt ignorantia Petrie. g. adhuc infantis; poſitiua eſt error quidam intellectus circa aliquod obiectum; talis eſt error hæreticorum oppoſitus contrariè veritati fidei catholicæ; priuatiua eſt carentia cognitionis debitiæ; talis eſt ignorantia Chriſtiani adulti apti hic, & nunc ſcire myſteria fidei, & de hac ignorantia hic poſiſſimum agitur; quæ rursus diuiditur à Scoto in 4. diſt. 13. q. 2. & à Iuriſtis in ignorantiam iuris, & facti, & hæc diuiſio ſe tenet ex parte obiecti. Prior eſt carentia ſcientiæ de ipſo iure, ſeu lege aliquod præcipiente, vel prohibente. Poſterior eſt carentia notiæ de facto, vel alicuius facti particularis; vt ſi quis ſciens in die feſto eſſe audiendam miſſam, ſed ignorat eſſe hodie diem feſtum.

Not. 2. quod ignorantia priuatiua ratione ſubiecti diuiditur in vincibilem, & inuincibilem. Inuincibilis eſt illa, qua ignoramus aliquid, quod ſcire non tenemur, vel non poſſumus, etiã adhibita ad hoc morali diligentia. Vincibilis eſt illa, quæ adhibita morali diligentia de facili ſuperari, & vinci poteſt; & iſta iterum duplex eſt, affectata, & craſſa. Affectata eſt ea, qua aliquis vult ignorare ea, quæ hic, & nunc tenetur ſcire, vt liberius indulgere poſſit peccatis, & de hac loquitur Pſalmiſta. Noluĩt intelligere, vt bene ageret. Craſſa verò, & ſupina eſt illa, qua aliquis ex negligentia aliquid ignorat, nec ſcire cu-

rat, quæ scire potest, & tenetur; Vnde dicitur crassa, quia est voluntaria ob negligentiam voluntatis, quæ tempore impinguatur, dicitur etiam Supina, quia, qui desides, & negligentes sunt, supini iacere solent.

Not. 3. Quod ignorantia ratione actus diuiditur, vt docet etiam Scotus in secundo dist. 22. in antecedentem, concomitantem, & consequentem. Antecedens est carentia notitiæ debitæ antecedens omnem actum, vel liberum consensum voluntatis, ideoquæ est prorsus inculcata, & solet vocari à Doctoribus probabilis, & inuincibilis; Huiusmodi ignorantia est in eo, qui sagittam mittit in hominem, inuincibiliter ignorans esse hominem, & credens esse feram, alioquin non occidisset. Concomitans dicitur esse illa, quæ simul natura coincidit cum ipso actu, seu libero consensu voluntatis, & qua non existente tamen operans id fecisset, quod ignoranter fecit: alij tamen volunt, quod talis ignorantia faciat opus non esse voluntarium, etsi non causet positivè inuoluntarium. Consequens dicitur illa, quæ sequitur liberum voluntatis consensum, & solet alias diu culpabilis, & vincibilis, quia potuit humana, & morali diligentia superari, sic ignorantia de die festo, quo Petrus laborat, putans esse diem feriatam, potuisset tamen scire, si humanam diligentiam, & debitam fecisset, vt sciret ea, quæ hic, & nunc scire tenetur.

I. Concl. Ignorantia ant. priuatiua in genere moris causat simpliciter inuoluntarium non positium, sed negatiuum; Est Scoti in 4. dist. 42. q. 1. D. Bonau. & est communis. Prob. Opus quod sequitur ad ignorantiam antecedentem, quæ est eadem cum inuincibili, non est volitum in se, quia non est cognitum, imò si cognitum fuisset, id noluisset, nec est volitum in sua causa, quia causâ illius, nempe ignorantia antecedens est etiam inuoluntaria, ergo actus ex illa ignorantia procedens est simpliciter inuoluntarius negatiuè idest non voluntarius, non autem inuoluntarius positivè, quia circa illud voluntas non elicit actum nolitionis, cum ab intellectu non fuerit præostensum voluntati. Quare sic operari; etiam in materia moris, non peccaret &c.

II. Concl. Ignorantia concomitans causat inuoluntarium negatiuè. Prob. Quod fit ex tali ignorantia nullo



modo est volitum, neque in se, neque in sua causa, vt patet de occisione inimici pro fera, nam occidendo inimicum, non cogitat de inimico occidendo, sed tantum de fera, & sic talis occisio non est voluntaria in se, ad quod requiritur cognitio. Neque est volita in causa, quia illa ignorantia non est voluntaria, cum sit inuincibilis, ergo ignorantia concomitans facit inuoluntarium negatiuum, ac proinde excusat à culpa, quia, vt ignorantia à culpa excuset, non requiritur, vt opus sit positiuè nolitum, sed sufficit, quod non sit voluntarium, neque formaliter, neque interpretatiuè, idest neque in se, neque in causa: Verùm huiusmodi rationes valent de ignorantia concomitanti inuincibili, non vero de vincibili, quia tunc causat voluntarium interpretatiuè, & in causa, vt recte obseruat Angles in 2. d. 22. q. 2. art. 3. diff. 2. ac proinde talis ignorantia non excusat à peccato; quicquid nonnulli dicant apud Mastrium disp. 15. de peccatis q. 6. art. 2. n. 101.

Cæterùm quando quis agnoscit, se occidisse inimicum, & in hoc sibi complacet, tunc reus fit homicidij interni tantum, non autem externi, ac proinde non subiaceret pœnis à lege præscriptis: Immo etiamsi ante homicidium, desideraret hoc modo: Occiderem, etsi scirem, inimicum esse; peccaret quidem affectu interno; non tamen actu externo homicidij, ac proinde nec pœnis subiaceret, ita Herincx p. 2. disp. 1. q. 5. de ignorantia.

III. Concl. Ignorantia consequens causat voluntarium saltem in causa. Prob. In moralibus talis est actus, qualis est causa, sed ignorantia consequens est voluntaria; ergo actus ex illa procedens est voluntarius. Prob. min. Illa ignorantia est voluntaria, quam possumus, & nolumus vincere, & expellere, sed ignorantiam consequentem possumus, & nolumus depellere, ergo &c. Ex quo fit, vt qui incautè emittit sagittam, qua homo occiditur, velle homicidium interpretatiuè, quia volens se exposuit ad tale homicidium, estò formaliter noluerit, ideoque est reus homicidij; & de hac ignorantia videtur loqui D. Paulus 1. ad Corinth. cap. 14. Qui ignorat ignorabitur, negari tamen non potest, quin ignorantia consequens minuat aliquo modo voluntarium, ac proinde peccatum.

*De actibus elicitis voluntatis in specie.*

## QVÆSTIO I.

*Quid sit intentio, & an sit actus voluntatis distinctus ab amore, spe, & desiderio.*

**N**OT. 1. Quòd intentio generaliter sumpta iuxta nominis etymologiam, est in aliud tentio, sicut intendere est in aliud tendere, & sic varias habet significationes, nam quælibet intentio in aliud à; quauis virtute proueniens, siue animata, siue inanimata, siue intentionali intellectiua, siue volitiua dicetur intentio. Verùm in præsentī Doctores nomine intentionis intelligunt voluntariam, & liberam tendentiam in aliquid. Quarè meritò D. Bonau. in 2. dist. 38. q. 2. existimat intentionem non esse actum vnius potentiæ, sed quasi mixtum ex vtraque potentia: & rationem addit, quia intentio dicit appetitionem. Desiderium autem est passio appetitus concupiscibilis ex bono absolutè spectato proueniens. Amor est passio appetitus concupiscibilis ex bono, vel pulchro absolutè spectato proueniens. Spes verò est passio irascibilis proueniens ex bono apprehenso, vt possibili acquiſitu. His prænotatis sit.

Concl. Intentio, etsi præsupponat iudicium intellectus est simpliciter actus solius voluntatis: est communis. Prob. Intentio est actus, quo homo tendit in aliquid, quod sibi proponit tanquam in finem, sed voluntas est que tendit in finem, velut in suum obiectum, & potentias sibi subditas determinat, vt tendant ad suos fines, ergo intentio est actus solius voluntatis. Vnde infertur, intentionem esse actum distinctum ab amore, & simplici complacentia, eo quia licet voluntas, & intentio habeant idem obiectum, attamen differunt, nam in illo obiecto sunt duæ rationes, prima boni per se amabilis, quo sensu est obiectum voluntatis, seu amoris; secunda boni obtinendi per media, & sic est obiectum intentionis.

Infertur 2. intentionem esse distinctam à spe, & desiderio,

rio, quia, licet ista tendant in obiectum absens, plerumque; tamen versantur non circa finem, sed circa media, etsi contingat versari circa finem sunt actus inefficaces; intentio autem semper est efficax volitio finis.

Arg. cont. concl. Intentio dicitur oculus, & lumen, vt habet Matth. c. 6. si oculus tuus simplex fuerit, totum corpus lucidum erit, sed hæc ad intellectum pertinent. ergo &c. Resp. quod intentio vocatur oculus, & lumen metaphoricè, non autem formaliter.

Quæres 1. An voluntas eodem actu appetat finem, & media, quod quidem quæsitum sic est intelligendum. An possit esse idem actus, quo diligatur directè finis in se, & propter se, & insuper medium similiter diligatur directè, quia vtile est ad talem finem.

Resp. quando finis, & medium amantur propter proprias bonitates, & directè, non est vnus tantum, sed duplex, scilicet intentionis respectu finis, & electionis respectu medij, adeout obiectum adæquatum intentionis sit finis propter bonitatem, quam habet, obiectum verò electionis sit medium propter utilitatem. Et quidem hoc patet, quia voluntas, qua amamur efficaciter sanitatem, est causa eligendi media, sed non potest esse causa huius electionis sine diuersitate ex natura rei; Vnde D. Anselm. Dial. de libero arbitrio c. 5. docet, diuersam esse voluntatem, qua volumus aliquid propter se v. g. sanitatem, & qua volumus aliquid, vt sanetur; eò quia vna voluntas est causa alterius, quod sine aliqua distinctione esse nõ potest.

Quæres 2. An intentio sit causa physicè effectiua electionis. Resp. neg. cum communiore sent. Doct. contra Vasquez, & quosdam alios, vt aduertit Herincx. Ratio: quia non est statuenda causalitas efficiens vnus actus, & præsertim eiusdem potentiae in alium absque necessitate, quæ hic non apparet, cum voluntas sufficiat sola, non minus respectu electionis, quàm ipsius intentionis. Itaque intentio tantum mouet, & determinat moraliter voluntatem ad electionem; sicut obiectum, seu finis determinat voluntatem ad amorem absque physica efficientia.

Quæres 3. An intentio finis necessariò determinet ad electionem medij melioris.

Resp. neg. cum Scoto, & Scotistis contra Vasquez. Ratio

tio quia non necessitatur eligere medium vt ilius, cum hoc non sit necessarium ad consecutionem finis; è contra verò medium minus vtile est sufficiens, & reuerà bonum, ergo potest hoc liberè acceptari, neglecto alio, ita Herinex disp. 2. q. 7. de actibus elicitis liberi arbitrij.

Quæres 4. An, supposita absoluta, & efficaci intentione finis, electio vnici medij ad consecutionem requisiti sit necessaria. Resp. affirmatiuè cum Doct. communiter contra nonnullos. Ratio quia talis intentio est præuia electioni, & ad hanc ita determinat voluntatem, vt sit impossibile ea carere, supposito, quod perseveret intentio, quæ proximè ad executionem non sufficiat, ergo ex hac suppositione necessaria est talis electio.

## QVÆSTIO II.

*Vtrum voluntas possit velle plures fines simul.*

**N**OT. 1. Quodd præter ea, quæ tradita sunt in physica. agendo de causa finali, aliqua alia remanent obseruanda pro præsentī quæst. Et quidem in primis, quod bonum, quod simpliciter est bonum reciprocantur inter se bonum, & finis, vt docet Arist. 2. Metaph. cap. 2. vbi ait. Qui è medio tollit finem, necessariò tollit omne bonum, & 2. phys. insinuat bonum, & finem esse idem, sed non sunt idem formalieer, ergo sunt idem conuertibiliter. Verum si loquamur de bono in communi, prout abstrahit ab honesto, vtile, & delectabili, & à bono simpliciter, & secundum quid non datur reciprocatio inter bonum, & finem; quia bonum vtile non est amabile propter se, sed propter alterum, bonum autem, quod fundat rationem finis debet esse bonum propter se; finis enim est id, cuius gratia aliquid fit. Præterea, licet plures Doct. finem cum causa finali promiscuè vsurpent, attamen, vt notat noster Frassen, aliquid discriminis inter vtrumque videtur intercedere; Finis enim præcisè dicitur respectu agentis; causa verò finalis respectu eorum, quæ fiunt propter finem; Vnde hæc est finis operis, ille autem est finis operantis; sic lucrum dicitur quidem finis Architecti, non verò eius causa finalis.

Not. 2. Quòd finis est duplex, nempe medius, qui ordinatur: ad alium, & vltimus, ad quem ceteri ordinantur, finis vltimus est, vel secundum quid, & in certo quodam genere; sic scientia est finis vltimus vigiliarum, studiorum, laborum &c. studentium. Vel est vltimus absolutè, & simpliciter, & in omni prorsus genere, ad quem omnia entia quot quot sunt ordinantur. Hic autem est apparens, aut verus, primus est qui, etsi reuerà non est finis vltimus tñ apparet, vel operans sibi talem finem præfigit, sic auarus præfigit sibi diuitias pro vltimo fine. Secundus est, qui habet veram rationem vltimi finis, & hic est Deus infinitus, principium, & finis omnium rerum. Insuper finis vltimus verus est naturalis, vel supernaturalis, primus est quem homo viribus naturæ assequi potest; secundus è contra, sed necessarium est auxilium Dei. Rursus vterque finis est, vel obiectiuus, qui scilicet agenti obijcitur, & ab eo intenditur, vel formalis, qui est ipsamet animæ operatio, qua finem vltimum consequitur, vt vniob beatifica cum obiecto diuino.

Not. 3. Quòd finis alius est totalis, alius partialis, prior est, qui se solo totaliter mouet agens ad operandum, posterior est, qui partialiter tantum mouet appetitum, ita vt illa motio non sit adeo efficax ac si alter finis moueret v. g. Si quis pietatis, & curiositatis explendæ gratia Romam peteret, pietas, & curiositas essent duo fines partiales, ex quibus vnus totalis, & adæquatus integraretur. Quare in proposito præsentis quæst. certum est, duos fines simul intendi posse ab eodem appetitu. Certum pariter, duos fines totales successiuè ab eodem posse intendi; difficultas igitur solummodo est de duobus finibus totalibus, an simul ab eodem possint intendi, sit ergo.

Concl. Non potest voluntas eadem simul plures fines totales, & adæquatos velle, seu intendere: est communior, & verior. Prob. 1. auct. S. Scrip. Matth. 6. *Nemo potest duobus Dominis seruire*, & ratione subdens idem. Christus ait, *Aut enim vnum odio habebis, & alterum diliges, aut vnum sustinebis, & alterum contemnet*. Prob. ratione desumpta ex natura vltimi finis, & summi boni. De ratione vltimi finis est, vt non sit alterius gratia, & cætera omnia sint propter se ipsum; ergo implicat dari, aut concipi plures vltimos fines,

fines, in quos feratur voluntas. Prob. ex ratione summi boni. De ratione summi, & essentialis boni est, quod per se ita sit perfectum, & sufficiens, vt se solo complerè, & adæquatè satiet appetitum, trahens secum omnia bona, ergo ex ratione summi boni manifestè repugnat, posse eandem voluntatem simul appetere plures fines totales vltimos, & adæquatos; sequeretur enim neutrum esse sufficiens; quia neutrum secum haberet omne bonum per se appetibile; immò extra quodlibet illorum daretur bonum ex natura sua maximum, quod etiam in 1. part. Theologiæ ostensum fuit, repugnare euidenter.

Arg. 1. Deus est finis simpliciter vltimus, sed aliquis proponere sibi potest plures Deos; ergo & plures fines vltimos.

Resp. dist. min. Plures Deos sibi proponere &c. absolutè supremos omnium dominatores, nego: quorum vnus sit inferior, & alter superior, vel qui in creaturas diuersa habeant dominia, vt somniarunt antiqui idolatræ, conc. min.

Contra. Aliquis potest fingere duo suprema numina, quorum vnum alteri non sit subditum, ergo poterit vtrique impendere suum amorem, ac proinde velle duos fines vltimos &c. ant. patet. Eò quia si talis fictio repugnat, maximè quia pluralitas Deorum est impossibilis, sed hoc non obstat, plura namque impossibilia per modum possibilium finguntur: consequentia est euident, quia voluntas amare potest omne id, quod amandum ei intellectus ostendit.

Resp. conc. ant. & neg. conf. Etenim licet talis fictio ex parte intellectus concedi possit, nihilominus cum à fingente optimè cognoscatur non esse reuerà duo numina suprema, sed conficta, nunquam eius voluntas mouebitur ad illorum amorem absolutè; aliud namque est, posse fingi ab intellectu, aliud posse à voluntate amari, & esse obiecta appetibilia absolutè; sed, dato etiam, quod voluntas sefferet in duo numina ficta, tenderet tantum partialiter in vtrumque, ac proinde non in duos totales, & vltimos fines.

Arg. 2. Si homo non posset operari propter duos fines totales, & adæquatos, ergo non posset desiderare duo aliqua bona sub disiunctione v. g. Doctoratum, vel Episcopatum tali voluntatis affectu, vt si alterum haberet, nihil amplius desiderandum superesset, & in hoc casu in quolibet illo-



rum vltimum finem constitueret, sed hoc non videtur impossibile, ergo non est impossibile, duos fines &c. Resp. neg. suppositum, quia implicat concipere alterutrum, vt bonum sibi sufficiens, & vt vltimum finem.

Arg. vltimò. Non sæpè duos fines vltimos quis sibi constituit de facto; ergo & de possibili. Ant. probari posset multis exemplis, sed maximè duobus. Primo in eo, qui actu fertur in plura obiecta mortalia nullum inter se habentia subordinationem; hic enim duos fines vltimos actualiter sibi constituit. Secundo in iusto venialiter peccante, qui habet pro vltimo fine, & Deum, & creaturam absque vlla dependentia vnius ad alterum, ergo idem homo potest ferri simul in duos fines simpliciter vltimos.

Resp. neg. assumptum; Vnde ad primum de peccato mortali resp. eum, qui peccat mortaliter, non ponere vltimum finem in creatura formaliter, & propria intentione; non enim illum diligit sic, vt se, & sua omnia in illam referat, & expressè, & formaliter illam amet, vt obiectum sibi sufficiens, sed interpretatiuè tantum, seu imputatiuè, quatenus propter bonum creatum deserit suum finem vltimum, & bonum illud præfert diuinæ amicitiae, ac proinde interpretatiuè censetur diligere plus creaturam, quam Deum &c. Quare dum dicimus voluntatem non posse appetere, seu velle duos fines &c. intelligendum est de propria, & formali ratione; interpretatiuè autem, & secundum moralem imputationem, id non apparet repugnare. Ex qua responsione patet, quid sit dicendum de peccato veniali; Nam qui peccat venialiter particularem finem constituit in creatura, quam diligit propter se, non verò vltimum finem humanæ vitæ; quia tunc, neque hunc finem constituit in creatura, explicitè apprehendendo illam esse summum bonum, immo nec interpretatiuè, quia cum quis peccat venialiter non ob id se excludit ab amicitia Dei, ac proinde dici nequit operari ac si iudicasset vltimum suum finem non esse in Deo. Pro complemento huius disputationis superest, vt ponamus quædam quæsitâ ad hanc præsentem materiam spectantia.

Itaque queritur 1. Quid sit consilium.

Resp. Consilium est inquisitio rationis ante iudicium de eligendis. Explicatur: electio consequitur iudicium

rationis de rebus agendis, in rebus autem agendis magna incertitudo inuenitur, quia actiones sunt circa singularia contingentia, quæ propter sui variabilitatem incertæ sunt. Quare in rebus dubijs, & incertis ratio non profert iudicium absque inquisitione præcedente; vnde Arist. lib. 3. Eth. cap. 8. ait, electionem esse appetitum præcon-  
siliari.

Quæres 2. Quid sit deliberatio.

Resp. est consilium de eligendis post inquisitionem eorum, quæ sunt ad finem, vel est iudicium determinatum consequens eligendorum inquisitionem de medio aptiori usurpando ad finem obtinendum.

Quæres 3. Quid sit consensus. Resp. est actus voluntatis acceptantis, & approbantis medium ab intellectu sibi propositum, quatenus conueniens ad finem obtinendum. Duplex autem diuidi solet consensus, alius formalis, seu explicitus, seu expressus, & est actus expressus voluntatis, quo formaliter consentit iudicio intellectus. Alius tacitus, qui dicitur etiam interpretatiuus, & implicitus, & est quando intellectus sufficienter aduertit aliquid boni, vel mali, nec tamen contradicit voluntas; vnde iuxta illud tritum axioma. Qui tacet consentire videtur; v. g. si insurgat in nobis aliquis motus iræ, vel vindictæ, quem tenemur reprimere, si non obstemus, imò delectemur, in huiusmodi appetitum consentire censemur.

Quæres 4. Quid sit electio. Resp. quod electio sumitur dupliciter; Primò improprie pro receptione vnius alio relicto, & de hac hic non est sermo; Secundò proprie, vt supponit consilium, & deliberationem, quæ sic describitur; Est actus voluntatis acceptantis vnum medium ab intellectu propositum quatenus conueniens ad finem obtinendum. Hinc colligitur consensum, & electionem, differre inter se secundum magis, & minus, omnis enim electio est consensus, non tamen consensus est electio. Quare differunt aliquando realiter, prout consensus est sine electione, aliquando formaliter prout vna, & eadem actio diuerso modo spectata, modo electio, modo consensus appellatur consensus quidem quatenus voluntas acceptat medium ab intellectu sibi propositum; electio verò quatenus vnum medium præ alijs amplectitur.

Quæ-

Quæres 5. Vtrum electio sit tantum eorum, quæ sunt ad finem, an etiam quandoque ipsius finis.

Resp. esse tantum de his quæ sunt ad finem, etsi quandoque finem concernat, non concernit vt finem vltimum, sed quatenus ad vltiorem finem ordinari potest; Vnde Arist. lib. 3. Eth. dicit voluntatem esse finis, electionem verò eorum, quæ sunt ad finem.

Quæres 6. Vtrum in Brutis, & Pueris sit electio.

Resp. neg. ex Arist. 3. Eth. c. 2. colligitur pariter ex D. Gregorio Nisseno lib. 5. c. 4. dicente, *Pueros, & irrationalia voluntariè quidem agere, sed etiam spontaneè, & non coactè, non tamen esse eligentia*; & hoc patet, nam electio antecedit deliberationem, vt habetur 3. Eth. c. 3. & ibidem docet electionem esse eorum, quæ in nobis sunt consultatiua appetitio: sed in Brutis, & in pueris neque est consultatio, neque deliberatio, ergo nec electio.

Quæres 7. Quid sit imperium, & vsus, & an reperiantur in Brutis. Resp. 1. Imperium est actus voluntatis imperantis sibi ipsi, & alijs potentijs in executione mediorum ad finem, quæ quidem definitio patet ex dictis.

Resp. 2. Vsus est actus voluntatis alias potentias mouentis ad finem propositum efficaciter obtinendum; quæ descriptio, vt clarior fiat; obseruandum, quod sicut duplex est applicatio, altera actiua, quæ est à voluntate, altera passiuæ, quæ est in facultate; ita duplex est vsus actiuus, qui nil aliud est, quam actus voluntatis mouentis cæteras potentias sibi subditas ad agendum, & passiuus quia est ipsa facultatis electio prout à voluntate mouetur, quo supposito hic de actiuo solum est sermo, nam agitur tantum de actibus elicitis voluntatis, qualis non est vsus passiuus. Resp. 3. In Brutis non est imperium, neq; vsus. Prob. respons. Ad imperium namque requiritur voluntas, quæ habeat dominium in cæteras potentias, & ad vsum requiritur applicatio libera aliarum potentiarum ad suas actiones cum dominio, quæ non reperiantur in Brutis. Deinde imperium supponit electionem, vel consensum; vsus pariter eadem postulat, cum sequatur imperium prius enim est imperium, vt etiam habetur ex D. Damasc. lib. 2. Orthodoxæ Fidei cap. 23. dicente, *quod impetus ad operationem præcedit vsus*; sed impetus fit per imperium ergo &c.

Quæ-

Quæres denique. Quid sit fruitio, & quod nam eius obiectum. Resp. 1. Fruitio est actus voluntatis circa bonum possumum formaliter consistens in amore amicitiae, non autem in assecutione obiecti, nec in delectatione, quæ percipitur ex ipso; nam talis delectatio, se habet velut passio profluens à fruitione ita Scotus in 1. dist. 1. q. 3.

Resp. 2. Obiectum fruitionis in communi est finis, ut communis est ad finem verum, qui est solus Deus, & ad finem apparentem, ut sunt diuitiae, & voluptates, & ad finem præfixum, qualis est ille quem sibi peccator præfigit de quibus omnibus latè in p. 1. disp. de beatitudine.

## DISPUTATIO IV.

*De bonitate, & malitia morali actus humani.*

### QVÆSTIO I.

*Quid sit bonitas, & malitia moralis.*

**N**Ot. ex Scoto in 2. dist. 40. q. 1. quod in actu humano duplex bonitas reperiri potest, altera naturalis, & est illa, quæ importat integritatem, seu aggregationem eorum, quæ ei competunt secundum rationem, seu entitatem physicam: Altera moralis, & hæc importat integritatem, & aggregationem eorum, quæ secundum rectam rationem eidem inesse debent. Similiter malitia, alia naturalis, alia moralis. Prior est, quæ dicit carentiam eorum, quæ actui competunt secundum entitatem physicam. Posterior est carentia eorum, quæ inesse debent actui secundum rectam rationem. Vnde bonitas moralis sic ex Scoto quolib. 18. & 2. dist. 7. & alibi describitur: Est integritas, & aggregatio omnium, quæ recta ratio dicat, actui debere inesse, & malitia è contra. Talis autem descriptio bonitatis, est bonitatis moralis fundamentalis; ut aduertit Mastrius: eo quia bonitas pro formali importat, ut docet Scotus in 1. dist. 17. decorem quemdam illius actus, qui includit illam integritatem, seu quod idem est, importat totalem convenientiam, & integram conformitatem actus ad rectam rationem consurgentem ex eorum aggregatione; similiter de-

descriptio malitiæ intelligitur de fundamentali, nam pro formali importat defectum illius decoris, & conuenientiæ ad rectam rationem, quam præsefert bonitas.

I. Concl. Bonitas moralis est conuenientia actus liberi cum natura rationali, vt est talis, seu quatenus operatur ex ratione. Est Scoti loc. cit. & alibi D. Bonau. & aliorum, vt notat Herincx disp. 5. quæ sic eam probat. Bonum relatiuè sumptum idem est, quod alicui conueniens; ergo bonum morale actus idem est quod conueniens illi naturæ, quæ moralis denominationis est capax, qualis est sola natura rationalis vt talis, ac proinde bonitas moralis est conuenientia prædicta.

II. Concl. Malitia moralis est disconuenientia, seu repugnantia actus liberi cum natura rationali quatenus tali. Est Scoti quol. 18. & videtur communis. Prob. Malitia moralis est constituenda per ordinem ad eundem terminum ad quem opponitur ei bonitas: nam sic discurrendum est de malitia morali vti de bonitate, ergo est disconuenientia seu repugnantia actus liberi cum natura rationali. Quæ quidem disconuenientia statuitur in priuatione, seu quasi priuatione morali, vt docet Scot. in 2. dist. 37. q. 1. non est tamen considerata carentia hæc instar priuationis physicæ, & strictè acceptæ, quæ est absentia formæ à subiecto capaci, nam actus potest esse malus, etsi oppositæ bonitatis non sit capax. Itaque est priuatio moralis consistens in hoc, quod bonitas, quæ deest, sit debita; debita inquit, nonnulli, ipsi potentiæ, quæ deberet versari circa Deum v. g. amando, non odiendo, posito quod velit circa huiusmodi obiectum versari, velut alij docent, debita ipsi actui v. g. odij, cui etsi competere simpliciter nequeat conuenientia, seu bonitas amoris, debetur tamen ex suppositione, quod informare velit, vt ita dicam voluntatem liberam: Ita discurret Herincx loco supracitato.



*Vtrum moralitas actus humani statuatur nedum  
in dirrectione, seu dirrigibilitate à recta ra-  
tione, sed etiam in libertate.*

**N**Ot. Quòd celebris est controuersia inter Theologos de hac quæst. quare diuersæ sunt sententiæ. Prima affirmat moralitatem importare solam regulabilitatem actus à recta ratione præscindendo à libertate: Ita Valent. cum quibusdam Thomistis opinari videtur disp. 2. q. 13. punct. 1. Altera sententia putat, moralitatem esse solam libertatem actus humani. Ita Durand. 2. dist. 28. q. 1. art. 1. quem sequuntur plures Recentiores, vt Suarez, Auerſa, Selaſ, & alij, declarantes id esse intelligendum de libertate morali, & non physica tantum. Tertia sententia, quæ est communior, & verior, docet moralitatem actus humani formaliter importare directionem, seu dirrigibilitatem actus liberi à ratione consulente, & præcipiente, prohibente, vel permittente, connotare autem libertatem, seu includere in obliquo, vel tanquam fundamentum totius generis moris, vel tanquam rationem, seu conditionem fundandi; & hanc tenet Scotus pluribi, & signanter in tertio dist. 30. vbi docet, actum bonum cum deliberatione fieri debere, & à directione deliberationis dici humanum, & imputabilem; Idem docet D. Bonau. in 2. dist. 41. art. 1. q. 2. vbi dicit, actum esse moralem, quia est in potestate voluntatis præuia cognitione, quæ sit regula, quam quidam sententiam amplectuntur passim Recentiores, qui in eo solum discrepare videntur, quod quidam contendunt, moralitatem intrinsecè, & in recto vtramque illam habitudinem importare in actu humano, vt Zumel. p. 1. q. 14. art. 13. & Coninch. tract. de actibus humanis disp. 1. dub. 2. Alij verò volunt, quod actus humanus solam habitudinem ad rationem dirigentem includat in recto, libertatem verò tantum in obliquo, & pro connotato, seu pro fundamento moralitatis.

I. Concl. Moralitas in actu humano nec solam dirrigibilitatem à recta ratione importat, nec solam eius libertatem, sed ytramque simul, rationem quidem dirrigentem  
in



in recto, libertatem autem in obliquo, seu pro connotato. Est Scoti loc. cit. D. Bonau. & plurimorum extra nostram scholam. Prob. 1. pars. Dantur actus, qui regulantur, & regulabiles sunt à ratione, puta actus beatifici amoris Dei in Beatis, qui non habent moralitatem actus humani; ergo moralitas actus humani adæquatè non consistit in sola regulatione rationis: ant. pat. quia actus beatifici non sunt liberi proximè, sed necessarij, neque sunt præmio digni, ac proinde non sunt morales.

Prob. 2. pars. Si in sola libertate confisteret adæquatè moralitas actus humani, non posset in aliquo actu variari ipsa moralitas quoad bonitatem, vel malitiam: sed consequens est falsum, ergo & ant. Prob. min. Demus Titium feria 5. paulò ante mediam noctem incipere manducare carnes, & hunc actum continuare vsque post mediam noctem; tunc sic discurre. Talis manducatio carnis ante mediam noctem potest habere moralitatem actus boni, si v. g. fiat ex obedientia, & ex indigentia: At post mediam noctem habet moralitatem actus mali; quia est contra præceptum Ecclesiæ; ergo potest variari moralitas in aliquo actu humano absque variatione libertatis: ergo &c. Præterea existente vna sola libertate idem actus potest habere plures species bonitatis, & malitiæ ex obiecto, & circumstantijs, vt patet de furto commissio in loco sacro; at si ratio communis, & generica moralitatis esset posita in sola libertate, variata vna specie moralitatis, variaretur sine dubio libertas, quæ vt ratio generica esset essentialiter inclusa in qualibet specie moralitatis, ergo &c.

Prob. concl. quoad 3. part. Non est sola regula rationis, nec sola libertas, ergo sequitur, quod sit vtræque, & probatur sic. Ratio moralitatis in communi, seu generica diuiditur tanquam in duas species diuersas moralitatis, nempe in bonitatem, & malitiam, sed bonitas, & malitia dicunt habitudinem peculiarem ad rationem, prout ratio comprehendit & regulam rationis, & libertatem: ergo moralitas, quæ est ratio communis, & generica ad illas debet esse posita in habitudine ad principia moralitatis, hoc est ad regulam rationis, ac voluntatis libertatem: quod insinuat Arist. 2. Eth. c. 4. vbi docet, quod inter cætera, quæ postulatur, vt actus sit moralis, vnum est, quod fiat

ex electione; qui enim operatur studiosè debet operari sciens, eligens, & propter ipsum; ergo vtrique requiritur ad moralitatem.

Verùm hæc ratio concludit de vtrique in recto potius, & ex æquo, quam in recto, & in obliquo; vnde si velimus tenere, vtramque exigi in recto, non recedimus à Scoto, quia de hac re eius mens non est certa. Confirmatur conc. ex Scoti doctrina, docentis in 4. dist. 14. q. 3. quod actus dicuntur morales à consuetudine, siue à more, quatenus per eos assuescimus sic, vel sic operari; sed posse assuescere nobis comperit tantum secundum actus liberos, non vero naturales, qua ratione lapis ob iteratum descensum non dicitur assuescere; ergo moralitas actus humani non solum importat dirrigibilitatem, vel solam libertatem, sed vtramque, vel ex æquo, vel saltem vnā in recto, idest rationem, & aliam in obliquo idest libertatem, tanquam fundamentum præuium, ad cuius positionem sequitur adæquata ratio moralitatis.

II. Concl. Libertas actualis siue directa, siue indirecta, siue expressa, siue interpretatiua est necessaria ad moralitatem, tanquam fundamentum; libertas autem aptitudinalis non sufficit. Prob. 1. pars. Nam omnis moralitas actualis est meritoria, vel demeritoria, laudabilis, vel vituperabilis, sed hæc consistere nequeunt sine actuali libertate; ergo libertas actualis est necessaria &c. Prob. 2. pars. Quia si sufficeret libertas aptitudinalis, ergo actus ex eo quod esset moralis, esset etiam bonus, vel malus; sed hoc est absurdum, vt patet de homicidio facto ab ebrio, & ab ipso non præuisum, ergo &c.

Arg. cont. 1. concl. probando moralitatem in sola libertate consistere ex Scot. in 2. d. 40. §. de 2. dico, docente actum dici moralem, quia liberè elicitum, & quod 18. actum esse imputabilem, quia est in potestate voluntatis; ergo &c. Resp. Scot. non excludere dirrigibilitatem à ratione, imò illam præsupponere, quia libertas consistere nequit sine cognitione eius, quod operatur. Vnde amentes, sicut sunt vsu rationis priuati, sic nec habere possunt vsum libertatis, quæ præexigit rationem regulantem. Itaque sola libertas non est sufficiens, sed requiritur etiam regula rationis.

Contra. Actus eo ipso, quod est liber, est moralis; ergo moralitas, & imputabilitas formaliter consistit in sola libertate: Prob. ant. Actus liber quatenus liber distinguitur ab actu necessario: sed actus necessarius quia talis non est moralis, nec imputabilis; ergo actus liber quatenus liber erit moralis, ac proinde in sola libertate stat moralitas.

Resp. conc. ant. & neg. conf. ad probat. dist. mai. actus eo ipso, quod est liber, est moralis, & imputabilis ratione solius libertatis voluntatis, adeout eius libertas sit totale principium moralitatis, nego, simul cum recta ratione regulante, & ostendente, quid agendum, & non agendum, conc. mai. Vnde quando dicitur moralitatem consistere in libertate includitur etiam regula rationis, alioquin non esset libertas sufficiens ad moralitatem.

Arg. probando non requiri libertatem necessario ad ponendum actum moralem. Actiones Christi etiam præceptæ fuerunt morales, quia moritoria, non tamen fuerunt libera, aliàs peccare potuisset eas omittendo: similiter visio beata, & fructio sunt actus morales, & tamen sunt actus necessarii; ergo &c. Resp. quod Christus ex privilegio fuit simul viator, & comprehensor, ac proinde speciali modo merebatur, & operabatur; regulariter tamen loquendo, seu de lege ordinaria est necessaria libertas proxima exercitij in actu ad fundandam bonitatem, & malitiam moralem; esto in Christo ex privilegio fuerit tantum libertas remota, quia non erat simpliciter viator, sed etiam comprehensor. Ad illud de actibus beatificis dicitur non reperiri in eis bonitatem moralem, de qua hic loquimur, sed rectitudinem quandam naturalem: immò quia Beati sunt aliquo modo liberi saltem libertate intrinseca, & remota, concedi potest ipsis actibus beatificis aliqua bonitas tali libertati proportionata; qua ratione docuit Scot. loc. cit. actum beatificum v. g. Michaelis posse à Deo acceptari velut meritorium, ac proinde eadem ratione dici potest maxima laude dignus.



## QVÆSTIO III.

*Vtrum bonitas, & malitia sint differentia essentialis actus humani.*

**N**ot. 1. Quòd moralitas, vt sic, se habet veluti genus ad bonitatem, & malitiam moralem, ac proinde istæ sunt species ipsius generis moralis. Vnde cum bonitas sit species moralitatis debet ex parte generis importare id, quod importat moralitas, idest modum illum habitudinis, in quo moralitatis essentia collocatur; ex parte autem differentia nil aliud potest addere, nisi quod talis habitudo sit ad obiectum, vt consonum regulis morum, & maximè, quia per hoc distinguitur à malitia, quæ respicit obiectum dissonum. Verùm si bonitas, & malitia, comparentur ad actum humanum; tunc non se habent, nisi tanquam quid extrinsecum, & velut accidentia ad subiectum, quod afficiunt, vt clarius patebit infra &c.

Not. 2. Quod, vt supra significatum fuit, moralitas actuum humanorum consistit formaliter in habitudine, seu relatione actus liberi ad regulas morum; hæc autem relatio non est rationis, vt quidem non rectè sentiunt, sed est realis; conuenit enim actibus humanis independenter ab omni operatione, & fictione intellectus, cum reuerà, & à parte rei actus humani sint boni, vel mali, meritorij, vel demeritorij, laude, vel vituperio digni. Cæterum huiusmodi relatio non est prædicamentalis, sed transcendentalis, quia relatio prædicamentalis respicit terminum, vt purè terminum, habitudo autem ad obiectum vt regulabile, in qua moralitas actus humani consistit, non respicit illum, vt purum terminum, sed vt specificatiuum, & causam formalem extrinsecam. Tum quia relatio prædicamentalis dependet ab existentia termini, quo deficiente euanescit, moralitas autem non sic, potest namque dari actus complacentiæ de bono præterito, bonus, & delectatio morosa de actu præterito malo, peruersa.

Not. 3. quod præsens quæstio mouetur præsertim de actibus ab ipsa voluntate elicitis, nam de imperatis, qui ab alijs potentijs fiunt, satis patet distinctio moralitatis ab entitate physica. Vnde experientia constat, vnum, &

eundem actum externum in esse naturæ per diuersas moralitatis species vagari, propria entitate inuariata, & ab una in aliam transire, & consequenter non possunt bonitas, & malitia se haberi ad tales actus, nisi vt quid accidentale. Circa quam quæstionem sic explicatam sunt tres opiniones. Prima putat, moralitatem esse actui libero essentialem, adeout ille actus, qui non est moralis, non possit manens idem essentialiter acquirere aliquam moralitatem, siue bonitatis, siue malitiæ ita Granad. p. 2. tract. 9. disp. 2. citans pro sua opinione plures Doctores. Secunda admittit in actibus, qui versantur circa obiecta delectabilia, quæ talia præcisè, moralitatem esse accidentalem, quibusdam tamen asserit esse essentialem: & sunt ij actus, qui bonitatem, vel malitiam ex obiecto desumunt ita Arioga. Tertia sententia est D. Bonau. in 2. & Scoti in 1. dist. 17. q. 3. & Scotistarum, quam passim Doctores amplectuntur; ideo sit iuxta mentem Scoti.

Concl. Bonitas, & malitia non sunt differentię essentialis actus humani, neq; secundum eius entitatem physicam, neque in genere moris; Prima pars, vt notat Herincx, est contra quosdam Thomistas; Secunda est contra superiùs recensitos. Prob. 1. pars. Bonitas, & malitia, possunt ab actu separari, manente eadem entitate actus, si videlicet actus desinat esse liber, sed quod potest separari ab aliquo nequit esse essentialis respectu eius: ergo bonitas, & malitia non sunt differentię essentialis actus humani, nec proprietates, sed accidentia communia actus humani in esse physico; potest namque idem actus specie, & numero de necessario fieri liber, & è contra, vel ex defectu attentionis circa obiectum, vel ex defectu aliarum circumstantiarum, puta inaduertentiæ, inconsiderationis, motus primi &c. Prob. 2. pars. Actus etiam moralis potest de bono fieri indifferens, aut malus, vt de actu externo est certum; comestio namque carnis incæpta ante mediam noctem feriæ sextæ non est mortalis, & continuata post mediam noctem est mala mortaliter; ergo bonitas, & malitia nec quidem actus humani in genere moris sunt differentię essentialis.

Confirm. esse morale actus constituitur ex dictis per libertatem, sed libertati prout consistit in ipsa voluntate

accidit bonitas, & malitia, ergo & actui spectato in esse morali; quod enim accidit formæ constitutiue actus in esse morali, etiam accidit actui ita constituto; sicut sequitur; albedinem accidere homini, ut sic, quia accidit rationali, quod est differentia hominis constitutiua.

Arg. 1. Veritas, & falsitas sunt differentie per se actus intellectus, ergo similiter bonitas, & malitia respectu actus voluntatis. Resp. neg. ant. quia etiam veritas, & falsitas sunt accidentia actus iudicariui, ut sic, qui probabilius potest de vero transire in falsum, & è contra.

Resp. 2. conc. ant. & neg. conf. Quia veritas, & falsitas ex solo obiecto, bonitas autem, & malitia insuper ex libertate, & conscientia operantis, & alijs circumstantijs pendet.

Dices, etiam malitia, & maximè bonitas actus humani desumitur ab obiecto. Resp. non desumi à solo obiecto, sed etiam ab operante, & ab alijs circumstantijs; & dato etiam, quod bonitas ex obiecto competeret essentialiter, attamen quia ab illa sola non dependet bonitas moralis, hinc fit, bonitatem, & malitiam secundum omnia ad ipsas concurrentia accidere actui humano.

Contra. Aliqui actus humani sunt essentialiter, & intrinsecè boni, ut actus virtutum Theologicarum, alij intrinsecè, & essentialiter mali, ut odium Dei, blasphemia &c. ergo &c. Resp. neg. assumptum. Quia neque actus supradicti sunt ita necessariò boni, vel mali, ut nequeant bonitate carere, vel malitia morali, cum possint desinere esse liberi. Dicuntur tamen esse boni priores actus intrinsecè ob bonitatem illorum obiectiuam, ex qua fit, ut eo ipso, quod liberè exercentur, sint conformes rectæ rationi, nulla circumstantia extrinseca requisita v. g. lege positiua eos præcipiente. Posteriores autem dicuntur intrinsecè mali, quia eo ipso, quod exercentur liberè, sunt necessariò moraliter mali, etiam seclusa lege positiua, qua prohibentur. An autem respectu talium actuum, si considerentur in genere moris, possit dici bonitatem, & malitiam esse conditiones essentielles, aut saltem necessariò consequentes, parum refert, nec de hoc est inter nos, & alios Auctores specialis controuersia; ita discurret noster Herinx p. 2. disp. 3. q. 2.



Quætes 1. Vtrum idem actus humanus, tam internus, quam externus bonus possit successiue affici malitia morali. Resp. affirmatiue quoad vtramque partem ex Scoto quol. 17. quem sequuntur Scotistæ, & plures Recentiores extra nostram Scholam. Prob. 1. pars, & 2. simul. Ex dictis bonitas, & malitia non sunt differentiæ essentiales actus humani, ergo idem actus entitatiue affici potest modo bonitate, & modo malitia morali.

Prob. etiam specialiter 1. pars. Potest quis habere actum elicitum per ignorantiam, seu inaduertentiam circa obiectum in se malum, & eundem actum continuare, accedente iam ignorantia vincibili. Demuse. g. sacerdotem missam celebrantem ignorare inuincibiliter hanc Ecclesiam esse interdictam, postea verò aliquid audit de interdicto, negligit tamen de eo inquirere, & perseverat in eadem prima volitione; in tali casu idem numero actus entitatiue erit successiue bonus, & malus, ergo &c. dixi successiue, eò quia fieri non potest, vt idem actus humanus internus, seu elicitus possit simul, & semel affici bonitate, & malitia morali intrinseca; *bonum namque ex integra causa*, vt docet D. Dionys. cap. 4. de diuinis nominibus.

Prob. 2. pars. Nam, vt supra tactum fuit, potest quis incipere carnes manducare ante mediam noctem feriæ sextæ, & continuare talem manducationem etiam post mediam noctem, sed in tali casu idem actus externus, nempe comestio, qui erat bonus, accedente tempore, quo lex prohibet carnis comestionem, euadit malus, ergo idem actus externus &c.

Quætes 2. An eidem actui externo competere possit bonitas, & malitia respectu diuersorum operantium, iminò & eiusdem operantis. Resp. quod 1. pars quæsitæ videtur certa. Donatio enim eleemosynæ, quatenus procedit à domino ex fine vanæ gloriæ, vel fornicationis, est mala, quatenus autem procedit à famulo ex pio affectu misericordiæ est bona; similiter passio Christi erat mala respectu Crucifigentium, & bona respectu Christi patientis, ergo &c.

Prob. 2. pars; quæ videtur esse contra communem sententiam, eam tamen docuit Almainus, & sequitur Arriaga dicens inter Recentiores esse communissimam, vt refert noster Herincx, qui sic eam probat. Potest idem actus ex-

ternus imperari per diuersos actus internos, quorum vnus est bonus, & alter malus; ergo in isto opere externo simul erit bonitas extrinseca, & malitia extrinseca alterius actus interni mali, ac proinde erit idem actus externus bonus, & malus etiam respectu eiusdem operantis, vt patet de eleemosyna imperata principaliter ob subleuationem, & pietatem pauperis, & secundariò etiam ob vanam gloriam.

#### QVÆSTIO IV.

*Vtrum actus humani desumant bonitatem, vel malitiam ex obiecto.*

**N**ot. 1. Quòd bonitas moralis duplex est, vna dicitur formalis, seu actualis, quæ reperitur in ipso actu, & qua actus dicitur formaliter bonus; altera dicitur obiectiua, quæ reperitur in obiecto, & constituit rem, in qua est, obiectum bonæ actionis moralis. Verùm obiecta sunt in triplici differentia; alia sunt obiecta ex sui natura bona, & honesta, alia ex sui natura mala, & inhonesta, alia denique ex sui natura neque bona, neque mala, sed indifferencia ad bonitatem, & malitiam. Prima sunt amare Deum, dare eleemosynam, amare parentes &c. Secunda sunt odire parentes, furari, fornicari &c. Tertia sunt ambulare, spueri, leuare festucam, & similia.

Not. 2. Quod bonitas obiecti, nec in vtilitate, nec in delectabilitate, sed in honestate consistit, ac proinde obiectum non dicitur bonum moraliter, quia est vtile, & delectabile, sed quia honestum. Bonum enim vtile, & delectabile possunt esse obiectum bonæ, & malæ actionis, quia non amantur propter se, sed propter aliud: quare si est vtile ad assequendum finem honestum, tunc erit bonum, si ad finem inhonestum, & turpem, erit malus. Similiter delectabile, nequit per se dare actui bonitatem moralem, quia sæpè, quod delectat, non est honestum, sed turpe; vnde bonum vtile, & delectabile reuocantur, vel ad bonum honestum, vel ad bonum inhonestum, & turpe.

I. Concl. Bonitas, & malitia actus humani desumuntur ex obiecto. Prob. hæc communis conc. 1. auct. S. Script. & signanter Osee cap. 9. *Facts sunt abominabiles, sicut et a, nunc di-*

*lexarunt*, ergo ex obiectis dilectis deriuatur actio humana abominabilis, vel laudabilis, quæ quidem rationes præsupponunt in actu, vel bonitatem vel malitiam, ex quibus oritur laus, vel vituperium, ergo &c.

Prob. ratione. Sicut in naturalibus prima, & specifica bonitas rei naturalis sumitur à forma, quæ dat illis speciem; ita in moralibus prima, & specifica bonitas moralis attendi debet à forma, quæ dat speciem actui humano; sed obiectum se habet vt forma dans speciem actui morali; ergo ab eo sumitur prima, & specifica bonitas moralis. Maior patet, min. prob. Omnis motus, & via ad terminum respicit ipsum tamquam propriam formam, quia comparatur ad eum veluti potentia ad actum, & sicut determinabile ad determinatum, sed actus est essentialiter via, seu tendentia in obiectum, ergo illud se habet vt forma dans illi speciem. Tum quia actus humanus tam in esse moris, quam in esse physico consideratus est essentialiter respectiuus; ergo debet sumere primam suæ moralitatis speciem ab eo, quod primariò respicit, quod est obiectum: hoc autem est intelligendum de obiectis ex natura suæ; vel bonis, vel malis, non autem de obiectis indifferentibus.

II. Concl. Ad hoc vt obiectum tribuat actui humano causaliter specialem bonitatem, vel malitiam debet ipsum per se, & citra conceptum alterius conditionis obiectiuæ habere specialem ordinem conuenientiæ, aut disconuenientiæ cum natura rationali quæ tali. Hæc est communis. Ratio est, quia vt ostensum est in prima Conclusionem; Nequit obiectum tribuere bonitatem, vel malitiam, nisi in se ipso illas radicaliter contineat, quatenus est vel honestum, vel turpe, ac proinde radicaliter conueniens, vel disconueniens rationi; alioquin nequit concipi, quomodo obiectum specialem bonitatem, vel malitiam actui tribueret. Hinc actui adulterij accedit specialis malitia iniustitiæ, ex eo quod mulier non sit propria, sed aliena.

Arg. 1. cont. 1. concl. Actus humanus sumit primam moralitatis speciem ab eo, quod primò respicit, sed primum, quod respicit est finis, obiectum autem est volitum propter finem; ergo actus humanus primam suæ moralitatis speciem non ab obiecto, sed à fine desumit.

Resp.


Resp. conc. mai. & dist. min. Est finis, qui coincidit cum ipso obiecto, conc. min. est finis, qui habet rationem circumstantiæ, nego.

Arg. 2. Vna, & eadem res potest esse obiectum boni, & mali actus; Deus namq; potest esse obiectum amoris, & odij, pecunia potest esse obiectum liberalitatis, & auaritiæ; ergo bonitas, & malitia actus nequit desumi ex obiecto. Confirm. Nam actus exterior v.g. largitio eleemosynæ est actus humanus, & bonus, sed huiusmodi actus non desumit suam bonitatem ex obiecto, quia nullum habet obiectum, sed ipsum potius est obiectum actus interni, ergo &c.

Resp. veram non esse maiorem de obiecto sumpto in genere entitatio, sed in genere moris, & secundum diuersas moralitates obiectiuas, quas vnum, & idem obiectum materiale habere potest ratione conuenientiæ, vel disconuenientiæ ad regulas morum. Aliud enim est obiectum materiale, & aliud formale in genere moris, vt infra patebit. Ad Confirm. negatur assumptum, eo quia obiectum actus exterioris, vniuersaliter loquendo, est illa materia circa quam versatur, quatenus subest regulæ rationis, puta largitionis eleemosynæ obiectum est pecunia, obiectum furti est res &c.

Arg. 3. Hic actus (Volo honestè viuere) est singularis, & determinatus in genere moris, & tamen eius obiectum non est determinatum, sed communissimum, ergo moralitas specifica actus humani non desumitur ex obiecto.

Resp. dist. ant. in esse rei est commune, & genericum, conc. ant. quatenus respicitur sub vno motiuo consonantiæ ad rationem, neg. ant. in hoc enim sensu accepto: Volo honestè viuere, est vnū in ratione obiecti, sicut obiecta scientiarum, habituum, & potentiarum, estò ampla, & diffusa, tamen, vt comprehenduntur sub vna ratione formali, ad vnitatem specificam in ratione obiecti pertinent.



*Vtrum actus humani aliquam bonitatem, vel malitiam  
desumant a circumstantijs.*

**N**ot. 1. Quòd circumstantia est accidens, seu conditio actus humani moralis, ipsum moraliter afficiens: actus autem humani circumstantiæ septem solent numerari, quæ hoc versiculo continetur. Quis, quid, ubi, quibus auxilijs, cur, quomodo, quando. Quis: significat qualitatem, seu conditionem personæ agentis, conferentem aliquid bonitatis, vel malitiæ ipsi actui per accidens coniuncti v. g. Quod operans sit Religiosus, coniugatus, ex officio, aut iustitia obligatus. Quid: denotat non rem seu obiectum, sed obiecti qualitatem conferentem aliquid bonitatis, & malitiæ &c. v. g. quod res furtiva sit sacra, quod percussus sit pater, aut clericus, quod ex furto sit damnum secutum &c. Vbi: denotat loci accidentariam conditionem conferentem &c. v. g. Quod in loco sacro fusus sit sanguis, vel semen; quod in loco publico sit scâdolosè peccatum &c. Quibus auxilijs denotat accidentaria media, & instrumenta actus humani, v. g. quod aliquid sit patratum ope Dæmonis, aut malefici, veneno &c. quod missa sit celebrata absque calice consecrato. Cur: denotat non intrinsecum finem operis, sed extrinsecum operantis conferentem &c. v. g. Quod eleemosyna data sit ad vanam gloriam, quod verba iocosa directa fuerint ad luxuriam, quod furtum sit commissum ad fornicandum. Quomodo: denotat modum accidentarium &c. v. g. quod actus sit commissus intensè, remissè, spontè, coactè, scienter, ignorantè, motu primo, vel secundo &c. Quando: significat accidentariam temporis conditionem conferentem &c. v. g. quod aliquid sit omissum, vel commissum tempore festi, interdicti, prohibitionis &c. Aliqui addunt octauam circumstantiam, nempe quoties, sed reuerà numerus non est indiuidui actus humani circumstantia, quasi similis actus secundus foret circumstantia primi, sed est multiplicatio similium actuum.

Not. 2. Quòd circumstantiæ sunt duplicis generis, aliæ dicuntur formales, quæ se tenent ex parte actus, vt intentio,

sio, remissio actus, maior, vel minor libertas, facilitas, vel difficultas in operando, duratio &c. Aliæ dicuntur obiectiuæ, quæ se tenent ex parte obiecti, vt maior, vel minor quantitas eleemosynæ, & huiusmodi sunt circumstantiæ loci, temporis, personæ. Vnde circumstantiæ priores augent bonitatem, vel malitiam in eadem specie, at posteriores, augent bonitatem, & malitiam in eadem specie solum, quando pertinent ad idem obiectum virtutis, vel vitij.

Not. 3. Quòd circumstantiæ se tenentes ex parte obiecti, aliæ dicuntur mutantes speciem actus, aliæ augentes eius bonitatem, vel diminuentes. Primæ sunt illæ, quæ spectant ad specialem virtutem, vel si spectent ad eandem virtutem quasi genericam, important tamen aliam, & aliam difformitatem, eo quia sub vna virtute, puta religionis sunt plures virtutes, veluti species sub genere, vt e. g. circumstantia Personæ sacræ, loci sacri, voti, iuramenti &c. Secundæ verò augent bonitatem, vel malitiam actus intra eandem speciem, quia non spectant ad diuersam virtutem; sic qui furatur decem nummos peiorem actum elicit, quam qui quinque tantum, licet non eliciat actum specie diuersum, & è contra de actu bono.

Cæterum placet adnotare, quod noster Doctissimus Marchant. in 1. tom. sui Tribunalis tract. tit. 3. q. 4. tradit diuisionem circumstantiarum in eas, quæ sunt meræ circumstantiæ, & sunt, quæ ita actum, vel opus circumstant, vt ad substantiam operis, vel actus nullatenus pertineant e. g. circumstantia Personæ sacræ &c. & in eas, quæ ab ipso appellantur mixtæ, quæ aliqua quidem ratione opus, vel actum circumstant; at sub alia ratione consideratæ verè ad substantiam operis, vel actus pertinent e. g. furtum mille aureorum, vel concubitus sacrilegus, quem cum moniali haberet religiosus; etsi enim vnum sacrilegium specie, ac numero sit ob circumstantiam voti; iniuria tamen, & violatio castitatis Deo promissæ, quæ est tam ex parte religiosi, ac monialis, pertinet, imò complet totam substantiam actus, siue operis, quatenus malum est, adeout ex duabus partialibus iniurijs vna totalis coalescat, & vtraque confitenda est in Sacramento pœnitentiæ: sed latius de hoc agetur, Deo adiuuante, in tractatu de peccatis.



I. Concl. Omnis actus humanus siue externus, siue internus habet aliquas circumstantias, à quibus desumit quandam bonitatem, vel malitiam diuersam ab ea, quam ab obiecto habet. Hæc constat ex Concil. Trid. sess. 14. c. 5. & Can. 7. ubi definitur: In confessione explicandas esse circumstantias, quæ peccati speciem mutant, sine quibus à pœnitentibus peccata integrè explicari nequeunt. Quare etsi Trid. loquatur de peccatis, & actibus malis, tamen ob paritatem rationis tenet à contrario de actibus bonis. Hanc eandem veritatem tradiderunt D. Thomas part. 2. q. 18. art. 3. & Scotus in 2. dist. 7. q. vnica §. ad solutionem, & quolib. 18. §. de 1. Prob. euidenti ratione. Nulla videtur esse actio humana, tam externa, quam interna, quæ ultra bonitatem, & malitiam primariam, & essentialem, quam habet ex obiecto, non habeat etiam aliquam accidentalem, & secundariam ex adiunctis, quæ adesse, & abesse potest, salua specifica bonitate, & malitia ex obiecto desumpta, vt experientia ipsa testatur; nam actus humanus ratione circumstantiarum redditur magis conformis, vel difformis regulis morum, ac proinde magis dignus laude vel vituperio; ergo &c.

Confirm. ex analogia ad res naturales, in quibus bonitas, & perfectio rei naturalis non solum à forma substantiali desumitur, sed etiam ex accidentibus; ergo à pari in genere moris, bonitas, & perfectio actus non solum sumitur ex obiecto, quod se habet instar formæ substantialis, sed etiam à circumstantiis, quæ sunt quædam accidentia ei adiuncta. Ratio autem a priori est, quia tales circumstantiæ possunt importare ordinem conuenientiæ, seu conformitatis, vel disconuenientiæ, seu difformitatis ad rationem diuersum ab eo, quem importat obiectum; non solum enim est disconueniens rationi furari, sed etiam furari in loco sacro &c.

II. Concl. Dantur circumstantiæ non solum aggrauantes bonitatē, vel malitiam intra eadem speciem, sed etiam nouam speciem addentes. Prob. quia circumstantia interdum dicit nouam, & specialem conformitatem, vel difformitatem ad rationem, interdum non; sed tantum auget, & perficit actum præexistentem, ergo &c. Cæterum, quoad circumstantias mutantes speciem, compertum est

ex Trident. plures reperiri in peccatis, vt etiam supra tactum fuit ideo &c.

III. Concl. Ad hoc vt circumstantiæ formales dent bonitatem, vel malitiam non est necesse, quod intendantur, neq; quod prænoscantur. Prob. Quemadmodum actus ipse voluntatis, vt sit voluntarius, non est necesse quod præcognoscatur, neque alio actu distincto sit formaliter, & expressè volitus, ita etiam ad hoc, vt circumstantia se tenens ex parte eiusdem actus, e. g. remissio, duratio &c. sit voluntaria, sufficit vt sit volita vt quo, sicut ipse actus, licet non sit volita, vt quod: Et hic modus voluntarij sufficit, vt tales circumstantiæ bonitatem, vel malitiam in actum refundant: ita Mastrius disp. 5. de actibus humanis q. 4. art. 4. Concl. 4.

IV. Concl. Vt circumstantia obiectiua tribuat actui bonitatem, vel malitiam debet esse aliquo modo cognita, & insuper debet esse volita, bonitas quidem directè, malitia saltem interpretatiuè; ita communis sententia Theologorum, teste Poncio. Prob. 1. pars. Nam bonitas, vel malitia obiecti, vt influat in actum, debet esse cognita; alioquin, qui furaretur rem in loco Sacro, committeret sacrilegium, estd ignoraret, quod locus, vel res esset Sacra.

Prob. 2. pars. A paritate bonitatis obiecti, quæ debet esse directè volita ad hoc vt influat in actum, ergo similiter bonitas circumstantiæ. Prob. 3. pars; nam sufficit, quod malitia obiecti sit indirectè, & interpretatiuè volita; ergo idem dicendum est de malitia circumstantiæ, quæ quidem malitia in praxi nequit præscindi; quia moraliter est necessariò annexa obiecto: e. g. nequit præscindi, neque ab actu interno malo, vel externo, circumstantia adulterij; adeo vt possit quis velle habere copulam cum tali muliere vxorata, & voluntate delectari de tali copula; ac si non esset vxorata; & tanto minus in actu ipsius copulæ. Cæterum licet generaliter sit verum nempe vt circumstantiæ obiectiue dent speciem, per se non requiri, quod intendantur; in aliquibus tamen per accidens enenire potest, quod debeant esse per se volite, & intentæ saltem materialiter. Quare pro maiori intelligentia obseruanda est doctrina, quam tradit Scotus in 4. dist. 22. q. 1. de circumstantijs aggrauantibus peccatum. Docet igitur quod

dam esse generales, quæ nimirum in omni peccato includuntur, vt inobedientia, ingratitude, contemptus aliqualis Dei, & similes; quasdam verò esse speciales, quæ non in quolibet peccato reperiuntur, sed speciali prohibitionem, qua prohibetur obiectum, cui per accidens adiunguntur. Itaque doctrina superius adducta venit intelligenda de circumstantiis specialibus, nam qui occidit Clericum, vel furatur rem Sacram, esset Sacrilegus, etsi nollet adesse tales circumstantias, non verò de circumstantiis generalibus, quæ ad hoc vt tribuant specialem malitiam actui, oportet, quod sint per se volitæ, & intentæ saltem materialiter, & ratio est, dicit Scorus, quia generaliter includuntur in omni peccato, vel tamquam passionibus, vel tamquam gradus generici, nam eo ipso, quod aliquis agnoscit actum hunc esse peccatum, & adhuc illud perpetrat, implicite, & indirecte vult omnes præfatas circumstantias, ac proinde non obligatur in confessione illas explicare. Verum si peccator esset tantæ peruersæ voluntatis, vt intenderet ex motiuo Deum offendendi, vel legi eius non subiiciendi, tunc peccatum speciales contraheret malitias distincte in confessione aperiendas, nempe iniuriæ Dei, inobedientiæ, superbix, contemptus diuinæ legis, & sic de alijs.

Dices. Quare si aliquis occidens Clericum, & agnoscens huiusmodi homicidium esse contra legem communem, contra legem gratitudinis non contraheret specialem malitiam ingritudinis inobedientiæ, contemptus &c. nisi deliberate intendat agere contra istas leges? Resp. ex Scot. in 4. dist. 17. q. 1. hanc esse rationem, eò quia circumstantia non dat specialem malitiam diuersam ab ea, quam dat obiectum, cui accidit, nisi speciali, ac diuersa prohibitionem sit verita, diuersamque dicat difformitatem ad rationem; cum igitur hanc specialem prohibitionem, ac difformitatem non habeant huiusmodi circumstantiæ generales, nisi quatenus sibi adiungi potest ab operante expressa intentio contemnendi beneficium acceptum, obuiandi præcepto, quæ præceptum est, hinc fit, quod refundere nequeunt specialem malitiam, nisi earum inhonestas specialiter intendatur.

V. Concl. Circumstantiæ interdum conferre possunt primam, & essentialem bonitatem, vel malitiæ speciem; tunc autem desinunt esse circumstantiæ, & transeunt in

rationem obiecti. Hæc pariter est communis, quæ solet explicari varijs exemplis; etenim si quis faciat eleemosynam per vanam gloriam, tanquam finem totalem, & particularem, tunc talis actio ex obiecto bona, euadit mala essentialiter ex circumstantia finis, non amplius retinens rationem circumstantiæ, sed transiens in rationem obiecti.

Similiter in actione indifferenti idem contingit, dum fit ex bono, vel malo fine, vt si quis studeat ob vanam gloriam, vel gloriam Dei, in his enim casibus finis extrinsecus (de quo, in quæstione sequenti magis patebit) confert actui primam speciem bonitatis, vel malitiæ, ac proinde rationem habet non circumstantiæ, sed obiecti.

## QVÆSTIO VI.

*Vtrum actus interior sumat bonitatem à fine extrinseco.*

**N**ot. 1. Quodd duplex finis potest intendi à voluntate, vnus intrinsecus, & proximus, qui est idem cum obiecto, & vocari solet finis operis; vt dare eleemosynam ob subleuationem pauperis, alius extrinsecus, & remotus, qui differt ab obiecto, & est precipue inter circumstantias, & vocatur finis operantis, vt docet Scotus in 2. dist. 30. vt si quis det eleemosynam ex fine pœnitentiæ, vel vanæ gloriæ; qui quidem finis non competit tali actui ex sui natura, sed solum ex intentione operantis. Hic autem nos loquimur non de fine intrinseco, sed extrinseco.

Not. 2. quod obiectum actus humani est id, in quod natura sua tendit, seu circa quod versatur, & dicitur materiale; formale autem obiectum est ratio, sub qua in obiectum materiale tendit actus, potentia, & habitus. Vtrumque autem hoc obiectum parziale efficit vnum totale, & vtriusque bonitas adesse debet, vt illam det ipsi actui. Quare si actus obiectum materiale sit bonum, formale autem malum, actus erit malus v. g. eleemosyna, & subleuatio miseræ alienæ facta ad fornicandum. Idem est dicendum, si obiectum formale sit bonum, materiale verò malum v. g. furtum commissum cum intentione dandi eleemosynam. Verum si obiectum materiale actus foret indifferens moris,

& for-

& formale bonum, tunc actus esset bonus, vt dictum est supra; & è contra. Quare omnes actus humani habentes idem obiectum formale sunt eiusdem speciei: estò habeant diuersa obiecta materialia, e. g. duo actus charitatis, quibus diligitur Deus propter se, & proximus propter Deum: è diuersò actus habentes idem obiectum materiale, & formale diuersum, distinguuntur specie, e. g. actus fidei, spei, & charitatis habentes idem obiectum materiale Deum sub diuersa ratione formali, nempe fides Deum vt primam veritatem reuelantem, spes vt summum bonum nostrum, charitas vt summum bonum per se idest ipsius Dei.

I. Concl. quando actus voluntatis ex obiecto est indifferens, & refertur ad finem bonum sub ratione boni honesti, tunc sumit ab illo bonitatem in aliqua specie. Ratio desumitur ab opposito. Quando actus refertur ad finem malum, seu turpem, tunc sumit ab illo malitiam in aliqua specie peccati; ergo si actus indifferens ex obiecto refertur ad finem bonum, seu honestum recipiet ab illo bonitatem in aliqua specie moris. Confirm. Nam electio mediij est eiusdem speciei cum intentione finis; ergo si finis est bonus, etiam medium indifferens sumet ab illo suam bonitatem.

II. Concl. Quando actus humanus ex obiecto est bonus, & refertur ab operante in bonum finem, adeout bonitas finis sit diuersæ speciei à bonitate obiecti, tunc sumit nouam speciem bonitatis ab ipso fine. Est Scoti quolib. 18. & in 4. dist. 14. q. 2. §. si queratur, vbi docet, actum vnius virtutis sæpè imperari ex motiuo alterius, & opus melioris virtutis factum propter eundem finem esse magis meritorium.

Prob. ratione. Actus ex obiecto indifferens, vt mox dicebamus, sumit bonitatem à fine, ergo etiam actus ex obiecto bonus, sumit à fine nouam bonitatem, bonitas namque obiecti non obstat, quin à fine possit nouam bonitatem participare.

Confirmatur à contrario: Actus ex obiecto malo sumit nouam malitiam à fine malo iuxta illud Eth. 5. c. 2. Qui furatur propter adulterium, magis adulter est, quam fur; ergo etiam actus ex obiecto bonus accipiet à fine bono nouam speciem bonitatis; non enim minus efficax est intentio finis boni circa bonam electionem, quam intentio mali finis circa malum electionem,

III. Concl.

III. Concl. Quando obiectum electionis est per se bonum, & proximè amatur propter eandem bonitatem, cum relatione ad alium finem extrinsecum habentem bonitatem formaliter distinctam, tunc species bonitatis ex obiecto desumpta est essentialis illi actui, desumpta verò ex fine est accidentalis. Ita Mastrius disp. 5. q. 4. art. 5. n. 237. de actibus humanis, eamque sic probat. Bonitas obiecti ex se sufficiens est dare actui speciem virtutis; ergo si actus proximè, & immediatè tendit in obiectum propter propriam ipsius honestatem, sumet ab eo primam, & essentialem virtutis speciem.

Confirmatur. Nam in tali casu applicari potest regula, quæ traditur de malitia, quia hæc species ex obiecto desumpta est inuariabilis in tali actu; voluntas enim dandæ eleemosynam propter illius honestatem, semper est in specie misericordiæ, siue referatur in finem pœnitentiæ, siue religionis, siue in quodcumque aliud bonum: è diuerso, quando quis furatur ad mechandum, cum actus furti nequeat esse sine malitia iniustitiæ, bene tamen sine malitia mechæ, dicendum est illam ex medio desumptam esse essentialem actui in genere moris, hanc verò ex fine desumptam esse accidentalem.

Dices: cum quis vult ieiunare, vel tribuere eleemosynam ad satisfaciendum pro peccatis, non intendit tale opus propter se, sed tanquam medium ad pœnitentiam; at medium, quæ tale, non habet rationem boni honesti, quæ soli fini conuenit, sed tantum boni vtilis; ergo talis actus non habet bonitatem moralem ab obiecto, quod immediatè respicit, sed à fine extrinseco tantum, ad quem ordinatur, ac proinde bonitas tunc non erit essentialis obiecto in genere moris, sed potius à fine recipiet &c.

Resp. neg. mai. & ratio est, quia ieiunium, vel eleemosyna facta, vel voluta ad satisfaciendum pro peccatis simul intenditur, & propter se proximè, & propter aliud, nempe propter pœnitentiam, ad quam ab operante ordinatur. Vnde non habet rationem puri mediij, nec puri finis, sed finis simul, & mediij, seu finis intermediij, cum sit bonum honestum ratione sui, & bonum vtile ratione ordinationis ad pœnitentiam, veluti ad finem extrinsecum, ac proinde prima bonitas erit actui essentialis.



*Vtrum idem actus voluntatis possit simul, & eodem tempore habere diuersas species moralitatis, & esse bonus ex obiecto, & esse malus ex fine, vel è contra, malus ex obiecto, & bonus ex fine.*

**N**ot. Quòd in hac quæstione sunt duæ sententiæ vna, affirmat posse simul consistere malitiam ex fine, & bonitatem ex obiecto in eodem actu voluntatis, ita Almai tract. 1. moral. cap. 12. Caiet. part. 2. quæst. 18. art. 9. Corduba in quæst. lib. 2. quæst. 23. & alij. Altera negat, & est communis inter Recentiores, eamque videtur docere Scotus quolib. 18. vbi ait iuxta sententiam D. Dionys. *Bonus ex integra causa* &c. bonitatem moralem consurgere debere ex integritate omnium, quæ ad actionem humanam requiruntur, ita vt vna sola circumstantia deficiente, totus actus deturpetur, & malus dicatur; sit ergo.

Concl. negatiua ad mentem Scoti, Mastrij loc. cit. num. 253. & aliorum extra nostram scholam. Prob. conc. 1. auct. D. Thomæ, qui consonat Scoto in 2. dist. 48. q. 1. art. 4. vbi sic docet. Cum quis dare vult eleemosynam propter inanem gloriam, hic est vnus actus voluntatis, & hic actus totus malus est, licet non ab omni eo, quod in eo est, malitiam habere, & ratio ipsa id clarè suadet; nam licet obiectum huius actus: Volo dare eleemosynam propter inanem gloriam materialiter, & in esse entis sit bonum, formaliter tamen, & in esse obiecti, & vt actum illum terminat, & specificat, non est bonum, sed malum. Tum quia habet rationem mediij ordinati ad malum finem, idest vanam gloriam, ac proinde non est conforme, sed difforme dictamini rectæ rationis, & prudentiæ. Tum etiam, quia tunc circumstantia finis mali transit in rationem obiecti specificantis, & finalizzantis, ergo actus non potest simul esse bonus ex obiecto, & malus ex fine, & è contra. Vnde qui furatur ad bonum finem, nempe ad dandam eleemosynam, non habet bonum finem, sed malum, quia est causa furandi, & ratio eligendi malum medium, à quo vitiatur finis, & ad eius speciem trahit.

Arg.

Arg. 1. cont. concl. In naturalibus bonitas naturalis aliquius rei consistere potest cum aliquo eius defectu, ut pater de homine, cui deest aliquis oculus; ergo etiam in moralibus bonitas essentialis, quæ sumitur ex obiecto poterit consistere cum malitia ex fine, vel alia circumstantia.

Confirmatur ex illa reg. iuris. Utile per inutile non vitiatur l. 1. ff. de verb. oblig. ergo si actus electionis ex parte mediæ est bonus, per malitiam finis non vitiabitur.

Præterea est maxima Theologorum: Posse actum excusari à tanto, & non à toto, ergo dari potest actus partim bonus ex obiecto, & partim malus, nempe ex fine, ac proinde actus erit bonus, & malus simul. Resp. ex Scoto quod. 18. duplicem esse bonitatem naturalem, aliam primariam, quæ dicitur entitativa, & essentialis, & est passio entis, aliam secundariam, & accidentalem, si in assumpto antecedenti intelligatur de bonitate secundaria negatur, quia etiam in naturalibus dicitur turpis illa facies, cuius una sola pars est deformis; si verò de bonitate primaria conceditur assumptum, & negatur paritas, quia cum perfectione essentiali stat defectus accidentalis; illa enim sumitur præcisè ab eo, quod est à parte rei, at bonitas moralis non sumitur ex obiecto, ut est à parte rei, sed ut est conformè, vel difforme regulis morum. Ad confirmat. resp. ex Alciato nobili Iurista in d. l. illud axioma veritatem habere in his, quæ separationem accipere possunt, qualis est actus constans ex pluribus partibus; falsum autem in indiuiduis, idest in opere, quod non accipit diuisionem sine corruptione.

Ad ult. neg. conf. Ex eo enim, quod actus excusatur à tanto, & non à toto, non sequitur aliquem actum moralem partim esse bonum, & partim malum, sed esse simpliciter bonum, vel malum, & totaliter; minoris tamen malitiæ potest esse ob aliquam circumstantiam diminuentem, ut fornicatio ex graui tentatione commissa.

Arg. 2. Circumstantia mala finis adiuncta obiecto honesto non tollit intrinsecam honestatem ipsius; ergo nec tollit, quin illam possit actui humano communicare in ipsum tendenti. Resp. dist. ant. Non tollit intrinsecam honestatem illius in actu primo conc. in actu secundo neg. ant. tollit itaque in actu secundo honestatem, quatenus impedit finis malus, ne refundatur in actum; obiectum namq. ho-

nestum non communicat honestatem suam actui, ut cumque in ipsum tendenti, sed eo modo, quo proponitur, ac præscribitur à prudentia, nempe, quod actus tendat in obiectum bene circumstantionatum, ut honestatem ab eo sumere possit.

## QVÆSTIO VIII.

*Vtrum actus externus addat aliquid bonitatis, vel malitiæ actui interno.*

**N**OT. 1. Quòd quando quærimus, an actus externus addat bonitatem, vel malitiam interiori, simul quærimus, an sit maioris meriti, vel demeriti actus internus simul cum externo, quam solus internus; nec loquimur de merito ex opere operato, quia sic certum est opus externum e. g. suscipiendi Sacramentum addere ex opere operato aliquid bonitatis actualis gratiæ, & virtutum, quæ propter solum actum voluntatis Personæ cupientis suscipere tale Sacramentum non confertur; sed loquimur de merito operantis. Insuper hæc quæstio intelligenda est de voluntate efficaci, quæ tamen non operatur, quia ab extrinseco impeditur; Si enim oblata occasione operandi, non operatur, & voluntas est inefficax, aut imperfecta, sine dubio tali bonitati actus adderetur aliqua bonitas ratione operis externi; cum certum sit, quod maioris valoris est elargitio elemosynæ propter Deum, quam sola voluntas inefficax elargitionis. Itaque quæstio est de actu perfecto, & efficaci, cui succedit actus externus velut effectus voluntatis efficaciæ.

NOT. 2. quod non est hic sermo de bonitatis intensiux additione, ut etiam aduertit Scot. quolib. 18. sed de extensiua; siquidem si de intensiua loquamur compertum est actum exteriorem regulariter addere aliquid bonitatis, vel malitiæ actui interiori causaliter, vel occasionaliter, quia eo posito intenditur actus internus, ut ipsa experientia constat, nam qui re ipsa martyrium patitur, regulariter ex hoc capite plus meretur, quam qui illud efficaciter optat; cum ille occasionem habeat eliciendi novos, ac plures, & intensiores actus. Idem cæteris paribus dicendum, de per-

petrante fornicationem, ac de cupiente fornicari. Igitur tota difficultas est de extensiuā, itaut sensus quæsitū sit, inquit Scotus. An actus exterior, quando in eodem supposito coniunctus est cum interiori, habeat propriam, ac distinctam bonitatem, vel malitiam, quæ superaddatur bonitati, vel malitiæ actus interioris.

Not. 3. quod circa hanc quæstionem in hoc sensu explicatam celebris est controuersia; Etenim Thomistæ cum omnibus ferè recentioribus negant, actum externum aliquid bonitatis, vel malitiæ addere actui interno. Ita D. Thomas p. 2. q. 20. art. 3. Ex aduerso Scot. cum suis, affirmat, quæ sententia est etiam Alens. part. 2. q. 107. memb. 8. art. 2. & p. 4. q. 77. memb. 3. art. 3. & D. Bonau. 2. d. 40. art. 2. q. 1. & dist. 42. art. 1. q. 2. qui falsò pro sententia opposita adducitur à Recentioribus. Cæterum nonnulli sententiæ oppositæ fortè rationibus pressi (inquit Mastrius in hac quæstione) suam opinionem ita explicant; Quod cum dicunt actum externum nil bonitatis, vel malitiæ addere actui interno, id debere intelligi tantum in ordine ad præmium, vel pœnam essentialem, non verò de pœna accidentali, vel præmio; in hoc enim sensu fatentur aliquid plurius addere externum, ac proinde concludunt actum exteriorem solum secundum quid facere hominem meliorem, vel peiorem.

Concl. Actus exterior habet distinctam bonitatem, vel malitiam; ac proinde aliquid bonitatis, & malitiæ essentialis addit actui interno. Est Scoti loc. cit. & aliorum. Prob. 1. auct. D. Aug. qua utitur ipsemet Scot. dicentis lib. 13. de Trinit. c. 5. *Mala voluntate, vel sola, quilibet misor efficitur, sed miserior potestate, qua desiderium mala voluntatis adimpletur.* Hoc autem intelligi nequit de miseria pœnæ, quia desiderans, & non potens habere, quod desiderat, plus habet de pœna, quam ille, cuius desiderium impletur; ergo intelligitur, inquit Scotus, de malitia culpæ.

Resp. Suarez, Pallaucinus, Serra ex Ricard. & alij augeri malitiam actus interni per externum, & intensiue, & extensiue, sed tantum in ordine ad præmium, & pœnam accidentalem; ac proinde non simpliciter, sed tantum secundum quid hominem meliorem, vel peiorem efficere, ut supra indicaui ex eodem Mastrio.

Verum hæc responsio vel non soluit vel incidit in nostram sententiam, quia præmium, ut præmium, fundatur super bonitate, & merito, sicut è diuerso pœna fundatur super malitia, & demerito; ergo si actui interno secundum se coniuncto cum externo, correspondet proprium præmium, vel pœna siue essentialis, siue accidentalis, correspondet etiam propria bonitas, vel malitia, ideoque Thomistæ sic respondentes incidunt in nostram sententiam, ut latè discurret Mastrius tom. 2. disp. 5. q. 5. de actibus humanis.

Prob. 2. nostra concl. Si sententia Thomistarum admitteretur, sequeretur, quod actus externus non necessario in confessione esset explicandus, quia fatendo quis voluntatem efficacem furandi, fornicandi &c. in eorum sententia explicaret totam peccati malitiam, sed consequens est contra communem ecclesiæ praxim, ergo &c.

Resp. neg. seq. mai. sed non omnes eandem assignant rationem: Aliqui dicunt confitendum esse actum externum, quia aliter nequit explicari voluntas efficax patrandi peccatum: sed hæc responsio ex dictis est falsa &c. Resp. Suarez disp. 10. sect. 1. Arriaga, Auerſa, ad rationem superius adductam, sed ne quæstio nimis excrescat, ommissis omnibus alijs responsionibus, affero solam responsionem Salas ad eandem rationem, dicentis, actum externum facere vnum peccatum cum interno, quatenus est obiectum actus interni, ac proinde in confessione explicandum, quia ab eo deriuatur malitia in actum internum.

Contra. Etiam si admittatur, quod actus exterior faciat vnum totale peccatum cum interno; adhuc tamen redit eadem difficultas, nam quando actus exterior ponitur, vel grauius peccatur extensiuè, vel non: si primum adhuc habemus intentum, non obstante tali vnitatem peccati; si secundum, ergo non est opus illud explicare in confessione; licet faciat vnum per se peccatum cum interno; sicut circumstantiæ aggravantes intra eandem speciem, faciunt etiam vnum cum actibus internis: Sufficienter enim explicaretur in confessione, dicendo, quod quis habuerit efficacem voluntatem e. g. furandi, cum non magis deriuetur malitia ab actu externo in internum per hoc, quod ponatur in esse, quam si solum efficaciter sit volitum absque positione in esse. Itaque ut etiam ait noster Baronius in Eth. actio-

ne 2. actus exterior est formaliter bonus, vel malus. Prob. denique ex Scot. à priori. Bonitas moralis est integritas omnium eorum, quę secundum rectam rationem debentur actui, è contra malitia; sed alia est integritas actus externi, & alia interni, quia actus externi sunt subordinati, legi, & regulis morum quibus conformari possunt, vel difformari; ergo habent aliam moralitatem ab illis distinctam; sicut vnus actus internus, ab alio, actio namque externa potest cadere per se sub præcepto, ac proinde supponitur in ipsa aliqua propria bonitas, vel malitia.

Arg. cont. concl. & 1. auct. S. Scrip. & SS. PP. & signanter Gen. 22. *Quia fecisti* ( idest facere paratus fuisti ) *hanc rem, & non pepercisti unigenito filio tuo propter me, benedicam tibi.* Quibus verbis Deus voluntatem Abraham pro facto, non minus gratam habuit, quam si opere, quod Deus impediēbat, fecisset, & compleuisset. Et ad Corinth. Epist. 2. D. Paulus dicit; *Si voluntas prompta est, secundum id quod habet a ceptum est, non secundum id, quod non habet:* Vbi Apost. videtur docere, quod voluntas efficax sit eiusdem meriti apud Deum, se sola, ac cum opere externo coniuncta, ergo &c.

Resp. quod ex 1. auct. solum habetur, Abraham sua bona voluntate, qua voluit immolare Isaac, sufficienter promeruisse præmium aliquod, non tamen habetur, quod præmium tam excellens promeruerit, quale acceperat, si actu n. externum immolationis addidisset actui interno. Resp. a l. 2. Ex Textu adducto solum inferri potest, quod voluntas efficax sit eiusdem meriti quoad sufficientiam, nempe, vt ei tribuatur præmium essentiale, non verò quod sit eiusdem meriti quoad excellentiam, nimirum, vt ei tam excellens tribuatur præmium, ac si actus externus propter bonam voluntatem positus fuisset.

Arg. 2. obijciendo PP. qui videntur docere voluntatem pro facto reputari, & signanter D. Aug. lib. 1. de libero arb. c. 3. de eo, qui cupit adulterari, quod non exequitur ob carentiam occasionis, vel impedimenti; *Non minus Reus est, quam si ipso facto deprehenderetur,* sic etiam Bernard. Epist. 77. & cæteri. Resp. Patres in hoc sensu locutos fuisse, videlicet, quod voluntas reputatur pro facto quoad culpam, non verò quoad quantitatem culpæ.

Arg. 3. ratione. Actus exterior est solum bonus, vel ma-



lus denominatione extrinseca, desumpta à bonitate, vel malitia actus interni imperantis, ergo &c. Resp. neg. ant. & ratio est, vt supra indicauimus, quia vt Scotus docet quol. 18. non solum actus internus est natus habere conuenientiam, vel disconuenientiam ad rationem, sed etiam actus imperatus exterior, mediante actu interno, à quo in ipsum redundat bonitas, vel malitia, ac proinde habet propriam, & intrinsecam bonitatem, vel malitiam.

Arg. 4. Vbi non est noua, ac distincta libertas, neque est noua, & distincta bonitas, vel malitia, quæ in libertate fundantur, sed in actu externo non est distincta libertas ab interno, quia externa necessariò sequitur ex efficaci voluntate, ergo &c. Resp. neg. mai. Nam moraliter potest dici distinctas esse libertates in actu interno, & externo coniunctis, quatenus voluntas habet distinctum dominium, & imperium reuocatorium in vtrumque; quousque perfectus sit, vt significat Scotus quolib. 18. ad 1. principale. Itaque quando libertas actus interni externo communicatur, cum imperando; quandam libertatem distinctam participatam in illum transfundere censetur, quæ sufficiens est ad inducendam aliam bonitatem, vel malitiam.

Dices libertas actus imperati dependet à libertate imperantis, immò videtur esse eadem libertas imperati, & imperantis, ergo est eadem libertas, & non distincta.

Resp. ex Scot. loc. cit. neg. conf. & ratio negationis est, quia interdum dicitur libertas imperati dependere à libertate imperantis, in quantum non potest effectus posterior denominari liber, nisi prior actus denominetur talis; & quamuis posterior necessarius videatur ex suppositione, suppositio tamen libera est, & non est liberè volita, nisi vt habet connexionem cum posteriori.

Arg. vltimò. Qui voluntate efficaci vult furari, & non furatur; solum, quia non inuenit quod furetur, non minori supplicio est apud Deum, ac si furatus fuisset, ergo &c. Tum quia aliàs sequeretur aliquem posse priuari merito sola appositione extrinseci impimenti; vt si quis volenti dare eleemosynam ligaret manus; sed hoc est falsum, quia potius enim duplicaretur ei premium, vt de se ipsa dixit S. Lucia Pascasio. Si inuitam iusseris violari, castitas mihi duplicabitur ad coronam.

Resp.

Resp. Furem in tali casu non esse minori supplicio digno apud Deum, si de essentiali loquatur; Secus autem de accidentali, quod ei adderetur per furtum reuera patratum. Ad illud de volente elargiri eleemosynam similiter resp. quod non haberet meritum, & præmium accidentale; licet haberet essentiali; Quare duplicaretur ei præmium non ratione omissionis actus externi, sed ex alio capite, nempe ex patientia, vel ex intensiōe actus, sicut euenisset etiam in S. Lucia quæ, si esset violata, occasionem habuisset resistendi inclinationi naturalis appetitus, delectationis &c.

Quæres 1. An bonitas, vel malitia competat prius actui interiori, vel exteriori.

Resp. bonitatem primariò conuenire actui interiori voluntatis, exteriori autem per denominationem extrinsecam ab interiori; Ita videntur sentire Theologi antiquiores; vt D. Bonau. in 2. dist. 42. art. 1. q. 1. & Scotus eadem dist. in solutione 2. & 3. q. Verum Scot. quel. 17. vbi de hoc ex professo agit indicat contrarium tenere, cum doceat, actum exteriorem, non tantum denominatiue, sed etiam intrinsecè participare bonitatem, & malitiam moralem, vt superius ostensum fuit. Quare cenſeo esse respondendum cum distinctione etiam de mente Scoti. Bonitas, & malitia formalis prius conueniunt actui interiori, per quem deriuatur in exteriorem actum; Bonitas autem obiectiua prius competit actui externo, & deinde actui interno, & prob. hæc 2. pars auct. D. Aug. quæ passim asseritur: *Non ideo furari esse malum, quia velle furari est malum, sed potius ideo velle furari est malum. quia furari est malum*, ergo bonitas, & malitia obiectiua prius competunt actui externo, quàm interno. Prob. etiam ratione. Illa actio primariò, & ratione sui est bona, aut mala, quæ primariò, & ratione sui est conueniens, vel disconueniens naturæ rationali; illa verò secundariò est talis, quæ ratione alterius est conueniens, & disconueniens, sed actio exterior bona, aut mala ex obiecto, & circumstantijs primariò, & ratione sui talis est, & interior solum ratione exterioris; ergo &c. In hac eadem Sententia videtur esse etiam D. Thom. p. 1. q. 20. in qua expressè docet, vt aduertit Caspensis, bonitatem, vel malitiam ex obiecto, & circumstantijs prius competere

actui exteriori, & ab ipso deriuari ad interiorē; quāuis idem Caspens. contendat cum nonnullis Recentioribus, qui volunt D. Thom. loqui solum de bonitate, & malitia obiectiua, non verò de formali, vt putat Caspens.

**Quæres 2.** An actus internus, & externus sint vnum peccatum, vel duo peccata. Resp. ex nostro Bassolio in 2. dist. 42. dici posse vnum peccatum, & plura; vnum quidem vnitatem ordinis, non autem simplicitatis, & indiuisibilitatis, quo sensu actus exterior, & interior censetur esse vnus actus humanus; quando enim vnum est propter aliud, est tantum vnum in hoc sensu, vt & Scot. indicat quol. 18. a. 3.

Vel resp. metaphysicè, & considerando naturam vtriusque actus, in vtroque esse duas malitias, ac proinde esse duo peccata; at secundum moralem æstimationem, considerando nimirum actum, vt imputabilis est, qua ratione illi debetur laus, vel vituperium, pœna, vel præmium, sic vnā esse malitiam, & vnum peccatum, sicut vna est libertas deriuata ab actu interiori ad exteriorē, & vna malitia in genere moris, & sic ex vtroque consurgit vna integra actio moralis, quæ coalescit ex illis duabus malitijs partialibus.

## QVÆSTIO IX.

*Vtrum dentur actus indifferentes, tam in specie, quam in indiuiduo, qui nec boni sint, nec mali.*

**Not. 1.** Quodd in hac celebri quæstione grauis est controuersia inter Thomistas, & Scotistas; nam Thomistæ cum D. Thom. in p. 2. q. 17. art. 5. concedunt dari actus indifferentes in specie, sed non in indiuiduo; sic enim docet. D. Thom. Dicendum, quod contingit quandoque aliquem actum esse indifferentem secundum speciem, qui tamen est bonus, vel malus in indiuiduo consideratus, & hoc ideo, quia actus moralis, sicut dictum est, non solum habet bonitatem ex obiecto, a quo habet speciem, sed etiam ex circumstantijs, quæ sunt quasi quædam accidentia, & mox subdit, oportet, quod quidam indiuidualis actus habeat aliquam circumstantiam, per quam trahatur ad bonum, vel malum, ad minus ex parte intentionis finis; quia

ne-

necesse est, quod vel ordinetur, vel non ordinetur ad debitum finem; vnde necesse est omnem actum hominis à deliberatiua ratione procedentem, in indiuiduo consideratum, bonum esse, vel malum; hætenus D. Thomas. Scotistæ è contra cum Scoto in 2. dist. 41. ad cuius claritatem, & ad tollendam omnem contradictionem, quæ videtur esse in Scoti doctrina, qua de re etiam Scotistæ inter se pugnant, non omnes in eodem sensu Scotum intelligentes, & explicantes; ponuntur sequentia notabilia.

Not. 2. Quòd in hac quæstione non est sermo de actibus, qui ratione ignorantie inuincibilis, inaduertentie indeliberationis non sunt boni, nec mali; sed loquimur de actibus liberis, & deliberatis: Vnde quando queritur: An detur actus indifferens secundum speciem; sensus est, an detur actus, qui moraliter nec sit bonus, nec malus ex obiecto, & fine intrinseco: similiter de actu indifferenti in indiuiduo, sensus est; an detur actus indifferens in indiuiduo, idest spectatis etiam circumstantijs, à quibus saltem extrinsecè, & in genere moris dicuntur indiuiduari, quatenus à parte rei nunquam datur actus humanus, nisi cum his, vel illis circumstantijs.

Not. 3. Quòd in doctrina Scoti tria actuum genera distinguenda sunt. Primum purè naturalium, prouenientium à natura secundum gradum communem brutis citra deliberationem voluntatis, & dictamen rationis, quales sunt quos affert Scotus loc. cit. fricatio barbæ, & leuatio festucæ: secundum est purè moralium, & prorsus humanorum, qui à ratione imperantur cum deliberatione, quales sunt eleemosyna, abstinencia, iustitia &c. quorum bruta non sunt capacia. Tertium, quod mediat inter extrema, explicata, est illorum actuum, qui partim naturales sunt, partim morales; ac proinde ita procedunt à facultate naturali, vt pariter admittant moralem; quales sunt actus generandi, piscandi, ambulandi, imperandi seruo, vt domum ornet &c. qui quidem actus, vt dicit Scotus fieri nequeunt sola imaginatione, quemadmodum fricatio barbæ. Quare Scotus admisit actus indifferentes explicatos in hoc tertio genere, non autem in primo genere, cum illi procedant, vt testatur etiam ipse Scotus ex sola imaginatione, non ex libero arbitrio impellente. Actus namque tertij generis sunt

indifferentes quocumque modo sumantur, cum sint extra genus actus virtuosi, & intra genus actus deliberati, & humani, capaces quidem circumstantiæ bonæ, & malæ, sed non illam exigentes.

Not. 4. Ex D. Bonau. in 2. dist. 41. cui consonat Scotus, quod aliquid ordinari potest ad Deum tribus modis, idest actualiter, virtualiter, & habitualiter. Actualiter, quando quis de fine ultimo, hoc est de Deo cogitans illum amat, ac proinde omnia in Deum ordinat. Virtualiter, est, quando quis refert aliquod opus in Deum, adeo ut opus sequens habeat directam ordinationem, & consequentiam ad primum e. g. si quis intendat dare pro Deo centum nummos, & incipiat dare, & cogitat de Deo in primo nummo, in alijs autem non, sed distrahitur. Si autem opus alterius generis inciperet, oporteret, ut intentio remaneret ad hoc, quod opus esset meritorium. Per hunc modum, inquit D. Bonau. intelligitur esse in viris Religiosis, qui principio ex charitate deuouerunt portare Religionis pondus; quicquid enim faciunt, quod ad suæ Religionis obseruantiam spectat, ex prima intentione est eis meritorium ad salutem, nisi forte, quod absit, superueniat contraria intentio, vel maneat in peccato mortali. Habitualiter, quando non præcogitato fine ultimo, siue Deo, ex sola boni operis consideratione ipsa charitas, vel aliqua alia virtus charitate inferior inclinatur ad ipsum opus bonum, sicut vir obediens meretur obediendo Prælato sibi præcipienti, etiam si nihil de Deo cogitet, sed solum consideret, quod bonum est obedire. Ideoque Scot. loc. cit. ad rem nostram sic docet. Non tenetur homo, nec tentione necessitatis, contra quam sit peccatum mortale, nec tentione minori, contra quam sit peccatum veniale, referre semper actum suum in Deum actualiter, vel virtualiter, quia Deus non obligauit nos ad hoc.

Concl. Dantur actus indifferentes non solum in specie, sed etiam in indiuiduo. Prima pars est communis; secundæ pars est Scoti loc. cit. & Scotistarum, & plurimorum extra nostram Scholam; eamque primò docuerunt D. Bonau. & Alenf. p. 3. q. 35. memb. 3. Prob. 1. auct. D. Hieron. Epist. 89. ubi docet obseruantiam legis antiquæ non licere, neque esse indifferentem post mortem Christi, sed malam, & subdit.

dit. Sunt namque differentia inter bonum, & malum, sicut Philosophi disputant; est enim bonum continentia, & malum luxuria, & inter utrumque indifferens ambulare; hoc neque bonum, neque malum est, siue enim feceris, siue non feceris, neque iniustitiam habebis, neque iniustitiam. Quid clarius pro nostra sententia.

Neque valet dicere, quod Hieron. loquitur ex specie, & ex obiecto, non verò in exercitio, & in indiuiduo; eo quia illa verba, siue feceris, siue non feceris, aperte indicant effectum, seu actum in exercitio, & in indiuiduo. Prob. 2. ratione à priori ex D. Bonau. & Scot. Nullum datur præceptum obligans nos dirigere omnes nostros actus liberos in bonum finem moraliter; ergo possunt dari actus indifferentes; etiam si si sint deliberati, quales sunt ambulare ad expellendum frigus; vel ad sanitatem conseruandam, vel sedere, vel habere aliquam delectationem non prohibitam; antecedens patet, quia non tenemur ad opera indifferentia ex obiecto; ergo &c.

Confirm. Quia quando opera nostra ex obiecto, & specie sua sunt indifferentia, & fiunt ex indigentia aliqua naturæ, ut mox dicebamus, non sunt bona moraliter, neque mala; ergo sunt indifferentia. Ant. prob. Quod non sint bona patet manifestè, quia iam essent digna laude, & meritòria vitæ eternæ, & materia voti, & iuramenti, quod est ridiculum asserere. Cæterum quod non sint mala, nisi eis addatur aliqua mala circumstantia probatur. Quia non sunt otiosa, fiunt enim ex indigentia aliqua naturæ ad eam subleuandam. Et certè si mala essent, & peccata, essent materia sufficiens sacramenti, & absolutionis. Quis enim dicet, quod deliberatè lauare faciem, expurgare corpus, calefacere &c. sint actus, qui de necessitate referenda sint ad finem morale, alioquin peccata committi. Ingenue Ariaga de se ipso inquit. *Ego de me fateor, quouique hanc questionem primò agitare audiui, nil de tali obligatione unquam cogitauit, nec putauit, me aliquid mereri vel demereri in huiusmodi actibus.* Neque ullus confessor esset, inquit Montefinos utrumcum Caspensi, qui talem materiam admitteret veluti sufficientem materiam absolutionis Sacramentalis.

Prob. 2. ad hominem. Nulla species esse potest, quæ non existat in aliquibus indiuiduis, sed dantur actus in sua specie indifferentes, etiam per Aduersarios, ut sedere;



ambulare, scribere qui secundum se, neque bonitatem, neque honestatem, neque malitiam, seu turpitudinem habent; ergo dantur etiam indiuidua indifferentia, in quibus esse possit prædicta species, quia sicut dantur actus ex objecto indifferentes; ita etiam circumstantiæ sunt indifferentes, & præsertim circumstantia finis extrinseci, ut constat de actu, nec præcepto, nec prohibito. Prob. 3. Non repugnat esse omissionem voluntariam in indiuiduo indifferentem, e. g. quando aliquis cessat ab aliquo opere bono non præcepto, quod si vellet, posset proseguire, & tamen cessatio voluntaria nequit dici inala, nec bona, quia non est ommissio operis præcepti; ergo &c.

Prob. denique. Potest quis prudenter sequi hanc nostram sententiam, quæ propter auctoritatem, & rationem est probabilior, quia magis fauet conscientiæ, succurrit humanæ imbecillitati, ac proinde vitantur quam plurima peccata venialia, quæ si admittatur opposita sententia, non euitantur; tum quia est in fauorem libertatis humanæ, non enim debemus, inquit D. Bonau. obligationem aliquam ei imponere sine graui fundamento rationis, vel auctoritatis. Si quis, inquam, secundum nostram sententiam operetur, tunc actus eius non erit bonus, nec malus, sed indifferens; non quidem malus, quia prudenter iudicat, talem modum operandi sibi esse licitum; nec bonus, quia non ordinat illum ad finem honestum: ergo saltem per accidens datur actus indifferens, ergo dari potest &c.

Arg. 1. auct. in qua præcipue fundatur opinio opposita. Patres explicando illud dictum Christi de verbo otioso. Matth. c. 12. *Omne verbum otiosum, quod locuti fuerint homines, reddant rationem de illo in die iudicii*: conueniunt per verbum otiosum intelligi, quod frustra profertur, sine honesto, & rationabili fine, ergo nequit dari actus indifferens in indiuiduo. Resp. comuniter. Verbum, & opus indifferens factum ex aliqua indigentia naturali non esse otiosum, estò si sine careat honesto, non tamen rationabili causa, cum fiat ad naturam subleuandam. Cæterum doctissimus Macedo in 2. collat. 10. Different. 4. ponderat naturam verbi otiosi, & explicat, illud dici otiosum, quod destituitur suo fine, ad quem est institutum, verba autem sunt instituta ad manifestanda sensa interna hominibus, & ad civilem societatem;

tem; Vndè verba sic instituta, & ordinata, si careant debito fine, sunt otiosa. Secùs autem si sint voces naturales, quales sunt exclamationes, admirationes, & interiectiones; hæ enim nec sunt bonæ, nec malæ in genere moris.

Arg. 2. auct. SS. PP. qui, yt videre est apud doctores Recentiores stant pro opposita sententia, & signanter D. Aug. lib. 2. de peccatorum meritis cap. 18. ait. *Voluntatem in medio non posse consistere, ut neque bona, neque mala sit. Si enim diligatur iustitia bona est; si verò non diligatur, non est bona: ergo &c.*

Resp. ex Macedo; quod Patres in hunc sensum sunt interpretandi; nempe de actionibus propriè, & rigorosè moralibus, & de ijs, quæ finem exigunt honestum, & virtuosum, non verò de alijs, quæ intra latitudinem naturalem continentur. Quod attinet ad auct. D. Aug. dicendum, non loqui in eo sensu, quo adducitur, ideoque dicit, voluntatem non posse consistere &c. non enim datur status medius inter iustitiam, & iniustitiam; ac proinde voluntas vel est in iustitia, idest gratia, vel non, & sic est in culpa; non verò excludit dari aliquas actiones indifferentes.

Arg. vltimò. Si darentur actus indifferentes in individuo per ipsos generari posset habitus, sed talis habitus nequit admitti, ergo &c. Prob. min. Quia omnis habitus est determinatus ad certos actus, & etiam determinat potentiam ad eosdem actus eliciendos; at iste esset indeterminatus. Resp. conc. quod generatur habitus indifferens ex actibus indifferentibus, sed negatur probatio; fit enim transitus ab vna significatione ad aliam; esset siquidem determinatus ad consimiles actus, esset autem indeterminatus in genere moris. Cæterùm hæc dicta sint disputationis gratia, & ad veritatem inuestigandam. Quilibet enim Christianus, & præsertim Religiosus amplecti debet consilium D. Pauli, sic nos monentis. *Sive manducatis, sive bibitis, sive aliquid aliud facitis, omnia in gloriam Dei facite.*



*Vtrum bonitas moralis dependeat à conformitate cum voluntate diuina. Vel sub alio titulo. An voluntas humana, ut sit recta, debeat conformari cum voluntate diuina in voluto.*

**N**OT. 1. Quòd voluntas Dei, alia est beneplaciti, quæ verè, & formaliter est in Deo, alia est signi, quæ est signum alicuius voluntatis existentis in Deo, cuiusmodi est præceptum, prohibitio, permissio, consilium, & operatio. Voluntas beneplaciti, alia est simplex omninò complacentia respiciens obiectum sine ordine ad existentiam; alia verò cum ordine siue absoluto, siue conditionato tendens ad existentiam obiecti; & quidem si voluntas diuina, omnibus consideratis aliquid absolutè velit, dicitur consequens, & ista semper impletur. Si autem solum velit, quantum est de se, vel considerata una ratione boni, & non omnibus, dicitur ant, ut etiam dictum est in part. 1. in disp. de D. voluntate.

Not. 2. Quòd tribus modis intelligi potest, nostram voluntatem debere conformari voluntati D. primò in obiecto materiali; quatenus voluntas creata vult idem, quod diuina. Secundò in obiecto formali, quatenus voluntas creata vult idem ob eandem rationem, & finem ac diuina. Tertio. in quantum licet voluntas creata non velit, quod Deus vult, vult tamen id, quod Deus vult ipsam voluntatem hominis velle. Profectò voluntas creata non obligatur semper se conformare voluntati diuinæ in voluto formali positivè; non enim obligatur positivè velle omnia, quæ vult Deus, & multo minus sub eadem ratione; cum possit quandoque ab omni actu se abstinere. Immo etiam si aliquid velit, non est necesse, ut id velit sub eodem motiuo, quo vult Deus, tum quia particulares rationes, quas habet Deus sunt homini ignotæ: Tum quia Deus omnia vult propter suam bonitatem, & tamen voluntas creata non peccat, si non operetur ex motiuo charitatis. Tum quia nullibi extat huiusmodi præceptum, seu obligatio, Nam voluntas creata

potest esse recta etiam si non habeat præfatam conformitatem; cum ad honestatem sufficiat motium quodcumque honestum, etsi diuersum ab eo, quod habet Deus. Itaque sufficit, quod voluntas creata habeat sub ratione aliqua generali ad bonitatem honestam conformationem in voluto formali. Quare voluntati creatæ non debet displicere ratio sub qua Deus vult obiectum (estò sit laudabile se ei conformare) siue voluntate antecedenti, siue consequenti; cum diuina voluntas sit iustissima &c.

Not. 3. Quòd certissimum est, nostram voluntatem tene-ri velle id, quod Deus præcipit, ut velimus; nam per voluntatem diuinam præcipientem ponitur humanæ voluntati obligatio, ac proinde non se conformando ei peccat. Quare ad hoc, ut voluntas creata non peccet, debet conari ad id, quod diuina voluntas præcipit, etiamsi id faceret tentando, nec volendo, ut opus sequatur, prout Abraham ex voluntate diuina erat obligatus ad volendum occidere Isaac; quàmuis Deus noluerit occisionem sequi, sed noluerit solum Abrahæ voluntatem, obedientiam, & conatum.

I. Concl. Homo tenetur se conformare in omnibus diuinæ voluntati in voluto formali, non tamen in voluto materiali. Est Scoti D. Thomæ, & omnium Theologorum.

Prob. 1. pars. Conformari voluntati diuinæ in voluto formali est ipsi conformari in ratione communi, & generali, propter quam Deus operatur, quæ est bonum commune totius uniuersû, quatenus tale bonum ad Deum, & eius gloriam, ut ad finem ordinatur; sed voluntas humana nequit in hoc rationabiliter, & rectè discordare à diuina voluntate, ut patet ex dictis, ergo homo tenetur conformari voluntati diuinæ in voluto formali, saltem negatiuè, hoc est non discordare positiuè ab illa, ut supra tactum est.

Prob. 2. pars nempe, quod non teneatur semper ei conformari in voluto materiali, seu in obiecto à Deo voluto; Siquidem id constat ex eo, quod Deus voluntate generali primæ causæ, & uniuersalis prouisoris, plura vult, quæ non est laudabile nos velle, puta bella, pestes, mortem Parentum &c. ergo non semper tenemur in voluto materiali nos conformare: Ant. patet, quia illa si referantur, & considerentur, ut spectant ad communem ordinem uniuersû, vel ad ostensionem Diuinæ Prouidentię, eiusque iustitię, sunt bona;

bona, mala verò respectiue ad nos: cum ad nos non pertineat communis ordo uniuersi, aut diuinæ iustitiæ, undè D. Aug. in Enchirid. c. 101. *Aliquando bona voluntate homo vult aliquid, quod Deus non vult Tanquam si bonus filius Patrem vellet viuere quem Deus bona voluntate vult mori; ut magis patebit in sequenti conclusione.*

II. Concl. Voluntas nostra potest trīstari, imò potest ei inefficaciter displicere volutum materiale à Deo, siue quod Deo placet, siue quod facit, vel facere præcipit, sub alia, tamen ratione, quatenus nimirum est malum disconueniens, aut molestum nature nostre personæ affini &c. prout nobis displicent erumres, egritudinæ, & similia mala propria, & Amicorum. Patet conc. exemplo Dauid, & D. Pauli, qui scientes esse voluntatem Dei, ut adhuc viuerent, dicebant: Dauid Psal. 119. *Hon mihi, quia incolatus meus prolongatus est* & Paulus ad Philippens 1. *Geatior autem ex duobus desiderium habens dissolui, & esse cum Christo &c.* Imò, & ipsi Christo inefficaciter, seu voluntate conditionata, cum qua tamen stat voluntas absoluta, ut patet de proijciente merces in Mare, displicuit mors à Patre ei præcepta, ut habetur Matth. 26. *Tristis est Animamēa usque ad mortem: & transat à me Calix isto.* Ratio est, quia talis voluntas inefficax ex nullo capite est prohibita; tum quia non est contraria diuinæ, cum etiam ipse Deus, in quo nulla reperitur contrarietas voluntatis, sæpè efficaciter aliquid velit, cuius oppositum ob aliam rationem inefficaciter desiderat.

Ex qua Doctrina infertur, quod filius ex charitate, seu pietate filiali rectè, siue ignoras dispositionis diuinæ, siue non, desiderat Parenti vitam, sub tacita tamen submissione ad Dei voluntatem, atque de morte parentis, quatenus ei mala, tristatur.

III. Concl. Voluntas humana discordare nequit à diuina, vel eidem aduersari in voluto materiali, quando Deus nō scitur aliquid absolutè velle independenter ab arbitrio hominis, adeout nequeat efficaciter velle oppositum, aut ad illud conari. Huiusmodi autem obiecta à Deo volita, sunt creatio mundi; variatio temporum, anni, prima vocatio, & similia, quæ Deus ex se absolutè vult independenter à causâ secunda. Similiter illa, quæ quidem vult occasione ex creaturis accepta, hac tamen supposita vult absolutè,

lurè, & inevitabiliter; puta mortem hominum corporalem, resurrectionem mortuorum, pœnæ æternitatem &c. Vnde non possumus in oppositum conari orando pro salutem damnatorum, pro tollenda pœnæ æternitate &c. hoc enim esset impium, & stultum. Ita discurret Herinex p. 2. disp. 3. q. 10. Quod si voluntas Dei non sit nobis nota, possumus in oppositum conari; si loquamur de pœnis, & flagellis, egritudinibus à Deo nobis in hac vita immisissis; immo etiam si sit nobis nota diuina voluntas. Quia non constat, Deum absolutè velle, ut illa patiamur, sed præsumere possumus, hæc velle tantum sub conditione, nisi hominum industria, præcibus, aut emendatione vitæ auertantur, qua conditione posita etiam ipse Deus ea non vult, ac proinde ab eis nos liberat.

Pari ratione voluntas humana non potest se conformare diuinæ voluntati, quæ vult efficaciter concurrere ad materiale peccati: eo quia licet Deus possit velle materiale peccati, & permissionem ipsius absque eo, quod velit peccatum ipsum; nihilominus ego non possum velle eandem permissionem mihi contingere, quin mihi velim peccatum ipsum; nam talis voluntas Dei non est ante præuisionem dispositionis voluntatis creatæ ad consentiendum, si non, negetur auxilium necessarium ex parte primæ causæ, ac proinde conari, ut non sit noster consensus, non est facere irritum Dei voluntatem, sed est facere, ut non sit conditio sine qua diuina voluntas non tenderet ad tale obiectum creatum. Hinc D. Petrus, cui fuit reuelata trina negatio, debebat conari, ne in peccatum negationis ipsius Christi caderet.

Arg. cont. 2. concl. In oratione Dominica à nobis petitur, ut fiat voluntas Dei in Terra, sicut in Cœlo, sed in Cœlo Beati conformantur voluntati Diuinæ non solum in volito formali, sed etiam in materiali, ergo idem nos viatores præstare debemus. Resp. præfata verba, vel esse intelligenda de voluntate præceptiua Dei, & per eam nos petere à Deo, ut in omnibus hic in terris obtemperemus diuinis præceptis, sicut Beati in Cœlo semper obediunt Deo in omnibus, ut ex Aug. exponit D. Thomas, & alij. Vel si fiat sermo de voluntate Dei respectu cuiuscumque voliti, solum denotatur nos debere conformari diuinæ voluntati in quo-



cumque volito, non quidem secundum se, & absolute, sed prout stat sub ordine ad finem, ad quem Deus illud ordinat, & velle, ut ordo diuinæ voluntatis in omnibus impleatur. Cæterum, quod in Patria omnes conformentur diuino volito, etiam materiali, est propter illius status perfectionem, ubi, cognita Dei voluntate, operantur solum secundum rationes æternas, & superiores, & sub illo motiuo, quo Deus vult res illas. Vnde in Psal. 57. dicitur. *Lan-*

*abitur iustus, cum viderit vindictam, manus suas lavabit in sanguine peccatoris.* Quomodo autem letentur innui de

mente Scoti in p. 1. q. 9. in disp. de visione

beatifica. Verum nobis ope-

rantibus secundum

rationes par-

ticula-

res,

& temporales licitum est vel-

le oppositum, immò ad

id sæpè tenemur, ut

constat ex su-

pra di-

ctis.



# TRACTATUS QVARTVS DE CONSCIENTIA.

## DISPVATIO I.

### QVÆSTIO I.

#### *Quid sit conscientia.*

**N**ot. 1. Quòd ea est humanæ naturæ supra beluas, dignitas, & præcellentia, ut homo rationis compos ad suum finem ultimum assequendum, qualis est beatitudo, indigeat regula, qua ad huiusmodi finem eius actus ordinentur. Hæc autem regula est vel innata, & nobiscum genita, vel exterius proposita, vel interiùs acquisita; prior est ipsamet ratio, seu lumen naturale nostris cordibus insita, dictans quid agendum, & quid fugiendum; posterior est lex tum à Deo, tum ab hominibus præscripta. Tertia denique sunt omnes illi habitus ex frequentatis actibus in nobis geniti, quibus non solum dirigimur in nostris operationibus, sed etiam ad promptè, & expeditè actus eliciendos adiuuamur. In præsentiarum agendum nobis est de regula interiùs posita, hoc est de conscientia, quæ videtur esse prima, cum sit nobis proximior.

Not. 2. Quòd conscientiæ vocabulum varijs, & præsertim tribus modis usurpari solet: primò communiter, quatenus est complexio causarum concurrentium ad actum, qui specialiter conscientia dicitur, huiusmodi sunt synderesis, lex naturalis, habitus fidei infusæ, intellectus discurrens, iudicium approbans bonum, & reprobans malum; quo sensu à D. Basil. nominatur: *Rationale indicatorium*, à D. Damasc. *Lex nostri intellectus*, & ab aliquibus habitus mentis boni, & mali discretivus. Secundò sumitur strictius, nempe pro illis specialibus causis, quæ præcisè concurrunt ad formandum, & eliciendum conscientiæ actum, qualiter sunt synderesis, lex naturalis, intellectus discurrens &c. Conscientia non nunquam vocatur eo modo, quo causa

effectus sui appellationem aliquando obtinet, ut sol dicitur calidus, quia calorem efficit. Terriò accipitur strictissimè, nempe pro illo actu intellectus, quo bonum approbat, & malum reprobatur, atque voluntatem mouet, & moraliter impellit ad id prosequendum, & ad illud fugiendum.

Not. 3. Quòd quemadmodum in scientijs speculatiuis aliqua sunt prima principia hominibus per lumen naturale nota, & cognita, qualia sunt. Impossibile est idem esse, & non esse: Totum est maius sua parte &c. sic in scientijs practicis aliqua sunt generalia principia omnibus naturaliter nota, e. g. Deus est colendus, bonum faciendum, malum vitandum, nemini faciendum, quod nobis fieri nolumus, & huiusmodi &c. Insuper sicut potentia, quæ versatur circa prima principia speculatiua dicitur intelligentia, seu intellectus primorum principiorum, ita pariter potentia, quæ generalia principia morum, & agibilium apprehenduntur dicitur habitus primorum agibilium, seu Synderesis.

I. Concl. Conscientia non est Synderesis, neque lex naturalis. Hæc est communis paucis exceptis, nimirum Henrico putante esse quamdam inclinationem voluntatis ad bonum, aut ad malum, & Durando dicente, conscientiam coalescere ex duobus habitibus altero intellectus, altero voluntatis. Prob. nostra concl. quod i. p. Synderesis propriè sumpta est habitus primorum principiorum practicorum dictans in genere bonum esse faciendum, malum fugiendum; sed conscientia non solum in genere, sed etiam in particulari, & in specie dictat, & incitat ad hoc bonum faciendum, & hoc malum fugiendum: ergo Synderesis à conscientia distinguitur. Quare Theologi explicationis gratia proponunt huiusmodi practicum Sylogismum, cuius maior est à Synderesi minor à ratione, siuè à potentia ratiocinante, & alijs notitijs innatis, infusis, vel acquisitis; conclusio verò à conscientia propriè sumpta, & ut facilius id percipiatur ponamus sylogismum practicum. Synderesis proponit. Omne bonum semper est amplectendum, ratio naturalis subdit minorem; sed temperantia est bona; conscientia infert hanc conclusionem: ergo temperantia semper est amplectenda.

II. Concl. Conscientia strictè sumpta est actus intellectus, quo practicè iudicat aliquod in singulari faciendum, vel

vel fugiendum, laude, vel pœna dignum: hæc est communis, & signanter traditur à Doctissimo Petro Marchantio t. 1. tribunal. Sacram. Prob. & simul explicatur conclusio. Primò dicitur actus, ut distinguatur à Synderesi, à lege, vel à lumine naturali, & alijs principijs, à quibus conscientia tanquàm effectus à suis causis procedit. Secundò dicitur intellectus, nam conscientia iuxta nominis ethymologiam appellatur cum alio scientia, vel concursus scientiæ, & conferentiæ ad iudicium formandum, siue ad practicè concludendum, sit ne, vel fuerit ne hoc faciendum, vel fugiendum; ex quo constat conscientiam esse actum iudicij, ac proinde non ad voluntatem, sed ad intellectum pertinere: dicitur in singulari, ut iterum conscientia distinguatur à Synderesi, dicitur faciendum, vel fugiendum laude, vel pœna dignum, ut conscientia extendatur tam ad facta, quam ad facienda: siquidem post factum sæpè remorder conscientia ostendens pœna dignum opus, quod in faciendò aliquando non aduertit, dicitur etiam practicè, quo indicatur conscientiam non consistere in prima intellectus operatione, neque in secunda, sed in tertia, non quidem speculatiua, sed practica; ordinatur enim ad operationem, ut eleganter aduertit D. Bonau. in compendio Theologico.

Cæterum Marchantius cit. addit has particulas, nempe ex eo quod facultas ratiocinatiua ex nonnullis principijs illud cum aliqua credulitate proponat ut bonum, vel malum; & hæc addit definitioni ad includendam omnem conscientiam, siue sit facultatis ratiocinantis recta, siue erronea, dubia, vel opinosa. Talis enim formatur conscientia, qualia sunt principia, ex quibus formatur; unde si sint principia recta formatur conscientia recta, si erronea, erronea &c. Ponitur cum aliqua credulitate, quia omnis conscientia, habere debet quandam adhesionem credulitatis ad principia, ex quibus procedit; nam huiusmodi adhæsiō dat vim iudicio, & actui conscientie iudicantis. Hinc Apostolus ad Roman. c. 14. conscientiam nomine fidei appellat dicens. *Omne autem, quod non est ex fide, peccatum est.*

Quæres. Quotuplex est conscientia.

Resp. conscientia superius descripta diuidi solet à Theologis in rectam, siue infallibilem, erroneam, probabilem, dubiam, & scrupulosam, quibus addit Marchantius con-

scientiam hypocondriacam, siue fatuam. Conscientia recta, seu infallibilis est, quæ ex rectis, & infallibilibus principiis rectè dicitur, quid sit agendum, vel fugiendum. Probabilis ex probabilibus, dubia ex principiis practicè dubijs, erronea ex principiis erroneis apprehensis ut veris, practicè iudicans bonum malum, malum bonum &c. Scrupulosa ex leuibus principiis, & motiuis absque rationabili fundamento: & denique conscientia hypocondriaca, quæ ex humore malancholico, & fatuitatem inducente, potiùs, quam ex aliquibus principiis intellectus procedit.

Cæterum nonnulli diuidunt conscientiam in bonam, & malam; verùm theologicè discurrendo conscientia mala non meretur conscientia nomen, sed potiùs anticonscientia, cum contraria sit conscientia; nec etiam potest nominari conscientia erronea cum etiam, credulitatem, quandam includat assentiendo iudicio formato ex principio erroneo.

Quæres 2. Quot, & qui sint actus conscientia.

Resp. Quod actus conscientia tum iuxta differentias temporis, tum iuxta rationem obiecti, & modum, quo illud respicit sunt multiplices, quos sic explicat noster Petrus Marchantius tom. I. Tribunal. Sacramental. tract. de conscientia: Etenim aut conscientia respicit bonum, aut malum, si respicit bonum, aut illud respicit ut factum, aut in fieri, aut ut faciendum est. Conscientia quatenus versatur circa bonum faciendum, & futurum, approbat, consultat, suadet; quatenus respicit bonum, ut præsens sit, inclinat, incitat, confortat; quatenus verò respicit bonum præteritum, & factum, approbat, complacet, & blanditur. Similiter conscientia quatenus respicit malum diuersos etiam habet actus, quatenus respicit malum futurum, & faciendum retrahit, terret, dirigit; dum respicit malum, ut sit in præsentem, obmurmurat, redarguit, resistit; dum versatur circa malum iam commissum, remordet, iudicat, castigat &c.



*Quotuplex est conscientia recta, & infallibilis, & unde habeat suam infallibilitatem.*

**N**ot. Quodd conscientia recta, & infallibilis, ut supra indicauimus, dicitur illa, quæ ex rectis, & infallibilibus principiis procedit, & formatur, dictans hoc esse faciendum, & illud fugiendum.

I. Concl. Conscientia recta, seu infallibilis rectè diuiditur in naturalem, & acquisitam. Naturalis dicitur, quæ ex principiis naturæ primæuæ à Deo insitis procedit: talis est, quæ ex synderesi, lege naturali, seu lumine mentis, & generaliter ex lege Diuina naturali ortum habet, unde sicut hæc lex apud omnes eadem est, sic conscientia ex ipsa formata omnibus est communis iuxta illud Pauli ad Roman. *Gentes, quæ legem non habent, naturaliter ea. quæ legis sunt, faciunt, huiusmodi legem non habentes ipsi sibi sunt lex.* Conscientia recta, seu infallibilis acquisita dicitur illa, quæ ex principiis positiuis rectis, & infallibilibus acquisitis procedit, huiusmodi sunt S. Scrip. traditiones, consuetudines probatæ &c. siuè illa, voce, siuè scripto fuerint proposita; talis est conscientia, quæ formatur ex lege fidei, vel morum, prout ex S. Scrip. vel legitima traditione ad nos peruenit. Item, quæ ex lege Ecclesiast. ex Petri Cathedra, vel Concil. Apost. promulgata procedit; similiter, quæ ex principiis naturæ per ius gentium est deducta.

II. Concl. Tria sunt principia infallibilia, ex quibus conscientia recta formatur. Primum est synderesis, & lex Diuina naturalis omnibus nota; vix enim contingere potest, ut quis inculpabiliter primæ legis naturæ præcepta ignoret, tum ex parte legislatoris, qui est Deus, tum ex parte obiecti, quod infallibili veritate naturali innititur; tum ex parte operantis, cui talis vis à Deo naturæ conditore insita est. Secundum prouenit à lege Diuina positiua, vt supra innuimus. Tertium prouenit ex legibus humanis, vel ex principiis naturalibus: Quarè primum principium obtinet primum gradum infallibilitatis ex parte obiecti, subiecti, operantis, & legislatoris. Secundum, & tertium habent infallibilitatem ex parte quidem obiecti, seu principiorum.



deductorum, non tamen semper ex parte deducentis, & operantis, etsi enim principia illa primæ veritati innitantur, ac proinde omnimodam infallibilitatem habeant; quia tamen aliquando contingit illa ignorare, aut varijs disputationibus inuolui consequenter fit, ut conscientia operantis ob intellectus humani imbecillitatem etiam inculpabiliter, aut in errorem, aut in dubietatem, aut in opinionem incidat.

### QVÆSTIO III.

#### *Quid sit opinio.*

**N**ot. Quòd quàmuis opinio, quæ est assensus intellectus alicui propositioni, non sæpè confundatur cum conscientia probabili, attamen in rigore discrimin est inter opinionem, & conscientiam probabilem; eo quia opinio versatur circa aliquod se tenens ex parte præcedentis syllogismi practici, de quo supra &c. Verùm conscientia probabilis est concl. deducta ex ipso syllogismo practico, quæ est regula immediata hic, & nunc aliquid agendi. Itaque conscientia formatur, & deducitur ab examine duarum opinionum resolvendo in casu particulari posse vnam, vel alteram eligi.

Concl. Opinio est assensus rationis alteri parti propositionis contrariæ, vel contradictoriæ ex principijs tantum probabilibus cum aliquali formidine partis oppositæ. Hæc conclusio videtur communis, & sic explicatur. Dicitur primò assensus, quia quamdiù ratio non assentitur opinio dici nequit, sed vel argumentatio, vel ratiocinatio, vel potius dubium dici potest: dicitur rationis, etenim siue ab extrinseca auctoritate, siue à principijs, & argumentis assensus procedat, ad hoc ut opinio vocetur rationis, inclinationem requirit, alias potius vocari deberet resignatio, quàm opinio e. g. Regularis credit se non teneri ad ieiunium, idquè non ob aliud quàm, quia superior dicit, & sic cum formidine oppositi, si ratiocinativè concludat simili argumento: quod superior asserit, possum licitè sequi, vocari debet opinio, etsi fundamentum sit ab extrinseco: nam ratio non mouetur ad assentiendum, nisi ex aliquo fun-

fundamento intrinseco, secùs autem si laicus simplex, & idiora existimat se non teneri ad ieiunium, quia superior dicit, & sic potius resignatio, non opinio appellanda est; dicitur alteri parti propositionis contrariæ, vel contradictoriæ, nam si ratio neutri parti assentiatur, non opinio, sed dubium vocatur: si propositiones sint disparatæ, non vocatur opinio, sed simplex resolutio. Vnde proprietas opinionis, est, quod ea subsit semper formidini de opposito, quia nimirum oppositum semper habet: dicitur ex principijs tantum probabilibus, ut opinio discernatur à scientia: deniquè dicitur cum aliquali formidine partis oppositæ; Nam duplex est formido, alia intrinseca, alia extrinseca: intrinseca dici solet etiam practica, extrinseca speculatiua. Prima est, quæ ipsum operantem reddit anxium in iudicio practico rationis eo tempore, quo operatur, ita ut nequaquam apud se ipsum statuatur, quod hic, & nunc hoc, vel illud agere, vel omittere licitè possit. Secunda est, quæ etsi operans intrinsecè, seu iudicio practico sit sufficienter resolutus, quod hic, & nunc agere, vel omittere licitè possit, ab extrinseco tamen timet, ne iudicio suo speculatiuo de tali re, vel actione subesse possit aliqua falsitas. Itaque opinio ad hoc, ut sit vetè probabilis, excludere debet ab operante primam formidinem, nempe intrinsecam, & practicam, tamen non est necesse, quod excludat formidinem speculatiuam, & intrinsecam.

Quæres. Quotuplex sit opinio.

Resp. Prima diuisio opinionis est in speculatiuam, & practicam. Speculatiua est illa, quæ tantum gratia sciendi est, & nullatenus refertur ad actionem, dixi nullatenus, si enim aliquo modo ad actionem, vel operationem referatur, tunc debet dici practica e.g. opinio speculatiua: An aliquid sit peccatum, vel non, & huiusmodi &c. ethi excitentur primò ratione discendi, attamen quia, multarum practicarum notitia ab illis dependet, reuerà dicendæ sunt practicæ.

Secunda diuisio est in opinionem probabilem, & improbabilem. Prima dicitur, quæ ex principijs probabilibus opinanti, siue ex ea operanti nascitur, notanter dicitur opinanti, seu ex ea operanti, non enim sufficit, ut principia alteri sint probabilia, sed debent esse probabilia etiam

etiam respectu eius, qui ex ea operatur, quia opinio est directiua operationis; ut autem operatio censeatur honesta, & prudens, eius principia debent esse probabilia ipsi operanti. Probabilitas autem alia est intrinseca, alia extrinseca, prior dicitur, quæ innititur rationibus fundamentalibus desumptis, vel ex obiecto, vel ex circumstantijs, & conditionibus, vel ex alijs adiacentibus; posterior est illa, quæ oritur ex principijs probabilibus extrinsecis, quæ sunt auctoritas, & probitas, & doctrina auctorum, interpretatio communis, & usus proborum &c. Insuper datur etiam opinio probabilis utraque probabilitate, nempe intrinseca, & extrinseca. Opinio improbabilis dicitur, quæ nec à sufficienti auctoritate, nec à ratione probabilis saltem respectu operantis, & opinantis originem ducit, huiusmodi sunt quædam opiniones, quæ à modernis Theologis circumferuntur, quæ potius speculatiuè probantur, non practicè.

Tercia diuisio, quæ desumitur à materia, vel obiecto, est in opinionem iuris, & in opinionem rei, seu facti. Opinio iuris est, quæ versatur circa ius prohibens, vel præcipiens, videlicet, quando altercantur Doctores. An aliquis actus sit prohibitus, nec ne, præceptus, vel non. Opinio rei est, quæ versatur circa rei substantiam, aut internam qualitatem, ex qua dependet effectus bonus, vel eius substantia, & moralitas; tales sunt opiniones de materia, & forma Sacramentorum, de potestate, & iurisdictione Ministrorum in Sacramentis; de materia, & forma contractuum, ad hoc ut subsistant, & apud Medicos de perniciæ, vel bonitate pharmacorum, & Medicinarum.

Opinionum probabilium alia est probabilior, alia minus probabilis; prima dicitur, quæ videtur, seu apparet niti maioribus, & firmitioribus rationibus, aut quæ maiori auctoritate fulcitur. Secunda est, quæ minoribus, seu minus firmis rationibus, & minori auctoritate niti censetur; denique opinionum probabilium alia dicitur tutior, alia minus tuta: Tutior est, quæ magis remouet à peccato, eiusque periculo, perpensis omnibus circumstantijs, vel quæ ad finem, seu effectum est magis utilis, & secuta, siquidem ratio magis tuti, siuè securi non semper ab ipsa re mensuranda est, sed frequentius à circumstantijs, seu ab effectu, vel utilitate rei.

*Vtrum liceat operari ex quacumque opinione probabili.*

**N**Ot. Quod in lege Diuina naturali, vel positiua non datur per se opinionum probabilitas quoad substantiam præcepti, eo quia vel constat legem esse Diuinam, vel non constat; si constat esse iam datam absque dubio obligat, nec opinionibus humanis subijci potest, si non constat, tunc melior est conditio possidentis, ac proinde non obligat, & licet nulla dari possit opinio quoad substantiam præcepti, seu legis, ut indicauimus, attamen dari potest quoad aliquas circumstantias, quæ quidem circumstantiæ potius afficiunt actum, seu factum, quàm ipsam legem: e.g. An Machabæi in sabbato nolentes pugnare, quia festum erat, & se permittentes occidi, peccauerint, vel meritorie egerint. Cæterum est receptissima sententia Theologorum dari opinionum probabilitatem in lege humana, tam Ecclesiastica, quam ciuili, seu politica, quia intellectus noster natura sua fallibilis est, & in multis ignorans, & obscurus, ex quo fit, ut quæ per se, & simpliciter dependent à lege humana, Epichæia, interpretationi, & varijs dubitationibus, ac proinde Doctorum opinionibus subiacent.

I. Concl. Nunquam licet uti aliqua opinione probabili cum formidine intrinseca, & practica oppositi. Hæc est communis sententia Theologorum. Prob. concl. unica ratione. Formido intrinseca, & practica oppositi reddit operantem anxium, & irresolutum in iudicio rationis; sed nulli licet cum tali anxietate, & indeterminatione agere, quia imprudenter se gereret: ergo nunquam licet uti aliqua opinione probabili cum formidine intrinseca, & practica oppositi; Necus autem est discurrendum de opinione probabili cum formidine extrinseca, & speculatiua oppositi; nam talis formido non tollit certitudinem practicam, & moralem, qua quis moraliter certo scit posse operari, & ad agnoscendam talem opinionem probabilem habentem certitudinem moralem, & practicam aduertit Marchartius plura desiderari: Primò operantem respicere debere, quæ controuertitur, ut certo concludat opinionem non

non continere aliquam manifestam falsitatem, sed siue in se, siue ab extrinseco in illa apparere aliquam veritatem. Secundò certitudinem in opinione morali practica requisitam maximè respicere actionis moralitatem, & honestatem; itaut quamuis sit altercatio de re apud Doctores, tamen operans iudicat se certò, & tutè operari, & certitudo operationis non tam refertur ad rem, quæ controuertitur, quàm ad ipsam operationem, seu actionem, quæ, etsi ex obiecto non omninò certa, ex natura tamen moralitatis humanæ certè tuta est, quia in operando ad plura non tenetur homo, quam, ut adhibita ordinaria vigilantia, bona fide credat se honestè agere ex rationabili motiuo, quod semper in opinione probabili inuenitur. Neque enim semper magis apparentia sunt magis vera, neque quod multitudinem Doctorum pro se habens, certiorè habet veritatem, sed interdum in concilio seniorum præualet Daniel, & quàmuis loquendum sæpè ut multi, sapiendum tamen ut pauci, & cum paucis: hæc Marchantius.

II. Concl. In materia, & forma Sacramentorum nunquàm licet uti, opinione probabili, quamdiù possumus uti certa à Christo instituta, vel ab Ecclesia usurpata; hæc est Scoti in 4. d. 3. q. 2. quem preter Scotistas sequuntur quam plures Recentiores, ubi habet, quod Sacramenta non validantur ratione nostræ existimationis, & opinionis, sed prout in re, & iuxta Christi institutionem; quare cum Sacramenta sint mysteria omnimodæ veritatis nullam prorsus fallibilitatem admittere possunt, nec quidem materialiter sumptam: ergo non licet uti opinione probabili, quamdiù possumus uti certa &c.

Confirmatur. Etenim, si quis posset in Sacramentis uti opinione probabili, relicta certa, se exponeret periculo nihil faciendi; cum effectus Sacramentalis non possit suppleri per quamcumque probabilem rationem, sed alligatus sit signis Sacramentalibus à Christo institutis, & ab Ecclesia usurpatis; sed ille, qui periculo se exponit non agit prudenter: ergo non licet uti opinione probabili relicta certa. Hæc doctrina explicari potest huiusmodi exemplo: Etsi apud Auctores sit probabilis opinio, quod liceat in lixiuio, vel tenui brodio aquæ, in quo decocta est caro, baptizzare, tamen ubi adest aqua pura, non potest quis uti lixiuio.

Idem

Idem dicendum est de nonnullis formis, quæ ut probabiles assignantur ab aliquibus auctoribus e. g. Baptizzo te in nomine Genitoris, Geniti, & Spirati. Immo oppositum conclusionis videtur damnatum ab Innoc. XI. in propositione quæ inter damnatas est prima.

Dices. In necessitate licet uti huiusmodi materia, nempe lixiuio, deficiente aqua: ergo censetur fieri verum Sacramentum cum tali materia; ac proinde qui utitur eadem materia extra necessitatem, non se exponit periculo nihil faciendi. Resp. neg. conf. ratio est, quia in necessitate iudicatur potius esse baptizandum in lixiuio, quàm relinquere hominem absque Baptismo, etsi talis Baptismus non sit omnino certus, sed tantum licitus, nam quæcumque materia speculatiue probabilis in casu necessitatis assumi potest, ut secundum charitatem subueniamus proximo ob periculum damnationis.

III. Concl. nunquam licet absque peccato uti opinione probabili etiam extra Sacramenta, relicta sententia certa, & infallibili; hæc pariter videtur communis.

Prob. ubi datur sententia certa, & infallibilis, non censetur illa opinio absolutè, & per se probabilis, cum omnis opinio semper aliquid fallibilitatis, & formidinis oppositi includat, qua ratione censetur potius temeraria, & periculosa; imò & falsa, quia oppositum, seu contradictorium sententiæ certæ, & infallibilis non potest esse nisi falsum, aliter oppositum, & contradictorium alicuius propositionis infallibilis veritatis, possent aliquo modo simul esse vera, quod nulla ratione potest dici: ergo non licet uti opinione probabili relicta sententia certa.

Confirm. quia opiniones, quæ, data certa, & infallibili contraria, dicuntur probabiles, non censentur probabiles simpliciter, & per se, sed respectu perplexitatis, aut impossibilitatis utendi contraria certa, aut respectu alicuius alterius præcepti concurrentis, & earum promouentis, ut dictum est de Baptismo in lixiuio.

III. Concl. Opinio probabilis consequens non iustificat factum præcedens, sed ad conscientiam probabilem saluandam requiritur, ut assensus vel antecesserit, vel fuerit actum ipsum committatus. Explicatur concl. Quidam Presbyter diuersas conuentiones fecit suæ cum Collatore



Beneficij, siuè cum Beneficiario resignante, aut commutante, adhibita debita reflexione, & deliberatione ad id, quod agebat, post factum occurrunt ei variæ anxietates, ne Simonia aliqua interuenerit: examinat diuersas opiniones, reperit unam ex illis probabilem sibi fauentem, eamque applicat; ista postrema applicatio opinionis non sufficit ad iustificandas conuentiones priores factas à peccato præterito; raro est, quia Presbiter imprudenter egit, & periculo peccati manifestè se exposuit in materia, quam debebat prius examinare, & de illa inquirere antè factum, ut prudenter in huiusmodi re se gereret. Quare aduertant, qui post actus commissos, vel omisos, antequàm vadant ad Confessionem, auctores reuoluunt, ut aliquem sibi fauentem reperiant, & ut opinionem aliquam probabilem suo facto applicare possint, nam studium postea factum, & opinio applicata facto præterito nequit iustificare actionem; ut eleganter discurret Petrus Marchant.

Arg. cont. 1. concl. unico arg. Esse certum, & incertum sunt contradictoria, sed opinio habet certitudinem, & incertitudinem ergo opinio non potest esse sufficiens ad prudenter operandum etiamsi sit probabilis.

Resp. dist. mai. Certum & incertum sunt contradictoria si dicantur de eodem respectu eiusdem, & eodem modo, conc. mai. si diuerso modo, neg. mai. ad min. opinio probabilis habet certitudinem, & incertitudinem eodem modo, neg. min. diuerso modo conc. min. nam etsi respectu prudentis iudicij, ac cuiusdam possibilitatis in genere posset esse quædam incertitudo, tamen respectu actionis hic, & nunc, est sufficiens certitudo ad operandum, ut etiam deduci potest ex suprà notatis de certitudine practica, & speculatiua.

## QVÆSTIO V.

*Vtrum in concursu duarum opinionum, quarum una est probabilis, altera est probabilior possit quis, relicta probabiliori, uti minus probabili.*

**N**ot. 1. quod opinio præter formidinem speculatiuam, & practicam includit etiam formidinem aptitudinalem,

lem, seu virtualem, quatenus opinio est talis cognitio ex genere suo, ut si non actu semper annexam habeat formidinem, eam tamen habere potest, quia tum ex obiecto suo, quod est contingens, tum ex medio ad illud procedendi, quod est probabile tantum, potest illi subesse falsitas; neque ex hoc sequitur tolli in opinione determinationem ad alteram partem, etiam quando interuenit actualis ipsa formido, hoc enim est proprium solius dubitationis, & suspicionis, ut infra dicemus; Quare formido solum efficit, ut assensus determinatus alterius partis non sit cum euidencia, & certitudine; siquidem intellectus determinatè sic assentitur illi parti, ut iudicet formaliter, vel virtualiter obiectum illud probabile posse aliter se habere; itaque propriè loquendo formido tollit firmitatem assensus, non verò determinationem.

Not. 2. Quòd maior, vel min. probabilitas, ut docet Scotus in Reportatis prouenit ex mai. vel min. acumine intellectus inuenientis, seu inuestigantis rationes, quibus prob. mai. vel min. probabilitatem alicui propositioni inesse: Unde non est maximum discrimen inter opinionem minus probabilem, & probabiliorem, quia nec maior probabilitas attingit perfectam certitudinem, & veritatem, nec minor probabilitas declinat in dubium; sed vtraque aliquatiter accedit ad veritatem, & certitudinem saltem moralem; ita tamen, ut tam opinio probabilior, quàm minùs probabilis possit esse falsa: ex quo fit, ut successu temporis plures opiniones, quæ apud antiquiores Doctores erant probabiles, apud Recentiores modo sint minùs probabiles: Exemplum esse potest de recitatione officij; nam non pauci Doctores antiqui docuerunt Sacerdotem teneri sub pœna peccati mortalis recitare matutinum ante celebrationem Missæ, quæ quidem opinio à Recentioribus validissimis rationibus est reiecta, sic etiam in speculatiuis eadem ratio currit.

Not. 3. Quòd in hac famosa controuersia tres afferuntur sententiæ. Prima asserit non esse licitum sequi opinionem minus probabilem, & minus tutam, relictâ probabiliori, & tutiori, & hæc, ut notat Amicus disp. 15. sect. 4. est fere omnium antiquorum Theologorum, pro qua citari solent Adrianus, Henricus, Gerson, Gabriel, Maior, & alij.

Ex.

Ex Recentioribus verò eam ex professo tuentur Comitolus, Philetus, Prosper Fagnanus, & Merenda iuris peritus, qui duo ultimi acerrimè contendunt, nunquam licitum esse operari cum opinione minus probabili, relicta probabiliori. Secunda sententia ex diametro opposita priori concedit licitum esse usum opinionis probabilis in omni casu, & materia, estò adsit altera opinio probabilior, & tutior, ita Marcus Vidalis, Ouiedo, & alij. Tertia sententia media via incedit asserendo licere sequi opinionem minus probabilem, & minus tutam, relicta probabiliori, & tutiori, non tamen in omni casu, & materia. Quare excipit casus valdè graues, ut de Sacerdote Sacramenta administrante, de medico remedium applicante, de iudice sententiam ferente, de aduocato causam patrocinate, de rege bellum gerente, in his enim, & similibus casibus, in quibus sequendo opinionem minus tutam, ac minus probabilem grauia damna emergere possunt, docent opinionem tutam esse amplectendam, vel saltem probabiliozem, si tuta nō sit obuia, ita quàm plures Scotist. signanter Villalobos, Vulpes, Portel, Herincx, Marchantius Bonauentura Baronus in Eth. act. 2. Mastrius, & alij, & est sententia communior, & magis recepta à Recentioribus.

I. Concl. Potest quis in concursu duarum opinionum, quarum una est probabilior, & tutior, altera minus probabilis, & minus tuta, relicta probabiliori, sequi minus probabilem, & minus tutam, non tamen in omnibus, ut supra indicauimus, & ostendetur in 2. concl.

Prob. 1. auct. Scoti in 4. dist. 15. q. 2. ubi docet furantem in extrema necessitate, non teneri ad restitutionem, etiam cum ad pinguiorem aduenerit fortunam, quàmuis opposita opinio sit tutior, & secundum aliquos etiam probabilior, & q. 2. Prologi videtur docere, quod in rebus dubijs locum habet labor Doctorum, & expositorum, ex quo sequitur inquit Mastrius in Theologia morali disp. 1. q. 4. art. 1. quod quando Doctores docent aliquam opinionem esse probabilem, etsi sit minus tuta, potest quilibet eam sequi absque ullo periculo peccandi, alioquin si semper pars tutior esset amplectenda, non liceret unquam ad consilium peritorum recurrere; unusquisque enim per se nescit, quæ sit tutior, & minus tuta, cum in lege Christi non detur

perplexitas; hæc tamen ultima verba Mastrij pace tanti viri non mihi satis probantur, nam manifestum apparet, non omnibus recurrentibus ad peritos innotescere, quæ opinio sit probabilior, vel minus probabilis, & minus tuta.

Prob. nostra assertio à priori. Qui operatur secundum opinionem minus probabilem, & minus tutam non imprudenter, sed prudenter operatur, ergo potest quis sequi opinionem minus probabilem, & minus tutam, relicta probabiliori. Prob. ant. Ad hoc, ut aliquis prudenter operetur non requiritur, ut operetur cum certitudine, & sine periculo violandi aliquod præceptum, quia si talis obligatio esset, non sufficeret sequi opinionem probabiliorē, in qua sæpè potest esse huiusmodi periculum, cum experiamur, opiniones, quæ aliquo tempore censebantur probabiliores, ut supra notauimus, deprehensas fuisse falsas à Doctoribus recentioribus: ergo non est obligatio operandi sine tali periculo, sed sufficit operari ea ratione, ut prudenter existimetur non esse peccatum in tali opere: ergo operando quis iuxta opinionem probabilem prudenter operatur.

Confirmatur auct. Arist. lib. 2. Ethicorum cap. 6. ubi tradit, prudenter operari illum, qui sequitur opinionem hominis sapientis, & probi: ergo &c. Prob. 3. Sententia de probabilitate asserta in conclusione est magis consona legi Diuinæ, & humanæ; humanæ quidem, quia Iuristæ, & alij Doctores affirmant in rebus humanis præferendas esse opiniones benigniores iuxta legem benignius §. de lege, & iuxta cap. fin. de transl. Diuinæ etiam, quia benigna est, ut dicitur Matth. 11. *Iugum enim meum suauis est*; & Ioan. 5. *Mandata eius graua non sunt*; ergo sententia de usu probabilitatis rectè, & tutè amplecti potest, non enim tenemur ad illud, quod perfectius est, & securius, sed satis est, quod in praxi est rectum, & securum, alioquin teneremur consilij euangelicis. Accedit etiam auctoritas non solum primorum Theologorum nempe, Alensis, D. Bonau. D. Thomæ, Scoti, & aliorum, qui in diuersis materijs tam speculatiuis, quàm moralibus amplexati sunt opinionem minus probabilem, & minus tutam, relicta probabiliori, & tutiori, verum etiam summorum Pontificum, qui in facti contingentia secuti sunt opinionem minus probabilem.

bilem, vt patet de Honorio XI. qui in dispensatione professionis Religiosæ ad Matrimonium contrahendum, sequutus est opinionem Ricardi minus probabilem; de Greg. VII. Martino V. Eugenio IV. Greg. XIII. qui in Matrimonio rato illud dissoluendo operati sunt contra opinionem communem probabiliorem, & tutiorem, D. Bonau. Scoti, & aliorum Theologorum, ut videre est apud Recentiores, qui hanc materiam latè pertractant; ergo &c.

II. Concl. Non tamen est licitus usus opinionis probabilis relicta probabiliori, & tutiori in casibus grauioribus, qui versantur circa validitatem actus, seu in quæstionibus facti, huiusmodi sunt, administratio Sacramentorum, sententia iudicialis, Porrectio Medicinæ, Aduocatio, Bellum, & similia; hæc est Villalobos, Layman, Portel. Salonij, Herincx, Mastrij, & aliorum. Prob. conclusio quoad 1. p. nimirum de administratione Sacramentorum. Præceptum Charitatis obligat, ut caueamus graue damnum, aut periculum proximi, neque indigenti adhibeamus remedia incerta, & periculosa, dum possumus uti certis: ergo non potest quis in administratione Sacramentorum sequi opinionem probabilem relicta certa, & probabiliori; hinc meritò oppositam sententiam tanquam scandalosam, & perniciosam damnauit Innocentius XI. in prima propositione, quæ sic sonat. *Non est illicitum in Sacramentis conferendis sequi opinionem probabilem de valore Sacramenti, relicta tutiori, nisi id vetet lex conuentio, aut periculum grauis damni incurrendi: hinc sententia probabili tantum utendum non est in collatione Baptismi, Ordinis Sacerdotalis, aut Episcopalis.* Prob. 2. pars de sententia iudiciali, nam oppositum damnatur ab eodem Pontifice tanquam doctrina scandalosa, & perniciofa in propositione secunda his verbis. *Probabiliter existimo Iudicem posse indicare iuxta opinionem etiam minus probabilem.*

Prob. denique concl: quoad omnes partes unica ratione; sed validissima. Valor Sacramentorum, Ius tertij in res liti subiectas, expulsio morbi, & vita, aut facultates subditorum in regno non pendent ex iudicio magis, vel minus probabili; sed aliundè videlicet Sacramenta ex institutione Christi, sententia ferenda ex legum dispositio-

ne, & iustitia causæ publicæ in actis deducta, quoad iudicem, ex efficacia medicinæ, quoad Medicum, & maioris iuris apparentia quoad Aduocatū, & ex dominio intrinseco vitæ, ac facultatum quoad Regem: ergo in his casibus non licet uti opinione probabili, & minus tuta, relicta probabiliori, & tutiori.

Arg. cont. 1. concl. & primò auctoritate desumpta ex lege Canonica. Ex cap. de Clerico excom. & cap. Si quis autem de poenitentia distinct. 7. habetur hæc regula generalis. *In dubijs tutior pars est eligenda*; ergo non potest quis sequi opinionem minus probabilem relicta probabiliori.

Resp. allegata capita Iuris solum statuere regulam, quæ opinio, stante dubio, sit amplexanda, nempe tutior, cum non liceat cum dubio practico operari; imò quando operans se determinat ad alteram partem dubij, tunc non ampliùs habet rationem dubij, sed opinionis, & sic tutiorem partem sequitur.

Arg. 2. auct. D. Aug. libro de utilitate credendi, ubi indicat, opinionem, seu opinari non esse sine vitio; ergo opinio minus probabilis non potest amplecti sine vitio.

Resp. quod argumentum nimis probans, nihil probat, quia auctoritas adducta probat, neque opinionem minus probabilem, neque magis probabilem esse licitam, dicente D. Aug. simpliciter, & absolutè opinari non esse sine vitio; quare interpretes expendunt ly opinari, seu opinionem, pro falsa persuasione scientiæ de re, quæ ignoratur, ut infra ipsemet Aug. se explicat dicendo. *Proprium est opinantium id est eorum, qui arbutantur scire, quod nesciunt.*

Arg. Iurisperitus Merenda propugnator opinionis probabilioris. Virtutis operationes sunt firmæ, & solidæ: ergo cum prudentia sit virtus intellectualis debet in suo obiecto, & in suo actu infallibilitatem, & certitudinem, rectitudinis inuoluere, & ob id Aristotiles lib. 6. Eth. c. 3. exclusit opinionem à numero virtutum, cum careat certitudine, & opinionem honesti nō esse iudicium prudentiæ; quia non ita fertur in suum obiectum, ut non possit esse falsa: ergo cum iudicium conscientiæ debeat esse actus prudentialis nequit deduci ex opinione probabili.

Resp. etiam aduersarium teneri soluere huiusmodi argumentum, cum etiam opinioni probabiliori possit subesse



se falsum; quare dicimus, quod prudentia, cum sit virtus practica, & non speculatiua postulat certitudinem moralem, & practica, ac proinde, etsi eius obiectum sit interdum speculatiue falsum, practice tamen est semper verum, & sic iudicium conscientie est certum de honestate actionis.

Contra. Si iudicium conscientie probabilis est certum, sequitur, quod talis conscientia non est dicenda probabilis, sed certa: at hoc non est admittendum: ergo &c.

Resp. neg. sequelam; ratio est quia conscientia non dicitur à DD. probabilis ratione proprii ministerij, seu intrinsecè, sed ratione antecedentis, seu extrinsecè quatenus ad illius formationem cōcurrit opinio incerta circa antecedens sylogismi practici ita Herincx p.2. disp.4. q.3. n.24.

Arg. Si esset licitum sequi opinionem minus probabilem, sequeretur, quod unusquisque pro suo arbitrio posset operari, cum omnia sint posita sub opinione, maxime in nostra tempestate, quod est manifesta perniciēs disciplinæ Christianæ; ergo &c. Resp. neg. sequelam, dicimus enim posse quis sequi opinionem minus probabilem, verè tamen probabilem, idest rationibus sufficientibus, & auctoritate fulcitam, & sic non dicitur unusquisque operari pro suo arbitrio.

Arg. cont. 2. concl. In prima conclusione asseritur vsus opinionis minus probabilis: ergo consequenter talis usus admittendus est in omnibus casibus absque ulla exceptione. Conseq. pater, quia nulla adduci potest euidentis ratio disparitatis. Resp. neg. conseq. & ratio est, quia in 1. concl. agitur tantum de honestate actus, honestas autem actus, & conformitas ad legem præcipientem totaliter pendet ex prudenti iudicio, & estimatione operantis, per quam ei proximè proponitur lex præcipiens. Verum in 2. concl. agitur de valore actus, qui non dependet à iudicio nostro, sed aliunde, ut in concl. indicauimus. Itaque ratio disparitatis est euidentis, ac manifesta, cum 1. concl. versetur circa honestatem actus, seu quæst. iuris, & secunda circa valorem actus, & quæst. facti.

Quæres 1. An possit esse aliqua opinio magis tuta, sed minus probabilis. Resp. cum Mastro ex doct. Scoti posse aliquam opinionem esse magis tutam, quatenus remouet omne

omne peccatum, & adhuc esse minus probabilem, ex eo quod intellectus minores rationes pro ea habeat; ad rem. Scorus in 4. d. 15. d. 2. §. ad argumentum quærit. An futurum in extrema necessitate factum obliget postea ad restitutionem in pinguiori fortuna. Certè, quod tutius esset restituere, nam sic; remouetur omne periculum peccati tamen efficaciores sunt rationes, quod non teneatur hic, & nunc ad restitutionem, quia res ablata in extrema necessitate censetur iure poli fieri propria. Hinc colligitur aliud esse unam opinionem esse altera probabiliorem, aliud esse tutiorem; siquidem maior securitas sumitur ex ordine ad obseruantiam legis, quæ maior semper est in opinione affirmante actum esse prohibitum, quia eam sequendo nemo malè agit; maior autem probabilitas opinionis sumitur ex ordine ad veritatem magis, vel minus ostensam rationibus, & testimonijs, quæ maior probabilitas equè benè potest esse in ea opinione, quæ dicit actum esse licitum, & in opposito actum esse illicitum; cum ergo dicitur ex opinionibus probabilibus unam esse altera tutiorem, id explicant recentiores de peccato materialiter sumpto esse intelligendum, non autem de peccato formaliter sumpto, eo quia loquendo de peccato formaliter sumpto una non debet dici tutior altera; cum aliqua opinio dicatur tuta, eo quia utens illa in operando non peccat; est enim recta regula honestè operandi, ac proindè una opinio nequit esse tutior altera formaliter, sed tantum materialiter, quia sequens opinionem probabilem relicta tutiori, ad summum se exponit periculo faciendi rem materialiter malam, sicut si quis ignorans inuincibiliter esse feriam sextam carnes comedat.

Quæres 2. An inter opiniones verè probabiles teneatur quis per se tutiorem sequi. Resp. inter opiniones verè probabiles neminem per se teneri sequi tutiorem: ratio est manifesta ex dictis, quia supponitur omnes opiniones verè probabiles esse in operando tutas, cum omnes excludant periculum peccati eo ipso, quod veritatem probabilem dicunt, notanter dicitur per se non teneri, nam per accidens interdum tenetur, eo quia, etsi manendo in precisa actione, quæ sit ex opinione probabili, tutè operatur, nec possit peccare; attamen quia ex occasione ad operationes

illius sequitur peccatum, vel proximum peccandi periculum tenebitur abstinere, non tam ab opinione, quàm ab operatione consequente opinionem, non quia opinio minus tuta est, sed quia operatio periculum annexum habet: ita ex communi discurrit Marchantius, qui subdit hanc regulam. Quandocunque sequitur ex aliqua opinione graua men operanti, vel alicui tertio, preferri semper potest alia opinio, & aliquando consultius est sequi illam, quæ à grauamine absoluit: hæc enim vocatur ab aliquibus tutior propter obligationem charitatis, quia quis tenetur suæ libertati, vel alienæ utilitati consulere e. g. Est opinio probabilis asserens legem ieiunij esse latam, vel obligare: alia autem similiter probabilis negat aut legem latam esse, aut obligare, in tali casu potest quis, & aliquando consultius est præferre opinionem asserentem legem ieiunij non esse, latam, aut non obligare iuxta regulam iuris: *Melior est conditio possidentis*

Quæres 3. Quæ opinio censetur verè probabilis.

Resp. Petrus Marchantius hoc opus, hic labor; quot enim capita, tot sensus, & qui alicuius opinionis assertor est, illi veram probabilitatem assignat, & iam cruda illa, assertio incipit in auribus prurire, quod unius, aut alterius auctoris dictum fundet opinionem probabilem, quod, quàm sit periculosum sentire, appello ad solum sapiētis iudicium. Vndè asserit idem Marchantius, illam solam existimari debere opinionem probabilem, quæ principiis legis Diuinæ, naturalis, & positivæ, & præceptis charitatis est conformis, siuè non repugnat; ex qua doctrina infert, periculosum esse sequi quorumlibet Auctorum, & Doctorum opinionem ex sola auctoritate, quod illas suis libris referant, & permittantur; neque enim prælum, neque impressio, aut etiam censura euulgari permittens librum, dat auctoritatem singulis opinionibus, & Auctoris sententijs, quæ in libro reperiuntur; neque liber ipse eo quod approbatus est, indicat omnes opiniones approbatas, sed sufficit, quod liber, siuè Auctor nihil contra fidem, aut bonos mores apertè docet, aut apertè errores seminat: hinc meritò ab Alexand. VII. damnata fuit hæc propositio, quæ in ordine est 27. *Si liber sit alicuius Iunioris, & modernæ, debeat opinio censeri probabilis, dum non constet reiectam esse à Sede Apostolica*

*licet tanquam improbabilem* : Et ab Innoc. XI. damnata fuit hæc alia propositio, quæ in ordine est tertia. *Generatim dum probabilitate sive intrinseca, sive extrinseca quantumvis tenui, modo à probabilitatis finibus non exeat, confisi aliquid agimus, semper prudenter agimus* : quæ quidem proposito est eque temeraria, & scandalosa, ac prima ; non enim sola auctoritas Doctorum fundare potest opinionem vere probabilem, cum vera probabilitas sumenda sit primò, & principaliter à ratione, non ab auctoritate dicentium, quia sola probabilitas extrinseca non sufficit ad prudenter operandum : itaque imprudenter quis agit semper, qui levi ratione ductus, & tenui operatur, nec quælibet tenuis probabilitas intrinseca est sufficiens ad rectè operandum.

Quæres 4. Vtrum sententia unius Doctoris possit facere opinionem verè probabilem.

Resp. Nolo hic reticere, quid sentiat Caramuel circa præsens quæsitum, dicit ipse t. 1. suæ Theologiæ fundamental. tres, vel quatuor Doctores facere posse opinionem probabilem, imò & unicum Doctorem, eò quia unus Doctor, qui librum edidit docendo aliquam opinionem novam, habet pro se sui libri Censores, quatenus approbantes librum approbant etiam omnem doctrinam in eo contentam, quasi Censores examinantes librum addant ei quandam auctoritatem, imò & opiniones auctoris approbando faciant suas, & sic opinio nova alicuius Doctoris erit verè probabilis, cum aplectatur etiam ab iisdem Censoribus. Verùm apparet, Caramuelem in hac materia minus rectè loqui ; siquidem approbatio Censorum, ut suprâ notauimus, non tribuit maiorem probabilitatem opinionibus in libro insertis, quam in se habeant, ac proinde opinio Caramuelis viri alioquin doctissimi non est tenenda, sed dicendum cum Valentia q. 24. Vasquez. d. 62. c. 4. Sanchez lib. 1. sum. c. 9. & comunitè cum Recentioribus, ut refert, & sequitur Caspensis disp. 3. de Conscientia, quod opinio unius viri docti, ac probi, & in materijs moralibus benè versati est probabilis in praxi ; ratio est, quia opinio probabilis est, quæ non levi, sed graui fundamento nititur, auctoritas autem unius viri probi, docti, & versati in moralibus non est leue fundamentum in re, aliàs incerta, & obscura : ergo reddit opinionem probabilem in praxi.

Insuper opinio singularis, quam contra communem sequitur vir Doctus optima ratione ductus, postquam partis oppositæ fundamenta examinavit, censetur probabilis in praxi à præcitatis Doctoribus, qui hac ratione ducuntur. Probabilitas opinionis in re morali non tam ex numero auctorum, quam ex præstantia, & gravitate ratione pensanda est; ergo quando opinio aliqua singularis fulcitur gravi auctoritate, & optima ratione post diligens examen fundamentorum partis oppositæ, & post manifestam solutionem rationum eiusdem, meritò censeretur debet non temeraria, non improbabilis, sed verè probabilis, quam doctrinam docuit etiam Scotus; & tantò magis huiusmodi doctrina militat in aliquo casu particulari non examinato ab alijs ex professo; quare, si contingat contractum aliquem facere, de quo Doctore non scripserint, vel saltem de aliquâ particulari circumstantia, sed solus Doctor iunior, & modernus, qui quod liceat de tali contractu, vel de alio casu particulari, resoluit, in tali casu opinio moderni Doctoris censeretur potest probabilis, nisi ratio evidens contrarium suaderet. Ita post alios tradit Fagnanus de opinione probabili, & Gabriel à S. Vincentio de remedio ignorantie disp. 12. ubi aduertit ex communi Doctorum consensu, quod licitum est sequi auctoritatem viri clarissimi, & in moralibus versatissimi, idquè habetur etiam l. Si pater ff. de solutione, & lege sept. Mense de statu hominum, quæ quidem doctrina intelligenda venit de Doctore, qui scripsit, & etiam de eo, qui consulit oretenus.

Quæres 5. Vtrum iudex, quando rationes hinc inde sunt æquè probabiles, possit arbitrari, ferendo sententiam in fauorem illius partis, quæ sibi placuerit.

Resp. certum esse non posse iudicem ob pecuniam acceptam sententiam dicere in fauorem unius præ alio, quando opiniones sunt æquè probabiles; oppositum enim damnatur ab Alexand. VII. in propositione 26. quæ sic habet: *Quando litigantes habent pro se opiniones æquè probabiles, potest iudex accipere pecuniam proferenda sententia in fauorem unius præ alio.* Dubium tamen moueri potest: An iudex habeat in sua potestate arbitrari inter opiniones æquè probabiles nulla accepta pecunia, vel alio munere, nam nomine pecuniæ non solum veniunt nummi, sed etiam omne id, quod est pretio estimabile.

Resp.

Resp. Quàmvis Alexander non damnaverit arbitrium iudicis, nisi pecunia accepta, nihilominus videtur damnatū ab Innoc. XI. in illa propositione paulò superiùs allata, in qua dicitur: *Iudicem non posse ferre sententiam iuxta opinionem, minus probabilem*, videlicet in ciuilibus quia in criminalibus ab omibus pro certo habetur; sed opinio minùs probabilis est, quod iudex possit ferre sententiam in fauorem unius præ alio, quando litigantes habent pro se opiniones æquè probabiles: ergo ex hac rectè inferitur non posse iudicem, etiam pecunia non accepta, inter litigantes arbitrari. Quod autem opinio minus probabilis sit illa, quam dicimus in minori, clarè constat; nam compertum est iudicem rationabilius, & æquiùs iudicare rem diuidendo, aut partes componendo eo ipso, quod in iure sint æquales, quàm si uni parti ferret sententiam fauorabilem: ergo etiam non accepta pecunia iniustè iudex potiùs uni, quàm alteri parti sententiam fauorabilem ferret: quod autem probabilius sit, iudicem teneri rem diuidere, aut partes componere, traditur à Diana in summa verbo iudex, & notat Mastrius cum Laiman tract. 5. de conscientia capite 5. & ratio potissima est, quia iudex non est dominus iuris, sed interpres, ac proinde ius suum cuique tribuere tenetur, quod non faceret, si ex duobus æquale ius ad aliquod habentibus totum uni tribueret; nam sic personarum acceptionem committeret contra regulam Iuris. *In iudicijs personarum acceptionis habenda non est*; itaque in tali casu, vel aliqua iusta compositio in partes litigantes facienda est, ad quam compelli possunt, vel uni dimidium, & alteri alterum dimidium Iuris, aut rei, de qualis, est adiudicari debet.

Queres 6. An licitum sit ex probabilibus opinionibus alter utram ad placitum, immò & minus probabilem contra propriam opinionem sequi.

Resp. breuiter. Ad hoc, ut quis in actionibus humanis prudenter operetur, exigitur, ut opinionem, quam in praxi amplectitur, faciat suam, nempe, ut, perpensis rationibus talis opinionis, formet probabilem conscientiam. Vnde non apparet aliqua difficultas de opinionibus æquè probabilibus respectu operantis, quò minus possit operari a seculo iuxta unam, modò iuxta aliam opinionem. Remanet igitur difficultas de opinione minus probabili. Quare



stando in fundamentis suprà positis; cum opinio minus probabilis, relicta probabiliore, possit in praxi amplecti, consequenter poterit quis modò probabiliorem, modò minus probabilem sequi, dummodò hic, & nunc existimet per reflexionem rationum esse verè probabilem; tali enim pacto eo ipso per reflexum iudicium propriam opinionem practice sequitur. Ita Herincx ex communi.

## DISPUTATIO II.

*De conscientia dubia, erronea, & scrupulosa.*

### QVÆSTIO I.

*Vtrum conscientia dubia sit regula sufficiens ad prudenter operandum.*

**N**ot. 1. Quòd dubium nil aliud est, quàm animi suspensio, qua neutri parti determinare assentitur: Si huiusmodi suspensio contingat per meram carentiam omnis actus rationis vocatur dubium negativum: si per actum positivum perplexitatis inter duas partes, vocatur dubium positivum, quia, licet ex utraque parte appareant rationes, attamen suspenditur assensus. Dubium autem positivum. Aliud est speculativum, aliud practicum. Hoc est hæsitatio, seu dubitatio de re aliqua, considerata prout hic, & nunc est cum omnibus suis circumstantijs, & in ordine ad operationem e.g. Si hæsitem, seu dubitem: An hodie sit ieiunandum propter alias circumstantias, quæ fortasse hic, & nunc possunt à ieiunio excusare. Illud est hæsitatio, seu dubitatio de re aliqua secundum se considerata abstrahendo à circumstantijs e.g. ut si simpliciter hæsitem, seu dubitem. An liceat die festo venari, hoc dubium dicitur speculativum; quia est sine omni exercitio operationis.

Not. 2. Quòd conscientia dubia, ut etiam supra indicavimus, sic definitur: Est illa, quæ rationibus inter se pugnantibus, siuè quæ ex diuerso dictamine practico ita suspensa, & fluctuans redditur, vt in neutram partem se resolvere possit; Obseruandum ulterius, quod conscientia dici potest dubia dupliciter: primò formaliter, & intrinsecè, & est

& est quando dictamen, & iudicium eius ita manet anceps, & suspensus, ut in neutram partem practicè inclinet: Secundò obiectiue, seu extrinsecè, & est quando obiectum, circa quod conscientia versatur, est reuera dubium, ita ut in alterutram partem nullatenus definiri possit: conscientia tamen in se, & intrinsecè ad unam partem se resoluit: e. g. hæsitat quis, an teneatur restituere agrum, quem, facta debita diligentia dubia fide possidet, dubitando esse alienum. Conscientia obiectiue manet dubia, quia facta, possibili inquisitione, non potest probare suum esse, & sicut non desunt probabilia argumenta, quæ probant esse alienum, ita sunt alia, quæ probant suum esse, unde quàmuis conscientia maneat obiectiue suspensa in his quæstionibus practicis, & conditionatis, videtur, quod si alienus est ager, tu non potest illum retinere, si tuus est, non teneris illum restituere, & consequenter iudicas obiectiue, siue respectu obiecti periculū peccati nō esse. Itaq; formaliter, & intrinsecè principio altero mouente se determinare potest non restituendo, quantumuis speculatiue dubius esset, quia in dubijs melior est conditio possidentis. Nos autem hic agimus de conscientia intrinsecè, & formaliter dubia.

I. Concl. Conscientia practicè dubia non est regula sufficiens ad prudenter operandum, ac proinde non est licitum operari, stante dubio practico: hæc est communis Theologorum sententia. Prob. 1. auct. S. Serip. & signanter ex D. Paulo ad Rom. 1. c. 4. *Quod non est ex fide peccatum est* idest, ut interpretantur Patres, quod non est secundum iudicium conscientiæ peccatum est; nam ibi fides pro conscientia usurpatur, & Ecclesiastici c. 3. *Qui amat periculū parabit in illo;* sed qui operatur cum dubio practico non operatur ex fide, & se exponit periculo peccandi: ergo non est licitum operari cum conscientia practicè dubia, ac proinde conscientia dubia non est regula sufficiens ad prudenter operandum.

Prob. ratione. Operans cum conscientia dubia ex modo procedendi conuincitur interpretatiue inclinare ad obiectum siue licitum, siue illicitum, neque curare, an sit peccatum, nec ne; sed certum est sic operantem se periculo peccandi exponere: ergo qui operatur cum tali dubio, non operatur prudenter, ac proinde nec licitè.

II. Concl. Licitum est agere cum dubio speculatiuo, a  
quan-

quando ex alijs principijs practicis, aut certis, aut opinatiuis suppetit iusta ratio formandi, & de facto formatur determinatum iudicium practicum, quod liceat hic, & nunc exercere talem actionem. Ita communiter Doctores, & signanter Villalobos, Caspensis, Herincx, Mastrius, & alij. Prob. Regula nostrarum actionum non est notitia speculatiua, quæ sistit in sola veritate obiecti cognoscendo, sed notitia practica, quæ omnium circumstantiarum qualitatem, & conditionem perpendit; unde ex aliqua occurrente circumstantia obiectum, quod secundum se, & speculatiuè apparet dubium, reddi potest practicè certum: ergo si hoc iudicium sit determinatum, etiam prudens actio hic, & nunc erit certa. Confirm. Etenim quamuis miles speculatiuè dubitet: An bellum sit iustum, tamen practicè rectè potest iudicare sibi licitum esse in tali bello militare, & tunc licitè militat persuadendo sibi iustum esse bellum, & iuste à Rege suis subditis præcipi militare. Cæterum aduertendum, quod à Doctoribus traduntur communiter aliæ diuisiones dubij. Aliud enim est dubium iuris, & aliud dubium facti; primum est, quod versatur circa aliquod Ius, siuè legem, nimirum dubitando, an sit aliqua lex lata, vel non. Item, an casu, quo sit lata, obliget. Insuper quamuis communiter obliget, an his circumstantijs, hoc, vel illo casu obliget. Secundum est, quo quis non dubitat de iure, vel lege, dubitat tamen de facto, vel faciendo aliquo actu ex lege resultante e. g. Scit aliquis absque ulla dubitatione vota facta esse adimplenda, dubitat autem primò an vouerit. Secundo stante hoc dubio: An teneatur votum reddere, & sic de singulis. Rursus dubium diuiditur, in dubium de honestate actus, & in dubium de obligatione actus. Primum est, quando dubitatur. An id, quod debet fieri sit per se, & ex sua natura bonum, vel malum. Secundum est, quando constat quidem ex se non esse malum, dubitatur autem an sit malum ratione præcepti, vel prohibitionis: e. g. Berta, quæ simplex votum castitatis emisit, dubitat, an possit nubere, non quia dubitet, an matrimonium sit malum, sed an sit licitum voto simplicis castitatis obstrictis.

Quæres 1. An, quando quis est dubius de honestate actus, possit cum tali dubio conscientiaæ agere.

Resp.

Resp. negativè, & ratio est, quia honestas est de intrinseca ratione actus moraliter boni, ac proindè, qui de honestate actus dubitat, manifesto periculo peccati se exponit; ergo non potest sic dubitans operari; secùs autem si dubium esset ab extrinseco, nempe ex ratione iuris, siuè legis; tunc enim aliquando dubius de lege prohibente potest ad actum, qui aliùs de se est honestus absque periculo peccati se determinare e. g. scit quis esse honestum per se conuersari charitatiuè cum homine, dubitat autem an sit excommunicatus, & consequenter an lege prohibente id sibi liceat, potest manente dubio conuersari, quia ut infra explicabitur: *In dubijs melior est conditio possidentis*

Quæres 2. Qualiter intelligi debeant illæ duæ regulæ iuris, quæ passim à Doctoribus allegantur, nempe. In dubijs melior est conditio possidentis. Item in dubijs tutior pars est eligenda, Resp. Doctores non parum variant in huiusmodi regulis explicandis, quas quidem explicationes adducere nimis longum esset, quare, omnibus omissis, amplector explicationem nostri Marchantij qui eas ita declarat. Duo illa axiomata Iuris non sunt sibi inuicem contraria, sed se inuicem adiuuant, & se explicant; non enim conditio possidentis melior dicitur, nisi quia contra peccati periculum, vel obligationis vinculum reddit possidentem, non obstante dubio, tutum, & securum; ac consequenter in dubijs ratio possessionis indicat partem tutiorem, siuè tutam, & securam, unde etiam concluditur: Tutior pars est sequenda, ita ut idem sit sequi meliorem conditionem possidentis in dubijs, ac sequi tutiorem partem. Quare in hac materia distinguere oportet duos possidentes, siuè possessores sibi contrarios. Prior possessor est lex, siuè sit iustitiæ, siuè sit virtutis, idest siuè in materia iustitiæ, siuè in materia alterius virtutis contra hominem. Posterior est homo contra legem; dicitur verò lex possidere quando in quacunque materia respectu subditi habet vim obligandi, & dicitur homo possidere contra legem, quando in aliquo casu, vel ex aliqua ratione eximitur, & liber est à legis seruitute, onere, siuè obligatione; unde illa dicitur pars tutior, vel melior, quæ fauet possidenti, siuè sit legis contra hominem, siuè hominis contra legem.

Aduertendum tamen. quòd opinio tutior, & melior in hac

hac materia non dicitur respectu posteriorum, quæ sunt tuta, & bona, sed respectu non tuti, & non boni; unde si utraque pars dubij ex varijs opinionibus probabilibus sit tuta, vel bona, non refert quam partem quis dubius sequatur; nam sufficit ad prudenter, & honestè operandum ut absque periculo, & mali operetur; & consequenter sufficit, ut partem tutam, vel conditionem bonam quis in dubio sequatur; etsi comparatiuè nec sit tutior, nec melior v. g. Dubitat Sacerdos, an possit celebrare absque peccato ante maturini recitationem, stante opinione ex utraque parte probabili, quilibet potest alterutram eligere, quia vtraque pars est tuta, licet negativa sit tutior, quia longius remouet peccati periculum; sufficit enim, quod alterutra sit tuta, & simpliciter peccati periculum remoueat, non enim tenemur sequi quod melius est, sed sufficit sequi bonum, siue quod rationabiliter credimus non esse malum. Itaque non dicitur tutior illa pars in hac regula, quæ à peccato est remotior, ut nonnulli intelligunt, sed simpliciter quæ excludit verum peccati periculum, etsi altera pars longius fortè ab omni occasione remoueat, quæ quidem in aliquibus esset maioris perfectionis, non tamen obligationis, & interdum foret homini in laqueum: ita Marchant. qui ad dignoscendum quando censeatur lex, siue præceptum esse in possessione obligandi contra dubitantem, & quando censeatur dubitans contra legem possidere, subdit istas duas regulas generales.

Prima est. Quandocunque dubitanti de lege, siue præcepto constat legem fuisse promulgatam, & usu cœmmuni apud probos receptam, quamdiu certè non constet de eius abrogatione (quamuis ex rationibus apparentibus contingat dubitare) possessio stat ex parte legis, siue præcepti, & dubio manente dubitans obligatur ad legem; & idem dicendum est, si dubium sit tantum de aliqua circumstantia e. g. Certò scit aliquis peregrinationem, castitatem, ieiunium &c. vouisse, dubitat tamen an interuenerit deliberatio sufficiens ad obligandum, tenetur, manente dubio, tale votum implere quia eo ipso, quod vouit, se ipsum sua libertate spoliavit. Secunda: quando quis rationabiliter dubitat de legitima institutione, promulgatione, receptione legis, vel auctoritate legislatoris, manente dubio,

pos-

possessio adiudicanda est in fauorem dubitantis, ratio est, quia cum lex, & præceptum sint quædam seruitus, & gra-  
uamen, semper in fauorem grauari interpretanda est, & sic  
pariter discurrendum est de lege pœnali, quando dubium  
est de delicto fundamentalis, vel circumstantia principali,  
super qua pœna fundatur e. g. Ioannes percussit Petrum  
Clericum ignorans Clericum esse, dubitat an sit excom-  
municatus, manente dubio, possidet Ioannes libertatem  
contra legem, siuè contra pœnam legis, quàmuis constet  
de lege non percutiendi Clericum.

## QVÆSTIO II.

*Vtrum in dubio Iuris, vel facti semper tutior pars  
sit eligenda.*

**N**Ot. Quod in hac celebri, & perdifficili quæstione re-  
periuntur tres sententiæ. Prima docet extra mate-  
riam iustitiæ in quouis euentu quoties est dubium si-  
uè Iuris, siuè facti sequendam esse partem tutiorem, si post  
adhibitam diligentiam sufficientem, adhuc dubium perse-  
ueret iuxta regulam: In dubijs tutior pars est eligenda; ita  
Vasquez Lorca disp. 38. & alij &c. Secunda sententia as-  
serit nos in dubio Iuris non teneri sequi partem tutiorem,  
benè tamen in dubio facti: e. g. si dubium sit: An in Iure  
statuta sit irregularitatis pœna pro tali delicto, non teneri  
illum, qui dubius est de tali delicto perpetrato se gerere uti  
irregularem; secùs autem si dubitet quis, an occiderit ho-  
minem, cui sententiæ videtur fauere Ius Canonicum, ut  
infra patebit, quoad homicidia. Tertia sententia com-  
muniter asserit non semper esse sequendam tutiorem par-  
tem, tam in dubio Iuris, quam in dubio facti etiam in ma-  
terijs ad iustitiam non pertinentibus ita Villalobos, Sua-  
rez, Marchantius, Sancius, Herincx, Mastrius, Caspensis,  
& quamplures alij, iuxta quam sententiam sit.

Concl. In dubio iuris, vel facti non semper sequi tutio-  
rem partem, etiam in materijs ad iustitiam non pertinenti-  
bus, tenemur. Prob. nostra concl. Possessio non solum fa-  
uet in materia iustitiæ, sed etiam in quauis alia materia, s-  
nam de quauis materia est intelligenda illa regula: in du-  
bio



bio melior est conditio possidentis, ac proinde etiam altera pars tutior in dubijs est eligenda, cum ex dictis clarè constet, has duas regulas non esse inter se contrarias, sed concordantes, quatenus se inuicem adiuuant, & explicant: ergo in dubijs iuris vel facti tam in materia iustitiæ, quàm in materia aliarum virtutum si, adhibita morali, & sufficienti diligentia, dubium vinci non possit, tutius est sequi illam partem, quæ possidenti fauet, nisi in aliquo casu particulari expressè decisum sit in iure. Prob. ant. Possessio est titulus communis, & uniuersalis omnibus virtutibus, ac proinde non solum in materia iustitiæ, sed etiam in materia aliarum virtutum melior est conditio possidentis e. g. Qui non est obligatus præcepto religionis, est in possessione suæ libertatis, quoad illam virtutem, & sic de alijs.

Confirmatur. Etenim ideo in materia iustitiæ melior est conditio possidentis, ut ea possessione adiutus possit, præmissa debita diligentia, sequi partem minus tutam, quia, ex altera parte ius dubium est æquale inter possidentem, & non possidentem, ex altera verò ius suæ possessionis est certum, & sic potiori iure gaudens vincit alterum: sed hæc ratio æquè militat in materia cuiuscunque virtutis; nam ex utraque parte est æquale ius obligationis dubium, hoc est ex parte voluntatis, & ex parte illius virtutis: ex parte autem voluntatis est ius certum possessionis libertatis: ergo ex parte voluntatis est ius fortius, nam certus non debet vinci ab incerto, quale est dubium, & consequenter in materia cuiuscunque virtutis melior est conditio possidentis.

Arg. 1. Cap. ad audientiam de homicidio dicitur: In dubijs tutior sententia est eligenda, & idem habetur cap. Significasti 2. eod. tit. ex qua regula infertur, dubitantem, an ex sua percussione secuta sit mors percussi iam mortui, debere se gerere pro irregulari; ergo ex iure semper tenemur sequi tutiorem partem. Resp. cum Herincx, regulam adductam non esse traditam ad declarandum, quod uniuersim ex natura rei in dubijs pars tutior sit necessariò sequenda, sed solum in casu prædicto de homicidio; idque statuit Pontifex ob reuerentiam sacri ministerij, ne fortè qui verè homicida est, celebret; quæ constitutio, ut notat idem Herincx cum Maldero, Caspensi, & alijs non est extendenda ad alia dubia diuersi generis, immò nec ad dubium mu-

tilationis, & ut uno verbo dicam cum Caspensi, & alijs in nullo dubio iuris, vel facti incurritur irregularitas nisi in dubio facti homicidij prohiberi, de quo p. 4. t. de censuris.

Arg. 2. Lex est certissima v. g. in hoc casu: ne cognoscas Bertam non tuam; dubium autem est matrimonium, quo solum potest legi derogari: at legi certæ non derogatur per dubium sequens, ergo dubitanti, an matrimonium sit validum, non licet petere debitum.

Resp. Herincx eodem argumento probari, quod nec posset reddere, ut patet, quod est contra omnes, & ipsum ius canonicum. Deinde simile argumentum fieri potest in materia iustitiæ. Certa enim est lex, ne utaris re aliena, & solum est dubium. An sit tua, adeoque simili ratione non, liceret possessori ea uti. Itaque resp. neg. assumptum pro 2. part. quia præter dubium matrimonium est certa lex possessionis iuris petendi debitum, & reddendi orta ex matrimonio bona fide contracto, quod ius per superueniens dubium tolli nequit; lex autem castitatis solum vetat accedere ad personam, quam constat non esse suam; possessor autem talis prudenter practicè iudicat esse suam, seu non esse non suam, & accedere ad eam, ad quam habet ius accedendi, utpote bona fide illam tanquam suam possidens. Adde id manifestè licere in casu dubij ob impotentiam coeundi, licet enim triennio tentare etiam petendo, & tamen est dubium de valore, sed est possessio, de quo p. 4. tract. de matrimo.

### DISPUTATIO III.

#### *De conscientia erronea.*

#### QVÆSTIO I.

*Verum sit peccatum agere cōtra conscientiam erroneam.*

**N**ot. Quòd; præter definitionem superius assignatam, de conscientia erronea, oportet aduertere conscientiam erroneam oriri, & denominari ab errore intellectus. Error autem intellectus provenit ab ignorantia, quæ ad rem nostram, ommissis eius diuersis diuisionibus habitis in tractatu de actibus humanis, duplex est, nempe inuincibilis,

lis, & vincibilis. Prima est, quæ nulla morali diligentia, vinci, & superari potest, quia videlicet vel nunquam suborta est in mente aliqua dubitatio de re, quæ ignoratur, vel etsi subortum sit aliquod dubium de ea, adhibita tamen sufficienti, vel diligenti inuestigatione talis ignorantia vinci non potuit; Secunda est, quæ adhibita morali diligentia potuisset vinci, & debuit, tamen superata non fuit. Ex qua diuisione infertur, quod duplex est conscientia erronea, alia nempe inuincibilis, alia vincibilis.

Concl. Agere contra conscientiam inuincibiliter erroneam est peccatum iuxta grauitatem, & leuitatem materiæ. Hæc est communis inter Theologos, & aded certa, ut quamplures existiment esse de fide. Prob. per illud D. Pauli ad Rom. 14. *omne quod non est ex fide peccatum est* quæ verba explicantur à Patribus de conscientia erronea, & recta, ut signanter tradit Innoc. III. in cap. vlt. de præscrip. ubi ait esse sermonem de conscientia recta, & erronea: ergo &c.

Prob. ratione, ideo est obligatio sequendi conscientiam rectam, eò quod ipsa proponat obiectum bonum, & honestum; sed id præstat conscientia erronea inuincibilis, quia, etsi obiectum in se honestum non sit, neque de illo extet præceptum, tamen hic, & nunc ignorantia inuincibilis illud apprehendit, & proponit voluntati ut bonum, & honestum, vel ut malum; licet in se non sit malum: ergo obligat conscientia inuincibilis iuxta suum dictamen operari, ac proindè peccat agendo contra illam.

Confirm. Quamuis prima regula humanarum actionum sit lex naturalis, & positiua proxima, tamen regula necessaria debet esse ratio, per quam lex cognoscitur; undè non potest esse ratio conformis, aut difformis legi, nisi cognitione, ergo eiusdem malitiæ est operari contra legem cognitam, ac operari contra legem veram; operari enim contra veram legem solùm est peccatum quando cognoscitur; ergo &c.

Arg. cont. concl. Conscientia erronea est inferior Deo: ergo non potest obligare ad oppositum illius, quod lex Dei præcipit; nam certum est, quod inferior non potest obligare contra legem superioris, neque illi derogare; ergo si conscientia dicat hic, & nunc esse mentiendum ad saluandum vitam e. g. Amici, voluntas non tenetur velle menti-

ri, quia est contra legem Dei. Prob. conf. Nam discordare à conscientia dictante aliquod contra legem Dei non est discordare à lege Dei, sed illi conformari; ergo conscientia erronea inuincibilis non potest obligare.

Resp. quod inferior Prælatus suis subditis per conscientiam erroneam potest obligare contra legem superioris ignoratam; quare conscientia, supposita ignorantia Diuinæ legis, potest obligare voluntatem ad mentiendum hic, & nunc, in quo casu inferior non obligat contra superiorem, cuius lex non est cognita, & quod tunc obligat est lex ipsa naturalis, & Diuina præcipiens conscientiam esse sequendam: ita Caspensi, Marchanti. & alij.

Quæres. An obligatio operandi secundum conscientiam proueniat à lege naturali, an verò à lege positua.

Resp. Quando iudicium conscientie proponit aliquod, ut legem naturalem, obligatio est naturalis, quando verò proponit legem posituam est obligatio legis positivæ; ac proinde peccatum sumit suam malitiam à difformitate legis naturali, vel positivæ; ratio est, quia conscientia non habet vim ligandi ratione sui, sed ratione legis, quam applicat, quæ quidem lex pari ratione obligat quando, & qualiter cognoscitur siuè sit talis, siuè non; ergo obligatio conscientie proportionari debet obligationi legis, quæ per conscientiam applicatur. Quare aduertit Marchantius, quod conscientia erronea actu dictare debet esse peccatum, quod agitur; quod si dictet tantum in habitu, potest quis agere contra huiusmodi conscientiam habituales absque peccato, quia tunc in actu non applicatur lex e.g. Petrus conscientia erronea aliquando seductus credidit, se in die Ieiunijante Solis occasum non licere comedere absque ieiunij violatione, & peccato, nihilominus, non deposito illo errore ad præceptum Superioris, vel immemor sui erroris, in meridie comedit, non frangit ieiunium, nec peccat, quia conscientia erronea consistit in dictamine actuali, & non habituali &c.



*Vtrum quando conscientia inuincibiliter errans existimat vtramq; partem contradictionis esse peccatum; peccet quis alterutram partem amplectens.*

**N**Ot. Quòd titulus quæstionis huiusmodi exemplo declaratur. Reperitur quidam pastor ouium ita rudis, & ignarus, ut, conscientia inuincibiliter errante, sibi persuadeat ex una parte esse peccatum contra præceptum Ecclesiæ non audire Sacrum die festo, ex altera parte etiam esse peccatum illud audire, quia sic compellitur gregem sibi commissum, vel furi rapiendum, vel lupo vorandum derelinquere, quæ damna tenetur vitare ratione sui officij, & consequenter ratione iustitiæ. Concordant Doctores, quod si talis in ea perplexitate constitutus, unum ex illis duobus peccatis grauius altero esse credat, teneatur non eligere grauius, quia sic peccaret; nam homo tenetur vitare, quod credit esse malum, & vitare potest. Difficultas tamen est, quando quis existimat in vtroque esse parem malitiam; circa quam difficultatem nonnulli opinantur in tali casu, pastorem peccare: ratio est, quia actio illa est peccatum, quæ est libera, & ut talis fertur in obiectum iudicatum malum: cum ergo actio Pastoris in casu nostro sit libera, & liberè feratur in obiectum iudicatum malum, peccat. Confirmatur. Etenim Pastor, estò nequeat vitare utriusque partis malitiam, potest tamen fugere quamlibet determinatè, hoc est, potest deponendo conscientiam erroneam unam, vel alteram partem determinatè eligere: ergo quando unam partem cum determinata malitia propositam eligit, liberè amplectitur obiectum iudicatum malum, ac proindè peccat: ita discurrunt Med. Gran. Pasq. & alij: his tamen non obstantibus sit.

Concl. Probabilius est Pastorem in tali casu, si discernere non valeat quod nam strictius obliget, non peccare operando contra alterutrum illorum. Hæc est Sanchez in selectis Amici disp. 15. Caspensis in tract. de conscientia, Roderici in summa part. 2. capite si, & Mastrij disp. 1. de conscientia. Prob. nam sola cogitatio, qua quis existimat aliquam actionem agendo se peccaturum, non sufficit ad peccandum,

dum, nisi actio liberè fiat: e. g. qui est detentus in carcere, non peccat non audiendo Sacro, quamvis existimet se peccare, quia liberè illud audire non potest, sed in casu nostro neutrum præceptum adimpleri potest; ergo actio illa non est libera, nec peccatainosa.

Confirmatur, quia agere contra conscientiam inuincibiliter erroneam non est peccatum, nisi talis conscientia sit libera ad agendum, vel non agendum id, quod per eam dictatur, non verò quando est necessaria, hoc est, quod executioni mandari non potest id, quod dictat agendum: ergo &c. Hinc patet responsio, ad fundamentum opinionis oppositæ, licet enim Pastor respectu cuiuslibet præcepti illorum signati in particulari sit liber; non tamen respectu illorum duorum vagi; ac proindè illa libertas potius est physica, quàm moralis in ordine ad culpam, ita Rodericus, & Sanchez.

Quæres. An, quando aliquis apprehendit tantum malum in genere, nesciens distinguere, an peccatum sit mortale, vel veniale, peccet mortaliter.

Resp. Variant Doctores circa propositum dubium. Quidam existimant solum committi peccatum veniale hac ratione ducti, eo quia ratio operantis in se non continet dictamen malitiæ mortalis, ac proindè non potest in actum transfundi, quoniam verò ratio dictat esse malum in genere, saltem venialiter peccatur. Ita Nauarrus, Vasquez, & Azorius. Alij censent in tali euentu semper committi peccatum mortale, quia cum operans non distinguat, an sit peccatum mortale, vel veniale, exponit se periculo mortaliter peccandi.

Verum censeo esse distinguendum de malitia in genere, nam vel per malitiam istam in genere intelligitur quædam malitia communis, quæ per intellectum nostrum abstrahitur à malitia mortali, quam veniali, & sic nullo modo reperiri potest in aliqua actione humana; cum omnis actio humana sit mala venialiter, vel mortaliter, nequè detur quid medium; vel intelligitur pro malitia in genere malitia aliqua in confuso apprehensa, adeò ut Rusticus e. g. confuse apprehendat aliquam actionem esse quidem malam, sed ab eo non distingui, an sit mortalis, vel venialis, quare in hoc sensu mihi videntur loqui Herincx, & præ-



sertim Marchantius, qui sic discurret. Vnde non assentiendum credo illis, qui dicunt semper esse peccatum mortale, quando quis conscientia erronea dictante aliquod malum esse in genere sine determinatione mortalis, vel venialis contra dictamen procedit, asserentes pro ratione, quia, cum non distinguat, exponit se periculo peccandi mortaliter, his inquam non assentior, non enim est tale periculum, nisi quis transgressionem apprehendat sub ratione alicuius mali grauis, & dubitatio, siue suspicio aliqua mentis, vel aduertentia periculi insurgat, ne fortè mortale sit, ita ut in actu includatur hæc conditionalis, etsi peccare deberem mortaliter, volo tamen facere, vel per modum contemptus, siue sit mortale, vel veniale volo facere, quæ conditionalis, vel contemptum sapiens rarò includitur, ideoquè communiter materia, vel obiectum actus ponderanda sunt, sicut in agentibus contra conscientiam rectam, malum non distinguentem, aliàs omnes vulgares, & idiotæ personæ, imò, & multi aliàs sensati, qui inter peccatum mortale, & veniale non possunt distinguere, semper in omni actu peccaminoso peccarent mortaliter, quia periculo peccati mortalis se exponerent, ex quo quantæ absurditates, & perplexitates conscientiarum orirentur, prudens lector attendat.

Censeo itaque (sequitur Marchantius) quod, qui malum operantur, siue ex conscientia recta, siue erronea non reflectentes ad periculum mortalis peccati, unde aliquis contemptus possit probari, si materia sit tantum venialis, venialiter tantum peccaret, si verò mortalis mortaliter: ratio mea est, quia sicut ad peccandum simpliciter requiritur aliqua reflexio, & aduertentia, quod actus sit malus, siue reflexio ad malum; sic ad peccandum mortaliter: requiritur aduertentia, & reflexio aliqua, quod actus sit mortalis, vel saltem periculum peccati mortalis, aliàs non esset peccatum voluntarium.



*Utrum conscientia inuincibiliter errans magis obliget,  
quàm præceptum superioris.*

**N**Ot. Quòd indubiè nullus Prælatus dispensare, vel relaxare potest obligationem conscientiaè adhuc erroneæ dictantis aliquod esse præceptum, aut prohibitum; nullus enim superior etiam supremus relaxare potest obligationem legis naturalis; ac proindè, cum lex naturalis obliget non agere contra conscientiam inuincibiliter errantem, nulla potest interuenire dispensatio. Dubium tamen est. An à Deo possit fieri huiusmodi dispensatio, & quidem Caspensis in tractatu de conscientia, & Herincx q.2. de conscientia erronea dicunt, quod, quamuis Deus possit conscientiam erroneam tollere, non possit tamen dispensare, quòd, stante conscientia inuincibiliter errante, euadat licitum, quod proponitur illicitum, eò quia non est intelligibile, ut manente præcepto, eiusque propositione licitè fiat oppositum; tum quia, ut benè discurret Caspensis, si talis dispensatio à Deo facta nota est homini tum mutat conscientiam, si verò non est illi nota perindè se habet ac si propriè conscientia esset vera, & talis dispensatio non adesset; itaque licet in nostra sententia Deus possit dispensare in præceptis Decalogi, attamen nequit fieri, quod stante præcepto, fiat licitum id, quod conscientia illicitum esse dicat. Remanet igitur resoluendum, cui potius standum sit, quando concurret præceptum Superioris, & conscientia in contrarium dictans.

**I. Concl.** Quando conscientia erronea est de lege Superioris, in cuius præceptis dispensare potest alter superior, præceptum huius superioris est maioris obligationis, quàm iudicium conscientiaè; ratio est, quia præceptum maioris superioris sicut potest derogare legi inferioris, ita potest tollere conscientiam circa obligationem talis legis: ergo tenetur quis in tali euentu deponere conscientiam erroneam.

**II. Concl.** Si conscientia sit de lege non dispensabili ab altero superiore, & nihilominus illa sit aut vincibilis, aut quæ possit deponi propter auctoritatem superioris præ-

cupientis, aur alterius fide digni, similiter est maioris vis obligandi in tali præcepto, quam in dictamine conscientię erroneę. Prob. nam quando conscientia potest deponi, honestè impleri potest præceptum superioris; sed quod honestè potest impleri, habet vim actū obligandi; ego tenetur quis conscientiam deponere, & stare iudicio, seu præcepto superioris. Cæterum quomodo prudenter sit deponenda conscientia erronea infra dicetur.

## QVÆSTIO IV.

### *Utrum teneamur sequi conscientiam vincibiliter errantem.*

**N**Ot. Quòd inter conscientiam vincibiliter errantem, & inuincibiliter errantem intercedit huiusmodi discrimen, quod conscientia inuincibiliter errans proponit perfectè, & prudenter obiectum malum voluntati sub ratione boni, & sic ratione ignorantię inuincibilis censetur bonum, quod reuerà non est, ac proindè etiam actus voluntatis, qui sumit ab obiecto bonitatem in genere moris, est bonus. Conscientia autem vincibiliter errans imperfectè, & imprudenter procedit proponendo voluntati sub ratione boni, quod est malum, quia potest, & tenetur quis adhibere diligentiam sufficientem ad deponendam conscientiam vincibiliter errantem.

I. Concl. Licitum est sequi conscientiam vincibiliter erroneam, quę dictat aliquid esse præceptum, quod tamen præceptum non est, dummodo non sit prohibitum e. g. Audire Missam die profano. Similiter non est illicitum si quod dictat esse bonum, licet sit indifferens; verum si quod dictat tanquam bonum, sit in se malum, vel quod dictat esse vetitum, sit præceptum, illicitum est sequi huiusmodi conscientiam: ratio est, quia conscientia vincibilis, cum sit error vincibilis, non abstergit malitiam ab opere, vel operis omissione: ergo censetur voluntariè errare: ita Herinex.

II. Concl. Quando conscientia vincibiliter errans dictat aliquid præceptum, vel prohibitum, etsi obliget, ne contra illam quis faciat; non tamen obligat, ut ipsam positivè sequatur. Ita DD. passim docent. Prob. Nam talis conscien-

tia oritur ex aliqua ignorantia vincibili, seu culpabili, quæ vinci potest, & debet; ergo non obligat, ut illam positivè sequamur, estò obliget, ne contra illam, dum perseverat, operemur: tum quia simpliciter loquendo operans obligatur non sequi huiusmodi conscientiam; ergo &c.

Quæres. Quomodo sit deponenda conscientia erronea vincibilis. Resp. Caietanus quæst. 19. putavit ad deponendam huiusmodi conscientiam sufficere arbitrium ipsius operantis; at hæc opinio à Theologis communiter rejicitur tanquam falsa, & periculosa; quia ille modus deponendi conscientiam æcus est, ac expositus manifesto periculo peccati; nec enim arbitrium eius non est regula operandi, ita nec conscientiam deponendi: tum quia conscientia non capit ligare pro libito voluntatis, sed ob motuum aliquod rationis apparens. Itaque ad deponendam legitime conscientiam erroneam debet homo moveri ratione, vel auctoritate, ob quam nunc prudenter iudicet contrarium eius, quod antea iudicaverat; immò, etsi adhuc perseveret existimatio, vel potius imaginatio de malitia actionis, præmissa oratione pro illuminatione cordis, debet existimare se prudenter, neglecto proprio captu, operari, & sic acquiescere iudicio vel Superiorum, vel Doctiorum.

## QVÆSTIO V.

*Vtrum scrupulosus agendo contra conscientiam scrupulosam peccet.*

**N**Ot. Quòd scrupulus est anxietas, & titubatio quædam mentis, cum quadam dubitatione, & trepidatione in agendo, conscientiam torquens, & turbatam reddens, ex leuibus, & incertis coniecturis orta. Dicitur anxietas, & turbatio &c. quia scrupulosi sunt similes folijs arboris agitatæ vento, quæ modò in unam, modò in aliam partem vertuntur: dicitur cum quadam animi dubitatione, & trepidatione, nam in hoc scrupulus differt à vero dubio, quod dubium suspensum animum teneat, scrupulus autem operatur, ut semper trepidans quis maneat, quamvis vertatur in unam, vel aliam partem, nunquam medium tenens, sed sub dubitatione aliqua semper tremens, nunquam constans in  
 . . . agen-

agendo: agitur autē hic de scrupulo practico, non speculativo; parum namque refert, quod quis in speculatione varijs agitetur trepidationibus modò in alteram partem se in praxi resoluat; cætera particula patent ex dictis in definitione superius tradita de conscientia scrupulosa. Scrupulus autem quoad ethymologiam nominis originem ducit à quodam lapillo paruo, qui in calceo pedem urget, & propriè scrupulus nominatur.

Concl. stante conscientia simpliciter tantum scrupulosa, si scrupulosus contra eam agat, non peccat, ratio est, quia scrupulus est tantum fluctuatio mentis, & incostantia ex debilibus, vel leuibus fundamentis orta; unde potius afflictio iudicanda est, sed huiusmodi conscientia nequit obligare secundum quod leuiter, & imprudenter præscribit fluctuando: ergo stante conscientia simpliciter scrupulosa non peccat scrupulosus contra eam agendo.

Cæterum si conscientia scrupulosa in iudicium aliquod determinetur, quod omnibus spectatis non liceat sibi hic, & nunc talem actionem exercere, tunc peccabit agere contra iudicium, non ratione conscientia scrupulosa, sed ratione conscientia erronea; conscientia enim scrupulosa, mediante iudicio practico transit in erroneam. Aduertit tamen Petrus Marchantius non facile credendum esse scrupulosis, dum etiam affirmant, se iudicium formasse, & actui præcedenti ex iudicio consensisse; sicut enim in uno sunt turbati, sic in alio; quare monet, debere confessarios in primis curare, ut penetrent statum scrupulosi, exindè autem credere non debere scrupuloso, etsi ille putet se enucieatè omnia explicare, maxime in ijs, quæ ad consensum, vel dissensum voluntatis in tentationibus, & alijs fluctuationibus spectant, sed debere tacitè, & imperturbato animum ipsam examinare, & ex re ipsa (attento qualiter se scrupulosus antea, & postea habere soleat) non autem ex scrupulosi narratione iudicium ferre. Fluctuatio enim, seu perturbatio animum possidens omnem narrationem inficit; dicunt enim, & affirmant frequenter se varia pati in voluntate, & in corpore, quæ sunt tantum in imaginatione, se consentire, cum tamen reuerà appareat constantissimus dissensus; nam ut notat idem Doctor quæst. 4. quæ in imaginatiua, & appetitiua sensibili, seu animali fiunt, similia sunt

sunt ijs, quæ in intellectu, & voluntate fiunt. Ex quo fit, ut scrupulosi actus potentiarum animalium accipiant pro actibus intellectus, & voluntatis. Accedit collusio Dæmonis ipsos tot imaginationibus, & ratiocinationibus obruentis, ut ijs se assentire, & consentire per rationem, & voluntatem videantur. Eadem verò, quæ à Dæmone fieri solent, possunt ferè efformari mirabiliter à melancholico spiritu per vim imaginatiuam, quod si huic spiritui simul se Dæmoni immisceat, in supremo periculo, vel deceptionis, vel fatuitatis versatur scrupulosus, ita Marchantius in tractatu de conscientia, ubi plura similia tradit pro dirrigendis conscientijs erroneis, & scrupulosis; & insuper addit conscientiam hypocondriacam, & fatuam, quam sic describit. Conscientia hypocondriaca, & fatua nil aliud est, quàm fatuitas mentis, & delirium quoddam parziale ex humore aliquo prauo, vel alia praua dispositione prædominante procedens, quo homo in deliria, & fatuas actiones, ac operationes discursus, ratiocinationes prorumpit, quæ conscientiæ nomen reuerà non meretur, ac proinde potius Medico, quàm confessorio curatur &c.





# TRACTATUS QUINTVS DE LEGIBVS.

## DISPVTATIO I.

### *De lege in communi.*

#### QVÆSTIO I.

#### *Quid sit lex.*

**N**OT. 1. Quòd legis vocabulum secundùm nominis etymologiam oritur vel à verbo lego, quia leges, signanter positivæ legi, & promulgari debent, ut obligent; vel à verbo eligo, quia lex omnis dicitur, quæ sint eligenda, & quæ respuenda; vel à verbo ligo, quia lex obligat, & quasi ligat ad aliquid efficiendum, vel fugiendum. Quoquomodo usurpetur legis nomen, impræsentiarum à nobis solùm accipitur quatenus significat regulam exterius, aut interius propositam, cui conformari debent actiones humanæ, ut probæ fiant, & honestæ; non enim alia via agnoscimus bonitatem, vel malitiam humanarum actionum, quàm ex conformitate, vel difformitate, quam habent cum lege.

NOT. 2. quod lex, & ius coincidunt, & differunt inter se; differunt quidem, si ius à iustitia dicatur; nam in hoc sensu idem significat, quod iustum, vel æquum alteri debitum, unde iustitia dicitur ius suum unicuique tribuere, iuxta communem descriptionem Iurisperitorum; coincidunt autem, si Ius dicatur à iubendo, & sic deriuatur à supino verbo Iubeo, quod est iussum, à quo ultima syllaba sublata, remanet ius. Quare Doctor sumendo ius in hoc secundo sensu in 4. dist. 46. p. 1. art. 1. illud diuidit ad instar legis, nempe in Ius naturale, Diuinum, & humanum.

Concl. lex in genere rectè describitur. Regula perseuerans actionum humanarum indita, vel posita, obligans ad aliquid faciendum, aut omittendum, Hæc videtur communis

munis dicitur 1. Regula, quia lex formaliter, & per se indicat agenda, & omittenda, in quo genere conuenit cum synderesi, & conscientia, quæ pariter sunt Regulæ. 2. Perseuerans; ut lex distinguatur à simplici mandato, & præcepto, quod pro libito superioris ponitur, & tollitur, imò etsi non sit sublatum in morte eius, qui illud tulit, cessat; secus autem lex, ut notat Abbas in cap. irrefragabiliter §. cæterum de officio Ordinarij; eo quia lex debet esse stabilis, & perpetua quantum est ex sui natura; estò per accidens, hoc est ratione communitatis, status, materiæ, & aliarum circumstantiarum sit mutabilis, ac proinde non stabilis, & perpetua. 3. Actionum humanarum, quia non agimus de actionibus Angelorum, sed hominum, & de ijs, quæ liberè efficiuntur. 4. Indita, vel posita, ut tam lex naturalis, quam positiua Diuina, Ecclesiastica, aut Politica sub hac definitione includantur. 5. Obligans ad aliquid &c. Ut lex distinguatur à monitionibus; exhortationibus, consilijs, & id genus similibus, quæ nullam obligationem inducunt, sed solam directionem; at lex & dirigit, & obligat ad aliquid faciendum, vel omittendum.

Quæres 1. Quænam sunt conditiones legis.

1

Resp. ex communi doctrina, tam Theologorum, quam legalium esse plures. Prima est. Quod lex sit honesta; idest iuxta Isidor. lib. 1. Eth. c. 2. quod Religioni conueniat, quod disciplinæ congruat, & quod saluti proficiat, aliàs non obligat, nam ut dicit D. Petrus: *Oportet Deo obedire magis, quàm hominibus*: 2. ut lex sit iusta, idest, ut onera æqualiter diuidantur in subditos, non quidem æqualitate arithmetica, sed geometrica proportionem personæ ad personam, ne videlicet pauperes grauentur, sicut Diuites, sed inspiciantur vires, & merita singulorum: 3. ut lex sit obseruatu possibilis, nedum physicè, sed etià moraliter, adeout non sit nimis difficilis, maxime si sit humana; atsi sit diuina, de fide est, Deum impossibilia non iubere; itaque debet iuxta unanimum consensum Doctorum post Isidor. lex esse secundum naturam, & consuetudinem Patriæ, loco, & tempori conueniens; hoc est, accommodata fragilitati humanæ, Patriæ, honesto usui, loco, & tempori: 4. ut sit utilis, ne aliàs sine ratione feratur, ac proinde sit irrationabilis; vnde debet esse congrua ad remouendum malum, seu abusum, &

ad

ad introducendum bonum, seu actus honestos contrarios malo usui, s. ut feratur in bonum commune; nam lex primariò, & principaliter respicit bonum communitatis, estò secundariò illud bonum cedere possit etiam in commodum alicuius privati. Quare generaliter dicitur l. iura ff. de leg. *Quod iura non in singulas personas sed generaliter constituentur*, idest pro aliqua multitudine, & l. i. ff. de ieg. habetur *Legem esse præceptum commune, & communem Republica sponsonem*, & in cap. erit autem dist. 4. traditur. *Erit autem lex honesta, nullo prius a comodo, sed pro communi civium utilitate conscripta*. Sexta, ut sit promulgata; teste Scoto 4. d. 3. q. 4. de communi sententia Doctorum, & habetur expressè cap. in istis dist. 4. ubi dicitur: *leges instituuntur dum promulgantur, firmanntur, dum moribus utentium approbantur*; & cap. i. de concessione præbendæ in 6. lex, constitutio, & mandatum nullos adstringunt, nisi postquam ad notitiam perue-nerint eorundem, nisi post tempus, infra quod ignorari non debuissent; sed de hac conditione latè agendum infra.

Quæres 2. Quoruplex est lex.

Resp. lex variè partitur, siquidem in primis diuiditur in legem Diuinam, & humanam; quia omnis lex vel est à Deo per diuinam potestatem legem præscribente, vel ab homine potestate purè humana leges ferente. Lex Diuina iterum duplex, nempe æterna, & temporalis, prior est ipsamet Dei rectitudo, & prima veritas, quatenus per eam, omnia, ut recta sint, dirrigi, & regulari debent, hinc psal. 11. 8. *mandata, & iudicia Dei dicuntur veritas, & equitas; Omnia mandata tua veritas*. Posterior est, quam Deus in tempore creaturis præscripsit.

Et hæc rursus duplex, Naturalis Diuina videlicet, & positiua. Prima est, quæ à Deo humanæ rationi est indita, regulans iudicium, & actiones eius humanas in ordine ad beatitudinem æternam, & ex Dei voluntate obligans hominem in foro Dei sub debito culpæ: ita noster doctissimus Marchant, tom. 2. sui Tribunal. tract. 1. tit. 1. q. 2. Positiua Diuina est, quæ à Deo præter legem naturalem homini ponitur, & velut superadditur in ordine ad finem supernaturalem, transgredientes obligans ad culpam, & reatum penæ æternæ, vel temporalis: ita idē Marchant. Insuper Diuina positiua, partitur in nouā, & veterem. Lex autem hu-

mana est, quæ ab hominibus potestatem habentibus est instituta in ordine ad Rempublicam conseruandam; quæ duplex est, alia Ecclesiastica, alia sæcularis, seu ciuilis. Prior est, quæ per potestatem à Christo concessam fideles in rebus politicis, & ciuilibus dirrigit, quatenus ad supernaturale regimen aliquo modo spectant, illique deseruiunt & subordinantur. Sæcularis, seu laica dicitur ea, quæ hominem dirrigit in ijs, quæ temporale, & humanum regimen spectant, de quibus omnibus suis locis erit disputatio.

## QVÆSTIO II.

*Vtrum ratio legis consistat in actu intellectus, vel potius voluntatis.*

**N**ot. 1. Quod lex tribus modis spectari potest, ut passim notant Doctores. Primò in ipsa mente legislatoris, in qua primò gignitur, & formatur, ac proinde in tali statu lex accipit primum esse essenziale, inchoatiuè quidem à practico iudicio, quo legislator iudicat tale medium fore expediens ad publicum, & commune bonum promouendum, & conseruandum; completiuè verò ab actu voluntatis, quo efficaciter vult ad tale medium subditos obligare. 2. Spectari potest in aliquo signo externo sensibili Scripturæ, aut vocis, per quod lex ipsa interna legislatoris notificatur, & in tali statu lex accipit nouum esse signi sensibilis, quo fit apta ad voluntatem subditorum mouendam, vt eam obseruet operando quod præcipit. 3. Spectari potest in ipso intellectu subditorum, à quo lex apprehensa proximam vim habet dirrigendi, & obligandi, & in tali statu fit proximè idonea ad dirrigendas, & mouendas voluntates subditorum, quo sensu nihil aliud est, quam iudicium practicum, quo subditus iudicat, hanc, vel illam regulam à Superiore præscriptam, & promulgatam sibi seruandam esse.

Not. 2. quod circa hanc quæstionem versantur tres sententiæ; Prima affirmat, essentiam legis in actu intellectus consistere, & hæc est regula quædam, & mensura humanarum actionum, sed regulare, & mensurare actus humanos ad rationem pertinet, quæ est primum principium actuum humanorum, & in unoquoque genere id, quod est principium,

pium, est etiam mensura, & regula illius generis. Insuper de ratione legis est ordinare subditum ad finem, sed ordinare res, vel media ad finem est actus prudentiæ, intellectualis; ergo &c. 2. Sententia è diuersò asserit, legem essentialiter consistere in actu voluntatis, quo legislator vult subditos obligare; ita Scot. in 3. dist. 36. & in 4. dist. 44. D. Bonau. Almainus Poncius, Herincx, Marchant. Frassen, & alij Scotistæ; quorum sententiæ subscribuntur Suarez, Salas, Becanus, Arriaga, & non pauci Recentiores. 3. Denique sententia, censet naturam legis positivæ, de qua præsertim procedit præsens quæstio, in utroque consistere; ita Amicus Castropal. Siluius, & Caspensis; his prænotatis sit.

Concl. Legis ratio consistit formaliter in actu voluntatis præsupponens actum intellectus, quo legislator iudicat materiam legis convenientem esse, ut sub obligatione sanciatur. Est Scoti l. c. & in 1. d. 44. ubi sic docet dico, quod leges aliquæ generales rectæ de operabilibus dictantes præfixæ sunt à voluntate D. & non quidem ab intellectu D. ut præcedit actum D. voluntatis. Quibus verbis Doctor apertè significat diuinam legem, non in actu intellectus, sed D. voluntatis esse reponendam; sed idem à simili dicendum est de lege humana ciuili, & ecclesiastica ob paritatem rationis: ergo legis ratio in actu voluntatis est reponenda.

Prob. auct. S. Scrip. quæ pluribi indicat, legem spectare ad voluntatem, & signanter in psal. 39. *In capite libri scriptum est de me, ut facerem voluntatem tuam, Deus meus volui, & legem tuam in medio cordis mei*: Et psal. 102. *Notas fecis vias suas Moysi, filijs Israel voluntates suas*; idest leges, & præcepta, & Matt. 7. *Qui facit voluntatem Patris mei*; hoc est, qui eius legem obseruat; ergo &c.

Confirmatur ex eo, quod leges ciuiles dicuntur principum placita; nam dicitur lib. 1. ff. de constit. Princip. *Quod Principi placuit, legis habet vigorem*; fauet & D. Aug. lib. 6. de Ciuit. Dei; dicens: *Arbitraria Principum pro legibus arant*. Insuper Arist. in Rhetorica ad Alexand. c. 1. affirmat, legem esse communem ciuitatis consensum; ergo in actu voluntatis est reponenda; Resp. Thomistæ præcitas auctoritates solum indicare legem esse actum voluntatis, non quidem elicitiuè, sed tantum connotatiuè, & præsupposi-

tiue. Verùm huiusmodi distinctio videtur gratis excogitata; Siquidem potius è contra se habet, ut in nostra conclusione asserimus, videlicet, actum voluntatis præsupponere actum intellectus, cuius munus est, indicare, & ostendere voluntari, quid iustum, & conueniens, atque expediens sit subditis præcipere; & voluntatis munus est mouere per imperium externum subditorum voluntates.

Prob. ratione. Voluntas est regula humanarum actionum; ergo ad voluntatem spectat tradere leges: ant. patet; eò quia voluntas D. est prima regula nostrarum actionum; tunc enim nostræ voluntates sunt rectæ, & bonæ, quando D. voluntati conformantur; & voluntas Prælatorum, & Principum est 2. regula rectitudinis, velut quædam participatio D. voluntatis, earundem actionum; ergo &c.

Arg. Thomist. auct. S. Scrip. & ratione. Legis officium est illuminare, & instruere subditos iuxta illud Psal. 118. *Præceptum Domini lucidum, illuminans oculos &c.* & Psal. 118. *Lucerna pedibus meis;* sed hæc omnia competunt intellectui; ergo ad actum intellectus spectat legis ratio.

Resp. mai. verificari etiam de voluntate; quare D. Ansel. lib. de volunt. Deic. 4. ait. *Voluntas Dei est magistra humana Voluntatis;* ac proinde etiam voluntas illuminat, & instruit, voluntas, inquam superioris, subditos; quatenus agenda, & fugienda obiectiue proposita monstrat subditis, obligando eos ad legis præscriptæ obseruantiam; quod nequit intellectus præstare, cum sit solum regula ostensiuæ, & indicatiuæ, non verò præceptiuæ, & obligatiuæ in ordine ad subditos, nisi per actum voluntatis Principis, ut magis patebit ex dicendis in disputatione de lege æterna, & naturali.

### QVÆSTIO III.

*Vtrum ad obligationem legis requiratur promulgatio?*

**N**OT. 1. Quòd promulgatio legis nil aliud est, quàm legis publica denunciatio, qua superior politicus suum præceptum intimat, & denuntiat communitati. Cæterum contendunt nonnulli, promulgationem esse de essentia legis; verior tamen sententia est, quod promulgatio sit tantum



tum conditio, ut etiam supra indicauimus. Ratio: quia lex non constituitur in sua essentia per actualem obligationem, sed solum per vim obligatiuam; actus namque secundus ad essentiam rei non pertinet; obligare autem actualiter est actus secundus, cum sit effectus eius: ergo cum promulgatio sit legis publica intimatio, & applicatio præsupponit legis essentiam, ac proinde promulgatio non est de eius essentia, sed conditio tantum. Quod indicat non obscure etiam Scot. 4. d. 3. q. 4. art. 1. ubi de lege euangelica disserens docet, institutionem præcessisse promulgationem eius, quia non promulgatur lex nisi à legislatore primò determinetur, quæ quidem determinatio dicitur prima legis institutio.

Not. 2. Quod non omnes leges eodem modo promulgantur; etenim ad hoc ut lex humana promulgetur debet legislator suam voluntatem signo externo subditis manifestare; idque solemnī ritu, ut notant communiter Doctores; nam Rex, seu Princeps non censetur suam legem promulgare cum potestate obligandi, nisi ritu solemnī id facere ostendat. Quoad legem verò diuinam promulgari potest vel per reuelationem internam, vel per externam expositionem cum, vel sine solemnitate; non enim Deus est alligatus solemnitatibus, sed sufficit ad nos obligandos, quod suam voluntatem nobis sufficienter indicet. Insuper lex naturalis promulgatur per naturale dictamen rectè rationis ex D. Thoma q. 70. art. 4. ita quidem ut Deus censeatur, promulgasse legem naturalem per modum habitus hoc ipso, quod dedit nobis lumen naturale, & per modum actus, quando eo lumine naturæ utimur, siue quando recta ratio nobis dictat, quid hic, & nunc faciendum sit iuxta illud Psal. 4. *Signatum est super nos lumen vultus tui Domine.*

Not. 3. quod, licet omnes Doctores asserant, esse necessariam promulgationem legis ad hoc, ut vim habeat obligandi, attamen contendunt, quæ promulgatio, & quantà sit necessaria; Sot. Caiet. Medina, & Molina asserunt, promulgationem sufficientem ad hoc, ut lex habeat vim obligandi, non solum debere fieri in curia, sed etiam in singulis Prouincijs, & Ciuitatibus Metropolitanis, & præterea in singulis Diocesisibus lex Pontificia; & quidem de legibus civilibus constat ex authentica infra adducenda; &

idem

idem dicendum de legibus Pontificijs. Ita etiam tenent Conrad. Felin. Zabarel. Decius, quos citat, & sequitur VViggers q. 94. art. 4. Verùm Salas disp. 12. sect. 9. Bonac. disp. 1. p. 1. p. 4. Guliel. Herincx p. 2. disp. 3. de lege q. 9. censent, promulgationem in curia esse sufficientem, ut lex habeat vim obligandi; quia neque ex natura rei, neque ex iure aliquo positiuo requiritur promulgatio in singulis Prouincijs; ut infra patebit rationibus.

I. Concl. Lex Imperatoris obligat post duos menses, post quam facta est promulgatio sollemnis in singulis Prouincijs. Prob. Nam ita statuitur expressè in Authentica. *Ve facta noua constitutiones*. Quam habere vim legis contra Vasquez probat Castropal. t. 1. tract. 3. disp. 1. ex Pio IV. in Bulla edita pro obseruatione Concil. Trid. quæ incipit. *Sicut, & Sacrorum*, ubi mentionem faciens huius Authent. ait. *Iura communi statutum esse, ut constitutiones noua non nisi post certum tempus obineant &c.* ergo post duos menses obligare censetur. Cæterum certissimum est legislatorem non subiectum Imperatori posse unica tantum promulgatione obligare, non transactis duobus mensibus; dummodo tamen percurrat tempus moraliter necessarium, ut in notitiam subditorum humano modo venire possit, mandatum enim, & constitutio nullū adstringit, si eam inuincibiliter ignorat; ut habetur in cap. 1. de consecrat. præb. in 6.

II. Concl. Probabile est, leges canonicas, seu Pontificias ubique non obligare, nisi in singulis Prouincijs, aut Diæcesibus promulgentur, probabilius tamen est non requiri promulgationem in singulis Prouincijs, sed sufficere, si Romæ solemniter promulgentur, nisi aliter in ipsa Bulla exprimatur. Ita tenent graues Doctores, quos refert, & sequitur Diana in tract. de leg. ref. 8. Caspensis tract. de leg. Stephanus à S. Paulo in tract. de leg. & hanc sententiam tutam esse in conscientia censet Layman. lib. 1. t. 4. cap. 3.

Prob. 1. pars. Quando Pontifex mentem suam non exprimit, standum est iuri ciuili, ac proinde sicut lex Imperialis non obligat ubique post promulgationem factam, ita nec lex Pontificia; nam ius ciuile, ubi iure canonico non aduersatur, ab Ecclesia seruari solet, ut videre est cap. 1. de noui operis nuntiat. Vbi dicitur *Sicut leges non dodignantur, sacros canones imitari, ita & Sacrorum canonum statuta Princi-*

*pum constitutionibus adinuantur, & cap. Si in adiutorium dist.*  
 10. habetur, *Leges Imperatorum in adiutorium Ecclesie assumi*  
*posse.* super quod caput glossa ait. *Vbi desunt canones, leges ci-*  
*uari possunt; sed hic desunt canones exprimere mentem*  
 Pontificis; ergo leges ciuiles citari possunt. Confirm. Ete-  
 nim nimis durum videtur, & onerosum, si statim atq; Ro-  
 mæ publicatur aliqua lex Pontificia, per totum orbem fi-  
 deles dispersos obligaret. Præterea leges Conc. Trid. in  
 multis locis non seruantur, quia in illis promulgatæ non  
 fuerunt, ut notat etiam Herinex q. cit.

Prob. 2. pars. Ex communi sententia, & praxi. Nam  
 Regulæ Cancellariæ Romæ solum publicantur, & secun-  
 dum illas causæ ex toto orbe deciduntur. Bulla Cænæ Do-  
 mini nusquam nisi Romæ solet promulgari, & tamen ar-  
 ctat omnes Christi fideles. Pius IV. voluit in sua Bulla, ut  
 decreta Tridentini, quæ ad reformationem, & ius canonici-  
 cum pertinent, ubique post promulgationem Romæ fa-  
 ctam incipere obligare à Kal. Maij 1564. & ratio à priori  
 est; Quia Pontifex legibus ciuilibus non obligatur, seu  
 arctatur, ac proinde in suis decretis non tenetur seruare  
 modum publicationis iuris ciuilis, neque Authent. supra  
 relatæ; ergo quoties Pontifex suas constitutiones Romæ  
 promulgat, neque mandat alibi publicari, intendit omnes  
 obligare; nisi ex ipsis aliter coniecturari rationabiliter  
 possit. Quare rectè infertur, legem Romæ publicatam,  
 quæ nullum tempus determinat, non requirere tempus bi-  
 mestre, ut obliget, sed solummodo tempus moraliter ne-  
 cessarium, ut veniat in subditorum notitiam, ita Docto-  
 res supra allegati, unde lex quantum est ex se etiam igno-  
 rantes obligat in actu primo; licet quoad actum secundum  
 non liget, nisi post habitam notitiam; hæc tamen doctri-  
 na limitanda venit in lege irritante; quæ quidem lex irri-  
 tatoria est quadruplex; nam vel irritat aliam legem, vel ir-  
 ritat contractum, vel irritat priuilegium, vel indulgen-  
 tiam. Et quidem si lex sit irritatoria alterius legis, seu  
 consuetudinis censet Caspensis cum communi, necessa-  
 rium esse, ut irritatio promulgetur sicut aliæ leges; Ra-  
 tio, quia cum lex reuocatoria habeat rationem legis, debet  
 promulgari, ut suum sortiatur effectum. Vnde si princeps  
 legem irritauerit, & subditus ignorans irritationem agat

contra legem irritam, non peccat, quia quousque secunda voluntas Principis insinuetur, semper censetur remanere prima. Verum si lex sit irritatoria actus, vel contractus, postquam semel est promulgata, habet vim irritandi actum, vel contractum, etiam si ignoretur ab ijs, qui huiusmodi actus, & contractus agunt. Ratio. Quia in lege irritatoria contractuum Princeps non seruat potestatem legislatiuam, sed dominatiuam, quæ non expectat aliquod tempus, sed statim obligat. Vnde restitutio e. g. fit, non quia quis peccauit contra legem, sed quia accepit, quæ sibi debita non erant; cum à Principe statutum fuerit præteritum rerum. Similiter, si quis contraheret matrimonium intra tertium, vel 4. gradum cum ignorantia inuincibili iuris, vel facti; aut etiam clandestinè contraheret post promulgationem Tridentini, matrimonium esset nullum.

Cæterum si lex sit irritatoria priuilegij, necesse est, ut innotescat parti cui priuilegium fuerat concessum, ut suo loco magis patebit. At quoad indulgentias verius apparet, reuocationem sortiri suum effectum absque eo, quod innotescat ijs, quibus indulgentia fuerat concessa; immò docet Corduba q. 36. concl. 3. solo actu interiori posse Pontificem reuocare indulgentias, eo quia cum ex voluntate ipsius pendeat concessio indulgentiæ, ipso Pontifice nolente, cessabit indulgentia.

#### QVÆSTIO IV.

*Vtrum ad hoc, vt lex obliget, requiratur acceptatio populi.*

**N**Ot 1. Quodd nulli dubium est, legem naturalem, vel diuinam positiuam obligare absque ulla acceptatione populi; eo quia cum lex naturalis sit indita à Deo, & lex D. positua immediatè à Deo feratur, clarum est, eas obligare independentè omninò ab hominibus, quorum, Deus est Dominus supremus, & simpliciter independens. Igitur quæstio procedit de lege humana, tam Ecclesiastica, quàm ciuili; non quidem de potentia ad obligandum absque acceptatione, cum communis Doctorum sententia tradat, tam Pontificem, quàm Principem politicum.

posse fideles obligare ad legis obseruantiam à se lata independenter à Populi consensu; sed de facto: An videlicet quoties Princeps, siue Ecclesiasticus, siue secularis, & Politicus condit legem, expectandus sit consensus, & acceptatio Populi, ut vim habeat obligandi.

Not. 2. quod circa quæstionem sic explicatam sunt duæ opiniones, altera affirmatiua, altera negatiua. Prior est Becani p. 2. tract. 3. cap. 6. Bonacin. & aliorum Doctorum legalium, & Theologalium quorum fundamentum adducetur in parte argumentatiua. Posterior est sententia communis Doctorum, & maximè legis Ecclesiasticæ; Quandoquidem Pontificis auctoritas non sit deriuata ab hominibus, sed immediatè à Deo, seu à Christo supremo, & absoluto legislatore. His prænotatis, sit.

Concl. Ad obligationem legis, tam canonicæ, quàm ciuilis non exigitur necessariò consensus, & acceptatio populi, ac proinde non est illicitum legem absque ulla causa non recipere. Prob. 1. pars, quæ est magis conueniens, tum subditorum subiectioni, tum ordinato regimini, ac publicæ tranquillitati; hancque tradit Alfonso à Castro de lege pænali, Herincx in tract. de leg. Caspensis Suarez de leg. c. 19. Vasquez. & disp. 156. cap. 5. Pontius de Matrimonio lib. 1. cap. 7. & Mastrius in disp. de legibus, & videtur communior, ut supra indicauimus.

Prob. Etenim si obligatio legis dependeret ab acceptance populi; hoc maximè esset, vel quia in Principe deesset potestas alios obligandi, vel quia deesset voluntas; sed neutrum dici potest, ergo &c. Non quidem primum, ut de ecclesiastico Principe patet, cum is non acceperit potestatem condendi leges à populo, sed immediatè à Christo. De Principe autem seculari supremo, & non dependenti ab auctoritate Populi idem probatur; quia Populus ci, & in eum omne suum imperium, & potestatem confert, ut habetur l. 1. ff. de constit. Princip. ac proinde contulit quoque potestatem obligandi ad acceptandi legem, sine qua potestas obligandi foret inefficax. Alioquin Princeps non esset absolutus Dominus, si eius potestas, necessariam haberet dependentiam à populo; immò huiusmodi potestas æquè resideret in Principe absoluto, ac in populo, quod nemo dixerit. Neque asseri potest secundum, nempe quod  
desit

desit in Principe potestas, cum soleant legislatores per potestas compellere ad legis executionem, ut praxis ostendit.

Prob. 2. pars. Nam summus Pontifex Alexander VII. damnauit hanc propositionem, quæ inter damnatas est 28. *Populus non peccat: etiam si absque ulla causa non recipiat legem promulgatam*; ergo non est licitum legem absque ulla causa non acceptare. Et quidem dignissima fuit damnatione huiusmodi doctrina, quæ generatim complectitur quemcunque Principem, idest Superiorem quemlibet publicam potestatem habentem, siue sit ecclesiasticus, siue secularis talis Princeps, qui legem, quam condere potest, si condatur, Populus non recipiendo legem promulgatam nullum peccatum committit; etiam si nullam habeat rationabilem causam non recipiendi.

Arg. cont. p. 1. concl. Princeps leges condere censetur, & promulgare sub tacita conditione, si à Populo acceptentur, quia id videtur pertinere ad suaue regimen populorum, estque magis conforme benignæ voluntati legislatorum. Quod aperte confirmat dictum Gratiani §. leges cap. 3. dist. 4. *Leges instituuntur, cum promulgantur, firmanentur, cum moribus videntur approbantur*. Et in l. de quibus ff. de legibus ita habetur. *Leges nulla alia ex causa nos tenent, nisi quia iudicio populi receptæ sunt*.

Resp. neg. assumptum, quia id derogaret auctoritati Principis, esset etiam causa, seu occasio suspicandi, Principes in sua potestate habere dependentiam à Populo. Ad dictum Gratiani, dicitur non esse accipiendum in tali sensu, quod requiratur Populi consensus, ut lex ab initio vim habeat obligandi, sed in hoc sensu, videlicet, ut firmetur, & perseveret, eo quia per contrariam consuetudinem lex tollitur. Quare verum est, legibus non alia ratione nos teneri, nisi quia usu receptæ sunt; nihilominus ex voluntate legislatoris ad earum obseruationem tenemur. Vel Resp. cum Herincx ad textum ciuile l. de quibus. Iurisconsultum loqui de legibus, quæ iuxta formam regiminis Democratici olim fiebant Romæ à Magistratu simul, & à Plebe.

Arg. 2. Lex humana, quæ à maiori parte populi non recipitur eo ipso videtur inutilis, ut potè magis cedens in destructionem, quàm in ædificationem, ac proinde ex natura rei deficit à ratione legis obligantis; ergo &c.



Resp. neg. ant. Nam potest lex esse de se utilis bono communi, & populus duræ ceruicis resistere, nolendo eam acceptare; quæ quidem peruicacia potius frangenda est, quàm permittenda contra legem. Monet tamen Herincx, quod boni, & prudentis Principis est malorum pericula, & legis commoda expendere, etsi mala præponderent, ac timeantur non euitanda, legem relaxare. Immo hæc tanta esse possent, ut lex per se desinat esse tali populo utilis, & obligare. Quà propter Doctores communiter aduertunt, quod si lex sit nimis dura, & grauis, & ut talis à Populi maiori parte iudicetur, in talicasu, verisimile est, non obligare; censetur namque esse latam à Principe, non cum intentione absolutè obligandi, sed experiendi quomodo à Populo recipiatur. Insuper si lex de facto non sit usu recepta, hoc est de facto non obseruetur, vel à tota communitate, vel à maiori parte, quando instat tempus illam obseruandi, non censetur Princeps unum, vel alium obligare velle. Præterea potest populus ad remedium supplicationis recurrere, ad hoc ut lex vel moderetur, vel reuocetur, si rationabilem causam habeat, & interim lex eos obligare non censetur, quamdiù non habent resolutionem in contrarium: ita Castro. Rodriq. Salas, Bonac. Suarez, & alij. Quod si tali supplicationi legislator non respondeat præsumitur condescendere, & obligationem tollere; nisi ex circumstantijs constet de opposito, nempe ipsum tacere, ut suauiter, & cum minori offensione, ac damno reijciat supplicationem; tunc enim non licebit amplius suspendere legis obligationem, ut tradit Pourè, & sequitur Stephanus à S. Paulo.

## QVÆSTIO V.

*| Vtrum lex ferri debeat pro communitate.*

**N**OT. 1. Quod communitas, ut sic præcisa, solet ita describi. Communitas est totum quoddam morale constans ex partibus, quæ nisi aliquo vinculo connectantur, nequeunt totum commune componere; Vnde pro diuersitate connexionis, seu vinculi variæ resultant communitates. Hac ratione dicimus hominum communitatem pro-

propter communem naturam, quam obligat lex naturalis; dicimus communitatem fidelium propter communem fidem, & signa, & ceremonias, quibus discernuntur ab infidelibus; ita modo appellatur Ecclesia, & antiquitus Synagoga: hanc communitatem obligant leges D. & Ecclesiasticae. Sunt etiam communitates temporales, seu politicae sub eodem capite, ac sub iisdem sanctionibus, ut Regna, & ciuitates, & potest sic describi. Communitas politica est cætus hominum humano iure inuicem sociatorum in ordine ad aliquem finem naturalem sub aliquo capite; dicitur ad aliquem finem naturalem, ad differentiam communitatis Ecclesiasticae, quæ est in ordine ad finem supernaturalem, qua ratione Arist. 3. polit. cap. 10. ait Ciuitatem esse ciuium multitudinem habentium inter se morale vinculum sub uno principali moderatore.

Huiusmodi autem communitas politica distinguitur à Philosophis moralibus, & Iurisperitis in perfectam, & imperfectam. Prior dicitur, quæ est capax politicae gubernationis, & sibi sufficit in hoc ordine, unde Arist. lib. 1. Polit. cap. 1. docuit, Ciuitatem esse communitatem perfectam, & à fortiori Regnum. Posterior dicitur illa, quæ non est sibi sufficiens, ac proinde non est capax politicae gubernationis; quia in ipsa non congregantur singulae personæ, ut membra principalia ad unum corpus politicum instituendum, qualis est domus, cui Paterfamilias præest: Talis siquidem communitas non regitur propria potestate iurisdictionis, sed dominatiua; ac proinde pro diuersitate dominij participat modum imperandi respectiue ad diuersos subiectos; aliud enim est ius, vel quasi dominium Patrisfamilias in uxorem, aliud in filios, aliud in seruos, & famulos; unde neq; habet perfectam unitatem, seu uniformem potestatem, neque etiam participat proprie politicum regimen, ideoque dicitur communitas imperfecta.

Not. 2. Pro maiori claritate dictorum, quod dominium à Doctoribus, tam Theologalibus, quàm legalibus duplex distingui solet. Primum est dominium proprietatis, & est quædam facultas disponendi de re perfecte absque iniuria ullius, ratione cuius dominij res dicitur sua, ut domus, pradium &c. Secundum dicitur iurisdictionis, estque po-

testas, seu facultas quædam gubernandi sibi subditos: Quod quidem dominium iurisdictionis sub diuiditur in præceptiuum, & in legislatiuum; quemadmodum enim non omne præceptum est lex, ita non omnis potestas præceptiua est legislatiua, è diuersò autem, sicut omnis lex est præceptum; ita omnis potestas legislatiua includit præceptiuam. Et hoc dominium iurisdictionis fundamentum habet in eo, quod aut ratione alicuius vinculi naturalis, ut Patris in Filium, aut ratione contractus, ut in matrimonio, & emptione serui, aut ratione potestatis gubernandi, quæ residebat in communitate, est quis constitutus Princeps.

Concl. De ratione essentiali legis est, ut pro aliqua tota communitate præscribatur. Est communis & breuiter, prob. 1. ex discrimine, quod intercedit inter præceptum. & legem; præceptum namque uni, lex omnibus præscribitur; ergo &c. Prob. 2. Lex æterna, & naturalis non uni soli homini data est, sed in omnium cordibus est scripta. Similiter lex D. tam vetus, quam noua communitatibus præscriptæ sunt; illa quidem Iudaico Populo, hæc Ecclesiæ uniuersali, leges humanæ pariter pro communitate feruntur, ut de lege ciuili constat. Siquidem lib. 1. ff. de leg. dicitur, *Lex est commune præceptum*, & l. iura eod. tit. *Lex a non in singulas Personas, sed generaliter constituitur*. Idem de lege canonica liquidò patet, nam canones, & Decreta à Patribus dicuntur esse leges publicæ, idque præsertim docet Greg. IX. in proæmio Decret.

Prob. ratione. Lex est principalis actus prudentiæ politicæ, quæ per se primò respicit bonum totius Reip. aut communitatis, cui præscribitur; ergo ad totam communitatem ordinatur. Tum quia de ratione legis est, quod sit perpetua; sed nulla Persona humana particularis pro statu isto est perpetua: ergo lex respicit communitatem, quæ censetur esse perpetua, quatenus per continuam successionem perseverat.

Arg. In iure can. lex distinguitur in priuatam, & publicam ex cap. licet de Regularibus, & cap. duæ sunt, prior priuatae Personæ, posterior communitate præscribitur. Idem traditur in iure ciuili. Nam Instit. de iure nat. gentium, & ciuili diuiduntur leges Principis in generales, quæ omnes obligant, & in personales, quæ non trahuntur ad

exem-

exemplum, ergo &c. Resp. 1. Ius can. loc. cit. intelligi de voto concepto ex speciali inspiratione Spiritus S. aut de ipsamet inspiratione, quæ cum sit cordis infusa, improprie dicitur lex. Resp. 2. Ius civile tantum velle, legem personalem, quæ improprie dicitur lex, quia fertur in fauorem Personæ particularis, cuiusmodi sunt priuilegia, non debere trahi in exemplum.

Arg. 2. Quando lex fertur pro communitate, vel solum obligat communitatem, ut sic, vel etiam comprehendit singula membra eiusdem communitatis; si primum, tunc communitas se gerit ut persona particularis, ac proinde lex dirrigi potest ad personam particularem; si secundum, ergo merito concluditur, lege posse condi pro uno solo, si expediat. Resp. legem ordinarie ferri ad communitatem non collectiue, sed distributiue, nempe ea ratione, ut ab omnibus, & singulis de communitate seruetur, cum distributione accomoda iuxta legis dispositionem. Cæterum potest interdum lex ferri in communitatem, ut communitas est, ei præcipiendo, vel inhibendo aliquem actum, qui ob illa sola, ut communitas est, exerceri debeat, ut patet de statutis, & legibus præfixis alicui Congregationi, uniuersitati, Capitulo, & Collegio.

Quæres. Qui nam possint legem condere.

Resp. Non spectare ad quemlibet leges condere, sed tantum ad multitudinem, vel ad eum, qui multitudini præest, ut docet D. Thom. 1. 2. q. 90. art. 3. Quare primo potest sum. Pontifex potestate sibi à Christo immediate concessa ferre per totum orbem leges Ecclesiasticas, hoc est, per se, ac directe versantes circa res spirituales ordinatas ad salutem Animarum; civiles verò leges, idest directe spectantes commodum temporale, seu regimen civile in territorio tantum sibi temporaliter subdito. Et quàmuis etiam cæteris Apostolis collata fuerit huiusmodi potestas condendi leges, non tamen immediate, & independenter, ut tradunt Turrecremata lib. 2. sum. Eccl. c. 77. Cord. de potest. Pontificis, & alij. Vnde hæc est differentia inter potestatem datam Petro, & cæteris Apostolis, quia potestas collata Petro est independens ab altero; potestas autem cæteris Apostolis data fuit dependenter à Petro. Item potestas data Petro est perpetua, quia per successionem durat,

rat, Apostolorum verò est personalis; & ideo poterat Petrus suis legibus obligare ceteros Apostolos; Similiter poterat Petrus eorum leges restringere, & reuocare; eò quia Petrus à Christo erat constitutus Pastor omnium, ac per consequens etiam Apostolorum, utpotè subditorum, sicut aliorum fidelium. Insuper potest Papa sine consilio Cardinalium condere leges uniuersales obligantes totam Ecclesiam; ita Panormit. c. 2. de Clerico non residente. Felin. in rubr. de constit. n. 2. idem docet Herincx in tract. de leg. ex communi sententia Theologorum innixa præsertim super verbis, quæ dixit Christus ipsi Petro Matt. 16. *Tibi dabo clauis cælorum*. Et Io. 20. *Pasce oues meas*. Vnde Anacletus Papa, & refertur dist. 22. c. 2. *Romana Ecclesia non ab Apostolis, sed ab ipso Domino Salvatore nostro primatum obtinuit*; ac proinde Papa in legislatione non dependet à Concilio, neque à Cardinalibus. Hinc patet error VViclef. damnatus in Concil. Constant; negantis, Christum tradidisse potestatem legislatiuam Petro, & successoribus eius. Vnde asserbat; solum Christum fuisse nostrum legislatorem. Contrarium tamen definitur etiam in Trid. sess. 6. cap. 19. contra Lutherum, & alios hæreticos.

II. Legati sedis Apost. possunt ferre leges pro tota Pro- uincia suæ legationis; habent enim iurisdictionem ordinariam. eamque maiorem, quam Episcopi, ut constat ex rit. de off. legati. Et cap. final. expresse deciditur, legatorum statuta eorum morte, vel amotione non expirare, quousque reuocentur. Sunt autem triplicis generis legati, ut inter alios bene notat Layman in theol. moral. in tract. de legibus, quem vide, si placet.

III. Cardinales S. R. E. cum ordinariam, & quasi Episcopalem iurisdictionem obtineant in Ecclesia sui tituli, ut constat ex cap. Quærelam, de electione cap. his, quæ de maior. & obed. habent potestatem legislatiuam, ac proinde possunt leges, & statuta condere in Ecclesijs suorum titularum. Item ex præscripta consuetudine, teste Layman l. cit. ordinariam iurisdictionem exercent in suos familiares, ut proinde hi cum licentia Cardinalis sui, cuiusque Confessario exposito confiteri possunt. Verum nullam iurisdictionem habent Cardinales in Ecclesiam yniuersalem, etiam vacante Sede Papali, ut habetur in Clement. Ne Re-

*mani de elect* & cap. *Vlt periculum de elect* in 6. ubi præcipitur, ut Cardinales, mortuo summo Pontifice, post decem dies exactos, quam primum omni conatu, & sollicitudine Pastorem eligant, & se nequaquam de alio negotio intromittant. Et quàmvis Capitulum cathedrale, vacante Sede Episcopali, succedat in iurisdictionem Episcopi; non tamen Cardinales succedunt in iurisdictionem Papalem: imò hoc illis expressè inhihetur Clement. cit. Ne Romani. De electione. Ex Papæ verò commissione emergentibus dubijs circa morum reformationem, & in litibus iudicialibus Concilia, & Pontificia iura interpretantur. Verùm, an eorum interpretationes, siue declarationes vim legis, an solum sententiæ doctrinalis, vel iudicialis obtineant, pendet quæstio ex mente summi Pontificis, ait Layman. ipsis tribuentis potestatem. Interim præsumendum non est habere vim legis, præsertim, quia authenticè non promulgantur. Ita docent passim Doctores cum Roderico t. 1. q. q. reg. q. 11. art. 2.

IV. Episcopi ferre possunt leges pro sua Diœcesi, ut habetur c. 2. de Major. & obedient. & cap. 2. de constit. in 6. & alibi: quæ quidem potestas firmatur praxi Ecclesiæ; camque habent postquam sunt confirmati, antequàm sint consecrati; per confirmationem namque accipiunt iurisdictionem, cui potestas legislativa est annexa, ut inter plurimos tradit noster Herincx. Nec requiritur consensus Papæ, nisi in casibus iuri Pontificio repugnantibus, aut ex iure, vel consuetudine Papæ reseruat. Similiter non requiritur regulariter consensus Capituli, vel Synodi Pastorum, cum hoc nullo iure caueatur; estò requiratur saltem consilium Capituli ex cap. Quanto 5. *De his, qua fiunt à Prælati*, & tradit Zipæus in *Analyfi iuris Pontificij* noui hoc titulo. Dicitur regula. Nam lex cedens in præiudicium Cleri, nequit ferri sine illius consensu ex cap. Nouit, de his, quæ fiunt à Prælati, & alijs iuribus, quemadmodum exigitur consensus Cleri, & Populi ad instituenda, noua festa cap. final. de ferijs. Ita noster Herincx l. c. qui etiam monet attendendam esse consuetudinem, quæ potestatem Episcoporum varijs in locis potuit extendere, vel arctare. Neque Episcopi Archiepiscopis subiacent nisi in quibusdam casibus, qui reducuntur ad ius illos visitandi,



corrigendi, & ad ius appellandi, & etiam conuocandi Episcopos sibi subiectos pro Concilio Prouinciali.

V. Capitulum Cathedrale Sede vacante potest condere leges: ita communis sententia Doctorum contra Malderum, & quosdam alios: Succedit enim Capitulum in iurisdictionem Episcopi quoad totam iurisdictionem in spiritualibus, & temporalibus, præterquam in casibus iure prohibitis, ut colligitur ex cap. un. de Maior. & obed. in 6. ergo potest condere leges nouas, præcedentis Episcopi leges reuocare, & contrarias statuere, duraturas usquedum ab Episcopo nouo tollantur. Vide Herincx, & Layman. loc. cit. qui latè discurrunt de hac materia; & ex professo agit de Vicario Capitulari. Pellegrin. in praxi, & Marchet. in praxi Vic. Capitularis.

VI. Concilium generale legitimè congregatum potest condere leges, quæ tamen ante confirmationem Papæ non obligant, ut tradunt communiter doctores. Similiter Concilia Nationalia, Prouincialia Diocesana possunt leges ferre, proportionatas tamen, & accomodatas iurisdictioni, tam quoad territorium, quam quoad materiam legum: ita communiter Canonistæ, & Theologi.

VII. Generales Religionum à S. Sede approbatarum possunt condere leges pro suis subditis, quam potestatem habent à Sum. Pontifice, ut constat ex priuilegijs Religionum. Item Capitulum Generale Sede vacante potest condere leges, quæ quidem leges obligant Religiosos subditos in conscientia; si legislatores intendant sic obligare. Neque Xistus IV. in Bulla incip. *Circumspecta Apostolica Sedis* apud Bullarium Rodriquez ademit huiusmodi potestatem Ministro Generali nostræ Seraph. Relig. Siquidem Pontifex ad instantiam Generalis, & uniuersi Ordinis tantum annullat obligationes sub culpa mortali, ac censuris; ex Statutis hætenus factis oriundas; immò & papalibus. De faciendis tamen de nouo siue à Papa, siue à Capitulo non agit: Multò minus derogat statutis obligantibus ad culpam venialem, & temporalem, ut videre est apud Roder. t. 1. qq. res. q. 10. art. 8. & apud Portel. V. statutum, qui refert. Pium V. concessisse, ut per quæcunque statuta etiam Apostolica, non ligarentur fratres ad aliquas censuras, seu penas Ecclesiasticas, vel ad peccatum mortale, sed tantum

ad pœnas. seu pœnitentias per Prælatos iniungendas; dummodo non sit contemptus, vel mandatum non sit impossibile sub pœna excommunicationis, vel in virtute S. Obedientiæ, & ita se declarant etiam præsentis nostræ constitutiones, quatenus non intendunt obligare ad culpam, nisi transgressio esset ex contemptu. Monet tamen Herinex, quemlibet legislatorem observare debere parcitatem in statutis, & legibus condendis, quia nimia multiplicitas parit contemptum, & reddit onus non suaue, sed nimis onerosum. Tum quia, ut ait Zypæus lib. 3. *Analysis iuris Pontif. tit. De his, quæ fiunt à Prælatiis*. Corruptissimæ Reip. indicium plurimæ leges: sat multa, sat benè constituta sunt, si sat benè observari curentur.

VIII. Imperator ferre potest leges civiles per omnes Provincias sibi subditas. Item & Rex, alijque Principes supremi non habentes superiorem in iurisdictione temporali. Adde, & Reginam posse leges condere, si sit Domina Regni, idque etiam si sit Matrimonio iuncta; nisi vices viro commiserit. Alioquin ius, & dominium Regni per matrimonium non transfertur in virum, sed perseverat in ipsamet Regina.

IX. Communitates, & Ciuitates, quæ per se gubernantur, nec legitimam Superiorem agnoscunt. possunt ferre leges pro omnibus suis subditis: huiusmodi tamen potestas legislativa non competit patrifamilias, estò quidam in dubium id reuocare studeant; habet siquidem paterfamilias potestatem dominatiuam, seu æconomicam, ut supra & non tamen iurisdictionis, ac proinde potest intra limites suæ potestatis, suosque filios obligare etiam sub culpa mortali, si materia fuerit grauis, non tamen leges condere. Cæterum notant DD. patrefamilias in suis præceptis ordinariè non intendere obligationem in foro conscientiæ, sed pœnalem tantum; & idem dicendum de præceptore respectu discipulorum.

Quæres 2. An legislator merè politicus possit condere aliquas leges Eccles. ad Religionem catholicam pertinentes.

Resp. negatiuè: eò quòd potestas legislativa ecclesiastica, & laicalis sunt diuersi ordinis, ac proinde nequit Princeps merè civilis transire limites potestatis civilis, ut liquet ex iure canonico. Dices. Potest Magistratus indicare

dies festos, & punire eos, qui tales dies non obseruant; ergo potest Princeps ciuilis condere leges ecclesiasticas.

Resp. neg. assumptum: nam certum est Principem sæcularem sine auctoritate Episcopi non posse dies festos instituere in honorem Dei, ut tradit Abbas in cap. de ferijs: ratio, quia festorum obseruatio ad publicum Dei cultum ordinata inter spiritualia continetur; laica autem potestas nequit quid sacrum, vel religiosum præcipere cap. cum laicis de rebus Eccles. non alienan. & cap. deuouimus: quamuis possit dies festos indicare prætextu ciuilis honoris, vel alio titulo; & tunc non præcipit actus Religionis, sed solum ut à seruilibus operibus abstinetur, & forenibus, ac ciuilibus negotijs cessetur, ut norat noster Moronus lib. 100. resp. resp. 8. Nec refert Magistratus imponere pœnam non obseruantibus dies festos, eosque punire; id enim eis permittitur cap. *irreligiosa de cons. dist. 3.* Immo a Pio V. in constit. incip. *Cum primum sub dat. Roma Kal. April. 1566.* conceditur tam sæculares, quàm ecclesiasticos procedere posse contra violantes dies festos ab Ecclesia indictos; ac proinde in istis puniendis, teste Morono, datur præuentio fori.

Quæres 3. An potestas condendi leges sit delegabilis.

Resp. affirmatiuè: ratio, quia potestas legislatiua est quedam pars iurisdictionis ecclesiasticæ (de ciuili enim non est dubium) quæ est delegabilis saltem respectu unius, vel alterius Prouinciæ iuxta Suarez lib. 4. de leg. c. 6. respectu verò totius Ecclesiæ quoad absolutam legislationem, per quam accipiat vim obligandi totam Ecclesiam absque speciali approbatione Pontificis, talis potestas non potest delegari; neque ulli alteri comitti: ratio est, quia leges canonicæ obligantes totam Ecclesiam proficiis debent à potestate, quæ in rebus ad mores pertinentibus errare non possit; hæc autem potestas, cum pendeat à speciali directione Spiritus S. promissa Pontifici, non est delegabilis; sicut nec potestas definiendi res fidei; ac proinde nec potestas legislatiua pro tota Ecclesia est delegabilis, vel saltem non est deleganda; ne tota Ecclesia periculo alienius erroris in re tam graui exponatur. Neque Prælati possunt in iurisdictione spirituali delegare nisi Clericum; qui tamen non sit de coniugatis, cum isti habeantur tanquam laici, ac proinde incapaces delegationis, ut constat ex cap. un. de Cler.

conjug. At Sum. Pontifex delegare potest etiam laicum, dummodo sit baptizatus, ut colligitur ex glos. in cap. pret. dist. 32, Dubium est tamen; an possit feminam delegare; opiniones sunt hinc inde, probabilior tamen sententia est; ut arbitratur Mallet. lib. 2. de leg. constit. & iure can. tit. 1. posse Pontificem delegare feminæ potestatem ferendi leges. Ita Palud. in 4. dist. 19. q. 2. art. 1. Vgol. de censuris tab. 1. c. 2. §. 7. Henriquez lib. 13. de Sacram. cap. 24. & alij. Ducuntur hac ratione, quia nullo iure diuino est prohibitum, ne Papa pro sua summa potestate possit mulieri delegare huiusmodi potestatem.

Quæres 4. Quænam sint legis proprietates.

Resp. legis proprietates tres communiter numerant, nempe auctoritatem, veritatem, & bonitatem, lex enim, habet principium, formam, & finem. Ratione principij condentis legem debetur ipsi legi auctoritas; nam edictum sine auctoritate sancitum nullius est valoris. Ratione formæ debetur legi veritas, seu rectitudo; quia id, quod præscribitur cum iniustitia, non consequitur legis rationem, sed in tyrannidem vergit. Ratione finis debetur legi bonitas: Siquidem lex tota ordinatur in bonum commune societatis hominum, nec non in bonum particulare Dei, ad quem omnes creaturæ bonum, tanquam ad fontem, & caput, unde dimanant, refluere debet.

Quæres 5. Quinam sint præcipui legis actus?

Resp. legis actus esse quatuor iuxta communem sententiam, nimirum, præcipere, vetare, punire, & permittere. Et ratio est manifesta, quia cum actus humani sint, vel ex genere boni, vel genere mali, vel indifferentes, sequitur, quod quatuor sint actus principales legis: præcipiuntur enim actus boni, prohibentur actus mali committendi, puniuntur commissi, & permittuntur actus indifferentes.

Quæres 6. Qui nam sint legis effectus, & officia?

Resp. Duplex esse maxime legis officium, nempe dirrigere, & obligare. Primum patet, quia omnis lex est mensura, & regula actuum humanorum. Secundum pariter est euidens, eo quia si lex dicitur à ligando, animos enim nostros, inquit Cassiodorus, ligat, suisque tenet obnoxios constitutis, consequenter debet obligare iuxta naturam uniuscuiusque legis. Resp. 2. legis effectum præcipuum

esse subditorum bonitatem, & ordinationem; idque præstat secundum ampliorem, vel meliorem bonitatem, quam ipsa continet. Hinc lex Evangelica omnium præstantissima intendit, ut homo fiat simpliciter bonus, non solum in exteriori opere, sed etiam in interiori animo, adeo ut fiat filius Dei adoptivus per gratiam. Lex naturalis, ut homo fiat bonus virtutibus moralibus, quæ naturæ commensurantur, habeatque vitam ad cæteros homines ordinatam, alteri non faciendo, quod sibi fieri nolit. Lex denique civilis, ut homo sit bonus civis, præstando ea, quæ ad pacem Reipubl. ordinata sunt. Lex Ecclesiastica, ut Clericus probis moribus instituitur, & quæ sui muneris sunt, debito ordine fungatur.

## DISPUTATIO II.

*De lege æterna, & naturali.*

### QVÆSTIO I.

*Utrum lex æterna sit propriè lex, & an aliæ leges ab ea deriuentur.*

**N**Ot. 1. Quod præsens quæstio profundior est, quam prima fronte appareat. Siquidem oportet pro eius intelligentia altissima, & diuina perscrutari, id est æternos actus intellectus, & voluntatis Dei tam absolutè, quam relatiuè ad creaturas. Quare alia est lex propriè dicta, & alia est lex impropriè dicta. Prior est illa, quæ dicitur imperans, debitè promulgata cum intentione obligandi subditos, ut etiam superius tactum fuit. Posterior est illa, quæ, cum sit impropriè lex, neque vim legis obligandi habet, quia non est imperans, sed tantum indicans; ac proinde est regula, cui actus conformari debet, ut naturaliter rectus dicatur, seu in genere naturæ, quæ quidem regula ex Scot, quol. 18. est iudicium intellectus illius, qui est mensura totius naturæ, quod iudicium formaliter deriuatur ex natura rerum, seu terminorum, principiatiuè verò ab intellectu D. qui iudicat ita esse; ideoque huiusmodi iudicium dicitur lex indicans; ut veritas huius propositionis: Deus est

est amandus, pendet formaliter ex natura terminorum, principiatiuè verò ab intellectu D. eo ferè modo, quo philosophamur de possibilitate, & impossibilitate rerum.

Not. 2. Quòd volitio Dei, quæ est lex æterna respectu creaturarum est in Deo non libera, & contingens, sed necessaria, cum respiciat pro obiecto regulas practicas necessariæ, & æternæ veritatis, ad quam naturaliter obligamur; ut Deus est colendus, parentes sunt honorandi, non est mentiendum, & similes; hæ enim sunt regulæ omninò immutabiles, & æternæ; ideoque Deus iudicat, & necessariò vult tales regulas esse à creatura seruandas; rationem huius dat Scot. q. 4. prol. docens, voluntatem D. in ordine ad necessaria non esse primam regulam, sed benè intellectum D. cui ex sua perfectione se necessariò conformat D. voluntas. Ex quo fit, quod, licet Deus potuerit absolutè non prohibere actum odij, blasphemie, vel mendacij ea prohibitione, quæ fit per actum liberum, & explicatur per verbum imperatiui modi: Non occides, non mentieris, quæ est externa prohibitio per reuelationem, & legem positiuam à Deo latam; attamen prohibere non potuit ea prohibitione, quæ consistit in iudicio reprobante intellectus per modum indicatiui, & in displicentia reprobativa voluntatis; quæ prohibitio explicatur per verbum indicatiui modi sic. Nolo mendacium, odium &c. Et dicitur prohibitio interior, quia, licet ad extra nihil Deus dicat, reuerà tamen ei illa obiecta displicent: quia ratione Deus dicitur necessariò prohibere actus intrinsecè malos, nec talis prohibitio est ei libera, quia huiusmodi reprobatio, & displicentia sunt actus necessarij in intellectu, & voluntate D. immediatè regulati per scientiam simplicis intelligentiæ; & hæc doctrina est valdè notanda, maximè pro fundamento illius quæstionis: An Deus dispensare possit in præceptis Decalogi, de qua infra erit disputatio.

Not. 3. Quòd sicut Thomistæ alia via incedunt in hac quæstione, ita modo diuerso solent explicare rationem legis æternæ. Quarè dicunt legem æternam nil aliud esse, quàm rationem D. Sapientiæ, quatenus omnium actionum, & motuum est directiua; sicut enim in quolibet Artifice præexistit ratio eorum, quæ per artem fiunt, ita etiam in quolibet gubernante præexistere debet ratio directiua.



eorum, quæ ab ijs, qui eius gubernationi subsunt, agenda, vel omittenda sunt. Discurrunt enim consequenter ad fundamentum supra insinuatum, nempe rationem legis consistere formaliter in intellectu. At ijsdem rationibus, quibus impugnatum fuit suprad. fundamentum, impugnamus pariter præfatam doctrinam. Planè lex, quæ solum dictamen intellectus importat, non sufficit ad rationem, legis propriè dictæ; quia de ratione legis est, quod non tantum sit directiua, sed etiam obligatiua respectu subditorum, quam vim non obtinet nisi ex voluntate legislatoris. Vnde lex æterna non obligat nos ex eo, quod Deus cognoscat aliquid agendum, vel omittendum, sed ex eo, quod nobis aliquid per suam voluntatem imperet; ita de mente Scoti tradunt passim Scotistæ, & signanter Nicol. de Nise in tract. de leg. & sequitur Arriaga. Immo Becan. c. 2. q. 1. explicat mentem D. Thomæ eodem modo, dicens; quod lex æterna est actus D. mentis, quo concipit, & iudicat, quasdam Regulas prácticas necessariæ, & æternæ veritatis esse à creatura seruandas, cum voluntate eam obligandi, & in hoc sensu, ait, D. Thom. legem æternam accepisse.

I. Concl. lex æterna, si accipiat pro actibus intellectus, & voluntatis D. regulantis immediate per scientiam simplicis intelligentiæ, non est propriè lex; Si vero accipiat pro Diuinæ sapientiæ ratione, seu pro D. voluntatis actu, quo Deus ab æterno decreuit creaturam rationalem teneri in tempore ad hoc, vel illud faciendum, vel cauendum est propriè lex. Prima pars est Scoti, & Scotistarum, nec non aliorum extra nostram Scholam, & signanter Caramuelis t. 1. suæ theol. fundamentalis; quæ ex dictis remanet satis probata. 2. pars est Alens. 3. p. q. 26. memb. 1. & videtur communis. Prob. ex D. Aug. qui lib. de lib. arb. dicit, quod *lex æterna est summa ratio, cui semper obtemperandum est, per quam mali miseram, boni bonam vitam merentur; per quam illa, quæ temporalis est rectè fertur, rectèque mutatur*; ergo est propriè lex; habet enim quicquid desideratur ad rationem legis propriè dictæ; Ab æterno fuit in Deo voluntas obligandi, fuit iudicium ex parte intellectus, mouens voluntatem ad promulgationem, & fuit voluntas promulgandi pro suo tempore; ergo in mente Dei fuit ab æterno quicquid exigitur ad essentiam legis.

Con-

Confirm. Quicquid Deus habet in tempore, habuit ab æterno, quia Deus est immutabilis, nec aliquid noui potest ei accidere, ergo leges, quas habemus in tempore latas, habuit Deus ab æterno; ac proinde lex æterna indicata in secunda parte conclusionis est propriè lex.

II. Concl. legi æternæ subijciuntur omnia entia, tam rationalia, quam irrationalia, diuersa tamen ratione; ut discurrendo patebit: hæc est omnium Theologorum, & Catholicorum. Prob. lex æterna est gubernatiua rerum uniuersi; sed omnia diuinæ gubernationi subduntur, ergo, & legi æternæ; unde dicitur Sap.c.8. *Attingit à fine usque ad finem fortiter, & omnia disponis suauiter*. Et quidem de creaturis ratione carentibus constat ex Psal. 14. *Ignis grandis, nix, glaciès &c. quæ faciunt verbum eius*, & Psal. 118. *Ordinatione tua persuerat dices, quoniam omnia seruiunt tibi*. Cæterum de creaturis ratione præditis clariùs constat, quia hæc lex æterna est prima regula, & mensura actuum in genere moris; est norma directiua nostrorum actuum, cui subduntur omnes humani actus, quatenus morales, siue, ut etiam Angelos comprehendamus, omnes actus creaturarum intellectualium.

Quod autem diuerso modo legi æternæ subijciantur, euidens est; cò quia irrationalia subijciuntur necessariò, & naturaliter, quatenus scilicet Deus imprimat illis naturalem inclinationem, seu instinctum ad faciendum naturaliter, & necessariò ea, quæ Deus ordinat iuxta eorum naturam ab ipsis fieri. Verùm intellectualia illi subijciuntur liberè, & moraliter, quoad actus morales, estò homines quoad actus, qui naturam sequuntur, & fiunt prorsus independentes à ratione, subijciuntur naturaliter, ac proinde non liberè, sed necessariò.

III. Concl. Omnes leges iustæ, & propriè dictæ ab æterna lege deriuantur: Hæc est omnium Theologorum. Prob. 1. ex S. Scrip. nam Prouerb. 8. D. sapientia testatur. *Per me Reges regnant, & legum conditores iusta decernunt*. Quod ad eum verum est, inquit Marchantius tom. 3. tract. 2. tit. 2. q. 1. & consonat Frassen. t. 2. in tract. de legibus disp. 3. art. 2. q. 2. ut etiam ipsa Tyrannorum potestas deriuetur ab ipso Deo, qui eis Regnum, & principatum tribuit propter vindicanda Populi peccata iuxta illud Iob. *Qui regnare facis ho-*

*minem hypocritam propter peccata populi. & Eccles. 10. Regnum à gente in gentem transfertur propter iniustitias, & iniurias, & contumelias, & diuersos dolos. Quare idem Marchant. concl. 3. sic habet. Omnis potestas regia, siue quæuis præfectura à D. prouidentia prouenit, siue quia illam indigno obuenire, permittit; siue etiam, quia positiuè in peccati poenam, vel populi vindictam potestatem illam indigno subiecto dimittit. Quam veritatem tradit D. Aug. lib. 1. de lib. arb. c. 6. ubi ait. In lege temporalis nihil instam, atque legitimum quod non ex hac æterna sibi homines deriuauit, & lib. 5. de Ciuit. Dei c. 21. luculenter explicat, qualiter Deus etiam impijs Tyrannis permittit regnare.*

Prob. 2. concl. inductione facta per omnes leges: & quidem de lege naturali constat, nam supra in definitione legis naturalis diximus, quod lex naturalis dicitur diuina, quatenus à Deo potentia naturali est superaddita; ut ipsa ratio ex natura sua primæ veritati subordinetur iuxta illud psal. 4. *Signatum est super nos lumen vultus tui Domine.* lex Diuina positiua nil aliud est, nisi illius æternæ legis quædam deriuatio immediata; quicquid enim Deus præcepit in tempore, ab æterno in sua D. mente decreuit. Denique omnes leges humanæ, quæ vel per discursum humanum, vel ex lumine, & ratione naturali, vel ex ratione reuelata colliguntur, & statuuntur, etiam ab ipsa æterna lege originem ducunt; etenim, cum lex naturalis, & Diuina, ex quibus humanæ leges inferuntur, ab ipsa Dei æterna lege promanet, pari ratione, ab ipsa omnes humanæ leges deductæ censeri debent. Itaque lex naturalis deriuatur à lege æterna medio lumine rationis; leges D. immediatè ponuntur à Deo; leges verò humanæ media potestate, vel ab ipso Deo immediatè, vel mediante Reipub. consensu, Principibus communicata.

Arg. 1. cont. 2. part. 1. concl. Lex necessariò requirit aliquem, cui possit præscribi, sed ab æterno nullus existit, cui lex præscriberetur, ergo nulla lex æterna proprie dicta datur. Resp. conc. mai. & dist. min. Nullus existit in esse existentia realis, conc. in esse obiectiuo, nego: ergo nulla lex æterna proprie dicta datur disting. conf. in actu primo neg. conseq. in actu 2. conc. conf. Quemadmodum enim dicitur, Deum ab æterno habere dominium quoad habi-

tum,

tum, seu actum primum, & in tempore quoad actum secundum; ita pari ratione discurrendum est de lege æterna.

Arg. 2. De ratione legis propriè dictæ est, quod promulgetur; sed ab æterno nulla potuit esse promulgatio: ergo &c.

Resp. dist. min. nulla potuit esse promulgatio, se tenens ex parte creaturarum conc. min. ex parte legislatoris, nego. Quia cum lex æterna sit Decretum Dei immutabile, sine ulla sui mutatione ab æterno lata obligabit in tempore; secus autem se habet decretum hominis; cum enim sit mutabile, quamdiu non promulgatur per modum legis, potius se habet per modum propositi ferendi legem. Addi etiam potest, quod promulgatio est conditio sequens ipsam legem; ac proinde in actu primo datur lex propriè dicta, absque eo, quod promulgetur.

Arg. 3. lex æterna, & Prouidentia videntur esse prorsus idem; sed Prouidentia non est propriè lex, ergo nec lex æterna. Resp. neg. mai. Etenim, licet D. lex æterna cum D. Prouidentia in eo conueniat, quod utraque videatur directio, & ordinatio rerum quarumlibet in fines sibi conuenientes, tamen lex æterna à Prouidentia distinguitur in multis: Siquidem illa per se primò respicit bonum commune uniuersû, hæc autem bonum singulare cuiuslibet creaturæ. Illa dicit in sua ratione vim obligandi, ista nequaquam. Item lex æterna in Deo tradit regulas generales gubernationis, e. g. lapidem deorsum, ignem sursum, inclinari, Prouidentia verò comparatur ad legem æternam, ut conclusio particularis ad principium uniuersale: ideoque Prouidentia ad legem æternam, tanquam ad principium reducitur; non aliter ac prudentia ad legem positiuam; quæ tradit regulas generales e. g. Deum esse colendum, iuxta quas prudentia colligit hic, & nunc esse operandum.

## QVÆSTIO II.

*In quo consistat essentia legis naturalis.*

**N**OT. 1. Quòd lex Diuina naturalis, cuius descriptionem dedimus supra ex Petro Marchant. si in omnibus suis finibus attendatur, benè diuiditur ex eodem Doct. q. 3.

in sacram, moralem, & politicam. Lex naturalis sacra (quam nonnulli ceremonialem, alij ecclesiasticam vocant) est, quam hominibus à principio indidit in ordine ad cultum Dei; nam sicut hominibus à principio indita est Dei cognitio, & instinctus ad illum colendum; ita sine dubio præceptum aliquod naturale de Deo colendo illi impositum est. Siquidem homo creatus ad imaginem Dei, naturali suæ inclinationi relictus, etiam ad aliquem Dei cultum internum, & externum propendit. Cuius signum manifestum est, quod nulla unquam tam barbara natio in uniuerso fuerit, quæ Deum aliquo ritu, etsi superstitioso, & falso, colendum non æstimauerit. Lex naturalis moralis dicitur, quæ hominem in moribus dirigit, prout ad æternam beatitudinem, est creatus. Lex denique naturalis politica est, quæ hominem, ut est animal sociale dirigit, quatenus societas illa, & ciuitas ordinatur ad charitatem, & Deum.

Not. 2. Quòd ad legem naturalem pertinent in primis illa uniuersalissima principia practica, cuiuslibet naturaliter nota, nempe bonum est faciendum, malum est fugiendum. Quod tibi non vis alteri non feceris. Quæ non tam dicenda sunt præcepta, quàm præceptorum omnium principia: 2. ad eandem legem pertinent omnia præcepta Decalogi; hæc enim lumine naturali ex illis duobus principijs inferuntur, ut patet de cultu Dei, de honore parentum, de homicidio &c. excipitur tamen præceptum de Sabbato obseruando, eò quòd aliquid habeat iuris positiui D. & aliquid iuris naturalis; nam quatenus cultum Dei iubet est de iure naturæ; & quatenus præscribit talem diem potius, quàm alterum est iuris D. positiui: 3. omnes actus virtutum moralium sunt de lege naturæ, si spectentur secundum suam rationem genericam, ut docent Richard. in 4. & D. Thom. q. 94. art. 3. secus autem si considerentur secundum seipsos, & in proprijs speciebus, exemplo declaratur: actus temperantiæ v. g. secundum suam rationem genericam, idest quatenus est actus virtuosus, talis est, ut in eum natura inclinet, & sic ad legem naturæ pertinere dicitur; quod autem per abstinentiàm carnibus, & per ieiunium quadragesimale debeat exerceri, hoc non est à lege naturali, sed pendet à lege positiua, & præcepto Ecclesiæ.

Not. 3. Quòd triplicis generis sunt naturæ præcepta, quo-

quorum aliqua respiciunt hominem, ut est ens, substantia &c. aliqua ut est animal, & habet aliquid commune cum brutis; & denique aliqua ut est rationalis. Vnde iuxta triplicem inclinationem hominis in bonum, quod est obiectum appetitus, seu inclinationis, dantur tria præcepta, per quæ homo in suis actibus dirigatur. Primum in ordine ad se ipsum, in quantum inclinat ad conseruationem sui proprii esse, & sic dicat, aliquando esse comedendum, bibendum, dormiendum, & arcenda sibi nociua: 2. in ordine ad inclinationem, quam habet ad conseruationem speciei, seu generis humani: 3. denique in ordine ad inclinationem rationalem decenter viuendo in ordine ad Deum, & homines, quibuscum societatem inire debet. Ad primum genus, temperantia suppeditat præcepta de cibo, & potu moderatè sumendis, & fortitudo dat vim, & robur ad repellenda nociua vitæ conseruationi. Ad 2. genus spectant præcepta castitatis, & prudentiæ, quibus decenter fiat propagatio, & liberorum educatio. Ad 3. verò pertinent præcepta Religionis, iustitiæ &c. quibus possit homo, & Deum colere, & honorare parentes, & superioribus obsequi, & cum cunctis ita viuere, ut neminem offendat.

Verùm aduertunt DD. circa duo priora, ad obligationem legis, aut præcepti naturæ non sufficere, quod res, ad quam est inclinatio naturæ, sit in se bona, sed insuper requiritur, ut iuxta dictamen rectæ rationis sit hic, & nunc aliquo modo necessaria; alioquin omnia quæ aliquam commoditatem præstant naturæ, & in quæ natura inclinat, caderent sub præcepto legis naturalis. Itaq; tunc solum censetur istud præceptum urgere, quando adest aliqua necessitas, ob quam recta ratio dicat ea hic, & nunc esse faciendâ.

1. Concl. lex naturalis non consistit in ipsa rationali natura secundum se spectata, quatenus actiones aliquæ sunt illi moraliter conuenientes, & honestæ, aliæ verò repugnantes, & inhonestæ. Hæc est Frassen, & Mastrij in Theologia moral, disp. 2. de leg. q. 2. art. 2. est tamen contra Vasquez, Meratium, & alios, quibus consentit etiam noster Herincx in disp. de leg. naturali. Prob. lex naturalis est verè, & propriè lex, sed ipsa natura rationalis præcisè sumpta nequit esse lex propriè dicta, ergo lex naturalis nequit in ipsa consistere. Tum quia natura rationalis legi



naturali subijcitur; ergo ratio legis in ipsa natura rationali nequit consistere, alioquin idem sibi ipsi subiceretur.

Neque lex naturalis consistit in convenientia, aut disconvenientia, quam habent actiones aliquæ ad naturam rationalem independentem à lege positiua Dei, vel creaturæ, ut opinatur Poncius noster in suo cursu Theol. disp. 25. q. 2. eò quia hæc non est lex, sed potius materia ipsius legis naturalis, quæ præcipit id, quod est naturæ rationali conueniens, & vetat disconueniens.

II. Concl. Ratio formalis legis naturalis nec consistit adæquatè in ipso lumine habituali, & naturali in actu primo, & quatenus est vis discernendi honesta, & turpia, seu licita, & illicita: est Frassen in tract. de leg. disp. 1. q. 3. de naturæ legis essentia, & Mastrij loc. cit. contra Auerfam sentientem cum Alens. 3. p. q. 27. memb. 2. Prob. Nam ut supra ostensum est in prima concl. lex propriè dicta est ordinatio; at lumen naturale habitualiter sumptum non est ordinatio, sed tantum vis intelligendi. Præterea Deus habet sibi lumen connaturale, quo perfectissimè cognoscit, quæ honesta, & turpia sunt, & tamen dici nequit habere legem naturalem, ergo lex naturalis in ipso lumine habituali non est reponenda.

III. Concl. lex naturalis non consistit formaliter in dictamine, & iudicio solum ostensiuo, & indicatiuo boni, & mali, sed etiam præceptiuo, & imperatiuo, ac obligante ad ea, quæ tali lege præscripta sunt; ac proinde lex naturalis propriè, & in rigore est ipsum verum practicum, seu ius quoddam ex ipsa rerum natura formaliter exortum, & principiatiue ab intellectu D. eius institutore, per lumen naturale rationis à D. voluntate nobis intimatum, tanquam præceptiuum, & obligatiuum. Ita colligo ex præfatis Doctoribus Frassen, & Mastrio: prima pars est contra Gabriel. & Almainum, censentes legem naturalem esse solum dictamen rationis indicans &c. Prob. igitur nostra concl. quæ est etiam D. Bonau. in 2. d. 35. dub. 4. & Gersonis tract. de vita spir. lib. 2. concl. 5. ubi legem naturalem sic describit: *Lex naturalis præceptiua est signum inditum cuilibet homini non impedito usu rationis, & notificatiuum voluntatis D. volentis creaturam rationalem humanam teneri ad aliquid agendum per consecutionem sui finis naturalis.*

Prob. ratione. Lex naturalis est regula propriè dicta, & mensura bonitatis, aut malitiæ moralis actus humani, sed iudiciũ indicatiuum, & ostensiuum boni, & mali nequit esse talis regula, & mensura, cum illam bonitatem, aut malitiam indicatam supponat; regula autem alicuius regulati rectitudinem, vel obliquitatem non supponit; hæc enim non cognoscitur nisi per applicationem ad regulam; ergo &c. tum quia lex naturalis est propriè lex, & de ratione legis est, ut fatentur Doctores, præcipere, & obligare. Quod insinuat etiam Scot. in 4.d. 50. docens. Quodcunque peccatum, ideò esse peccatum, quia est contra præceptum Diuinum.

Arg. cont. 1. concl. Sunt aliquæ actiones ita intrinsecè malæ ex natura sua, puta odium Dei, blasphemia &c. ut earum malitia nullatenus pendeat ex dictamine intellectus, vel ex prohibitione extrinseca Dei: è conuerso aliquæ sunt ita intrinsecè bonæ, v. g. colere Deum, ut nulla ratione pendant in sua bonitate ex causa extrinseca; ergo non possunt habere huiusmodi malitiam, & bonitatem, nisi quatenus sunt conuenientes, aut disconuenientes naturæ rationali; ac proinde natura rationalis habet rationem legis. Resp. conc. ant. & disting. conf. bonitas, & malitia in esse naturæ, conc. quod non habeantur nisi quatenus dicunt conuenientiam, & disconuenientiam naturæ rationali; bonitas, & malitia in esse moris, nego conf. Nam hæc sumitur proximè ex ordine ad dictamen rationis, & remotè ex ordine ad legem æternam in sensu superius explicatam.

Arg. cont. 2. concl. D. Paul. ad Rom. 2. legem vocat, naturalem, conscientiam dictantem, quid agendum, aut fugiendum sit secundum rationem naturalem, nam cum dixisset. *Gentes, quæ legem non habent &c.* subdit: *Ostendunt opus legis scriptum in cordibus suis, testimonium reddente illis conscientia ipsorum.* Quibus verbis non obscurè indicat, legem naturalem esse dictamen naturale rectæ rationis; ergo constat legem naturalem esse reponendam in ipso rationis lumine, non quidem actuali, sed in lumine habituali; idem videntur docere D. Ambros. S. Maximus &c.

Resp. allatas auctoritates nihil aliud probare, quam legem naturalem interdum pro conscientia, & synderesi accipi,

pi, quatenus, videlicet, dictat quid agendum, & quid omittendum sit, sicut conscientia. Nihilominus lex, & conscientia valde inter se differunt, ut patet ex ijs, quæ de conscientia in proprio tractatu dicta fuere.

Arg. 2. Quicquid est in animis nostris, vel est potentia, vel passio, vel actus, vel habitus; sed lex naturalis non est potentia Animæ, nec passio, nec actus, aliàs cum nihil agimus, non maneret in nobis, ergo est habitus.

Resp. ad min. legem naturalem non esse potentiam, aut passionem sed esse actum, non quod sit semper actu existens, sed quatenus est actus natus existere, ac proinde virtualiter manet tale dictamen; & sic est actus rationis, vel in re, vel in virtute existens; inadæquatè tamen, ut supra explicatum est; nam ratio adæquata legis naturalis non solum est reponenda in dictamine recto rationis naturalis sed maxime in præcepto diuino deriuante à voluntate Dei ut Authore, & rectore naturæ rationalis.

Quæres. An lex naturalis sit omninò eadem in omnibus hominibus in quouis statu spectatis.

Resp. 1. Quòd certum est, legem naturalem esse unam, unitate luminis, quia unico lumine naturali monstrat homini quid agendum, & quid fugiendum; unitate principij, quia unicum Deum habet Authorem, & legislatorem: & unitate finis. quia tendit ad hunc finem, nempe, ut faciat hominem rectum secundum inclinationem naturæ. Dubium tamen est; an sit una unitate præcepti; hoc est. An eadem legis naturæ præcepta sint communia apud omnes. Dicendum legem naturalem quantum ad principia generalia esse eandem omninò in omnibus hominibus in quouis statu spectatis. Ratio est. Quia hæc lex est velut proprietas consequens non quidem rationem propriam, & particularem alicuius indiuidui, sed specificam naturam, quæ est eadem in omnibus, ergo & ipsa lex. Deinde, quemadmodum in speculatiuis prima principia se habent respectu cuiuscunque intellectus, ita prima, & principalia principia practica, sed speculatiua ex terminis sunt nota, ac proinde eadem apud omnes; ergo, & principia prima practica, hoc est; bonum est amplectendum, & malum est fugiendum &c. Resp. 2. principia particularia legis naturæ, quæ ex generalibus inferuntur, ut plurimum eadem sunt apud

omnes: Deficiunt tamen interdum apud plurimos, tam quoad rectitudinem eorum, quam quoad ipsorum notitiam; idque quia rectum iudicium in rebus agendis impeditur aliquando, aut per passionem, quæ usum rationis peruertit, aut per malam consuetudinem, aut per deprauatam ipsius naturæ habitudinem; Quò fit, ut latrocinia, quibusdam Gentilibus visa fuerint non iniusta, alijs simplex fornicatio visa fuerit licita; Immodè etiam inter Patres, Cassianus, Origenes, & nonnulli alij existimarunt, mendacium in aliquo casu esse licitum, ac proinde non esse peccatum, & inter Theologos de pluribus est controuersia, quæ sunt conclusiones remotè deductæ à principijs, seu præceptis generalibus; idque oritur, quia quantò magis conclusio distat à principijs, tantò minus est euident. Sic e.g. ex hoc principio quod tibi non vis &c. Sequitur euidenter, ergo aduersus alterum non est proferendum falsum testimonium; sed non ita euidenter colligitur: ergo non est dicendum mendacium pro vita hominis conseruanda.

Ex hætenus dictis faciliter deducitur resolutio illius celebris quæstionis, an detur ignorantia inculpabilis eorum, quæ lege naturæ sunt præcepta. Et quidem Theologi passim cum Alensi, D. Thom. q. 94. art. 6. & Scoto in 3. d. 37. q. un. s. ad quæstionem respondent, non dari ignorantiam inculpabilem principiorum primorum uniuersalium legis naturæ, quæ sunt ex terminis nota. Ratio est clara. Quæ enim per se nota sunt, ex natura sua ab omnibus cognosci possunt; quia lumen naturale, nisi natura sit deprauata, ostendit veritatem talium principiorum in uniuersali. Notanter dicitur in uniuersali; nam in singulari contingit frequenter dubitare. An hoc, vel illud sit bonum, vel malum? An hic sit Deus &c. An colendus ut Deus? quomodo de Christo Deo, & ut Deo plures sectæ, & hæreses natæ fuerunt; ita inter alios discurret noster Marchantius t. 1. sui Tribunal. in tract. de conscientia; qui etiam subdit, dari ignorantiam inculpabilem pariter præceptorum aliquorum, quæ in Decalogo exprimuntur; etsi rariùs, & ad tempus. Rationem dat sic discurrendo. Quia, cum aliqua non sint per se nota, ut supra indicauimus, sed deductione, & discursu, siue declaratione indigeant; non est mirum, si ob infirmitates, & tenebras mentis

tis humanæ læsæ per peccatum originale, ad aliquod tempus ignorare contingat. Exempla dedimus supra de Barbaris. Nec mirum de Barbaris. Sanè experti sumus seniores aliquos, immò, & iuniores defectu instructionis non credidisse immunditias, & pollutiones esse peccata. Quid de osculis, & tactibus? Quod si ad contractus illicitos iure naturæ usurarios, & huiusmodi, quæ ex hoc principio uniuersalissimo: Quod tibi non vis, alteri ne feceris deducuntur veniamus, non est finis ignorantiarum, ob offusas humanæ subtilitatis opiniones, quarum tamen plurimas referimus in plurimis culpabilibus. Porro quis neget mendacium iure naturæ prohiberi? Societatem humanam tollere? Cassianus tamen, Origenes, Martinus de Magistris approbarunt mendacium, quod sit pro saluanda vita. Nec longè absunt Assertores restrictionum mentalium, quæ omnem Societatis humanæ sinceritatem destruunt. Hæc Marchantius.

Quæres 2. Vtrum lex naturalis se extendat ad omne opus virtutis adeout omnes virtutum actus sint materia legis naturæ. Resp. breuiter, quia in notabilibus quæst. 2. plura ponuntur, quæ faciunt pro resolutione præsentis quæstionis. Si per materiam legis naturalis intelligatur propriè, & expresse id, quod ipsa præcipit prohibendo oppositum; in hoc sensu, illi solum actus virtutum sunt materia legis naturalis, qui necessariam rectitudinem important pro conseruando recto ordine morali naturæ rationalis, quem solum habet pro obiecto lex naturalis, ut præceptiua, & prohibitiua. Quod si per materiam legis naturalis intelligatur in sensu latiori; idest etiam id, quod ipsa sub consilio præscribit, omnes actus virtutis dici possunt materia legis naturalis, saltem in quibusdam occasionibus, & circumstantijs, omnes enim illi boni sunt, & honesti, ac naturæ rationali conformes, & per consequens in dictis circumstantijs illos consulit. Itaque absolutè loquendo non semper lex naturalis obligat ad singulos virtutum actus, qui fieri possunt. Ita communiter Theologi.



*Vtrum ad materiam legis naturalis spectet non solum substantias actus, sed etiam modus.*

**Not. 1.** Quòd sensus præsentis quæstionis est: An sola substantia actus, seu illa ratio, quam actus præcisè sumit ab obiecto, sed etiam modus, idest circumstantia aliqua requisita ad moralem bonitatem actus, videlicet, quod actus fiat voluntariè; quod ex cognitione præcepti, quod propter honestatem virtutis, vel denique, quod fiat ex motu charitatis. Et quidem mouetur quæstio solum de præceptis affirmatiuis, ut enim quis præceptis negatiuis satisfaciatur, nullus actus, quantum est ex forma præceptorum, requiritur, cum per solam non positionem actus prohibiti homo fiat conformis præcepto negatiuo.

**Not. 2.** quod lex naturalis duplici modo seruari potest; primò, ut obseruatio legis tantum sufficiat ad euadendam culpam. 2. ut sit obseruatio digna laude, & præmio. Et quidem hoc modo necessarius est modus virtutis in omnibus præceptis, tam affirmatiuis, quàm negatiuis, ne per ut homo intendat, & eligat seruare legem intuitu honestatis, & cum omnibus circumstantijs actum honestantibus; & ne in terminis fiat confusio, hæc distinctio coincidit cum alia, quam passim Doctores tradunt, nempe, quod finis est duplex alius intrinsecus, alius extrinsecus operis, seu actus; Prior est finis ipsius legis, de quo accipitur commune dictum, finis legis est anima legis; & iste finis, vel perfectio sic intenta à lege potest consistere absque formali honestate, inquit inter alios Herincx, dummodo opus materialiter impleatur, non enim requiritur, ut intendatur honestas, quæ actui competit ex proprio obiecto; nam indubiè, præceptum temperantiæ implet, qui temperanter viuit ad vindictam suorum peccatorum. Quare solum præceptum charitatis exigit in actu præcepto honestatem ex proprio motu desumptam. Posterior est, quem Deus in lege naturæ, & diuina, & in humana legislator humanus intendit, & de hoc habet commune dictum, finis præcepti non cadit sub præcepto, multa namque præcepta implentur ab homine in peccato mortali existente; non tamen secundum finem



finem D. voluntatis, qui est remuneratio vitæ æternæ ex quo rectè inferitur, quod lex naturalis cum suis præceptis obligat, ut non apponatur indebitus finis, vel mala circumstantia, quia tunc peccatur contra aliam legem.

I. Concl. Actus, quo lex naturæ impletur, fieri debet scienter, & voluntariè: Est communis. Prob. Per legem præcipitur actus humanus; sed actus humanus debet esse voluntarius, & ex certa cognitione, ut constat ex dictis in tract. de act. human. ergo actus, quo lex naturæ impletur, debet fieri scienter, & ex certa cognitione. Quare ex defectu huiusmodi conditionis non satisfacit propriè præcepto iustitiæ, seu misericordiæ, qui in ebrietate, aut aliâ sine usu rationis restituit rem alienam, vel dat eleemosynam extreme indigenti. Quàmvis postea non teneatur iterum restituere, aut eleemosynam dare, eò quòd materia præcepti sit sublata, altero recipiente, quod suum est, aut necessitate pauperis subleuata. Hinc si Socrates, inscio Platone, aut invito restituisset, quod Plato abstulerat, penitus liberaretur ab obligatione restituendi, licet in tali casu non esset ab eo impletum præceptum restituendi, sed solummodo ablata materia præcepti. Nihilominus non requiritur, ut actus lege naturæ præceptus fiat tanquam præceptus; quia lex hoc non mandat, neque intendit, sed solum ut actus liberè fiat; nec aliam obligationem fideles apprehendunt. Immo etiam si obligatio legis ignoretur, v. g. colendi Deum obligare pro hac die, & aliquis ista die liberè Deum coluerit, præcepto satisfacit; nec tenetur postmodum resciscens obligationem præcepti denuò cultum Deo exhibere, quæ doctrina magis etiam militat in simili de lege humana, ut suo loco dicetur.

II. Concl. Lex naturalis non obligat generaliter, ut actus fiat ob honestatem virtutis, & multò minus, ut fiat propter finem charitatis. Hæc pariter est communis. Prob. Non debet quis ad aliquid obligari, nisi euidenter constet de obligatione, vel ex lumine naturali, vel ex lege D. vel ex auctoritate &c. sed ex tenore præceptorum non aliud habetur, quàm quod præcipiatur actus ex genere honestus, v. g. ut proximo velimus, quod nobis ipsis, miseriæ proximi succurramus, non autem quod id fiat tali modo &c. ergo de obligatione non constat.

Dices. Si conclusio esset vera, ergo lex aliqua naturæ impleri posset per actum ex circumstantia vitiatum v. g. satisfacere præcepto dandi eleemosynam, vel honorandi parentes, estò id fieret ob vanam gloriam. Resp. conc. conseq. cum Herincx, & alijs. Sed dices: dando quis eleemosynam ob vanam gloriam peccat contra legem naturæ prohibentem vanam gloriam ipsam: ergo &c.

Resp. Herincx. Quod quàmvis dans eleemosynam ob vanam gloriam peccet contra aliam legem prohibentem illam; non tamen peccat dando eleemosynam, satisfacit enim præcepto, saltem quoad substantiam.

#### QVÆSTIO IV.

*Vtrum lex naturalis sit immutabilis.*

**N**OT. 1. Quòd aliqua dici possunt de iure naturæ dupliciter. Primò positiuè, & propriè, quatenus natura directè illud præcipit, vel prohibet, & ad illud exequendum inclinat, ut Deum esse colendum; alteri non faciendum, quod tibi non vis: 2. permissiuè, & negatiuè. quatenus lex naturæ contrarium non inducit, quo modo dicit D. Thom. 1. 2. q. 95. att. 5. hominem esse nudum, est de iure naturæ, quia natura non dedit ei vestitum, sed ars. Similiter hac ratione iure naturæ dicuntur omnia communia, nam diuisionem rerum, & dominiorum, non natura, sed ius gentium introduxit pro maiori pace, & bono societatis humanæ; pari modo seruitus dicitur esse iuris naturæ negatiuè, constat autem id, quod hoc modo est de iuræ naturæ, posse mutari introducendo contrarium illius, quod natura nec præcipit, nec prohibet: vnde Scot. in 4. dicens communitatem rerum in lege naturæ olim fuisse præceptum legis naturæ, dicere voluit, quod natura dictabat, & quasi pronuntiabat seruandum pro illo tunc velut quid consonans rationi.

NOT. 2. Quòd duobus modis lex aliqua intelligitur posse mutari: Primò additione: 2. subtractione. Priori modo fit, quando lex naturæ reuerà non mutatur in se, sed tantum additur ei aliquid per legem positiuam; posteriori modo; si nimirum aliquid desinat esse de lege, quod priùs ad

legem spectare noscebatur; idque contingit per subtractionem materiæ quæ subest dispositioni legis, dum ipsa definit esse materia legis: ut in secunda concl. declarabitur.

I. Concl. lex naturalis mutari potest per additionem, non vero per abrogationem. Est communis. Prob. 1. pars. Tunc mutatur lex per additionem, quando ipsi adduntur aliqua præcepta; sed legi naturali possunt superaddi præcepta, seu leges; ergo &c. minor patet; nam multa præcepta superradita sunt legi naturæ ad humanam vitam utilia, tam per diuinam legem, quàm per leges humanas.

Prob. 2. pars. Prima legis naturæ principia generalissima sunt prorsus immutabilia; sunt namque in ipsa hominis natura fundata; ergo lex naturalis quoad præcepta, uniuersalissima, nempe bonum est faciendum, malum est fugiendum; quod tibi non vis &c. & quoad præcepta, quæ ex istis per facilem discursum deducuntur, qualia sunt præcepta 2. tabulæ Decalogi, non potest mutari. Vnde Gratian. dist. 5. c. 1. ait. *Naturale ius inter omnia primatum obtinet tempore, & dignitate; caput enim ab exordio rationalis creature, nec variatur tempore, sed immutabile semper permanens.*

II. Concl. lex naturalis mutari potest per subtractionem materiæ. Prob. Tunc lex mutatur per materiæ subtractionem, quando materia, in qua cadebat legis obligatio, definit esse materia legis; sed ita contingere potest; ergo &c. Minor explicatur, & simul probatur. Lex naturalis statuit, quod bonum, seu res aliena non sit retinenda inuito Domino, sed sit restituenda, at quod erat alienum, potest fieri proprium; vel per præscriptionem, vel per alium ritulum; sic pariter non est restituendum depositum, si petatur in damnum alterius; Similiter non licet occidere alterum, attamen si ab eo inuaderis, potes ad tuæ vitæ conseruationem illum interficere cum moderamine inculpatae tutelæ; ergo &c.

Arg. cont. 1. concl. Glossa in c. 17. Ecclesiast. disertè pronunciat ius naturale aliquando emendari, & corrigi per legem scriptam; sed hæc emendatio inducit veram, & essentialem mutationem, ergo &c. Resp. Glossam tantum velle, per legem scriptam suppleri per declarationem, ex eo quod lex naturalis ob morum deprauationem ita in aliquorum cordibus erat obscurata, ut existimarent aliqua esse licita, quæ naturaliter mala sunt.

## QVÆSTIO V.

*Utrum lex naturalis possit à Deo de potentia  
absoluta dispensari.*

**N**OT. 1. Quodd agit Doctor hanc quæstionem ex professo in 3. d. 37. q. 1. ubi adducta opinione D. Thomæ, quæ est negatiua, de qua infra, explicat titulum, & sensum quæstionis his conceptis verbis. Dispensare non est facere, quod præcepto manente, liceat facere contra præceptum, sed dispensare est reuocare præceptum, vel declarare qualiter debeat intelligi. Est enim duplex dispensatio, scilicet iuris reuocatio, & iuris declaratio, quæro igitur, an stantibus omnibus circumstantiis eisdem in isto actu, qui est occidere hominem, variata sola circumstantia prohibiti, & non prohibiti, posset Deus facere, quod ille actus, qui cum talibus circumstantiis aliquando prohibitus, aliàs esset non prohibitus, scilicet licitus. Si sic ergo simpliciter potest dispensare, sicut simpliciter mutauit legem veterem quantum ad ceremonialia, quando dedit nouam. Si autem Deus non potest facere de isto actu, qui cum talibus circumstantiis erat prohibitus, quod manentibus eisdem circumstantiis prioribus de prohibitione non sit prohibitus, igitur non potest facere, quod occidere non sit prohibitum, cuius oppositum manifestè patet de Abraham. Hactenus Doctor. Quare non possum non mirari, Mastrium alioquin fidelem Scoticæ Doctrinæ sectatorem, & propugnatores in tom. Theol. moral. disp. 2. de leg. q. 2. a. 3. n. 51. pronunciasse hæc controuersiam inter Thomist. & Scotist. de legis dispensatione esse de solo nomine, & modo loquendi. Siquidem ita clarè loquitur Scotus, & fundamenta D. Thomæ examinat, ut nemo iure dubitare possit, quin hæc controuersia sit de re, & non de solo nomine.

NOT. 2. ex eodem Doct. §. ad quæst. igitur dico. Quod aliqua possunt dici esse de lege naturæ dupliciter. Vno modo tanquam prima principia practica nota ex terminis, vel conclusiones necessariò sequentes ex eis, & hæc dicuntur esse strictissimè de lege naturæ: sed talia non sunt præcepta 2. Tabulæ, quia rationes, eorum, quæ ibi præcipiuntur, vel prohibentur, non sunt prima principia practica.

simpliciter necessaria, nec conclusiones simpliciter necessariae. Non enim in his, quæ præcipiuntur ibi est bonitas necessaria ad bonitatem ultimi finis conuertens ad finem ultimum.

Nec in his, quæ prohibentur est malitia necessario auertens à fine ultimo, quin, si bonum istud non esset præceptum, posset finis ultimus amari, & attingi; etsi illud malum non esset prohibitum, staret cum eo acquisitio finis ultimi. De præceptis autem primæ tabulæ secus est quia illa immediate respiciunt Deum pro obiecto. Duo quidem prima si intelligantur esse tantum negatiua; primum non habebis Deos alienos: 2. non assumes nomen Dei tui in vanum, idest non facies Deo tuo irreuerentiam. Ista sunt strictè de lege naturæ, quia sequitur necessario: si est Deus est amandus ut Deus, & quod nihil aliud est colendum tanquam Deus. Nec Deo facienda est irreuerentia, & per consequens in istis non poterit Deus dispensare, ut aliquis possit licitè facere oppositum talis prohibiti. Pergit Scorus ad 3. præceptum, quod est de Sabbato; & dicit. Sed an sit de lege naturæ strictè hoc præceptum de Sabbato quantum ad cultum pro aliquo tempore determinato exhibendum. Deo, dubium est, quia si non; igitur absolute Deus posset dispensare, quod homo toto tempore vitæ suæ non haberet bonum motum circa Deum, quod non videtur probabile; Plura habet notatu digna, sed ne in prolixitatem nimiam labar, ea relinquo videnda apud ipsum Doctorem.

Not. 3. quod in hac quæstione, quàm difficill, tam celebri sunt tres famosæ sententiæ. Prima est D. Thomæ cum suis quem sequuntur passim Recentiores, negantes Deum in præceptis Decalogi, dispensare posse. Et ponitur talis modus, inquit Doctor §. hic dicitur lex naturæ est lex descendens ex primis principiis notis in agibilibus, talia sunt principia practica nota ex terminis, quæ sunt quædam seminaria, ad quorum veritatem inclinatur naturaliter intellectus ex terminis, & ad assentiendum tali dictamini inclinatur voluntas naturaliter ex talibus principiis; sed omnia quæcunque sunt in Decalogo sunt talia, vel immediate, vel mediatè; omnia enim, quæ præcipiuntur habent bonitatem formalem, quæ secundum se ordinata est ad finem ultimum, ut per illa homo conuertatur, & conse-

quatur ipsum. Similiter omnia, quæ ibi prohibentur, habent malitiam formalem auertentem à fine ultimo, ita, quod ibi præcepta sunt bona, non tantum quia præcepta, sed ideo præcepta, quia secundum se bona. Similiter ibi prohibita sunt mala, non tantum quia prohibita, sed ideo prohibita, quia mala. 2. Sententia ex opposito affirmat, Deum posse dispensare in omnibus Decalogi præceptis; ita Ocham, Gerson, Gabriel, Almainus, & alij Nominales, censentes, omnia peccata, idè esse peccata, quia sunt per legem prohibita; & Deum liberè talem legem tulisse, ac proinde, idè esse mala, quia prohibita. Unde cum fieri possit, ut Deus alicui illa non prohibeat, consequenter fieri potest, ut alicui liceat agere contra legem naturalem; & hoc est in lege naturali dispensare. 3. Sententia est Scoti, docentis, Deum non posse dispensare in præceptis primæ tabulæ; benè tamen in præceptis 2. tabulæ quia priora sunt de lege naturæ strictissime, posteriora verò minùs strictè, ut in notabilibus explicatur, & magis patebit.

I. Concl. Duo priora præcepta primæ Tabulæ negatiuè sumpta non possunt à Deo de potentia absoluta dispensari; adeo ut licitum fiat, quod est illicitum ex natura rei intrinsecè; præcepta autem 2. Tabulæ possunt à Deo dispensari. Est Scoti in 3. dist. 37. q. un. & Scotistarum, nec non quorundam extra nostrâ Scholam, & signanter Caramuelis t. 1. Theol. fundament. Prob. conc. quoad 1. p. ex Scoto sic. Quæ sunt vera ex terminis, siue sint necessaria ex terminis, siue consequentia ex talibus necessarijs præcedunt in veritate omnem actum voluntatis, vel saltem habent veritatem suam circumscripto per impossibile omne velle, sed ita se habent illa duo prima præcepta negatiuè sumpta, ergo habent suam veritatem, ac proinde bonitatem independentem à voluntate Diuina.

Prob. 1. pars auct. D. Bernard. lib. de dispensat & præcepto cap. 5. ubi ait. *Deinde, quod inuolabile nominauit illud intelligo, quod non ab homine traditum, sed diuinitus promulgatum, nisi à Deo, qui tradidit, mutari omnino non patitur, ut exempli causa non occides, non machaberis, non fursum facies, & reliqua illius tabula legisita; qua, etsi nullam prorsus humanam dispensationem admittunt, nec cuiquam hominum ex his aliquo modo soluere, aut licuit, aut licebit; Dominus tamen horum, quod voluit, &*



*quando voluit, soluit. & loquitur de dispensatione propriè dicta, ut ex ipsius verbis perspicuè constat.*

Prob. ratione. Etenim, ut Deus dispenset propriè in præcepto v. g. non occidendi innocentem, sufficit, quod per actum suum possit efficere, ut occisio illa sit licita, manentibus cæteris omnibus circumstantijs, ob quas aliæ occisiones sunt prohibitæ: sed Deus id facere potest, immò de facto fecit, ergo &c. min. patet in occisione Isaac Abrahamo præcepta, quæ afficiebatur omnibus circumstantijs, ob quas aliæ occisiones sunt prohibitæ, præter circumstantiam præcepti diuini contrarij. Nec valet responsio Gonet, nempe Deum in prædicto casu non dispensasse propriè, sed impropriè tantum, mutando materiam, & eam per mutationem subtrahendo legi naturali; Deus enim tanquam supremus Dominus, vitæ, & necis omnium dedit ius Abrahamæ in vitam innocentis, vel eo tanquam ministro, & executori uti voluit. Non valet inquam, eò quia simili ratione posset dici, superiorem non dispensare dispensando præceptum, vel licentiam homini sano comedendi carnes in die ieiunij dando, sed mutare solam materiam præcepti, quo solum prohibetur commestio propria auctoritate, & citra præceptum, vel licentiam superioris; at in tali casu esset vera, & propria dispensatio; ergo etiam in occisione Isaac; ac proinde, estò non auctoritate propria, & priuata, sed Dei, qua datur licentia faciendi, quod prius non erat licitum, fuit propriè dispensatio.

Verùm huiusmodi dispensatio censetur passim à Doctoribus, etiam Scotistis non posse fieri in præcepto de non dicendo falsum testimonium; quia mendacium est ita intrinsecè malum, ut nequidem diuinitus possit esse licitum, qua ratione Deus ipse mentiri nequit.

Arg. cont. 2. p. concl. & primò argumento, quod sibi objicit Scotus: Apost. ad Rom. ait. *Non machaberis, non occides, etsi quod est aliud mandatum, tu hoc verbo instauratur diliges proximum tuum sicut te ipsum*, ergo in isto præcepto diliges proximum tuum, includuntur necessariò præcepta 2. Tabulæ. Hoc enim videtur Apost. ibi probare expressè: unde in fine concludit. *Qui diligit proximum legem impleuit.* Quod confirmatur auctoritate Saluatoris Matt. 22. *In his 10. talis expendet, & Propheta*; sed dilectio proximi necessariò sequi-

quitur ex hoc principio necessario : Deus est diligendus ; ergo à primo ad vltimum omnia præcepta 2. tabulæ sequuntur necessario ex primo præcepto primæ tabulæ .

Resp. Scot. quod diliges Dominum tuum non est simpliciter de lege naturæ inquantum est affirmatiuum , sed inquantum est negatiuum . Dato etiam , quod sit de lege naturæ strictè proximum esse diligendum , tamen ex hoc non sequuntur præcepta 2. Tabulæ , puta , quod nolendum sit ipsum occidere quoad bonum personæ propriæ , vel nolendum sit adulterari quoad bonum personæ coniunctæ sibi , vel quod nolendum sit furari quoad bonum fortunæ , quo ille utitur ; & ita de cæteris præceptis , quia possibile est , me velle , proximum diligere Deum , & tamen nolle , vel non velle sibi vitam corporalem , vel seruare fidem coniugij , & sic de alijs . Et tunc ad auct. Pauli , & Christi potest dici , quod Deus nunc de facto explicauit dilectionem proximi ultra illud , quod includit inquantum sequitur ex principijs legis naturæ . Verùm est igitur , quod diligens proximum legem implet , eo modo scilicet quo explicata est , debere seruari , licet non eo modo , quo dilectio proximi concluditur ex primis principijs legis naturæ .

Arg. 2. Deus nequit variare naturam , sed præcepta 2. tabulæ sunt præcepta naturæ ; ergo variari nequeunt inuariata natura . Resp. conc. mai. & disting. min. ita ut proueniant à natura independentè à Deo , nego ; ita ut habeant coniunctionem cum natura ex ordinatione diuina ; conc. min. Non enim illa præcepta profluunt ab ipsa natura per modum proprietatis inseparabilis , sed à D. Voluntate .

Arg. 3. auctoritate D. Aug. dicentis in lib. de vera Religione , *Neque Pater de aterna lege iudicare potest* , & lib. 1. de lib. arb. c. 6. *legi aterna semper est obtemperandum , & illam esse incommutabilem* : ergo &c. Resp. D. Aug. loqui de potentia ordinaria ; vel de lege naturæ strictissimè sumpta ; ut sunt duo prima præcepta &c. facti etiam pro fundamento huius questionis doctrina tradita in tract. 6. de peccatis p. 2.



*Vtrum Pontifex dispensare valeat in ijs, quæ sunt Iuris naturæ, vel Diuini.*

**N**OT. 1. ex Marchant. 1. 2. tract. de leg. quod aliqua præcepta sunt ex se, & ex natura sua legis simpliciter D. aliqua verò sunt legis D. ex adiecto, seu ex suppositione alicuius promissionis humanæ: primi generis sunt præcepta Decalogi, & alia à Deo immediate tradita hominibus. 2. generis non sunt simpliciter diuina, sed tantum ex concurrentia præcedentis actus humani v. g. Præceptum D. est hoc. Redde Altissimo vota tua, displicer ei infidelis, & stulta promissio; sic pariter se habent iuramenta. Quæ quidem vota, & iuramenta, ut à voluntate humana procedentia, tres conditiones implicitas continent. Prima, quod intelligatur superioris auctoritas reseruata. 2. quod respiciant verum bonum. 3. quod non sint in salutis dispendium, vel perfectionis impedimentum, ut docet Gerson.

NOT. 2. Quòd potestas à Christo tradita Pontifici his verbis. *Tibi dabo clauēs Regni Cælorum; & quod unquē ligaueris in terra* &c. non extenditur ad dispensationem legis D. sed ad peccatorum, & pœnarum spiritualium solutionem, vel impositionem, ad indulgentias dispensandas, & ad soluenda vota, & iuramenta, ut inter alios tradunt Marchant. & Herincx. Siquidem supremi Pastoris est providere, ne, quæ ad salutem sunt ordinata, ad perniciem, & detrimentum salutis ex humana infirmitate reuoluantur; quæ omnia complectitur mandatum Christi. *Pasce oues meas*, Vnde fatetur Paulus 2: ad Corint. 5. *Legatione Christi illi fungimur*; Pastores igitur Ecclesiæ sunt Ministri, & dispensatores Mysteriorum Dei, ea lege, ut fideles inueniantur; fidelitas autem, ut discurrit Marchant. fundatur in hoc, ut potestate utantur in ædificationem, & non in ruinam, ut testatur D. Paul. 1. c. *Secundum potestatem, quam Dominus dedit mihi in ædificationem, non in destructionem*, his prænotatis sit.

Concl. Pontifex virtute clauium, seu potestate sibi à Christo tradita nequit dispensare in ijs, quæ præcisè sunt iuris D. vel naturalis: Est communis contra Panormitanum,

num, & alios Iuristas, nec non contra Sanchez adscribentes Pontifici potestatem dispensandi in toto ferè Euangelio. Prob. concl. In ijs, quæ sunt immediatè à Deo, nullus potest dispensare, nisi ei specialiter committatur; sed nec ex Scrip. S. nec ex praxi constat, specialem commissionem dispensandi in præceptis euangelicis esse traditam Pontifici, ergo &c. Prob. nam Scrip. in illis verbis. *Quodcumque ligaueris &c.* Si aliquid probat nimis probat, non enim in solo Euangelio, immò in omnibus, in quibus potest Deus. Itaque in ista generali concessione non venit intelligenda hæc potestas quæ specialiter non exprimitur, sed generalis potestas clauium, & Regiminis in suo ordine, & alia, quæ iuxta sensum Patrum, & Ecclesiæ ibi intelliguntur concessa. Prob. 2. ex descriptione Ecclesiæ, quam tradit Gerson in tract. de potest. Eccles. *Potestas Ecclesiastica est, quæ à Christo supernaturaliter & specialiter collata est Apostolis, & discipulis, ac eorum success.ribus legitimis usque ad finem huius sæculi ad edificationem Ecclesiæ militantis secundum leges Evangelicas;* ergo Pontifex pascere debet oves ad præscriptum legis Euangelicæ; ac proinde nequit legem variare, seu dispensare; & ad rem dicit Iacob Apost. c. 4. *Si iudicas legem, non es factor legis, sed iudex, unus est legislator, & iudex, qui potest perdere, & liberare.*

Arg. 1. cont. concl. Potest in quibusdam casibus adesse summa utilitas, immò necessitas relaxandi aliquod præceptum naturæ: ergo oportet, quod Deus reliquerit Ecclesiæ huiusmodi potestatem, ut sufficienter provideat Animarum regimini. Resp. Herincx. Necessitatem, vel fore tantam, ut ob illam lex per se ipsam non obliget, nec casum comprehendat, vel facile tolli possit alia via, quam dispensatione, vel certè ob illam, utpotè fundatam in malitia hominum, potestatem tollendi obligationem legis naturæ non debuisset hominibus concedi. Alioquin argumentum, si quid probaret nimium probaret; Nam similis necessitas, vel utilitas potest quoque occurrere in casibus, ad quos tamen nec oppositum sentientes potestatem Pat. extendunt. Nam maior est necessitas, ut aliquando frater sororem accipiat, aut uxorem sterilem post matrimonium consummatum relinquat, vel veneno interimat, & aliam ducat, quando inde; dependeret conseruatio fidei catho-  
licæ.

licæ in aliquo Regno, quàm dispensandi in matrimonijs raris, illaque dissoluendi ob priuatas difficultates in eo subortas, quoad aliqui tamen dicunt posse fieri.

Arg. 2. Pontifex dispensat in residentia Episcopi, quæ est de iure diuino, ut indicat Trid. sess. 23. c. 1. de Reform. & etiam de iure naturali; ergo &c.

Resp. cum Herincx, omissis aliorum responsionibus Pontificem dispensare cum Episcopis in casibus; in quibus solo iure humano ad residendum obligantur: non enim toto tempore obligatur iure D. residere, nec id colligitur ex verbis Trid. cum in absentia prouideri possit gregi, cui de iure D. sunt obligati. Cæterum si Papa dispensat aliquando, id facit ob grauissimam causam, ratione cuius censeri potest in tali casu præceptum de residendo cessare.

Arg. 3. Pontifex dispensat in matrimonio rato, quod est de iure D. ergo &c. Resp. esse inter Doctores controuersum, ut aduertit idem Herincx quo iure matrimonium ratum sic insolubile; An diuino iure positiuo, an naturali. Si iure naturali, an simpliciter, an secundum quid, quatenus uidelicet ius naturæ non vetat illud omninò solui, sed solui propria contrahentium auctoritate, de quo in tractu de matrimonio. Verùm dato, quod sit simpliciter iure naturæ insolubile, largè sumpto, adhuc dici potest secundum sententiam plurimorum Doctorum, Papam, vel Ecclesiam in casu professionis Religiosæ matrimonium suam auctoritate non soluere, sed tantum declarare illud à Deo ob melius bonum dissolui. Quod si Papa in aliquibus casibus dispensauit, id factum est, vel quia allegatæ sunt apparentes rationes nullitatis matrimonij, prout contigit in matrimonio Ludouici cum D. Ioanna, vel Papa securus est, inquit Herincx, aliam opinionem probabilem.

Quæres. An in lege naturali locum habeat Epikia.

Resp. negatiuè. Quia Epikia est interpretatio mentis legislatoris, quando expressa ab eo haberi nequit, ac proinde habet quandam rationem emendationis, & correctionis legis; huiusmodi autem interpretatione non est opus in lege naturali, cum ipsa legislatrix ratio, quæ legem tulit, & dictauit v. g. non esse occidendum innocentem, dicet, posse occidi in casu necessariæ defensionis propriæ vitæ.

Quæ-

Quæres 2. An lex naturalis admittat interpretationem; seu declarationem. Resp. affirmatiuè. Ratio. Etenim, cum non omnia legis naturæ præcepta sint æquè nota, & æquè cuilibet intellectui facilia, quædam ex illis declaratione, & interpretatione indigent ad hoc, ut verus eorum sensus habeatur, cum non omnes circumstantiæ, in quibus lex præcipit, & prohibet, ibi apponantur e. g. lex naturalis, quæ præcipit, seruari secretum, eget aliqua declaratione, cum illa non obliget in omni casu; ut si noceret Reipublicæ &c.

Quæres 3. Quid sit ius gentium. Resp. discordare iuristas, & Theologos in hac difficultate: at, omissis varijs dicendi modis, dicendum est iuxta sententiam communiorum Theologorum, quod ius gentium nil aliud est, quàm commune hominum iudicium, & gentium consensus, vel est ius ex communi iudicio, & consensu proueniens; vel tandem quod omnes homines naturali ratione ducti constituunt. Hoc iure Regnorum, & Terrarum diuisio introducta est l. omnis Populi ff. de iustit. & iure. Quàmuis enim omnia bona essent communia, tamen processu temporis omnes homines ratione naturali perlustrati, iudicarunt possessiones diuidendas fore ad vitam pacificam duccendam. Præterea bella, contractus, seruitutes, legatorum admissio, pacta, & similia hoc iure introducta sunt; non enim ab aliquo Principe in aliquo speciali Regno sunt stabilita, sed communi usu gentium determinata. Quare merito infertur primò ius gentium esse mediū inter ius naturale. & Ciuile, cum neque à natura sit insitum, neque à determinato aliquo Principe conditum; sed ab omnibus fere gentibus introductum, non quidem scriptura, sed usu, & consuetudine gentium: secundò infertur hoc ius esse positum, & humanum, aliàs vana videretur diuisio iuris in naturale gentium, & ciuile; qui plura desiderat, adeat Bonac. disp. 1. de leg. q. 1. p. 1. & Suarez de leg. & Herinex disp. 3. de lege tam ciuili, quam Ecclesiastica q. 1.





## DISPUTATIO III.

*De lege Diuina positiua.*

## QVÆSTIO I.

*Vtrum lex vetus fuerit bona.*

**N**ot. Quòd lex D. positiua, ut in eius descriptione superius tradita diximus, est specialis Dei iussio legi naturali superaddita, seu posita, partim præcepta legis naturæ renouando, partim (quod est proprium legis positiuæ munus) varia præscribendo, quæ ex natura rei non sunt necessaria ad honestatem creaturæ rationalis. Huiusmodi præcepta in omni statu fuerunt; v. g. in statu innocentiae præceptum de non comedendo fructu ligni scientiæ boni, & mali, quod etiam Euam concernebat, ut patet ex Gen. 3. similiter & posteros, si status innocentiae permansisset, iuxta communem Doctorum sententiam, etsi nonnulli aliter sentiant. In statu legis naturæ, qui à lapsu Adæ usque ad tempus legis Mosæicæ perdurauit, fuit præceptum de usu remedij contra peccatum originale. Item de non comedendo carnem cum sanguine Gen. 9. Item præceptum circumcisionis datum familiæ Abraham. Et in utroque statu erat obligatio eliciendi actus virtutum theologicarum, ut colligitur ex Trid. sess. 14. c. 4. docente. *Motum contritionis fuisse quouis tempore necessariū ad impetrandam veniam peccatorum.* Postea verò Deus seligens posteros Iacob, seu Israelitas in populum suum peculiarem, ob promissionem factam Abraham, ex cuius semine Christus erat nasciturus, tulit eis legem specialem, quæ lex Mosæica, seu vetus dicitur, & nominatur Mosæica, quia data fuit à Deo in monte Sinai Moyfi; Verùm desinente statu legis veteris, aduenit status gratiæ, in quo Christus noster Redemptor, & legislator condidit legem nouam, quæ appellatur euangelica.

Not. 2. Quòd lex D. positiua partitur sicut lex naturalis, in sacram moralem, & politicam. Aut enim lex D. positiua dirigitur ad res sacras, quæ pertinent ad fidem, & Religionem, & dicitur lex positiua sacra, quam nonnulli ce-

ceremonialem vocant. Aut respicit actus morales virtutum in ordine ad vitam æternam, & in ratione bonitatis, gratiæ, meriti, & gloriæ, & sic vocatur lex positiua moralis. Aut respicit regimen quoddam politicum Animarum, prout in unum corpus mysticum, idest Ecclesiæ coadunantur, & hæc, prout à Deo procedit, lex D. politica dicenda est, & distinguitur ab Ecclesiastica humana, quæ ciuilis, & politica nomen sortitur.

Concl. Lex Vetus, quæ dicitur Mosaica fuit bona, & sancta. Est de fide contra quosdam hæreticos, & præsertim contra Manichæos qui, teste D. Aug. putabant, legem Mosaicam esse malam, & procedere à principio malo. Prob. auct. S. Scrip. & primò Apost. ad Rom. 7. *Lex quidem Sancta, & mandatum sanctum, & iustum, & bonum*; & infra, *consensio legi quoniam bona est*. Quare etiam Christus legem seruauit, tum in circumsione, tum in alijs; & seruare illam docuit Matt. 8. *Vade inquit, & ostende te Sacerdoti, & offeras munus, quod præcepit Moyses*. Confirmatur quia lex vetus data fuit à Deo Exodi 20. *Locutus est Dominus cunctos sermones hos*, & alibi.

Arg. ab hæreticis. Lex Mosaica vocatur à D. Petro act. 15. iugum importabile; ergo non est bona. Resp. sic vocari, quia iuxta seruilem conditionem Israelitarum fuit dura, & difficilis.

Arg. 2. Ezech. 20. habetur. *Ego dedi eis præcepta non bona, & iudicia, in quibus non viuens, & polluit eos in muneribus suis*.

Resp. Verba illa non intelligi de præceptis veteris legis, cum de illis dicatur Esdræ c. 9. *Dedisti eis iudicia recta, & legem veritatis, & ceremonias & præcepta bona*; ita etiam apud Ezech. c. 20. Itaque præcepta non bona, intelliguntur plagæ, & punitiones, quas Deus Israelitis intentauit, vel eis euenire permisit.

Arg. 3. Lex subintrauit, ut abundaret delictum, ergo &c. Resp. ly ut loc. cit. sumi consecutiue, non autem causaliter; quo sensu lex subintrauit, sic, ut abundauerit delictum; ac proinde significat, quid data lege, euenerit: nam cum aliquid concupiscitur, & postea prohibetur, concupiscentia magis accenditur iuxta illud Poetæ. Nitimur in vetitum, semper, cupimusque negata; & Apost. *Occasione accepta peccatum per mandatum operatum est in me etiam concupiscentiam*.

Arg. 4. Apost. ad hebr. 6. ait. *Nihil ad perfectum adduxit lex, & cap. 7. reprobatio fit precedentis mandati propter infirmitatem eius, & inutilitatem; & cap. 8. Si illud prius (sub intellige testamentum) culpa vacasset, non utique secundum locum inquireretur.* Quæ omnia sonant legem veterem non fuisse bonam, sed inutilem: ergo &c.

Resp. quod quamvis lex vetus fuerit bona, & utilis, & spectato tempore, & conditione Iudeorum perfecta, absolute tamen non erat perfecta, cum ex se non sufficeret, hoc est, sine ordine ad passionem, ad iustificationem, & salutem, *sicut ex evangelica.* Unde Apost. ait, *legem veterem non iustificare*, id est absolute, & sine relatione ad Messiam venturum. Quare ex hac doctrina patet responsio ad allatas scripturas: Prima intelligitur de insufficienti utilitate ad iustificationem 2. ubi dicitur, si culpa vacasset, explicatur à Doctoribus, si imperfectione caruisset. Hinc est, quod, qui in antiqua lege fuerunt iusti, adepti sunt iustitiam, & salutem fide saltem implicita Messiae, & gratia novi Testamenti, cuius virtus ad illos peruasit, ideoque tradunt SS. PP. quod veteris Testamenti Sancti Patriarchæ, & Prophetæ, & quoque salvi facti sunt, pertinuerint ad gratiam novi testamenti.

Arg. ultimo. Plura in lege veteri fuerunt inordinata, ideoque a Deo correctæ, ut pat. Matt. & Deuter. 23. permittitur Iudæis, ut fenerentur alienegenis; ergo &c.

Resp. Neque Christum, neque Deum correxisse veterem legem. eo quod esset mala, sed partim eam explicasse contra peruersas expositiones quorundam Iudæorum, partim imperfectionem illius legis perfectiora consulendo perfecisse, seu suppleuisse.

## QVÆSTIO II.

*Utrum lex vetus solos Iudæos obligauerit, & qualiter obligabat.*

**N**ot. Quod in lege veteri fuerunt præcepta triplicis generis, ut passim notant Theologi. Prima dicuntur moralia, quæ per se bonitatem, & honestatem continent: secundò ceremonialia, quæ pertinent ad cultum Dei, & præ-

præscribuntur quomodo, & quibus ceremonijs sit colendus, ut sit Populus ad Idolatriam propensus retraheretur. Denique Iudicialia, quibus constituebatur rectus ordo populi, tum inter se, tum quoad communitatem; & in exercendis iudicijs. Hæc trimembris præceptorum diuisio habetur expressè in veteri Testamento; ut Deutr. 6. *Hæc sunt præcepta, & ceremonia, atque iudicia, quæ mandauit Dominus Deus vobis*, & alibi. Cæterum, in eadem lege veteri continebantur etiam quædam consilia; sæpè namque in ea indicatur, vota hominum gratissima esse Deo; quæ proinde tacitè consulit; similiter meminit multarum oblationum, ac sacrificiorum gratuitorum, eorumque ritus describit, quæ pariter implicite consulit.

I. Concl. Lex vetus per se loquendo obligabat solos Hebræos. Prob. Etenim ad illos solos lex illa dirrigebatur, & illis solis fuit promulgata, ut liquidò patet ex Exodo, Leuit. & Deuter. at lex ex dictis supra non obligat nisi illos, ad quos dirrigitur, & promulgatur. Vnde Deuteron. c. 4. dicitur. *Qua est alia gens sic incluta, ut habeat ceremonias, iustaque iudicia, & uniuersam legem?*

Notanter dicitur in concl. per se loquendo; nam potuissent etiam Gentiles talem legem assumere, & sibi imponere; erat enim cuilibet liberum istam legem profiteri, & populo electo se adiungere per circumcisionem, quæ erat ianua veteris legis iuxta illud Pauli ad Galat. c. 5. *Testificor omni homini circumcidens se, quoniam debitor, est uniuersa legis faciende*; & habetur expressè exodi c. 12. *Si quis Peregrinorum in vestram volueret transire coloniam, & facere phase Domini, circumcidetur primò omne masculinum eius, & tunc risè celebrabit, eritque sicut indigena terra.*

II. Conc. lex vetus obligabat hebræos in conscientia, & quidem ex genere suo sub peccato mortali, non tantum quoad præcepta moralia, & ceræmonialia, sed etiam quoad iudicialia. Ita comuniter Doctores. Et probatur Nam lex vetus data est modo præceptiuo in materia capaci obligationis in conscientia, ergo censendum est sic eam de facto obligasse. Et quamuis Gerson putauerit, præcepta iudicialia ad solam poenam temporalem ligasse; nihilominus Theologi vnanimi consensu arbitrantur oppositum; eò quia lex iudicialis mandatur eisdem verbis, quibus ceremonialis, & moralis.

Prob.

Prob 2. pars. Quia materia illorum est capax grauis obligationis, ut potè in se grauis; Nec Deus regulariter dat leges positiuas de rebus leuibus, ergo censendum est obligare ex genere suo sub mortali; ex genere suo, inquam, nam paruitas materiæ regulariter excusat à mortali, etiam in iure Diuino positiuo, sicut in iure naturali. Verum iuxta Theologos non obligabat per se loquendo ad sui obseruationem cum periculo vitæ, nisi quoad præcepta moralia negatiua, quæ in Decalogo continentur, idque colligitur ex pluribus locis S. Scrip. & euentibus &c.

### QVÆSTIO III.

*Vtrum cessauerit lex vetus, & quando cessauerit.*

**N**OT. 1. Quòd ab aduentus tempore Christi non poterant seruari ceremoniæ legis veteris, tanquam signa Messiae venturi, sed vel simpliciter, tanquam figuræ Messiae, vel tanquam figuræ mysteriorum futurorum, quæ nec dum erant impleta, cum præcipua mysteria in passione, & morte Christi essent implenda; Vnde docet Scot. in 4. d. 3. q. 4. quod lex vetus fuit in morte Christi consummata, & noua confirmata radicaliter, seu causaliter, meritorie, & inchoatiue, quàmuis formaliter, & completè expirauerit in die Pentecostes, ut ostendetur in concl.

Not. 2. Quòd à tempore instituti baptismi, circumcisio non fuit amplius necessaria paruulis necessitate medijs in ordine ad remissionem peccati originalis; fuisset tamen eis adhuc adhibenda ex præcepto tanquam signum distinctiuum populi Iudaici, & fæderis cum illo à Deo initi, sicut remanebat præceptum circumcidendi Ioannem, etsi in utero sanctificatum; secùs autem de remedio legis naturæ, quod erat solum necessarium ad delendum peccatum originale, ac proinde eius necessitas, adueniente baptismo, simpliciter expirauit, ut tradit Scot. in 4. d. 3. q. 4. Quod si oppositum videatur docere, accomodè exponi potest, dicendo, quod circumcisio cessauit simpliciter quoad peccatum originale; ut explicat Herincx.

Not. 3. Quòd quidam Christiani ex Iudæis, quos secuti sunt Cerinthiani, Nazaræi, & Ebionitæ, teste Aug. hæresi

8. & 9. putarunt legem veterem in noua perseverare, ac proinde seruandam esse cum Euangelio; male intelligentes Scripturam, quæ testatur legem veterem esse æternam; & illud Matt. 5. *Non veni solvere legem, sed adimplere*. Verum decepti sunt, quia Iy, æterna, in S. Scrip. interdum sumitur pro duratione valde diurna, ut alibi notatum fuit. Et quidem in hoc sensu lex vetus dicitur æterna; & addi potest cum D. Aug. q. 43. in exodum: *Legem veterem dici æternam, & perpetuam, non secundum literam, sed secundum spiritum, id est, secundum res per legem figuratas, quæ ultimatiè implebuntur in beatitudine*. Neque illis fauet secunda auctoritas; nam, Iy, solvere, non intelligitur pro abrogare, sed pro violare; id est non veni violare legem, contra cuius verum sensum nil docuit Christus, eamque seruauit quousque fuit in vigore.

I. Concl. lex vetus cessauit introducta Euangelica lege: est de fide; & clarè patet ex S. Scrip. & præsertim act. 15. ubi lex antiqua vocatur iugum importabile. & D. Paul. ad Galat. c. 3. *Lex pedagogus noster fuit in Christo, at ubi venit fides, iam non sumus sub pedagogo*. Et in Epist. ad hebræos c. 7. ait *Translato enim Sacerdotio, necesse est ut & legis translatio fiat*, ergo cum Sacerdotium veteris legis esset in sola Tribu Aaron, Christus ex Tribu Iuda oriundus, Pontifex pro nobis ingreditur, Sacerdotio secundum ordinem Melchisedech instituto. Itaq; tam lex cæremonialis, & iudicialis, quàm etiam moralis cessauit introducto Euangelio; & quamuis lex moralis etiam apud nos remanserit materialiter, hoc est, quatenus illius materia est in lege noua præcepta, vel prohibita ex iure naturæ; nihilominus formaliter, id est, quatenus erat pars veteris legis desijt, ut communiter tradunt Theologi contra Bellarm. lib. de iustificat; & quosdam alios.

II. Concl. Lex vetus non cessauit in Natiuitate Christi, vel ante ipsius mortem. Est communis. Prob. Christus usque ad mortem seruauit legem Moyſis in circumcisione, oblatione templi, esu Agni paschalis &c. Item mundatos à lepra misit ad Sacerdotes iuxta legis præscriptum. Immo oppositam Phariseorum calumniam à se repulit, mostrando, se nil legi contrarium facere, ac declarando verum legis sensum, unde ait. *Non veni solvere legem, sed adimplere*.



III. Cœnel. Lex vetus non desijt obligare præcisè in morte Christi, sed à promulgatione legis nouæ factæ in Pentecoste, & per consequens tunc lex vetus expirauit. Ita D. Bonau. 4. d. 3. q. 2. Scotus, & Scotistæ in 4. d. 3. q. 4. & videtur communis contra Thomistas. Prob. 1. ex S. Scrip. D. Paul. ad Ephes. c. 2. ait. *Legem mandatorum decrosis*; (supple Euangelicis) *euacuans*; & ad hebr. c. 10. *Aufert primum, ut sequens statuat*; ergo lex vetus cessauit, quando incæpit noua; ita etiam tradunt D. Aug. Epist. 119. cap. 16. & Leo Papa ser. 1. in festo Pentecostes. Hinc euidenter infertur, legem nouam incæpisse obligare solum in die Pentecost. quo fuit solemniter promulgata. Faciunt ad id probandum rationes conclusionis, & auctoritates tum D. Aug. & Leon. Papæ, tum D. Bonau. & Scoti l. c. & insuper probatur. Lex non obligat, antequam sit sufficienter promulgata, sed ante diem Pent. lex Euangelica non fuerat sufficienter promulgata, ergo &c. maior patet ex dictis in quæst. de leg. promulgatione. Cæterum existimat Herincx, cum Scoto in 4. d. 3. q. 4. non omnes homines à puncto præcisè, quo fuit facta legis nouæ promulgatio, ita fuisse obligatos, ut peccarent nisi statim secundum illam legem operarentur. Quamplures enim ignorantia inuincibili laborantes indubiè non peccarunt, nec adhuc modo peccant in materiali illius transgressionem. Pari ratione non est censendum, omnia, quæ iudicantur necessaria necessitate medijs, subito obtinuisse obligationis vim respectu omnium, ut sapienter discurret Scot. loc. cit. de Baptismi necessitate post promulgationem in die Pentecostes factam; sed consentaneè D. Pouidentij remedium legis naturæ adhuc aliquo tempore fuisse utile, quamdiù videlicet spectatis circumstantijs distantie loci, commercij &c. lex Euangelica potuit illis innotescere.

Adde ex eod. Doct. huiusmodi modum abrogandi legem veterem per nouæ introductionem fuisse conuenientissimum. Tum quia non decebat populum Dei priuari propria lege, nisi per meliorem, & perfectiorem; Tum quia ista abrogatio non fuisset hominibus accomodata, immò nec utilis, utpote Iudæis inuincibiliter incognita, & non promulgata, qui proinde legem adhuc seruabant, tanquam obligantem, quod in ipsius etiam Apostolis locum habuisse videretur.

## QVÆSTIO IV.

*Virum lex Euangelica sit lata pro toto Orbe, & sit duratura vsque ad finem mundi.*

**N**ot. 1. Quæd lex Euangelica varijs nominibus appellatur: interdum vocatur lex fidei, sic ad Rom. 3. *Lex fidei*, & cap. 8. *Spiritus vult*; quandoque *lex gratie*, ut Io. 1. lex libertatis, & denique lex noua, quia est ultima lex à Deo data, quæ priorem antiquauit, vel quia totum hominem per gratiam renouat. Quare libertas christiana non consistit, ut simus liberi ab obseruatione legis Dei, sed primò in libertate à seruitute peccati iuxta illud Io. 8. *Omnis, qui facit peccatum seruus est peccati*. 2. in libertate à iugo legis cærimonialis, & iudicialis Iudæorum ad Galat. 4. *Quomodo iterum conuerimini ad infirma. & agenda elementa, quibus donum seruire vultis*. 3. in libertate à dominio & reatu legis, etiam naturalis ad Rom. c. 6. *Non estis sub lege, sed sub gratia*. Non tamen licet inferre cum hæreticis. Ergo ad legem non tenemur. Nam multum inter se differunt, esse sub lege, & esse in lege, ut notauit D. Aug. Psal. 1. Iudæi equidem erant sub lege, quia tanquam serui subiecti erant pœnis, & tortoribus legis legalibus. Nos autem sumus in lege, quia tanquam filij ex amore, & charitate viuimus iuxta legem; & in hoc sensu Apost. negat esse sub lege, & affirmat, se esse in lege; ut explicat D. Aug. lib. de continentia c. 3. *Non sumus sub lege bonum quidem iubente, non tamen dante, sed sumus sub gratia, quæ id, quod lex iubet, faciens nos amare, potest libere imperare*.

Not. 2. Quod lex Euangelica, non solum continet præceptum fidei, sed varia alia præcepta, quæ congruè possunt distingui in moralia, Sacramentalia, & Theologica, ut docet Trid. sess. 6. can. 19. contra hæreticos, falso putantes solam fidem esse præceptam, quia hæc sola iustificat, de quo agimus in tract. de gratia. Siquidem Saluator legem naturalem, seu moralem renouat dicens: *ego autem dico vobis*; & D. Paulus à Regno Dei excludit fures, aliosque legis moralis transgressores. Idem pat. ex Iacob. c. 2. Deinde dedit præcepta Sacramentalia. Io. 3. *Nisi quis renatus fuerit* &c. & c. 6. *Nisi manducaueritis carnem filij hominis*, & alibi. Deniquè præcepta virtutum theologicarum instituit, Quæ

*crediderit &c.* Quare credibilia reducuntur ad fidem, speranda ad spem, & charitatem. Insuper in lege noua continentur quædam noua consilia moralia, ideoque dicuntur Euangelica, puta, paupertatis, obedientiæ &c.

Concl. Lex noua, seu Euangelica lata est à Christo pro uniuerso mundo, & durabit usque ad finem mundi. Vtraque pars est de fide. Et quidem prima pars est contra quosdam modernos hæreticos temere asserentes Christum esse hominibus datum, ut Redemptorem, non ut legislatorem, cui obediant, quod damnatur à Trid. sess. 6. can. 21. & probatur ex S. Scrip. Isaïæ 2. *De Syon exibit lex, & cap. 33. Dominus iudex noster & legislifer noster.* Jerem. 31. *Dabo legem meam in uisceribus eorum.* Et in Euangelio pluries Christus loquitur, ut Io. 14. *Mandata mea seruare, & alibi.* Quod autem lata sit præ omnibus, nemine excepto liquidò patet ex illo Matt. *Euntes in mundum uniuersum predicate Euangelium omni creatura.* Sicut enim Christus est omnium Redemptor, ita est omnium legislator.

Prob. 3. pars. Ex verbis ipsius Christi, dicentis Matt. 28. *Ecces ego uobiscum sum usque ad consumptionem sæculi.* Vnde nouum Testamentum dicitur æternum ad Hebr. 13. & in consecratione calicis, & alibi, præsertim de lege noua dicitur Daniel. c. 2. *In æternum non dissipabitur, aliter non tradetur, stabit in æternum.*

## QVÆSTIO V.

*Vtrum usus legalium in lege noua aliquando licuerit.*

**N**ot. ex Scoto in 4. d. 3. q. 4. §. Respondeo, quod de isto facto fuit controuersia inter duos egregios Apostolos, & postea inter Doctores famosos August. & Hierony. hoc negante, illo asserente usum ceremonialium legalium. Vnde ad intelligentiam sententiæ D. Hieron. sciendum est, quod D. Hier. ut obseruant Seraph. Doctor, & Subtilis, duo temporâ posuit in nouæ legis datione, & Sacramentorum suorum institutione. Vnum scilicet tempus condendi euangelium, quod incæpit ab aduentu Christi usq; ad passionis consumationem: Aliud fuit promulgationis, quod incæpit ab Aduentu Spiritus S. usque ad finem

nem mundi: similiter posuit, quod mandata legalia, & ceremonialia dupliciter conuenit obseruari, vel ex præcepto tanquam necessaria ad salutem, vel ex dispensatione, non quia bona sint, sed quia inde elicitur bonum. Concessit ergo D. Hieron. legalia maximè circumcissionem seruari debere quousque veritas Euangelij promulgaretur, & institutio nouæ legis aperiretur, & in hoc toto tempore; sed illis incipientibus aperiri illa cessabant, sicut ista innotescebant, ita ut nulli post acceptam notitiam veritatis liceret seruare huiusmodi sacramenta aliquo modo, nisi illis solis, ad quos non peruenerat prædicatio Euangelij; vel etiam ipsis Apostolis maioribus ex dispensatione, & pia quadam simulatione; & ad hoc ponendum mouit eum auctoritas S. Scrip. & Ecclesiæ. Nam omnes Apostoli consenserunt Actorum 15. legalia non esse seruanda. Rursus videbat Apostolos alicubi post illam sententiam seruasse, & dicebat, primam sententiam datam esse secundum rigorem veritatis, sed obseruationem factam esse secundum simulationem pietatis, iuxta illud Apost. 1. ad Cor. c. 9. *Omnibus omnia factus sum Iudæis tanquam Iudæus* &c. Auctoritas Ecclesiæ etiam mouit, quia SS. Patres communiter damnauerunt hæresim Hebionis, & Cherinthi, qui dixerunt, legalia cum Euangelio esse seruanda, & ob id dicebat, pia quadam, & dispensatoria simulatione esse seruata ob infirmitatem Iudæorum, & dixit etiam, quod Paulus pia quadam simulatione reprehendit, qui nec peccabat. Ita D. Bonau.

Verum D. Aug. alio modo soluit; distinguit enim triplex tempus, nempe tempus condendi Euangelium, promulgandi conditum, & custodiendi iam promulgatum. Primum tempus fuit ab Aduentu Christi usque ad passionis consummationem; unde ante Christi mortem, neque mortua erant; neque mortifera: 2. à passione Christi usque ad diuulgationem Euangelij, & tunc pariter seruari poterant etiam ab his, qui audierant Euangelium propter honestatem, quia cum honore deducenda erat synagoga ad tumulum, non quasi Idolatra statim abiicienda; ac proinde tali tempore seruari peterant propter proximi utilitatem, ne Iudæi à fide reuocarentur: 3. tempus fuit à sufficienti promulgatione usque ad finem mundi, quo tempore nullo modo sunt seruanda, quia iam fuerant tumultata. Triplici

enim de causa possunt aliqua obseruari, ut docet D. Bonau. nempe propter salutis necessitatem, propter honestatem, & propter proximi infirmitatem, quæ omnia cessant in 3. tempore, quo legalia erant iam sepulta.

I. Concl. Legalia fuit licitum obseruare etiam post Euangelij promulgationem. Est D. Aug. quem sequuntur D. Bonau. Scot. D. Thom. & omnes scholastici, eamque probat ex factis Apostoli. Nam dudum post legis nouæ promulgationem Apost. Paulus circumcidit Timotheum ex Matre Iudæa, & Patre gentili. Et act. c. 21. idem Timoth. iuxta consilium Iacobi, assumptis viris, ritu Iudaico est purificatus. Similiter Petrus Antiochiæ iudaicas ceremonias seruauit, ut constat ex Epist. ad Galat. 2. Item Apostoli omnes in Concilio, vt habetur act. cap. 15. decreuerunt, ut Christiani abstinerent à sanguine, & suffocato, quod pertinet ad ceremonialia; sed quod Apostoli repleti Spiritu S. post legis Euangelicæ in die Pentecostes promulgationem obseruarunt, eius eorum obseruantiam non iudicarent necessariam, non potest esse mortiferum, ergo fuit licitum aliquando obseruare &c.

II. Concl. Petrus iustè reprehensus est à Paulo, quia reprehensibilis erat, non quia male faceret, sed aliquantum incautè, & illo defectu circumspectionis, credo, quod fuit in eo aliqua culpa, licet non esset mortalis, & diuina dispensatione hoc permissum est, ut dum Petrus repræhensus non desisteret, clarius veritas pateretur. Ita Seraph. Doct. loc. cit. & paulò superiùs pronunciauit. Dicendum est, quod Aug. dictis Hieron. addidit, & clariùs hoc vidit, & idè eius dictis standum est. Nam & ipse Hier. addendum, & hæc corrigenda sibi commisit. Et Scot. loc. cit. ait. Salua reuerentia aliorum teneo cum Paulo, & Aug. licet enim Apostoli in actibus, vel verbis, quæ dixerunt ut homines potuerint errare; tamen nullus Apost. vel Prophetæ, in quantum Scriptor alicuius partis Scripturæ aliquo modo errauit, quia secundum Aug. in Epist. ad Hier. & ponitur in canone dist. 9. *Si ad scripturas diuinas admissum fuerit aliquod mendacium quantumcunque paruum, seu officiosum, nihil remanet in ea solida veritatis, qua conuincatur Aduersarius; cum ergo Paul. in Epist. ad Galat. quæ est pars Script. canonicæ hoc scribat; in facto eius restitit, quia reprehensibilis*

erat: & subdit. *Cum autem vidissem, quod non rectè ambularet ad veritatem Evangelij*; necesse est dicere ista verba esse simpliciter vera, vel totius Scripturæ auctoritas auferetur. Itaque reprehensibilis erat, idest, ut explicat. Doct. Seraph. utilis reprehendi, & dignus, quia, ad veritatem Evangelij non ambulabat, idest, non usquequaq; quia ex hoc veritas conculcabatur; & ideo Paulus bene fecit, & utiliter, quia coram omnibus eum reprehendit. Nec est excusandus Petrus, sequitur D. Bonau. ab una leui negligentia, ne Paulus accusetur grauius mendacij culpa: ergo veraciter non simulatoriè Petrus fuit reprehensus à Paulo, non quia legalia seruabat, sed quia exemplo suo Gentiles iudaizare cogebat. Cæterum Becanus purat, Petrum fuisse reprehensione Pauli dignum, quia videbatur nimis sollicitus de tali obseruatione, & Suarez censet, in isto actu Petri fuisse defectum maioris boni, quæ opiniones non videntur distare à communi. His tamen non obstantibus sententiam Hieron. præter Adrianum propugnat latè Lorca disp. 35. & alij, ut notat Herincx.

Arg. cont. 1. concl. Apost. ad Galat. 4. Si circumcidamini, Christus vobis nihil proderit; ergo &c.

Resp. cum D. Aug. lib. de mendacio c. 5: & etiam in Epist. cit. nihil prodesse Christum ijs, qui existimabant, circumcisionem esse necessariam ad salutem, vel iustificationem, iuxta illud, quod subdit Apost. *Enacuat iſtis à Christo &c.*

Arg. 2. legalia habebant rationem mendacij, ergo illicita; ant. patet; quia in morte Christi fuerunt consummata mysteria, quæ per ceremonias legis veteris figurabantur.

Resp. neg. assumptum; nam, ut supra notatum fuit, poterant post mortem Christi, & mysteriorum eius consummationem obseruari absque significatione præfiguratiua: Si enim nato Christo adhuc legalia poterant; imò debebant seruari, estò non ampliùs tanquam signa Christi venturi; ita pari ratione non erat illicitum, eadem post mortem Christi obseruare ea ratione, quam supra retulimus. Quod si quis urgeat, ergo etiam modo licet legalia obseruare.

Resp. cum D. Aug. Epist. 19. non licere, ed quia iam sepulta fuere, ac proinde à Christianis omnibus irreparabiliter deferenda sunt. Hinc rectè infertur, ceremonias ve-



teris legis non posse ab Ecclesia restaurari; ne quidem materialiter spectatas, saltem quoad principales, & velut substantiales, ut sunt circumcisio, sacrificia, & cætera ad illa spectantia; ut aduertit Herincx, subdens, meritò ab omnibus reprehendi Caiet. quod p. 3. q. 37. art. 1. dixerit circumcisionem esse licitam, æthiopibus schismaticis in ditione presbyteri Ioannis, quicquid utuntur tanquam ceremonia ad imitandum Christi circumcisionem.

Quæres. An in legem D. positivam cadere possit mutatio.

Resp. affirmatiue, quia variæ mutationes contingere possunt: primò ratione status, nempe, quando est lata pro uno statu determinatè; sic lex circumcisionis lata pro statu veteris testamenti, eo desinente, in legem baptismi mutata est: 2. ratione materiæ, ut quando id, quod est in se materia legis, v. g. occisio hominis priuata auctoritate, ratione adiunctæ, aut mutatæ circumstantiæ, ut accedente sententia iudicis, cessat esse legis materia; pari ratione in defensione propriæ vitæ: 3. mutatio fieri potest per regulam charitatis, & bonitatis, quando nimirum actus maioris charitatis impossibilis est cum alio; hic, & nunc legis positivæ D. præcepto; ut si aliquis exponit propriam vitam ob motuum charitatis, vel etiam alterius virtutis pro defensione amici, seu pro liberando alium à periculo mortis. 4. ratione concurrentiæ diuersorum præceptorum impossibilium, quorum unum alteri esse preferendum ratio dicat; sic præceptum de vita conseruanda, de proximo iuuando in necessitate aliqua antecedit præceptum sanctificandi Dominicam: Vnde est regula generalis, quod quandocunque concurrunt duo præcepta, quorum unum est maius, seu altioris ordinis, semper seruanda est quod est maius, seu altioris ordinis.

Quæres 2. An lex D. positiva admittat interpretationem.

Resp. affirmatiue. Ratio; quia cum lex positiva Dei non sit menti inscripta, quoad omnes eius circumstantias, sed debeat exterius proponi, potest sensus verborum legis D. sicut etiam cuiusvis alterius legis positivæ declarari, siue explicari; quæ quidem explicatio erit certa, vel probabilis; prout explicantium auctoritas erit certa, aut probabilis. Vnde triplex legis interpretatio distingui solet. Prima auctoritativa, seu iudicialis; & hæc competit soli

Pontifici cum suo Concilio pro uniuerſali Eccleſia; & interdum etiam Episcopis cum Concilio pro ſuo grege, ubi aliqua obſcuritas, & perplexitas naſcitur: 2. eſt Doctoralis, ſeu doctrinalis, & hæc comperit Doctoribus, Profeſſoribus, Paſtoribus, Confeſſarijs &c. Immo in neceſſitate ineuitabili, quando hic, & nunc operandum ſit, & non pateat aditus ad Doctores, & paſtores quilibet iudicio recto legem de bono, & æquo interpretari poteſt, ut ex communi tradit Marchantius tom. 2. tract. de leg. 3. eſt lex naturalis, ad quam quis in omni perplexitate, tanquam ad rectum rationis dictamen recurrere poteſt, & debet; de prima dicitur Melachiz. *Labia enim Sacerdotis cuſtodiunt ſcientiam, & legem ex ore eius requirendam præcipis* Item Lucæ c. 10. *Qui nos audit me audit & qui nos ſpernit, me ſpernit* &c. De 2. ſcribit Paulus ad Ephēſ. c. 4. Chriſtum dediffe Eccleſiæ; *Quoſdam quidem Apoſtoloſ &c. alios autem Doctores & Paſtores*. De 3. patet, quia ſignatum eſt ſuper nos lumen, quo diſcernere poſſimus quid hic, & nunc agere oportet conformiter ad S. Scrip. traditionem, doctrinam, & communem Eccleſiæ ſenſum. Verum epikia in lege D. non habet locum; cum ſtriçtè ſumpta ſit emendatio legis generaliter expreſſæ in caſu, quem legiſlator non fuiſſet comprehenſurus ſi præuediſſet; quod in Deo, qui omnes caſus præuidit, & excipiendos excepit, nulla ratione eſt admittendum.

Quæres 3. An Deus ſua potentia absoluta potuiſſet condere hominem ex legem. Hoc quæſitum à doctiſs. Caramele propoſitum fuit Louanij Petro Marchant. tunc Commiſſario Generali Ordinis Min. eiſque reſponſionem ſibi datam ad litteram refert, & ſcribit tom. 3. theol. fundam. his conceptis verbis: Vix à noſtra ſententia Reuerendiſs. Petri Marchant. opinio diſtinguitur, & quia Virum maximi facio, volui eiſus verba hic adſungere, ut videat lector candidus quàm altè, & magnificè de Deo ſentiant Scotici, quàm demiffè Aduerſarij. Ipſe igitur ad mentem Seraphicæ Scholæ in reſolutione ad me data 9. Decemb. 1643. conſultus. An poſſit Deus condere hominem ex legem, & ab omni præcepto liberum? ſic inquit.

Aduertend. legem, & præceptum dupliciter ſumi poſſe. Primò pro regula aliqua directiua ad actionem, vel finem abſque ullo alio formali decreto, vel præcepto, & abſque  
ulla

ulla obligatione superaddita; nisi solius rectitudinis debita inesse actui ex natura sui intrinseca, vel finis, ad quem regula dirigit, adipiscendi: 2. pro formali decreto, vel mandato sub obligatione alicuius culpæ, vel pænæ à transgrediente incurrendæ. His sic prænotatis.

Resp. 1. Deum iuxta primam acceptionem non posse condere hominem ex legem. Ratio est, quia cum homo ex essentia sua sit rationalis, supponit ex natura sua rationem, siue rationalem potentiam, cui intrinsecum est, humanas actiones dirigere, itaut si deficiat, actus rectitudinis debita inesse careat, & à fine, propter quem homo conditus est, deuiet. Ratio igitur in homine ex natura, & essentia sua est participatio legis æternæ, & pro officio habet actiones, prout humanæ sunt, & hominem ad finem. ad quem conditus est, dirigere. Et hoc modo implicat, hominem rationalem condi, & sine lege, quæ sit ratio, creari.

Resp. 2. sua infinita potentia posse condere hominem absque adiuncta formali aliqua lege, vel præcepto rationi superaddito, quo transgressor ad culpam, vel ad pœnam obligetur. Ratio est, quia non implicat; & alias homo absque tali præcepto verus est homo, rationale animal, Dei imaginem, & similitudinem referens, & beatitudinis æternæ iuxta media ab omnisciente, & omnipotente Deo disponenda per infinitam suam sapientiam capax. Et legem, vel præceptum formale habere superadditum non est hominis essentiæ, & naturæ, etsi à principio condita naturæ superaddita sint. Hucusque doctissimus iste Vir, qui, ut videris, sine ulla limitatione de Dei potentia loquitur, & omnia, & singula præcepta potuisse non imponere, affirmat. Ergo ad mentem Marchantij, si legis nomine rationem intelligamus, non potest Deus creare hominem ex legem; quia non potest condere creaturam rationalem sine ratione, intellectualem sine intellectu, album sine albedine. Si autem legis nomine præceptum aliquod morale ab homine realiter distinctum intelligamus, potest Deus creare hominem ex legem: quia talis homo suppositus duas contradictorias non infert, & quidquid contradictionem non inuoluit, potest à Deo fieri: Sic Marchantius.

Quæres 4. In quibus lex noua excellat Veterem.

Resp. in multis legem nouam excellere veterem, quam

excellentiā expressit D. Paulus ad Galat. 3. ad Hebr. 7. 8. & alibi. Et potest talis excellentia ostendi instituendo comparationem. Primò quidem in causa efficiente, nam licet auctor utriusq; legis sit Deus, hoc tamen interest, quod veterem dederit per ministerium Angelorum, nouam autem per unigenitum filium suum, ut tradit Apost. ad Hebr. c. 2:2. in causa materiali, eo quia mysteria Trinitatis, Incarnationis, Redemptionis, & alia in lege veteri fuerunt occulta, aut imperfectè cognita, at in Euangelio sunt aperte reuelata. In materia quoque morali supereminet lex noua, nam dirigit non solum actus externos, sed etiam actus internos iuxta illud Matt. 5. *Nisi abundauerit iustitia, vestra plusquam scribarum, & Phariseorum non intrabitis in Regnum Cælorum*; ideoque dicitur, quod lex verus cohibet manum, & lex noua Animum, non quod lex verus non regularet actus internos; sed quia non ita expressè, & clarè sicut noua. Item sacrificijs, & ceremonijs veteribus propè infinitis successit efficax, & incomparabile sacrificium, & Sacramenta. 3. In causa formali. Lex enim noua non fuit scripta in membranis, aut tabulis lapideis, sed in tabulis cordis, ut ex vaticinio Hieremiæ docet Apost. ad Hebr. c. 8:4. In causa finali. Quia lex noua est finis veteris, teste Apost. ad Rom. c. 10. *finis legis Christus*. Vnde umbram habet futurorum, & lex noua vocatur ab eodem Apost. consummatio veteris. Quare comparat statum legis veteris, scribens ad Galat. 4. statui pueri existentis sub Pedagogo, statum autem nouæ legis statui Viri perfecti, qui iam non est sub Pedagogo.

Præterea si effectum utriusque legis spectemus; lex vetus continet mandata, non gratiam, qua impleantur; sed hanc ex fide in Christum, & ex lege noua mendicabat iuxta illud Act. 4. *Neque enim aliud non. en. est sub Cælo datum hominibus in quo oporteat nos salues fieri*; At lex noua continet spiritum, & gratiam, & quidem abundantiorē, & maximè in Sacramentis ex passione Christi vim, & efficaciam gratiam producendi habentibus. Plures etiam aliæ differentia assignari possent, ex quibus præstantia legis nouæ magis ostenditur; nempe, quod sit magis universalis ex parte locorum, temporum, & personarum. Item, quod sit filiorum, lex autem vetus seruorum. Vnde lex noua fideles

les veluti filios potius per amorem, quam timorem inducit ad sui obseruantiam, scribente Apost. ad Rom. c. 8. *Non accipistis spiritum seruitutis iterum in timore, sed accepistis spiritum adoptionis filiorum.*

Hinc facillè soluitur illa quæstio; An lex noua sit grauior veteri; & breuiter dicendum cum Scoto in 3. d. 40. q. 1. Quod longè grauior est vetus; grauitas enim alicuius legis in comparatione ad aliam ex duobus pendet, nempe ex onere imposito, & ex defectu ad portandum onus impositum. Onera imposita in lege veteri in primis erant moralia, deinde ceremonialia, & iudicialia. De moralibus patet, sicut etiam de ceremonialibus; quia, licet tangere possent mortuum, & huiusmodi, incurrebant tamen ex hoc multas immunditias, ad quarum purgationem, si non faciebant, quod legè mandabatur, peccabant mortaliter; sicut explicatur ibi: *Anima, qua feceris, vel qua non feceris sic morte morietur, & peribit de populo suo*: quæ est comminatio damnationis æternæ, ut dicit Nicol. de Nyse in hac quæst. Item tenebantur ad omnia iudicialia, vel per se, vel quando per eorum Iudices decernebatur, & maximè per Sacerdotes leuitici generis iuxta illud Deuter. *Omnis Anima, qua contempserit iudicium Sacerdotis, morte morietur.* In lege autem noua sunt eadem præcepta moralia, quæ tunc, sed magis explicata. Ceremonialia sunt multò pauciora, & leuiora, quæ imposita sunt per Christum. Iudicialia, verò nulla sunt imposita à Christo. Lex enim Christi est lex mititatis, & humanitatis, & iugum suauis, adeo ut qui illud bono animo portant, reficiantur, ut dicitur Matt. 10. secus autem de iugo veteris legis; hoc unum sufficiat adnotare cum Gulielmo Paris. nostro Petro Galatino, & Abulensi, quod in lege veteri erant præcepta 613. comprehensis præceptis ceremonialibus, & iudicialibus; ideoque vocabatur lex mandatorum.



*De lege humana, tam Ecclesiastica, quàm ciuili.*

QVÆSTIO I.

*Vtrum admittendæ sint leges humanae præter legem naturalem, & Diuinam,*

**N**Ot. ex Scot. in 4. d. 15. q. 2. quod homo in duplici positione spectari potest; altera ciuili ad precisè conuiuendum; altera spiritali ad sanctè viuendum, quare iuxta hanc duplicem considerationem lex humana communiter diuiditur in temporalem politicam, quæ dirrigit, & ordinat hominem ad finem naturalem, qui viribus naturæ haberi potest per morales virtutes, ut refertur de antiquis Philosophis, & etiam de Populo Romano, etsi in tenebris gentilitatis sepultis; & in ecclesiasticam, quæ dirrigit, & ordinat hominem ad finem supernaturalem, idest ad æternam fælicitatem; quæ non viribus naturæ, & philosophicis virtutibus, sed gratiæ auxilio, ac virtutibus theologicis adipisci potest. Quare cum leges Dei eternæ, & naturales, seu lumen naturale ostendant, qualiter homines in suis actionibus se gerere debent, & sufficienter homines dirrigant ad morum honestatem, & ad ducendam vitam ciuilem, & pacificam, quæritur, qua ratione admittendæ sint, præter leges naturales, & Diuinas, leges humanæ. Hinc enim hæretici temerè contendunt, nullam potestatem legislatiuam dari in hominibus.

Concl. Præter leges naturales, & Diuinas, admittendæ pariter sunt leges humanæ. Ita omnes Theologi. Prob. 1. de lege Ecclesiastica. In S. Scrip. apertè habetur dari in Ecclesia potestatem legislatiuam, nam Io. 20. dicit Christus Petro, *Pasco oues meas*, Act. 20. *In quo vos Spiritus S. posuit Episcopos regere Ecclesiam Dei*; quis autem ignorat, regimen præferre potestatem præcipiendi, imperandi, & leges ferendi? Item Paulus 1. ad Cor. ait. *Sicut tradidi vobis præcepta mea tenetis*; & in fine capitis. *Cetera cum venero disponam*, prout quoquè 1. ad Timoth. c. 3. & ad Titum 1. disposuit legem de Bigamo non ordinando &c.



Confirmatur ex continuo, & perpetuo usu, & praxi Ecclesiæ; ut videre est in canonibus Apostolorum, Conciliorum generalium, & Pontificum, in quibus multa sunt decreta, & ordinata, quæ in particulari non erant determinata per ius Diuinum, & naturale, & quidem si nil aliud esset, sufficerent præcepta nascentis Ecclesiæ de communione in Paschate, de confessione annua, de ieiunijs, de diebus Dominicis, & festis &c. imò ipsi hæretici semetipsos confundentes dies Dominicos ab Ecclesia constitutos, & varia festa Domini Sabaoth, signanter diem natalem Domini cum sequenti, feriam secundam Paschæ, & Pentecostes, & alia obseruant.

Prob. 2. de lege temporali, seu ciuili auctoritate Scripturæ; nam ad Rom. 13. dicitur. *Omnis Anima Potestatibus sublimioribus subdita sit: itaque, qui resistit potestati, Dei ordinationi resistit*; ad Titum 3. *Admonet illos Principibus, & Potestatibus subditos esse*; ita etiam D. Petr. 1. c. 2. Prob. etiam ratione. Si in quavis familia priuata caput eiusdem potest præcipere filijs, & seruis; ergo contra rationem est, huiusmodi potestatem toti Reipublicæ, aut Regno denegare. Tum quia, potestas ista usu omnium gentium comprobata nullibi in lege gratiæ abrogatur, immò, magis in allatis auctoritatibus firmatur, & stabilitur, ergo &c.

Cæterum rationem cur leges humanæ sint admittendæ dat Scot. in 4. d. 26. q. unica. Expedit, inquit Doctor, supra legem naturalem ponere diuinum præceptum, quia homines minus obediunt præceptis legis naturæ, quam Deo præcipienti, & minanti, & minus timent, ac reuerentur conscientias proprias, quam auctoritatem Diuinam, ac proinde ex hoc capite fuit necessaria lex positua D. Necessitas pariter legis humanæ deducitur ex corruptione naturæ humanæ per peccatum originale vulneratæ; unde homines deprauati minus obediunt Deo præcipienti, quam auctoritati humanæ certis, ac determinatis poenis in hac vita transgressores punienti, quas Deus non statim infligit. Vnde D. Isid. lib. 5. etymol. ait: *Facta sunt leges, ut carum metu humana coercentur audacia, itaque sit inter improbos innocentia, & inter ipsos improbos formidato supplicio refronetur nocendi facultas*. Necessitati additur, & utilitas legis humanæ; cum enim lex naturæ non disponat de omnibus, quæ in varijs

cir-

511

circumstantijs exiguntur ( ad omnia namquē singularia non descendit ) vel pro varietate temporum, vel locorum, vel personarum statibus, & conditionibus, utile fuit per leges humanas determinatē explicare huiusmodi præcepta, eorumque circumstantias.

Arg. hæretici cont. conc. Deus fecit hominem natura liberum, & dedit ei dominium, ut præset animalibus ut habetur Gen. 1. & non alijs hominibus; ergo &c.

Resp. Deum loc. cit. expressisse, quod natura convenit omnibus hominibus, non tamen prohibuit, posse inter homines, quamvis natura æquales, ordinem institui, ut unus auctoritatem habeat præsidendi, & alijs imperandi, quod in natura corrupta fuit maximē necessarium. Immo, ut alibi dictum fuit, etiam in statu Innocentiæ, huiusmodi potestas, sine tamen imperfectione morali, locum habuisset, sicut etiam locum habet in Hierarchia Angelica.

Arg. 2. Christus Marci 7. dampnat humana præcepta ex c. 29. Isaïæ dicens. *In vanum me colunt, docentes doctrinas, & præcepta hominum*; ergo &c. Resp. Christum non dampnare leges humanas, cum alibi iusserit reddi Cæsari, quæ sunt Cæsaris; sed redarguere multas, & vanas observantias Iudæorum superstitiosas; ideoque dicitur, in vanum &c.

Arg. 3. S. Scrip. facit homines ex leges, ut patet ad Galat. 5. *Vos in libertatem vocati estis, & ibidem. Si spiritu ducimini non essis sub lege.* & prima ad Timot. *Iusto non est lex posita.*

Resp. libertatem christiani non consistere in exemptione ab obedientia superioribus præstanda, sed in eo, quod supra explicatum est. Ad 2. dicimus, nos non esse sub lege eo modo, quo erant Iudæi, idest tanquam sub Pedagogo; sed potius supra legem. Vnde iusto non est lex posita, quatenus pœnas, & terrores minatur, cum iustus leges impleat non formidine pœnæ, sed amore honestatis,

Quæres 1. Quodnam sit ius canonicum.

Resp. licet ius canonicum, seu Ecclesiasticum latè sumptum comprehendat leges Pontificias, & Episcopales; tamen ius canonicum simpliciter stat pro illo, quod continetur in his voluminibus, nimirum in Decreto Gratiani, Epistolis Decretalibus Gregorij IX. Sexto Decretalium Bonifacij VIII. Clementinis, & in extrauagantibus, rumo Ioan. XXII. tum communibus.

Decretum fuit compilatum à Gratiano Monacho Benedictino circa annum 1150. ut refert Herincx, & ab Eugenio 111. approbatum, immò, & legendum Gymnasijs publicis concessit, ac postremò auct. Greg. XIII. recognitum, ac retineri mandatum; Hoc autem Decretum diuiditur in tres partes. Prima continet dist. 101. diuisas in capita, seu canones, in quarum viginti prioribus agitur de iure in genere; in reliquis verò de Personis, seu Ministris Ecclesiasticis. 2. complectitur causas 36. quarum singulæ diuiduntur in quæstiones, & quælibet quæstio in capita, & tractatur de ijs, quæ ad formam, & materiam iudiciorum sub ecclesiastica potestate cadentium spectant. Causa vero 33. quæ est matrimonialis quæst. 3. continetur; tractatus de pœnitentia diuisus in septem distinctiones, quæ subdividuntur in capita: 3. pars continet tractatum de consecratione diuisum in quinque distinctiones, & quælibet distinctio in capita, in quibus agitur de consecratione Ecclesiarum, celebratione missarum, Eucharistia, festis, & Ecclesiasticis ceremonijs, baptismo, confirmatione, & ieiunijs. Loca ex 1. p. desumpta citari solent hoc modo can. vel cap. Humana dist. 1. ex 2. p. sic can. vel c. Quicumque studet 1. q. 1. idest causa prima q. 1. Capita verò tractatus de Pœnit. solent sic alligari. can. vel c. Reperiuntur de Pœnit. dist. 3. & capita tertiæ partis citantur sic can. vel c. Vasa de consecrat. dist. 1. Cæterum sunt etiam quædam, quæ appellantur Paleæ; quid verò nomine Pallæ intelligendum veniat, sub quo nonnulla Decreti capita inscribuntur, variant interpretes. Miranda in manual. Prælat. tom. & Herincx in disp. 2. de leg. humana tradunt ex communi sententia esse additiones quasdam ad primam collectionem, postea factas, siue ab ipso Gratiano, siue ab alio; quæ quidem paleæ non sunt contemnendæ, cum ipsæ ut notat Herincx, reperiuntur in Decretalibus, & apud vestutiores Gratiano Collectores.

Decretalium autem compilatio prodijt mandato Greg. IX. per Raymundum de Pennaforti ex Ord. Prædicatorum Capellanum eiusdem Pontificis, & S. R. E. Pœnitentiarii ex varijs, tum eiusdem, tum aliorum Pontificum Epistolis, constitutionibus, & Concilijs, iam inde ab Alexand. III. usque ad Greg. abrogatis per ipsum anterioribus

bus Decretalium compilationibus, quæ variæ erant. Edidit autem hoc opus sub nomine Decretalium, non solum ad distinctionem Decreti Gratiani, sed etiam, quia duplo plures continet Epistolas Pontificum, quàm sint reliquæ auctoritates simul sumptæ. Vnde Decretum Gratiani continet longè plura Conciliorum Decreta, quàm Pontificum constitutiones, vel Decretales Epistolas. Corpus igitur Decretalium constat quinque libris, in quibus ipsa juris Pontificij materia ad res forenses accomodatè disponitur. In primo quidem libro agitur de Personis, penes quas est iurisdictio aliqua, nec non de Iudiciorum præparatorijs. 2. de ordine Iudiciorum. 3. de rebus Ecclesiasticis, quæ in iudicium venire solent. 4. de sponsalibus, & matrimonio. 5. de criminibus, & pœnis. Vnde versus.

Iudex, Iudicium, Clerus, Sponsalia, Crimen.

Prædicti autem libri vocari solent extra, & ita apud Antiquiores præsertim citantur, eò quod sint extra corpus canonicum Gratiani tempore prius. Hodie tamen plerumque citatur sine addito, e. g. c. tua nos de iureiurando, & per excellentiam indicantur hic libri. Simpliciter etiam sæpè citatur solus numerus capitis e. g. c. 2. de pactis c. final. de Rescriptis. Si verò sub eodem titulo sint diuersa capita, quæ eandem vocem initialem habent, citantur simpliciter numerus capitis, vel certè, quorum sit caput ita incipiens e. g. dilectus 1. de Simonia c. dilectus 2. de Simonia. Sextus Decretalium à Bonifac. VIII. ex Concil. Lugdun. decretalibus Epistolis Pontificum Gregorij successorum, immo & nonnullis ipsius Gregorij nouellis constitutionibus collectus, multis etiam ipsius Bonifacij constat totidem libris, quot Decretales Greg. IX. cuius citatio fit eodem modo, quo citantur Decretales excepto, quod capita, & tituli huius libri citentur cum addito, dicendo in sexto sic v. g. cap. Volentes de priuil. in 6. Clemens V. paulò post edidit pariter constitutiones, partim suas, partim ex Concil. Vien. cui præfuit, desumptas; quas, ipso mortuo, absoluit, & publicare fecit Ioannes XXII. & ab ipsarum Authore Clementinæ dictæ sunt, & citantur sic. Clement. dudum de Sepult. Denique Ioannes XXII. edidit constitutiones viginti, & post ipsius obitum diuersæ à diuersis Pontificibus exierunt, quæ extrauagantes di-

etæ sunt, quia, licet nunc sint de corpore Iuris, tamen aliquamdiu extra illud extiterunt, & solent sic citari Extrauag. Vnigenitus, idest Constitutione extrauaganti sub titulo unigenitus.

Petes. An omnia, quæ continentur in iure canonico, ad sui obseruantiam obligent.

Resp. 1. quod libri Decretales, seu Decretalium, sextus, Clementinæ, & aliæ extrauagantes, seu Constitutiones, quæ reperiuntur insertæ in Corpore iuris canonici, & aliæ constitutiones aliorum Sum. Pontificum, qui postea successerunt, indubiè ab omnibus obseruari mandantur, cum fuerint factæ ab habentibus auctoritatem leges ferendi, & fuerint promulgatæ &c. Resp. 2. quod de Decreto Gratiani posset meritò dubitari, an omnia in eo inserta usque ad ipsas Patrum sententias habeant vim legis communis. Affirmarunt nonnulli, quos refert, & sequitur Felinus in c. 2. de Rescrip. sed infundatè, ait Herincx, rationem assignans. Nam, cum Gratianus priuato studio Decretum collegerit ex constitutionibus Sum. Pontificum, Conciliorum, tum Generalium, tum Prouincialium Episcoporum, ac iuris ciuilis, & Patrum sententijs, nonnulla etiam adiiciens de suo, ad ordinis rationem, & connexionem capitum, ac eorum conciliationem, quæ sibi inuicem aduersari videbantur, non potuit ijs à se collectis attribuere potestatem, quam ipse non habuit. Quare non alia Canonum ibi contentorum est auctoritas, quam fontium, unde manarunt. Quare nec leges ciuiles, per hoc, quod in Decretum sint coniectæ, censeri debent canonizatz; cum Gratianus auctoritatem nõ habuerit illas in numerum Sacrorum canonum referendi. Nec refert, quod Greg. XIII. illud emendatum retineri iusserit, nec non vetuerit ei addi, vel quid quàm detrahi; nam hoc nihil facit ad confirmationem singulorum in eo contentorum; & non alio id fine factum, quàm ut fides sit penès Auctorem: ita discurret Herincx cum Couar. Zoesio, Vallensi, & alijs.

Quæres 2. Quodnam sit ius ciuile.

Resp. Corpus Iuris ciuilis pluribus libris comprehenditur, nempe Institutionum, Digestorum, seu Pandectarum, Codicis, & Nouellarum. Institutiones, velut prima Iurisprudencia elementa, ac legum, præambula quatuor libris

continentur, in quibus compendiosè explicantur Iuris principia; & solent citari sic. Instit. de iust. & iure. Pandectæ quasi volumen omni scientiarum genere, & doctrina refertum, suo Digesta, quodd ex immensa, & confusa, multitudine voluminum veteris Iurisprudentiæ præcipua capita sint in hoc opus digesta; & citantur per duplex ff. Vnde si citetur sic l. omnes Populi ff. de iust. & iure; quærenda est lex, quæ ita incipit in lib. Digestorum sub tit. de iust. & iure. Codex quidem unus constitutionum Imperialium à Iustinianno anno 3. Imperij editus fuit; sed anno sexto postea emendatus prodijt, additis, detractisq; quamplurimis; quam id vocant Codicem repetitæ lectionis. Is continet libros duodecim; & citari solent, uti leges Digestorum, idest per C. magnum, quod significat Codicem. Accesserunt deinde Nouellæ Constitutiones Iustinianni post editionem recogniti Codicis factæ, quæ citari solent v.g. Nouella 66 §. igitur etiam; vel Auth. idest authentica constitutione, ut factæ novæ constitutiones 66. inter Nouellas Iustinianni. Cæterum de his omnibus non est dubitandum, quin habeant plenariam Iuris auctoritatem; Antiquiora tamen recentioribus cedunt, ac proinde Digesta Codici, Codex Nouellis; an autem instituta cedant Digestis, Zoësius, & alij, ut refert Herincx, censent per Instituta derogare Digestis; eo quodd sint posteriora.

## QVÆSTIO II.

### *Quanam sit materia legisi humanæ.*

**N**OT. 1. Quodd, ut alibi notatum fuit, actus sunt in triplici differentia, alij siquidem sunt honesti, vel boni, alij inhonesti, seu mali, & alij sunt indifferentes. Certum est, legem humanam non posse præcipere actus, seu actiones malas, talis enim lex esset contra primum principium morale, & diuinum: declina à malo: etsi impius Machiauellus ausus fuerit, dicere, ob bonum publicum posse à Principibus mala præcipi, & contraria veræ Religioni præcepta ferri, quod etiam Politici moderni amplecti non vententur.

NOT. 2. Quodd leges humanæ non omnia vitia debent co-



hibere, sed tantum grauiora, & à quibus communitatis maior pars per legem poterit abstineri. Quare D. Aug. lib. 1. de lib. arb. c. 5. ait, *Humanas leges multa concedere, atque impunita relinquere qua per diuinam prouidentiam vindicantur.* Tum quia, ut ipsa ratio ostendit, humanæ leges debent hominibus imponi iuxta eorum conditionem, & capacitatem, & fragilitatem, unde D. Isid. docuit, quod lex ad hoc ut recta sit, esse debet possibilis secundum naturam, sed secundum hominum naturam labilem nequeunt omnes uniuersim homines ab omnibus vitijs abstinere, id namque reseruatur iustis, & perfectis; ergo per leges non omnia vitia debent cohiberi, sed satis est, maiora, & grauiora.

I. Concl. Lex humana potest præcipere, vel prohibere actiones ex natura sua indifferentes. Prob. communi ratione; lex humana præcipere, & prohibere potest omne id, quod potest esse utile communitati, & maximè si conducat ad bonum spirituale, sed actiones indifferentes quandoque possunt ita se haberi in ordine ad communitatem, ergo &c. patet etiam conclusio ex usu, & praxi. Etenim Princeps Ecclesiasticus vetat quasdam actiones indifferentes, & præcipit, quæ hic, & nunc conducunt ad bonum Animæ. Vetat loqui e.g. cū monialibus, quæ quidem locutio, in se absolute spectata, est indifferens, nec bona, nec mala; nihilominus ratione circumstantiarum potest esse mala; ac proinde huiusmodi prohibitio in bonum commune spirituale refertur.

II. Concl. Humanæ leges omnium virtutum actus præcipere possunt, & debent; hoc videlicet sensu, quod nulla sit virtutis species, de cuius actibus in communi, humanæ leges non constituantur. Est D. Thomæ 1.2. q. 96. Herinckx L. c. Mirandæ, & videtur communis. Prob. 1. ex Arist. qui lib. 5. Eth. c. 1. ait. *Leges ad communem utilitatem omnium constitui, d: omnibusque debere dictare; & subdit, lex præcipit, foris opera facere, & qua temperati; & qua mansueti, similiter, & alias secundum alias virtutes, & malitias, quædam quidem iubens, quædam autem vetans, & prohibens, & Plato Dialogo 1. de leg. Eos, qui de Diuina Republ. disserunt non ad particularia virtutis, & præsertim ad vagationem, sed ad vniuersam ipsos virtutem respexisse putandum, & per singulas earum species leges quasisse.*

Prob. insuper ratione. Nam cum virtutum omnium species, ratione obiectorum distinguantur, & nullum sit obiectum

etiam virtutis, quod ad bonum commune referri non possit, rectè inferitur, quod leges de omnium virtutum actibus debent præcipere saltem in communi; quàmvis leges humanæ non debeant præcipere de omnibus singularum virtutum actibus in particulari. Sensus igitur conclusionis, & huius ultimi dicti est, quod leges debent quidem præcipere de aliquibus actionibus singularum virtutum; non tamen de omnibus, aut de singulis in particulari; sit exemplum in materia fortitudinis. Præcipit humana lex etiam cum mortis periculo Rempubl. esse defendendam, non, autem dat hoc præceptum de amico, etsi id quoque spectet, vel spectare possit pariter ad fortitudinem, sed hoc relinquitur legi naturæ. Item in materia temperantiæ. Præcipit Ecclesia, quod certis diebus à fidelibus ieiunetur, at reliquo temporis anno, temperatè, & moderatè comedatur, relinquendo hoc legi naturæ. Itaque lex humana eas solas actiones præcipere debet, quæ ad commune bonum ordinantur, vel referri possunt mediatè, vel immediatè.

III. Concl. Lex humana sub propria ratione legis non respicit nisi actus futuros. Prob. Nam sicut frustra datur consilium pro illis, quæ iam transierunt, vel fiunt, neque sunt amplius in nostra potestate; ita pariter frustra pro illis datur præceptum, aut lex. Tum quia lex est regula actionum humanarum, ac proinde lex debet illis præcedere; non enim potest homo se dirrigere iuxta regulam, quæ non dum extat. Notanter dicitur sub propria ratione legis; eo quia potest superior per legem, quatenus habet rationem sententiæ disponere aliqua circa præterita, ea puniendo, vel irritando; sicut hoc potest sine lege per sententiam, quam vocant ab homine; quo sensu intelligenda sunt iura c. 2. & c. final. de constit. & l. leges c. de legibus: ita tenet Panormitanus, cum communi Iurisperitorum, qui in cap. final. cod. tit. ait, quod lex siue constitutio iuris antiqui declaratoria, addens novam pœnam non extenditur respectu pœnæ ad præterita, immodò respectu dictæ pœnæ censetur quasi lex, & constitutio nova: Et in fine d. cap. addit, quod ubi lex, siue constitutio est iuris naturalis declaratoria extenditur etiam ad præterita; quia ibi solummodò declarat, & nihil de nouo inducit iuxta id, quod habetur in iure in l. hæredes palam ff. de testamentis.

*Vtrum lex humana præcipere possit actus internos.*

**N**ot. 1. Quodd actus humanus, alius est internus, & alius est externus; prior est ille, qui elicitur à potentijs internis, quales sunt intellectio, volitio, & imaginatio; posterior est, qui producitur à facultatibus, seu potentijs externis, quales sunt operationes quinque sensuum exteriorum. Insuper actus interni, vel sunt purè interni, absq; ulla prorsus connexionione cum externis, vel non sunt purè interni, sed quandam connexionem habent cum externis. Duplici autem modo potest actus internus connecti cum externo, nempe, vel per se, vel per accidens. Tunc per se connectitur cum externo, vel quando est causa, & veluti forma illius, qua ratione voluntas adulterandi connectitur cum adulterio actuali: vel quando est conditio necessariò requisita ad substantiam actus exterioris in genere, moris considerati; quo pacto attentio connecti debet cum oratione vocali, & dolor internus contritionis cum confessione sacramentali, & intentio baptizandi cum actione externa.

Not. 2. Quodd magnum discrimen est inter actus internos, qui connectuntur per se cum externis, & inter eos, qui per accidens tantum; nam primi sufficienter manifestantur per exteriores, volitio enim furandi apertè manifestatur per furtum, quod externè perpetratur; at secundi non sufficienter manifestantur per exteriores, recitatio siquidem exterior officij non sufficienter manifestat attentionem, & deuotionem, cum possit esse sine illis. Rursus actus internus potest connecti cum exteriori non per se, sed per accidens, etiam quantum adesse morale actionis, sicut motuum penitentiae per accidens coniunctum est cum externo ieiunio, & motuum vanæ gloriæ largitioni eleemosynæ. Quæstio igitur præsens procedit de omnibus recensitis actibus, an videlicet lex humana possit illos præcipere, tam directè, quam indirectè.

I. Concl. Lex humana, siue ciuilis, siue canonica non potest directè præcipere actus internos nullam connexionem habentes cum externis. Est communis sententia.

Theo-

Theologorum contra Medinam cod. de tract. q. 15. De lege civili patet, & nulla est difficultas, quia hæc proximè respicit tranquillitatem, & pacem externam Reipubl. quæ à solis actibus exterioribus pendet: itaque probatur quoad legem Eccles. Lex humana nequit ferri nisi de actibus, de quibus Iudex humanus potest punire transgressores, quia ut docet Arist. lib. 10. Eth. c. 5. legislatiua potestas debet necessariò coniunctam habere potestatem coactiuam, aliàs esset inefficax, ac proinde inutilis, sed in Ecclesia non est potestas puniendi actus merè internos, quia, ut habetur cap. erubescant dist. 13. Ecclesia non iudicat de occultis, ergo &c.

II. Concl. Actus interni coniuncti per se cum externis possunt præcipi à lege humana. Est communis. Prob. lex est regula actuum humanorum, sed actus humani esse nequeunt sine aliquo actu interiori, cum quo habet connectionem, ergo lex humana præcipiendo, vel prohibendo actum externum, velut regula prohibet, vel præcipit actum internum, qui requiritur, ut actus externus sit humanus, & voluntarius. Vnde si Ecclesia præcipit auditionem sacri, præcipit intentionem illud audiendi. Similiter si prohibet comestionem carnis, etiam prohibet propositum illam comedendi, estò propositum non prodeat in actum externum. Huic tamen doctrinæ contradicunt nonnulli Doct. inter quos est Meratius de leg. disp. 11. sect. 3. Becan. c. 6. de leg. hum. q. 5. ut refert, & sequitur Stephan. à S. Paulo in theol. moral. disp. 3. de leg. hoc videlicet fundamento, quia de actu efficaci interno, si in nullum actum externum prodeat, non potest homo ferre legem, cum nequeat illum iudicare.

III. Concl. Quando actus interni coniunguntur cum externis, tanquam necessarijs ad aliquod esse morale, vel quasi artificiale illius, possunt esse materia legis humanæ, ac proinde præcipi, vel prohiberi. Ita communior sententia. prob. Ad verum contractum per exteriora verba faciendum est necessarius consensus interior, sed Ecclesia, & Respubl. in multis casibus potest præcipere suis subditis, ut verè contrahant; ergo & potest præcipere illum interiore consensusum. Confirm. Etenim ad cultum Religionis in Ecclesia Dei necessarium, necessaria quoque est in Ec-

clesia potestas præcipiendi actus externos Sacramento-  
rum, Sacrificij, Orationis &c. non tantum secundum ma-  
terialem entitatem, qua perficiuntur, & constant, sed etiam  
secundum esse formale talis entis moralis, vel quasi artifi-  
cialis, videlicet, validitatis Sacramenti, & Sacrificij; at hoc  
esse morale Sacramenta habere nequeunt nisi dependenter  
ab actu interiori voluntatis, ergo ut sic possunt esse mate-  
ria legis humanæ. Unde infertur; Recitantes horas cano-  
nicas, vel audientes Sacrum cum voluntaria distractione  
non implere præceptum, & consequenter peccare morta-  
liter, & teneri fructus beneficij restituere, quod euidenter  
deducitur ex cap. Dolentes de celebratione Missarum ubi  
præcipitur, ut officium diuinum celebretur studiosè pari-  
ter, & deuotè.

IV. Concl. Quàmuis 3. concl. sit probabilior, nihilomi-  
nus probabile est leges humanas non posse præcipere, nec  
prohibere actus internos, qui cum exterioribus per acci-  
dens coniunguntur; ac proinde qui recitaret horas canoni-  
cas, & sacrum audiret, & similia voluntaria distractione  
satisfaceret præcepto, nec teneretur ad fructuum restitue-  
tionem. Ita quam plures Recentiores, quos plena manu ci-  
tat Diana, & signanter Enriquez lib. 11. de missa tom. 2. Less.  
lib. 2. c. 37. dub. 11. Layman lib. 4. tract. 1. c. 5. hac ratione  
ducti: quia lex humana non potest præcipere, nec prohi-  
bere quod non potest punire, nec punire quod cognoscere,  
ac iudicare nequit: sed nulla potestas humana potest co-  
gnoscere, ac iudicare actus internos; ergo nec eos præcipe-  
re, aut prohibere. Quare in cap. Dolentes cit. iuxta hanc  
opinionem solum præcipiuntur actus studiosi interni, ut  
videlicet cum talibus circumstantijs exerceantur, quæ ad  
actum Religionis externum necessariæ sunt, & dumodo  
non fiat aliqua actio, quæ sit impossibilis cum externa  
attentione, qualis esset confabulatio, visio, & similia.

Arg. 1. cont. 1. conc. Ecclesia propria auctoritate potest  
reseruare peccata merè interna, ergo &c. Resp. neg. conf.  
Nam reservatio non fit præcipiendo, vel prohibendo actum  
internum, sed negando potestatem absolucndi, si fortè pe-  
nitens habeat tale, vel tale peccatum.

Arg. 2. Ecclesia punit actus merè internos, nam cap. Ex-  
communicamus §. credentes 13: de hæreticis excommuni-  
can-

cantur credentes hæreticis, & idem habetur in bulla Cœne.

Resp. neg. assumptum, eò quòd per credentes intelliguntur, qui verbis, vel factis assentiuntur hæreticis, ut condistinguantur ab illis, qui hæresim docent, aut diuulgant, ut patet in ijsdem allegatis canon.

Arg. 3. In Clement. de hæret. §. Verùm excommunicantur Inquisitores procedentes, vel procedere omittentes ex odio, aut simili prauo affectu; sed prauus affectus est actus internus; ergo &c. Resp. quòd intelligitur de prauo affectu cum actione externa coniuncto. Quare regula generalis est, quòd, quotiescunque Ecclesia videtur præcipere, aut prohibere actus internos, vel intelligi debet de actibus internis per externa signa manifestata; vel dicendum Ecclesiam hic, & nunc non ferre aliam legem, sed tantùm explicare quid iuxta naturam rei, vel præceptum D. fieri oporteat.

## DISPUTATIO V.

*De ijs, qui legibus subijciuntur.*

### QVÆSTIO I.

*Utrum Princeps, seu legislator teneatur suis legibus.*

**N**ot. Quòd apud omnes Doct. pro certo habetur Principem, supposita sua lege taxante pretia rerum, tene-ri ad eam obseruandam; sicut etiam indubiè peccaret, si contractibus à se cum suis subditis iniris non staret; quia naturalis iustitia exigit, ut æquè liberè contrahentes simul, equè grauitè per contractum ligentur. Itaque difficultas est: An legislator teneatur suis legibus, quæ equè ad ipsum, quàm ad subditos spectant, præter superius excepta; & præter eas leges, quæ ipsi Principi nec conueniunt: nec accomodari possunt; ut leges statutaræ pro futoribus, vel sartoribus, de non utendis vestibus sericis, de non portandis armis &c.

I. Concl. Vbi ipsa communitas leges condit, seu ubi Populus sui ipsius habet gubernationem; nec non ubi communitas gubernatur per Senatum, seu per aliquos Primates, communitas, & tales Primates obligantur directè suis



legibus. Prob. Nam singuli in particulari sunt inferiores, & subditi talis Communitatis, vel Senatus, sed certum est subditos directè obligari legibus suorum superiorum, ergo &c. Nec refert, quod ipsi cæteris coniuncti leges ferant, quia ut sic non sunt singuli in particulari, sed sunt ipsa communitas, vel Senatus, quam communitatem, vel Senatuum singuli in particulari habent supra se, tanquam suum superiorem. Ita passim Doctores.

II. Concl. Legislator, ut Rex, seu Princeps absolutus, tam civilis, quàm Ecclesiasticus non tenetur suis legibus, quoad vim coactiuam, benè tamen quoad vim directiuam. Hęc pariter est communis sententia, maximè Theologorum. Prob. quoad 1. p. Aliquem obligari legibus quoad vim coactiuam, nil aliud importat, quam à potestate superiori posse cogi, & puniri ob legis transgressionem: sed Princeps absolutus nullum alium superiorem agnoscit, quàm Deum; ergo non potest ab ulla potestate cogi, & puniri; non enim ab alio Rege, quia in parem non habet potestatem; neque idem Princeps in se ipsum; nemo enim dicitur habere in seipsum imperium coercituum; neque ab ipsa lege, cum lex non habeat talem vim coactiuam, nisi ex potestate ipsius Principis. Vnde legislator non incurrit pœnas suam legem transgrediens, quæ pro transgressoribus sunt ab eodem Principe absoluto, & independenti statuta. Prob. quoad 2. p. Aliquem ligari legibus secundum vim directiuam nil aliud est, quàm eas teneri in conscientia seruare; sed de iure naturæ membra se debent capiti conformare, illius leges obseruando: ergo & caput ex eadem lege tenetur membris accomodari simul cum illis proprias leges obseruando. Quare in l. C. de leg. habetur. *Digna vox maiestate Regnantis, alligatum se legibus Principem profiteri*: & cap. cum omnes de constit. *Quod quis quis iuris in alterum statuit, ipse debet uti eo*; & ibidem ex Cætone. *Potero legem, quam tu ipse tuleris*; & denique cap. iustum est d. 10. ex Isidoro. *Iustum est, Principem legibus obtemperare suis*.

Cæterum, licet Doct. omnes conueniant, Principem secundum vim directiuam teneri &c. discordant tamen in assignanda ratione talis obligationis. Quidam namque censent non desumi huius obligationis radicem directè, &

immediatè ex efficacia propriæ legis, sed quia est indecens, legislatorem non seruare quod alijs præscribit, quando subest ratio, qua stringit ipsum lex naturæ ad sui obligationem, quæ quidem obligatio cum sit iuris naturæ, videtur solum esse decentiæ, & honestatis. Ita Less. Azor. Bonac. & alij: immò Diana part. 11. tract. 7. varijs Iurisperitis citatis, resoluit, Principem supremum contraueniendo suæ legi absque scandalo, nunquam peccare mortaliter, quia tunc, inquit, illa naturalis æquitas non obligat grauius. Verum alij aliter sentiunt.

Dices, in l. Princeps ff. de lege dicitur, Princeps legibus solutus est. ergo non tenetur &c. Resp. legem allegatam, intelligi quoad vim coactiuam; non autem quoad vim directiuam.

## QVÆSTIO II.

*Vtrum Clerici teneantur legibus ciuilibus, &  
Religio si legibus Synodalibus.*

**N**Ot. 1. Quòd nomine Clerici veniunt omnes ij, quæ iuxta Ecclesiæ morem cultui diuino sunt dedicati; & in sortem diuinam vocati, quod fit per tonsuram Ecclesiasticam, aut ingressum approbatæ Religionis, siue quis sit professus, siue nouitius, aut conuersus, qui apud nos dicitur laicus, ut condistinguitur à Clerico religioso. Itaque omnes isti sunt exempti à potestate laica, & ciuili, ut clarè constat ex multis capitibus iuris, & ex Trident. sess. 25. c. 20. An verò hæc immunitas, seu exemptio sit de iure Diuino, vel Humano, controuertitur à Doct. communis tamen opinio, & probabilior est, esse huiusmodi immunitatem de iure humano; cum de iure Diuino non constet ex S. Scrip. aut Ecclesiastica traditione, maximè cum sit communis doctrina, Christum in noua lege non tulisse præcepta positiua distincta à Sacramentalibus. Similiter nec ratio naturalis, etiam supposita fide, dicat hanc exemptionem esse simpliciter necessariam, Quarè, ut notat Herinx, olim Ecclesia ex agris suis pendebat tributum Imperatoribus Christianis, ut patet cap. Si tributum 11. q. 1. & c. tributum 23. q. 8. Et quamuis talis immunitas à Principibus Ecclesiæ donata fuerit, non possunt tamen Principes

eam reuocare, sicut sine sacrilegio nequeunt agros semel donatos Ecclesiæ repetere; præsertim cum exemptio ista sit concessa etiam potestate Pontificia, nec non Conciliorum roborata, & firmata, cui nequit potestas sæcularis derogare. Itaque exemptio in materia spiritali est iuris D. in reliquis consona æquitati naturali.

Not. 2. Quod Ecclesiasticorum exemptio à legibus ciuilibus non ita latè, atque indistinctè protenditur, ut eximat ipsos ab obligatione, qua aliàs tenentur ex iustitia, atque ratione naturali; esset enim huiusmodi exemptio quodammodo irrationabilis; per quam Reipubl. membra (quales sunt etiam Ecclesiastici, & Regulares) in nulla re subderentur Principibus, & potestatibus sublimioribus, saltem ut alij ciues in ijs, quæ spectant ad iustitiam naturalem, quæ in bonum communis habet ordinare eius membra. Difficultas igitur non est de legibus repugnantibus libertati Ecclesiasticæ, sed de legibus, quæ decent etiam Ecclesiasticos; An ad eas seruandas teneantur quoad vim, dirrecliuam; certum est enim non teneri ex vi legis, seu quoad vim coactiuam; cum non possint cogi, ac puniri à Principibus, quorum non sunt subditi cap. Ecclesia Sanctæ Mariæ de constit. *Iurisdictio autem sine coactione inutilis censetur l. final. ff. de eo, cui mandata est iurisdictio.*

I. Concl. Clerici obligantur quoad vim dirrecliuam non minus, ac sæculares ad leges ciuiles generaliter latas, & bono publico utiles. Est communis sententia contra Nauar. conf. 3. de constit. putantem Clericos non obligari simpliciter legibus ciuilibus. Et contra Bonacin. & alios existimantes, Clericos ex sola æquitate naturali, nempe ex ratione conformitatis ad alia membra Reipubl. obligari ad leges ciuiles, ac proinde peccare venialiter tantum, si eas non obseruent. Excipiunt tamen contractus quoad valorem pretij, & similia, censentes in his grauiter peccare, sed contra legem naturalem iustitiæ. Prob. conc. Nulla apparet ratio eximendi Clericos à legibus non repugnantibus libertati Ecclesiasticæ; immò rationabilissimum est, ut Clerici quoad vim dirrecliuam illas obseruent, tanquam membra, & ciues, ergo &c. æquum est, ut huiusmodi legibus ligentur; alioquin maxima foret turbatio in laicorum commercijs cum Clericis, ut consideranti pater, ac proinde in  
re.

re graui peccant mortaliter. Immo Præpositus q. 95. disp. 4. dub. 3. & plures alij Theologi, & canonistæ, ut refert Herincx, existimant, vim obligandi Clericos fundari in approbatione superiorum. Et Salas cum multis alijs satis probabiliter tradit, Clericos ad similes leges ciuiles obligari directè ex vi ipsarum legum: ita etiam Bontempio.

Cæterùm Clerici legibus ciuilibus generaliter latis contraueniens non possunt puniri à potestate ciuili, sed à potestate ecclesiastica dumtaxat. Potest tamen Iudex sæcularis capere Clericum in fragranti crimine repertum, & ipsum ducere ad superiorem, ut tradunt noster Oritz in sum. c. 4. Nauar. in manuel. c. 17. Bonac. de leg. disp. 10. q. 2. p. 1. §. 1. & alij, quia in tali captura nihil fit contra immunitatem Ecclesiæ, ut etiam ostendit Diana tract. 2. de immunit. resol. 11. Similiter potest Clericus à Iudice sæculari capi ob delictum commissum ad effectum illum remittendi ad Iudicem ecclesiasticum; quia in tali casu, si de fuga sit suspectus capi, & carcerari potest Glos. in cap. cum non ab homine. Item quando agitur de delicto committendo, & tunc ut obuietur delicto futuro, potest capi. Abbas in cap. cit. Pariter si Clericus die, seu nocte incedat cum armis prohibitis, capi potest, & duci ad Iudicem ecclesiasticum, ut puniatur. Abbas cap. cit. & Couarr. pract. q. 33. An verò possit Princeps impedire Clericos ad transgressionem suæ legis paratos, dubium est. Et quidem Herincx affirmat, quia auferre à Clerico arma, aut merces, quæ contra prohibitionem defert, sic non est punire, sed solum impedire legis transgressionem, teste etiam Couarr, idque per viam puræ defensionis; licet arma, aut bona ablata non possint retineri, vel fisco tradi; Alij verò ut Megala in 3. p. lib. 3. c. 11. Alterius de cens. t. 1. Diana tract. 2. de immunit. resol. 16. relati à Malet. lib. 3. p. 1. tit. 70. negant, à Principe auferri posse triticum quod à Clericis extra territorium exportatur, quia Clericus vi coactiua non tenetur statutis laicorum.

II. Concl. Religiosi exempti, quales sunt Mendicantes, & plures alij, gaudent non solum immunitate Ecclesiastica communi; sed insuper non obligantur legibus Episcoporum, aut Synodorum etiam Prouincialium. It contra Lezanam, & nonnullos alios. Prob. Religiosi exempti non sunt

sunt propriè pars alicuius Diocesis, cum nulli Episcopo subiacent, sed immediate ipsi sum. Pontifici; & Sedi Apostolicæ, ut sapienter ostendit noster Rodriquez tom. 2. q. q. Reg. q. 63. art. 3. ubi solum excipit Legatos à latere, & illos, quibus super exemptos à Sede Apost. specialis delegatur facultas; prout etiam à Trid. conceditur Episcopis circa observationem festorum Episcopaliū, & nonnulla alia, ut videre est apud Rodriq. ergo Regulares non tenentur legibus supradictis: facit adhuc etiam regula iuris, nempe exceptio firmat regulam in contrarium, ergo cum Trident. facultatem specialem conferat Episcopis, ut in quibusdam obligare, & cogere possint Religiosos, consequens est ipsos esse à reliquis simpliciter exemptos.

Confirmatur. Quia status religiosus est planè disparatus, & specialibus legibus adstrictus, ac proinde inter Clericos, & ipsos non debet esse omnimoda conformitas; prout non obligantur nouitij ad obseruanda præcepta Professorum eò quod non sint in eodem statu cum professis; ergo nec Religiosi exempti obligantur legibus Synodalibus &c.

Quæres. An Clericus coniugatus gaudeat iisdem priuilegijs, & immunitate, quibus gaudet Clericus non coniugatus, Resp. Clericus coniugatus gaudet tantum priuilegio canonis, ut nimirum percutiens illum incurrat excommunicationem canonis. *Sequitur uadente Diabolo &c.* & fori quoad causas criminales, adeò ut pro illis nequeat trahi ad tribunal seculare, siue agatur criminaliter, id est ad vindictam, siue ciuilitè, id est ad reparationem damni illati, hac tamen lege, ut deferat habitum, & tonsuram, & non sit bigamus cap. 1. de Clerico coniugato in 6. & ex Trid. sess. 23. c. 6. Quoad causas autem ciuiles ortas ex contractu, vel quasi contractu non gaudet Clericus coniugatus priuilegio fori, sicut nec sunt immunes à gabellis, & tributis, & oneribus Reipubl. ideoquè contrauenientes possunt capi, & puniri à Iudice sæculari d. cap. de Clerico coniug. At mortua uxore censetur etiam immunis à solutione gabellarum, & gaudet omnibus priuilegijs, quibus gaudent Clerici. Abbas in cap. Clericus 2. n. 4. de vita, & honest. Clerici.

*Vtrum Aduena, & Peregrini teneantur legibus, tã proprij territorij, quam loci extra suum Territorium.*

**N**ot. 1. Quod nomen Aduena sumi potest dupliciter, nempe propriè, & impropiè; posteriori modo ille dicitur Aduena, qui non est ciuis, sed extraneus, seu externus; priori modo dicitur, qui ex uno longinquo loco in aliquod oppidum venit, teste Calepino verbo Advena. Nomen Peregrini pariter sumitur dupliciter, generaliter, & specialiter, seu largè, & strictè; largè, seu generaliter dicitur Peregrinus quicumq; ab aliquo exiens loco ad alium pergit; talis enim quousque ad suum locum redierit, peregrinari censeatur; strictè vero, seu specialiter appellatur, qui ad præsentiam Domini Papæ accedit, vel ad visitanda limina Apostolorum Petri, & Pauli, vel aliorum Sanctorum, ut notat Hostiensis lib. 2. in rubr. de peregrinantibus n. 1. Hinc liquidò patet Peregrinum largè sumptum non differte ab Aduena strictè accepto. Insuper nomine Vagabundi, seu Vagi, veniunt, qui nullibi domicilium fixum habent, in quo habitent, sed hinc inde vagantur, ideoque appellantur Vagi; ita Doctores.

Not. 2. quod Domicilium ex Iurisperitorum sententia sumi potest tripliciter, nempe natura, legis dispositione, & animo, seu voluntate incolæ; & coincidit cum alia diuisione ab ijsdem Doctoribus tradita, hoc est; Domicilium aliud est naturale, aliud accidentale, aliud & commune. Naturale est illud, inquit Soncin. cap. licet ratione n. 11. de foro competenti, & Alciatus in l. Prouincialis; quod ex ipsa natura nascitur, seu venit, ut natiuitatis propriæ, seu etiam Patris l. Ciues, ubi glos. C. de inculis, & hoc domicilium est imutabile. Accidentale est illud, quod comparatur assumptione, & vocatur domicilium habitationis, & facit inculas, ita Gaill. alios referens. Vnde ille dicendus est verus incola, qui in aliquam regionem domicilium suum contulit l. domicilium ff. ad municipal. & l. Pupillus §. Incola ff. de verb. signif. Tale autem domicilium amittitur pro voluntatis arbitrio, ut tradit Barr. in d. l. assumptio. Domicilium denique commune est Ro-



ma, quæ dicitur communis Patria i. Roma ff. ad municip. teste Marian Sonein. in d. cap. licet ratione.

Cæterum ut clarius ad nostrum propositum loquamur. Parochiani sunt ij, qui in Parochia habent domicilium, vel quasi domicilium; censentur domicilium habere in Parochia, qui in ea habitant, animo ibidem perpetuò manendi, etiam si iam primùm aduenerint, & quasi domicilium, qui in Parochia habitant maiori parte anni v. g. studentes in Vniuersitate, milites in præsijs &c. & Vagi, qui nullibi fixerunt domicilium, & ij sortiuntur Parochum loci, in quo diuersantur.

1. Concl. Nemo extra proprium territorium tenetur, vel ligatur eiusdem legibus. Hæc est communis sententia, & in praxi receptissima. Prob. ex cap. ut animarum 2. de Constit. in 6. ubi de statuto Episcopi, quo excommunicantur fures, dicitur. *Subditi eius iurum extra ipsius Diocesim committentes minime ligari noscuntur; cum extra territorium ius dicenti non pareatur impune.* Similiter refertur cap. illa dist. 12. dictum Aug. *Cum Remam venio, Sabbatoieiuno, cum Mediolanum, non ieiuno &c.* Prob. ratione. Quia legislator, tam Ecclesiasticus, quàm civilis non habet iurisdictionem extra suum Territorium, quod est quasi sphaera suæ actiuitatis; ergo nec eius lex vim habet ligandi, & obligandi eos, qui pro tempore morantur extra proprium Territorium. Tum quia rationabile videtur, quod lex sit regula quædam communis pro bona territorij gubernatione, instituta, & lata; ergo non debet extendi ad subditos alibi existentes. Quæ quidem doctrina est intelligenda etiam de illis, qui sunt in loco exempto, ut passim docent Canonistæ in cap. Cum Episcopus, quia talis locus se habet, ac si esset extra territorium. Dummodò tamen locus sit exemptus localiter, siue secundum se, ut sunt aliquæ Parochiæ, & oppida Pontifici, & Episcopo extraneo, vel Comiti exempto immediatè subiecta; in quibus indubiè cessat iurisdicção Ordinarij, non tantum personaliter, seu ratione Personarum, prout sunt loca Regularium exemptorum, in quibus non liberantur subditi ab obseruantia legum Territorij; etsi nonnulli oppositum sentiant, quorum opinio nullatenus est admittenda, inquit Herincx, quia sequeretur hoc manifestum absurdum, nimirum Seculares intra Claustra non

tene ri obseruari leges locales, seu Diœcesanas. Similiter verificatur hæc doctrina, & nostra conclusio etiam de ijs, qui ex industria proprium territorium ad tempus deferunt, ne videlicet teneantur abstinere ab opere seruili, ieiunare &c. eò quia tales utuntur iure suo, ac proinde existentes extra territorium licitè eximuntur ab obseruatione legis proprij territorij: Nec valet dicere; eos agere in fraudem legis; non valet, inquam, quia hic nulla fraus intercedit, sed nuda fuga obligationis præcepti, quæ non militat contra præceptum, cum nullus lege ieiunij teneatur manere in loco, ubi præcipitur ieiunare: ita Suarez, Sanchez, Bonac. Herincx, & quamplures alij. Hinc rectè infertur, delinquentem extra suam Diœcesim non incurrere censuram delicto annexam ex lege Diœcesana; nec in reservationem peccato positam; ac proinde delinquens potest ibi saltem absolui ab ordinario Confessario; Immò nec ulla difficultas apparet, quin possit etiam à Confessario suæ Diœcesis absolui, si pœnitens dicat, se huiusmodi peccatum extra territorium perpetrasse, quia sicut reuerà non censetur reseruatum extra, ita non afficitur reservatione ex eò, quod fateatur in proprio Territorio.

II. Concl. Probabile est, Peregrinos, & aduenas existentes extra proprium Territorium non obligari ad leges particulares loci, in quo sunt. Ita noster Villalobos, Sanchez Reginal. Granado, & Diana p. 1. tract. 10. ref. 13. & 15. plures alios citans. Prob. Quia legislator non habet potestatem, seu iurisdictionem in extraneos sibi non subditos, quales sunt peregrini, & aduenæ, qui in loco, in quo degunt, non habent domicilium, nec quasi domicilium, ut potè, cum non intendunt maiori anni parte ibi permanere, sed peractis negotijs ad proprium domicilij sunt redituri. Tum quia tales non sunt partes communitatis, in qua sunt; ergo non ligantur legibus, quæ pro ista sola communitate feruntur. Quod autem nonnulli extendant etiam ad peregrinos, qui pro maiori parte anni illic morantur, modo sedem ibi non figant animo perpetuò manendi; talis opinio communiter reputatur nimis laxa.

III. Concl. Probabilius est, Peregrinos, & Aduenas tene ri ad obseruantiam legum, quæ præscribuntur in ijs locis, in quibus sunt, etiam tantum per modum transeuntis.

Prob. solet conclusio ex dictis D. August. & signanter ex vulgatis versibus.

Si fueris Romæ Romano viuito more.

Si fueris alibi, viuito, sicut ibi.

Et etiam ex quadam responsione D. Amb. data D. Aug. Sed probatur ratione. Si Peregrini, & Aduenæ non ligarentur legibus loci, in quo sunt, hoc esset, vel quia legislator non haberet potestatem illos obligandi, vel quia non intenderet eos in lege comprehendere, non primum, quia ex communi Doctorum consensu constat peregrinos legibus territorij quoad contractus, & formas in iudicijs seruandas de facto obligari; ergo non ex defectu potestatis in Principe. Neque secundum; quia sicut illa legum à peregrinis obseruantia ad bonum commune, idest ut se moribus conforment apud quos viuunt, conducit; ita legislator bonum commune intendens in sua lege, censetur illos comprehendere. Tum quia iuxta regulam iuris in 6. *Qui sentit commodum, debet sentire & onus*; ergo rationabile videtur, ut peregrini subiciantur legibus locorum, in quibus degunt; alioquin nullis legibus peregrini extra proprium territorium ligarentur, quod est manifestum absurdum: qua ratione etiam Vagi, ne soluti vagentur ab omnibus legibus, ex sententia communi tenentur legibus locorum, per quæ transeunt. Quare à fortiori habet locum nostra conclusio; quando peregrini, & aduenæ veniunt ad locum, ubi seruatur ius commune, quod in suo territorio ob contrariam consuetudinem non ampliùs viget, cum ubicunque reperiantur, sint absque dubio subiecti iuri communi, à cuius obseruatione per accidens excusabantur manentes in proprio territorio. Similiter malè operantur, qui in vigiliâ S. Bartholomæi, quæ e. g. Pisauri fit die 24. Augusti, & Fani 23. eiusdem Mensis, pergunt die 24. ad festum Fani, putantes esse solutos à ieiunio, quia reperiuntur Fani, ubi non vigilia, sed festum celebratur; eo quia ius commune Ecclesiæ obligat ad ieiunandum in vigilia S. Bartholomæi, siue fiat die 23. siue die 24. Crederem tamen, euntes ad Fani Ciuitatem iustis de causis posse vigiliam anticipare, nimirum ieiunando die 23. & sic ius commune seruare.

Arg. cont. 1. concl. & præsertim contra id, quod additur,

tur, posse videlicet de industria quemlibet deferere proprium Territorium &c. Non videtur licitum esse, dare operam ludo pilæ, venationi &c. ea intentione, ut quis per similia factus impotens, non ieiunet, ergo nec est licitum exire e proprio territorio ea intentione, ut à ieiunio liberetur. Resp. neg. conf. est enim latum discrimen, quia exiens extra territorium vult quidem, & intendit facere, quod præcepto ieiunij prohibetur, sed non ubi, & quando dictum præceptum obligat, sed ubi, & quando cessat omnino obligare, idest extra Territorij limites; secus autem ludens pilæ &c. cum voluntariè se impotentem reddat ad ieiunandum, ut non ieiunet; ac proinde non vult ieiunare ubi, & quando præceptum ieiunij per se obligat.

Arg. cont. 3. conc. In cap. à nobis 21. de sententia excommun. dicitur sententia excommunicationis generaliter latam in furtum comittentes, non nisi subditos obligare; ergo non peregrinos &c. Resp. Herincx cum alijs: In cit. cap. non agi de pœna imposita per legem, sed per sententiam generalem, & præceptum, quod non respicit locum, sed personas, ac proinde non solet comprehendere nisi Personas simpliciter subditas: lex autem solet immediate respicere territorium, & eo mediate personas, ideoq; obligare potest personas repertas in territorio, estò non sint absolutè subditi.

Quæres 1. An proficiscens e proprio territorio, in quo est festum ad aliud territorium, in quo non est festum, teneatur ante exitum in suo territorio missam audire.

Resp. Variant doctores; quidam enim asserunt, quod si in proprio Territorio fiat unum tantum sacrum, idquè celebretur antequam ille exeat e territorio, teneri illud audire, nisi habeat intentionem alibi missam audire. Ratio, quia obligatio audiendi missam tunc urget. Alij dicunt, cum, qui e loco, ubi festum celebratur, egreditur, ipsa die, ut pergat ad locum, ubi non est tale festum, non obligari ad missam manè audiendam; si ante meridiem peruenturus sit ad locum, ubi festum non celebratur. Ratio, quia in proprio loco poterat missæ auditionem differre usque ad horam diei duodecimam, quo tempore existens in alio loco liber est à præcepto audiendi missam: ita Sanchez, Malder. Caspenfis, & alijs: contrarium tamen sentiunt Sayrus Filiuc. noster Bontempio, & alijs.

**Quæres 2.** An pergere volens extra proprium territorium, ubi est dies ieiunij, ad aliud, in quo non sit ieiunium, possit comedere carnes, ientaculum sumere mane, si sciat vespere futurum esse in loco, ubi non ieiunatur.

**Resp.** Doctores omnes conueniunt non posse carnes comedere, quia obligatio abstinendi à carne est præceptum negatiuum, ac proinde semper, & pro semper obligat, & potest integrè adimpleri quolibet momento, sicut quolibet momento obligat. Difficultas igitur solum remanet de ientaculo, cui Doctores passim respondent affirmatiuè, et si nonnulli contradicant. Ratio est, quia, cum præceptum de ieiunio sit indiuisibile, hoc est, obligans pro integro die, & non pro aliqua parte tantum, sequitur, quod is, qui una parte diei non obligatur ad ieiunium ut in proposito, nec teneatur reliquis diei partibus; non enim tenebitur ad ieiunium perueniens vespere ad locum, ubi ieiunium non seruatur, ergo neque tenetur mane, sed ientare poterit.

Cæterum notant passim Doctores, quod, ut subditus extra territorium ligari non possit, debet esse extra territorium non solum ratione suæ personæ, sed etiam ratione rei, circa quam operatur, ipsiusque operationis. Vnde manet obligatus legibus territorij rem ipsam afficientibus, v.g. tenetur quis soluere tributum ex prædio, quod habet in alieno territorio; similiter Clericus beneficiatus tenetur legibus alterius territorij concernentibus beneficia, quæ ibidem obtinet, ac proinde pœnas, etiam excommunicationis, suspensionis ibi statutas pro non residentibus, incurrit. Res namque præcepta afficit territorium, & ratione illius censetur ibidem peccatum personæ alibi existentis moraliter consumari. Idem dicendum de eo, qui extra territorium existens occidit existentem intra territorium: is enim verè delinquit in territorio, ac proinde censuris contra sic delinquentes ligatur.

#### QVÆSTIO IV.

*Vtrum pueri, Amentes, & Ebrj teneantur legibus:*

**N**ot. Quod licet omnibus sit exploratum, infideles nullis ecclesiasticis legibus teneri, cum non sint subditi  
Ec-

Ecclesiæ, quam nemo ingreditur nisi per baptismum; hæretici tamen omninò adstricti sunt legibus ecclesiasticis; estò enim in pœnam suæ rebellionis sint extra Ecclesiam eiekti; cogi tamen possunt ab Ecclesia, ut regrediantur, ad quod continuò obligantur, & interim ligantur eius legibus, & indubiè peccant toties, & quoties eas transgrediuntur. Hinc patet responsio ad quæstionem, quam mouet Caramuel. in Theol. fund. t. 1. fund. 19. q. 2. videlicet Catholicos inter hæreticos conuersantes teneri legibus Ecclesiasticis, cum nemo se possit conformari consuetudini iniquæ, pertinaciter introductæ contra mentem Ecclesiæ Catholice, quæ suos subditos leges non obseruantes punit.

I. Concl. Infantes ante rationis usum nulla lege ligantur humana, vel diuina, vel naturali; sicut nec ulla lege in actu secundo obligantur perpetuò amentes. Ratio est manifesta. Quia lex est regula actuum humanorum, idest, elicitorum cum præuia cognitione; sed in carentibus usu rationis talis cognitio non reperitur, ergo non tenentur. Idem dicendum de inculpabiliter ignorantibus, dormientibus, & inculpabiliter ebrijs pro eo tempore, quo in tali statu existunt. Vnde Doct. tradunt, pueris, aut Amentibus dari posse carnes comedendas in quadragesima; nec peccare Parentes, vel alios impediendo illos ab audiendo Missam die festo; secluso scandalo; talis enim cooperatio nec quidem materialiter est mala; cum non sit actus illicitus, quoad Amentes autem putat Castro Palao de leg. disp. 1. punt. 24. licitè illis ministrari cibos vetitos, non quia carent ratione, sed quia amentia est infirmitas excusans à ieiunio: Verùm ratio assignata conc. militat etiam in Amentibus. Cæterum non esse licitum, ebrijs, vel Amentibus etiam perpetuò incitare ad copulam carnalem, aliosque actus iure naturæ omnibus illicitos, & in se respectu omnium malos, nulli dubium esse potest.

II. Concl. Dum pueri peruenerunt ad rationis usum (quod censetur communiter esse circa septennium) statim incipiunt subijci legibus etiam Ecclesiasticis, generaliter omnes respicientes; præterquàm legi ieiunij, & communionis; immò & censuris, ac pœnis ab homine latis *cap. 1. de delictis puerorum*: & insuper non comprehendendi censuris à iure, vel generaliter latis putat cum alijs Castro Pal.



estò opinio contraria sit communis; excipiens solummodo excommunicationem à iure latam in percussorem Clerici *ex cap. super eo. & cap. Pueris; quamvis de sensent. excom.*

Aduertendum tamen, quod ly, statim, in conc. positum non est sumendum physice, sed moraliter, maxime circa præcepta Ecclesiastica. Siquidem pia Mater Ecclesia non videtur pueros obligare v. g. ad Missam audiendam statim atque sunt capaces rationis, nisi ad summum sub veniali ob apprehensionem adhuc imperfectam tum mysteriorum, tum ipsius præcepti. Ex quo fit, ut facile negligant præceptorum requisita: Ideoque Jacob. Marchant. in resol. pastoral. putat, eos tantum sub mortali obligari ad Missam audiendam, quando capaces sunt ad Eucharistiam recipiendam: quod plerumque fit circa annum 10. vel 12. Idem asserit Sotus de præcepto confessionis annuæ. Verum videtur, hæc potius relinquenda esse determinationi seu iudicio prudentum Confessorum; nec non Parentum. Præterea censent nonnulli pueros post septennium, vel circa ligari præcepto diuino Confessionis in mortis articulo; posito, quod aliquid egerint, cui possit subesse peccatum mortale; idque ob periculum damnationis æternæ: & quidem id multum prodesse potest, adeoque omitti non debet à Parentibus, & Parochis.

## QVÆSTIO V.

*Vtrum leges humanae tam ciuiles, quàm Ecclesiasticae obligent in foro conscientiae.*

**N**OT. 1. Quod hæretici Vualdenses, ut notat Guido lib. de hæresibus tenuerunt, quod nullæ leges humanæ in foro conscientiae obligare possunt, nec qui eas transgreditur sit reus culpæ apud Deum; eundem errorem suscitauerunt Io. VViclef, & Io. Hus, quos secutus est Calvinus lib. 4. Instit. cap. 15. ubi etsi concedat Prælatos, & Magistratus politicos posse leges aliquas ad conseruationem pacis inter ciues præscribere, negat tamen, eas in conscientia obligare. Cum conscientia, inquit Calvin. soli Deo subdita sit; ideoq; ab eo solo ligari, seu lege coerceri possit; contra quos stat definitio Concil. Constant. sess. 8. & 15. & Bulla Leonis X. contra Lutherum.

NOT. 2.

Not. 2. quod etiam inter Theologos est maxima controuersia circa præsentem quæstionem. Quidam enim, ut Gerson, Almain. & nonnulli alij asserunt; solum Deum obligare in conscientia, quorum sententia, ut sonat, accepta, culpatur erroris; eam tamen nititur explicare, & Doct. recensitos à censura liberare noster Petrus Marchant. t. 2. sui Tribunalis tract. de leg. ubi sic loquitur. Colligitur 3. Nonnullos parum prudenti oculo respexisse Gersonem cum Almaino, & alijs, dum temeritatis, & erroris eos arguunt, ex eo, quod docuerint solum Deum posse obligare ad culpam in foro conscientiæ; quasi ex eo necessariò inferratur Ecclesiam. & Sum. Pontificem non posse, quod verè erroneum esset, in conscientia obligare. Si enim attendissent Vicariam potestatem agere in virtute principalis, & præcepta Ecclesiastica, quæ à Vicario Christi procedunt, à potestate spiritali procedere, quæ idem forum cum Deo participat, non iudicassent absurdum cum Gersone asserere, solum Deum obligare ad culpam in foro conscientiæ: cum participatæ potestatis D. sit, quod Ecclesia ad culpam obliget. Hactenus Marchant. Alij contendunt leges ciuiles non posse obligare in conscientia, sed leges Ecclesiasticas tantum; quia hæ immediatè à Deo deriuantur, illæ ab hominibus immediatè. Ita Almai. de potest. Eccles. quam sequitur Vulpes, ut refert Mastrius in Theol. moral. Alij denique legem humanam non solum Ecclesiasticam, sed etiam ciuilem, & temporalem vim habere obligandi in conscientia: ita communiter Theologi, Iurisperiti, & summissæ.

I. Concl. Lex humana, tam ecclesiastica, quam ciuilis vim habet obligandi subditos in conscientia. Hæc est de fide definita in Concilio supra allegato contra hæreticos: & perspicuè habetur in S. Scrip. & præsertim ad Rom. 3, *Omnia anima potestatibus sublimioribus subdita sit, non est animi potestas, nisi à Deo &c.* & subdit; *Subditi estote, non solum propter iram, sed etiam propter conscientiam*, hoc est, non solum ob pœnam à Iudice infligendam, sed etiam ob culpam in Anima.

Prob. etiam ratione. Quilibet legislator humanus accipit à Deo immediatè potestatem regendi, posita electione communitatis, quia dicitur sap. 6. *Audite Reges, quoniam data est à Domino potestas vobis*, & Prouerb. 8. *Per me Reges regnant*:

orgo cum imperant, nomine Dei imperant, ac proinde vim obligandi in conscientia habent. Quæ doctrina à fortiori militat in Principe, seu Prælato Ecclesiastico. Quare Ecclesia in suis præceptis obligat in conscientia ad eorum observantiam, etiam secluso contemptu, scandalo, aut consuetudine transgrediendi; nec audiendi sunt, qui oppositum dixerunt, cum à DD. passim censura meritò notentur.

II. Concl. Lex humana, siue Ecclesiastica, siue ciuilis, supposita grauitate materiæ, & finis legis, obligat sub peccato mortali, quando legislator id expressè, vel æquiualentè declarat. Hæc pariter est communis; & pater; quia tunc adest potestas, & Voluntas sufficienter intimata. Si quidem hanc suam voluntatem legislator Ecclesiasticus declarat, quando expressè dicit: sub reatu peccati mortalis, vel quando addit in lege: sub interminatione diuini iudicij, sub pœna maledictionis æternæ, sub indignatione Dei, & SS. Apostolorum, in virtute sanctæ obedientiæ &c. Insuper appositio grauis pœnæ spiritualis, qualis est, excommunicatio maior, suspensio totalis, & totalis interdicti, degradatio, depositio, priuatio omnium beneficiorum, officiorum, inhabilitas per modum pœnæ, priuatio ecclesiasticæ sepulturæ; huiusmodi namque pœnæ non infliguntur nisi ob peccata mortalia, saltem probabilius; ac proinde sunt signa grauis obligationis. Notant tamen non pauci Doctores, quod tales pœnæ sint sententiæ latæ; nam si dictæ pœnæ essent solum, præmissa aliqua monitione, ferendæ, tunc ad earum incursionem deberet interuenire contumacia; unde ex ijs ut sic non posset sufficienter colligi, actum præteritum secundum se spectatum fuisse mortalem; sicut nec colligitur ex eo, quod legi sit apposita pœna excommunicationis minoris; quæ ob solum peccatum veniale incurri potest; secus autem si aliquid prohibeatur sub pœna irregularitatis, cum hæc iuxta probabiliorem sententiam supponat peccatum mortale; si per modum pœnæ ob delictum irrogetur; Quàmuis nonnulli apud Dianam p. 1. tract. 10. de leg. res. 21. id adhuc negent quoad suspensionem; & aliqui quoad irregularitatem; Immo Valentia, Solonius, & alij apud Dian. volunt, suspensionem, interdictum, & irregularitatem ob solum peccatum veniale incurri posse; sed de hoc in part. 4. in tract. de censuris.

Adde,

Adde, quod quædam leges ecclesiasticæ sunt purè pœnales, ac proinde non ad culpam, sed ad solam pœnam obligant, ut colligitur ex illo Decreto Pij Papæ, & martyris; pœnam statuentis in Sacerdotem, cuius negligentia aliquid de Sanguine Domini in terram deciderit, in quo decreto nulla culpa imponitur; & generaliter mihi certum est, inquit Ferrus Marchant. omnes illas leges pœnales Ecclesiæ non obligare ad culpam, quando vel pœnæ ex natura legis non habent culpam annexam, vel quando materia legis aliàs nullum peccatum includit, ut sunt pœnæ irregularitatis ex defectu, bigamiæ &c. Immo quam plures censent, satis probabile, quod si lex Ecclesiastica solam pœnam temporalem statuatur, sub ea tantum obliget; ratio est, quia legislatores ecclesiastici possunt, & solent comminari pœnam spiritualem, dum in conscientia, & sub mortali obligare intendunt.

III. Concl. Quamvis in lege civili pœna etiam gravis taxetur, & ipsa etiam materia sit gravis; non ob id statim iudicandum est, legem obligare sub mortali. Ita noster doctissimus Villalobus, Nauar. Valent. Mirand. in suo Manuali, & ex parte sequitur Caspensis Castro Palaus tract. 3. d. 1. punct. 15. Diana p. 10. tract. 15. ref. 46. Franciscus Bonæ spei, & alijs. Ratio est quia cum leges civiles absolute loquendo sufficienter consequi possint finem suum, pacem nimirum externam, & publicam tranquillitatem, comminando pœnas temporales, rationabiliter præsumitur, eos nolle aliud onus imponere transgressoribus suarum legum, quàm subeundi pœnas præscriptas; ergo &c.

Confirm. eò quia, dum non constat de mente legislatoris, debemus in benigniorem partem legem interpretari, iuxta regulam illam l. benignius; ergo cum non appareat in lege intentio legislatoris obligandi ad culpam, censendum est ad pœnam solam obligare; nam qui ex duobus propositis alterum tantum affirmat, alterum negare videtur l. cum Prætor ff. de iudic. cap. Non de presumptione, ergo legislator, qui ad pœnam temporalem obligare potest, & etiam ad æternam, si exprimat in pœnâ temporalem tantum, non apparet voluisse obligare ad æternam. Accedit etiam, quod consuetudo communis sic interpretatur leges pœnales, ut satis sit, si homo pœnas luat pro transgressione; nec Principes

pes unquam expreſſerunt in ſuis legibus pœnâlibus, velle obligare ſubditos ad culpam theologicam; ergo, ipſa conſuetudine interpretante, leges huiuſmodi ſolùm obligant ad pœnam temporalem; quantumvis ſit grauis, qualis eſt mœrtis pœna, bonorum conſiſcacio &c. Ex qua doctrina euidenter deducitur, non peccare mortaliter eos, qui merces veritas traducunt ex una Prouincia in aliam abſque ſolutione gabellarum, & vectigalium, quæ à Principe præſcribuntur, nec teneri ante Iudicis ſententiam ad reſtitutionem, quia ut eleganter aduertit Perrus Marchant. t. 3. ſui tribunal. Rex, vel Princeps in impoſitione gabellarum, tantam taxat pœnam, quæ prudenter conſiderata ſufficit ad damnum reparandum, quod ex defraudatione gabellarum euenire poteſt. Nec reſert, ſubdit Doctor, quod defraudens gabellam ſaltem voluntariè dat cauſam damno, cui incertum eſt, an per deprehenſionem fraudis prouideri poterit, quia omnium canonistarum calculo Regi nihil plus, aut minus aduenit, ſiue gabellæ defraudentur, ſiue non: Nam publicani, & Collectores non plus reddent Regi, quàm quod conuentum eſt, ubi gabellas à Rege conduxerunt; Nec ipſis Collectoribus damnum inferitur, quia ſola conſideratione damnorum, quæ inferri poſſunt, multò minori prætio illas emerunt, & obtinuerunt. Accipientes inſuper in ſuum commodum, & lucrum quicquid à defraudantibus per vigiliam ſuam accipere poſſunt, & ſic nulli aliquid perit. Prob. conc. quoad 2. p. Ex illa Regula iuris.

*Adiones agentium non operantur ultra eorum intentionem* ergo legislator non intendens obligare, etiamſi materia ſit de ſe grauis, lex non obligat ſub graui culpa; Quicquid dicat Vaſquez exiſtimans, legiſlatorem humanum non poſſe in graui materia obligare leuiter, ſicut in leui materia non poteſt obligare grauiter; non enim hæc pari paſſu currunt, ut conſideranti patet.

Atg. Nullus poteſt obligare, ubi non poteſt iudicare; ſed homo iudicare nequit, quod latet in aliorum conſcientia, ergo nec etiam ligare poteſt in conſcientia. Deinde homo non poteſt infligere pœnam æternam; ergo nullus legiſlator poteſt ſaltem obligare ad culpam mortalem, ad quam neceſſariò ſequitur pœna æterna. Reſp. diſting. mai. nullus homo &c. ſua poteſtate abſoluta, & ſimpliciter

conc.

conc. mai. potestate humana, quatenus ab æterna, & naturali lege Dei, & ipsius ministerio fungitur, teste Apost. ad Rom. 13. *Non est potestas nisi à Deo*, neg. mai. Ad aliam rationem distinguo ant. homo non potest infligere pœnam æternam directè, & immediatè, conc. ant. indirectè, hoc est quatenus potest suis legibus obligare ad culpam mortalem &c. neg.

Arg. 2. Potestas ciuillis est corporalis, ergo nequit obligare conscientiam, quæ est spiritualis, cum eius finis sit pax temporalis Reip. & non pax conscientie, & pax æterna. Resp. neg. cons. obrationem superius assignatam; quia etiam leges ciuiles diuina lege præcipiuntur obseruari, & certè multum conducit ad pacem externam Reip. potestas obligandi in conscientia, cum per hanc obligationem arceantur fideles à transgressionem legum. Itaque quamuis finis legis ciuilis sit pax externa, attamen in conscientia nos obligat, ut hanc pacem seruemus.

Arg. cont. ult. conc. à Thomistis, asserentibus, legem, etsi pœnalem, nisi aliter constet de mente legislatoris, obligare in conscientia auct. S. Scrip. Prima desumitur ex Epist. 1. D. Petri c. 2. ubi dicitur. *Subiecti estote omni creatura propter Deum*, & paucis interpositis, concludit, *quia sc. est Voluntas Dei*; & infra subdit. *Serui subditi estote in omni timore Dominis, non tantum bonis, & modestis, sed etiam disculis*. 2. desumitur ex Apost. ad Rom. 13. *Non est potestas nisi à Deo, quæ resistit potestati, Dei ordinationi resistit*. Et ne quis sibi blandiatur interpretando huiusmodi scripturas allegatas obligare quidem ad pœnam, non autem in conscientia, in eadem Epist. vers. 4. dicitur. *Idèò necessitate subditi estote non solum propter iram, sed etiam propter conscientiam; ideo, & tributa præstate. Reddito ergo omnibus debita, cui tributum, tributum, cui vestigal, vestigal*. Quod prius præceperat ipsemet Christus Matt. c. 22. dicens: *Reddito ergo, quæ sunt Cæsaris, Cæsari &c.* Resp. allatas auctoritates significare Principes posse, si velint obligare suis legibus subditos in conscientia; at an de facto in legibus non præceptiuis, sed pœnalibus obligent, vel nec ne; negamus iuxta fundamentum conclusionis. Et quidem quoad tributa non possunt Principes obligare subditos in conscientia, nisi quatenus ad sustentationem Principis, & Reipublicæ sunt necessaria. Verùm



nostris temporibus. interpretante consuetudine, non obligant, vel etiam ex alio capite, nempe, quia proprium est legis humanæ ut humanæ obligare ad penas temporales, etiam usque ad mortem corporis. Quare in hoc sensu locutus est Christus; *Reddito quæ sunt Cæsaris, &c.* expendo (ly quæ sunt) idest quæ iure naturæ debentur Principi ratione sui status, & ratione seruandi Rempublicam &c.

Dices. Patres videntur passim damnare transgressores legum humanarum ut habetur *Cap. Imperatores. 1. q. 3.* Resp. Patres loqui de legibus, tam præceptiuis, quam penâlibus, supposita earum iustitia, & voluntate Principum obligandi; quia legum obseruatio multum conducit ad bonum regimen Reip. ad quietem, & populi pacem, sicut earum transgressione multa incomoda, & perturbationes in Republica eueniunt, maximè resistendo potestati &c.

Arg. ratione. Leges penâles sunt veræ leges, sed comperitum est de ratione legis esse præcipere, vel prohibere, ac proinde ad culpam obligant; quia pena correspondet culpæ: ergo, si infligitur pena, prius supponitur culpa.

Resp. leges penâles, ut infra ostendetur, non esse veras leges in rigore, cum obligent tantum ad penam; sicut etiam obligare solent Religiosorum constitutiones, quas nemo dixerit, esse consilia. Itaque correspondet in lege solùm penâli culpa iuridica, seu ciuilis non verò theologica, & in hoc sensu verificatur maxima &c.

Quæres 1. Vnde dignosci possit leges obligare in conscientia, vel nec ne, & maximè ad mortale.

Resp. per sequentes regula. Prima regula fundatur in intentione legislatoris. ut supra etiam indicauimus; nam leges à voluntate legislatoris sumunt vim obligandi, vel non. Itaque, si legislator expresse declarat suam intentionem obligandi, vel non obligandi, standum est suæ intentioni declaratæ. Quod si de mente eius non constat, ex verbis in lege positis, poterit eius mens deprehendi. Vnde sit Regula 2. assignata à Clemente V. in Clement. Exiui de Paradiso. Quidquid per verbum præcepti statuitur, aut inhibitionis, aut alicuius æquipollentis præcepto, aut inhibitioni, obligat ad culpam. Vnde verba præceptiua, qualia sunt, præcipio, impero; item iubeo, mando, aut verba inhibitoria, qualia sunt, prohibeo, inhibeo, vcto, inter-

dico sunt signum sufficiens grauis obligationis, ut tradunt Doctores communiter, & declaratur in allegata Clementina, quæ etsi agat de regula S. Francisci, habet tamen hac in parte, ut inter alios notat Herincx, vim iuris communis, cui est inserta. Idem sentiunt Doctores post Clement. cit. de verbis præcepto æquipollentibus, cuiusmodi sunt v. g. omnes obligentur, teneantur, nemini liceat, nemo possit &c. De verbo, debeo, communis sententia docet, importare non solum honestatem, & cōuenientiam rei, sed etiam necessitatem imperij, secus autem de hoc verbo oportet, & de verbis imperatiui modi v. g. facite, caute, nemo audeat &c. Quamuis ex circumstantijs, siue attenda materia, & usu, sufficiant, ut declaratur in Clement.

Regula 3. Verba communia, & indifferentia præcepto, & exhortationi, qualia sunt, volumus, decernimus, ordinamus, statuimus, sancimus &c. per se loquendo non sufficiunt ad præceptum, nisi ex circumstantijs, aut verbis adiunctis restringantur ad rigorosum præceptum.

Regula 4. Non obligant ad culpam leges pœnales, quæ neque præcipiunt, neque prohibent, sed sub hac forma feruntur, qui hoc, vel illud fecerit, & similia, soluat hanc, vel illam pœnam.

Regula 5. Grauitas, vel leuitas materiæ, circa quam lex versatur, est signum obligationis leuis, vel grauis. Grauis autem materia censetur hic non solum illa, quæ per se, & absolutè spectata semper, & in omni euentu talis est, sed etiam illa, quæ licet secundum se, præcisè considerata sit leuis, nihilominus ratione circumstantiarum, loci, temporis &c. grauis euadit, quia in his, vel illis circumstantijs plurimum confert ad bonum commune.

Regula 6. Grauis obligatio dignoscitur etiam ex consuetudine, quando videlicet communis usus legem ita recipit; nam consuetudo est optima legum interpret.

Regula 7. Quotiescunque verba sunt dubia, ex quibus vir prudens, attentis circumstantijs, nequeat iudicare, an in lege sint signa sufficientia voluntatis obligatiuæ legislatoris, iudicandum est pro non obligatione: & quoties dubitatur de obligatione, an sit grauis, vel leuis, iudicandum est, esse leuem; iuxta reg. 30. iuris in 6. *In obscuris minimum est sequendum; & in culpis, uti in pœnis benignior est interpretatio*

*facienda* reg. 49. in 6. cum melior tunc sit conditio subditi suam libertatem possidentis; qua in dubio non est privandus.

Quæres 2. An leges fundatæ in præsumptione obligent in conscientia, veritate in contrarium inspecta.

Resp. Quod duplex est præsumptio iuris, alia iuris tantum, alia iuris, & de iure. Prior est, cum ius in aliquo facto dubio præsumit, sed super illud nil statuit; ut in his: *Semel malus, præsumitur malus de reg. iur. in 6. Quilibet præsumitur bonus cap. final. extra de præsumpt.* Posterior est quando ius præsumit super incerto, ex aliquibus coniecturis adeo ut super illo statuatur aliquid ac si verissimum esset, ut in casu cap. is, qui extra de Sponsal. ubi dicitur quod si quis carnaliter cognovit sponsam de futuro præsumitur; quod secum voluerit contrahere matrimonium per verba de præsentibus; contra hanc non admittitur probatio in contrarium, bene tamen contra illam. Adde, quod datur alia præsumptio, quæ dicitur præsumptio periculi. Itaque leges fundatæ in præsumptione iuris simpliciter non obligant in conscientia, quia sunt velut leges conditionatæ, ac proinde deficiente conditione, deficit earum obligatio; leges verò fundatæ in præsumptione iuris, & de iure, & pariter in præsumptione periculi obligant in conscientia. Ratio prioris partis est, quia sic lex pro bono communi disponit; ac proinde, etiam veritate in contrarium inspecta, tenetur quis ad eius observantiam, ut in casu proximè allato ex canonico textu; quidam tamen aliter sentiunt, ut habetur infra in quæsito 2. q. 3. disp. 6.

Ratio posterioris est; nam ad iustificationem huiusmodi legum, quæ fundantur in præsuppositiva præsumptione, satis est, ut factum sit dubium, & ex illo aliquid mali possit evenire e. g. Si apud sæculares fieret aliqua lex, ut cum infidelibus nullo modo communicarent, seu apud Religiosos, ut fieri interdum solet, quod nullus ingrediatur talem Domum, vel per siluam deambulet propter mala, quæ fortasse exinde possent nasci, obligarentur in conscientia, & sæculares non communicare cum infidelibus, & Religiosi non ingredi domum, vel per siluam ambulare; etsi hic, & nunc in aliquo nullum periculum mali adesset; sufficit igitur, quod ut plurimum in similibus actibus pericula  
ma-

mali adfint, seu nata fint ad esse, ideoque generaliter sunt iustè prohibiti; ut ex communi tradunt Hierinex, Miranda, & Marchant. sic discurret. Quia lex fertur ad auertendum malum commune, & tollendam omnem occasionem generaliter: quod, sicut in commune est magnum Ecclesiæ bonum, sic eius oppositum æstimatione mali, quod contingere potest, est grande malum, & materia grauis, & sufficiens ad obligandum ad culpam mortalem.

Quæres 3. An lex humana obliget cum periculo vitæ.

Resp. quod quamuis lex humana regulariter loquendo non obliget ad sui obseruantiam cum periculo vitæ, aut magni alicuius nocumenti temporalis, ut docent Doct. on nes; potest tamen in certis casibus obligare ad actus, quibus etiam gratie vitæ periculum annexum est; unde quod lex debeat esse moraliter possibilis, siue non, & difficilis nimis, non est necessarium ad legem pro quibusdam casibus particularibus. Quorum primus est. Quando violatio legis humanæ cederet in contemptum fidel, Religionis, aut Ecclesiasticæ potestatis, aut etiam ciuilis legislatoris, ut legislatoris. Ratio est, quia plurius interest, fidem, Religionem, potestatem Ecclesiasticam, & ciuilem non contemni, quàm vitam corporalem non seruari; nam tales contemptus cedunt in detrimentum honoris Dei, qui omnibus rebus creatis præferri debet.

Casus 2. est, quando obseruatio legis humanæ plus confert communi bono Reipublicæ, aut Religionis, quàm conseruatio vitæ propriæ æstimetur; vel e contra quando violatio legis humanæ plus nocet communi bono, quàm propriæ vitæ amissio. Sic miles in statione tenetur cum vitæ periculo vigilare, & pugnare contra hostem; Similiter si quis ab hæreticis, aut infidelibus urgeretur diebus ab Ecclesia prohibitis manducare carnes sub pœna mortis, tunc mortem potius subire tenetur, quàm carnes manducare. Secus autem, si à peruersis hominibus catholicis cogeretur; quia tales non præsumuntur agere, in contemptum Religionis christianæ.

Casus 3. Interueniente scandalo; quo casu teneremur potius sustinere mortem, quàm transgredi leuissimam legem, exemplo Eleazaris, qui mortem potius eligere voluit, quàm simulare, se carnes comedisse lege prohibitas, ne adulescentes scandalizarentur.

Dices. Quælibet obseruatio legis est actus virtutis, sed quilibet actus virtutis est maius bonum, quàm vita corporalis, ergo pro quocunque actu virtutis tenetur quis sustinere mortem. Resp. ad mai. quod adueniente hac circumstantia non est actus virtutis; quia iam lex cessat obligare, & subintrat aliud præceptum, vel saltem in talibus circumstantijs lex non habet vim obligandi.

## QVÆSTIO VI.

*Vtrum in legem humanam cadere possit interpretatio.*

**N**Ot. Quòd interpretatio legis nil aliud est, quàm explicatio verborum legis quoad eorum significatum, seu sensum à legislatore intentum. Significatio autem verborum est duplex alia materialis, alia formalis, prior est purus sensus gramaticalis, posterior verò includit etiam intentionem legislatoris; & hæc subdiuiditur in significationem naturalem; videlicet, quæ ex communi hominum usu sumitur, & in ciuilem, quam nimirum habent verba ex impositione, aut fictione iuris. Sic mors ex fictione iuris significat non solum mortem naturalem, sed etiam ciuilem. Quo modo Religiosi dicuntur ciuilitè mortui, & filius secundum acceptionem ciuilem significat etiam filium adoptiuum. Insuper duplex est interpretatio, ut aduertit Sebastianus Medices Iurisconsultus in tract. de legibus, & statutis, alia mentis, alia verborum l. scire ff. de leg. Mens tamen præualet verbis; quia potior est finis, quàm ea quæ sunt ad finem, nam omnis actus à fine iudicatur l. rem non nouam C. de Iudicijs, verba siquidem propter mentem, & non è contra instituta sunt l. labeo. ff. de superl. legata. Tum quia verba dependent à mente, & non è conuerso.

**I. Concl.** In legem humanam sæpè cadit rationabilis interpretatio. Prob. ratione desumpta ex fragilitate, inconstantia, & obscuritate mentis humanæ, maximè in subditijs; & etiam ex impossibilitate legem obseruandi, in subditijs, consideratis rebus humanis; quibus ipsa impossibilitas non rarò subest; ergo frequenter est necessaria interpretatio legis. Constat insuper conclusio ex toto tit. 2. de Constit. lib. 1. Decretal. & in 6. eodem tit. cap. 1. Item tit. 3. de rescri-

scriptis lib. 1. In quibus Pontifices manifestè ostendunt constitutiones suas interpretationem admitttere; siue ut nihil contineant in præiudicium, aut grauamen intollerabile tertij; siue ne una constitutio sit prioris destructiua; & à fortiori militat ratio de lege ciuili, ergo &c.

II. Concl. Assignari solet quadruplex interpretatio legis humanæ. Prima est auctoritatiua, quæ fit ab ipso conditore legis. Sic Princeps aliquando declarat suam legem; sic Pontifex, Episcopus suas leges Diæcesanas, & S. Congregatio Cardinalium interpretatur Concil. Trid. ex commissione Pontificis: 2. est doctrinalis, quæ fit à Doctoribus, & scriptoribus approbatis: ad quam requiritur primò, ut sit conformis verbis usualibus legis 2. ut sit menti legislatoris accommodata: 3. ut non sit difformis à lege naturali, & Diuina, vel contra aliam legem humanam: 3. dicitur usualis, & est quæ de lege iudicat prout est in usu, & praxi apud pios, & timoratos, quorum vita, & mores legem interpretantur. Qualiter e.g. lex ieiunij in accidentalibus multis mensuranda venit ex usu piorum, & timoratorum. 4. dicitur æquitas, seu Epikia, & est, quæ ex bono, & æquo (maximè in anxietate, & perplexitate) iudicat agendum contra verba expressa legis. Quod tripliciter contingere potest. Primò, ubi duæ leges concurrunt, nec utraque potest simul impleri. e.g. Urget in festo præceptum de audienda Missa, urget necessaria assistentia infirmo præstanda ex alia parte; in tali casu æquitas interpretatur, legem de audienda Missa non obligare cum tanto detrimento præcepti charitatis. 2. quia aliquando lex videtur nimis dura, ardua, vel moraliter impossibilis, e.g. Petrus in feria 6. reperitur in loco, ubi nullus cibus ei suppetit nisi carnes comedat, in tali euentu per rationabilem Epikiam censetur lex non obligare cum tanto periculo, vel infirmitatis, vel mortis. 3. Epikia versatur circa legislatoris mentem, quæ non videtur se extendisse ad casum præsentem, e.g. Ecclesia prohibet lectionem librorum hæreticorum; interim occurrit casus, quo debeam meam fidem tueri, & hæreticum conuincere, quod nullatenus possum sine lectione talis libri prohibiti; censetur in tali casu, Ecclesia non comprehendisse huiusmodi casum: & in hoc æquitatis iudicio, quilibet est interpres, ubi ratio probabilis oc-



currit, nec patet recursus ad superiorem. Verùm hoc intercedit discrimen inter recensitas interpretationes: quod interpretatio auctoritativa, seu Principis declarantis verba obscura legis, vel suæ, vel suorum Prædecessorum, vel etiam inferiorum obligat ad sui sequelam; debet tamen ad hoc, ut vim legis habeat populo sufficienter proponi, siue per promulgationem solemnem, siue per hoc, quod corpori iuris sit inserta: sic pariter interpretatio facta ex commissione, qualis est, declaratio Trid. facta à Cardinalium Congregatione ex Papæ commissione. Item interpretatio usualis ex communi consensu, & legitima consuetudine, inducere potest obligationem, ut communiter tradunt Doctores. Difficultas tamen oritur de sententia Principis litis decisiva, an habeat vim obligandi. Iurisperiti existimant, eam habere vim legis ad similes causas decidendas; oppositum tenent quamplures Doctores cum Couar. eo quod sententia decisiva litis, ut sic respiciat bonum priuatum, non commune; tum quia non futurum, sed præteritum, vel iam præexistens inter partes spectat, ac proinde non est obligativa, sed potius applicativa iuris uni parti, quàm alteri. Itaque, ut sententia decisiva habeat vim legis, debet constare, Principem id voluisse; vel per aliud equiualens. Ita Herincx cum alijs disp. 3. de leg. q. 14. At interpretatio doctrinalis ad sui sequelam non obligat, cum fieri possit à quouis docto viro, & prudenti; possumus tamen eam sequi in praxi eo modo, quo opinionem probabilem. Ad hanc reuocatur interpretatio consuetudinis non præscriptæ, & interpretatio iudicialis facta à Iudicibus inferioribus. Similiter facta ab ipso Principe, sed tanquàm Doctore priuato, aut opinatiuè rescribente; prout Innoc. IV. ius canonicum interpretatus fuit.

Quæres. Vnde sit desumenda doctrinalis interpretatio legis. Resp. per sequentes regulas traditas à Roder. in compend. qq. regul. Rodriq. & à Miranda in manual. Prælat. Reg. quæ quidem regulæ inseruiunt ad interpretandum, & explicandum non solum leges, & iura, sed etiam priuilegia.

1. Regula, & principalis est, quod ad proæmium recurrendum est ex eo enim mens legislatoris conijcitur; conrineturque in eo causa finalis l. fin. ff. de hæred. restituend. ubi Bart. Bald. Angelus, & alij.

II. Regula. Quod Priuilegia, gratiæ, & concessionēs recipiunt interpretationem à supplicatis; menti enim supplicantis præsumitur se conformare concedens cap. inter Dilectos §. Cæterum de fide instrum. ubi Felin. Iason in l. Gallus Decius conf. 10. & alij.

III. Regula. Quod verba canonum legum, & priuilegiorum debent intelligi iuxta id, ad quod principaliter proferuntur à legislatore l. 1. §. non autem ff. de flumine; nam verba posita ad unum finem ad eundem finem sunt interpretanda cap. fin. de verborum signif. sicut etiam actus agentium non operantur ultra eorum intentionem iuxta Philosophos, & Iurisconf. l. non omnes ff. de rebus creditis.

IV. Regula. Quod una Scriptura non solum explicatur per alteram partem eius, sed etiam per alias omnino ab ea, separatas. Exemplum habetur in l. 1. ff. de rebus dubijs, ubi Vulpianus ait, alteram partem alternatiuè per alteram interpretari; & in cap. 2. requisitis 41. de appellat. ubi dicitur, ea, quæ in principio ad medium, & ad finem, illa verò quæ in medio ad finem, atque principium sæpè referri; hoc est per media declarantur extrema, & per unum extremum declaratur aliud, de quo Bart. in d. l. 1. de rebus dub. Alexander conf. 69. volum. 6. Decius conf. 14.

V. Regula. Quod voluntas legislatoris declaratur à verosimili; sicut voluntas hominis à verosimili indagatur l. non est verosimile ff. de eo, quod metus causa; nam qui arguit à verosimili, arguit à ratione naturali; cum similitudo sit cognata naturæ, & pro lege habeatur, de quo Bald. conf. 180. n. 3. vol. 3. Oltrad. conf. 13. ad quod faciunt tradita à Suarez in tract. de leg.

VI. Regula. Quando verba non soleant in iure usurpāri; nisi in significatione ciuili, tunc secundum eandem sunt explicanda; sic in iure ciuili, usucapio, præscriptio &c. & in iure canonico suspensio, interdictum &c. Similiter si verba habent solum significationem naturalem iuxta eandem sunt intelligenda. At si verba habeant utramque significationem præferri debet per se loquendo naturalis, quæ in communi conuictu est frequentior. Quod si aliquod verbum habeat duplicem significationem naturalem, præferenda est usitatior, nisi ex signis aliud colligatur. Immo significatio communis præferri debet propriæ, quia lex,

quæ loquitur omnibus censetur loqui iuxta intellectum communem. Ita in hac regula Herincx.

VII. Regula. Perpendi debent leges, an sint fauorabiles, vel odiosæ, nam iuxta vulgatam regulam iuris: fauorabiles ampliandæ, odiosæ restringendæ sunt. Quæ autem censendæ sint fauorabiles, vel odiosæ certa regula non potest definiti. Illud tamen certum est, quod lex pœnalis priuans aliqua re, odiosa iudicari debet, & similiter lex correctoria iuris communis, & exorbitans, cum correctio legum maximè vitari debeat ex reg. iuris in 6. Lezana verb. leges dicit, eam legem vocari fauorabilem, quæ primariò prodest aliquibus, etsi alijs secundariò noceat; è contra verò illam esse odiosam, quæ primariò pœnam continet, etsi alijs secundariò profit.

VIII. Regula. Quando lex est fauorabilis explicari potest iuxta utramque significationem verborum, nempe naturalem, & ciuilem; & sic nomine filij venit etiam adoptiuus, & legitimus. Vbi verò lex est odiosa explicari debet iuxta communem sensum verborum, & mitior interpretatio est amplectenda cap. pœnæ de pœnit. dist. 1. & c. odia de reg.

IX. Regula. Nunquam debet lex ampliari, aut restringi detorquendo verba ad significationem impropriad, nisi ad vitandum absurdum, ne lex reddatur illusoria, & ridicula; vel nisi contineret iniustitiam, vel præiudicium innocentis, vel nimium rigorem, aut simile inconueniens. Vnde lex, etiam odiosa contra sui naturam est amplianda l. 1. §. penult. ff. ad S. C. Maced. & idem dicendum in lege pœnali. Tum quia iuxta vulgatam reg. iur. omnis dispositio interpretanda est, ut valeat potius, quàm pereat. Et, quod dicitur hic de lege fauorabili debet extendi etiam ad alias causas fauorabiles, quales sunt causæ Matrimonij libertatis, dotis, testamenti, & pietatis. Circa hanc ultimam notat Gobat. nomine pietatis, seu piæ causæ venire iuxta communem sententiam Doctorem tam theologaliū, quàm legalium, dotem pro honesta puella, victus necessarius congruus statui, aut si pro studio Theologiæ quis legatum faciat &c.

X. Regula. Lex, quantumvis fauorabilis non est extendenda ultra proprietatem verborum ad similes casus ob si-  
mi-

militudinem, aut identitatem rationis, ut etiam tradit Bonacin. & alij contra plurimos iurisperitos, & Theologos, ut notat Herinex. Ratio, quia si verba legis casum similem non comprehendant, nec lex comprehendere censetur. Excipitur tamen, quâdo ex non extensione sequeretur iniquitas, & imprudentia in lege, vel legislatore.

XI. Regula. Lex non includit illud, ad quod mens, & ratio legislatoris non se extendit l. cum Pater §. dolo ff. de leg. 2. Mens autem Principis in dubio semper præsumitur fuisse talis, qualis de iure esse debet, de quo Panorm. in cap. suggestum, Bald. l. ex facto.

XII. Regula. In legibus pœnalibus argumentum à simili, aut ab identitate rationis non valet; rigor enim pœnæ potius debet restringi, & mitigari, quam ampliari, ideoque proprium casum non excedit, ut definitur in iure, & sentit glos. cap. in pœnis 49. de reg. iur. in 6. Ratio; quia, lex pœnalis non omninò pendet à ratione, sed à sola voluntate legislatoris taxante certam aliquam pœnam; ita Castro de leg. pœn. lib. 1. c. 7. Anton. de Butrio c. ult. de consuetud. Rodriq. & alij.

XIII. Regula. In rescriptis, & privilegijs semper præsumendum est, Principem velle se conformare iuri communi, & rationi; ita tamen quod aliquid addatur per privilegium dispositioni communis iuris, ne superfluum reddatur l. si quando C. de inofficioso testam. vel aliquod dubium tollendo confirmet concessionem.

XIV. Regula maximè necessaria ad interpretationem statutorum regularium est, quod in illis non debent de toto rigore apices iuris seruari, sed secundum æquitatem naturalem (quod bonum, & æquum iurisperiti vocant.) interpretari oportet; nam sæpè sæpius perniciosè erratur, allegata solum auctoritate scientiæ iuris, ait Iurisconsultus in l. si servum §. sequitur ff. de verborum obligatione. Monet tamen Rodriq. Superiores Regulares; & Iudices, ne in suis causis procedant de bono, & æquo ad libitum, & beneplacitum suum absolute, sed iuridicè iuxta terminos iuris naturalis, & gentium, de quo Bald. in rub. C. de constit. pecun. & in cap. 1. §. qui viduam; & idem tradit etiam noster P. Miranda in manual. Prælat.

*De lege pœnali, & irritante.*

## QVÆSTIO I.

*Vtrum lex pœnalis obliget ante Iudicis sententiam.*

**N**OT. 1. quod lex pœnalis dicitur, quæ pœnam aliquam transgressoribus imponit, ad differentiam legis moralis, quæ nullam imponit pœnam, sed mores dirigit obligando ad actus positionem, vel omissionem. Quod si lex obliget ad actum, & simul ad pœnam dicitur lex mixta, nempe ex morali, & pœnali; si verò solam pœnam intenter, nec ad actum faciendum, vel omittendum obliget, appellatur purè pœnalis. Quæ quidem lex pœnalis, distinguitur in ciuilem, & Ecclesiasticam; & utraque insuper est multiplex pro multiplicitate pœnarum, quæ siue in iure ciuili, aut Ecclesiastico, siue in tribunalibus sæcularibus, aut Ecclesiasticis imponuntur. Specialiter autem in iure canonico, & iudicijs Ecclesiasticis solent irrogari pœnæ excommunicationis, suspensionis, interdicti, cessationis à Diuinis, depositionis, & degradationis. Irregularitas quoque pœnalis infligi solet, sed à Iure; hæc respiciunt Animam; quoad corpus verò numerantur carcer, verbera, bannum, seu relegatio, damnatio ad triremes &c.

NOT. 2. Quod recta legis pœnalis diuisiō est in legem pœnalem sententiæ ferendæ, & latæ: prior dicitur ea, in qua legislator tantum comminatur pœnam, seu mandat Iudici, ut reo pœnam infligat: posterior est ea, in qua legislator de facto transgressori pœnam imponit, & ad eam damnat. Quare sententia hic non accipitur pro iudiciali definitione, qua per Iudicem controuersię terminantur, sed generaliter pro quouis decreto superioris, siue fiat in iudicio, citatis reo, & testibus, siue fiat in aliqua lege. Et quidem si priori modo fiat vocatur sententia ab homine; & diuiditur in declarationem facti, & in condemnationem pœnæ, & rursus in interlocutoriam, & diffinitiuam. Si posteriori modo fiat dicitur sententia à Iure; quod nomen usus obtinuit, ut soli constitutioni iuris pœnalis tribuatur, ita ex communi tradit Herincx.

Not.

Not. 3. Quòd tria sunt pœnarum temporalium genera : in primo genere reponuntur; quæ solum priuant bonis temporalibus, seu ciuilibus, ut pecunijs, & aliquibus fortunæ bonis : in 2. reponuntur, quæ priuant bonis naturalibus, ut carceratio, fustigatio, exilium &c. In 3. denique reponuntur, quæ bonis spiritualibus priuant, ut excommunicatio, quæ excommunicatum priuat Ecclesiæ suffragijs, fidelium consortio &c. suspensio, interdictum, & huiusmodi, inter quas pœnas hoc discrimen intercedit, quod pœnæ 3. generis in sola priuatione, & passione consistunt; pœnæ autem 2. generis requirunt quamdam actionem, seu executionem actiuam, qua infligantur; pœnæ verò primi generis sunt quasi mediæ, quàmuis enim quamdam actiuam executionem postulent, v. g. dare eleemosynam, ieiunare, & similia, nihilominus cum non sint pœnæ graues, personæ condemnatæ possunt eas per se absque magno incomodo executioni mandare. His prænotatis sit.

I. Concl. lex humana potest obligare transgressores ad pœnas 3. generis, quæ nimirum in sola passione, & priuatione bonorum spiritualium consistunt, subeundas ante Iudicis sententiam. Prob. Nulla apparet repugnantia, non enim minoris est virtutis sententia legis, quàm sententia Iudicis, sed Iudex per sententiam potest condemnare Reum ad pœnam statim subeundam; ergo, & sententia legis id potest. Vnde constat, Ecclesiasticas censuras deberi à delinquente statim obseruari, cessando, & abstinendo ab operationibus per tales censuras prohibitis, ita Doct. &c.

II. Concl. Pœnæ 2. generis, nempe quæ bonis naturalibus priuant, & postulant inflictionem, seu executionem, quamdam actiuam non incurruntur ipso facto: ita Doctores communiter. Hinc persona delinquens non tenetur, ad recensitas pœnas legis subeundas ante Iudicis sententiam, immò nec ante ipsius sententiæ executionem. Si quidem leges humanæ nequeunt graues, & notabiles pœnas imponere tali præcepto, ut delinquens ex sedebat in conscientia exequi, & exercere; naturali enim legi repugnat, ut seipsum quis occidat, vel publicè, & cum infamia grauius se flagellet; sibi manum abscindat, & similia. Quare ad patibulum damnati se ex scala præcipitare non debent, sed expectare, donec à iustitiæ Ministro proijciantur. No-



ties lex pœnam imponit per verba præsentis temporis, in peratiui modi, qualia sunt, excommunicamus, priuamus, & similia, pœna est latæ sententiæ: sicut etiam si dicatur, excommunicatus, est priuatus &c. III. Regula. Quoties lex imponit pœnam per verba in peratiui modi quibus, vel nulla significatur actio, vel nulla saltem Iudicis, aut iustitiæ Minister, tunc est latæ sententiæ; ut cum de reo in lege dicitur careat, subiaceat, incidat, vel sit inhabilis, vel sit inane, irritum &c. Quod si dubium est, an verba legis contineant sententiam latam, vel ferendam censendum est, quod tantum contineat ferendam nam in pœnis benignior interpretatio est adhibenda de reg. iur. in 6. Notat insuper Herincx cum Præposito q. 96. d. 3. dub. 7. paucissimas leges videri esse, quæ ita strictè obligent, & forte nullas ciuiles. In modò ultra censuras, & irregularitatem nullam aliam pœnam propriè dictam, qualis est priuatio alicuius iuris quæsitæ, seu cæpti possideri, incurri ante sententiam declaratoriam criminis, praxis habet, ut post Farinac. & alios tradit Castro Palao disp. 2. p. 2. n. 12. adeo ut nullatenus possit executioni mandari. Declaratoria verò sententia requirit citationem partis, teste Iulio Claro, & ab ea dari potest appellatio, ut docet Farinac. & alij passim. Ex quibus colligitur, subdit idem Doctor, pœnam priuationis officiorum, beneficiorum, actuum legitimorum, confiscationis bonorum, inhabilitatis ad hæreditatem ad eundam, & similes non obligare in conscientia ante sententiam declaratoriam criminis, etsi ipso iure imponantur.

Neque obstat, hinc sequi frustra poni in lege pœnali verba, ipso facto, & absque alia declaratione, si non contrahitur pœna, delicto commissio; ideoque nullam esse differentiam inter legem latæ sententiæ, & ferendæ; non obstat, inquam; eo quia pœna imposita à lege ipso facto non requirit sententiam condemnatoriam, sed sufficit declaratoria criminis; secus verò dicendum est de sententia ferenda. Quare consultò in nostris constitutionibus declaratur, quod licet statuta aliqua dicant ipso facto &c. non incurrantur pœnæ ante Iudicis sententiam.

Quæres I. Ad quid obliget lex pœnalis post Iudicis sententiam: Resp. breuiter cum Caspensi, & Bonacina omisis varijs Theologorum, ac Iurisperitorum sententijs. Quando

tiam semel latam reuocare. Quare videant Religiosi ad quos in Prouincijs spectat ferre penales sententias; & sciant non esse in suo arbitrio non sententiare iuxta leges, & Constitutiones Religionis; licet aliquando ratione circumstantiarum possint intra taxam legis minuere, vel augere pœnas. Cæterum, si Iudex supremus sit, non tenetur ad penam taxatam per legem; potest namque pœnas remittere, & arbitrari, cum lex ipsum non arctet. Nihilominus si absque legitima causa id faciat, tradunt Doctores, illum peccare ad minus venialiter.

## QVÆSTIO II.

*Vtrum ignorantia excuset à pœna legis humane.*

**N**ot. Quod ad pleniorē intelligentiam præsentis questionis faciunt ea, quæ tradita fuere de ignorantia in tract. de actibus humanis. Vnde cum illa repetere superfluum sit; solum ad mentem reuoco, quod alia est ignorantia facti, alia iuris, & licet ignorantia facti, & non iuris excuset à pœna, ut habet reg. 13. Iuris in 6. attamen certum est omnem ignorantiam in foro conscientiæ, de quo non loquitur regula allata, excusantem factum à peccato, excusare etiam à pœna ex cap. 2. de constit. ubi dicitur. *Rom, quæ culpa caret in damnum vocari non conuenit*; & ratio est, quia lex iusta non imponit pœnam nisi, ut pœnam, qualis non est, nisi præcesserit culpa. Quæ doctrina, ut obseruat Herincx cum Suarez locum habet etiam in lege purè penali, videlicet, illum non incurrere pœnam, cuius opus, vel omissio sit ex tali ignorantia, ut non esset peccaminosum, si sub culpa fuisset præceptum.

I. Concl. Ignorantia quæ excusat à graui culpa, etsi non excuset à peccato veniali, excusat à graui pœna. Secus autem ignorantia non excusans à culpa graui, nisi lex ad incurrendam pœnam requirat scientiam, aut dolum. Ita ex communi docet Herincx disp. 5. de leg. penal. q. 4. Prima pars patet, quia tunc cessat causa, ob quam grauis pœna imponitur. Ratio 2. partis. Quia hæc ignorantia non tollit causam pœnæ; ergo nec pœnam tollit. Aduertit tamen, quod si actus sit quidem culpabilis, non tamen ex-  
cul-

culpa, ob quam est imposita pœna; non incurritur pœna. Cerrè peccat percutiens scienter, & deliberate alterum, si tamen inuincibiliter ignoret eum esse Clericum non incurrit pœnas latis in percurientes Clericos: Neque coniugatus incurrit priuationem iuris, seu facultatis petendi debitum, si cognoscat alienam, quam inuincibiliter nescit esse suæ uxoris consanguineam.

Notanter dicitur in conc. Nisi lex ad incurrendam pœnam requirat scientiam, vel dolum. Nam si utatur his, aut similibus verbis. Qui temerè hoc attentauerit, præsumpserit, scienter hoc fecerit &c. non sufficit ad pœnam incurrendam quæuis culpa grauis, sed culpa, quæ supponat scientiam, adeout si quis transgrediatur legem ex ignorantia vincibili, aut crassa; etsi sufficienti ad peccatum mortale, non incurrat similes pœnas. Secus est iuxta Suarez, & plures alios, ut obseruat Herincx, contra Bonacin. disp. 1. de cens. q. 2. p. 1. quando miles leges violantur ex ignorantia affectata, cò quod in iure ipsa æquiparatur scientiæ, ac temeritati.

II. Concl. Qui transgreditur legem humanam in materia iuris diuini, vel naturalis, sciens quidem se agere contra legem Dei, aut naturæ, ignorans tamen inuincibiliter legem humanam, non excusatur à pœna legis humanæ exceptis censuris. Ita Scot. 4. d. 6. q. 8. Suarez, & alij. Ratio est; quia tunc non cessat causa pœnæ; lex enim humana non solum intendit punire sui formalem transgressionem, sed etiam legis D. aut naturalis, præsertim si cadat in materiam à se etiam præceptam.

Notanter dicitur in conc. exceptis censuris. Siquidem probabilissimum est & iam communiter receptum inuincibilem ignorantiam legis Ecclesiasticæ excusare à censura. Quando enim preceptum Ecclesiæ ignoratur, peccans non censetur eam contemnere, aut contumax esse. Quod certius est in censuris latis per Iudices ordinarios cap. Ut animatum de Constit. in 6. ubi dicitur. *Vt Animarum periculis obuietur, sententijs per statuta quorumcunque ordinariorum prolatis ligari nolumus ignorantes*. Cæterùm etsi Scot. l. c. videatur velle, quod ignorantia cænonis non excuset à censura, loquitur de culpabili, ut explicat Hugo Cauellus in Scholio.

*Vtrum omnis lex prohibitiua sit irritatoria actuum, quos prohibet: & an leges irritantes obligent conscientia ad non faciendos actus illos sic irritos.*

**N**Ot. 1. Quod omnibus compertum est, tum ex usu, & praxi Ecclesiæ, nec non Conciliorum, tum ex praxi Principum sæcularium esse in potestate legislatoris irritare. & inualidare quosdam actus humanos; Aliud enim est, actum esse simpliciter humanum, aliud illum esse validum, seu habere moralem efficaciam, ac proinde posterius potest separari à priori. Dupliciter autem potest actus aliquis humanus quoad moralem efficaciam per potestatem publicam irritari. Primò immediatè, & directè, v. g. contractus Matrimonij clandestini irritatur à Conc. Trid. sess. 24. cap. 1. de Reformat. Et tunc contrahentes relinquuntur habiles ad contrahendum, & solum redduntur inhabiles ad sic contrahendum. 2. mediate, & indirectè; nempe inhabilitando personas aliàs habiles ad contrahendum, & ex consequenti dumtaxat irritando ipsum contractum, prout v. g. personæ consanguineæ affines sunt inhabiles, ac proinde earundem matrimonia inualida, & irrita.

Not. 2. quod lex irritans est, quæ actum aliàs validum, impedit, ne effectum sortiatur; & diuiditur in legem ferendam, & latæ sententiæ, ad quod dignoscendum faciunt regulæ superiùs allatæ. Siquidem quando lex irritans est latæ sententiæ nulla requiritur sententia iudicis etiam declaratoria, nisi quando lex irritans est pœnalis, seu constituta in pœnam delicti. Actus enim irritantur, vel in pœnam, vel ob bonum publicum, seu commune, vel mixtim, quod ex occasione legis, & subiecta materia est iudicandum. Quare aliquæ leges sunt pœnales, aliquæ non: quando sunt merè pœnales, sequuntur regulas legum pœnaliũ; & sic requirunt sententiam declaratoriam criminis, est sicut latæ sententiæ. Similiter requirunt scientiam legis adesse, adeout ignorantia excusans actum à culpa, etiam excuset ab irritatione incurrenda. Secus est, quando irritatio non est constituta in pœnam, aut certè simul, ac principaliter ob bonum commune, ac moralem decentiam disti-

stinctam à punitione delinquentis. Sic constat ex sensu Ecclesiæ professionem factam ante præscriptum tempus à Trid. esse inuálidam, sic matrimonium clandestinum, aut cum alio impedimento dirrimente contractum esse inuálidum, etsi lex irritans ignoretur.

I. Concl. Leges humanæ, tam canonicæ, quam ciuiles prohibitivæ non irritant actus, quos prohibent. Hæc est communis, & recepta sententia contra nonnullos Iurisperitos, & Canonistas, asserentes omnem legem prohibentem actum, etiam illum irritare; asserentes inter alia pro fundamento regulam iuris 64. *Quæ contra ius fiunt, debent pro inuisis haberi.* Prob. conc. quoad 1. part. cum Mastrio disp. 8. de leg. q. 5. art. 4. De fide est aliud esse actum esse irritum, & aliud, esse prohibitum; est enim de fide, sacerdotem degradatum valide consecrare, cum tamen id sit ei prohibitum: Episcopum validè ordinare non subditos: immò addit Herincx ista nec irritari possunt ab Ecclesia. Idem patet etiam in præceptis Ecclesiasticis, v. g. illicitum, & tamen validum est matrimonium contractum absque denunciationibus præiis, aut cum impedimentis impediens tantum. Vnde in his habet locum regula iuris. *Multa fieri prohibentur, quæ tamen facta tenent.* Nec contradicit altera regula superius allata. *Quæ contra ius fiunt &c.* quia ut explicat Mastrius cum Arriaga, intelligenda est de iure irritante; sed fortasse melius responderetur cum Herincx, quod regula solum vult, actus, etsi contra legem merè prohibentem factos, meritò per Iudicem in pœnam posse rescindi, quando irritabiles sunt iuxta illud, quod dicit Io. Papa c. Vides. dist. 10. *Quod contra leges accipitur, per leges dissolui moratur.* Prob. 2. pars. Nam ex natura rei aliud est prohibere, & effectus irritationis non est necessario connexus cum prohibitione: prohibere namque est obligare, ne fiat actus, irritare autem est reddere actum inuálidum, & nullum: ergo nisi lex ipsa ciuilis prohibens exprimat irritationem, non irritatur actus. Ita Innocent. in cap. si verè de sent. excom. Felin. in cap. 2. de Constit. & alij Iuristæ.

II. Concl. Leges prohibentes, & irritantes simul actus obligant in conscientia ad non ponendum actum, ut si dicatur prohibeo, veto, præcipio, ne talis res fiat sine tali,

vel tali conditione &c. volo, ut sic facta non teneant; leges autem, quæ non prohibent, sed tantum præscribunt conditiones quasdam necessarias ad valorem actus, vel contractus per se non obligant in conscientia directè ad illum actum omittendum, sed præcisè, ut non reputetur validus, si fiat sic v. g. lex præscribens formam, qua testamentum condi debet, non obligat simpliciter, & absolutè, sed solum, quod si aliter testetur, testamentum sit nullum; sic lex irritans contractus minorum; quibus nihilominus non est illicitum facere huiusmodi contractus. Verùm foret illicitum actum irritum facere; quando sit talis conditionis, ut non possit fieri honestè, nisi fiat validè, v. g. si lex præscribat formam actus, ad quem aliquis ex iusticia obligatur; tenetur enim ponere actum validum. Idem est si lex versetur in materia Religionis, nam grauitèr aduersari videtur reuerentiæ rebus sacris debitæ, exercere talem actum inualidè; ideoque per legem humanam constituitur medium in materia talis virtutis necessariò seruandum. Hinc matrimonium inualidum contrahere communi sensu est graue sacrilegium. Item inualidè absoluere, profiteri, eligere, beneficia conferre &c. Ita ex communi sententia tradunt Mastrius, & Herincx.

Quæres. Vnde dignosci possit, legem aliquam irritare actum. Resp. duobus modis dignosci posse legem prohibentem velle etiam irritare actus prohibitos; primò quando verbis expressis iniungit, & exprimit irritationem v. g. dicendo. Actus sit nullus, sit irritus, sit inualidus, sit nullius roboris, vel sub alijs æquipollentibus dicendi modis, qui mentem legislatoris satis indicent: 2. modo, quando lex præscribit formam essentialè, seu substantialè; irritat actum aliter factum, cum res subsistere nequeat sine sua forma substantiali; talem autem formam certò præscribit, si addat clausulas irritantes, ut si dicat. Aliter facta, non valeant, sint irrita, cassata, effectum non sortiantur, omni prorsus robore careant, cassamus, annullamus &c. tunc enim lex apertè resistit valori actus. Vnde electio, collatio, sententia, & similes actus aliter exerciti absque dubio sunt inualidi, sed difficultas est, quando lex non apertè exprimit, unde agnosci possit esse formam substantialem, vel accidentalem, de quo videndi sunt Doct. qui de ea latè tractant.

Quæ-



**Quæres 2.** An lex irritans fundata in præsumptione suum sortiatur effectum, quando præsumptio non subsistit.

**Resp.** Quàmvis responsio huius quæsitæ ex dictis non obscure deduci possit, attamen pro uberiori doctrina respondeo cum Rodriq. & Suarez; Quod lex fundata in præsumptione non obligat in foro conscientiæ, inspecta veritate in contrarium; tum propter æquitatem, iuxta quam intentio legislatoris est interpretanda arg. l. ex facto ff. de vulg. tum quia contra eam legem passim admittitur probatio, conditionaliter enim tantum obligare censetur dicta lex, nempe si veritas non sit in contrarium cap. veritate dist. 8. Quod procedit etiam si præsumptio legis sit iuris, & de iure, quæ tam efficax reputatur, ut pro veritate habeatur, ut notant glos. & Doct. in cap. is, qui fidem de Sponsal. & cap. tua nos eod. tit. Id enim non tollit, quin intentio legislatoris secundum æquitatem interpretanda sit, ne præsumptio veritati præferatur, de qua si constet legitime, puta per partis confessionem, lex cessat etiam in foro exteriori ex glos. singul. in l. C. de non num. pecun. Idem etiam dicendum est, si præsumptio sit suppositiua (ut vocant) seu quæ supponit posse ita esse, vel non esse; quia lex in illa fundata non semper nititur veritate, ac proinde sublato dubio, in quo fundatur, per veritatem in contrarium inspectam, omnis præsumptio, & lex illi innixa cessat. Et in hoc sensu intelligenda est doctrina superius tradita de lege præceptiua fundata in præsumptione iuris, & de iure de Sponsalibus id est in foro fori, seu externo, non autem in foro conscientiæ, esto cogi possit à Iudice, casu quo non possit probare veritatem facti.

**Quæres.** An pœna conuentionalis obliget in conscientia. **Resp.** breuiter. Si talis pœna debeat ad satisfactionem interesse obligat in conscientia ad sui solutionem; ita Corduba lib. 1. q. 36. Caiet. Felin. Nauar. & Fernandez. Si autem non debeat ex interesse, sed solum ob omissionem, aut actionem aliquam culpabilem contra contractum debetur quidem in conscientia, si petatur ab alio contrahente, non expectata Iudicis sententia, opinio tamen opposita censetur ab Herincx probabilis, nempe quod non teneatur quis soluere huiusmodi pœnam nisi post Iudicis sententiam.

*De Cessatione, & mutatione legis humane.*

## QVÆSTIO I.

*Utrum lex cesset, cessante fine, seu causa finali.*

**N**OT. 1. Quòd lex humana cessat, seu mutatur, quando eius obligatio tollitur; id autem diuersimodè fieri solet; Aliquando namque lex cessat cessante fine, quæ quidem cessatio dicitur ab intrinseco; aliquando verò cessat velut ab extrinseco; vel quia superior illam reuocet, vel abroget, vel per consuetudinem contrariam; impræsentiarum quærimus tantùm de primo modo, de alijs enim agetur in sequentibus quæstionibus.

NOT. 2. quod duplex potest esse finis legis, alius intrinsecus, qui à lege, seu præcepto non distinguitur, sed cum inseparabiliter sequitur e. g. Si legislator præcipiat ieiunare, orare propter honestatem, quæ in ieiunio, & oratione, reperiuntur. Alius extrinsecus, & à materia præcepti distinctus; v. g. si præcipiatur ieiunium ob carnis mortificationem, peccatorum satisfactionem &c. Quare interdum cum fine intrinseco, & materia præcepti coniungitur, & spectatur etiam finis extrinsecus, aliquando verò solum finis intrinsecus. Hinc quoties materia præcepti de se habet honestatem, & lex illam præcipit, censetur præcipere ob finem intrinsecum illius; estò simul habeat plures fines. At quoties materia præcepti de se honestatem non habet, vel si illam habet, à legislatore non intenditur, sed solum illius executio; quatenus alicui fini extrinseco conuenit, tunc ex illo fine extrinseco sumenda est tota honestas rei præceptæ, ut inter alios tradunt Suarez, & Castropal. disp. 5. de legibus.

NOT. 3. quod legis finis duplici modo cessare potest, nempe contrariè, seu positivè, & negatiuè, seu contradictoriè; tunc censetur contrariè cessare finis quando nimirum lex contrarium finem sortiretur, adeout quod prius erat iustum iniustum fiat; tunc autem cessat negatiuè, quando videlicet lex non transit in contrarium statum; ita quod

legis observatio fiat impossibilis, iniqua, aut nimis noxia, & ardua, e. g. latum est generale præceptum, ne arma noctu deferantur ob vitandas rixas, & perturbationes; Petrus certò sciens non esse secururam ullam perturbationem aut rixam, poterit arma deferre, cum in tali casu finis legis cesset negatiuè. Similiter superior præcipit, ut nullus Religiosus deambulet in loco, ubi potest esse occasio scandali; quod scandalum cessare potest, & de facto cessat in Religioso Sene. Difficultas igitur est de fine cessante negatiuè, certum est enim; quod quando finis legis cessat contrariè, lex quoque cessat, quia in tali casu lex fit iniusta.

I. Concl. Quando lex fertur ob duplicem finem, nempe intrinsecum, & extrinsecum spectandus est semper finis intrinsecus pro perseverantia legis, vel eius cessatione. Ita noster Doctiss. Castro de potestate legis penalis quem sequuntur Recentiores, ut Palao, Salas, Bonac. & alij; ratio data fuit supra: ideo &c.

II. Concl. Lex cessat ob cessationem causæ finalis eiusdem in toto: ita communis sententia. Ratio est. *Quia res, per quas causas nascitur, per easdem dissolvitur* de reg. iur. in 6. sed observatio legis inducitur ob talem causam; ergo cessante tota causa finali, cessat eius obligatio. Tum quia legislator non intendit obligare cessante in totum causa legis. Verùm si eadem lex habeat plures fines, uno cessante remanentibus cæteris; non cessat obligatio legis. Similiter si finis adæquatus cesset pro aliquo tempore tantum, non statim inferri potest, legem absolutè cessasse, sed pro eo tempore remanet supensa lex quoad obligationem.

III. Concl. Vbi lex respicit, magis bonum generale communis, quam priuatum uniuscuiusque in particulari, nunquam cessat lex ratione finis cessantis respectu unius in particulari, nisi cesset respectu omnium. Hæc est communior, & probabilior contra Dianam p. 1. tract. 10. & alios ab eo relatos. Prob. lex, & generale præceptum non respicit casus speciales, sed ea, quæ communiter contingunt l. ea, quæ rarò ff. de reg. iuris; ergo dum communiter casus contingere possunt, quilibet est censendus obligatus, quia iam videtur comprehensus sub lege, & sub fine eius. Præterea, dum vulgariter dicitur cessare ratio legis in casu particulari, reuerà non cessat omnis ratio in tali casu, etiam

respectu personæ particularis, quia adhuc manet finis generalis, & altior nempe bonum commune, cui est valdè utile seruare legem in tali casu; videlicet, ut sit conformitas in membris communitatis, & via præcludatur varijs, & multis incommodis; nam quisque, ut eleganter discurret Herinx facillè sibi blandiri posset, causam legis hic, & nunc in se cessare.

IV. Concl. Quàmuis lex respiciat magis bonum particulare singulorum, quàm generale communitatis, adhuc non cessat lex respectu unius particularis; licet cessare videatur finis respectu ipsius in particulari. Hæc probatur ijsdem rationibus, quibus supra &c. lex enim ieiunij, in qua secundum D. Thom. Ecclesia attendit ad id, quod communius accidit, magis bonum particulare uniuscuiusque respicit, quàm bonum generale communitatis, prout etiam facit lex confessionis annuæ, & abstinentiæ à carnibus, quæ quidem leges etiam ex doctrina Dianæ attendunt ad id, quod communiter solet accidere, non verò ad id quod respectu unius in particulari accidit. Notant tamen Villalob. Rodriq. Harinx, & alij passim, quod, si in aliquo casu particulari lex redderetur notabiliter grauis, ac difficilis quoad obseruantiam, tunc non solum dicitur lex, seu finis legis cessare negatiuè, sed etiam aliquo modo contrariè.

## QVÆSTIO II.

*Quomodo lex humana cesset per reuocationem, seu per abrogationem superioris.*

**N**Ot. Quòd licet naturalis ratio ostendat, mutationem legis, seu eius abrogationem non debere fieri sine causa urgente, nisi appareat aliqua maior, & necessaria utilitas; Vnde habetur in l. 2. ff. de constit. Princip. *In rebus novis constituendis euidentis esse utilitas debet, et recedatur ab eo iure, quod diu æquum visum est.* Nihilominus interdum huiusmodi mutationem ab ingenij imbecillitatem, hominum fragilitatem, temporum successionem, & subditorum ingenia, negotia, & ob alias rationabiles circumstantias contingit prudenter fieri reuocando, & abrogando per superiorem legem latam. Quæ reuocatio si sit totalis, propriè vocatur

abrogatio legis ; si autem sit partialis , idest una pars ; v. g. pœna per legem taxata , vel ipsius legis pars aliqua tollatur , dicitur derogatio .

I. Concl. Lex humana per ipsum legislatorem , vel eius successorem , aut in iurisdictione superiorem abrogari ; seu derogari potest : Concl. est clara ; & c. 16. Ethicorum habetur registrata Artexensis excusatio his conceptis verbis . *Nec putare debetis , si diversa iubeamus , ex animi nostri venire levitate , sed pro qualitate , & necessitate temporum , ut Respublica possit utilitas ferre sententiam .* Quod si legislator sine legitima causa legem mutaret , malè , & imprudenter quidem ageret , factum tamen tenebit , quia lex essentialiter pender à legislatoris voluntate .

II. Concl. Episcopus potest constitutiones Synodi Diœcesanæ abrogare , inconsulta Synodo ; estò nonnulli contrarium teneant . Ratio est . Quia solus Episcopus est legislator , cæteri autem Clerici , qui in Synodo comparent , se habent tantum , ut Contiliarij , à quibus non dependet legis constitutio , ac proinde nec eius abrogatio ; ergo Episcopus extra Synodum potest leges Synodales , tanquam suas leges abrogare .

III. Concl. Nullus inferior potest legem superioris abrogare , nisi ab ipso facultatem habeat . Est communis , & probatur per Clementinam . *Ne Romani Pontificis* , ubi à Clement. V. decernitur legem superioris non posse per inferiorem abrogari , corrigi , aut mutari : ratio , quia legis abrogatio est actus iurisdictionis , & potestatis legislativæ , quæ residet tantum in superiore ; ergo inferior nequit & c.

### QVÆSTIO III.

*Vtrum lex cesset per contrariam consuetudinem .*

**N**Ot. 1. Quòd consuetudo sic passim describitur ex Isid. l. 1. etymol. cap. 3. est ius quoddam moribus constitutum , quod pro lege suscipitur , cum lex deficit , & habetur dist. 1. c. consuetudo . Quæ consuetudo duplex est altera facti , altera iuris : prior est frequentia liberè operandi , vel omittendi : posterior est quasi altera lex obtinens parem obligandi potestatem . Consuetudo pro iure acce-

pra ortum habet à consuetudine facti, quatenus idem est quod actus publicè frequentatus. Rursus consuetudo triplex est, nempe contra legem, præter legem, & iuxta legem. Prima consistit in actibus frequentatis contra legem, & vim habet abrogandi legem: 2. consistit in frequentatione actuum, qui nulla lege prohibentur: 3. declarat, seu interpretatur legem, & consistit in frequentatione actuum secundum legem, & per hanc consuetudinem lex firmatur.

Not. 2. Quòd, ut consuetudo abroget legem contrariam quinque conditiones postulantur. Prima, ut oriatur ex pluribus actibus liberè frequentatis; non enim consuetudo vim legis habere potest nisi per actus liberos, & voluntarios: 2. requiritur temporis diuturnitas, quæ iuxta Recentiores tam in legibus civilibus, quam Ecclesiasticis sufficit tempus longæum, idest decem annorum; licet plures Doct. pro lege Ecclesiastica requirant tempus 40. annorum ex cap. de quarta &c. ad aures de præscrip. ubi tamen, ut aduertit Herincx, est sermo de præscrip. contra bona, & iura Ecclesiæ: 3. requiritur scientia, & consensus saltem tacitus, & interpretatiuus; qui consistit in eo quod Princeps cognoscens talem consuetudinem non contradicat, ubi faciliè potest; nam in hoc differunt lex, & consuetudo; quod in illa expressus consensus, in hac tacitus interueniat: 4. ut actus à populo, vel à maiori parte frequentetur quasi ex obligatione, seu animo introducendæ obligationis, non verò ex sola deuotione; ut vesperi recitare Ave Maria, in die Cinerum cineres recipere &c. In dubio autem, an sit introducta animo se obligandi, an ex mera deuotione, præsumendum est non esse introductam animo se obligandi; quia in dubijs fauorabilior pars est tenenda, & nemo præsumitur velle sibi onus imponere, nisi constet de ipsius voluntate: tum quia tunc mellor est conditio communis adhuc libertatem suam possidentis: 5. exigitur; ut id, quod introducit per consuetudinem possit esse materia legis; ideoque contra Ius Diuinum, & naturale non potest consuetudo introduci, ac proinde consuetudo debet constare, ut vim legis habeat, ex actibus, qui sint liciti, & honesti, hoc est non repugnantes legi D. nec naturali consuetudinis C. quæ sit longa consuetudo; & sic dicitur rationabilis.



I. Concl. lex humana cessat, ac proinde eius obligatio per contrariam consuetudinem, quæ constat omnibus conditionibus supra recensitis, ac explicatis. Hæc est communis. Prob. Huiusmodi consuetudo habet vim legis, sed certum est, legem præcedentem posse per legem contrariam superuenientem abrogari, ergo & per consuetudinem contrariam; maior patet ex communi sententia, & habetur expressè in can. consuetudo dist. 1. Hinc bene inferitur consuetudinem præcedentem per contrariam consuetudinem superuenientem cessare, & abrogari; si introducta sit à personis habentibus auctoritatem ad eam inducendam; quales non sunt pueri, mulieres, furiosi, & similes, quia hi legem condere non possunt. Ita Roder. t. 1. q. 69. art. 1. & Auctor eius Compendij citans D. Thom. & alios. Cæterum ad hoc ut consuetudo censeatur præscripta, debet esse consuetudo non interrupta; sicut etiam ut legem abroget; Vnde cap. final. dicitur. *Non debet iuri positio præiudicium generare, nisi fuerit legitime præscripta*; legitima autem præscriptio, ut notant Doct. continuitatem postulat. Quare si consuetudo per actus contrarios quandoque interrumpatur, debet de nouo præscriptio inchoari contra legem. Quot autem actus requirantur ad firmandam consuetudinem, variant Doct. Panorm. Azorius, Barthol. Reginal. apud Dian. p. 1. tr. 10. de leg. res. 7. & Rodriq. cum suo compilatore censent sufficere duos, vel tres actus, factos contra legem, sciente Principe, & non contradicente, cum facile possit; quia frequentia alicuius actus, aiunt, habetur quando aliquid bis fit, nam quod bis fit, frequenter fieri dicitur. Quod si actus habeat causam successuam, & continuationem temporis sufficientis ad consuetudinem inducendam, dicunt, sufficere unicum actum. Aduertit tamen Herinex, quod determinatum tempus non est necessarium, quando consuetudo tollit legem, non via præscriptionis, sed via conuiuentiæ, seu tacitæ approbationis personalis Principis; tunc enim videtur, solum requiri tempus determinandum iudicio prudentis Viri, attentis omnibus circumstantijs &c. Idem dicendum de consuetudine præter legem. De qua re videndi sunt Doct.

Quæres 1. Vnde dignosci possit consuetudinem introductam esse animo obligandi, si de ea dubitatur.

Resp.

Resp. in dubio præsumendum est, non fuisse animum obligandi, ut supra indicatum est; nisi de ea sufficienter constet, vel nisi indicia moraliter certa aliud ostendant. Iudicia autem ad iudicandum pro obligatione consuetudinis morali iudicio est relinquendum, ait Herincx. Ad quod iudicium prudenter formandum, tradunt communiter Doctores sequentia. Primò; si consuetudo sit difficilis, & de re graui, & communiter à Populo seruata: 2. si superiores eam obligare supponant, & transgressores puniantur. 3. si prudentes, & timorati malè sentiunt de non seruantibus consuetudinem. Denique si obligatio consuetudinis bono publico multum conducatur.

Quæres 2. Quomodo consuetudo probetur.

Resp. Probari per duos testes, si agatur in foro externo. Ita Sera phin. decis. 1349. citans Rotam Roman. anno 1600. 14. Aprilis, Iason, Nauar. Dian. p. 8. tract. 5. ref. 28. & alij. At in Belgio, ut refert Herincx, & Sclder consuetudo probatur per turbam, seu turmam, turma autem ad minus debet constare Personis decem.

Quæres 3. An lex prohibens consuetudinem, tolli etiam possit per consuetudinem.

Resp. affirmatiuè si à lege non reprobetur. Ratio est: quia lex, quæ est essentialiter prohibitio potest abrogari per consuetudinem, cur ergo prohibitio consuetudinis non potest consuetudine abrogari? Tum quia prohibitio consuetudinis includitur implicite in omni lege, in qua prohibetur fieri ipse actus. Ita Suarez lib. 7. de leg. & alij plures. Ratio posterioris est, quia ius reprobans consuetudinem declarat illam non esse rationabilem, nec bono publico expedire, nisi tanta mutatio superueniat, ut non censeatur manere sub iisdem circumstantijs; sub quibus erat reprobata. Qualiter autem per legem abrogetur consuetudo, ponitur talis regula. Per legem uniuersalem non abrogantur consuetudines speciales locorum, aut statuta specialia; non continentia solum ius commune, aut priuilegia, nisi eorum fiat mentio in lege, aut nisi saltem in genere reuocentur expressè; dicendo, qualescunque contrariæ consuetudines ex cap. 1. de constit. in 6. Verùm consuetudo particularis per legem particularem abrogatur, etiamsi non sit facta illius mentio. Ita Suarez lib. 1. c. 2. Salas disp.

19. sect. 13. & alij. Consuetudo tamen immemorabilis nunquam censetur abrogata per clausulam generalem derogatoriam omnis consuetudinis, nisi specialiter excludatur, & illi derogetur, hæc enim comparatur priuilegio. Ita Rodriq. tom. 1. q. 9. art. 5. citans Couar. Gutierrez, Mieres, & Tiraquel.

## QVÆSTIO IV.

*Vtrum lex cesset per dispensationem.*

**N**ot. 1. Quodd dispensatio est actus iurisdictionis, quo relaxatur lex in casu particulari, vel persona, sub qua subintellige etiam Personam fictam v. g. Monasterium, Religionem &c. relicta eiusdem legis obligatione in uniuersali, aut quo legis obligatio suspenditur ad aliquod tempus. Vnde si obligatio in totum tollitur, dicitur dispensatio totalis, si tantum in partem, dicitur dispensatio partialis: Ad valorem dispensationis requiritur actus internus Superioris legitimè dispensantis, exterius tamen manifestatus, consequenter ipsius consensus aded est necessarius, ut inualida sit dispensatio, quam superior fictè concessit absque consensu, quia *actus agentium non operantur ultra intentionem eorum l. non omnis ff. si eorum paratur.*

Not. 2. Quod ad dispensandum plures sunt causæ. Prima est utilitas communis, vel etiam priuata: 2. est necessitas publica, vel priuata: 3. est pietas. Verum posita una ex his causis non semper tenetur superior dispensare, tenetur tamen ad dispensandum, quando necessaria est dispensatio ad euitandum damnum publicum, vel etiam priuatum Animæ, vel corporis &c. vel ad euitandum scandalum, ut quando v. g. Vir paratus est ad ducendam mulierem, quam deflorauit, & periculum est, ne illum peniteat cum ipsa contrahere, tunc superior potest dispensare in impedimento matrimonij, etiam si Papæ sit reseruatum. Ita Sanchez lib. 3. de matrim. disp. 10. Salas disp. 20. sect. 4. Herincx, & alij, & infra magis patebit.

I. Concl. Legitimus Superior cum inferiore subdito in lege potest ipsum eximere ab obligatione legis, adhuc perseuerantis respectu aliorum. Est communis, & certa. Prob. Quia obligatio legis humanæ inducitur per voluntatem

legitimi superioris præcipientis; ergo etiam per ipsius voluntatem potest auferri iuxta reg. iur. *Res, per quas causas nascitur, per easdem dissoluitur*; nisi aliud obstat. Potest insuper superior maior superioris inferioris, qui legem tulit, in legibus ab ipso superiore inferiore latis dispensare; nam ut legitimus superior, & potestas non confertur priuatiuè, sed cumulatue; Item æqualis in iurisdictione potest dispensare in legibus latis ab eo, cui iniurisdictione successit; quia eadem potestate gaudet. Quare Papa dispensare potest à legibus canonicis, siue sint latæ à Pontificibus, siue à Concilijs.

II. Concl. Superior, seu legislator in suis legibus, vel in ijs, in quibus potest alium dispensare, potest etiam secum dispensare. Ita D. Thom. 22. q. 185. Corduba q. 31. Suarez, Sanchez, & alij. Prob. quia dispensatio est actus iurisdictionis voluntariæ; sed huiusmodi actum potest superior in seipsum exercere, quia ipse non est deterius conditionis alijs; secus est de actibus iurisdictionis inuoluntariæ, seu contentiosæ; hæc enim poscit distinctionem personarum, cum importet coactionem, vel sententiam, quæ dicitur ius inter partes. Itaque habens ordinariam potestatem dispensandi, uti cum alijs, ita secum dispensare potest. Hinc præter Pontificem, & Episcopos, etiam Generales, Prouinciales, & superiores locales possunt, & cum alijs, & secum dispensare. Immo & is, cui potestas dispensandi generaliter, & sine limitatione est delegata; alioquin esset deterius conditionis alijs.

III. Concl. Inferior superior non potest dispensare in lege superioris, quoties superior reseruauit sibi dispensationem, aut inferiori prohibuit dispensandi facultatem. Ratio est euident, quia inferior non habet potestatem in superiore, seu in eius leges; cum illæ dependant à potestate superioris. Nihilominus Episcopi possunt dispensare in lege Pontificis; & Conciliorum generalium, quando adest magna necessitas, & est periculum in mora, & impotentia adeundi Pontificem, & materia est parua, aut leuiter obligans; nam tunc ex rationabili interpretatione censetur Episcopus habere potestatem dispensandi etiam in expressè reseruatis Pontifici; ut in censuris, votis, impedimentis matrimonij &c. ita Panorm. in c. ac si Clericus §. de adulter,

ter. n. 9. & ibi Decius, Felin. & passim Theologi Azor. p. 1. lib. 5. c. 15. q. 7. plures citans, Vasquez, Rodriq. Villalob. Herincx &c. Immo etiam Prælati Regularium exemptorum possunt cum suis subditis dispensare in legibus Pontificijs in ijs, casibus, in quibus possunt Episcopi cum suis, quia in ijs, quæ sunt iurisdictionis gaudent potestate Episcopali respectu suorum subditorum, ut tradit signanter Roder. in qq. reg. & alij.

IV. Concl. Licet regulariter ad dispensationem requiratur causa; tamen si dispensatio concedatur à legislatore, vel ab alio habente facultatem dispensandi, valida est, sed illicita. Ita communis opinio contra nonnullos. Prob. lex pendet in fieri, & conservari à voluntate superioris, ut habeat suam vim, ergo poterit legislator, si velit, aliquem eximere ab obligatione legis etiam sine causa. Aduertit tamen Herincx, quod si dispensatio redundaret in damnum iniustum aliorum, ut si cæteris Communitatis imponeretur gravior tributum. ratione exempti à lege, adeo ut lex tributaria aduersaretur iustitiæ commutatiuæ, esset inualida quoad quoram, saltem iniusti excessus. An verò utens tali dispensatione, posito, quod sit valida, peccet; non conueniunt Doct. Nauar. Roder. & plures alij tenent, quod peccet saltem venialiter, quamplures alij censent nec quidem venialiter peccare, quia iam à lege est solutus; secus si ad indebitè dispensandum superiorem scienter induxerit.

V. Concl. Dispensatio concessa ab inferiori superiori in lege superioris maioris absque causa, inualida, & irrita est; ita Theologi, & Canonistæ; & signanter D. Thom. 2. 2. q. 88. art. 12. Prob. Etenim inferior dispensat in alienis bonis, & aliena voluntate superioris, ac proinde, ut dispensatio valide fiat, requiritur iusta causa, qua deficiente superior non censetur consentire, nec iustè præsumi potest eius potestas; nec rationi consonat, superiorem velle concedere, in tali casu dispensationem, vel dispensandi potestatem. Immo nec censetur valida dispensatio facta ab eo, qui bona fide credebatur, causam esse iustam, & sufficientem, cum reuerà non esset; licet dispensatus sit tutus in conscientia, donec sibi de insufficientia causæ sibi certò conflet; eo quia, sicut bona fides petenti dispensationem sine

causa sufficienti, non efficit dispensationem validam, ita neque illam reddit validam bona fides concedentis. Sic discurrunt Bonacin. de leg. disp. 1. q. 2. p. 3. Pontius de matrim. Castropal. & alij.

VI. Concl. Quando Prælatus aliquem inhabilem ad aliquod officium promouet, censetur cum eo dispensare, si impedimentum sit iuris humani. Ratio, quia ad dispensationem non requiritur causæ cognitio, sed solum voluntas dispensandi, de qua in præsentī casu satis constat, si inhabilem scilicet promouet; in ijs autem, quæ sunt iuris D. non censetur dispensare, cum ad talem dispensationem exigatur causæ cognitio, & examinatio. Similiter taciturnitas Prælati videntis aliquem iure impeditum exercere actum sibi interdictum, est tacitæ dispensationis signum, & inducit dispensationem; ita Paludan. in 4. d. 36. q. 4. art. 4. Azor. lib. 5. c. 15. q. ult. Salas de leg. disp. 20. sect. 9. & alij, nam taciturnitas est ratihabitio de præsentī, quæ sufficit ad concedendam iurisdictionem.

Cæterum potest ordinarius loci cum forensibus in suo territorio existentibus, sicut cum subditis dispensare in legibus tam communibus, quàm municipalibus; non autem in votis, iuramentis, irregularitate, aut alio singulari impedimento; sic enim refertur, declarasse S. Congregationem Card. quoad vota &c. estd opinio contraria videatur Herincx probabilis.

## QVÆSTIO V.

*Quomodo dispensatio reddatur inualida ob taciturnitatem veri, vel ob errorem, & metum.*

**N**ot. Quòd subreptio est subreptio veri, & obreptio est narratio falsi; unde Iuristæ distinguunt inter rescriptum, seu dispensationem subreptitiam, & obreptitiam; hæc enim tunc est, quando obtinetur per suggestionem, vel narrationem falsi; illa verò quando per taciturnitatem veri obtinetur, quàmuis frequenter ista inter se confundantur, ut passim notant Doctores.

I. Concl. Taciturnitas qualitatis, quàm iura volunt exprimi, reddit gratiam subreptitiam, quàmuis constet, quod,



ea expressa, superior eandem facultatem concessisset. Prob. Quia iura pro forma exigunt expressionem talium qualitatatum; sed forma substantialis est semper seruanda ergo &c. Idem dicendum est de qualitate, quæ ex stylo Curiae semper est exprimenda necessariò in impetratione dispensationis, ne reddatur subreptitia, etsi constet, ea expressa, à superiore adhuc gratiam fore concedendam. Ratio est, quia cum stylus Curiae faciat ius cap. Quàm graui de crimine falsi ab eo non est recedendum. Ita Suarez tom. 2. de Relig. tract. de voto lib. 6. cap. ult. Sanchez lib. 8. de matrimonio, & alij. Secus est, si nec Ius, nec stylus Curiae, neque consuetudo specialiter præscribunt aliquid in dispensatione exprimendum, quis tacuerit qualitates dispensationi extrinsecas, quia tunc valebit dispensatio. Verum vitatur dispensatio, si taceantur qualitates intrinsecæ dispensationi, & maximè causa finalis; quibus expressis, Prælarus non concessisset eodem modo, quo concessit. Suarez, Sanchez Bonacin. & alij.

II. Concl. Quoties in præcibus duæ narrantur causæ copulatiuæ, quarum altera est vera, est altera falsa, spectanda est causa finalis, atque ea existente vera, non obstat alterius falsitas ita Panormit. & alij, quos refert, & sequitur Mascard. de probat. concl. 325. n. 3. Ratio est, quia quando plura copulatiuè narrantur, quæ de iure non sunt omnia necessaria, resoluitur, copulatiua illa in disiuunctiuam. Verum cum disiuunctiuè narrantur causæ, sufficit alteram esse veram, ne rescriptum sit subreptitium, ut habetur expresse in cap. inter cæteros de rescriptis, & tradunt Gurtierrez quæst. Can. lib. 2. Sanchez lib. 8. de matri. disp. 21. & alij. Si verò narretur una tantum causa, & ea sit falsa, inualida absque dubio erit dispensatio, quia taceretur aliquid, quod prudentem habet connexionem cum materia dispensationis.

III. Concl. Vitatur dispensatio, sitquæ subreptitia, quando in supplicatione committitur error circa moralem substantiam rei; sicut enim alij contractus; sic & dispensatio tunc est inualida, & nulla. Quod verum est, ait Herincx; etsi errore detecto, superior etiam facilius dispensasset. Quare non valet dispensatio petita in residentia beneficii simplicis, cum sit curatum; in 3. gradu consanguinitatis, cum

cum sit affinitatis, estò in hac dispensatio sit faciliior, aut è contra. Item in impedimento dubio, cum sit certum; quia tunc non exprimitur moralis substantia rei, & dispensans censetur dispensare in specie sibi expressa; idem est, si petatur dispensatio in 3. gradu, cum sit secundus. Secus est iuxta Bonaci. q. 2. p. 5. & plures alios, si petatur dispensatio in 2. gradu, cum sit tertius, aut in 3. cum sit 4. eo quia non sunt species condistinctæ, sed 2. gradus continet tertium, & 3. quartum, ut minorem; dispensans autem in toto censetur etiam dispensare in parte contenta.

IV. Concl. Ex regula expressa Pij V. Constit. 13. in Bullar tom. 2. ad dispensationem in consanguinitate, & affinitate, requiritur, ut gradus propinquior exprimat, si sit primus à stipite, v. g. si Patruus cum nepte, ex fratre, aut sorore, vel Amita cum Nepote ex fratre, aut sorore, matrimonium inire desideret; cum (ut ibidem dicitur) in eo sua sanctitas nunquam dispensare intendat.

Ceterum dum personę dispensandę distant in gradu inæquali v. g. 1. & 3. vel 3. & 4. expedit quidem omninò id declarari, ut rectè aduertit Herincx; & sæpè facultates apostolicæ, quæ quibusdam delegantur, se extendunt, v. g. ad 2. & 3. mixtum, quæ tamen non se extendunt ad 2. gradum purum; etsi non necessariò debeat propinquior tunc exprimi, cum remotior trahat secum propinquiorem iuxta regulam allegatam Pij V. obrentis tamen postea, ut ibidem additur, litteris pontificijs declaratorijs gradus propinquioris, non expressi in petitione, quæ siquidem non exiguntur ad valorem iuxta Dicastil. disp. 8. de matrim. dub. 9.

V. Concl. Dispensatio obtenta per metum incussum ad eam obtinendam valida est. Ita Sanchez l. 3. de matr. disp. 39. Suarez de leg. l. 6. c. 21. Herincx, & alij. Ratio, quia gesta per metum valida sunt, exceptis casibus in iure expressis; secus autem dispensatio obtenta per dolum, & mendacium, quoties dolus, & mendacia versantur circa causam finalem, & motiuam; quia dispensatio vim recipit à voluntate dispensantis, & dispensans non habet voluntatem dispensandi, quoties decipitur circa causam finalem, & motiuam, ergo &c. Quod si dolus, & mendacia versentur circa causam solum impulsivam, valida est dispensatio, ut passim tradunt DD. nec viriatur dispensatio, si

cirretur in nomine personę, vel in nomine Dięcesis: Ita DD.

VI. Concl. Gratia absolutę concessa non expirat morte concedentis, etiam re integra, ut passim tradunt Doct. Verum si est gratia facienda expirat morte concedentis, re integra; secus autem, si non sit res integra; ut habetur ex cap. Si cui nulla de prębend. in 6. Vbi deciditur facultatem alicui concessam conferendi beneficia non expirare morte concedentis, etiam re integra. Secus si detur potestas conferendi beneficia certis personis, non in fauorem, & gratiam collata, sed in gratiam eorum, quibus beneficia conferenda sunt. Ratio, quia in primo casu hæc gratia facta erat omnino perfecta, & nullius executionis indigens respectu illius, in cuius fauorem concessa est. At in posteriori casu non erat gratia facta, sed facienda respectu eorum, in quorum fauorem data est.

Quęres. In quibus casibus censetur electa industria Personę si potestas alicui sit delegata.

Resp. Pręsertim in quinque casibus. Primò, quando aliquid ratione confidentię alteri committitur: 2. quando grauias, & ardua negotia mandantur: Quando dicatur, Tu, vel per Te agnoscas, vel per te ipsum; quia propter geminationem intelligitur electa industria personę; ac proinde non potest, committi, seu alteri delegari: 4. quando alicui non committitur iurisdictio, sed nudum ministerium, v. g. ut excommunicet, absoluet &c. quo casu non potest alteri subdelegari, nisi is, cui facta est commissio, esset legatus ex cap. fin. §. ult. de officio delegati: 5. quando Princeps committeret ea, quę sibi sunt reseruata in signum supremę potestatis, tunc enim nequit fieri subdelegatio: 6. Quando causa commissa est per verbum mandamus, vel præcipimus; nam cum talia verba necessitatem inferant, non poterit fieri subdelegatio glos. in leg. sepe audiui Cæsarem ff. de officio prætoris. Ita Mallet. lib. 2. tit. 1.

## QVÆSTIO VI.

*Quomodo cesset lex per priuilegium.*

**N**Ot. 1. Quod priuilegium sic communiter describitur, est priuata lex in alicuius fauorem data à Principe  
con-

contra Ius commune; dicitur data à Principe; nam solus ille, qui potest legem ferre, potest etiam per priuilegium à lege eximere; & sicut in politicis, seu temporalibus; sic in spiritualibus, cæteris paribus, est discurrendum; Vnde solus Papa potest dispensare in sacris canonibus, & priuilegia spiritualia concedere; Dicitur contra legem, seu ius commune; quia quando alicui conceditur priuilegium, præter Ius commune, & sine præiudicio alterius, non est propriè priuilegium, sed beneficium dicitur, ut notat Miranda in Manual. Prel. t. 2. ex Panormit. in cap. olim de verb. signif.

Not. Quod priuilegium aliud est reale, aliud personale. Reale est, quod conceditur alicui respectu loci, muneris, & dignitatis; personale, quod immediate conceditur personæ ratione sui. Quare hoc discrimen est inter ista, quod personale personam sequitur, & cum persona extinguitur; Reale autem rei coheret, & cum eadem expirat. Item priuilegium aliud dicitur gratiosum, quod videlicet gratis conceditur; aliud conuentionale, quod conceditur interueniente pacto, & aliud purum, quod absolute conceditur. Insuper priuilegium partitur in id, quod respicit bonum commune, & in id, quod respicit bonum priuatum. Rursum, aliud est purè fauorabile, nempe, quod confert fauorem, & commodum, & nemini affert præiudicium; aliud odiosum, nimirum, quod uni confert fauorem, & alteri præiudicium. Denique aliud est, quod motu proprio Principis conceditur, aliud verò in gratiam petentis.

Not. 3. Quòd materia priuilegij debet esse honesta, rationabilis, fauorabilis, & debet consistere in aliqua facultate ad agendum aliquid, vel non agendum, ad recipiendum, vel non recipiendum. Effectus autem priuilegij respectu priuilegiati consistit in facultate aliqua faciendi, vel omittendi. Vt autem actus facti virtute priuilegij sint validi, requiritur, ut seruetur forma substantialis contenta in priuilegio; actus enim sine forma substantiali celebratus, ut alias notauimus, est inualidus. Verùm obseruandum, quod priuilegium duobus modis concedi potest; primò absolute, nullo alio opere iniuncto ad fructum priuilegij consequendum: 2. iniuncto aliquo opere, quod duobus modis iniungi potest, nempe sub conditione, vel

sub quodam modo, & solemnitate accidentali: si in priori forma, præstandum est opus iniunctum, ut fructus priuilegij obtineatur, quia conditio videtur importare formam substantialem; si autem in posteriori forma, tunc priuilegium valet, etiamsi opus, seu modus iniunctus non adimpleatur; de quo videndus Bonac. disp. 1. de leg. q. 3. p. 4.

Not. 4. Quòd differt priuilegium à lege, etsi dicatur lex priuata, nam priuilegium ex natura sua non postulat esse perpetuum, aut concedi communitati perfectæ, aut solemniter promulgari. Insuper per se loquendo non obligat priuilegiatum ad eo utendum, nemo enim cogitur uti beneficio. Nihilominus per accidens potest quis teneri ad utendum priuilegio; quando videlicet, hoc expressè in priuilegio præcipitur, prout fit Clericis, ut utantur priuilegio Clericali Canonis. Si quis suadente &c quod quidem priuilegium simul habet veram rationem legis; sicut etiam habent priuilegia stabilia, quæ sunt inserta corpori Iuris, aut solemniter promulgata respectu eorum, quibus prohibetur contrauenire, prout sunt priuilegia Minorennium, & pupillorum. Potest pariter per accidens fieri, ut quis teneatur uti priuilegio; si per illud fiat habilis ad actum lege præceptum: sic per priuilegium exemptus à communi interdicto, tenetur die festo audire sacrum.

I. Concl. Per priuilegium à Principe alicui concessum; siue scripto, siue sine scripto, & bullatione cessat lex respectu eius, cui indultum est: conc. est communis, & constat ex supradictis; etenim Princeps, in cuius potestate est legem condere, etiam potest alioquos iustis de causis eximere ab ipsa lege. Confirm. Quia si per priuilegium lex non cessaret, maximè esset quia præiudicium inferretur bono communi, & Reipublicæ; sed hoc non obstat; licet enim priuilegium respiciat bonum priuatum, cedit tamen mediàtè in bonum commune, cum non legitimè concedatur, nisi quia expedit Reipublicæ Personis, aut rebus, quibus conceditur bene esse. Siquidem conceditur priuilegium ijs, qui sunt de Republica benemeriti, aut de quibus speratur, quod sint benemerendi; multum planè refert, ut remunerentur benemeriti; & ut prouocentur alij ad benemerendum. Quam quidem veritatem tradunt etiam SS, PP. nempe quotquot de priuilegijs mentionem fecerunt,

significando ; idèd esse retinenda , & conseruanda , quia non erant nociua communi bono ; quin potius utilia , utpote quibus honor exhibetur benemerito , vel quies procuratur , vel impeditur oppressio . Quare D. Greg. lib. 7. Epist. 39. ita disertè scribit . *Grane nimis , & contra Sacerdotalia constat esse propositum , velle cuiusquam Monasterij priuilegia olim indulta consundere , & ad irritum , quæ sunt pro quiete disposita niti deducere .*

II. Concl. Priuilegia varijs modis desinere possunt , aut amitti . Desinit itaqùè primò priuilegium , cessante causa , ob quam fuit concessum ; dummodo priuilegium non sit executioni mandatum l. Vrianus ff. de fideiussoribus . Aduertunt tamen passim Doct. quod hæc conclusio est intelligenda cum aliqua exceptione , seu limitatione . Primò nisi priuilegium concedatur ad vitandum aliquod morale periculum incontinentiæ , non cessat hoc dispensationis priuilegium cessante ipso morali periculo ob senilem ætatem , ob infirmitatem , vel ob alias causas : 2. nisi illud sit de re , quam Princeps etiam sine graui causa honestè concedere potest ; ita se habet priuilegium de anticipando Missæ Sacrificio ante auroram ob legitimas causas : 2. Desinit , seu amittitur priuilegium per reuocationem ; ac proinde priuilegium gratiosum extinguitur per reuocationem concedentis , vel successoris , vel eius superioris ; priuilegia autem remuneratoria , qualia sunt priuilegia Mendicantium Regularium ; ut loquitur Pius V. in Bulla , *Esse Mendicantium* non possunt reuocari per se ; Ratio est , quia Princeps iure naturæ tenetur seruare pacta , & conuentiones etiam cum subditis , per accidens tamen , sicut potest priuare subditos alijs bonis , quando necessitas boni communis id iusscit ; ita etiam potest eos priuare priuilegijs antea concessis . Quæ quidem reuocatio fit in specie , vel per clausulam generalem : non obstantibus quibuscunque priuilegis , per quam clausulam nõ censentur reuocata priuilegia contenta in corpore iuris communis , nisi quoque eorum clausula derogatoria exprimat . Idem dicendum de priuilegijs concessis per modum contractus : ita communiter Doctores : 3. Amittuntur priuilegia , seu cessant , per non usum , vel desuetudinem , aut per usum contrarium , quando nimirum sunt odiosa , & redundant in grauamen , & quasi



seruitutem aliorum, ut expressè habet l. & de nundinis. Ratio est, quia omnes obligationes tam reales, quàm personales sic extinguuntur, nempe spatio decem annorum, inter præsentes, 20. autem inter absentes. Cæterum Priuilegium Ecclesiæ concessum cessat per non usum 40. annorum, & contra Ecclesiam Romanam spatio 100. annorum; contra Monasteria, loca pia, personas, vel bona Religiosorum non currit præscriptio, & non usus, nisi post 60. annos; & ut currat præscriptio requiritur notitia priuilegij, & voluntas non utendi illo. At si priuilegium non cedat in alterius grauamen non amittuntur per præscriptionem, quia neque ipse priuilegiatus contra se ipsum, neque alij, ad quos non pertinet præscribere possunt: ita Rodriq. r. 3. qq. Reg. q. 35. art. 2. & alij: 4. Amittitur per delictum ipsius priuilegiati; quod duplex esse potest, unum non pertinens ad usum priuilegij, & tale delictum non tollit priuilegium, nisi in casibus à iure expressis; quo pacto Clericus mercaturam exercens perdit priuilegium clericale fori cap. ult. de vita, & honest. Cler. Alterum pertinens ad usum priuilegij, idest abusus priuilegij, vel per excessum facultatis concessæ, vel sumendo inde occasionem licentiùs viuendi, & liberiùs peccandi, præsertim cum scandalo, & detrimento boni communis: *Nam priuilegium meretur amittere, qui permessa sibi abutitur potestate* ut dicitur cap. ubi dist. 74. & cap. priuilegium 11. q. 3. Idquè contingit ex iuris dispositione, quæ est pœnalis; ac proinde requiritur sententia Iudicis (qui respectu Regularium exemptorum est Pontifex) saltem declaratoria criminis.

Denique amittitur priuilegium per voluntariam renuntiationem exterius factam, & à concedente acceptatam, Secùs est, si renuntiatio sit tantum interna, ac non dum acceptata, prout patet à simili in alijs iuribus, donationibus, & fauoribus. Hoc tamen locum habet in solis priuilegijs, quæ dantur per modum alicuius potestatis faciendi, vel omittendi aliquid in futurum, qualis est facultas audiendi confessiones, eligendi Confessarium &c. non autem in illis, quæ habent effectum momentaneum, seu operantur statim atque sunt obtenta, qualis est dispensatio in irregularitate, legitimatio &c. hæc enim non possunt redire per renuntiationem, nec etiam per reuocationem Principis.

Quæ-

Quæres 1. Quando priuilegium sortitur suum effectum? Resp. cum Hierinex ex communi sententia. Ordinariè priuilegium non sortiri suum effectum, antequàm innotescat, & acceptetur à priuilegiato, vel eius nuntio, seu procuratore. Ratio, quia priuilegium est veluti quædam donatio, & consequenter exigit, quod innotescat, & acceptetur; licèt in aliquibus priuilegijs non sit necesse, quod adsint tales conditiones; ut tradunt Suarez, Sanchez, & alij. Immodò iuxta Sanchez lib. 4. sum. c. 48. Bonac. & quamplures alios contra Suarez, & Vasquez priuilegium obtinet suum valorem à tempore acceptationis factæ à Procuratore, etiam respectu actus per ipsum priuilegiatum exercendi. Hinc inferunt validum esse matrimonium contractum post dispensationem Romæ simpliciter factam, & à Procuratore acceptatam; etsi contrahentibus non dum innotuerit. Similiter valida est confessio facta Sacerdoti post datam ab Episcopo, & acceptatam à Procuratore facultatem; si Sacerdos id ignorans intendat absoluerè quantum potest.

Quæres 2. An, & quomodò fiat communicatio Priuilegiorum, quæ sunt Regulatibus concessa.

Resp. Quod communicatio priuilegiorum consistit in extensione quadam, seu multiplicatione priuilegij, per quam fit, ut ius uni Religioni concessum, etiam alteri concessum censeatur. Hæc autem priuilegiorum communicatio dupliciter fieri potest, nempe perfectè, & imperfectè; quando priuilegium communicatur perfectè, eius communicatio dicitur ad instar; quando verò communicatur imperfectè, idest, non cum omni fauore, & gratia &c. eius communicatio non dicitur ad instar.

Itaque gaudent Regulares Mendicantes priuilegiorum, communicatione ex Leone X. in constit. quæ incipit *Diuidum per nos* an. 1519. & ex Pio V. per bullam incip. *Romanus* an. 1567. & pro nostro Seraph. ordine extat amplissima concessio Clement. VIII. in Bulla 2. in qua motu proprio, & ex certa scientia tribus Ordinibus S. Francisci communicat omnia indulta, gratias, indulgentias; & alia quæcunque priuilegia concessa, & concedenda alijs quibuscunque Ordinibus, tam Mendicantibus, quàm non mendicantibus, perinde ac si eis specialiter concessa fuissent.

Communicant pariter in priuilegijs Societatis Iesu, ut videre est apud Rodriq. in q. q. reg. tom. 1. & apud Mirand. & alios, qui docent etiam, communicationem priuilegiorum intelligendam esse respectiue ad Religionem, cui communicatur; nimirum hac lege; ut quæ conceduntur pro Generalibus, Prouincialibus &c. intelligantur communicata illis, qui, etsi non eodem nomine, eodem tamen munere fruuntur. Similiter priuilegia concessa festiuitatibus Sanctorum unius Ordinis, censentur etiam concessa festiuitatibus Sanctorum alterius ordinis. Itaque priuilegia, communicata ad inuicem ita fiunt propria illius Religionis, cui communicantur, ac illius, cui primò erant concessa.

Verùm in generali communicatione priuilegiorum non comprehenduntur priuilegia exorbitantia, quæ videlicet non sunt solita concedi. Similiter priuilegia, quæ fuerunt priori Religioni ex aliqua ratione speciali concessa, quæ non reperitur in alijs. Excipiuntur pariter priuilegia, quæ sunt preiudicialia, ut priuilegia de non soluendis decimis &c. ut censuit Rota in una Vallis Toletan. quartæ funeral. 19. Aprilis 1606. & deniq; exceptio est de priuilegijs scondentibus ea, de quibus in iure reperitur sancitum, ut in generali concessione non veniant, nisi in specie exprimantur. Ita Mallet. Insuper in communicatione priuilegiorum non communicatur usus, vel non usus, sed ius utendi priuilegio; ac proinde, licet unus non utatur priuilegio multis concessio, non præiudicat alijs non utentibus illis. Item priuilegia cōcessa uni Monasterio unius Ordinis censentur etiam concessa omnibus Monasterijs eiusdem ordinis. Secus est de priuilegio concessio uni tantum Religioso. Ita Doctores communiter.

Quæres 3. Quid sentiendum sit de confirmatione Priuilegiorum Regularibus concessorum.

Resp. Priuilegia Regularibus concessa, maximè vero nostro Ordini à pluribus Pontificibus ante, & post Concil. Trid. fuisse confirmata ex certa scientia, ac per Apostolicam potestatem, nempe à Paulo II. Sixto IV. Clement. VII. & VIII. & alijs, quos signanter referunt Rodriq. Potel. Mirand. & Herinex. Et generaliter omnia priuilegia omnium Mendicantium Ordinum confirmauit Pius V. Bulla *Esse Mendicantium Ordines*. Cui in hac parte, ut passim

notant Doctores supracit. non derogant aliæ Pontificum Tridentino posteriorum Bullæ priuilegiis confirmati-  
uæ, in quibus additur clausula. *In his, quæ non aduersantur*  
*Decretis Concil. Trid.* Etenim ut plurimi Doctores obseruant,  
clausula illa non intelligitur de omnibus priuilegijs, quo-  
uis modo contrarijs Tridentino, sed tantum de ijs, quæ  
formaliter ipsi contrariantur, & quæ Concilium ipsum ex-  
pressè, & signanter reuocat. Nec obstat, quod Trid. sess.  
25. cap. 22. de Regularibus decernat Quod omnia, & sin-  
gula in superioribus Decretis contenta obseruari S. Syno-  
dus præcipit; non obstantibus priuilegijs sub quibuscun-  
que verborum formulis conceptis: eò quia loquitur Trid.  
de decretis huius sessionis dumtaxat; ut satis colligitur ex  
textu, & alijs circumstantijs. Siquidem imponit coronid-  
em sessioni dicens. Hæc omnia, & singula in superiori-  
bus decretis ( non ait sessionibus ) contenta &c. Quod si  
etiam alia fuisset Concilij mens; ut sapienter discurret He-  
rincx Episcopus Iprensis, statuisset derogationem ad cal-  
cem totius Concilij, seu ordinationum omnium. Vnde in  
decretis aliarum sessionum aliquando expressè derogat pri-  
uilegijs, quæ summarie exprimit Rodriq. tom. 1. q. 8. art.  
8. aliquando non.

Quæres 4. Qualiter interpretanda sint priuilegia.

Resp. Quamuis in q. 6. disp. 5. plures regulæ inseruien-  
tes ad leges, & etiam priuilegia interpretanda traditæ sint;  
nihilominus sequentes addo, quæ peculiariter priuilegij  
interpretationem respiciunt.

I. Regula. Priuilegium regulariter strictè est interpre-  
tandum: quia cum priuilegium aliquid contra ius conti-  
neat, & plerumque ius alterius diminuat, oportet illud in-  
terpretari ita strictè, ut quàm minimè possibile est, deroge-  
tur iuri communi, neque ius alterius diminuat ex cap.  
Cum dilectus §. final. de consuet.

II. Regula. Priuilegium, quod non est contra ius com-  
mune, sed tantum contra legem priuatam, siue scriptam,  
siue non scriptam interpretandum est latè cap. Olim de  
verb. signif. Item non sunt strictè interpretanda priuilegia,  
quando ex stricta interpretatione nihil operantur. Verum  
priuilegium, quod sapit beneficium est latissimè interpre-  
tandum ex l. benef. ff. de constit. pariter priuilegium fauo-

rabile est latè interpretandum; odiosum autem stricte iuxta regulam iuris. Odia restringi, fauores conuenit ampliari.

III. Regula. Priuilegium contentum in corpore Iuris non est stricte interpretandum: ita passim Doctores cum Couar. 4. decret. 2. q. c. 8. §. 8. Secus autem priuilegium, non contentum in corpore iuris.

IV. Regula. Priuilegium, quod dicitur ad instar ita explicandum est, ut per ipsum censeatur concessus omnis fauor, & gratia cum eadem extensione, & limitatione, quæ continetur in alio ad instar cuius priuilegium est concessum; ut ex communi tradit Suarez de leg. lib. 8. cap. 15.

V. Regula Priuilegium, quod est ab homine est potentius consuetudine extensiuè, idest in ordine ad pluralitatem effectuum. Consuetudo verò est potentior intensiuè in ordine ad eosdem effectus. Ratio primæ partis est, quia per priuilegium potest concedi aliqua potestas, quæ per consuetudinem etiam immemorabilem acquiri non potest: ita Panormitan. cap. Quanto de consuetudine. Ratio posterioris est, quia facilius perditur priuilegium, quam consuetudo, quia maior est vis eius priuilegio.

VI. Regula. Priuilegium censeatur concessum solummodo personis, quæ sunt in priuilegio expressæ, vel quæ in eo comprehenduntur ex significatione verborum priuilegij, aut propter materiæ, & actionis connexionem, aut propter iuris dispositionem. Vnde priuilegium concessum Religionis, extenditur etiam ad Moniales. Item priuilegium concessum filijs extenditur etiam ad filias; & priuilegium concessum fratribus extenditur etiam ad Sorores. Item priuilegium concessum bonis Mariti extenditur etiam ad bona uxoris communia cum bonis Mariti; Similiter uxor gaudet priuilegio nobilitatis obtento à Marito. Denique priuilegium audiendi diuina officia tempore interdicti extenditur etiam ad familiares, ac domesticos: hæcenus de legibus.



# TRACTATUS SEXTVS DE PECCATIS.

## DISPVATIO I.

*De natura, & essentia peccati in genere.*

### QVÆSTIO I.

*In quo consistat ratio formalis peccati.*

**N**OT. 1. Quodd peccatum multipliciter accipi potest. Primò pro quocunque defectu siue naturæ, siue artis, & sic à Philosopho in 2. Physicorum monstra-  
vocalantur peccata naturæ, & errores alicuius artis, ut grammaticæ, Rethoricæ &c. appellantur peccata artis. 2. sumitur in S. Scrip. pro victima, quæ offerri solebat pro peccatis à populo commissis, sic in Osea cap. 4. dicitur: *Peccata populi mei comedent*, subintellige Sacerdotes: 3. sumitur pro occasione peccati, quo sensu Deuteronomij cap. 9. ille vitulus aureus, qui fuit Israeli occasio peccati Idolatriæ, dicitur peccatum. *Peccatum vestrum, quod feceratis, inquit Moyses, arripient igne combussis*. Similiter concupiscentia quatenus inclinât nos ad peccatum, dicitur à Trid. sess. 5. in decreto de peccato originali, peccatum, & aliquando etiam sumitur pro effectu peccati propriè dicti iuxta illud ad Romanos 7. *Non ego cœpor ilind, sed quon habitat in me peccatum* idest, ut explicat D. Aug. Concupiscentia ex peccato originali orta: 4. sumitur pro defectu moris non concernente finem supernaturalem, seù prout deviat à recta ratione absque lumine fidei, & sic dicitur peccatum philosophicum. Denique sumitur pro transgressione alicuius legis naturalis, vel Diuinæ, vel humanæ, quatenus nobis præscribunt modum agendi in ordine ad finem supernaturalem, & de hoc peccato theologicè sumpto hic quæritur, non quidem prout comprehendit etiam peccatum originale, de quo egimus in tract. de homine in statu naturæ lapsæ,



sed de peccato personali, hoc est, quod fit immediatè à libero arbitrio uniuscuiusque personæ.

Not. 2. quod quatuor à DD. adducuntur definitiones peccati iuxta quatuor genera causarum. Prima ex parte causæ efficientis, & est huiusmodi. Peccatum est transgressio legis Diuinæ: 2. ex parte causæ materialis sic iuxta D. Aug. Peccatum est factum, vel dictum, vel concupitum contra legem Dei æternam, quæ definitio explicari potest tam de peccato commissionis, quàm omissionis, dicendo non factum, non dictum, quando quis tenebatur: 3. ex parte causæ formalis sic. Peccatum est carentia rectitudinis debitæ; quæ deberet inesse actui secundo, & non inest, & hæc est D. Ansel. & Scot. 4. ex parte causæ finalis. Peccatum est auersio à Deo tanquam ab ultimo fine supernaturali, & conuersio ad creaturas.

Not. 3. quod peccatum aliud est habituale, aliud actuale; habituale diuiditur in originale, & personale; illud est carentia iustitiæ originalis in nostro protoplasto, & ad nos traducta; hoc autem est à voluntate propria cuiuscunque hominis. Actuale diuiditur in mortale, & veniale. Mortale est transgressio voluntaria legis Diuinæ, vel humanæ grauiter obligantis. Veniale verò leuiter obligantis. Item peccatum actuale subiuiditur in peccatum commissionis, & in peccatum omissionis. Primum est quod fit contra legem prohibentem aliquem actum, ut si quis furetur: 2. est quod fit contra legem præcipientem, nimirum omitendo aliquem actum præceptum, ut si quis non audiat Sacrum. Conueniunt omnes Theologi peccatum omissionis formaliter consistere in aliqua priuatione, idest in libera omissione actus debiti; differunt tamen in quo consistat ratio formalis peccati commissionis; quidam enim volunt consistere in aliquo positiuo, hoc est vel in ipso actu, qui prohibetur, vel ex eo, quod actus ille liberè tendat in obiectum, quod proponitur, ut prohibitum. Alij cum Ferrariensi contra gentes c. 9. censent, rationem formalem peccati consistere simul in actu positiuo, & negatione gratiæ sanctificantis, aut rectitudinis debitæ. Alij denique cum D. Bonau. in dist. 35. art. 1. & cum Scoto in 2. dist. 33. rationem formalem peccati tenent esse reponendam in priuatione rectitudinis, & conformitatis ad legem Diuinam, vel

vel humanam, quæ talem actum præcipit, vel prohibet, & hæc inter Theologos est magis communis, iuxta quam sit.

Concl. Ratio formalis peccati consistit in carentia conformitatis, seu rectitudinis, quam actus voluntarius habere deberet, sed non habet ad legem diuinam, vel humanam, contra cuius præscriptum elicitur, vel omittitur. Hæc est germana Scoti sententia loc. citat. ubi cum impugnasset alias opiniones concludit. Concedo igitur iuxta solutionem conclusionis præmissam, quod peccatum est formaliter corruptio rectitudinis in actu 2. non quidem, quæ inest, sed quæ deberet inesse, quod sic probat. Voluntas libera debitoria est, ut omnem actum suum eliciat conformiter regulæ superiori, scilicet secundum diuinum præceptum, & ideo quando agit disformiter ab illa regula, caret iustitia actuali debita (hoc est) iustitia, quæ deberet inesse actui, & non inest, & hæc carentia in quantum est actus voluntatis deficientis est formaliter peccatum actuale. Prob. nostra concl. auct. SS. PP. & signanter D. Aug. qui exponens illud Ioan. *Sine ipso factum est nihil, aut, peccatum non per ipsum factum est, quia peccatum nihil est*, & lib. 12. de Ciuit. Dei cap. 5. conformiter loquens inquit. *Nemo ergo efficiens causam male voluntatis querat, neque enim est efficiens, sed deficiens*. D. Greg. Nise. orat. cathechetica c. 5. ubi ait: *Vitium omne, improbitas in boni priuatione suam habet formam, & characterem*; & D. Basil. asserentis, *vitium virtutis esse priuationem, ut caligo lucis est recessus*: idem tradunt etiam alij Sancti Patres: ergo ratio formalis peccati consistit in carentia, seu priuatione boni moralis.

Prob. ratione à priori. Nulla res est, aut dicitur mala, siue in se, siue in ordine ad aliud, nisi per priuationem, aut defectum bonitatis, sed peccatum commissionis est maximum malum in genere moris: ergo eius malitia formalis in priuatiuo, & non in positiuo consistit. Confirm. Ex ratione bonitatis, ut opponitur malitiæ, quæ semper in perfectione consistit, vel in complemento rei, siue in se ipsa, siue in ordine ad alia: ergo ex opposito sequitur, malitiam in defectu talis integritatis, vel complementi consistere. Adde quod malum tam in genere naturæ, quam artis consistit in priuatione conformitatis ad leges, & regulas naturæ, & artis, hoc est in deficientia, ac deuiatione ab ipsis:

ergo tantò magis malum morale consistit in deficientia, & recessu à legibus, & regulis morum. Prob. insuper ratione Scoti in 2. dist. 37. Posita voluntaria, & libera priuatione conformitatis ad legem, & regulas morum in voluntate, vel in eius actu; præciso, vel secluso quocunque positivo illis superaddito, intelligitur peccatum: ergo peccatum quod est malum morale formaliter consistit in priuatione.

Confirm. Etenim posita tota substantia actus cum libera tendentia in obiectum, quod proponitur prohibitum, adhuc actus non intelligitur formaliter malus, nisi intellecta tali priuatione: ergo &c. Prob. modò quod peccatum non consistat formaliter in aliquo positivo morali, quæ dicatur relatio dissonantiæ, vel disconuenientiæ ad legem, aut ad rationem, ut putat Vasquez, quem sequitur Casp. Talis enim dissonantia, & disconuenientia non benè concipitur, vel explicatur per modum ordinis positivi, & contrarietatis ad legem, aut ad rationem, sed potius explicari debet per negationem, nempe per modum recessus à lege, & sic non importat aliquam relationem positivam. Tum quia non considerata illa disconuenientia positiva in actu, sed tantum carentia debitæ honestatis, & conformitatis ad rationem, habetur totum id, quod requiritur ad rationem malitiæ: ergo superfluit quæcunque alia ratio positiva dissonantiæ, seu disconuenientiæ.

Arg. cont. concl. Malum naturale respectuum, seu malum alteri sæpè consistit formaliter in positivo, ut patet de errore intellectus, qui est malus, non tantum quia priuat scientia per suammet entitatem positivam, & de dolore, qui præter voluptatis priuationem, adhuc est malus: ergo & malum morale consistit in positivo præter negatiuum. Resp. neg. assumptum in ant. nam error intellectus est talis per carentiam rectitudinis, & sic dolor est priuatio perfectionis, seu voluptatis.

Arg. 2. Actus malus est talis formaliter ab eo, à quo habet tendere liberè in obiectum: sed talem tendentiam liberam in obiectum, ut sic propositum, habet actus antecederet ad quamcumque negationem, vel priuationem, & hoc totum est positium: ergo secundum entitatem positivam, ut sic tendentem in obiectum, est formaliter malus: min.

patet, nam omnis actus specificatur ab obiecto formali.

Resp. dist. mai. Actus malus &c. habet ab obiecto, quatenus tale obiectum est dissonum rationi, vel legi, conc. mai. quatenus est per se tale, neg. mai. seclusa enim lege, illa tendentia libera in obiectum non esset mala.

Contra. Tendentia positiua in obiectum, prout rationi dissonum, in actu est prior, quam priuatio conformitatis ad legem, quia talis tendentia est causa priuationis sequentis: ergo tendentia positiua actus in obiectum prohibitum prius intelligitur specificata in genere moris, quam intelligatur priuatio conformitatis. Resp. neg. assumptum in ant. nam, sicut obiectum est malum, quia est dissonum rationi, vel legi, ita etiam illa libera tendentia positiua in obiectum est mala ob eandem dissonantiam.

Contra. Actui malo per se, v.g. odio Dei secundum esse positiuum, & quatenus est formalis auersio positiua à Deo, conueniunt omnia prædicata, quæ competunt malitiæ formaliter: ergo actus malus secundum suum esse positiuum erit talis, & non per negationem conformitatis.

Confirm. eo quia saltem in actibus intrinsecè malis, quale est odium Dei eorum malitia consistit in entitate positiua, & non per conformitatem ad legem, alioquin non essent per se, & intrinsecè mali: ergo non omne peccatum commissionis consistit in priuatione formaliter.

Resp. neg. ant. ad confirm. dicimus nullum dari actum, per se malum, quod non sit tale per difformitatem à lege vel æterna, vel naturali, vel positiua, ut ostendimus in disp. 2. de leg. q. 1. Vnde actus odij ipsius Dei dicitur malus intrinsecè, quatenus est difformis à lege æterna, qua per impossibile sublata, non esset intrinsecè malus; tales enim actus ideo sunt necessarii mali quia lex æterna necessariò dictat esse tales, & non è contra.

## QVÆSTIO II.

*In quo consistat ratio peccati habitualis.*

**N**OT. 1. Quod in præcedenti quæst. diximus peccatum aliud esse actuale, aliud habituale, & ibidem de actuali data est descriptio; habituale autem sic definitur: Est

trans-

transgressio legis D. vel humanæ iam præterita, adhuc tamen moraliter permanens, instar habitualis effectus usque dum sufficienter sit retractatum, & deletum. Et quamvis doctores circa descriptionem peccati habitualis, non videantur discrepare; attamen non omnes conveniunt in modo explicandi, in quo nempe consistat ratio peccati habitualis. Thomistæ putant consistere in sola, ac simpliei privatione gratiæ. Alij præsertim Recentiores opinantur peccatum habituale nil aliud esse, quàm ipsum peccatum præteritum, & carentiam condonationis diuinæ, & æqualis satisfactionis ex parte peccatoris, quod idem est ac dicere, peccatum habituale esse actum præteritum ex parte Dei non condonatum, & ex parte peccatoris non efficaciter retractatum. Alij denique ut Scotistæ antiquiores ponunt rationem peccati habitualis in reatu quodam, seu in quadam obligatione ex actu peccaminoso contracta, qua quis statim ac peccat, realiter obligatur ad pœnam peccato correspondentem: ita Bassol. Almainus Tataret. Nicol. de Nyse, quibus consonant Aretinus, Fauent Gauatius, & doctiss. Mastrius, qui in disp. 8. ita loquitur de Scotistis recentioribus in sententiam Neutralium abeuntibus.

Verùm, quia Thomistæ præsertim iuniores adeò acriter in hanc opinionem Scoti insurrexerunt, ut ne dum falsitate, & improbabilitate omnimoda eam notauerint; sed etiam in Ecclesia iam damnatam esse dixerint inter propositiones quasdam Michaelis Baij: Hinc factum est, quod recentiores Scotistæ tot clamoribus, atque minis perterriti hanc germanam Scoti sententiam hæctenus à nobilioribus Scotistis egregiè defensam timidè nimis deseruerint, illam inuitè ad recentiorum sententiam trahentes.

Cæterùm Scotistas Iuniores à veteribus solum discordare censeo in modo explicandi mentem Doctoris, cum omnes affirmant in peccatore, transacto iam actu peccati, remanere reatum culpæ, quod per Sacramenta, ut determinat Concil. Trid. contra quosdam hæreticos, deletur.

Not. 2. Prò intelligentia Scoti doctrinæ, idest in quo consistat ista macula habitualis, seu reatus culpæ, & pœnæ, de quibus loquitur Scotus in 4. dist. 14. q. 1. art. 1. quod per reatum, & obligationem ad pœnam duo intelligi possunt, nempe vel ordinatio, & deputatio ad pœnam, quæ est

est denominatio extrinseca, aut relatio sumpta ab actu diuinae voluntatis, quo peccator ob actum peccaminosum præcedentem, deputatur ad pœnam illi debitam, vel denominatio extrinseca, aut relatio ab actu ipso peccati præterito desumpta, quæ est dignitas pœnæ, vel deputationis, & ordinationis ad pœnam, quatenus eo ipso, quo homo peccauit, redditur dignus ratione peccati, ut ordinetur ad pœnam. In primo sensu talis obligatio ad pœnam dicitur simpliciter, & absolutè reatus pœnæ, at in secundo sensu propriè dicitur reatus culpæ, qui veluti passio consequitur ad ipsum actuale peccatum, & manet moraliter, vel habitualiter in peccatore, quo sensu locutus est Scotus, quando loc. cit. dixit, reatum, seu obligationem ad pœnam esse peccatum habituale, qui quidem reatus appellatur etiam dignitas pœnæ, idest quatenus est dignus pœna.

I. Concl. ratio formalis peccati habitualis non consistit in priuatione gratiæ sanctificantis: ita Scotus in 4. dist. 14. q. 1. contra D. Thomam, & Thomistas omnes. Prob. 1. Si peccatum habituale consisteret in sola gratiæ priuatione: ergo sequeretur (inquit Scotus) qui commisisset duo peccata mortalia, & qui unum tantum, essent æquè peccatores intensiue, & extensiue, quia tota gratia quantum ad intensionem, & sola ipsa quantum ad extensionem priuat, tam in eo, qui commisit unum peccatum, quàm in eo, qui duo millia, & ideò unus non dicitur minus peccator post actum transeuntem, quàm alius, sed hæc videntur absurda: ergo &c. I. rob. sequela maioris: etenim in quolibet per unum peccatum mortale ita fit priuatio gratiæ, quod nihil eius remanet, ac per consequens per nullum succedens peccatum, potest ista priuatio fieri intensior, nequè extensior, loquendo non de priuatione iustitiæ actualis, qualis est rectitudo, quæ deberet inesse actui secundo, sed de habituali; quia non priuat nisi unum habitu gratiæ, sicut non est reatus nisi unius inesse: ergo apertè demonstratur peccatum habituale non consistere in sola priuatione gratiæ.

Præterea. Peccatum veniale pariter relinquit post se quamdā maculam, ratione cuius potest quis dici peccator habitualis, tamen non priuat gratia, neque ex parte, neque ex toto, ut apud Theologos certum est: ergo ratio



peccati habitualis non consistit in sola gratiæ priuatione. Currit paritas de peccato veniali, & mortali; nam mortale, & veniale actuale sæpè sunt eiusdem speciei e. g. furtum graue, & leue, & consequenter sunt eiusdem speciei utrumque habituale; tùm quia peccatum veniale manet habitualiter, donec remittatur, vel per Confessionem, vel per alia remedia: ergo peccatum habituale saltem generaliter sumptum, prout complectitur tam mortale, quàm veniale, non est formaliter priuatio gratiæ.

II. Concl. Neque peccatum habituale consistit in sola ordinatione ad pœnam: ita Scotus, ubi supra, licet aliter nonnulli Scotistæ sentiant de mente Scoti. Verùm, ut rectè notat Illustriss. Cauellus in scholio, Scotus solum vult, nil dari medium inter actum peccati, & obligationem ad pœnam, quæ de facto, & velut physicè manent transeunte actu, esse ipsum peccatum habituale, etsi appellet eam peccati maculam, sed ipsum actum præteritum virtualiter manentem. Nunquàm enim Scotus negauit manere peccatum post actum præteritum in ratione culpæ; immò in dist. 21. q. 1. ut aduertit Herincx expressè ait, secundum Sanctos distingui inter remissionem culpæ, & remissionem pœnæ debitæ; ergo Doctor apertè stat pro nostra sententia. Prob. concl. Ordinatio ad pœnam fit à voluntate D. ac proindè non est mala moraliter; at peccatum habituale nec à Deo est, nec quid moraliter bonum; cum sit turpitudinæ quædam, & Dei offensa: ergo non in sola ordinatione ad pœnam reponenda est ratio formalis peccati habitualis. Accedit, quod Sedes Apostolica damnauerit hanc Baij propositionem. *In peccato sunt duo, actus, & reatus, transeunte actu nihil remanet nisi reatus, siue obligatio ad pœnam.* Vnde in Sacramento Baptismi, aut penitentis absolutione propriè peccati reatus tantum tollitur, & ministerium solum Sacerdotis liberat à reatu pœnæ scilicet ab obligatione ad pœnam consequenter: ergo ratio peccati habitualis nequit consistere in sola ordinatione, vel obligatione ad pœnam.

III. Concl. Ratio formalis peccati habitualis est ipsum actuale peccatum præteritum moraliter perseuerans in voluntate peccatoris, ratione cuius priuatur gratia; & ad pœnam ordinatur, donec peccatum remittatur. Est Scoti loc. cit. quem communiter sequuntur Recentiores.

Prob.

Prob. Etenim præter illud peccatum præteritum, sic moraliter permanens nihil aptius, & conuenientius potest assignari, quo homo possit æstimari, & denominari peccator: ergo &c. Ant. patet ex improbatione aliarum sententiarum: Consequentia est euidens. Sicut enim ab actu existente homo denominatur actualiter peccator, ita ab eodem moraliter, & habitualiter perseverante, denominari debet peccator habitu, seu reatu. Confirm. nam si aliquid obesset, quominus ratio formalis peccati, in actuali peccato moraliter perseverante, esset reponenda, maximè quia, actus ille physicè transit, ac proinde nequit adhuc moraliter perseverare; sed hæc ratio est nulla, eo quia non est nouum, quod actus humani etiam postea moraliter perseverent in ordine ad dandam aliquam denominationem velut effectus moralis, ut patet in contractibus, qui manent donec dissoluantur. Item in votis, quæ manent donec vel sint impleta, vel per dispensationem relaxata, & denique in humanis offensa alterius hominis, & iniuria censetur adhuc moraliter perseverare, postquam physicè euauit, donec derur plena satisfactio, aut fiat iniuriæ remissio: ergo etiam offensa Dei censetur sic habitualiter permanere.

Arg. cont. 1. concl. Peccatum actuale est actualis auersio à Deo: ergo peccatum habituale erit auersio habitualis; sed hæc est sola priuatio gratiæ permanens in Anima, sicut gratia ipsa est conuersio habitualis hominis in finem supernaturalem: ergo priuatio gratiæ est formaliter habituale peccatum. Confirmatur. Iustitia habitualis secundum omnes est gratia: ergo iniustitia habitualis formaliter erit priuatio gratiæ, sed peccatum habituale est iniustitia habitualis, sicut peccatum actuale est iniustitia actualis: ergo peccatum habituale consistit in carentia gratiæ.

Resp. neg. ant. in rigore loquendo, quia ut docet Scotus in 2. dist. 37. duplex est auersio à Deo, una formalis, quæ si sit positua, consistit in odio Dei, si tale odium sit possibile; si sit negatiua, consistit in carentia amoris Dei, quando amare Deum quis tenetur. Alia est auersio virtualis in omni peccato saltè mortali inclusa, quia, cum præceptorum Dei adimpletio sit necessaria ad fruendum Deo, qui hæc transgreditur, eo ipso virtualiter se auertit à Deo. Itaque peccatum actuale formaliter est voluntaria transgressio legis

Diuinæ, ex qua sequitur auersio à Deo ut legislatore, & ut fine supernaturali.

Ad confirmationem: resp. ex Scoto in 4. dist. 14. Priuationem gratiæ dici solere iniustitiam habitualement, quia est carentia gratiæ, qui est habitus, & non quia sit idem, quod peccatum habituale, seu moraliter permanens, ex qua doctrina patet responsio &c.

Arg. 2. Iustificatio consistit in translatione animæ à statu peccati, ad statum gratiæ, iuxta Concil. Trid. sess. 6. cap. 4. sed huiusmodi translatio fit à priuatione gratiæ ad ipsam gratiam: ergo priuatio gratiæ formaliter est ipsum peccatum habituale, quod per iustificationem aufertur.

Resp. ex Scoto in 4. dist. 16. q. 2. Remissionem peccati, & infusionem gratiæ, ex quibus integratur iustificatio, non esse unam simpliciter mutationem, sed duas, quarum prima est transitus à peccato in negationem eius, altera est transitus à priuatione gratiæ ad ipsam gratiam; Per primam mutationem destruitur status peccati, estò secunda mutatio non esset ei annexa.

Arg. 3. Macula peccati originalis consistit formaliter in priuatione iustitiæ originalis: ergo & macula peccati actualis in priuatione gratiæ, hæc enim priuatio non minus quàm illa est malum mortale, & peccatum habituale constituens, & denominans peccatorem. Resp. neg. assumptum in ant. Ratio est, quia etiam macula peccati originalis consistit in reatu culpæ, quatenus talis reatus præferet obligationem ad pœnam damni ex actuali Adæ præuaricatione in posteros deductam; quare in Sacramento Baptismatis huiusmodi reatus peccati originalis, iuxta doctrinam Concil. Trid. verè, & propriè deletur, ac proinde non est sola carentia iustitiæ originalis.

Arg. cont. 3. concl. Hæc sententia apertè aduersatur doctrinæ Scoti: ergo non est à nobis admittenda. Ant. patet ex his, quæ Scotus habet in 4. dist. 14. q. 1 ubi videtur apertè docere, aliquem dici peccatorem habitualiter solum per quandam relationem rationis in quantum est obiectum intellectus, vel voluntatis Dei, quia inquit Doctor, postquam commisit (subintellige peccatum) Dei voluntas ordinat ipsum ad pœnam correspondentem peccato, & tunc intellectus præuidet, & pro omni tempore, donec pœna de-

bita sit soluta; ergo asserta conclusio est contra nostrum Doctorem. Resp. neg. ant. & ad ea verba Scoti allata aliqualem responsionem notauimus supra ex Cauello, & rursus hic breuiter respondemus, quod dum Scotus dicit, peccatum habituale consistere in relatione ad penam, intelligendum est non formaliter, sed effectiue. Vnde eius mens fuit, rationem peccati habitualis non esse formaliter repouendam in ipsa ordinatione ad penam, sed tantum quod hæc ordinatio, ex ipso actu peccaminoso moraliter perseverante, proueniat.

Arg. vltimò. Peccatum habituale est effectus peccati actualis: ergo non est ipsum peccatum habituale moraliter perseverans, quia nihil est effectus sui ipsius. Resp. dist. ant. Peccatum habituale phisicè consideratum idest quatenus est habitus vitiosus ex frequentatis actibus vitiosis generatus, conc. ant. Moraliter consideratum est effectus peccati actualis, neg. ant. quia ut sic est ipsum actuale peccatum perseverans, donec deleatur, ut supra dicebamus.

### QVÆSTIO III.

#### *Quodnam sit subiectum peccati.*

**N**Ot. Quòd hic non loquimur de subiecto proximo, & immediato peccati, & malitia ipsius, nam ex dictis constat proximum, & immediatum subiectum peccati, & malitiæ ipsius esse solum voluntatis actum elicitum, vel imperatum, positium, vel negatiuum, in quantum voluntas circa quodcunque obiectum creatum, vel increatum tendit liberè, saltem cum indifferentia contradictionis per actum positium, vel negatiuum, rectum, vel obliquum, quod ex Scoto quolib. 18. art. 2. in hoc sensu intelligitur: sicut enim voluntas, ut est sub indifferentia actiua ad elicere actum, vel non elicere, continuare, vel non continuare, stante præcepto legis negatiuo, debitor est rectitudinis, & imputabilis actiue; et si elicit actum, dicitur actiue peccare: ita pariter actus ipsius voluntatis, quia ex se est liber passiuè etiam in eo instanti, quo fit, quatenus stat sub indifferentia in actu primo ad elici, & non elici, continuari, & non continuari, contrahit morale debitum

passuum. Quare sicut indifferentia actiua, & debitum actuum ex parte voluntatis sufficit, ut ipsa dicatur peccare, vel peccatrix, ita ex parte actus indifferentia passiva, & debitum passuum sufficit, ut ipse dicatur peccatum, & passivè capax rectitudinis, & conformitatis ad legem præcipientem, vel prohibentem; non loquimur, inquam, de hoc immediato subiecto, sed de subiecto remoto, qualis est potentia, quæ potest huiusmodi actus elicere, qui sint malitiæ moralis capaces.

I. Concl. Sola voluntas est subiectum primarium ipsius actus peccaminosi; est communis sententia SS. I. P. & signanter D. Aug. lib. 3. de libero arbitrio dicentis, quod causa primaria peccandi est voluntas, necnon omnium Theologorum. Prob. ratione. Omnis actus peccaminosus necessariò debet esse liber, aliàs non esset peccaminosus; sed assensus liber est actus elicited voluntatis, & in eadem immediatè receptus, & subiectatus; ergo omnis actus peccaminosus, ut liber subiectatur in voluntate. Tum, quia libertas ad peccatum requisita est primariò, & essentialiter in voluntate, & in alijs potentijs est libertas solummodò per quamdam participationem, quatenus voluntas suo imperiò in illis influit: ergo etiam ipse actus peccaminosus primariò, & essentialiter est in voluntate, ut rectè docet Scotus in 4. dist. 42. §. ad quæstionem.


II, Concl. In alijs potentijs à voluntate, nimirum in intellectu, & appetitu sensitivo non subiectatur peccatum, seu non est primariò, sed tantum secundariò. Est Scoti loco cit. & est communis sententia Theologorum, excepto Caiet. p. 2. q. 74. art. 4. cuius opinio vocatur ab Herincx paradoxa, seu potius error. Putat enim Caiet. posse in sensualitate reperiri peccatum veniale etiam citra libertatem, & consensum voluntatis, quasi sensualitati insit quædam imperfecta libertas. Prob. concl. Consensus voluntatis sic est necessarius ad peccatum, ut tamen in cæteris potentijs consumatur peccatum; e. g. Hæresis in intellectu, homicidium in potentia loco motiva, & motus sensualitatis in appetitu sensitivo; ergo in cæteris potentijs à voluntate potest esse peccatum, non quidem ex propria natura cum illis nulla ratione competat libertas, sed per imperium ipsius voluntatis libertatem participantem sunt pec-

cati subiectum, ac proinde secundariò, & non primariò in potentijs alijs à voluntate subiectatur peccatum.

III. Concl. Motus concupiscentiæ in sensualitate orti, & rationem præuenientes (qui à Theologis dicuntur motus primò primi) non sunt peccata, nec etiam venialia. Hæc est de fide contra Lutherum, Calvinum, & alios Hæreticos temerè asserentes huiusmodi motus esse peccata ex vitio fomitis. Prob. concl. ex Trid. sess. 5. Can. 5. ubi definitur, per Baptismum tolli totum id, quod verum, & propriam peccati rationem habet, non tollitur autem concupiscentia, de qua, ita subdit Trid. *Quæcum ad agnem relicta sit, nocere non consentientibus, sed viriliter per Iesu Christi gratiam repugnantibus, non valet.* Eadem veritas habetur in S. Scrip. & signanter ad Rom. c. 7. *Si autem: quod nolo malum illud facio iam non ego operor illud, sed quod habitas in me peccatum, idest,* ut expendit ex communi sententia Herinex. Si contra voluntatem sentio motus partis inferioris, seu concupiscentiæ non pecco, sed id tribui debet concupiscentiæ in me ex peccato relicte ad peccatum inclinanti.

Prob. ratione. Nam si motus concupiscentiæ essent peccata etiam ultra consensum, frustra diceretur Eccles. 18. *Post concupiscentiam tuas non eas*; scilicet illis non consentias, ut rectè D. Aug. docet. lib. 5. contra Iulianum c. 30.

Præterea. Omne peccatum debet esse voluntarium, & liberum: ergo cum tales motus nullatenus sint liberi, non possunt esse peccata. Tum, quia si essent peccata, sequeretur, quod lex Diuina, vel naturalis nos obligaret ad impossibile, cum impossibile sit huiusmodi motus impedire. Non est tamen admittenda opinio quorundam dicentium. Si postquam ratio sufficienter aduertit, tales motus, seu delectationes in sensualitate, voluntas se habeat negatiuè, nec consentiendo, nec positiuè reprimendo; immò motum ipsum permittendo, non videtur grauius peccare per se loquendo, quando id non facit ex complacentia delectationis sensibilis, & sibi satis firma videtur ad abstinendum ab omni consensu.





*Utrum dari possit pura omissio culpabilis.*

**Not. 1.** Quòd omissio nil aliud est, quàm priuatio, seu carentia actus, quem quis operari debebat ex vi præcepti, ut non audire Sacrum, quod audire tenebatur; & sic de alijs omissionibus tam internæ, quàm externæ operationis. Omissio autem non potest esse peccatum, nisi aliqua ratione sit voluntaria: & hoc tripliciter contingere potest, nempe quod sit voluntaria. Primò quia voluntas expressè, & explicitè fertur in ipsam, ut si quis habeat hunc actum, volo non ieiunare, vel non diligere proximum, quando præceptum urget. 2. potest esse omissio voluntaria non in se, sed in causa, ut dum quis vult aliquod impossibile cum impletionem præcepti cum aduertentia futuræ omissionis, ut qui vult ludere tempore, quo implendum est præceptum audiendi Sacrum: 3. potest contingere omissio voluntaria absque aliquo actu, quia quando proponitur per intellectum præceptum, & obligatio, voluntas suspendit omnem actum, & se habet merè negatiuè. In præsentī quæstione non loquimur de omissione primo modo, nec 2. sed 3. modo.

**Not. 2.** Quòd circa hanc quæstionem versantur tres opiniones. Prima asserit non posse dari puram omissionem in voluntate circa aliquod obiectum, sed, quolibet obiecto proposito in particulari, voluntas directè, & expressè necessariò aut vult omittere, aut non vult e. g. Proposita auditione Sacri, necessariò voluntas aut vult expressè audire Sacrum, aut non, ita Alensis, quem sequuntur Vasquez, Suarez, Caiet. & alij: 2. opinio docet non posse in voluntate esse puram omissionem, sed necessariò illam esse coniunctam cum actu, qui sit causa, vel occasio illius, undè, proposito obiecto audiendi Sacrum, etsi posset voluntas non velle expressè, & formaliter omissionem; necessariò tamen vult aliquod impossibile, ex quo sequitur omissio Sacri, ita D. Bonau. & Magister sententiarum, & alij, quos citat, & sequitur Vasquez, existimans eandem sententiam tenere D. Thomam: 3. opinio asserit esse possibilem puram omissionem absque alio actu voluntatis, siuè directo, siuè indirecto.

I. Concl.

I. Concl. Physicè loquendo, idest spectata natura voluntatis nulla est repugnantia, quod detur pura omisso culpabilis, absque alio actu positivo voluntatis; ita Scotus in 2. dist. 42. q. 4. quem præter suos, sequuntur Nominales, & quamplures Recentiores, quam sententiam art. 2. Caspensis probabiliorem vocat, idem asserit noster Baron. in eth.

Prob. auct. Arist. qui lib. 5. Ethicor. c. 3. docet, non minus esse immediatè in potestate voluntatis creatæ non agere, quam agere; sed per agere, & non agere indicatur actus positivus, & negatio eiusdem: ergo absolute loquendo dari potest pura omisso peccaminosa absque ullo actu positivo voluntatis. Prob. ratione. Si quid impediret, quò minus possit dari puta omisso peccaminosa, esset, quia, ut Aduersarij dicunt, omne peccatum debet esse voluntarium, & liberum; talis autem pura omisso peccaminosa, non fit voluntaria, & libera: sed hæc ratio nulla est; ergo &c. Prob. min. Pura omisso peccaminosa adhuc esset sufficienter voluntaria, & libera, eò quia ad hoc ut aliquid censeatur esse reuera voluntarium, & liberum, non est necesse, quod voluntas circa illud operetur positivè, sed satis est, quod sit in potestate voluntate illud facere, vel non facere; sed sic est, quod in potestate voluntatis est ponere actum positivum, vel eius omissionem; in hoc enim consistit libertas contradictionis; ergo &c.

II. Concl. Moraliter loquendo, idest, considerata conditione humana, & inspectis circumstantijs, omisso actus externi, vel nunquam, vel rarè datur sine aliquo actu positivo voluntatis; omisso autem actus interioris voluntatis frequentius dari potest.

Prima pars patet experientia: Etenim nunquam omitimus aliquod externo opere adimplendum, nisi quia vel nolumus implere, vel aliud agimus, ratione cuius prætermittimus id, quod debemus, ut cum quis omittit Sacrum in die festo, quia in certo loco longo tempore demoratur, vel etiam si tempore, quo debet incedere, quiescit, aut cum loqui tenetur, tacet. Prob. 2. pars. Voluntas diuerso modo se habet ad actum interiorem, & ad actum externum; ad actum enim externum, ut diximus, concurrunt plures conditiones externæ, & imperatæ, quæ non admittunt simplicem actum omissionis sine aliquo actu positivo saltem.

interpretatiuo; ad actum verò internum aliter se habet, cum sit actus immediatè elicitus à voluntate, & possit ab ipsa immediatè suspendi; nullum actum siuè nolle, siuè velle producendo, quo sensu non dicitur propriè actus, sed negatio, seu ommissio actus, ut melius patebit in solutione argumentorum: ergo &c.

Arg. 1. cont. 1. concl. Non potest dari peccatum sine exercitio libertatis; sed libertas per puram omissionem propriè non exercetur; ergo &c. Prob. min. libertas debet exerceri per aliquid vitale, sed pura ommissio non est vitalis, nam per eam voluntas non mouet se intrinsecè, quod proprium est vitalitatis: ergo per eam omissionem propriè non exercetur libertas. Resp. neg. min. & ad eius probationem disting. mai. per aliquod vitale virtuale, seu interpretatiuum conc. mai. per aliquod vitale formale semper nego mai. &c.

Arg. 2. Videtur implicantia, quod voluntas omissionem liberam exercent, quin moueatur ab aliquo bono amabili, aut auertatur ab aliquo malo; sed talis motus voluntatis nequit contingere sine aliquo actu positiuo voluntatis: ergo &c. Resp. dist. mai. quin voluntas moueatur positiuè, nego mai. quin moueatur, vel positiuè, vel interpretatiuè, conc. mai. motus autem interpretatiuus, ut ad præsens spectat in hoc consistit, quod voluntas habeat in sua potestate agere, vel non agere, & tamen non agat, sed suspendat omnem actum circa obiectum propositum.

Arg. 3. Peccatum omissionis numeratur inter peccata actualia, cum non sit quid habituale; sed primò redditur tale: 1. habituale ratione suæ perseverantiæ quousque per poenitentiam retractetur: ergo includit necessariò aliquem actum. Resp. conc. mai. & pariter conc. min. & neg. conf. Non enim benè infertur, peccatum omissionis non est quid habituale, quando actualiter fit talis ommissio: ergo non potest esse quid habituale, nisi necessariò includat aliquem actum positiuum, eo quia sicut peccatum commissionis censetur moraliter perseverare, quousq; expiatur, ita pari ratione peccatum puræ omissionis censetur moraliter perseverare, ac proindè habere esse habituale.

Arg. 4. Oportet dari aliquod, per quod voluntas transeat à statu indifferentiæ, in quo possit omittere actum, & non omit-

omittere, ad statum determinatum, in quo reuera illum omittit; sed in pura omissione nil datur huiusmodi: ergo voluntas remanet in statu indifferentiæ, & consequenter non habet omissionem peccaminosam. Accedit etiam definitio de peccato generaliter sumpto tradita à D. Aug. & à Theologis recepta, in qua significatur. Peccatum esse vel dictum, vel factum, vel concupitum, quæ verba actum, positium sonant; ergo &c. Resp. neg. min. & ratio est, quia sicut tollitur voluntatis indifferentia ad agendum positivè per ipsum actum, quem ponit, nec requiritur alius actus; alioquin daretur actus ad actum, & sic processus in infinitum, ita pariter tollitur indifferentia, & determinatur voluntas ad omittendum peccaminosè per non actum; eo ipso, quod talis ommissio sit in eius potestate. Ad D. Aug. dicimus, eum loqui regulariter, cum quo stat nostra conclusio; quod absolute loquendo fieri possit peccatum per puram omissionem: cum implicite etiam omissiones peccaminosas includat, ut si dicatur, peccatum est non factum, non dictum, nec concupitum, quando quis ad hæc tenetur.

## QVÆSTIO V.

*Vtrum omnia peccata sint æqualis malitiæ, & unde deriuetur inæqualitas.*

**N**Ot. 1. Quòd hic non loquimur de inæqualitate peccatorum mortalium, quoad effectum idest quoad priuationem gratiæ, & inflictionem pœnæ, quatenus pœna intelligitur pro damnatione æterna; nam certum est, quod omnia peccata mortalia in hoc sensu sunt æqualia, cum omnia æqualiter priuent nos gratia Dei, & inducant æternam damnationem: sed loquimur de gravitate peccati, quatenus huiusmodi gravitas est mensura malitiæ, ratione cuius peccatum dicitur magis, vel minus disconueniens naturæ rationali, & etiam magis, vel minus offensivum Dei; moralis enim magnitudo prauitatis, quæ inest peccato, gravitas nuncupatur, ex eò quod suo quasi pondere peccatores à summo bono ad miseriam trahat. Duplex autem à Theologis assignatur gravitas in peccatis, altera essentialis, altera accidentalis. Essentialis, & specifica est

ea, quæ essentialiter competit peccato in tali, vel tali genere. Accidentaliter autem, quæ accidentaliter aduenit ipsi peccato, & hæc diuiditur in intensiuam, & extensiuam. Intensua est illa, quam habet ex intentione actus. Extensua est, quam accipit vel ex eiusdem actus duratione, vel ex quantitate, & multiplicatione obiecti, vel ex alijs circumstantijs, ad quas renocari potest modus agendi, nempe ex maiori, vel minori aduertentia & libertate.

Not. 2. Quod oppositio inter virtutem, & vitium est duplex. Vna est directa, quando scilicet virtus, & vitium sunt circa idem subiectum, & mutuo ab illo se expellunt, quia sunt impossibilia, ut iustitia, & iniustitia respectu rei alienæ, quæ est materia, seu subiectum utrique extremo communi. Altera est indirecta, quando scilicet virtus, & vitium non sunt circa idem subiectum, sunt tamen contraria ex parte effectus, quia imperant contrarios effectus, quo sensu omnia vitia opponuntur indirectè charitati, iniustitia namque inclinat ad auferendum alienum, charitas verò contrarium imperat, & sic de cæteris &c.

I. Concl. Omnia peccata non sunt æqualis malitiæ, sed unum est altero grauius. Hæc est de fide contra Stoicos Philosophos, & contra Iouinianum hæreticum asserentem, merita, & demerita, præmia, & supplicia esse æqualia.

Prob. 1. ex S. Scrip. & signanter ex Deuter. cap. 25. *Pro mensura peccati erit & plagarum modus*: Et Ioannis cap. 19. *Propterea, qui me tradidit tibi maius peccatum habet* Deinde accedit ratio euidens. Certum est enim, quod auferre homini vitam sit maius peccatum, quam auferre minus bonum, aut otiosè mentiri; Eandem veritatem docent unanimi consensu Sancti Patres.

Præterea. Peccata specificantur, & suam malitiam desumunt ab obiecto, seu obiectis, circa quæ indebitè versantur, vel à virtutibus, contra quas militant; sed quædam obiecta magis, aut minus dedecent naturam rationalem, vel sunt contra rationem, quàm alia, & similiter virtutes: ergo peccata debent esse alia alijs grauiora. Tunc autem censetur aliquod peccatum esse magis contra rationem, quando est contra altiore, & perfectiorem finem, & obiectum: Magis siquidem rationi aduersatur Odium in Deum, quam in aliquam creaturam, furtum simplex, quam furtum, quod est sacrilegium &c.

II. Concl. Inæqualitas peccatorum quandoque oritur ex oppositione cum nobiliori, vel minus nobili virtute, quandoque ex obiecto præstantiori, quandoque ex legibus obligantibus, & denique ex connexis circumstantijs particularibus: hæc est Scoti, & Scotistarum in 2. dist. 21. q. 2. & videtur communis. Prob. 1. pars. Etenim gravius peccatum est odium Dei, quam furtum, quia odium opponitur nobiliori virtuti: idest charitati Dei, quam furtum, quod est vitium oppositum iustitiæ erga proximum: ergo &c.

Prob. 2. pars. Grauius quis peccat dum blasphematur Deum, quam dum contemnit, vel iniuria afficit hominem, quia Deus est obiectum summo honore dignus, non sic homo: ergo &c. Prob. 3. pars. Deus quandoque intendit una lege obligare magis unam Creaturam, quam aliam e. g. magis intendit obligare Sacerdotem, ut Paulo graui peccatori iam agonizzanti succurrat, ei administrando spiritualia, quam Missam celebret in die Festo. Insuper indubiè leges Diuinæ magis obligant, quam humanæ, ac proindè magis peccat transgrediens leges Diuinas, quam humanas: ergo &c. Prob. 4. pars. Grauius quis peccat furando aliquid ab Ecclesia, quam à domo laicali: ergo ex connexis circumstantijs quandoque oritur inæqualitas peccatorum.

III. Concl. Non nunquam peccatum minus graue ratione obiecti, seu ex genere, est grauius alio ratione nocu-  
menti, seu alicuius circumstantiæ: e. g. furatur quis mille aureos ab homine particulari, alius verò furatur ex loco Sacro duodecim ducatos: ex parte quidem nocu-  
menti, seu circumstantiæ est deterius primum, quam secundum, & ratio est, quia mensura humanarum actionum est recta ratio, sed hæc dictat peccata ratione maioris nocu-  
menti esse grauiora alijs, quàmuis illa sint alijs grauiora ex obiecto, aut ex genere. Ex quo paret in grauitate peccatorum semper discurrendum esse cæteris paribus.

## QVÆSTIO VI.

*Vtrum peccata commissionis, & omissionis differant specie.*

**N**ot. 1. Quòd aliud est peccatum omissionis, & aliud commissionis, ut supra indicauimus, quæ quidem di-



diuissio habet fundamento in S. Scrip. & PP. nam in Leuitico c. 7. dicitur. *Sicut pro peccato offertur hostia, ita & pro debito;* quia delictum à peccato differt per hoc, quod peccatum est commissio actus prohibiti, & delictum est omissio actus præcepti; sic enim dicitur delictum, quasi derelictum. Et ad Ephesios c. 2. dicitur: *Cum essetis mortui peccatis, atque delictis,* ubi Glossa interlinealis pro delictis intelligit peccatum omissionis, & pro peccatis peccatum commissionis. Tum quia sicut bonum est duplex, prout nunc ad rem nostram pertinet, nempe, aliud est facere bonum, & aliud est declinare à malo, ita ex opposito, duplex est malum, aliud omissionis, & aliud commissionis.

Not 2. quod peccatum omissionis, & commissionis possunt esse opposita eidem virtuti, vel diuersæ virtuti. Difficultas igitur est. An peccatum commissionis, & omissionis eidem virtuti opposita, differant inter se essentialiter, & specificè. Quidam absolutè negant, quorum ratio est, quia essentia peccati consistit in priuatione rectitudinis: ergo si priuatio est eiusdem rationis in duobus peccatis, consequens est, ut illa duo peccata sint eiusdem speciei, & ita contingit, quando commissio, & omissio opponuntur eidem virtuti secundum eandem rationem, ut contingit in commissione furti, & in omissione restitutionis, quia utrumque opponitur iustitiæ, & eodem modo facit inæqualitatem: ita sentit Beccanus tract. 2. c. 3. q. 1. cum Valentia, Suarez, & alijs. Alij verò absolutè affirmant, peccatum omissionis differre specie à peccato commissionis, non solum si hæc duo peccata considerentur materialiter, verum etiam formaliter secundum inordinationem, & propriam malitiam, aliàs odium Dei, & omissio amoris ipsius Dei, quæ sunt contra Charitatem; & hæresis, ac omissio credendi, quæ sunt contra fidem, non distinguerentur specie; cum opponantur eidem virtuti, quod est manifestè falsum, ita discurrunt Amicus disp. 22. sect. 1. Azor. Clauis Regia, Bonac. & alij apud Mastrium.

Concl. Si teneamus, quod una, & eadem virtus possit fundare præcepta specie diuersa unum affirmatiuum, & alterum negatiuum, ut probabilissimum est, dici potest, omissionem, & commissionem contra eandem virtutem esse peccata specie diuersa: & ratio est, quia ut ostensum fuit

in

in quæst. in qua querebatur, In quo consistat ratio formalis peccati: peccatum non est privatio rectitudinis habitualis ipsius virtutis, cui opponitur, neque ex hoc capite peccata postulant distingui ex rectitudine virtutum, quibus opponuntur, quia non sunt privationes rectitudinis habitualis earum, sed est privatio rectitudinis actualis idest conformitatis ad unum, vel plura dictamina, & præcepta eiusdem virtutis specie diversa, & sic stare possunt plura peccata specie diversa omissionis, & commissionis contra eandem virtutem; eo quia, licet illa præcepta, & dictamina sint circa idem materiale obiectum eiusdem virtutis, non tamen circa idem formaliter, neque secundum eandem rationem, ut contingit in exemplis allatis de actu odij, & de omissione amoris Dei, de hæresi, & de omissione actus credendi; nam hæc sunt contra eandem virtutem secundum diversam rationem formalem. Secus autem quando omissio, & commissio opponuntur eidem virtuti secundum eandem rationem formalem, ut accidit in commissione furti, & restitutionis, quia utraque opponitur iustitiæ, & eidem præcepto, nimirum, quod unusquisque possideat, quod suum est, ita discurret Mastrius disp. 15. de peccatis quæst. 2. art. 1. qui nititur etiam conciliare opiniones superius allatas, dicens, quod, secunda opinio loquitur in primo sensu; prima verò in secundo, dixerat enim peccata commissionis, & omissionis esse posse eiusdem speciei, quando omissio, & commissio opponuntur eidem virtuti secundum eandem rationem formalem.

Quæres 1. An actus coniunctus omissioni culpabili sit peccatum e. g. Quis omittit Sacrum in die festo ut interim studeat, ludat, fabuletur &c. ratione quorum actuum impeditur ab audiendo Sacro. Quæritur ergo utrum tales actus aliàs boni, aut indifferentes sint peccatum.

Resp. Nonnulli affirmant esse peccatum ratione omissionis, etiam si ex se peccata non essent, ita tenent Capreolus, Valentia, & quidam alij. Nihilominus dicendum est cum communiore sententia huiusmodi actus non aliam habere malitiam, quam omissionis, nisi aliunde secundum se sint peccaminosi; Vnde non est necesse in confessione explicare motiū, vel occasionem, nisi ipsum motiū, secundum se sit mortaliter malum. Nec refert, quod tali ca-  
su

su voluntas studendi sit mala, & similiter ipsum motiuum, nam actus internos, aut etiam externos, qui nō sunt speculariter ex obiecto mali, non oportet explicari, cum non faciant peccatum diuersum ab ipsa omissione, quia omnis actus liber, qui est causa alicuius peccati, licet sit peccatum, & malitia eiusdem rationis infectus, non tamen est ab omissionis peccato distinctum. Hinc traditur regula generalis ad cognoscendum, quando actus, seu opus de se incompatible cum obseruantia præcepti affirmatiui vitatur ex malitia omissionis, quæ talis est. Si talis actus in omissionem influat per modum causæ, vel occasionis, vitatur, & est peccatum; secus verò si in illa nullo modo influat, sed ad eam concomitanter, & merè per accidens se habeat.

Quæres 2. Quo tempore peccatum omissionis contrahatur. Resp. Quod difficultas non est de eo tempore, quo adest libertas ad ponendum actum, & omittitur; nam apud omnes certum est, tunc committi peccatum omissionis, quia liberè violatur præceptum. Difficultas igitur mouetur in casu, quo fuerit impedita libertas, vel ex ebrietate, vel somno, vel ex alia causa impeditiua obseruationis præcepti. Vnde sensus quæsitus est. An peccatum contrahatur, seu fiat non tantum, quando quis occasionem dedit, & causam probabilem futuræ omissionis, sed etiam tempore postea adueniente, quando currit præceptum implendum, etiamsi tunc vitari non possit ratione ebrietatis, vel somni, in quo statu indubiè est impotens ad obseruationem præcepti. De quo tres sunt opiniones. Prima asserit utroque tempore peccatum omissionis contrahi, seu committi, nempe quando datur causa omissionis, & quando reuerà accidit, etiamsi tunc sit ablata libertas per ebrietatem, vel somnum, ita tenent Thomistæ, & præsertim Caietanus, Medina, Serra, Suarez, & alij Recentiores: 2. affirmat tunc solum peccatum omissionis committi, & imputari, quando re ipsa currit præceptum, & ponitur omisio, & ratio est, quia sicut præceptum affirmatiuum non obligat ad semper, sed pro tempore determinato, ita omisio, quæ præcepto affirmatiuo opponitur, non ponitur, neque imputatur ad culpam, nisi pro tempore, quo præceptum obligat, sed contingere potest, quod præceptum obliget in eo tempore, quo quis est ebrius: ergo &c. in hac sententia sunt.

sunt Marſilius, Palatius, & etiam D. Thom. Cæterum dicendum eſt cum D. Bonau. in 2. diſt. 32. art. 3. q. 1. & Scot. in 2. diſt. 40. & 42. & quol. 18. quem ſequuntur præter Scottiſtas, etiam plures Recentiores, quod, ſuppoſito liberatiſ impedimento, eo tempore, quo currit præceptum affirmatiuum, tunc omiſſio rei præceptæ non imputatur ad culpam, ſed ſolùm quando data liberè fuit, ſeu voluntariè cauſa ſubſecutæ omiſſionis; ratio eſt, quia peccatum debet eſſe voluntarium, & liberum; ſed omiſſio actus præcepti in ſomnis, vel in ebrietate (& eadem ratio currit de peccato commiſſionis) non poterit eſſe voluntaria, nec etiam ſecundariò: ergo nequit eſſe in ſe peccatum, ſed tantum in poſitione cauſæ, ac proinde dicitur peccatum, quod committitur in ebrietate, fuiſſe in cauſa, non autem quando in ebrietate committitur. Tum quia in ſimilibus caſibus malitia omiſſionis contrahitur, & imputatur in applicatione, ſeu appoſitione cauſæ, quæ fuit in poteſtate voluntariſ; tunc enim eſt volita indirectè, ſeu interpretatiue, & in cauſa talis omiſſio, & directè eſt volitus actus, id eſt ebrietas, vel ſomnus cum obſeruantia præcepti incompoſſibilis: ergo tunc contrahitur malitia omiſſionis, quod idem eſt ac dicere in cauſa.

Quæres 3. An qui propria culpa incidit in aliquem morbum diuturnum, incurrat omnes omiſſiones peccaminofas ex eo morbo ſequentes.

Reſp. Ratio dubitandi deducitur ex reſolutione dubij præcedentis, ut benè diſcurrit Maſtrius, quia ſi in prædictis caſibus peccatum omiſſionis uniuerſaliter contrahitur in appoſitione cauſæ, & non potius pro illo determinato tempore, quo urget præceptum, ſequitur, quod qui voluntariè, & propria culpa incidit in aliquem morbum diuturnum, ex quo præuidit plures omiſſiones ſecuturas, v. g. non ieiuandi, non audiendi miſſa, non recitandi officium &c. incurrat omnes talium omiſſionum malitias, quod tamen valdè durum videtur: ratio ſequelæ eſſe poteſt, quia, quando dedit cauſam tali morbo, dedit quoque cauſam omnibus prædictis omiſſionibus, quas præuidit ratione morbi futuras, Variant DD. circa huius difficultatis reſolutionem; nos tamen, miſſis aliorum opinionibus, amplectimur cum Maſtrio communioſiorem, quæ videtur eſſe  
minuſ

minùs dura. Si huiusmodi omissiones fuerunt actu præul-  
sæ, vel saltem indirectè volitæ, in eas omnes incidere; hac  
tamen limitatione, quòd, ut hæ omissiones sint volunta-  
riæ indirectè, opus est non solùm esse præuifas, sed esse ta-  
les, ut præceptum obliget ad vitandum morbum, ne inde  
tales omissiones sequantur: siquidem præcepta ad hoc non  
obligant nisi quando omissiones proximè, ac eodem quasi  
tempore, moraliter loquendo, sequuntur. Vnde aiunt,  
quod ea, quæ iure humano ligant, non imputantur in cau-  
sa remota, quia id esset valde durum, sed tantùm in proxima,  
quæ nimirum eodem quasi tempore impedit executionem,  
vel tollit media ad eam per se ordinata, ut in projici-  
ente breuiarium, vel se inebriante respectu officij reci-  
tandi; non sic autem impedit morbum, quod ex nimio po-  
tu, vel crapula incurritur: hæc apud Mastr. disp. 15.

## QVÆSTIO VII.

*Vtrum aliud sit peccatum mortale, aliud veniale, & quomodo inter se differant.*

**N**OT. I. Quòd in hac quæst. sunt plures hæreticorum er-  
rores, nam Ioan. Vvicleff Putauit omnia peccata esse  
mortalia, de facto tamen solis reprobis imputari ut morta-  
lia; vnde dicebat, omnia peccata reproborum esse morta-  
lia, prædestinatorum autem omnia peccata esse venialia,  
allegans illud Apost. ad Rom. *Nihil damnationis esse in ys, qui  
sunt in Christo lesu*: quæ verba ipsi non fauent; intelliguntur  
enim de actualiter iustis, quamdiù sunt in gratia Dei, non  
autem si peccando excidant à iustitia. Calvinus pariter l.  
2. instit. c. 8. ait Sauctorum delicta esse venialia, non ex  
suapte natura, sed quia ex Dei misericordia veniam con-  
sequuntur: & denique Lutherus ait omne peccatum natu-  
ra sua esse mortale, fieri autem veniale credentibus, nam  
temerè assererat unumquemque ex fide iustificari, impiè  
detorquendo dictum Apost. *Credidit Abraham, & reputatum  
est ei ad iustitiam* Contra quos omnes stant definitiones Con-  
ciliorum, & signanter Trid. sess. 6. c. 11. ubi sic. *In homini-  
bus iustis esse aliqua peccata venia, propter quæ non desinunt esse in-  
iusti*; & tres Pontifices reprobarunt, teste Herinex, hunc ar-  
ticu-

riculum: *Nullum esse peccatum ex natura sua veniale, seu omne peccatum meretur poenam aeternam.*

Not. 2. quod peccatum veniale sic describi potest. Est transgressio voluntaria alicuius legis non grauitur obligantis, ordinantis ad finem supernaturalem: è contra mortale est transgressio alicuius legis grauitur obligantis, & ordinantis ad finem supernaturalem, utrumque autem peccatum, ut passim docent Theologi potest esse duplex. Aliud mortale ex genere suo, aliud ex accidenti, & similiter aliud veniale ex genere suo, & aliud veniale ex accidenti, seu ex circumstantiis. Peccatum ex genere suo mortale est illud, cuius malitia ex obiecto intra eandem speciem est grauis; e. g. fornicatio, furtum, homicidium. Mortale ex accidenti est illud, cuius malitia ex obiecto non est mortale fit tamen mortale ex aliqua circumstantia. Veniale ex genere suo est illud, cuius malitia ex obiecto intra eandem speciem quantumcunque accrescat, nunquam fit mortale, ut verbum otiosum, mendacium, & similia. Veniale ex accidenti est, cuius malitia ex obiecto est mortalis, sed fit venialis ex accidenti, hoc est ex paruitate materiæ, vel ex indeliberatione actus.

Not. 3. Quòd Doctores discrepant in assignanda differentia inter peccatum mortale, & veniale, quidam enim existimant in eo differre, quod mortale sit contra legem; veniale verò præter legem, & ita videntur sentire Alensis, Ricardus, Medina, & plures alij: Quidam censent, quod mortale differat à veniali, quia illud sit contra præceptum; veniale verò contra consilium, quæ opinio tribuitur à nonnullis etiam Scoto, sed ut infra patebit decipiuntur. Alij, quod mortale sit deordinatio ab ultimo fine, veniale verò ab ijs, quæ sunt ad finem, & hæc videtur sententia D. Thomæ quæst. 72. art. 5. ut refert Caspensis in tract. de peccatis. Denique Scotus cum suis in 2. dist. 25. docet, peccatum mortale differre à veniali, eò quod mortale est contra legem grauitur obligantem, seu ad aliquod, quod est necessarium ad salutem: peccatum verò veniale est contra legem non grauitur obligantem, sed ad aliquod, quod non est necessarium ad salutem, quæ doctrina apertè. Significatur à Scoto loc. cit. dum ait. Mortale per se à veniali differre, quia peccatum mortale est deordinatio opposi-



ta ordinationi, sine qua finis non potest consequi aliquo modo, quæ quidem ordinatio habet præceptum contra quod deordinatio fit. Peccatum autem veniale est deordinatio opposita ordinationi, quæ necessaria non est ad finem consequendum, sed est utilis, & quæ non est de præcepto, sed potius de consilio; intelligens Doctor per consilium legem, quæ non obligat ad ponendum aliquod necessarium pro consecutione vitæ æternæ; ut passim explicant Scotistæ.

I. Concl. Dantur quædam peccata, quæ ex sua natura sunt tantum venialia. Est de fide contra recensitos hæreticos, & remanet probata ex definitionibus Conciliorum, & Summorum Pontificum. Accedit etiam ratio. Nam lumen naturale ostendit cuilibet credenti verbum otiosum, furtum unius oboli, & similes defectus non importare gravem offensam Dei; ac proinde non esse mortalia, sed venialia. Tum quia actiones nostræ morales defectuosæ sæpè procedunt ex imperfecta deliberatione, & aliqua passione naturali, quæ nulla ratione dicendæ sunt peccata mortalia: ergo remanet, quod sint venialia; tum quia in humanis datur offensa gravis, & levis: ergo pari ratione admitenda est aliqua offensa levis, vel contra legem humanam, vel contra Diuinam.

II. Concl. Peccatum mortale, & veniale differunt inter se per hoc, quod peccatum mortale est carentia debitæ rectitudinis necessariæ ad consecutionem vitæ æternæ. Veniale verò est carentia debitæ rectitudinis, quæ non est necessaria, sed utilis ad finem consequendum. Hæc est conformis Doctrinæ Scoti superius allatæ. Prob. Quia nulla alia ratio definitiva, per quam magis explicetur peccatum mortale, & veniale, & magis inter se distinguantur, assignari potest: ergo definitio, & differentia assignata est primaria, & optima. Patet antecedens improbando, & reiiciendo opiniones oppositas; non enim peccatum veniale differt a mortali, eo quod mortale sit contra legem, & veniale sit præter legem, seu contra consilium Evangelicum, cum dicat Apostolus. *Non cognovi peccatum, nisi per legem* & ubi non est lex, ibi non est prævaricatio; neque talis differentia consistit in eo quod peccatum mortale sit contra finem; veniale autem contra media, ut putavit Caiet,

ier. quia etiam circa media potest esse peccatum mortale, & veniale ex genere suo. Tum quia potest aliquis inordinatè appetere aliquod medium in ordine ad finem malum, ut si aliquis det eleemosynam propter fornicationem; ergo &c.

Arg. cont. 1. concl. à Caluino Hæretico ad Rom. 6. dicitur. *Stipendium peccati mors*: In 1. Ioan. 3. *Qui facit peccatum ex Diabolo &c.* & alibi Scrip. Sac. peccato generatim sumpto mortem adscribit, & inimicitiam Dei: ergo omnia peccata sunt mortalia. Resp. Est regula certissima apud SS. PP. & Theologos, quod S. Scrip. tribuendo mortem, & inimicitiam Dei peccato, non loquitur de peccato veniali, neque de peccato generatim sumpto, ut est quid commune peccato mortali, & veniali, sed loquitur de peccato mortali, ac proinde Calvinus deprauat Scrip. & sensum.

Arg. 2. Ecclesia orat pro animabus fidelium Defunctorum cum solis venialibus, ne absorbeat eas Tartarus: ergo sentit eas posse obligari ad pœnas perpetuas Tartari, si secundum rigorem iustitiæ cum ipsis ageretur. Resp. neg. conf. quia Ecclesia considerat animas veluti ex corpore migrantes, & quæ nec dum sententiam suæ mansionis, aut loci, ad quem ire debent, acceperint, & sic præcatur, ne deducantur ad loca inferiora pœnarum, quæ generaliter nomine tartari intelliguntur.

Diçes. In Die anniuersarij omnium Defunctorum Ecclesia non potest tunc præces fundere ad Deum, & intelligi pro animabus è corporibus migrantibus, sed præcatur pro animabus iam deputatis ad sua loca, & mansiones: ergo &c. Resp. Ecclesia etiam in anniuersarijs præces sub simili consideratione repetit, sicut tempore aduentus præces fundit, quasi Christus tunc in carne expectetur venturus; essent enim præces inutiles, imò peruersæ, si fundarentur pro animabus, quæ fortasse sunt in Inferno, vel etiam in Purgatorio, quasi possent absorberi à tartaro infernali; ita Herinex.

Arg. 3. Omne peccatum quantumuis leue est offensæ Dei, ac proinde ex parte personæ offensæ trahit quandam infinitatem: ergo quantum est de se meretur pœnam æternam: ergo de se est mortale. Patet ant. quia Deus est persona infinita, & sic omnis offensæ infinita, Resp. neg. conf.

seu seq. ant. ratio est, quia sicut persona grauis in humanis potest offendi leuiter, ita persona infinita potest finitè, & leuiter offendi, sicut persona infinita ex opposito finitè à nobis amatur, & honoratur.

Ceterùm aduertunt Doctores difficile esse exactè in quavis materia dignoscere, quæ sint peccata venialia, quæ mortalia, adeout ipsemet D. Aug. in Enchiridion cap. 78. dixerit; *ita non humano sed Diuino pensanda iudicio*, & lib. 21. de Ciuit. Dei cap. ultimo. *Ego usque ad hoc tempus cum inde satagerem, ad eorum indaginem peruenire non posui*; & fortassis propterea latent, ne studium proficiscendi ad omnia peccata vitanda pigrescat; nihilominus infra dabimus aliquas regulas generales, quas Doctores passim docent ad agnoscendum, quando aliqua actio sit peccaminosa mortaliter, vel venialiter.

### QVÆSTIO VIII.

*Vtrum peccatum mortale, & veniale differant inter se genere, vel specie.*

**N**OT. 1. Quodd Thomistæ, & quamplures recentiores agendo de peccato mortali, & veniali dicunt quantum ad rationem offensæ non posse esse eiusdem speciei, aut generis, sed necesse esse, ut differant specie, & genere; rationem assignant, quia peccatum mortale est grauis offensæ Dei, priuat gratia, & mortem spiritualem infert animæ. Veniale verò est leuis offensæ, nec gratia Dei priuat, sed tantum charitatis feruorem erga Deum remittit.

Cæterum loquendo de peccato mortali, & veniali quantum ad rationem malitiæ asserunt specie differre, si comparatio fiat inter veniale ex genere, & mortale ex genere. Ratio eorum est, quia habent obiectum specie diuersum, & priuant perfectione specie diuersa. Aliud enim est obiectum e. g. verbi otiosi, aliud furti, & alia est perfectio, qua priuat mendacium iocosum, & alia, qua priuat homicidium. Si verò sermo sit de veniali ex imperfectione actus, aut ex leuitate materiæ, aiunt, peccatum veniale ex hoc capite non differre specie à mortali, sed intra eandem speciem differre solum secundum magis, & minus; magis au-

tem,

tem, & minus ex communi sententia Philosophorum non variant speciem: sic furtum quinque Assium est eiusdem speciei cum furto centum aureorum, sic actus indeliberatus, & deliberatus faciendi vindictam, & idem videntur dicere alij Doct. asserentes peccatum mortale, & veniale esse eiusdem generis, & speciei in genere moris, quando sunt circa eandem materiam, ut furtum graue, & furtum leue; quando verò sunt circa diuersam materiam, diuersæ speciei; & etiam quandoque diuersi generis, ut mendacium iocosum, & fornicatio: ita discurrunt Caiet. Medina, Bonac. & alij. At Scotus, & Scotistæ aliter sentiunt, unde pro clariori notitia nostræ sententiæ.

Not. 2. quod peccatum dupliciter considerari potest, nimirum moraliter, seu philosophicè, & theologicè ex Scot. in 4 dist. 14. q. 3. & alibi. Peccatum primo modo acceptum est, cuius malitia lumine solo naturali cognosci potest, ut virtuti naturali contrarium; nam Philosophi dicebant aliquod esse peccatum prout rectæ rationi repugnabat. Peccatum verò theologicè consideratum est, cuius malitia non cognoscitur nisi per diuinam reuelationem, qua scimus peccatum esse offensiuum Dei, impeditiuum gloriæ, & iuductiuum pænæ æternæ; Theologi siquidem in peccato attendunt, quod sit contra Dei voluntatem, ac legem, ac proinde, ut est Dei offensa, & iniuria: his prænotatis sit.

Concl. Si peccatum mortale in communi, ut sub se comprehendit mortale ex genere, & ex circumstantijs, & similiter veniale in communi, ut comprehendit sub se veniale ex genere, & ex circumstantijs, theologicè considerentur, differunt inter se essentialiter, & specificè, & sic diuisio peccati in mortale, & veniale est generis in species.

Prob. Natura, & essentia peccati, ut sic præcisà à mortali, & veniali consistit in priuatione rectitudinis, quæ actui inesse deberet: & rectitudo, vel lex habens rationem præcepti propriè dicti, idest obligantis ad aliquod simpliciter necessarium ad salutem, differt essentialiter, & specificè à rectitudine, vel lege habente potius rationem consilij, seu non obligantis, nisi ad aliquod veniale saluti non necessarium; etiamsi circa idem obiectum versentur, si non in genere moris, & philosophico, saltem in genere theologico,

estò non ex natura rei, 'saltem ex voluntate legislatoris: ergo priuationes rectitudinis per veniale, & mortale contractæ differunt inter se specie; ac proindè talis diuisio peccari erit generis in species, quam diuisionem, ut Scotus indicat in 2. dist. 37. & alibi Philosophi nunquam nouerunt. Verùm si de peccato philosophicè loquamur, & in genere moris tunc distinguendum est: Etenim si de mortali, & veniali ex genere loquamur specificè, & essentialiter inter se differunt, & ratio est manifesta, quia mortale, & veniale ex genere, ut homicidium, & verbum iocosum semper versantur circa obiecta specie diuersa, ac proindè in genere moris semper specificè distinguuntur, quod si de eisdem loquamur in eodem genere moris, prout sunt venialia, & mortalia ex circumstantijs tantùm, sic non semper specificè distinguuntur, ut in adducendo sententiam Thomistarum dictum est. Hinc sequitur illam diuisionem peccati mortalis, & venialis in mortale, & veniale, vel ex genere, vel ex circumstantijs dari de mortali, & veniali philosophicè consideratis, & in genere moris, non autè theologicè.

Quæres. Qualiter discernendum sit inter peccatum mortale, & veniale.

Resp. per sequentes regulas, quibus faciliter Minister Sacramentorum, ad quem spectat scire, quid intersit inter lepram, & lepram, discrimen agnoscere poterit.

I. Regula est huiusmodi. Ea peccata iudicanda sunt mortalia, ob quæ in S. Scrip. excluditur quis à vita æterna, vel punitur morte, quæ quidem pœna, nisi ob grauem offensam non infligitur. Quæ autem in S. Scrip. leuius puniri iudicantur, venialia censenda sunt. Ad primam partem huius regulæ pertinent ea, de quibus Paulus ad Corinth. 1. c. 6. scribit videlicet. *Neque fornicarij neque idolis seruientes &c.* & ad Rom. c. 5. ad Galatas 5. & ad Ephesios 5. & etiam Lucæ 11. *Va vobis Phariseis*; nam hoc verbum, vœ, aut simile, indicat pœnam grauissimam, vel æternam. Ad secundam partem pertinet, quod idem Paulus ad Ephes. 5. ubi de stultiloquio loquens ait: *Ad rem non pertinere*; Similiter illa præcepta quoque Deuter. c. 2. de non arando cum Boue, & Asino; de non capienda Matre cum Pullis in nido, & Mat. 5. de verbo orioso. II. Regula, quando vel traditione Diuina, vel Apostolica, vel conciliari definitione,

vel

vel concordi sententia SS. PP. & Theologorum aliqua actio pronuntiatur mortaliter peccaminosa, censenda est peccatum mortale, & non veniale, e. g. quia materia, & forma Sacramentorum, item ritus varij Sacramentorum ex Diuina, & Apostolica traditione sunt determinata, qui substantialiter ea variat; mortaliter peccat. III. Regula, quando ratio ipsa naturalis dicitur aliquam actionem grauem iniuriam interre Deo, aut proximo, aut ipsi operanti, illa iudicanda est pro peccato mortali; secus autem si non sit grauis. IV. Regula, quando aliqua actio ex suo genere mortaliter peccaminosa hic, & nunc processit ex semiple-na deliberatione, seu ex subreptione, & indeliberatione voluntatis, tunc censenda est solum peccatum veniale e. g. Si Plato ex motu primo, & indeliberato impetu Clericum percutiat, vel verbum aliud grauius contumeliosum proferat in Socratem, censetur peccare solum venialiter. V. Regula, quando cunque aliqua lex siue Diuina, siue humana grauius obligat ad sui obseruantiam; Si talis lex sit capax cadere super leuem materiam, tunc non censetur obligare ad mortale e. g. Præcipit lex Diuina, ne quis furetur, Si tamen aliquid leue furatur, non peccat mortaliter, & tantò minus si præceptum sit humanum: Dixi si talis lex sit capax &c. quia ut infra videbimus dantur plura præcepta, quæ non admittunt leuem materiam.

### QVÆSTIO IX.

*Quomodo veniale possit transire in mortale, & mortale in veniale.*

**N**Ot. Quod idem actus interior voluntatis potest fieri de mortali veniale, & de veniali mortale, & sic pariter actus exterior potest fieri de veniali mortale, & è contra; nam, cum actus exterior ab interiori proueniat, & ab eo in ipsum deriuetur bonitas, vel malitia, sequitur, quod idem actus exterior possit esse bonus, & malus successiue e. g. Si quis manducet seriatim quinta carnes ante mediam noctem, & sequitur manducare etiam post mediam noctem, idem actus interior, & exterior, qui non erat peccaminosus mortaliter, nec venialiter, transit in peccatum mortale



le, & è contra. Cæterùm peccatum veniale secundum suam rationem formalem, hoc est, ut veniale, non potest transire in mortale, neque è contra. Sola igitur difficultas est: An peccatum veniale ex genere suo possit fieri ex accidenti mortale, & è contra.

I. Concl. Peccatum veniale ratione proximi periculi incidendi in culpam mortalem efficitur mortale peccatum, ita communis sententia DD. & comprobatur auct. S. Scrip. Ecclesiastici 3. dicentis. *Qui amat periculum parabit in illo*, hoc est incurrit peccatum mortale, ac proindè mortem animæ. Accedit etiam ratio, quia operans cum periculo proximo incidendi in culpam mortalem, censetur contemnere salutem animæ, & interpretatiuè velle peccatum mortale: ergo &c.

II. Concl. Quando quis statuit, seu ponit in peccato veniali ultimum finem, transit veniale in mortale. Est communis opinio Doctorum. Prob. Qui in peccato veniali statuit ultimum finem, ita affectus est actioni venialiter peccaminosæ e. g. alicui vanæ conuersationi mulieris, vel alterius Socij, adeo ut sit paratus violare legem grauius obligantem, e. g. de audiendo Sacro die festo, is censetur appetiatiuè creaturam præponere Deo, eiusque amicitiæ, quod destruit ordinem ad finem ultimum, seu quod est ponere in peccato veniali ultimum finem: ergo peccatum veniale transit in mortale.

III. Concl. Peccatum veniale potest transire in mortale ratione damni grauis, siuè temporalis, siuè spiritualis. Item ratione finis ipsius operantis. Prima pars patet, nam furando quis acum à sartore, vel quid simile ab alio, potest mortaliter peccare, dum sciat, quod sic impediatur artifex à suo opere, neque possit habere aliud instrumentum, quo utatur. Secunda pars similiter liquidò patet; eò quia, si peccatum de se veniale ab operante ordinetur ad finem mortalem, ut si e. g. quis iocosè mentiatur, vel verbum turpe pronuntiet, ut inducat alteram personam ad secum fornicandum, tunc fit mortale; quamuis non teneatur necessariò confiteri se esse mentitum, sed satisfacit dicendo se desiderasse fornicationem, & procurasse alterum ad eam inducere, & sic veniale fit mortale etiam ratione scandali. Item veniale fit mortale ex conscientia erronea dictante

esse mortale id, quod hic, & nunc committitur iuxta regulas traditas in tractatu de conscientia.

IV. Concl. Peccatum veniale transit in mortale ratione contemptus formalis legis Diuinæ, & etiam legis humanæ, nec non humani legislatoris. Hæc est communis apud SS. PP. & Theologos. Prob. 1. auct. D. Bernard. lib. de dispensat. præcept. cap. 12. ubi dicit, *Venialia non contemni sine crimine*; & subdit. *Porrò contemptus in omni specie mandatorum per se pondere grauis & communiter damnabilis est*; ex quibus verbis perspicuè infertur non esse distinguendum inter contemptum legis Diuinæ, & humanæ, ut faciunt nonnulli DD. sicut enim omnis potestas est à Deo, & omnis legislatio ab eodem deriuata, ita qui legem humanam despicit, non hominem solum, sed in homine Deum contemnit.

Prob. ratione; quia contemptus formaliter includit indignam æstimationem personæ præcipientis, siuè Dei, siuè hominis, sed indignam de Deo habere æstimationem grauis irreuerentia est, & pariter habere indignam æstimationem de Prælato, ut Prælatus est, quia redundat ille legislatoris contemptus in contemptum Dei, cuius vices gerit, iuxta illud Lucæ c. 10. *Qui vos audit, me audit, & qui vos spernit, me spernit*: ergo &c. & huiusmodi contemptus est necessariò in confessione exprimendus, quia nouam malitiam specie distinctam actui superaddit, nempe contra virtutem Religionis. Hæc autem doctrina intelligitur de contemptu formali, non autem de materiali; tunc dicitur formalis, quando quis intendit aspernationem, & vilipensionem legis, aut personæ legem ferentis, & ipsius obseruationem despicit, & dedignatur subijci personæ, aut ordinationi legis; materialis autem est ille, qui à transgrediente non intenditur; & huiusmodi contemptus, qui etiam dicitur interpretatiuus, & indirectus, reperitur in quolibet peccato mortali.

Notant insuper DD. & præsertim Marchantius, quod etiam in contemptu formali potest esse leuitas materiæ; nam potest quis leuiter minus Prælatum æstimare, & in actu secundo minus deferre mandatis eius, ut potè quia appareat imprudens, & minus prouidus, intra venialis peccati rationem, secus autem si in animo gerat grauem despicientiam, & vilipensionem, quia etiam leuis materia

est gravis, ut supra diximus. Sicut etiam aduertunt, quod aliud est peccare ex contemptu & aliud per contemptum, seu cum contemptu. Primo modo peccat, qui interius contemptum fouet, non tamen ex contemptu mouetur ad transgressionem legis, neque legem transgreditur ad hoc, ut suam vilipensionem ostendat, sed transgreditur ex alio capite: 2. modo peccat, qui mouetur ad transgressionem ex contemptu, quia tunc contemptus exterior habens interiorem contemptum pro obiecto peccat mortaliter ex contemptu, & est speciale peccatum; ita communis opinio DD. & præsertim Herincx disp. 7. de peccato mortali; & veniali quæst. 7. Caspensis tract. de peccatis disp. 3. sess. 5. Marchat. tom. 1. tract. 1. q. 2. tit. 9.

Arg. cont. ultimam conc. Contemptus non est maius peccatum, quam inobedientia, sacrilegium, & similia; sed hæc non semper sunt peccata mortalia: ergo neque contemptus. Conseq. patet, nam si quis nolit obedire Prælati in rem minima solum, ut ostendat se illam rem parui pendere, non videtur peccare mortaliter, cum appareat levis esse iniuria. Resp. neg. mai. quia diuersa est ratio de contemptu, & sacrilegio, alijsque similibus, nam in ratione contemptus formalis, quatenus quis in animo, & in affectu paruipendet Prælatum, non datur paruitas materiæ iuxta doctrinam superius allatam, & in Sacrilegio, & similibus dari potest leuitas materiæ. Addit Caspens. Probabile sibi videri, quod docet Suarez tract. 3. de legibus c. 28. nempe contemptum Prælati, ut persona priuata tantum est, esse posse veniale peccatum ex leuitate materiæ; fateor tamen, me non intelligere, quomodo in actione externa, quæ præferebat contemptum Superioris, præscindi possit ratio personæ priuatae à ratione personæ, ut Superioris, cum eadem actio tendat directè in vilipensionem talis personæ, ut si verbum contumeliosum proferat contra superiorem, tanquam contra personam priuatam, & sic pariter si eum percuteret, ut personam priuatam; Vnde talis præcisio videtur, potius Metaphysica, quæ ad praxim nihil facit.

Ex hætenus dictis colligitur, quod peccatum veniale potest ex accidenti fieri mortale sextupliciter nempe, 1. ratione proximi periculi, 2. ratione finis ultimi, 3. ratione scan-

scandali, 4. ratione damni grauis, 5. ratione conscientie erroneæ, & denique ratione contemptus.

## QVÆSTIO X.

*Quomodo peccatum veniale ex consuetudine, vel ex repetitione actuum fiat mortale.*

**N**Ot. Quod quamuis ex multis peccatis venialibus non possit coalescere unum peccatum mortale, nihilominus dubitant DD. An ex pluribus præcedentibus peccatis venialibus contingere possit, ut posterius peccatum, quod sequitur, sit mortale ratione præcedentium, estò secundum se foret tantum veniale. Et quidem nonnulli putant peccatum veniale ex se, si transeat in usum, & consuetudinem fieri mortale, & tribuitur hæc opinio summæ Angelicæ Verbo inobedientia, cui videtur fauere D. Bernard. loco supra cit. ubi dicit, *Quoddam esse veniale, excepto quando per contemptum transit in usum, & consuetudinem*; Et posset comprobari ex cap. 3. de Pœnit. dist. 1. ubi sic habetur. *Qua humana fragilitate, quamuis parua, tamen crebra subrepunt, si collecta contra nos fuerint, ita nos granare, & opprimere sicut aliquod grande peccatum*, & ex cap. unum horarium dist. 25. ubi dicitur. *Ebrietatem, si assidua sit, computari in numero peccatorum mortalium*. Fauet insuper communis doctrina, quæ docet, habentem consuetudinem iurandi peccare mortaliter, licet aliàs tantum esset peccatum veniale iurare sine causa.

Adde pro confirmatione dictum aliquorum DD. qui docent, habentem propositum committendi omnia venialia quotquot se obrulerint, & vitandi sola mortalia peccare mortaliter; at hoc non potest esse, nisi quia omnia illa in unum collecta ratione consuetudinis perueniunt ad peccatum mortale. Verùm hæc opinio cum suis rationibus ad minus indiget explicatione, unde sit.

I. Concl. Quodocunque ex pluribus peccatis venialibus præcedentibus materia peccati venialis sequentis redditur grauis, tunc peccatum illud, quod aliàs esset veniale, fit mortale ex grauitate materiæ. Hæc concl. seu potius regula sic generatim accepta non potest negari; oportet autem in singulari eam explicare. Quare pluribus modis ma-

teria fieri potest grauior ex eo, quod alia venialia præces-  
serint. Primò, ratione periculi incidendi in mortale, quia  
exponens se periculo peccandi mortaliter, peccat mortali-  
ter; unde infertur primò, quod propositum committendi  
omnia peccata venialia, & vitandi tantum mortalia, est  
peccatum mortale, non ex eo quod voluntas tendat in om-  
nia illa peccata venialia, sed quia consuetudo multorum,  
peccatorum venialium maximè certi generis, putà nimis  
curiosè aspicere pulchram mulierem præseferunt proxi-  
mum periculum incidendi in peccatum mortale; nam eo  
ipso, quod quis habet tale propositum, habet etiam inter-  
prætatiuè voluntatem se exponendi huiusmodi periculo,  
ac proindè mortaliter peccat. Et in hoc sensu intelligen-  
dum est, quod dixit D. Aug. ubi suprà allegatus, non  
enim vult, quod peccata venialia fiant mortalia ex sola re-  
petitione, vel consuetudine, sed ratione periculi, quod in  
multis peccatorum generibus oritur ex frequentia actuum  
venialium. Hinc infertur, illum mortaliter peccare, qui  
se exponit periculo iurandi falsum ex consuetudine, quam  
habet iurandi, unde ex communiori sententia tenetur ha-  
bere propositum deponendi huiusmodi consuetudine n., &  
ad id Confessarius tenetur monere penitentem, & insuper  
debet monere de negligentia in extirpanda praua consue-  
tudine: An verò qui inaduertenter ex repentino motu,  
aut nimia affectione ad rem aliquam de facto periurat, com-  
mittat peccatum mortale distinctum à peccato prauæ  
consuetudinis iurandi, variant DD. ut videre est apud  
Dianam p. 10. tract. 14. res. 13. at de hoc alibi.

II. Concl. quodcumque materia posterioris peccati ve-  
nialis habet ex natura sua continuationem cum peccatis  
venialibus præcedentibus, tunc materia fit grauis, idque  
verum est non solum in materia Iustitiæ, sed etiam aliarum  
virtutum: hæc est plurimorum DD. & præsertim Sanchez  
lib. 1. sum. c. 4. Suarez dist. 3. de leg. c. 28. & Caspens. in  
tract. de peccatis disp. 3: sect. 6. Prob. in materia Iustitiæ.  
Si quis furetur aliquid parui momenti, & deindè pluribus  
vicibus furetur pariter leuia, si omnia illa furta leuia col-  
lectiuè faciant materiam grauem, & totalem, licet non pec-  
cauerit mortaliter furando, peccat tamen mortaliter reti-  
nendo huiusmodi materiam grauem, siuè illa materia gra-  
uis

uis ablata sit ab uno, vel à pluribus, etsi nonnulli contradicant. Prob. in materia temperantiæ. Siquidem aliquis comedendo, vel bibendo nimis cum salutis detrimento, fieri potest, ut ex singulis actibus parum damni sequatur; ex multis tamen sequatur graue damnum, adeò ut ea comestio, vel potio, quæ ratione noui effectus coniuncti cum effectum præcedentium incipiat asserre notabile damnum, sit peccatum mortale. Quo sensu intelligendum est, quod habetur in cit. cap. unum horarium, ubi Glos. illud interpretatur de frequenti habitu bibendi, qui quàmuis de se tantum peccatum veniale sit, seu ad minuta peccata pertineat, tamen, cum ratione assiduitatis faciliter degeneret in ebrietatem, erit peccatum mortale; Similiter qui sæpius in die ieiunij comedit aliquid licet paruum, si post plures comestiones deuenit ad eam quantitatem, quæ simul sumpta esset grauis, frangit ieiunium ratione continuationis materiæ, & mortaliter peccat; Secùs autem si contingat in diuersis diebus ieiunij; quia una dies ieiunij non continuatur cum altera. Eadem ratio etiam militat in recitatione Diuini officij respectu eiusdem diei, estò non currat respectu dierum diuersorum, & denique idem dicendum est de laborante in una die festi, si pluribus vicibus ita laborat, ut perueniat ad quantitatem sufficientem ad peccatum mortale: eadem doctrina extenditur à Suarez ad eum, qui frequenti communicatione cum excommunicato etiam in ciuilibus conuersatur, cui videtur consentire Caspensis; at an hoc sit verum iudicent alij.

Quæres. Qui sint, qui possint peccare venialiter.

Resp. D. Thomas docuit illos, qui cum peccato originali incipiunt habere usum rationis, non posse primò peccare venialiter, quàm peccent mortaliter, quam sententiam tenet etiam de homine in statu innocentie dicens, Adamum in statu innocentie non potuisse peccare primò venialiter, quàm peccasset mortaliter. Verùm hæc doctrina maximè quoad primam partem tanquam difficilis non amplectitur à DD. & meritò, quia licet in creaturis sit obligatio diligendi Deum super omnia, tamen usus rationis adest imperfectus in illis prioribus annis ( loquimur hic tam de pueris, quando primò perueniunt ad usum rationis sine peccato originali, quàm de ijs, qui sunt in peccato ori-



ginali) ita ut huiusmodi obligatio omnibus ignota sit eo tempore; tum quia contingere potest, ut infectus solo originali, vel etiam baptizatus, dum assequitur diluculum usus rationis, leuiter mentiat, aut alium actum peccaminosum exerceat cum imperfecta deliberatione; tum quia in pueris ordinariè est imperfectum iudicium de moralibus, ac proinde tales potius primò peccant venialiter, quàm mortaliter.

Quæres. Quomoddò iudicandum sit, quando mortale fiat ex accidenti veniale defectu considerationis.

Resp. Iam superius diximus, quod ex duobus capitibus, nempe ex defectu considerationis, vel ex leuitate materiæ potest peccatum mortale fieri veniale: & quidem quoad primam partem manifestè patet, quod ea, quæ fiunt ex aliquo repentino motu, & sine plena deliberatione non sufficiunt ad peccandum mortaliter; debet enim in voluntate necessariò præcedere cogitatio aliqua expressa, & actualis malitiæ moralis, vel periculi peccandi; vel expressa aliqua dubitatio, siuè scrupulus ad hoc, ut sit peccatum mortale, ut passim docent DD. Cæterùm tota difficultas est in explicando, quænam sit hæc deliberatio requisita ad peccatum, cuius defectu peccatum mortale fit ex accidenti veniale. Hinc varij sunt modi dicendi, at nos, qui breuitati studemus, omnibus omisissis, dabimus quasdam regulas magis particulares ad praxim pertinentes iuxta communem doctrinam.

Regula 1. Quando quis prauæ rei appetitum aduertens, se ita dispositum sentit, ut, etsi facillè posset peccare, non tamen exequeretur, signum est non præcessisse perfectam deliberationem, neque consensum. Regula 2. Quando motus prauus, tempore serè imperceptibili, seu paulò post cum primò aduertitur aduersari rationi, vel legi Diuinæ, statim voluntas conatur expellere talem motum, signum est nullum, vel imperfectum consensum præcessisse. Regula 3. Quando quis dubitat. An dormiens, vel vigilans, an sui compos, vel non, aliquid dixerit, seu fecerit, iudicandum est, non fuisse circa talia deliberatum, seu plenum consensum; eo quia plena vigilia, & plenus rationis usus homines de suis actibus certiores reddunt. Regula 4. Quando quis sit præditus bonis moribus, & sit timorati conscientie,

etiam

etiam si à prauis cogitationibus fuerit agitatus per longum tempus, credendum est, eum non perfectè consensisse, cum enim auersionem habeat à peccato, facile discerneret, si illud admississet; secus autem, si sit deprauatæ conscientię, & facilis ad consentiendum tentationibus, quia cum parui faciat peccatum, consensisse censetur. Regula 5. Collocutiones internæ siuè absolutè, siuè conditionatè, quibus Anima sibi ipsi de consensu respondere solet, ordinariè imaginatiuæ sunt, siuè à Spiritu melancholico, siuè à Dæmone excitatæ; ideoque illis absolutè credendum non est, nec de vero consensu, sed ut phantasmata repudiandæ sunt, ita Marchant. tom. 1. sui tribunalis tract. 3. ubi plures alias regulas habet ad huiusmodi materiam spectantes, quas clare, & latè explicat. Regula 6. Consensus conditionatus sufficit ad faciendum peccatū mortale, quando obiectum, circa quod versatur dictus consensus cadit sub legem grauius obligantem, & per adiectam conditionem non omnis malitia ab obiecto præscinditur, secus si præscindatur, nisi prauo fine, & inclinatione in peccatum vitietur.

Item b. & simul explicatur regula, quando obiectum, circa quod versatur consensus conditionatus cadit sub legem grauius obligantem, adiecta conditio non præscindens ab omni malitia, censetur pro non adiecta, nec factum iustificat, aut purificat; e. g. Si quis dicat, vellem fornicari si non deprehenderer à Patre, vel puniter; similiter si quis diceret, si non essem Sacerdos, si non essem uxoratus, vellem me vindicare, fornicari &c. tales conditiones appositæ non tollunt malitiam, nam etiam si quis non esset Sacerdos, vel uxoratus teneretur vindictam non facere, non fornicari &c. quando autem per conditionem præscinditur, & tollitur omnis malitia obiecti e. g. Si fiat talis conditionalis, vellem comedere, si non esset ieiunium præceptum, quæ quidem conditionalis est tantæ virtutis, ut iustificet factum, seu intentionem non solum in ijs, quæ sunt mala, quia prohibita, sed etiam in ijs, quæ sunt prohibita, quia mala, sic comprehendendo legem Diuinam quoque, secundum nostram sententiam non peccaret mortaliter, qui diceret, vellem occidere, fornicari &c. nisi lex Diuina hæc prohiberet, vel esset peccatum, vel offensa Dei, licet hoc non placeat Thomistis.

Cæterum viso quomodo peccatum mortale possit fieri per accidens veniale, & traditis regulis generalibus ad discernendum quando peccatum mortale ratione indeliberationis, & consensus possit esse veniale, superest, ut examinemus, quomodo peccatum mortale fiat veniale ex accidenti ob leuitatem materiæ. Compertum est omnibus, peccatum mortale ex genere suo fieri aliquando veniale ratione materiæ, sed difficultas est in discernendo, quando sit materia levis, aut grauis in aliquo præcepto, quod ex genere suo obligat ad mortale: & ratio difficultatis est, quia in aliquibus speciebus peccatorum nulla videtur admitenda materia levis, sed quælibet apparet grauis; ex quo fit, ut in illis non possit peccatum mortale ex genere fieri veniale ex accidenti ratione leuitatis materiæ; eò quod etiam in materia parua reperitur tota ratio malitiæ, & offensionis, tam respectu Dei, quam proximi, quæ est in materia graui. Itaque quilibet actus humanus, quo transgrediuntur quædam præcepta, imbibit totam rationem malitiæ, adeo ut nulla pars vel minima attingi possit, quin contrahatur tota ratio malitiæ, irreuerentiæ, & offensionis v. g. ut in iuramento assertorio, in materia hæresis, & infidelitatis, in contemptu, & odio Dei, in materia simoniæ iure D. prohibita; idem dicendum de peccato homicidij, & de re venerea.

Quæres 1. Quid sit delectatio morosa, & an sit peccatum mortale. Resp. 1. Talis delectatio est consensus interpretatiuus seu complacētia habita de aliquo opere malo cogitato, sine voluntate illud exequendi: dicitur de opere malo, quia ab omnibus passim sumitur in malam partem: dicitur vero morosa non à mora temporis, sed à mora rationis, eò quod voluntas ei cum aduertentia inhæreat, vel saltem consensu interpretatiuo, quæ quidem mora in minimo temporis spatio inueniri potest.

Resp. 2. Delectatio morosa circa aliquod obiectum aliàs grauius prohibutum, etsi non adsit consensus in actum opere exequendum, est tamen peccatum mortale: ita communis sententia Theologorum, & signanter D. Bon. in 2. d. 24. art. 2. q. 1. & 2. ac Scoti in 2. d. 42. cum D. Aug. l. 12. de Trinit. c. 12. contra Martinum de Magistris, qui docuit delectationem morosam de re venerea non continere culpam mortalem.

Quæ-

Quæres 2. Quomodo in præceptis, vel legibus sit dignoscenda materia grauis aut leuis.

Resp. Difficile est tradere regulas generales ad hoc dignoscendum, attamen Doctores tradunt quasdam regulas ad rem nostram valde idoneas. Prima est: Illa materia censenda est grauis secundum se, quæ multum conducit ad finem imponentis præceptum, aliàs erit leuis: ratio, quia cum lex aliquid præcipiens constituat actum præceptum in materia alicuius virtutis, quod valde opponitur fini præcipientis, planum videtur etiam valde opponi illi virtuti, ac proinde esse transgressionem grauem. Cæterum mature attendendum est ad circumstantias, ex quibus Superior ducitur ad præceptum imponendum de aliqua materia; sæpe enim contingere potest, ut materia secundum se sit leuis, imò etiam indifferens, & proinde incapax obligationis mortalis, quæ tamen ratione circumstantiæ potest euadere grauis e, g. si Prælati prohibeat clericis, vel religiosis sub pœna peccati mortalis ne tabacum sumant in choro, dum diuina agunt; similiter si Prælati regularis subditis præcipiat, ne talem, vel talem domum ingrediantur. Item, ut tempore noctis rigorosum silentium seruetur; nam licet hæc, & similia sint, vel leuia, vel indifferentia; attamen ratione circumstantiarum secundum finem præcipientis, possunt transire in materiam grauem peccati mortalis. Neque prudenter loquuntur ij, qui dicunt, debere certò constare, leuem materiam ratione superioris præcipientis, ac finis transire in materiam grauem, inquit Suarez; quia sæpe fines legislatoris sunt occulti, & maximè superioris regularis; unde cum prudens legislator significet se velle ad grauem culpam obligare, potius pro illo præsumendum est, & iudicandum, grauem esse materiam ratione alicuius circumstantiæ nobis occultæ. Regula 2. Quando materia præcepta, vel prohibita sub mortali est diuisibilis in plures partes, tunc quæuis eius pars notabilis æstimanda est materia grauis, & sufficiens ad peccatum mortale; e. g. quia totum diuinum officium Breuiarij est materia diuisibilis in septem partes, ideo omittens unam horam peccat mortaliter: Similiter, quia totus dies festus est materia diuisibilis in plures horas diei, idcirco laborans duabus horis, vel tribus, quod spatium censetur notabile, mortaliter peccat.

cat. Regula 3. Ea, quæ præcipiuntur, ut valdè utilia Reipublice, grauius censeri debent, eò quod materiæ quantitas sit ex se notabilis in æstimatione Reipublicæ; licet ex eius violatione non sequatur graue nocumentum: ita Caspensi. in tract. de peccatis disp. 3. sect. 4.

## QVÆSTIO XI.

*Vnde desumenda sit specifica peccatorum distinctio.*

**N**ot. Quòd distinctio præceptorum potest considerari dupliciter, nempe vel ex parte præcipientis, vel ex parte rei præceptæ: ex parte præcipientis aliud est præceptum naturale, aliud diuinum, aliud humanum, aliud ecclesiasticum, aliud ciuile. Ex parte rei præceptæ distinguuntur iuxta diuersitatem virtutum, quas præcipiunt, aut vitiorum, quæ prohibent. Cum autem quælibet virtus habeat plures actus specie diuersos, & diuersas agendi regulas, quibus regulari debet, hinc est, quòd contra eandem virtutem multipliciter peccari possit, & sic, quia virtus v.g. temperantiæ versatur circa moderationem in cibo, potu, & voluptatibus corporis, ideo contra eam variè peccari potest, nempe per gulam, per fornicationem &c. Ex quo fit, ut eadem virtus possit præcipi varijs præceptis; imò etiam contingit interdum, quòd unus, & idem actus virtutis possit multis præceptis prohiberi, ut patet de peccato usuræ: similiter potest idem actus pluribus virtutibus aduersari; sic furtum rei sacræ, aut Clerici percussio repugnat simul iustitiæ, ac Religioni, hoc est reuerentiæ debitæ rebus, & personis Deo dicatis.

I. Concl. Specifica peccatorum distinctio desumitur aliquando à circumstantijs specie differentibus: hæc est communis inter Theologos, excepto Durando. Prob. Ab eo peccatum dicitur esse specie distinctum, à quo habet nouam, & specie distinctam deformitatem à ratione, & regulis bene viuendi, sed hoc quandoque peccatum habet à circumstantijs, actum peccaminosum concomitantibus, ergo ab illis circumstantijs peccata specie distinguuntur mai. patet, min. prob. ex Concil. Trid. sess. 14. Can. 7. ubi definitur, in confessione aperiendas esse circumstantias, quæ speciem peccati mutant, ergo &c.

II. Concl. distinctio specifica peccatorum non desumitur ab obiecto entitatiue spectato, sed à ratione formali deformitatis, seu disconuenientiæ, quam habent cum regulis, & legibus benè viuendi: hæc est Scoti in 2. d. 37. ubi, postquam docuit, priuationes distingui specie ex distinctione specifica habituum, & numero ex distinctione habituum numerali, subdit: peccata, quæ sunt priuationes quædam scilicet rectitudinum, quæ deberent inesse actibus, distinguuntur formaliter ex distinctione talium rectitudinum, ut, quando debent habere diuersas rectitudines specie, sunt carentiæ diuersæ specie, & ita non per comparisonem ad obiecta, quæ non sunt mala, nisi materialiter, distinguuntur ipsa peccata, sed formalis ratio in eis distinguitur in comparisonem ad rectitudinem aliam, & aliam specie, quæ deberet inesse. Prob. etiam ratione; distinctio specifica actuum in genere naturæ rectè desumitur ab obiectis ex Arist. 2. de Anima, ubi ait; actus specificari ab obiectis in genere naturæ, ergo à pari distinctio specifica moralis peccatorum desumi debet à ratione formali obiectorum prohibitorum.

Conf. actus humanus sumit ab obiecto specialem bonitatem, vel malitiam moralem, ut ostensum est in tract. de actibus humanis, ergo & peccatum, quod est actus humanus malus desumit distinctionem specificam ab obiecto secundum talem, vel talem rationem formalem, idquæ patet in adulterio, quod distinguitur specie morali ab incestu, à Sacrilegio, à fornicatione, quia obiectum formale, & ratio formalis legis agnoscit in adulterio præter concubitum carnalem, iniuriam Thori, & Matrimonij, in incestu irreuerentiam, & iniuriam sanguinis, vel proximitatis; in Sodomia peruersitas ordinis totius naturæ &c. & sic in omnibus præceptis obiectum formale, & ratio formalis legis sunt quasi punctum, & index rectitudinis, à quo per peccatum magis, vel minus receditur, aut declinatur, ac proinde rectè ab illis sumitur specifica, unitas, vel distinctio peccatorum. Ex quo infertur, peccata esse diuersa specie, non solum per oppositionem virtutibus specie diuersis, sed etiam quando eidem virtuti, sub diuersa tamen ratione formali, repugnant; qua ratione periurium, voti transgressio specie inter se differunt, quia eidem virtuti Religio-



nis, sub diuersa tamen ratione formali, opponuntur.  
 Arg. cont. 1. concl. bonitas, vel malitia moralis est quid  
 intrinsecum actui malo, circumstantiæ verò sunt quid ipsi  
 extrinsecum, sed nihil intrinsecum desumi potest ab ex-  
 trinsecò, ergo actus humanus non potest denominari, vel  
 esse bonus, vel malus à circumstantijs. Resp. dist. min.  
 nihil intrinsecum physicum, & entitatiuè denominari po-  
 test ab extrinsecò, conc. min. nihil intrinsecum moraliter  
 denominari potest ab extrinsecò physico, neg. min. alio-  
 quin sequeretur, quod obiectum non daret actui humano  
 aliquam bonitatem, vel malitiam moralem intrinsecam,  
 quia tam obiectum est quid extrinsecum respectu actus  
 humani, quàm ipsæmet circumstantiæ; ac proinde qua ra-  
 tione actus humani desumunt ab obiecto bonitatem, vel  
 malitiam intrinsecam specificam, & essentialem, ità etiam  
 à circumstantijs.

## QVÆSTIO XII.

*Vnde desumenda sit numerica peccatorum distinctio.*

**N**OT. Quod, licet actus voluntatis sit unicus, quandiū  
 non exit in opus externum, nihilominus actus aliquis  
 unus formaliter potest esse virtualiter multiplex, quate-  
 nus transit super plura obiecta materialia inter se distin-  
 cta: e. g. si quis velit occidere decem homines, actus qui-  
 dem interius voluntatis est formaliter unus, nihilominus  
 ut transit super plura obiecta, etiam actus idem internus  
 est virtualiter multiplex, & in confessione explicandus, &  
 tanto magis si de facto occidat decem homines, est virtua-  
 liter multiplex, ut clarè patebit ex dicendis infra, & in  
 confessione explicandus:

I. Concl. peccata interna unitatem, & distinctionem  
 numericam sumunt ab ipsa unitate, vel distinctione actus  
 voluntatis, quo fit voluntaria præcepti transgressio iuxta  
 eius moralem existentiam; ita Herinex, Marchant. & alij  
 Recentiores Scotistæ, quam conclusionem sic explicat  
 Marchant. Quàmuis Ioannes uno actu voluntatis inten-  
 dat plures occidere homines, non obid plura peccata in-  
 terne committit, sed tantum unum, quia unicus est actus.

voluntatis, & unum obiectum formale, nempe occisio, etsi sint plura obiecta materialia, quæ in uno formali obiecto per modum unius continentur; ratio est, quia una est volitio, etsi quæ sit multiplicatio in materiali obiecto ratione obiecti formalis, & intentionis per modum unius, omnia in uno censentur unita, & volita, debent tamen omnes malitiæ, & iniuriæ, quæ in uno illo formali obiecto ununtur, exprimi in confessione, quia talem gravitatem addunt actui, ut quamvis formaliter sit unus, & unum peccatum, virtute tamen multiplex est, & ad iudicii veritatem, & integritatem spectat illa cognoscere. Dicitur in conclusione, iuxta eius moralem existentiam, & durationem, actus enim ille voluntatis, quamvis natura sua instantaneus, tamen moraliter censetur tamdiu existere, & durare, quamdiu moralis ista existentia, & duratio persistit.

Sed petes, quamdiu censeatur idem actus voluntatis internæ existere, seu durare?

Resp. Marchant. quamdiu non est formaliter vel interpretatiue reuocatus; tunc autem censetur formaliter reuocatus, quando voluntas alium actum contrarium elicit, vel quando à proposito se à tali distrahit, siue diuertit; interpretatiue verò quando, etsi contrarium actum, vel distractionem à proposito, siue etiam auersionem animi ab illo non senserit, aliquo tamen tempore dum ad actum illū reflectit, omnino negatiue se habet, & dissimulat, nec in illud obiectum mouetur, & sic censetur interpretatiue reuocatus. Quare non approbat Marchant. sententiam eorum, dicentium, actum voluntatis censi interruptum, per somnum, vel per occupationem externam, non à proposito assumptam, & rationem dat, quia aliàs si quoties actu reflectitur, toties moueatur, omnis motus sic perseuerans primo motui, seu impulsui, ex actu impresso reputatur, cum constet, voluntatem nec formaliter, nec interpretatiue illum reuocasse; aliàs sequeretur, quod quoties aliquis reflecteret post aliqualem diuersionem super primum actum, toties peccaret peccato distincto; quod non apparet verum, quia omnis actus prior cum posteriori censetur perseuerare. Itaque debet esse interruptio, aut formaliter, aut interpretatiue voluntaria, ad hoc ut actus interni repetitio censeatur numero distincta à priori; &

hæc sententia, ut verum fatear semper mihi magis placuit, quam opposita sententia; non enim mihi satis quadrat, quod illa distinctio moralis, seu interruptio posita per somnum, vel per aliam operationem externam, reuocet actum voluntatis, seu interrumpat, cum idem actus voluntatis perseueret habitualiter; tum quia hæc sententia liberat poenitentem ab angustiis inueniendi quoties actus per longum tempus sit interruptus.

II. Concl. Unitas, & distinctio numerica actus externi sumi debet ab unitate, vel distinctione morali omnium, quæ ad actum referuntur, quatenus in uno, vel diuersis obiectis formalibus, & sine operantis distinguuntur, vel uniuntur; sic in concubitu carnali, verba, oscula, sollicitationes, tactus &c. non faciunt peccata numero distincta, ratio est, quia moraliter actus illi ad unum actum principalem referuntur, & in uno formali obiecto, & sine operantis, qui est mulierem carnaliter cognoscere, moraliter uniuntur, & sic de similibus; quæ conclusio ex regulis sequentibus euadet clarior.

I. Regula. Actiones externæ simplices, siuè quæ ex unico actu compleri solent, ex se ipsis, seu ex sua singularitate, distinctionem, & unitatem habent, ratio, quia una in obiectum tendentia terminantur, & sic facile discerni possunt quoad numericam rationem &c.

II. Regula. Omnes illæ actiones, quæ ex natura sua plures actus coniunctos habent ab ipsa principali actione, & obiecto formali, ita sumunt unitatem numericam, ut in illis non habeatur ratio actuum concurrentium quoad unitatem, vel distinctionem: e. g. in celebratione Missæ, etsi plures actiones concurrant, tamen qui Missam in peccato mortali celebrat; unum tantum peccatum committit, unde sufficit dicere, celebraui in peccato mortali. Idem est dicendum iuxta opinionem plurimorum Doctorum, & præsertim Marchanti de eo, qui distribuit in peccato mortali Eucharistiam pluribus personis, supposito, quod talis actio sit peccaminosa mortaliter, quod si teneamus cum alia opinione probabili, quod talis distributio non sit peccaminosa mortaliter, cessat omne dubium. Idem censendum est de eo, qui ad audiendas confessiones se exposuit, etiam si ceterum personæ successiuè sibi præsentent, & omnes ab-

absoluantur à peccatis, rationem dat Marchantius, quia Ministerium, & actionem natura sua communem omnibus accedere volentibus, exercet, quam explicamus per verbum; pro tribunali sedere, iudicium facere &c. Verum id ingerit nobis aliquam difficultatem, quia quando Sacerdos absoluit unam personam, perficit omninè talem actionem, quæ nullam connexionem habet cum alijs absolutionibus, quia una absolutio non ordinatur ad aliam, neque tanquam medium ad finem, neque tanquam pars ad totum, siue physicum, siue morale, ac proinde videtur dicendum, Sacerdotem tot peccata committere, quot personas absoluit; & potest confirmari hæc ratio à simili, nam qui per totam noctem habet concubitum cum muliere, si plures copulas perfectas cum illa habuit, non sufficit dicere, dormiui cum muliere tota nocte, idque non alia ratione, quia quælibet copula carnalis habet suam unitatem numericam, distinctam à quacunque alia, neque ordinatur ad alias; altera tamen opinio est probabilis. III. Regula. Peccata cogitationis multiplicantur specie ex diuersitate obiecti, seu materiæ specie diuersæ, siue ex obiecto, & sine specie diuersis; & similiter multiplicantur numero ex parte obiecti, siue materiæ, licet alioquin sit unus tantum voluntatis actus, quando talis actus dicit ordinem, & respectum ad obiecta numero diuersa; ita passim Doctores, & præsertim Marchantius, Herincx, & Mastrius. Exemplum de prima parte regulæ. Si quis alium occidere velit ad hunc finem, idest ut bona eius surripere possit; vel si quis furetur, ut fornicetur, in his, & similibus casibus, quamuis unus sit voluntatis actus, duo tamen sunt peccata specie diuersa, quia in illo eodem actu duæ reperiuntur malitiæ diuersæ, nempe homicidij, & furti, vel furti, & fornicationis.

Exemplum de secunda, idest de multiplicatione numerica. Si Petrus eodem actu voluntatis decem homines occidere proponat, tunc committit decem peccata homicidij, quatenus unus, & idem actus terminatur ad plura obiecta numero distincta; & sic pariter discurrendum est de peccato omissionis; ut si quis velit tribus diebus festis Missam non audire. Contrarium tamen sentiunt Nauarrus, Bonacina, Filiuccius, & alij, asserentes, quod, si quis uno actu plures desideret mulieres, aut velit plures homines oc-

cidere, & similia; unum tantum numero peccatum committit. Cæterum quod spectat ad peccata oris aliqui volunt, multiplicari specie, quando verbum, seu sermo dirigitur ad diuersa specie, ut si Petrus Paulum appellet hæreticum, latronem, adulterum &c. tria peccata contumeliæ specie distincta committit; & idem asserunt si sermo dirigatur ad obiectum, quod duplicem malitiam specie diuersam habet; ut si quis alium appellet furem rerum Sacrarum, vel adulterum &c. ita Sanchez, Vasquez, Caspensis, & alij. Sententia tamen opposita, docens, omnes præfatas contumelias esse eiusdem speciei, quia in una ratione formali conueniunt, quæ est intentio auferendi alteri honorem, videtur mirior, & hanc tradunt Bonac. Molina, & alij. Quod verò attinet ad pluralitatem numericam peccatorum oris, pariter discordant Doctores; siquidem dicunt aliqui, non multiplicari numero peccata, si quis uno iræ impetu appellet alium ter, vel quater furem, & aiunt etiam non augeri numero conuitia pro numero eorum, quibus obijciuntur; ut si quis simul maledicat Deo, & duodecim Apostolis, putant; non esse nisi duplex maledictum alterum in Deum, & alterum in Apostolos, estò sint duodecim; ita Nauar. Manuali cap. 6. cum alijs. Alij verò affirmant in prædictis casibus peccata numero multiplicari, quia hæc conuitia verbo complentur, ergo, sicut quando primo latronem quis appellauit semel peccauit, sic etiam quando 2. & 3. quia non est maior ratio de primo, quam de alijs. Cæterum alij probabilius procedunt cum tali distinctione: quando quis pluribus personis iniuriam infert, plura peccata committit, iuxta numerum personarum, ac proinde in confessione oportet explicare numerum personarum, non quia personarum pluralitas præcisè sit circumstantia speciem mutans, sed quia est obiectum terminans, & determinans ipsum actum, ut aliquid ad ipsius substantiam spectans in individuo, quæ quidem ratio sufficienter exprimi nequit, nisi exprimaturs expressus personarum numerus. Secus autem est dicendum, si iniuriam infert pluribus verbis contumeliosis uni tantum personæ, quia una est pugna, aut lis, ac proinde illi actus mali, siue sint tres, siue quatuor, censentur partes unius pugnae, vel lis, & sic iuxta regulam superius traditam non multiplicantur.

numero peccata: Ita Bonac. Suarez, & alij communiter &c.

Denique quod spectat ad peccata operis, conueniunt Doctores, specie multiplicari ex obiectis specie diuersis, ut supra dictum fuit, numerica autem huiusmodi peccatorum distinctio sumenda est, vel ex actibus, & obiectis numero distinctis, vel si unus sit actus, & dicat ordinem ad plura obiecta numero distincta; ut si quis uno ictu plures homines occidar, plura numero homicidia committit, ab ipsis obiectis distinctis desumenda est numerica peccatorum distinctio, quia, ut supra dictum fuit, licet actus voluntatis secundum suam entitatem physicam sit unus, est tamen virtualiter multiplex, quatenus terminat ad plura obiecta distincta, & tantò magis si facto externo huiusmodi actus habeat suum complementum. IV. Regula. Peccatum omissionis, & commissionis contra eandem virtutem differunt specie morali inter se, quia eadem virtus potest fundare duo præcepta specie diuersa, unum affirmatiuum, alterum negatiuum, ut ex dictis patet.

V. Regula. Peccata possunt inter se specie differre non solum modis prædictis, sed etiam ratione diuersæ deformitatis, quæ ad eò diuersa ratione, & malitia materiam eiusdem virtutis attingere possunt, ut quantum est ex natura peccati ostendat aliam, & aliam deformitatem; neque sit eadem facilitas, moraliter loquendo illa committendi, qualia sunt e. g. sodomia, & bestialitas, & concubitus cum Dæmone; nam natura abhorret unum plusquam aliud; ita ex communi sententia loquitur Mastr. in Theologia moralis disp. 13. q. 5. art. 2. &c. VI. Regula. Quando peccata prohibita sunt pluribus præceptis in diuersis materijs, & ob diuersa motiua, vel circa eandem materiam, sed propter diuersa motiua formalia ad diuersas virtutes pertinentia, tunc peccata inter se specie distincta erunt; e. g. præceptum de furto simpliciter, & de loco Sacro. Secus autem si plura sint præcepta sub unica tantum ratione formali circa eandem materiam: e. g. ieiunium ex regulari obseruantia, & ex præcepto Ecclesiæ &c.

Quæres. Quodnam sit maius peccatum, quando duo vitia extrema opponuntur eidem virtuti in medio consistenti, nempe. An quod opponitur per excessum, vel quod opponitur per defectum e. g. An maius peccatum sit pro-



galitas, vel auaritia, quæ opponuntur virtuti liberalitatis. Resp. Pro resolutione huius difficultatis oportet aduertere in primis, quod, licet honestas, & rectitudo virtutis, quæ mediat inter duo vitia extrema, sit formaliter una, est tamen virtualiter duplex, ac proinde habet rectitudines actuales speciei diuersæ; unde illud peccatum, seu vitium extremum erit grauius, quod actui perfectiori, seu rectitudini actuali virtutis opponitur, & è contra illud minus graue, quod opponitur minori perfectioni. Insuper obseruandum ex Mairone in 1. d. 1. q. 1. §. de 2. dico; qui cum D. Ambrosio cuius hodie festum colimus, docet, quod quatuor sunt genera virtutum in Anima nostra: quædam sunt ad regulandum; ut Prudentia: quædam ad actum remittendum, ut temperantia: quædam ad intendendum, ut fortitudo: & quædam ad utrumque, ut Iustitia, cuius una pars est remuneratiua, & hæc ad intendendum; alia punitiua, & hæc ad remittendum. Iam modo ad propositam difficultatem dicimus, quod quando virtus datur ad actum intendendum, tunc defectus, vel vitium maius, seu grauius est in deficiendo, quàm in superabundando, seu excedendo, sicut timiditas plus vituperatur, quam audacia, quia fortitudo datur ad actum intendendum; sic pariter auaritia est peius vitium, quàm prodigalitas, quia liberalitas datur ad actum intendendum. E contra quando virtus datur ad remittendum actum, tunc peius est vitium per excessum, quàm per defectum: e. g. temperantia datur ad remittendum actum, ideoque peius vitium est crapula, & ebrietas, quàm nimia abstinencia; quam doctrinam amplectuntur passim Doct. potius sibi, quam alijs, à quibus acceperunt, appropriando.

Quæres. Quodnam propriè sit peccatum, quod sit ex malitia. Resp. Voluntas tunc propriè peccat ex malitia, non quando vult malum sub ratione mali, ut putant Ocham, & Gabriel; neque quando peccat ex habitu vitioso, ut quidam alij opinantur, sed quando nec ex ignorantia, nec ex infirmitate, nec ex passione, seu concupiscentia antecedenti, sed ex mera libertate, hoc est, nulla passione agitante, inducit se ad malum: ita D. Bon. & Scor. 2. d. 43. q. 2.

## QVÆSTIO XIII.

*Vtrum peccatum sit causa peccati, nec non pœna peccati.*

**N**OT. 1. Quodd aliquid potest esse causa dupliciter: Vno modo per se, & directè agendo, & mouendo, aliò modo per accidens, & indirectè ad modum remouentis prohibens: hoc autem fieri potest dupliciter: Vno modo aliquid efficiendo, aut mouendo, ut cum quis frangit, vel amouet trabem prohibentem lapidem, ne cadat; aliò modo per modum demeriti, quemadmodum ille, qui peccat dicitur à se remouere gratiam, quia demeretur eius ablationem, quæ quidem gratia impediēbat peccatum. Insuper aliquid potest dici causa alterius, vel propriè causando illud in aliquo genere causarum, vel quia sine illo talis effectus non causaretur, et si ad hoc non concurrat in aliquo genere causarum, & in hoc sensu aliquid dicitur causa sine qua non.

NOT. 2. Pro 2. parte quæst. ex Magist. sentent. quod priuatio boni potest intelligi actiue, vel passiue, idque secundum Scot. sic exponitur, quod ipsa culpa est à voluntate, ut à causa actiua, sed tamen deficiente, & ipsa pœna est in voluntate tanquàm in subiecto, quod per culpam priuatur bono conuenienti, quod bonum erat debitum in quantum voluntas potuit, & debuit agere ad rectitudinem actus, & tamen non egit. Primo itaque modo est culpa: 2. modo formaliter est pœna, quia videlicet est corruptio, siue priuatio boni sibi maximè conuenientis, & ut sic non est formaliter voluntaria, quia voluntas in quantum subiectum non habet formā sibi inherētem in sua potestate.

I. Concl. Loquendo de peccato tam formali, quam materiali potest interdum peccatum esse causa per accidens peccati ad modum remouentis prohibens, loquendo de peccato, quoad materiale potest esse aliquando causa peccati impropriè: est Scot. in 2. sent. dist. 36. q. 1. Prob. quoad 1. part. Peccatum est demeritum, quo voluntas priuatur gratia, sed voluntas gratia priuata redditur debiliōr ad bonum, & procliuior ad malum, seu ad peccatum, ergo peccatum potest aliquando esse causa per accidens peccati per modum remouentis prohibens. Prob. 2. pars. Non reperire.

tur actus inordinatus, siue culpabilis in alijs potentijs à voluntate, nisi in voluntate esset peccatum, ergo peccatum in voluntate est causa sine qua non peccati existentis in alijs potentijs, quod tamen non est intelligendum, quasi actus elicitus à voluntate, & actus imperatus sint duo peccata in esse morali, & theologico, licet sint duo actus in esse naturæ. Prob. 2. Eò quia post priora peccata relinquitur in voluntate dispositio quædam inclinans ad consimiles actus peccaminosos, ergo peccatum aliquando est causa peccati improprie.

II. Concl. Omne peccatum est pœna, & unum peccatum potest esse pœna alterius. Prob. quoad 1. p. ex Scot. in 2. cit. Pœna formaliter est carentia talis boni convenientis voluntari, sed peccatum est carentia, talis boni: ergo omne peccatum est pœna. Min. patet, quia in voluntate ponitur affectio boni iusti, & boni commodi, & utriusque carentia est pœna. Prob. 2. pars. Apocalip. cap. vlt. dicitur. *Qui in sordibus est sordescat adhuc*, ubi dicit Glossa: *Qui in sordibus est, hoc meretur, ut sordescat adhuc*, sed in sordibus esse nil aliud est quàm esse in peccatis, & sordescere nil aliud est quam peccare, ergo peccatum est meritum alterius peccati, ergo à relativiis peccatum sequens est retributio præcedentis, quæ quidem retributio est pœna peccati.

Arg. contra 2. conclusionem D. Augustinus in lib. 1. retract. dicit, quod omnis pœna est iusta, sed omne iustum est à Deo, ergo omnis pœna est à Deo; subsumo min. sed peccatum non est à Deo. ergo peccatum non est pœna peccati. Resp. dist. mai. Omnis pœna positiua, quæ exigit causam efficientem est à Deo conc. mai. Omnis pœna, quæ non respicit Deum, tanquam causam efficientem, sed solummodò deferentem ob demeritum peccatoris, & sic neg. mai. Omnis igitur pœna inflictà à Deo tanquam à causa efficiente non potest esse peccatum, sed benè pœna à Deo deferente creaturam liberam in suis defectibus.

Arg. 2. Pœna non excedit culpam, quia Deus semper punit citra condignum, sed quandoque peccatum sequens est maius præcedenti, ergo unum peccatum, non potest esse pœna alterius. Resp. dist. mai. Pœna inflictà à Deo non excedit culpam conc. mai. Pœna, quam peccator sibi met infert peccando neg. mai.

Arg.

Arg. 3. Si culpa sequens est pœna præcedentis, ergo à re-  
latiuis culpa præcedens est meritum sequentis, & pari ra-  
tione, illa culpa sequens est meritum alterius peccati, &  
sic deinceps, ergò si nullum peccatum debet remanere im-  
punitum, videtur quod homo debeat peccare in æternum,  
hoc est in infinitum, quod est indignum dicere, & manife-  
stum inconueniens. Resp. quod culpa præcedens respec-  
tu sequentis non est meritum condigni, sed congrui, quæ  
quidem congruitas in alia pœna de facili recompensari po-  
test per aliam congruitatem, unde sicut congruum est,  
quod Deus peccatorem deserat permittendo eum labi in  
aliud peccatum, ita etiam congruum est, quia malè usus  
est vita, ut vitam sibi auferat, & in Infernum demergat. Et  
insuper sic congruum est, ut si velit pœnitere, & abstinere,  
Deus det ei auxilium, ut in aliam culpam, non cadat.

#### QVÆSTIO XIV.

*Vtrum peccatum mortale contineat malitiam  
infinitam.*

**N**ot. 1. Quodd in peccato tria distingui solent. Primum  
est ipsiusmet peccati malitia moralis, quæ ut supra-  
dictum est consistit in priuatione debitæ rectitudinis: 2.  
est auersio à Deo, & conuersio ad creaturam: 3. tandem est  
ratio offensæ; nam peccans ponit in creatura rationem ul-  
timi finis saltem interpretatiuè, ac proinde iniuriam facit  
Deo auferendo illi honorem ultimi finis; honor siquidem  
Deo debitus consistit in cultu ei exhibito ab omnibus suis  
creaturis; igitur quando aliqua creatura intellectualis non  
exhibet ei prædictum cultum, sed Deum grauitèr, ac læ-  
taliter offendit; tunc Deus minùs habet de honore sibi  
debito, & per consequens læsionem patitur in honore. Pro-  
fectò honor est in honorante, & nil aliud est, quàm recta  
existimatio de virtute alterius. Hinc D. Aug. lib. 83. q. 9.  
31. ait. *Qui de Deo prauè sentit, verè la dat illum in honore, quia  
recta existimatio de illo est ei debita.* Itaque peccator infert Deo  
offensam, & iniuriam contra iustitiam.

Not. 2. Quodd iniuria tantò est grauior, quantò persona,  
eui irrogatur, est dignior, & persona offendens est vilior;  
cre-

crescit namque grauitas iniurię ex hac personarum impropor-  
 tione. Quare cum Deus, cui per peccatum fit iniuria;  
 habeat infinitam dignitatem, iniuria ei facta per pecca-  
 tum; quodammodo habet infinitam grauitatem; notanter  
 dicitur (quodammodo) quia, etsi cæteris paribus, pecca-  
 tum tantò fit grauius, quantò persona offensa est dignior;  
 & lædente est vilior; inde tamen non sequitur, malitiam  
 peccati, qua Deus offenditur, absolutè, & simpliciter esse  
 infinitam; sed tantum secundum quid; videlicet, quia cæ-  
 teris paribus, maior est, quàm malitia actus, qua persona  
 creata offenditur, quod benè potest consistere cum peccati  
 finitate in se. Itaque iniuria Dei est altioris ordinis in ra-  
 tione iniurię supra omnem iniuriam, quæ inferri potest  
 puræ creaturæ; ac proinde est illi improporcionabilis, quę  
 dici potest infinita negatiuè in se. Quam doctrinam indi-  
 cauit Arist. lib. 5. Eth. cap. 5. & leges statuunt, quod iniu-  
 ria, quæ fit Regi propter maiorem Regis maiestatem, seu  
 dignitatem, est maior ita l. Prætor ff. de iniurijs, & l. aut  
 facta ff. de penis; idque est commune omnium prudentum  
 iudicium; igitur iniuria, quæ fit à vilissimo peccatore Deo  
 excedit quodammodo in infinitum iniurias creaturæ fa-  
 ctas.

Not. 2. quod in hac quæst. duę sunt sententię; prima  
 est Thomistarum cum D. Thom. p. 2. q. 87. art. 4. & p. 3.  
 q. 1. art. 2. asserentium peccatum mortale importare mali-  
 tiam simpliciter infinitam, non quidem in ratione mora-  
 lis malitię, quæ est priuatio rectitudinis debitę finitę, sed  
 in ratione offensę, seu iniurię; quia in hoc sensu includit  
 aliquam infinitatem simpliciter in genere mali, prout of-  
 fensā se tenet ex parte Dei, & afficit ipsum. Quare dicunt,  
 & signanter Gonet. in comp. theol. tract. 5. de peccatis;  
 quod persona offensa non comparatur solum per modum  
 obiecti ad iniuriā ipsi illatam, sed etiam in ratione subiecti  
 moralis; quod afficit ipsa iniuria, & inde contrahit huius-  
 modi infinitatem in genere mali. Quod idem Gonet. ni-  
 titur probare tripliciter: primò ex vulgari illo proloquio  
 Honor est honorantis, iniuria autem est in persona offen-  
 sa: 2. ex differentia, quæ inter peccatum in ratione mali-  
 tię, & in ratione offensę reperitur, nam sub priori ratione  
 dicitur, & est malum peccantis, sub posteriori non ipseus  
 pec-

percantis, sed Dei offensus dicitur malum; ergo in ratione offensæ Deum ut subiectum morale respicit: 3. ex communi modo loquendi, non enim offendens, sed persona offensa dicitur pati offensam; ille autem dicitur offensam patiens, qui offensæ subiectum est, ergo persona offensa est morale subiectum offensæ, ac proinde in hac consideratione contrahit ab illo infinitam malitiam in genere mali.

Hinc disparitatem deducunt, inter actum charitatis erga Deum, & actum peccaminosum; nam ille comparatur ad Deum tanquam ad obiectum; hic autem comparatur ad Deum tanquam subiectum, quod moraliter afficit, & quodammodo informat, & participat gravitatem infinitam respondentem infinitæ dignitati Dei, neque actus charitatis participare potest parem infinitatem, quia obiectum non dat aliquid actui, nisi iuxta modum, quo ab ipso attingitur; attingitur autem Deus finito modo à tali actu, & à similibus; ideoque non accipiunt ab ipso infinitatem aliquam intrinsecam. Altera sententia est Scoti; & Scotistarum in 2. d. 37. q. 1. §. ex ista, & in 3. d. 19. & 30. §. contra, ubi ait actum charitatis esse tantæ bonitatis, quantæ malitiæ est peccatum, quo quis se auertit à Deo; & in 4. d. 14. q. 1. ubi docet, quod tantum malum est peccatum, quantum bonum aptum est inesse actui.

Concl. Peccatum mortale nullò modo, nec quidem in ratione offensæ seu iniuriæ includit malitiam simpliciter infinitam. Est Scot. loc. cit. & alibi, eamque amplectuntur quam plures Recentiores, & signanter Suarez, Lugo, Meratius, Becanus, Morandus, & Salas. Prob. 1. & simul evertitur Thomisticum fundamentum. Infinitum simpliciter in perfectione, siue sit infinitum in omni perfectione, & quacunque possibili, siue in aliqua determinata, est id, quod non potest habere maius se, siue in omni perfectione, siue in tali determinata, teste Scoto quol. 5. ubi ait infinitum in eo genere, in quo est infinitum, nihil potest esse maius, ut ex ipsa infiniti ratione constat; sed ex peccatis mortalibus unum est alio gravius; & maius, tam in ratione malitiæ, quam in ratione offensæ, & iniuriæ, ergo nullum peccatum est simpliciter infinitum. Maior constat ex dictis in Philosophia; minor probatur. Peccatum est malitia, & offensa Dei; ita tamen ut malitia sit radix iniuriæ, & of-



& offensæ, quia peccatum theologicè acceptum, & adequatè idè est offensæ, iniuria, & contemptus Dei, quia est transgressio D. legis; hoc est, ut explicat Mastrius, quia habet malitiam, quæ est priuatio obseruantix, & præcepti legis Dei; ergo cum ipsa ratio malitiæ in omnibus peccatis sit inæqualis, & suscipiat magis, & minus, etiam ratio offensæ, & iniuriæ esse non potest æqualis in omnibus peccatis, sed maior, & minor pro peccatorum grauitate; constat. quia accessorium sequitur naturam principalis iuxta Philosophos, & legistas l. cum principalis ff. de reg. iuris; quod autem sequitur aliud per modum passionis, nequit habere perfectiorem modum essendi, quàm id, cuius est accessorium l. iustissimè §. 1. ff. de edil. edic. Tum quia grauiori peccato, grauius offenditur Deus, ut passim loquuntur Scrip. Sac. & Patres; ergo si peccata non sunt paria, & æqualia in ratione malitiæ; neque erunt æqualia in ratione offensæ, & iniuriæ; alioquin dicendum esset, æquè Deum offendi peccato grauissimo, ac valdè minus graui intra latitudinem mortalis culpæ.

Nec valet responsio communis Thomistarum attendi debere grauitatem, & infinitatem ratione personæ offensæ; quia dum ostendimus peccato grauissimo offendi magis Deum, quàm minus graui, respicimus, & malitiam, & iniuriam personæ; quæ quidem iniuria non crescit adequatè ad dignitatem eius, sed seruata proportionè; ut patet ex 2. not. Confirm. Etenim iuxta regulam traditam à nostro Richard. quol. 1. q. 2. §. aliorum opinio. Quando sunt duæ opiniones, quarum una est magis remota ab uno pernicioso errore, quàm alia; magis declinandum est per illam quæ magis remota est ab errore, si potest ratio talis sustentari, vel sustineri; sed opinio asserens, peccatum mortale non continere infinitam malitiam simpliciter in ratione offensæ; sed tantum secundum quid, est magis remota à pernicioso errore Iouiniani, & Stoicorum, qui assererant omnia peccata esse æqualia, quàm opinio opposita; ergo declinandum est ad opinionem magis remotam. Neque dicant Aduersarij, errorem Stoicorum fuisse, quod peccata sint æqualia in ratione malitiæ; & in hoc sensu à Patribus damnari; non autem in ratione offensæ, & iniuriæ Dei; nam talis responsio apparet gratis ex cogitata;

cum

eum à Patribus Stoicorum error refellatur ex hoc capite; nempe quia dicebant, Deum æqualiter offendi quolibet peccato, qui est manifestus error, æquè siquidem offenderetur Deus per blasphemiam, idolatriam, & similia, ac per furtum, per fornicationem; & similia valde minus graua, Profectò signanter D. Aug. & D. Hieron. ut inter alios notat Mastrius in hac quæst. in sensum mox explicato prædictum errorem impugnant, & damnant, Nam asseriebant, omnia peccata habere æquale meritum, & æqualem dignitatem ad pœnam; ergo hæretici illi non solum contendebant omnia peccata esse paria, & æqualia in ratione malitiæ, sed etiam in ratione reatus ad pœnam, & per consequens in ratione offense, iniuriæ, ac demeriti; videantur Hieron. lib. 2. contra Iouinianum & D. Aug. Epist. 29. ad Hieron.

Cæterum quod attinet ad alia indicata à Gonet pro fundamento suæ opinionis minus fundata appareat; sicut enim actus charitatis est in eliciente, & terminatiue attingit Deum, velut obiectum; ita actus peccaminosus charitati oppositus est in eliciente effectiue, & terminatiue attingit Deum, cum oppositorum sit eadem disciplina, & oppositis opposita conueniant; ergo sicut actus charitatis non est in Deo tanquam in subiecto, nec ab eo participat infinitatem simpliciter in genere boni; nec peccatum est in Deo læso tanquam in subiecto; nec trahit, nisi talis contractio merè singatur, infinitatem simpliciter; sed uterque actus ex æquo contrahit solam infinitatem secundum quid. Neque illud vulgatum proloquium: honor est in honorante &c. aliquid releuat; cum secundum rationem honoris; & iniuriæ sit par ratio, & etiam iuxta moralem estimationem. Nam sicut honor est in honorante actiue, & intrinsecè, extrinsecè verò, ac terminatiue est illius, cui exhibetur, immò iuxta moralem æstimationem videtur etiam esse intrinsecè in persona honorata; ita offensa est in offendente actiue, & intrinsecè, at extrinsecè, & terminatiue est in persona dehonora; & quodammodo iuxta estimationem videtur esse in persona offensa; igitur pari passu concurrunt, ac proinde euanesceat ista infinitas contracta à subiecto, non enim Deus velut subiectum, in quo censetur moraliter subiectari offensa, tribuere potest pec-

cato infinitam malitiam simpliciter; alioquin in peccato reperirentur duæ malitiæ, altera moralis, prout est privatio debitæ rectitudinis, & hæc finita, altera quatenus est Dei offensa, & hæc infinita, quod est manifestum absurdum. Tum quia licet concederetur distingui in peccato has duas malitias, tamen nulla ratione altera dici potest infinita in genere offensæ; quia Deus offenditur semper finito modo, sicut finito modo diligitur.

• Arg. cont. conc. Gravitas offensæ crescit iuxta mensuram dignitatis Personæ, sed Deus est dignitatis infinitæ simpliciter, ergo peccatum in ratione offensæ Dei est simpliciter infinitæ malitiæ: mai. patet &c. Resp. dist. mai. Gravitas offensæ crescit &c. arithmetice, neg. mai. geometricè, idest modo iam explicato in 2. notabili; conc. mai.

Contra arguit Gonet. Ideo Deus offensus communicat offensæ gravitatem ordinis superioris, quia ipse superioris ordinis est; at non solum est dignitas ordinis superioris, sed etiam dignitatis simpliciter infinitæ, ergo offensæ communicat Deus gravitatem simpliciter infinitam. Resp. Quod si hoc argumentum valeret; sequeretur, quod Deus communicaret peccato malitiam infinitam intensivè; & consequenter necessariò omnia peccata essent equalis gravitatis, & malitiæ, quod est error damnatus. Resp. igitur conc. mai. & neg. min. Ratio est, quia actus habet specificationem, & denominationem ab objecto, unde si objectum est inferioris ordinis etiam actus est inferioris, si superioris superioris ordinis; non autem habet tribuere actui aliquam rationem malitiæ infinitæ quia Deus offensus est infinitum bonum; itaque dici etiam potest, quod sicut actui tribuitur esse ordinis superioris objectivè, & extrinsecè; ita tribuitur esse infinitum objectivè, & extrinsecè, ac proinde quædam infinitas secundum quid.

Contra si peccatum mortale non habet malitiam simpliciter infinitam, ergò finitè solum excedit peccatum veniale, sed hoc est falsum, quia communis sententia Theologorum docet, peccatum mortale excedere in infinitum peccatum veniale; ergo &c. Resp. disting. sequelam: in genere moris; hoc est in malitia morali intrinseca conc. quia in hoc proportionem habet, & solum excedit sicut magnum excedit parvum, quando utrumque est finitum; in genere

theologico; conc. Vnde dictum est supra ex Scoto, peccatum mortale; & veniale inter se differre genere theologico; non autem in genere moris.

Adde, quod, ut notat Tataret. quol. 5. non sequitur hoc excedit illud in infinitum, ergo est infinitum, quia est arguere à dicto secundum quid ad dictum simpliciter; sed oportet addere; hoc excedit illud in infinitum infinitè; quod tunc contingit, quando cum tali excessu concurrat etiam continentia formalis, vel virtualis perfectionum inferiorum, quæ excedit; quod non adest in proposito; alioquin sequeretur unum peccatum mortale continere nedum omnia peccata venialia, sed etiam omnia peccata mortalia inferiora, si tale peccatum esset simpliciter infinitum in genere malitiæ; immò tantam malitiam haberet unum peccatum mortale, quantam omnia simul, cum unum infinitum non sit altero maius.

Arg. 2. Peccatum mortale ex se, & ex malitia sua intrinseca inducit pœnam æternam; sed ex pœnæ infinitate arguitur culpæ infinitas; nam pœna commensurari debet culpæ; ergo cum pœna peccati mortalis sit infinita, etiam peccati malitia est infinita. Resp. ex Scoto in 3. d. 19. q. un. ad 3. & in 4. d. 50. q. 6. in fine, distinguendo mai. inducit pœnam externam, seu infinitam extensivè, conc. intensivè neg. mai. iam modo sicut pœna est infinita tantum secundum quid; ita culpa est infinita tantum secundum quid. Insuper solet impugnari conc. à Thomistis argumento desumpto à satisfactione, & merito Christi, quod vide in disp. de merito Christi p. 3. sed quæ res pro complemento responsionis ultimi argumenti: qua ratione peccatum mortale puniri debeat pœna infinita, an ex sui natura, ut prætendit arguens, an ex alio capite.

Resp. ex Scot. in 3. loc. cit. & in 4. q. cit. in fine, ubi docet, quod peccato mortali non correspondet pœna infinita, seu æterna ex propria natura, quia posset Deus absolute loquendo peccato mortali infligere pœnam aliquam, quæ si tantum duraret per momentum, adhuc sufficienter peccatum puniretur. sed hoc provenit ex ordinatione divina sic iuste disponente. Etenim quia culpa, seu peccatum durat in obstinata damnatorum voluntate; ideo etiam pœna durat, teste D. Aug. de fide ad Petrum dicente. *Ver-*

*manente in eis iniusta affectionis malo, permanet in eis iusta retributionis damnatio* Quod non est ita intelligendum; ideo damnatos æterna pœna puniri, quia postquam sunt in inferno, hoc est in termino, actualiter demereantur: neque pariter quod actualiter puniantur ob illam malam voluntatem; quia, cum sint in termino, non amplius sunt in statu merendi, & demerendi. Sed debet intelligi in hoc sensu: nimirum, quia quando erant in via fuerunt in causa, ut quantum esset ex se in tali statu semper permanerent; ac proinde duratio illa æterna in peccato est voluntaria in causa, seu interpretatiuè; cum voluntariè mortui sint in tali statu, in quo pœnitentiam agere non possent; & sic proportionem seruata pœna quoque est in æternum duratura; quam doctrinam explicat Doctor exemplo de Seruo proijciente se in foueam, è qua non possit nisi Domini auxilio exire; ita equidem se habet peccator, dum mortaliter peccat, cum sine Dei auxilio speciali non possit è profundissima fouea peccati, in quam se voluntariè præcipitauit, exire. Adde, ut supra indicatum est, peccatum mereri pœnam æternam, quatenus est iniuria, offensa, vel contemptus saltem virtualis, & interpretatiuus infinitæ Deitatis. Quare sicut contrahit malitiam infinitam obiectiuè, hoc est, infinitam secundum quid; sic etiam meritò, correspondet illi pœna infinita secundum quid, hoc est secundum durationem æternam, à qua Deus sua infinita pietate nos liberet; nobisque largiri dignetur, ne dum veram peccati cognitionem, sed etiam eiusdem fugam, & detestationem; sicque diuino auxilio suffulti ad æternam gloriam peruenire valeamus. Amen.

## DISPUTATIO II.

### *De peccatis in particulari, seu capitalibus.*

**D**isputationi præcedenti præsentem disputationem de peccatis in particulari, adiungo; quia non nisi cum magna difficultate ex doctrina generali superius tradita peccatorum in particulari distincta notitia deduci potest. Verum quia de Avaritia, Deo ad iuuante, agetur in tract. de iustitia, & iure, de inuidia, & ira in disp. de virijs charita-

ritati oppositis, de gula in disp. de ieiunio; ideirco hic solum de Superbia, Luxuria, & Accidia ex professo agere intendendo; & de cæteris eorum tantum naturam indicare; nec non filias &c.

## QVÆSTIO I.

### *De Superbia, ac eius filiabus.*

**N**ot. 1. Quod peccata capitalia sunt numero septem, nempe Superbia, Auaritia, Luxuria, Gula, Ira, Inuidia, & Accidia; & dicuntur capitalia; seu vulgò mortalia; quia sunt velut capita, & fontes, unde cætera omnia peccata deriuantur; cum unum quodq; habeat sub se plures filias, seu species. At inter ista septem primum locum tenet superbia, quia, teste D. Aug. lib. 14. de Ciuitate Dei est caput omnium vitiorum, vel quia est principium omnium peccatorum; vel quia, ut explicat Alexander de Arioſtis minorita in sum. Confessorum, in omni peccato contemptus Dei, qui ex superbia venit, repetitur. Superbia autem sic definitur passim à Doctoribus; est appetitus inordinatus, & peruersus propriæ excellentiæ, quam si quis appetat manifestare exterius fit vanagloria. Vnde Alens. p. 3. in tract. de superbia art. 1. q. 1. ait. *Superbus ab intra sibi magnus apparet seu vanagloriosus ab extra in ore aliorum laudem appetit*. Talis autem appetitus fit inordinatus dupliciter, primò ex parte rei, dum quis appetit excellentiam, aut honorem de eo, quod non existit, seu non habet, vel non est honore dignum; sic multi appetunt excellere in vitijs, & peccatis, etiam in ijs sæpe iactantes. Secundò fit inordinatus ex parte eorum, apud quos excellere, & laudari quis appetit; ut si quis apud Rusticos gloriam quærit, quod sit doctus Theologus. Tertiò ex eo, quod gloriam, & excellentiam non referat in debitum finem, & in honorem Dei; aut in salutem proximi: verùm, ut infra dicetur, tales inordinationes constituunt tantum culpam venialem.

Not. 2. quod iuxta D. Greg. Alens. & D. Thomam quatuor sunt species superbiæ, quarum prima est, dum quis bonum, quod habet, à se ipso habere putat: secunda dum



quis suis meritis accepisse existimat: tertia quando quis si-  
bi arrogat bona, quæ non habet: quarta denique dum ob  
bona, quæ habet cæteros despicit, qui illa non habent; quæ  
species omnes ad vanagloriam transferri videntur; si ea-  
rum appetitur manifestatio. Vnde Doct. passim enume-  
rant decem filias vanagloriæ; & sunt iactantia, nouita-  
tum inuentio, hypocrisis, pertinacia, discordia, contentio,  
inobedientia, curiositas, ambitio, & præsumptio; de qui-  
bus infra in sequenti quæstione.

I. Concl. Superbia, & vanagloria tunc sunt mortale pec-  
catum, quando propria excellentia, vel eius manifestatio  
appetitur cum contemptu subiectionis ad Deum superio-  
rem, qua talem, vel ad ipsam legem. Insuper quando hoc  
fit cum notabili irreuerentia erga Deum, vel legem ipsius  
Dei; vel cum graui damno proximi; nec non dum id appe-  
titur de peccato mortali, vel in ordine ad mortale. Dein-  
de quis mortaliter peccat, quando falsò finit laudari, sciens  
inde secuturum graue damnum proximi; ut si valde impe-  
ritus Doctor se multum permittit laudari; ex quo fieri  
potest, quod alij non accedant ad Doct. peritos pro suis ne-  
cessitatibus, & infirmitatibus. Denique peccat quis mor-  
taliter, dum in excellentia propria ultimum finem consti-  
tuit. Cæterum communiter sunt tantum peccata venia-  
lia: ita passim Doctores. Addo cum Petro Marchant. l. 2.  
tract. 2. tit. 3. sect. 1. q. 3. hanc regulam generalem. Qui-  
cunque eò dementiæ venit, ut bona, quæ habet, vel se ha-  
bere putat à se, & non à Deo habere velit: vel si à Deo suis  
tamen meritis, & ex debito adequatæ iustitiæ, Superbiæ  
grauissimo peccato mortali obnoxius est, si deliberato, &  
pleno actu voluntatis consentiat.

II. Concl. Quandoque bono fine homo appetere potest  
laudem, siue manifestationem alicuius excellentiæ: idque  
dupliciter, ut ex communi docet Marchant. loc. cit. Primò  
ad vitandum aliquam infamiam, vel reparandam minorem  
æstimationem, quam homines habent de se, forte ex aliqua  
detractione, vel ingesta mala suspicione, & hic finis vanus  
non est: immò non solum potest homo ob talium finem se  
laudare, sed etiam quandoque tenetur ad reintegrandam,  
aut conseruandam necessariam famam suam. Hoc modo  
Samuel coram populo primò Reg. c. 12. se laudabat, &

Sancti frequenter hoc fecerunt. Secundò. Propter gloriam Dei, & utilitatem aliquam spirituales ad ædificationem proximorum: sic Paulus, & Barnabas narrabant magna Dei, quæ per illorum manus Deus operari dignatus erat inter Gentes. Act. 19. & hic finis pariter non est vanus, sed meritorius per eandem rationem allegatam. Quod si finis appetendæ laudis, & gloriæ sit lucrum quoddam, vel commodum inordinatum, siue aliquid aliud, ex quo peccatum mortale redundat, erit appetitus mortaliter inordinatus. Exemplum dat Marchant. de Phariseis; qui comedebant domos Viduarum, simulantes longas orationes, & alia per hypocrisim faciebant, de quibus Matt. c. 23. & hoc sine vanam gloriam appetere peccatum mortale est: ita Marchant. qui ob plenioram notitiam subdit sequentes regulas.

Prima est. Quicumque ex superbia pretendit singularitatem in se solo excellentiam, aut bonum se habere cum aliquo aliorum despectu; si in grauem honoris Dei iniuriam, aut despectum, aut detrimentum alicuius tertij hæc singularitas vergat, est mortale peccatum; sin verò despectus sit levis, veniale peccatum. Secunda. Quicumque vult æstimari habere bonum, & excellentiam, quam non habet, si inde nullum nascatur graue detrimentum tertio, aut iniuria honoris Dei ex se tantum est peccatum veniale; quod si inde aliquod graue detrimentum oriatur est peccatum mortale; e. g. aliquis vult haberi doctus Theologus, Prædicator, Confessarius, peritus Medicus. Iurisconsultus, Aduocatus, quæ tamen dona non habet; etsi in hoc sistat; ita quod ad nullam functionem, seu actionem se applicet, est tantum peccatum veniale: secus autem si indubitanter cathedras, dignitates, confessionale, officium publicum Medici, Aduocati &c. tunc enim est peccatum mortale, & tenetur ad damna tertij, si quæ ei intulerit. Exemplum primæ regulæ. Aliquis vult singularis apparere in sapientia, doctrina &c. quasi ipsi soli super alios debeatur. Si ex hoc aliorum Doctorum, & sapientum doctrina grauer despicatur, peccat mortaliter. Vbi verò appetitus ille singularitatis nemini grauer nocet, genus quoddam vanitatis, & dementiæ est, ac per se tantum veniale. Vnde superbia ex suo genere est peccatum mortale.

quia, ut superius tactum est, in hoc consistit, quod homo ita inordinatè appetit excellentiam propriam, quod non vult subdi Deo, & regulæ, seu legi eius.

## QVÆSTIO II.

### *De Filiabus Vanagloriæ.*

**N**Ot. Quòd, ut supra indicauimus, decem sunt filiæ Vanagloriæ. Prima est iactantia, & nil aliud est, quàm propriæ laudis ostentatio, etiã si subsit veritas, & distinguitur ab arrogantiâ, quæ est falsa laus, cum sibi attribuit, quod non habet; ita Alexander de Ariostis in sum. Vnde D. Greg. lib. 21. moral. non enumerat superbiam inter septem capitalia, sed super omnia eam velut Reginam constituit, & inanem gloriam inter capitalia primo loco ponit; cui conuenienter assignantur recensitæ filiæ sic. Illa vitia, quæ de se nata sunt ordinari ad finem alicuius vitij capitalis dicuntur eius filiæ, seu rami; & non species, quia etiã vitia diuersi generis ad illa ordinantur: finis autem inanis gloriæ est manifestatio propriæ excellentiæ, ad quod potest homo tendere dupliciter, primò directè, siue per verba, siue per facta. Si per verba, vel hoc fit per verba simpliciter prolata in laudem propriam, & sic est iactantiâ; vel per verba habentia aliquam admirationem, & sic est præsumptio nouitatum. Si per facta, & sic est hypocrisis. Alio modo indirectè ostendendo se non esse alio minorem, & hoc quatuor modis: 1. quoad intellectum, & sic est pertinacia, per quam homo nimis innititur propriæ sententiæ, nolens cedere sententiæ meliori: 2. quoad voluntatem, & sic est discordia, dum non vult quis à propria voluntate recedere, ut alijs consonet: 3. quoad locutionem, & sic est contentio, dum quis contra alium clamorosè litigat: 4. quoad factum, & sic est inobedientiâ, dum quis renuit exequi Superioris præceptum.

I. Concl. Peccatum inanis gloriæ non est ex genere suo mortale; potest tamen esse mortale ex conditione materiæ, & etiã operantis. Hæc videtur communis, licet nonnulli oppositum sentiant. Prob. quia hoc peccatum quantum est ex se charitati quoad dilectionem proximi nõ repugnat

saltem grauiter. Verùm quoad dilectionem Dei potest charitati repugnare dupliciter, & sic euadere peccatum mortale: primò ratione materiæ, de qua quis gloriatur; puta cum quis gloriatur de aliquo falso, quod contrariatur diuinæ reuerentiæ iuxta illud Ezech. 28. *E' euatum est cor tuum.* & dixisti *Deus ego sum*; & illud 1. ad Corint. *Quid habes quod non accepisti? si autem &c.* Vel etiam de bono temporali gloriatur illud Deo præferendo; quod prohibetur Hierem. 9. *Non gloriatur sapiens in sapientia sua &c.* aut quando quis præfert testimonium hominis testimonio Dei, contra quos ait Ioan. 12. *Qui dilexerunt magis glo iam hominis, quàm Dei.* Alio modo ex conditione gloriantis, qui intentionem suam refert ad gloriam propriam, tanquàm ad finem vltimum, ad quem ordinat virtutis opera, & pro quo consequendo non prætermittit etiam facere ea, quæ sunt contra Deum.

II. Concl. Qui se iactat de vitijs, & peccatis perpetratis; si in tali iactantia intermisceatur desiderium, debet in confessione necessariò exprimere speciem peccati; si autem solum adsit peccatum iactantiæ nudæ v. g. de adulterio, fornicatione &c. satis probabile apparet iuxta Tamburinum lib. 2. methodo conf. cap. 7. §. 3. non esse necessarium tales species declarare, sed sufficere si dicatur, toties iactaui me de peccato mortali: modo absit gaudium, delectatio, & desiderium commissi peccati. Ratio Tamb. est, quia tota malitia iactantiæ consistit in eo, quod offensa Dei eligatur, ut medium ad captandam gloriam apud homines, quæ magna irreuerentia æquè in omnibus peccatis mortalibus reperitur, vel, si quid aggrauat peccatum, non videtur eius malitiam in aliam speciem transferre; idque ait, siue peccata, de quibus gloriaris, commiseris, siue non; ita etiam sentiunt Diana p. 11. tract. 7. Leander, Castropalao, & Lugo contra Pontium.

Cæterum. Si, dum quis se iactat de aliquo peccato, alios ad peccatum inducit, tenetur explicare ut peccatum scandalali speciem. Similiter qui alterum præsentem de certo peccato laudat, debet in confessione exprimere speciem peccati, quia excitat talem ad gaudendum de commisso peccato.

Quæres 1. An inuentio nouitatum, ut nouarum epularum, vestium, ludorum &c. sit peccatum mortale.

Resp. Si huiusmodi inuentio nouitatum ordinetur in finem mortaliter malum certum est, esse peccatum mortale; pariter si cedat in notabile detrimentum cultus diuini, vel boni publici, aut priuati; ut si notabiliter corrumpat iuentutem, aut mores: item si in iis constituatur ultimus finis. Ex qua responsione rectè inferitur, quod culpam mortalem incurrit mulier, quæ ita afficitur curioso ornatui; ut potius sit parata transgredi præceptum grauius obligans, quàm ab eodem desistere; sic pariter illa, quæ per similem ornatum intendit aliquem allicere ad carnalem concupiscentiam. Verùm non peccat mulier simpliciter loquendo, si se ornat iuxta suum statum, & Patriæ consuetudinem, dummodò id non malo fine fiat.

Dubium tamen est, an si notabiliter modum excedat, mortaliter peccet. Et quidem Doctores antiquiores, ut Alenf. & alij de hac rigorosè locuti sunt. Modernorum autem Doctorum alij nimis latè loqui videntur, dum dicunt; fœminam non peccare mortaliter excedendo notabiliter modum; immò, etsi ostendant pectus nudum, mammillas discoopertas, ut inde pulchriores appareant absque alia intentione mortaliter mala; quia id nullo iure naturali, Diuino, aut humano vetatur ita rigorosè, ut ad mortale obliget. Eò vel maximè, quod illa pars corporis inter honestas habetur, nec natura, aut pudor humanus absolute postulet illam tegi. Quare si quis inde occasionem capiat mortaliter peccandi, suæ malitiæ imputet, non fœminæ. Ita Caiet. Nauar. & plures alij, præsertim Recentiores, quos videre est apud Dianam part. 10. tract. 12. res. 30.

Attamen alij agnoscunt peccatum mortale in tali excessu modestiæ christianæ valde repugnanti; inter quos est Petrus Marchant. qui tom. 3. Tribunal tract. 2. tit. 2. res. 3. §. 1. De pompa Diaboli regula prima sic habet. Quandoque forma, vel figura vestimenti, siue ornatus obiectiuè iuxta ordinariam hominum infirmitatem est excitatiua in alio libidinis, & concupiscentiæ carnis, illis vestibus, vel ornamentis uti, ex natura sua est peccatum mortale; quam quidem regulam late, & eruditè probat, tum S. Scrip. tum SS. Patrum auctoritatibus. Tunc autem censetur excitatiua libidinis, quando, ut idem Doctor explicat, nuditas aliqua magna apparet, ut est videre in illis,

quæ

quæ pectus apertum gerunt, etiam mamillis ex parte discoopertis. Item quando, etsi non sit plena nuditas apparentior tamen caro redditur delicatulo, & transparente lino. Vnde & in Isaia Theriſtra cum aliis vestibus damnantur; Theriſtra autem sunt transparentes, & perlucidæ vestes, quæ non tam nuditatem tegunt, quam curiosius patere membra corporis faciunt. Denique hæc referenda sunt, quæ siue ex positione, siue ex modo, libidinis alterius speciem immitunt, ut de viris, qui ita strictas vestes gerunt, ut partes etiam verecundæ, si non discoopertæ, secundum tamen aliquam apparentiam pandantur: dicitur iuxta ordinariam hominum infirmitatem, idest iuxta communem hominum sensum, communemque naturæ fragilis inclinationem; ut excludatur singularis personæ tentatæ, vel afflictae miseria, quæ omnia sibi mala fingit, omnia interpretatur in malum, & proprio tantum phantasia ruit. Neque enim homines tenentur ab ordinarijs abstinere propter extraordinarias aliquorum phantasias; & ut euincantur communis mundanorum excusationes, quibus dicunt, se malum non intendere, se libertate sua uti: hætenus Marchant. qui pluribus scripturæ locis, & Patrum sententijs adductis rem latè ostendit. Et Albertus de Albertis docet Principes laicos, & Episcopos sub peccato mortali teneri talem consuetudinem extirpare, & tales feminas esse à Sacra Synaxi repellendas. Insuper apud omnes pro indubitato habetur, quod mortalem culpam incurrant illæ, quæ primò similem consuetudinem introducunt, quia ubi id est insolitum, ibi est magis periculosum.

Quæres 2. An hypocrisis sit semper peccatum.

Resp. Quod hypocrisis tertia filia vanæ gloriæ est simulatio virtutis, seu Sanctitatis, quam quis non habet; & semper est peccatum, quia semper est mendacium; Verum ad discernendum quando sit peccatum mortale oportet afferre doctrinam D. Thomæ, & D. Bonau. Igitur docet D. Thomas, quod in hypocrisi duo sunt, nempe defectus sanctitatis, & simulatio ipsius. Si ergo hypocrita dicatur ille, cuius intentio fertur ad utrumque; ut scilicet aliquis non curet sanctitatem habere, sed solum sanctus apparere, sicut consuevit accipi in S. Scrip. sic manifestum est, quod est peccatum mortale, quia intus malus esse vult, & foris ap-



parere bonus. Si autem dicatur hypocrita ille, qui intendit simulare sanctitatem, à qua deficit per peccatum mortale; tunc quàmuis sit in peccato mortali, ex quo priuatur sanctitate: non tamen semper ipsa simulatio est ei peccatum mortale, sed quandoque vaniale, quod discernendum est ex fine, qui si repugnat charitati Dei, vel proximi, erit peccatum mortale, puta cum simulat sanctitatem, ut falsam doctrinam seminet, vel ut adipiscatur Ecclesiasticam dignitatem indignus; vel quæcunque alia temporalia bona, in quibus finem constituit. Si verò finis intentus non repugnet charitati, erit peccatum veniale; puta cum aliquis in ipsa fictione delectatur, de quo dicitur 4. Ethic. quod magis videtur vanus, quàm malus; eadem enim ratio est de mendacio, & simulatione. Contingit tamen quandoque quod aliquis simulat perfectionem sanctitatis, quæ non est de salutis necessitate; & talis simulatio nec semper est peccatum mortale, nec semper est cum peccato mortali: est tamen peccatum mortale ex genere ita Angelicus Doctor; & eandem ferè doctrinam docet Doctor Seraphicus.

Quæres 3. Quando contingat cæteras filias esse mortaliter peccaminosas. Resp. Pertinacia mortalis est, quando in rebus fidei, vel bonos mores spectantibus quis pertinax perseueret contra auctoritatem Ecclesiæ, vel in notabile proximi damnum; secus venialis tantum in rebus leuioris momenti; Idem dicendum de discordia, & contentione. Inobedientia est mortale peccatum quando quis non vult subdi præcepto superioris iusta præcipientis animo illum obligandi ad mortale. Curiositas, quæ est inordinatus appetitus sciendi, est mortalis; primò dum appetit scire id, quod sub mortali prohibitum est, ut velle scire, seu audire, quæ dicuntur in confessione, & similia. Secundò si res, quam scire appetit, sit valde noxia; ut si quis cum periculo proximo grauis lapsus, in peccatum nimirum mortale legat librum nimis inhonestum. Tertiò dum quis ab altero scire vult, quod hic sine mortali reuelare non potest; ut si alter tacere tenetur ratione iuramenti &c. vel medijs illicitis, puta ope Dæmonis; seclusis igitur talibus grauibz circumstantijs non est ex suo genere mortalis.

Ambitio, quæ est appetitus inordinatus dignitatum, ac bonorum, ex suo genere est tantum peccatum veniale: mor-

rale tamen fiet, si quis appetat dignitatem cum notabili Reipublicæ damno, vel ad maiorem peccandi licentiam; ut si quis ambiat beneficium, vel officium, quo est indignus; vel si pravis medijs, estò sit dignus, aut cum iniuria tertij quis aspiret ad honores, & dignitates. Vnde Religiosus, etsi alijs dignior peccat mortaliter, si pravis medijs assequi studeat dignitates; secùs autem si iustè, & honeste ambiat; tunc enim non est dicendus ambitiosus. quia etiam Religiosus idoneus in Religione habet aliquale ius ad dignitates, quæ iuxta iustitiam distributivam conferri debent, & non iuxta genium, & affectum; ac proinde si talis minùs dignis postponatur, fit ei iniuria.

Præsumptio tandem quæ est appetitus ostendendi se illustrem per opera, quæ vires suas superant, est mortalis, dum cedit in notabile periculum vitæ propriæ, vel in grave damnum temporale, aut spirituale proximi; puta si quis ignarus artis medicæ ægrotos assumat sanandos; & similia, secùs autem est tantùm veniale ex suo genere.

### QVÆSTIO III.

#### *Vtrum Avaritia sit peccatum mortale.*

**N**Ot. quod avaritia est inordinatus appetitus bonorum temporalium, quæ nomine diuitiarum, & pecuniarum veniunt. Potest autem avaritia considerari dupliciter, vel prout opponitur iustitiæ, & tunc est inordinatus appetitus accipiendi, & retinendi iniustè bona aliena: vel prout opponitur liberalitati; & sic importat amotem, seu affectum inordinatum; puta cum quis nimis amat, vel considerat diuitias, aut nimis delectatur in eis, estò aliena rapere nolit, cui per excessum opponitur prodigalitas, quæ consistit in excessu elargiendi sua bona, seu diuitias. Filie avaritiæ, quatenus est peccatum contra iustitiam sunt septem. Prima est fraus, quæ est deceptio per factum quoad res; & ut plurimum committitur in contractibus: 2. est fallacia, quæ est deceptio per verba: 3. est proditio, estque dolus, qui committitur in opere contra personas; sic Iudas Christum prodidit; vel etiam circa rem; si quis manifestet modum capiendi urbem; si secretum sibi commissum alijs

alijs reuelat, vel aliorum Epistolas aperiat, & legat; quæ duo ultima sunt peccata graui, vel leuia, prout secretum commissum, vel in litteris contentum fuerit magni, vel parui momenti: 4. est usura: 5. est Simonia: 6. Periurium: 7. violentia, quæ omnes sunt peccata mortalia, ut suo loco ostendetur, ex suo genere; à quo tamen plerumque actus indeliberatus, vel paruitas materiæ, ubi dari potest, excusat. Auaritia autem quatenus opponitur liberalitati habet duas filias, nempe inquietitudinem, seu immoderatam sollicitudinem in diuitijs augendis, aut retinendis, & obdurationem, qua cor Auari redditur durum erga pauperes. *Auarus enim non implatur pecunia* dicit Ecclesiast. cap. 7.

Concl. Auaritia, prout opponitur iustitiæ, ex genere suo est mortalis, ita communis sententia; prout autem opponitur liberalitati, est veniale ex genere suo. Prob. 1. pars. Ea, quæ sunt ad finem necesse est commensurari fini, sicut medicina sanitati, teste Arist. 1. Politicorum; sed sic est quod bona exteriora habent rationem utilis ad finem: ideo non sunt optanda nisi secundum mensuram, prout videlicet sunt necessaria ad vitam, ergo dum quis immoderatè, & iniustè vult ea acquirere, vel retinere peccat ex suo genere mortaliter. Si autem immoderatè amat diuitias absque alterius iniustitia, & est nimis sollicitus in illis conseruandis, & acquirendis, peccat tantum venialiter. Fit tamen mortale per accidens; puta si diuitijs ita afficiatur, ut nolit subuenire necessitati pauperum, quod repugnat charitati proximi. Item si ob earum inordinatum amorem, & appetitum quis se exponat probabili periculo mortis, siue temporalis, siue spiritualis; vel omittat aliquid, ad quod tenetur sub peccato mortali, vel aliquid faciat, quod sub mortali prohibetur.

Ex dictis patet quod Auaritia est peccatum capitale, quia ex ea nascuntur oriri multa vitia secundum rationem finis. Diuitiæ siquidem, quas appetit auaritia, maxime promittunt sufficientiam, ut dicit Boetius lib. 3. de consolat; cuius ratio est, quia, ut ait Arist. 5. Eth. denario utimur, quasi fideiussore ad habendum omnia; & sapiens dicit, quod pecuniæ obediunt omnia; ac proinde est peccatum capitale, cuius filias enumerauimas supra. Vide tract. de iust. & iure, ubi agitur de auaritia prout opponitur iustitiæ.

*De luxuria.*

**I** Vxuria est adeò vitiorum facunda, ut præsentem questionem necesse sit in plures articulos secare: sic enim fiet, quod distinctè, & clarè tradatur eius notitia, explicentur eius filiæ; atque species, & insuper ea, quæ sunt illi affinia, seu annexa; sit igitur.

## ARTICVLVS I.

*Vtrum luxuria sit peccatum mortale, nec non capitale.*

**N** Ot. 1. Quodd sub nomine luxuriæ comprehenduntur omnes impudiciæ carnalis, & libidinosæ concupiscentiæ veritæ à lege diuina in præceptis Decalogi, præcepto sexto, quo prohibetur Mechia. Non mæchaberis: Mechia autem in rigore significat adulterium; attamen nomine Mechia, ut docet D. Aug. & Ecclesia ipsa, intelligitur omnis illicitus concubitus, omnisque impudicitia. Luxuria definitur communiter sic: est libidinosæ voluptatis inordinatus appetitus; seu venereorum delectatio. Talis autem delectatio est maxima, & maxime appetibilis secundum appetitum sensitium, nisi à ratione reguletur, & moderetur; alioquin perturbat ipsam rationem, & per ipsam deordinantur vires superiores, nempe ratio, & voluntas; ex eò quod voluntas nimis condescendit appetitui sensitui vehementer tendenti in obiectum delectabile. Sunt autem quatuor actus rationis in agendis. Primus est intelligentia finis, quæ impeditur per luxuriam iuxta illud Daniel. c. 13. *Species decipit te, & concupiscentia subvertit cor tuum*; & sic ponitur cæcitas mentis, quæ est dissipatio dulcedinis Dei, per quam respuit homo bona spiritualia, & affectat carnalia; ita Alex. de Ariostis: 2. est consilium de agendis propter finem, quod etiam impeditur à luxuria: unde Terent. ait de amore libidinoso. Quæ res in se neque consilium, neque modum habet; & quoad hoc ponitur precipitatio, quæ indicat consilij subtractionem. 3. est iudicium de agendis, quod pariter impeditur per luxuriam.

iuxta

(3 E)X

surue

am.m.s.

iuxta illud Daniel, 13. de senibus impudicis. *Auertunt sensum. ut non recordentur iudiciorum iustorum*, & quoad hoc ponitur inconsideratio: 4. est præceptum rationis de eo, quod est agendum; & luxuria retrahit hominem, ne exequatur id, quod decreuit esse faciendum; & quoad hoc ponitur inconstantia mentis. Ex parte autem voluntatis consequitur duplex actus inordinatus, unus est appetitus finis, & quantum ad hoc ponitur amor sui, quatenus videlicet tendit ad propriam delectationem, & per oppositum ponitur odium Dei interpretatiuè, vel formaliter, quatenus prohibet talem delectationem. Alius est appetitus eorum, quæ sunt ad finem, & quantum ad hoc ponitur affectus præsentis sæculi, in quo vult quis trui voluptate; & ex opposito ponitur desperatio futuri sæculi, quia, dum quis adhæret carnalibus delectationibus, non curat peruenire ad spirituales; sed fastidit eas; & sic habetur, filias luxuriæ esse numero actas; & sunt. Cæcitas mentis, inconsideratio, præcipitatio, inconstantia, amor sui, odium Dei, affectus præsentiarum, horror, & desperatio futurorum. Præter has filias, quæ internæ sunt, ponit D. Isidorus quatuor alias externas; nempe Turpiloquia, Scurrillia, Lubrica, & Stultiloquia.

Not. 2. quod luxuria veluti genus delectationem venereorum habet sub se plures species; & passim septem numerantur, nempe fornicatio, adulterium, incestus, stuprum, raptus, vitium contra naturam, & concubitus sacrilegus, seu Sacrilegium in materia libidinis; quibus addunt nonnulli impudicitiam; qua significare intendunt delectationem morosam in re venerea, turpes motus carnis, oscula, aspectus, tactus & c. de quibus omnibus sufficientem notitiam debet habere quilibet Confessarius. Aduertit tamen Herincx p. 3. disp. 2. de temperantia q. 3. quod propriè sola fornicatio, & vitium contra naturam sunt species distinctæ in genere luxuriæ; cætera namque conueniunt quantum ad malitiam luxuriæ cum simplici fornicatione; cui superaddunt singula malitiam specialem extra genus luxuriæ: adulterium quidem malitiam iniustitiæ respectu coniugis, & sic cupula supponens in utroque, vel alterutro vinculum coniugij: Incestus malitiam contra pietatem debitam sanguine iunctis; stuprum malitiam violentiæ

tæ oppressionis Virginis, quod est contra iustitiam; sicut & raptus, qui est iniuriôsa abductio fœminæ.

Concl. Luxuria est peccatum capitale ex suo genere mortale, adeout non detur in ea paruitas materiæ; ac proinde semper est peccatum mortale; nisi ex indeliberatione actus euadat veniale. Prima pars patet quia cum à luxuria oriantur multa mala, seu vitia, rectè dicitur peccatum capitale; 2. pars videtur esse communis sententia; immò oppositum asserere apparet esse damnatum ab Alexand. VII. cum propositio 40. damnata sic loquatur. *Est probabilis opinio, quæ dicit esse tantum veniale osculum habitum ob delectationem carnalem, & sensibilem quæ ex osculo oritur, secuso periculo consensus ulterioris & pollutionis*; de qua infra erit sermo.

Prob. ratione. Omnis delectatio venerea, seu libidinosa iuxta Galenum est inchoatio quædam pollutionis; sed certum est, quod omnis actus pollutionis est mortalis, ergo etiam quæcunque delectatio talis. Prob. ratione à priori. Ideo in iuramento assertorio, in simonia iuris D. non datur paruitas materiæ, quia nequit concipi etiam minima actio, quæ non includat totam rationem malitiæ, periurij, & Simonia; sed sic est, quod etiam in materia luxuriæ non potest concipi aliqua levis actio libidinosa, & venerea, in qua non includatur tota ratio malitiæ libidinosa: Sanè eo ipso, quod quis intendit libidinosa delectationem, e. g. osculi; etiam sine periculo ulterioris consensus, contrahit totam ratione malitiæ libidinosa; ergo non datur paruitas materiæ, tum ratione periculi; tum etiam in se.

Arg. 1. Quilibet potest licitè uti, quod suum est, sed in actu luxuriæ homo utitur eo, quod suum est, ergo &c.

Resp. disting. mai. ordinatè, conc. mai. inordinatè, neg. mai. Iam modò inordinate homo utitur suo corpore, & membris in luxuria; immo homo non est dominus sui corporis, sed Dus; unde homo habet solummodo usum sui corporis; idquè ordinatè, & conformiter ad leges naturales, & diuinas.

Arg. 2. Tangere res molles, suaues, & temperatas propter delectationem inde naturaliter resultantem non est mortale, ergo nec tangere carnes alienas secuso alio fine, & periculo. Resp. disting. ant. Tangere &c. ob delecta-



tionem puræ naturalem inde resultantem ex objecto conuenienti cum potentia, puta visiva, auditiva, & etiam tactiva, conc. ant. ob delectationem naturalem, quæ transit in uitiosam, & libidinosam, neg. quæ distinctio, & doctrina explicabitur in sequenti quæstione; ideo sit.

## ARTICVLVS II.

*De motibus Carnis, osculis. Tactibus, & aspectibus.*

**N**OT. I. Quod delectatio generalim sumpta potest sic definiri: est appetitus quies, & complacentia in bono possesso. Delectatio autem, ut eleganter tradit Petrus Marchant. tom. 1. Tribunal. alia est sensitiua, seu corporalis, alia spiritualis; prior est in appetitu sensitivo, & de bono sensibili, & nil aliud est, quam appetitus sensitivi quies in bono, quod conueniens sibi apprehendit; & hæc insurgit ex aliqua titillatione, & quadam iucunda, seu sensibili affectione carnis, ut de suauitate cibi, & potus, de iucundo auribus sono, de colore oculo grato &c. Posterior est quæ in appetitu intellectiuo, & de bono intelligibili, seu secundum intellectum originem ducit. Rursus delectatio alia est puræ naturalis, alia voluntaria; prima est quælibet vis, seu potentia naturalis, quæ in objecto, tibi conuenienti complaceat, ut intellectus in vero, voluntas in bono, auditus in sonis &c. Secunda est, quæ apprehensionem rationis, & iudicium, imperiumque voluntatis, sequitur, respicitque rationem, & voluntatem, prout ab illis dirrigibilis. Delectatio puræ naturalis, seu quæ naturalis est indifferens ad bonitatem, vel malitiam moralem. Similiter delectatio in potentijs spiritualibus duplex est, alia naturalis, quæ ex connexionione naturali, & ordine potentiarum sensitiuarum, & intellectiuarum oritur naturaliter. Ex eo enim quod sensitiua apprehendat objectum sibi delectabile, & appetitus sensitivus in eo sibi complaceat, intellectus etiam apprehendit, ut sensui conueniens, & voluntas ex amore proprio, quem habet ad corpus, etiam delectatur. Alia est delectatio rationalis, & libera, quæ sequitur iudicium, & apprehensionem rationis, & imperium voluntatis liberè operantis: ex eo enim, quod intellectus, &

ratio proponat voluntati delectationem in appetitu sensitivo excitatam, ut licitam, & prosequendam, vel illicitam, & fugiendam, voluntas delectationem liberè, vel eligit, eique consentit, vel refugit, & liberè ab ea dissentit.

Not. 2. Quod sensualitas dupliciter potest considerari: in se, & simpliciter, prout continet potentias sensitivas, tam internas, quam externas, ipsumque appetitum sensitivum; quo modo reperitur in Amentibus, infantibus &c. & sic est communis hominibus, & brutis: 2. respectuè, ut est à ratione ordinabilis; & aliquo modo ei subiecta, seu ut est humana. Insupert in Anima quoad hanc materiam tres motus reperiuntur; nempe naturalis; quem naturalium qualitatuum dispositio gignit, seu qui ex iuribus Animæ naturalibus procedit, quales sunt fames, sitis, & actus animæ vegetatiuæ, & generatiuæ, & generaliter appetitus cuiusvis delectabilis in natura; aliud sensitivus, & est, qui ex apprehensione imaginatiuæ appetitum sensitivum sequitur; & iste competit sensualitati prout per rationem, est dirrigibilis. Tertius denique est motus rationalis; & est, qui à ratione procedit, ut deliberatio in intellectu, delectatio, vel consensus à voluntate elicitus, vel imperatus.

Not. 3. Quod Theologi distinguunt motus, in primò primos, & secundò primos. Motus primò primi; ut etiam in tract. de actibus human. dictum est, dicuntur illi, qui omnem rationis usum antecedunt, & iuxta Marchant, non solum in sensualitate, prout natura est, reperiuntur, sed etiam in parte rationali, ut natura est, non ut libera; nam delectatio, quæ insurgit in sensualitate ob connexionem cum parte rationali, redundat etiam in ipsam, ut subita cogitatio mala, subita inclinatio voluntatis; vel aversio, ut natura est. Motus verò secundò primi dicuntur illi, qui consequuntur quidem aliquam rationis advertentiam, & usum; sed non perfectam, & iudicium rationis deliberatum. Tales sunt delectationes in sensualitate, seu in appetitu sensitivo, quatenus ad partem rationalem, idest intellectum, & voluntatem transmittuntur, & ipsa voluntas aliquo modo circa illa occupatur, antequam perfectè iudicet, & deliberet; in primis motibus nullum est peccatum; in secundis est tantum peccatum veniale, nisi accedat consensus deliberatus, vel interpretativus; ut in delecta-

Statione morosa, non quidem morosa morositate temporis, sed morositate consensus.

I. Concl. Motus carnis, seu sensualitatis, nec à voluntate excitati, nec aliqua ratione intenti, non sunt culpa mortalis ratione causæ datæ; si hæc sit ex se tantum levis: hæc videtur communis; adeo ut Vasquez in 1. 2. disp. 108. dixerit, de hoc hæctenus non fuisse controuersiam, & certè aliàs vix quidquam aspicere, loqui, audire, tangere &c. possemus sine periculo peccati mortalis; cum igitur huiusmodi motus facillimè soleant insurgere; ut sint, seu censeantur mortales, videtur requiri maius voluntarium, quàm sit id, quod solum est aliquo modo voluntarium in causa venialiter mala. Verùm motus carnis venerei, si à voluntate excitentur, vel ijs aliunde excitatis, voluntas consentiat cum plena aduertentia, & deliberatione sunt peccatum mortale: quod ex dictis liquidò pater;

II. Concl. Quando voluntas deliberatè consentit in aliquam delectationem de re illicita ex natura sua in materia mortali, quibuscunque conditionibus, vel circumstantijs honestis se muniat, si conditiones, & circumstantiæ in re actu non ponantur, peccat mortaliter. Ita Marchant. t. 1. tribunal. ex communi docet: quam sic explicat, & simul probat. Delectatur quis deliberatè, & actualiter in concubitu cogitato cum uxore aliena, immò & cum soluta, posita conditione, si esset sua uxor; cum modò non sit sua uxor, peccat mortaliter. Ratio est quia conditio, vel circumstantia apposita, cum non sit de inesse, est planè impertinens ad hanc delectationem in præsentia, quæ est per se deformis. Vnde conditiones tantum speculatiuè malum auferre videntur, cum res ipsa practicè sit in se mala. Et sic in uniuersum dicendum existimo de istis conditionibus, & circumstantijs, quæ in speculatione proponuntur tanquam futuræ, aut possibiles ad actum, qui hic, & nunc in esse ponitur; & qui debet hic, & nunc, prout sit, bene circumstantionari conditionibus, & qualitatibus suis inuestitus esse, ut bonus dicatur. Arbitror enim, pergit Marchant. effugium esse, & metaphysicas tantum speculationes, quæ in re morali nihil planè ponunt. Cum enim omnes propositiones de præterito, & etiam de futuro non sint veræ, vel falsæ, nisi reducantur ad propositionem de inesse  
sue

siue de præsenti: conditiones istę planè impertinentes sunt, & non veræ censendæ. Quia ad unam veram, & pertinentem de præsenti practice non reducuntur e. g. Delectatur licitè uxor de præterita copula licita viuente marito; quia reducitur ista delectatio ad hanc propositionem practicam veram. Delector de copula, quæ, quàmuis præterijt, verè hic, & nunc mihi licita est: illicitè vero delectatur de copula præterita, mortuo marito: quia hic, & nunc cum maritus sit mortuus, talis copula non potest actu repeti; & consequenter delectatio est de re, quæ legitimè hic, & nunc ad praxim reduci non potest. Delectatio siquidem cum actualis sit, & modo existens non afficitur, nec affici potest, circumstantijs, & conditionibus non-existentibus, quantumuis possibilibus. Similiter delectatur Tirtius concubitu cogitato cum Berta, cum conditione si sua uxor esset; unde cum actu uxor sua non sit, & delectatio actualis sit, & extra suas causas, à tali conditione non afficitur, sed conditio ad delectationem actualem omninò impertinens est; ideoque peccat mortaliter.

III. Concl. Oscula, & amplexus urbanitatis causa, & ex fine honesto, puta ad ostendendum amorem, seu affectum honestum, reuerentiam, pietatem, seu ad pacem protestandam, in quolibet sexu honestè data; vel accepta non sunt peccata: Hæc de se constat; nam cum oscula ex se sint indifferentia, sicut etiam amplexus; si fiant honesto fine participant tali bonitate morali, si malo fine, tali malitia morali; siquidem scriptura pluribi narrat, & approbat oscula ad finem honestum data; ut Gen. 27. *Accede ad me, & da mihi osculum*. Luc. 7. Christus reprehendit Simonem. *Osculum mihi non dedisti; hac autem &c.* & Apost. ad Thesal. cap. 5. *Salutate fratres omnes in osculo sancto*; ergo &c. Verùm oscula, & amplexus, quæ ex affectu libidinoso procedunt, vel cum affectu libidinoso sunt coniuncta extra coniugium; siuè ad concubitum carnalem ordinentur, siue in delectatione libidinosa, & sensuali ex ipso osculo oriente, sunt peccata mortalia, ut constat ex propositione damnata ab Alexandro paulò superiùs allata. Immo oscula enormia inter coniuges à pluribus Doctoribus censentur mortalia, ut dicit Alexander de Ariostis in summa; & quidem oscula coniugum partium pudendarum, nisi fiant ex aliqua le-

uitate, & subreptione; videntur excedere notabiliter coniugij honestatem; ac proinde fieri affectu nimis peruerso; ideoque consulendi sunt coniuges, & monendi, ut abstineant, à nimis turpibus osculis, & tactibus. Vnde sit regula generalis. Tactus omnes in quacunque parte corporis, siue proprii, siue alieni, quos iusta necessitas, vel congrua utilitas exigit per se peccata non sunt: ex opposito omnes actus, seu tactus prouenientes ab affectu impudico, & libidinoso sunt peccatum mortale.

Cæterum mulieres præsertim virgines non tenentur in secretioribus naturæ partibus viros admittere; ut ab illis curentur ab aliquo morbo etiam mortis inductiuo; eò quod nemo teneatur tale genus curationis admittere, à quo magis abhorret, quàm ab ipsa morte; seu morbo; ita Herinx, qui cum Læssio addit quod nemo tenetur admittere id, cui coniunctum est periculum turpis motus, aut delectationis carnalis, immò ad heroicum castitatis gradum pertinet male mori: quàm permittere in se turpes imaginationes, aut sensum ullum libidinis.

V. Concl. Quamuis aspectus ex natura sua sint indifferentes, euadunt tamen impudici, si ad libidinem, in se, vel in alio excitandam ordinentur. Ex hac conclusione, infertur primò; quod mortaliter peccant vir, & mulier, qui oculorum nutibus, & lasciuis aspectibus inuicem ad copulam, vel delectationes carnales ex intentione prouocant, vel prouocare intendunt. 2. Mortaliter peccant, qui ex aspectibus huiusmodi se, vel alios voluntariè proximo periculo lasciuæ delectationis, vel desiderij exponunt. Vnde si quis studiosè aspiciat concubirum viri cum muliere, etiam ex sola curiositate; vel etiam animalium copulam, seu comixtionem; cum ex natura sua sint proximè excitatiua; & incentiua ad libidinem, saltem ratione periculi possunt tales aspectus esse peccatum mortale; idem dicendum de studiosè aspicientibus picturas valde obscenas; quia tales videntur ex intentione quærere delectationes carnales: secùs si ob solam curiositatem, & picturæ excellentiam aspiciant; neque ullum periculum reuerà subsit; ut in pluribus contingere potest. Quomodo autem in confessione sint explicanda, & iudicanda huiusmodi peccata; dat duas Regulas Marchant. cit. Prima est omnis as-

pectus voluntarius, & deliberatus mulieris, aut cuiuscunque rei ad libidinem incitantis iuxta rationem delectationis voluntariæ ex aspectu prouenientis, aut periculum proximum ipsius, est peccatum mortale eiusdem speciei; cuius est delectatio ex aspectu consecuta. 2. Vir, vel mulier, quæ ex aspectu impudico tentat ad libidinem alterum incitare, eodem mortali peccato offendit, quale est illud, ad quod tali aspectu incitare tentabat. Vnde inter solutum, & solutam erit peccatum simplicis fornicationis; & sic de alijs. Ratio, quia aspectus impudicus speciem sortitur à qualitate affectus ipsius respicientis, seu ab intentione, quam habet, vel à delectatione subsequente, aut concomitante, siue etiam à periculo, cui se exponit.

Cæterum aduerte, quod ea, quæ dicta sunt de osculis, tactibus &c. in ordine ad personas solutas; militant etiam de osculis, tactibus &c. in ordine ad sponsores de futuro; quia cum delectatio libidinosa inter sponsores sit illicita ante matrimonium, consequenter est eis illicita omnis actio, ex qua proximè oriri potest talis libidinosa delectatio; etsi nonnulli oppositum docuerint; quod maximè post allegatam propositionem damnatam, non videtur admittendum.

Quæres. Quid de verbis inhonestis, cantilenis turpibus, choræis, missione litterarum, ac donorum censendum est. Resp. Turpia loqui, & turpia canere si bono fine, puta causa studij, censent passim Doctores, nullum esse peccatum, quod tamen difficile videtur. Si fient vano solatio, vel ex curiositate, & releuandi animum à laboribus est peccatum veniale dumtaxat; secluso tamen periculo adstantium, & audientium; quod non videtur abesse, quando verba, vel cantilenæ sunt valdè lasciuæ, & inhonestæ. Idem dicendum de lectione, & auditione rerum obscenarum, & turpium; Vnde qui legunt libros de turpibus, & obscenis ex professo agentes; si ob studium non peccant; si ex curiositate venialiter, si ob delectationem libidinofam intentam, vel periculo proximo se exponant labendi in talem delectationem peccant mortaliter. De componentibus autem, & representantibus comedias, quæ continent res valde turpes, & ad libidinem excitantes, existimant communiter Doctores eos peccare mortaliter; quia dant causam ruinæ proximi; licet enim illam non intendant, ta-



men cum moraliter certum sit, plures inde ad peccatum incitandos, mortaliter peccant; & idem iudicium fieri debet de describentibus turpia, & de pingentibus fœminas cum nudatis pudendis: vel in actu coeundi; quia hæc, & similia nata sunt excitare libidinem. Hinc recte inferunt Doctores, Magistratus, & Principes, qui comedias turpes exhiberi permittunt, mortaliter peccare; cum ipsi possint, & teneantur ex officio, & charitate trinare lapsus præcauere, & impedire ita ex communi Marchant. omnino videndus tom. 3. in principio, ubi de pompis diaboli. Missio litterarum aut donorum honestorum gratia fouendæ amicitiae non sunt peccatum; secus autem si inhonestæ sint, vel si honestæ, intendatur libidinosa delectatio, tunc est peccatum mortale. Denique Choræa, prout est honestæ recreationis gaudij, vel letitiæ signum, est licita, immò quandoque potest esse actus meritorius, ut Scrip. S. refert de Dauide saltante ante Archam; de sorore Moyssi exod. 15. & legitur de B. Francisco Solano saltante, & sonante ante altare Sanctissimi Sacramenti. Verùm choreæ, quæ nostris temporibus fiunt videntur multum periculosæ; quia in multis sunt causa libidinis, & sæpè motuum discordiarum, rixarum, & homicidiorum, ut quotidiana experientia apertè monstrat: Vnde ad rem descripsit choræam Guilelmus Lugdunensis, dum ait. Choræa est circulus, cuius centrum Diabolus, circumferentia omnes Angeli eius. Hinc Angelus in sum. septem condiciones assignat ad hoc ut choræa licitè fiat, quas Petrus Marchant. loc.cit. ad tres reducit; nempe. Vt fiant inter personas conuenientes: ut modus honestatis seruetur; & denique ut recta sit intentio, nimirum ad honestam recreationem &c. Verùm ad hoc deuenit sæculum istud per omnia miserandum, inquit Marchant. ut vix inueniatur choræa honesta: & Angelus sic concludit. Adeoque quia præfatæ condiciones non inueniuntur in choræis nostri temporis, non video quomodo sine peccato mortali quis choræas faciat ex consuetudine, sicut communiter fiunt.



*De fornicatione, & Adulterio.*

**N**Ot. Quòd simplex fornicatio est concubitus, seu copula naturalis soluti cum soluta; quam Gentiles inter robur traditi non reputabant esse peccatum mortale; & hanc opinionem, seu potius errorem amplexi fuere nonnulli Hebræi; & quidam Christiani Auctores, eo fundamento ducti; quod in præceptis Decalogi solam Mæchiam, hoc est adulterium Deus prohibeat; sed quàm longè à veritate abierint, monstrabit sequens concl.

I. Concl. Simplex fornicatio est peccatum mortale. Est de fide, & apertè traditur in S. Scrip. ut Tob. 4. *Assonas tibi, fili mi, ab omni fornicatione, & prater uxorem tuam nunquam patiaris crimen scire*; & Deuter. c. 22. *Si non est in puella inuenta uirginitas, aueriant eam extra fores domus patris sui &c.* Et clarius in nouo Testam. nam ad Rom. 1. dicitur: *Repletos omnes iniquitate, malitia, fornicatione &c.* Ad Ephes. 5. *Omnis fornicator, aut in mundus &c. non habet hereditatem in regno Christi, & Dei.* Ad Hebr. c. 13. *Fornicarios enim & adulteros iudicabit Deus.*

Prob. ratione. Vagus, & incertus concubitus omninò aduersatur fini naturæ, & generationi naturali; quæ iuxta dictamen naturale per se solum ordinatur ex natura sua ad prolis productionem, & congruam educationem, at non potest generatio prolis rectè dirrigi ad finem, nisi certitudine, & obligatione Patris, cura, & cohabitatione parentum; à quibus proles possit educari; ergo simplex fornicatio aduersatur rationi naturali, quæ execratur vagos concubitus. Nec refert, quod per diuites possit prouideri bonæ educationi prolis, & minus, quod in sterili non sequatur generatio. Quia rectitudo naturalis in similibus actibus consideratur ex ijs, quæ per se ex illis nata sunt sequi. Et nota quod concubinitus superaddit fornicationi statum, & perseuerantiam in peccato, cum sit continuata fornicatio cum non sua, quæ ueluti uxorem domi tenet, vel, si foris habeat, ad illam ex consuetudine solet ingredi: Vnde Trident. sess. 24. c. 8. de Reform. pœnas statuit contra Concubinarios; quod etiam Clericis sess. 25. cap. 14. de refor. suspensionem comminatur. Ex quo patet, quàm me-

ritò Innoc. XI. damnauerit hanc propositionem, quæ in ordine est 48. *Tam clarum videtur, fornicationem secundum se nullam inuoluerè malitiam, & solum esse malam, quia interdicta, ut contrarium omnino rationi dissonum videatur.*

I. II. Concl. Adulterium est illicitus concubitus, quo conjugalis thorus violatur; estque peccatum mortale, grauius fornicatione tum ratione Sacramenti matrim. tum ob damna, quæ inde nata sunt euenire. Quare falsum est, quod nonnulli ausi sunt dicere, nempe consensiente marito, copulam habitam cum eius uxore non esse adulterium; ac proinde non teneri in confessione exprimere talem circumstantiam; quia vir non habet facultatem cedendi in hoc iuri suo; nec eius cessio operari potest, quin sit legitima uxor; tum quia est lex Sacramenti Matrimonij, cui fit maxima iniuria. Hinc meritò talis opinio est damnata ab Innoc. XI. propos. 50. quæ sic lacet. *Copula cum coniugata, consentiente marito, non est adulterium adeoque sufficit in confessione dicere, se esse fornicatum.* Addo alteram propositionem in hac materia damnatam ab Alexand. VII. & in ordine propos. est 25. *Qui habuit copulam cum soluta satisfacit præcepto dicens, commisi cum soluta graue peccatum contra castitatem, non explicando copulam.* Igitur tenetur exprimere speciem peccati commissi; ut etiam Trident. præcipit. Siquidem neminem latet diuersæ luxuriæ species, quas supra numerauimus, ab omnibus theologis admitti; ac proinde fornicatio velut species à cæteris omnibus distincta, & diuersa in confessione aperienda est. Insuper; qui alterius thorum violauit, si & ipse est uxoratus, duplex est adulterium, quæ confiteri tenetur 36. q. 1. §. 1. ut inter alios notat Alexand. de Ariostis in sum.

Quæres. An actus; & oscula, quæ fornicationem sequuntur, sint exprimenda in confessione.

Resp. iuxta regulam superius allatam de distinctione numerica peccatorum. Quare actus, tactus, & oscula, quæ copulam vel antecedunt, vel sequuntur, censentur moraliter uniri in uno peccato fornicationis, si immediatè, vel paulò post fiant, quia, sicut tactus, & oscula priora ordinantur ad unum finem; ita delectatio habita de copula immediatè post illam censetur quædam permanentia moraliter continuata cum actu copulæ: ita Doctores commu-

niter. Vnde non est audiendus Sanchez dicens idem esse verum de tactibus, & osculis, etiamsi post copulam magna intercesserit mora, modo ad alia negotia se interim non diuerterit, qui copulam habuit; id enim est aperte alienum à ratione; nam sic posset quis per totam noctem iacere cum foemina, una sola copula habita; etque dicere sufficeret in confessione se commississe unum tantum peccatum fornicationis, quod improbatur passim à Doctoribus.

Quæres. Quid sit incestus, stuprum, raptus, & sacrilegium. Resp. Incestus est carnalis concubitus, vel copula inter consanguineos usque ad quartum gradum consanguinitatis inclusivè; & inter affines pariter usque ad 4. gradum inclusivè, si affinitas orta sit ex copula licita; si vero ex illicita usque ad 2. gradum inclusivè, nec non inter spiritaliter, vel legaliter coniunctos, de quibus sigillatim in tract. de matrim. Stuprum est defloratio virginis contra ipsius liberam voluntatem. Dicitur defloratio virginis, quia si corrupta violenter opprimatur, non reputatur stuprum, sed violenta oppressio; sequiturque speciem luxuriæ quantum ad actum; etsi illa iniuriosa oppressio speciale peccatum dicat, ac proinde in confessione aperiendum. In stupro autem attenditur particularis malitia ex iniusta apercione, seu ablatione claustris virginis. Dicitur contra ipsius liberam voluntatem si enim virgo consentiat liberè in copulam, tunc non est stuprum, quod singularem luxuriæ speciem constituit peccatum speciale stupri; itaque erit simplex fornicatio; nec refert, quod sit contra voluntatem parentum, vel tutoris; ac proinde fuit eis iniuria; nam talis iniuria, ut advertit inter alios Marchant. extrinseca est stupro; nec variat peccatum fornicationis, sed tantum aggravant illud huiusmodi circumstantiæ.

Cæterum dubitari potest, quando censeatur virgo non consentire, seu quando censeatur copula Virgini involuntaria. Resp. ex Marchant. t. 2. tract. 7. de luxuriæ speciebus; tunc censeatur copula Virgini involuntaria, & consequenter stuprum. Primò quando violentia intercedit: 2. quando metus in constantem puellam cadens est additus; 3. quando dolis, & fraudibus puella est inducta, ut promissionibus, fraudolentia matrimonij, vel magnæ dotis &c. 4. quando magnis importunitatibus, quæ in fragili sexu

arqui-

æquivalent, si non veræ coactioni saltem inductioni ex parte inuoluntariæ. Ad quid autem teneatur stuprator, agatur in tract. de restitutione p. 3.

Raptus est eductio violenta puellæ, siue corruptæ, siue incorruptæ; siue etiam coniugatæ. Vel ut alijs placet raptus est abductio alicuius personæ ipsa inuita, vel resistentibus eius parentibus, vel illis, sub quorum cura est per vim ad libidinem explendam, vel matrimonium ineundum; qua definitione comprehenditur non solum fœmina, sed etiam vir, ut tradit communis sententia; etsi fœmina rapiens virum non incurreret in pœnas latas contra Raptores; quia iuxta quandam regulam iurium. *Masculinum non concutit femininum in penalibus*. Et ex eadem inferitur, quod non est raptus, si quis discedat cum Amasia consentiente, inscijs, & inuitis parentibus. Alia, quæ ad raptum spectare possunt tradentur in materia de impedim. Matrim. Sacrilegium, prout ad luxuriæ species spectat, est peccatum carnis, siue concubitus illicitus, alterutro, vel utroque peccantium voto castitatis adstricto. Dicitur alterutro, vel utroque peccantium &c. quia etsi unus tantum sit voto adstrictus, adhuc est sacrilegium. Quod si uterque voto sit obligatus, debet pœnitens id exprimere, quia, ut observat Marchant cum alijs est virtute duplex sacrilegium, & iniuria duplex. Verùm si quis voto adstrictus castitatis in persona libera, & soluta turpitudinem, puta pollutionis excitaret, ita ut ipse in corpore suo nil pateretur, peccaret quidem mortaliter; non esset tamen sacrilegium; quia iniuria illa non fieret personæ sacræ, sed solutæ; etsi à sacra fiat; ita communiter Doct.

Cæterùm, quia sacrilegium committitur non solum si violatur persona voto adstricta; sed etiam dum violatur locus sacer, quo nomine venit Ecclesia cum cæmeterio; ideo præter Sacrilegium personæ, additur Sacrilegium loci Sacri.; quod dici potest extrinsecum, ut condistinguitur à Sacrilegio; quod committitur in Personis Sacris. Igitur qui in locis Deo consecratis concubitus illicitos habent, aut peccata carnalia cum effusione seminis committunt; ut pollutio voluntaria fornicatio, peccant peccato sacrilegij &c. Addo cum Marchant. loc. cit. ad Sacrilegium etiam spectare, si quis in habitu sacro, ut planeta, casula, Alba, vel

vel alijs ornamentis Sacris foedum concubitum haberet; illa enim, sicut loca sacra contaminari videntur. Insuper non ouetur dubium: An, si coniugati in loco sacro inclusi detineantur, copulam haberent absque loci sacri pollutione. Richard. Angelus, & Rosella affirmant; si multo tempore ibi detineantur; nec alibi adest opportunitas coeundi; ad vitandum incontinentiam dumtaxat; quo sensu amplectitur hæc sententia communiter à Recentioribus. Cæterum de pollutione loci sacri alibi agetur; ideo &c.

#### ARTICVLVS IV.

*Vtrum mollities, seu pollutio sit peccatum mortale contra naturam.*

**N**Or. Quòd vitium, seu peccatum contra naturam est illud, quod repugnat naturali ordini actus veneri, humanæ speciei conuenientis; pluribus autem modis contingere potest, ut passim tradunt Doctores ex D. Thoma, Alensi, & Astesano. Primo si absque omni concubitu causa delectationis veneræ pollutio in se procuretur; & sic dicitur mollities. 2. quando fit per concubitum, & non adhibetur persona eiusdem speciei, sed alterius speciei, nempe brutorum, & sic dicitur bestialitas. 3. quando adhibetur in coitu persona quidem eiusdem speciei; sed indebitè, ut in coitu masculi cum masculo, vel feminae cum foemina, ut indicat Apost. ad Rom. cap. 1. & sic vocatur vitium sodomiticum. 4. denique quando coniunctio est naturalis, & in vase naturali; sed modo indebito, ut præposterè accedendo ad foeminam; vel alio indebito modo coeundo.

I. Concl. Mollities est vitium contra naturam; ac proinde iure naturæ, & diuino prohibita sub pœna peccati mortalis. Prob. Mollities pugnat contra finem naturæ; ergo est contra naturam. Prob. ant. Deus naturæ Auctor sexum, & vas legitimum instituit ad generationem; sed talis institutio simul cum fine destruitur per mollitiem, quæ est contra primarium finem, & ordinem, quem natura ipsa postulat in actu seminationis: ergo &c. Confirmatur ex S. Scrip. Nam Gen. 38. narratur Onan filium Iuda, qui se-



men fundebat in terram, percussum fuisse à Domino, *Et quòd rem detestabilem faceret*; ergo iure naturæ, & diuino est prohibita mollities ut grauissimum peccatum dicente Apost. ad Corinth. c. 6. Molles Regnum Dei non possidebunt. Quarè meritò Innoc. XI. damnauit hanc propositiorem, quæ in ordine est 49. *Mollities iure natura prohibita non est, unde si Deus eam non iussisset sepe esset bona; & aliquando obligatoria sub morali.* Itaque mollities semper est peccatum mortale, quoties quis eam procurat ex libidine; immò etsi eam procuret causa sanitatis, quia adhuc talis directè consentit in pollutionem, quæ iuxta Scripturam est peccatum mortale.

II. Concl. Dum quis dat operam rei illicite, ex qua solum remotè sequitur pollutio, talis pollutio si non fuerit intentata, non est nisi peccatum veniale. Ex qua conc. inferitur, quod si pollutio sequatur ex nimio cibo, vel potu, vel ex guloso esu eduliorum nimis calidorum, est tantum peccatum veniale. Similiter si eueniat pollutio ex equitatione sola recreatione, vel nimia curiositate, vel vanitate assumpta, licet sciat quandoque pollutionem se passum fuisse, modò absit periculum consensus in eandem, non est nisi veniale peccatum; idem de pollutione secuta ex speciali situ in lecto, quàmuis fuerit præuisa, sed non intentata. Immò communis sententia tradit; quod desiderare simplici affectu pollutionem in somno ob aliquem bonum effectum inde secuturum; puta ad corporis sanitatem obtinendam: vel ad tentationem extinguendam, non est peccatum; ratio, quia tale desiderium, nec est causa pollutionis. nec fertur in malum, sed in opus per se indifferens relatum in bonum finem. Regula igitur generalis est, quam tradit ex communi Herinex part. 3. disp. 6. q. 3. de temperantia n. 29. ubi dicit: pollutio, ut sit grauiter peccaminosa debet esse plenè voluntaria, adeoque vel directè volita, & procurata, vel saltem volita, & præuisa in sua causa; quam hic, & nunc possumus, & tenemur euitare; prout sunt illæ; quæ in genere luxuriæ sunt malæ grauiterque influunt in effectum huiusmodi; puta morosa delectatio, turpes imaginationes, & aspectus, vel tactus, oscula impudica. Quod si sit causa rationabilis, vel necessaria, non tenetur quis, secluso periculo consensu in ipsam delectationem, ex communi

sententia Doctorum vitare. Quare confessarius non tenetur relinquere studium circa res venereas, auditionem confessionum fœminarum, commestionem rerum calidarum, accubationem sic, vel sic. Vnde concludunt Doct. communiter; nullum actum habere malitiam mortalem eo quod sit pollutionis præuisæ; & non intentæ causa; nisi sit in se ipso mortalis contra sextum præceptum non mæchaberis; quia soli tales actus censentur notabilis causa pollutionis.

## ARTICVLVS V.

*Quid sit Sodomia, & bestialitas: & an distinguantur inter se, & a pollutione, specie; adeo ut in confessione sint distinctè exprimenda.*

**N**Ot. pro resolutione tertiæ patris huius quæstionis; quod Philosophi docent aliud esse genus, & aliud esse speciem; speciem autem distinguunt in speciem infimam & non infimam, seu subalternam; prior dicitur illa, quæ sub se non habet alias species; ut Homo, Asinus, Leo &c. dicitur species infima; non enim sub homine datur alia species hominis; posterior verò dicitur, quæ adhuc distingui potest in alias species, quas sub se habet, e. g. corpus, quod respectu sui generis, nempe substantiæ est species non infima, distinguitur in alias species, nimirum in corpus animatum, & inanimatum, vegetabile, & sensibile &c. Iam verò à specie physica gradum faciamus ad speciem moralem, quæ pariter instar physicæ distingui potest in speciem infimam, & non infimam, & prout ad præsens spectat luxuria veluti genus diuiditur primò in duas species iuxta regulam logicalem: omnis bona diuisio debet esse bimembris; in luxuriam, quæ est iuxta naturam etsi illicitam; & sic est fornicatio; & in luxuriam contra naturam, quæ pugnat, ut supra ostensum est, contra ordinem, & finem institutum à Deo naturæ auctore; & hæc luxuria ut vitium libidinosum, & species non infima subdividitur in tres species infimas, nempe pollutionem, sodomiam, & bestialitatem, ut in conclusione clariùs monstrabitur.

I. Concl.

I. Concl. Sodomia propriè accepta est coitus, seu concubitus inter personas eiusdem sexus; ut passim cum D. Thoma tradunt Doct. sodomia vero impropriè dicta est concubitus cum personis diuersi sexus; ut masculus cognoscendo foeminam extras vas naturale: & utrique comperit hæc definitio. Sodomia est concubitus libidinosus in vase à natura ad generationem non ordinato. Vnde in ore coit-, licet sit nimis fœdum, & turpe, non est tamen sodomiticus actus; sed reducitur ad pollutionem opere alieno tactam. Potest insuper sodomia siue perfecta, siue imperfecta simul contrahere alias malitias; v.g. adulterij si fiat cum coniugato, vel coniugata; vel incestus si fiat cum affinibus, seu consanguineis; nec non sacrilegij si fiat cum persona Deo per votum castitatis dicata. Sed dubium suboritur. An in confessione explicandum sit, quod quis fuerit agens, vel patiens. Assimant apud Mastrium Cardinalis de lugo Tambur. Caramuel, & alij; quia putant esse diuersæ speciei procurare pollutionem propriam, & alienam. Negant Alphons. de Leone, Diana, noster Poncius, & alij; quibus consentit idem Mastrius; ratio, quia uterque peccat contra naturam, & uterque alterius peccato cooperatur; unde quàmuis agens pollui soleat, non verò patiens, tamen patiens ipsius pollutioni cooperatur; quod si patiens quoque polluat in tali actu, distinctè in confessione illud aperiendum est. Cæterum, quando Sodomia censetur reservata videri potest in sum Diana, & in alijs; existimant tamen passim Doct. ut notat Herinex; tunc solum esse reservatam, quando coitus est consumatus à duobus eiusdem sexus in vase præpostero. Nisi aliter explicetur in tabellis de reservatione casuum; quæ quidem pro diuersitate Diocesium sunt etiam diuersæ; & necessario à confessarijs legendæ; & attendendæ. Sanè hoc pessimum vitium est maximæ abhorendum, cum S. Scrip. narret, ob hoc nefandum scelus à D. iustitia funditus voracibus flammis deleta fuerit regio Pentapoli; & ex Ciuitate Sodomæ combustæ nomen accepit. Adde leges humanas in detestatione huius pessimi criminis ex tremas pœnas statuisse: Porro exercentes sodomiam sunt infames ipso iure ff. de postuland. l. 1. §. remouetur. Instit. de publ. iudi. §. 2. 2. morte mulctandi C. de adulter. l. cum vir, & Autent.

ut non luxuriant cont. natur. §. 1. coll. 6. & de iure canon. Si est laicus debet excommunicari, si Clericus in Monasterio ad agendam pœnitentiam detrudi: Ethî, subdit Alexand. de Ariostis in sum. præcep. Non mæchaberis, sunt filij diffidentia id est, de quorum salute diffidendum est, ut de excess. Prælat. cap. Quicumque, & grauius est hoc peccatum, quàm matrem cognoscere dicto capitulo Adulterij.

II. Concl. Bestialitas est coitus libidinosus hominis cum bruto, siuè passiuè, siuè actiuè, & in quocunque vase fiat; ita definitur à Marchant. loc. supracit. Vnde leuit. c. 18. *Cum omni pecore non coibis, nec maculaberis cum eo; Mulier non succumbet iumento, nec miscbitur ei, quia scelus &c* & c. 20. *Qui cum iumento, & pecore coierit, morte moriatur pecus quoque occiditur. Mulier si succubuerit cuilibet iumento simul interficietur cum eo; sanguis eorum fiet super eos:* In confessione autem non est opus explicare bestiaë qualitatem, seu speciem.

Cæterum ad hoc turpissimum vitium reuocatur iuxta communem Doctorum sententiam concubitus cum Dæmone; definitur enim bestialitas prout extenditur ad Dæmonem. Est carnalis commixtio cum reanimata alterius speciei, ut cum Bruto, vel Dæmone succubo, vel incubo; cui peccato semper superadditur malitia contra Religionem, & superstitionis, quatenus includit societatem cum Dæmone, insensissimo inimico Dei, & omnium nostrum; ac proinde in confessione talis coitus exprimendus; sicut etiam, an Dæmon fuerit sub forma fœminæ, an viri; an sub forma talis coniugatæ, consanguineæ &c. quia tunc præter bestialitatem additur affectus ad talem personam: Ita communiter Doct. De quarta autem specie contra naturam erit sermo in tract. de matrim. talis namque modus inordinatus, & innaturalis per se non est peccatum mortale inter coniuges; fieri autem potest mortale; si interueniat tanta deordinatio, ut generatio impediri possit, vel semen extra vas effundi contingat.

III. Concl. Pollutio, Sodomia, & bestialitas sunt species infimæ moraliter inter se specificè distinctæ; ac proinde in confessione aperiendæ. Hæc est certissima ex propositione damnata ab Alex. VII. & est 24. in ordine: estque talis. *Mollities, Sodomia, & bestialitas sunt peccata eiusdem speciei infimæ, ideoque sufficit dicere in confessione se procurasse pollutionem.*

*nam.* Suffragatur etiam ratio; quia peccata possunt inter se specie differre non solum quia prohibita sunt sub pluribus præceptis in diuersis materijs, & ob diuersa motiua, vel circa eandem materiam, sed propter diuersa motiua formalia ad diuersas virtutes pertinentia, verum etiam ratione diuersæ, ac notabilis deformitatis, & dissonantiæ à dictamine rationali; quatenus a led diuersa ratione, & malitia materiam eiusdem virtutis; cui opponuntur, attingunt, ut quantum est ex natura peccati, ratio non errans magis abhorreat unum, quàm aliud ob maiorem, vel minorem deformitatem; quam in illis agnoscit reuerà reperiri; sic magis ratio recta abhorret bestialitatem, quam sodomiam, magis sodomiam, quam pollutionem; igitur licet pollutio, Sodomia, & bestialitas sint vitium contra naturam in genere; seu ut condistinguitur à vitio venereo iuxta naturam, & naturæ modum; attamen in esse morali, spectata ratione diuersæ malitiæ formalis, sunt omninò species disparatæ; & consequenter in confessione distinctè aperiendæ. *Confirm.* Diuersæ rationes formales in genere moris habent constituere diuersas species morales, tam vitiorum, quam virtutum, sed ratio formalis pollutionis, sodomix, & bestialitatis sunt inter se formaliter diuersæ moraliter; aliud siquidem est effundere semen absque ulla copula; aliud illud effundere per copulam cum Persona eiusdem speciei, sed in vase indebito; aliud habere copulam cum bruto, vel Dæmone; ergo hæc tria inter se tanquam species infimæ distinguuntur, & consequenter distinctè aperiendæ sunt in confessione.

## QVÆSTIO IX.

*Vtrum Ira sit vitium capitale, & mortale.*

**N**Ot. 1. Quòd ira potest accipi dupliciter. Primo pro passione quadam potentix naturalis, quæ vocatur irascibilis; quæ sic describi solet. Est motus quidam naturalis animi ad propulsandum malum, vel ad arduum quidpiam superandum nobis innatus. 2. sumitur pro ipso usu rationalis passionis; quatenus homo ratione utens motum illum excitat, & imperat, aut excitato utitur in bonum, vel

malum; nam ira primo modo est de se passio indifferens in bonum tamen naturaliter ordinata: ut constat ex eius descriptione, in isto autem motu, seu passione iræ plures reperiuntur gradus. Primus est quidam motus simplex detestationis, vel persecutionis mali, aut superationis ardui, veri, vel apprehensi absque animi perturbatione; & hic pertinet ad fortitudinis virtutem. 2. est motus idem qui supra, sed cum aliqua perturbatione partis inferioris, absque tamen perturbatione ulla partis superioris, idest mentis; quo sensu dicitur de Christo Ioan. c. 11. *Inferemus spiritum, & turbauit seipsum*; idest pleno imperio excitauit in parte inferiori quendam motum naturalis turbationis teste D. Aug. l. 14. de Ciuit. c. 9. Tertius est excitatio quædam cordis in detestatione, vel propulsatione mali; siue aggressionem ardui; quæ ad tempus aliquantulum mentem perturbat, ut in primis motibus accidere solet. 4. est motus, qui rationem inordinatè perturbat, & omninò commouet, ita ut commotio illa rationi dominetur.

Not. 2. Quod filiæ iræ inordinatæ sunt sex, nempe indignatio, tumor mentis, tumor autem mentis est voluntas scad vindictam disponens ex Alens. clamor, contumelia, blasphemia, Rixa, ita D. Greg. lib. 31. moral. Quarum numerus, & sufficientia sic declaratur; potest namque ira tripliciter considerari, Primo secundum quod est in corde; & sic ex ea nascuntur duo vitia, alterum est indignatio, inquantum quis reputat eum, contra quem irascitur, indignum; alterum est tumor mentis, inquantum quis animum suum implet diuersis cogitationibus excogitando diuersas vias vindictæ: 2. consideratur ira prout est in ore; & sic ex ea duplex vitium procedit; primum dicitur clamor, quatenus aliquis inordinatè, & confusè loquendo iram suam ostendit; secundum est ex eo quod quis prorumpit in verba iniuriosa; quæ quidem si sint cōtra proximum, tale vitium dicitur contumelia. Si verò sint contra Deum, dicitur blasphemia: 3. modo consideratur ira secundum quod procedit usque ad factum; & sic ex ira oriuntur rixæ, contentiones, inimicitie, & homicidia: ita Nicolaus de Nise, Nicolaus de Orbellis, & alij.

I. Concl. Ira, quæ est appetitus vindictæ iniustæ, vel inordinatæ ex suo genere est peccatum mortale; & etiam



capitale : de hoc secundo patet ; primum probatur . Quod repugnat charitati , & iustitiæ est peccatum mortale ex genere , nisi vel imperfectus consensus , vel leuitas materiæ excuset ; sed huiusmodi ira repugnat charitati , & iustitiæ ergo &c. Prob. min. Repugnat charitati , quia proximo malum volumus : iustitiæ verò , quia iniuste , & inordinate volumus ; hoc autem potest esse dupliciter , ut dicit Nicolaus de Nise in p. 3. tract. 3. q. 3. uno modo ex parte appetibilis , ut potè cum quis appetit iniustam vindictam ; vel iniusto ordine , idest à se , vel à Iudice non competente ; vel propter indebitum finem ; debitus enim finis , ob quem licet desiderare vindictam , est conseruatio iustitiæ , emendatio &c. & sic est peccatum mortale . Potest tamen contingere , quod talis appetitus vindictæ fiat veniale propter imperfectionem actus ; quæ quidem imperfectio attenditur , vel ex parte appetentis , ut cum motus iræ præuenit iudicium rationis ; vel ex parte appetibilis ; ut cum quis appetit in aliquo modico se vindicare , e. g. si quis appetat , seu etiam de facto trahat puerum per aurem , vel per capillos ; vel ex modo irascendi , quia nimis ardentè irascitur interiùs , vel nimis manifestat iram suam exterius ; & sic est tantum peccatum veniale .

II. Concl. Ira prout est animi perturbatio etiam secluso appetitu vindictæ ; ubi ad eum gradum peruenit , ut hominem sensu , vel ratione priuet , aut motus , & gestus enormes in corpore excitet , si sit voluntaria in se , vel in causa est peccatum mortale , ita Petrus Marchant. t. Tribunal. tract. 6. tit. 2. q. 3. Rationem dat , nam si ebrietas est peccatum mortale , quia hominem ratione , & sensu per intemperantiam gulæ priuat , & naturam inhonestat , certè peior ex istis causis est ira , quæ hominem furiosum reddit ; hinc Seneca lib. 2. de ira c. 56. Nulla celerior ad insaniam via .

## QVÆSTIO X.

*Vtrum gula sit peccatum capitale , & mortale .*

**N**Ot. 1. Quòd gula est immoderatus , & inordinatus usus , seu appetitus ciborum ; hæc autem immoderatio quadrupliciter contingere potest . Primò in excessiua reple-

pletionem ultra naturæ ordinariam indigentiam. 2. in excessiva ciborum delectatione. 3. in inordinata procuratione, & multiplicatione ciborum. 4. in excessiva præparatione ciborum; Vnde Arist. in lib. Ethicorum ait; quod gulosus dicitur vel quia nimis edit, & bibit, vel quia nimis delicatè optat se cibare, etsi moderatè; vel quia nimium, & delicatè appetit cibos; & hi gulosi sunt peiores.

Not. 2. ex D. Greg. 31. moralium; quod ex gula solent oriri multa vitia, quæ quidem vitia possunt accipi vel ex parte animæ; vel ex parte corporis: Ex parte Animæ quadrupliciter contingit. Primo quantum ad rationem, cuius acies per gulam hebetatur; & sic ponitur hebetudo sensus circa intelligentiam propter fumositatem ciborum perturbantium caput. 2. quantum ad appetitum, qui per gulam deordinatur, quasi sopito rationis gubernaculo; & sic ponitur inepta lætitia. 3. quantum ad inordinatum verbum; & sic ponitur multiloquium. 4. quantum ad inordinatum actum, & sic ponitur scurrilitas idest modus, seu gestus exterior inkompositus. Ex parte autem corporis ponitur immunditia, quæ attenditur secundum inordinatam emissionem quarumcunque superfluitatum.

I. Concl. Gula ex natura sua est tantum veniale peccatum, fieri autem potest mortale ex diuersis circumstantiis. Prob. 1. pars; nam gula secundum se considerata non repugnat charitati Dei, vel proximi; ergo non est peccatum ex genere mortale. Prob. 2. pars: & quidem primò, si quis delectationi gulæ inhæret tanquam ultimo fini, eamque præfert diuinæ dilectioni iuxta illud D. Paul. *Quorum Deus ventor est*; & sic est peccatum mortale: 2. ex Marchant. quando quis tanta ingluvie ciborum se replet, ut sciens, & aduertens, vel aduertere debens sibi morbos graues causer, aut enormiter temperantiæ modum, & rationem excedit; ratio, quia sic rationalis creaturæ statum enormiter lædit.

II. Concl. Ebrietas est voluntaria, & immoderata sumptio potus ad grauem rationis perturbationem; ita passim Doctores, & signanter Marchant. qui ita discurret. Quando quis ad grauem perturbationem deducitur, adeo ut non possit communes actiones necessarias dirigere, dicitur dirigere, quia, etsi quis per se illas exercere non valeat ob titubationem, & motus impedimenta, ebrius tamen non

censetur, si potest dirigere famulitium, & auxilium rationabile sibi postulare. Itaque illa censetur grauis rationis perturbatio, non quæ rationem omninò tollit, ut quidam autumant, sed quæ ita conturbat, ut rationabiliter se dirigere nequeat. Ridiculum sanè est, quod nonnulli affirmant eum, qui crapula, & vino velut sepultus iacet in platea, si signum potest dare, ut currus diuertat, vel se submouere, ne currus super se transeat, ebrium non esse, ridiculum, inquam, & viris doctis indignum exemplum est.

Insuper est peccatum mortale ex eodem Doct. quando immoderantia enormiter temperantiam lædit; quod tunc censetur, quando tanta vini abundantia, & tam continua sumitur, ut monstruosa potitatio censeatur. Et hæ potationes vocantur vinolentiæ, etsi ratio non perturbetur. Vnde Isa. c. 5, *Va qui consurgitis mane ad ebrietatem sectandam, & potandum vsquo ad vespem, ut vino astuetis: & infra: Va qui potentes estis ad bibendum vinum, & viri fortes ad mescendam ebrietatem.* Et communiter Scrip. Sac. non solum priuationem rationis attendit, sed etiam excessum brutalem, & enormem, qui consideratur ex qualitate, continuatione, & alijs circumstantijs potationum. Quare Petrus Apost. in prima Epist. c. 4, inter peccata grauissima Gentilium recenset potationes, vinolentias, comestationes &c. Ex qua doctrina sequitur comprobatio doctrinæ Fernandez in exam. Theol. moral. lib. 4. c. 11. §. 6. de gula; nempe edere, aut bibere, & euomere cibos, & potus, ut iterum bibatur, & edatur esse mortale; quod docuit etiam Perez ex sentent. Angeli, Siluestri, & Armillæ: quia videtur esse magna deformitas contra naturam. Est pariter peccatum mortale; cum tempore prohibito à lege interdicta eduntur, quando scandalum oritur ex nimia superfluitate ciborum, de quo scandalum Paulus dicebat, se nunquam manducaturum carnes, si sciret fratrem suum inde scandalum offendi; & denique quando quis ederet cibos, quos natura non creauit ad esum, vel potum humanum; talis est caro humana, & sanguis humanus. Addit tamen Nauar. in maxima necessitate, licitum esse edere carnes humanas, & bibere sanguinem humanum, si homo inueniatur occisus; nunquam enim licet hominem occidere.

Quæres. An liceat vinum præbere ei, qui inebriari solet.

let. Resp. D. Thom. Nauar. Tolet. & passim Doct. non licere; ac proinde mortaliter peccare præbentem vinum, scienter ei, qui inebriari solet ratio est; quia ut docet D. Thom. cooperatur magno malo, quale est usus rationis amissio. Non est tamen illicitum cibo, & potu se replere ad remedium sanitatis, nempe ad vomitum, etsi ad hunc finem non liceat se inebriare.

## QVÆSTIO XI.

*Vtrum comedere, & bibere vsque ad satietatem ob  
solam voluptatem sit peccatum.*

**N**ot. Quod præter ea, quæ dicta sunt in quæstione antecedenti de gula; quæ faciunt pro resolutione etiam præsentis quæstionis, reuocanda est doctrina superius tradita in quæst. 8. de delectatione naturali secundum se, & ut subiacet voluntatis imperio; nam voluptas est idem, quod delectatio potentia sensitiva, seu carnalis, ut notat Catholicon; non enim voluptas propriè loquendo spectat ad voluntatem, sed gaudium; & insuper obseruanda est doctrina ab omnibus recepta de temperantia. Siquidem temperantia ex communi doctrina, & signanter D. Thom. 2. 2. q. 141. est virtus, quæ habet moderare appetitum circa delectabilia secundum tactum, & gustum, prout rectam rationem decet, ob specialem honestatem, quæ est in tali moderatione. Ex qua definitione indicatur obiectum materiale virtutis temperantiæ, dum dicitur circa delectabilia, nempe circa delectationes corporeas, non tamen omnes, sed illas tantum, quæ ex cibo, & potu, & rebus venereis percipiuntur: tangitur pariter obiectum formale, dum dicitur, ob specialem honestatem; bonitas namque, seu honestas specialis, quæ reperitur in eo, quod homo delectationibus ciborum, & venereorum moderatè utatur, & secundum præscriptum rationis est obiectum formale; quam doctrinam tradit etiam Arist. lib. 3. Eth. cap. 10. dicens. Circa huiusmodi igitur voluptates, temperantia, & intemperantia versatur, quæ cæteris quoque animalibus communia sunt, feruilesque, ob id, & ferina habentur; & paucis interiectis subdit. Vnde gula & edictus quidam Phi-

loxeus optabat guttur sibi longius gruis collo dari, utpote qui tactu oblectaretur, circa quem intemperantia ver-  
fatur.

Concl. Comedere, & bibere usque ad satietatem ob solam voluptatem esse peccatum est ita certum, ut oppositum asserere sit damnatum ab Innoc. XI. in proposit. 8. inter damnatas, quæ est talis. *Comedere, & bibere usque ad satietatem ob solam voluptatem non est peccatum, modo non obsit valetudini; quia licitè potest appetitus naturalis suis actibus frui.* Accedit evidens ratio; nam comedere, & bibere usque ad satietatem ob solam delectatione repugnat rectæ rationi, & aduersatur virtuti temperantiæ, ut docuerunt etiam Philosophi gentiles, ut Arist. Seneca, & alij; ergo est peccatum, & vitium gulæ, quæ ut mox dicebamus, est appetitus inordinatus cibi, & potus; estque unum ex septem peccatis capitalibus, ac proinde est contra abstinentiam, & sobrietatem, quæ sunt temperantiæ species: abstinentia siquidem habet moderare appetitum circa cibos, & sobrietas circa potum; castitas vero habet moderare, ac regulare delectationes in ordine ad coitum, & pudicitia delectationes, quæ sunt in osculis, tactibus, & amplexibus. Itaque meritò damnatur relata propositio, & redarguuntur eiusdem propositionis assertores velut voluptuosi, ac gulosi, immò ut verius loquar, tanquam bestiales; cum de bestiis tantum verificari possit, quod licitè potest appetitus naturalis suis actibus frui; ergo cum appetitus naturalis complectatur non solum gustum, sed etiam tactum, ac proinde concupiscentiam, quæ ad illicitas venereas delectationes anhelat, licitè poterit homo in se admittere delectationes libidinosas, & suis actibus frui, quod constat esse hæreticum. En veneficus anguis, qui latebat satis apertè detectus per Sum. Pontificis damnationem.

## QVÆSTIO XII.

*Vtrum Inuidia sit vitium capitale; & sit mortale peccatum.*

**N**ot. 1. Quòd iuxta Alens. inuidia est tristitia alienæ felicitatis, seu de bono alieno; quatenus illud est di-  
mi-

minutium propriæ excellentiæ; inuidere namque ex vi nominis, idem importat, quod non velle videre, seu nolle alteri tale bonum; & ex nolle, seu tristitia alieni boni sequitur in eodem inidente gaudium alterius calamitatis. Verùm obseruandum, quod quis ordinatè potest interdum tristiari de bono proximi, aut ei bonum nolle, & consequenter gaudere de alterius calamitate. Primò; quia bonum, quod in proximo reperitur, est nociuum iniustè Reipublicæ, vel nobis; siue etiam proximo; quo sensu iusti dolent de prosperitate impiorum; in quantum sibi, & Ecclesiæ nocet; & sic non est inuidia, sed timor bonus, & auersio à malo; ut docet D. Greg. lib. 22. moral. c. 6. Secundò tristiari quis potest de bono alterius, non quia in illo est, sed quia nobis deest; ita ut obiectum tristitiæ non sit ipsum bonum præcisè, sed carentia illius, quod nobis putamus bonum; & utile, & hæc si sit de bonis spiritualibus dicitur emulatio Sanctorum, de qua D. Paul. 1. ad Corint. 12. *Emulamini charismata meliora*. 3. tristiari quis potest de bono alterius, quia verè illo indignus est; aut quia malè, & peruersè illo utitur, aut usurus est, aut quia est impeditiuum salutis illius; siue quia ex eo superbit, & petulantior fit, & hæc pariter tristitia ab inuidia propriè non procedit, sed à zelo, & iusta indignatione: Tota igitur malitia inuidiæ in hoc consistit, quod contra charitatem aliquis ita propriam excellentiam, siue fictam, siue veram sibi amat, ut nolit proximum illam ullo modo habere, ne aut ei æquiparetur, aut ab eo superetur. Ita Petrus Marchant. Vnde D. Aug. lib. 11. super Gen. c. 14. *Amando enim quisque excellentiam suam, vel paribus inuidet, quod ei coquantur, vel inferioribus; ne sibi coquantur, vel superioribus, quod eis non coquantur*.

Not. 2. Quod sicut homines multa operantur ob delectationem, tum ut ipsam consequantur; tum ex eius impetu ad ali agendum moti: ita etiam ob tristitiam multa faciunt, vel ut ipsam euitent, vel ex eius pondere in aliqua agenda prorumpentes, sic tristitiæ satisfaciant; ideoque cum inuidia sit tristitia quædam conuenienter ponitur vitium capitale, eiquè assignantur à D. Greg. lib. 31. moral. quinque filias nempe. Odium, susurratio, detractio, exultatio in aduersis proximi, & afflictio in prosperis; cuius numeri sufficientia traditur ab Aleni ubi supra.



nisi enim inuidia, aut est in affectu; aut in sermone, aut in opere. Si in affectu & sic est odium, quatenus affectat malum damni, quia ut affectat malum penæ ob vindictam pertinet odium ad iram: Si autem sit in sermone; tunc aut ille sermo ordinatur ad discordias seminandas, & sic est susurratio; aut ad famam proximi tollendam; & sic est detractio; si autem sit in opere; aut est respectu aduersitatis proximi; quam desiderat, & procurat. & sic est exultatio in aduersis, aut est respectu prosperitatis, & sic est afflictio in proximis.

I. Conc. Inuidia est vitium capitale, & ex suo genere est peccatum mortale sumpra inuidia prout dicit tristitiam de bono alieno, in quantum apprehenditur impeditiuum propriæ excellentiæ. Est communis sententia Theologorum prima pars patet, cum in 2. notabili sint ei assignatæ tanquam vitio capitali filiæ: 2. pars prob. primo ex Arist. 2. Rethor. Quando aliquis tristatur de bonis alterius, in quantum alter excedit ipsum in bonis, hoc propriæ est inuidia, quæ dolet de eo, quod est gaudendum, & ideo semper est mala, & viriosa ergo &c. Prob. 2. Inuidia secundum rationem sui obiecti repugnat charitati, quæ præcipit, vt proximum diligamus, sicut nos ipsos, at non diligimus, imò odimus, dum de bono alieno tristamur, & de alterius malo gaudemus: sed quod repugnat charitati ex genere suo est mortale, nisi vel leuitas materiæ, vel actus in deliberatio excuset; ergo &c. Vnde D. Pauli ad Rom. i. inter grauissima peccata inuidiam enumerat, quibus Gentiles in reprobum sensum dati sunt, dicens, quod pleni essent inuidia, homicidio &c. idem docet ad Galat. cap. 5. & prima ad Timoth. 6.

II. Conc. Supremum inuidiæ peccatum, seu species est fraternæ charitatis inuidia; quæ in hoc maximè consistit; quod quis dona spiritualia fidei, spei, & charitatis, virtutum Spiritus Sancti, doleat in proximo esse; vnde iuxta Marchant. vocatur peccatum in Spiritum Sanctum, qui subdit tripliciter quis peccare dicitur. Primò cum quis hominem iustum, & bonum persequitur, quia reputatur illo melior, aut quia magni sit ob virtutis, & donorum excellentiam: hinc murmura, susurria, detractiones, irrisiones, vilipensiones. Secundò cum iusta alterius vita vide-

tura actiones nostras condemnare iuxta illud Sap. 2. *Circumveniamus ergo iustum, quoniam contrarius est operibus nostris.* Tertio non raro status contra statum, ordo contra ordinem ex quadam prava inclinatione assurgit, cum quilibet suos, suosque prædicare, & promovere tentans, consequenter personas etiam miraculis claras, ac miracula, & sancta aliorum opera vilipendit, interpretatur, aut minus æstimat, ne videantur suæ intentioni officere; & subdit idem Marchant. Nota occultum, sed frequentissimum hoc seculo peccatum, etiam, Ehu, inter eos, qui perfectionem profitentur, quos ob vānam sub velamine gloriæ Dei iactantiam iaculum occultæ invidiæ necat.

Arg. 1. Quod invidia non sit vitium capitale. Invidia, est filia inanis gloriæ; ex Arist. 2. Rhetor. ubi ait, quod Amatores honoris, & gloriæ magis invident, ergo &c.

Resp. Nicol. de Nyse ex D. Greg. non esse contra rationem vitij capitalis, quod unum oriatur ex alio; sed sufficit, quod habeat aliquam principalem rationem originandi multa genera peccatorum.

Arg. 2. quod invidia non sit peccatum. In omni peccato, teste D. Aug. regnat libido; sed ubique regnat libido, est improba delectatio, at in invidia nulla videtur esse delectatio, cum sit tristitia quædam; ergo &c.

Resp. ex Nicol. de Nyse, quod D. Aug. sumit ibi libidinem pro improba voluntate, & non pro delectatione immoderata; & ideo argumentum nil probat &c.

### QVÆSTIO XIII.

*Vtrum Accidia sit peccatum capitale, & mortale.*

**N**Ot. 1. quod duplex definitio de Accidia à Doctoribus passim traditur. Altera est D. Thomæ eam sic describentis. Accidia est tristitia de bono spiritali, seu divino. Altera est huiusmodi: Accidia est quidam remissi animi languor ad benè operandum in rebus salutis. Potest autem Accidia diuersis modis considerari: Primò ut est quidam motus, & passio naturalis corporis ex complexione, malè affecta originem ducens; quæ dici potest corporis, & heberudo quædam vitium naturalium deficientium reſpe-

Actu laboris suscipiendi; & sic non est peccatum; immò ut aduertit Gerson in reg. moral. tit. de Accidia Tædium boni proueniens ex malitia complexionis auget meritum, & laud em, si quis illud superare conetur: 2. spectari potest, ut est passio appetitus sensitiui laborem, & difficultatem operis refugientis; & hic motus pariter non est peccatum, etsi peccati incentiuum sit; si voluntas deliberatè ei consentiat, & iuxta rationem obiecti ad veniale, vel mortale inducit: 3. sumi potest pro quodam tædio boni spiritualis, & salutaris, quatenus laboriosum, & difficile est.

Not. 2. quod tædium illud, seu tristitia, in qua consistit Accidia circa duo versari potest: vel circa aliquod præceptum, & exercitium alicuius virtutis in speciali, quatenus est molestum carni, aut sensualitati, & eius delectationum impeditiuum; & hoc modo non est peccatum speciale; sed iuxta præceptum, aut virtutem, cui opponitur, vel cui contradicit, rationem peccati sumit: e. g. Ioannes ex sola apprehensione difficultatis voluntariè resoluit non ieiunare, ad quod obligatur sub pœna peccati mortalis: talis Accidia non est peccatum speciale, sed identificatur peccato transgressionis ieiunij; ac proinde sola transgressio est in confessione aperienda; Vel versatur circa Deum, & bonum diuinum, quatenus Deus diligendus est & omnia ad bonum diuinum, quod est ipse Deus, ut est finis noster, ordinantur: & hoc modo est speciale peccatum charitati, & dilectioni Dei oppositum, quia à dilectione Dei, & procuracione salutis, ac boni diuini hominem auertit, ad quæ ex præcepto speciali charitatis homo tenetur.

Not. 3. quod ex D. Greg. sex filiae Accidiæ assignantur, quæ sunt, malitia, rancor, pusillanimitas, desperatio, torpor circa præcepta, & vagatio mentis circa illicita; quarum numerus, & sufficientia sic ostenditur ex Nicolao de Nyse. Quia enim, ut dicit Arist. 8. Eth. malus non potest diu absque delectatione manere cum tristitia, idè ex tristitia contingit aliquid dupliciter oriri. Vno modo, ut homo recedat à contristantibus, alio modo, ut transeat ad delectantia; sic enim illi, qui ob vitam carnalem, quam ducunt non possunt gaudere spiritualibus delectationibus, se transferunt ad corporales, ut testatur etiam idem Philof. In fuga autem tristitiæ primò fugit homo contristanta,

tia, & secundò etiam impugnat ea, quæ tristitiam ingerunt, spiritualia autem bona, de quibus Accidia tristatur, sunt finis, & id, quod est ad finem: fuga autem finis fit per desperationem, fuga verò eorum, quæ sunt ad finem, quantum ad ardua, quæ subsunt consilijs, fit per pusillanimitatem; quantum verò ad ea, quæ pertinent ad communem iustitiam fit per torporem circa præcepta. Impugnatio siquidem bonorum spiritualium contristantium quandoque est contra homines, qui ad bona spiritualia inducunt, & hæc dicitur rancor: Quandoque est contra ipsa spiritualia bona, quæ detestatur aliquis. & hæc propriè est malitia. In quantum verò propter tristitiam aliquis se transfert ad delectabilia exteriora, ponitur euagatio circa illicita; unde patet, quod malitia hic non sumitur secundum quod est genus omnium vitiorum; neque rancor accipitur hic pro odio, sed pro quadam indignatione contra eum, qui ad spiritualia bona inducit; neque pariter vagatio mentis circa illicita sumitur hic prout generaliter reperitur in omni peccato, sed ut supra indicatum est.

I. Concl. Accidia prout est tristitia de bono spirituali, & diuino, est vitium capitale, & ex suo genere est peccatum mortale. Hæc est communis; & quoad 1. part. constat ex dictis, cum sint enumeratæ filiæ, quæ Accidiæ competunt: 2. pars prob. Nam Accidia aduersatur charitati diuinæ per actum oppositum; charitas namque Dei in se includit quoddam gaudium de bono diuino quatenus diuinum; accidia autem includit tristitiam, seu auersionem à bono spirituali, quatenus bonum est; vel quatenus ad Deum refertur, sed hoc est grauissimum vitium, ergo Accidia ex suo genere est peccatum mortale, nisi leuitas materiæ, vel actus indeliberatio adsit, & excuset. Tunc autem censetur Accidia aduersari charitati in materia graui, quando, ut docet Petrus Marchant' ex illa oritur auersio à Deo, & bono diuino, negligentia grauis salutis, contemptus virtutis, conuersio totalis ad creaturam; & quædam in illis immersio. Signa autem huius Accidiæ sunt; si quis non nisi cum tristitia audire potest conferre de Deo, de æterna beatitudine, de salute procuranda, de operibus ad salutem necessarijs, de voluptatibus huius sæculi fugiendis. Hinc fugit conuersationem illorum, qui de illis monent &c. & querit solatium in creaturis.

II. Conc. Accidia, prout est quidam remissi animi languor ad bene operandum in rebus salutis, est tantum peccatum veniale ex genere suo. Ratio est euidens; quia per se non aduersatur charitati, sed tantum eius feruori, & virtuti fortitudinis: ergo motus accidiæ, quando est propter repugnantiam carnis, ut paulò superius explicatum est, non censetur nisi peccatum veniale; immò si ratio viriliter detestetur, nullum penitus est peccatum, sed materia exercendæ virtutis; quod iuxta Nicol. de Nyse intelligendum est etiam in omni genere peccati.

Arg. quòd accidia non sit peccatum. Accidia est quædam passio, quia teste Damasc. est species tristitiæ, ergo non est peccatum. Resp. dist. conf. non est peccatum, prout est pura passio appetitus sensitiui refugientis laborem, & difficultatem operis; conc. conf. non est peccatum, ut est tristitia de bono spirituali; neg. conf. quia sic aduersatur charitati; & licet tristitia possit oriri ab appetitus passione, attamen cum voluntas teneatur regulare omnes inferiores passiones, quæ sunt materialiter peccaminosæ, seu incentiuum ad peccatum, peccat iuxta grauitatem materiæ, circa quam versatur.

Quæres quale peccatum sit: Si quis fastidiosus vitæ, & erumnarum deliberatè optat, se nunquam fuisse natum, aut conceptum; aut potius esse brutum.

Resp. Nauar. Siluest. Tolet. & Fernandez p. 4. c. 2. §. 8. de Accidia peccare mortaliter cū qui sic deliberatè optat; idem dicendum de eo, qui desiderat perpetuò manere in terra, & cedere Deo cælum suum; is enim peccat grauissimo peccato mortali contra præceptum spei diuinæ, qua quisque obligatur Deum, & diuinâ præ omnibus rebus creatis sibi concupiscere, Ita Stephanus à S. Paulo in sua Theol. morali; & addit cum Burchard etiam peccare coniuges dicentes deliberatè, se desiderare, ut detur sibi perpetuò in terra conuiuere; nisi hoc loquendi modo solum velint indicare vehementiam amoris coniugalis. Verùm clariùs, & meliùs respondet Herincx p. 3. disp. 13. q. 2. de accidia, qui postquam dixit, tristitiam de bono diuino, idest amicitia Dei, & statu filij adoptiui ob tædium laborum, & difficultatum esse graue peccatum mortale; subdit. Hac ratione Accidiosus displicet quod sint à Deo creati, ut per  
exer-

exercitia laboriosa virtutum debeant peruenire ad beatitudinem, aliàs damnandi. Vnde interdum vellent se non esse creatos, præsertim ad talem finem; neque esse cælum, aut infernum, aut se esse animal, seu brutum, ut liberi à præceptis possent sine timore suis cupiditatibus, aut otio indulgere. Sed quid de eo, quem tædet, seu pænitet assumpti status religiosi (idem est cum proportionem de statu sacerdotali) responderet idem Herincx: quod sicut non tenebatur quis statum istum assumere; sic nec tenetur de assumpto lætari: Quàmuis huiusmodi affectus non soleant cadere in bonos Religiosos; cum sint ingrati animi erga Deum, qui ad religionem à sæculo eos vocauit, argumentum, nec parum periculosum, atque adeo omninò dissuadendi: & suadendi Religiosi, ne eos pæniteat talem statum assumpsisse; sed potius iuxta statum assumptum non viuere; sicque se reprehendere, & omni conatu à negligentia, & torpore se emendare.





## TRACTATUS SEPTIMVS

D E

## LIBERO ARBITRIO,

ET GRATIA D. ACTVALI,  
ET HABITVALI.

DISPVATIO I.

*De libero arbitrio.*

QVÆSTIO I.

*Quid sit liberum arbitrium.*

**N**Ot. ex Scot. in 4. d. 14. q. 3. ad 2. quod triplex est liberum arbitrium, nempe Diuinum, Angelicum, & humanum; sicut triplex est natura intellectua-  
lis, Diuina, scilicet, Angelica, & humana; im-  
præsentiarum non intendimus inuestigare rationem, &  
quidditatem Diuini lib. arb. de quo aliqua dicta fuerunt in  
1. part. neque de Angelico, sed tantum de humano; de quo  
varie afferuntur definitiones. Prima est Magist. sent. de-  
sumpta ex D. Aug. lib. de eccles. dogm. c. 21. ubi sic docet.  
*Liberum arbitrium est facultas rationis, & voluntatis, qua bonum  
eligitur gratia assistente, vel malum gratia desistente.* Secunda est  
D. Anselm. de lib. arb. c. 3. *Liberum arbitrium est potestas ser-  
uandi rectitudinem voluntatis, propter rectitudinem ipsam;* sed ut  
clariùs innotescat ratio quidditatiua lib. arb. sit.

Concl. Liberum arbitrium est facultas actiua cum in-  
differentia contradictionis, & contrarietatis ad operan-  
dum, adeout positis omnibus prærequisitis ad operandum  
possit agere, vel non agere, & agere hoc, vel oppositum.  
Hæc definitio colligitur ex Scot. in 2. d. 25. q. vn. & dist.  
12. q. 1. Prob. & explicatur. Hæc definitio explicat opti-

me

mè naturam lib. arb. Nam ly, facultas est genus, & simul indicat lib. arb. non esse purum actum, ut putant Herueus, & alij, sed potentiam quandam, & principium elicitiuum; ly actiua insinuat lib. arb. esse de genere potentie actiue, & non potentie passiuæ, ut imaginantur Hæretici asserentes lib. arb. esse velut inane quoddam nihil omnino agens; ac proindè merè passiuè se habere; quod damnatur à Trid. in sess. 6. can. 4. ly cum indifferentia contradictionis, & contrarietatis, denotat, lib. arb. hominis esse perfectè liberum, ut infra ostendetur; & reliquæ particulæ aliqualem perfectam libertatem explicant, Ex qua definitione inferitur primò. Quod liberum arb. non est aliquis habitus, vel facultas quædam operandi, deriuata ex connectione, seu coniunctione rationis, & voluntatis, ut videntur sentire quidam veteres Theologi. Etenim lib. arb. est potentia insita, & intrinseca naturæ, ac proindè inammissibilis; non sic autem se habet habitus ex actibus acquisitus. Tum quia omnis habitus ex sui natura, cum determinet ad unum, & non inclinet ad oppositum, vel omnino tollit indifferentiam à potentia, vel saltem illam diminuit. Inferitur 2. lib. arb. non esse aliquod coalescens ex actibus intellectus, & voluntatis, ut opinantur Durand. & quidam alij, quia tales actus superadduntur potentijs, à quibus, cum sint quid realiter distinctum, possunt separari; & sic lib. arb. deficere, quod est manifestum absurdum, & contra Concilia, & Patres vocantes libertatem voluntatis liberum arb. atque unum pro altero usurpantes.

Arg. 1. D. Bernard. & Magist. sent. describunt lib. arb. per iudicium intellectus, & facultatem rationis; ergo lib. arb. non est facultas. Resp. consuetum esse potentiam significari per actum, & sic voluntas modò sumitur pro actu, modo pro potentia.

Arg. 2. probando indifferentiam lib. arb. ad operandum consistere non in sola voluntate, sed etiam in intellectu.

Iudicium intellectus quamdiu est determinatum, voluntas nequit ad quàmlibet contradictionis partem exire; eò quòd necessitatur ab illo iudicio, ut velit, vel nolit: ergo tota ratio lib. arb. non est in sola voluntate, sed formaliter in voluntate, & radicaliter in intellectu.

Resp. neg. assumptum, quia indifferentia intellectus v.g.  
ad

ad amandum vel non amandum est prorsus naturalis, non verò libera, ut aliàs dictum est.

Quæres. An de potentia Dei possit dari potentia intellectiua libera. Resp. Arriaga affirmatiuè disp. 5. sect. 3. eò quòd non appareat in hoc repugnantia. Verum non satis solide, inquit Herincx, hoc solo titulo asseritur rei possibilitas, quando meritò prudens suspicatur latere repugnantiam, etsi fortasse nobis non clarè apparentem. Et certè concipi non potest quo modo potentia intellectiua ex sui natura intellectiualis formari possit libera, cum liberum, & naturale sint rationes formaliter diuersæ, ac proinde incompossibiles, nisi fingere velimus chimæras.

## QVÆSTIO II.

*Vtrum in homine reuera reperiatur liberum arbitrium.*

**N**ot. 1. Quòd Stoici, & Priscillianistæ, & eorum sequaces negarunt, hominem esse præditum lib. arb. quòd posset prohibitu operari; sed asserbant, omnia hominis opera quadam necessitate fatali cuenire. Hunc eundem errorem suscitauerunt Abailardus, & Vvicleph. ut constat ex actis Concil. Constan. sess. 8. & ex recentioribus Luter. lib. contra Erasmus de seruo arbitrio, & assert. 36. dicit lib. arb. est figmentum in rebus, & titulus sine re; quem errorem deinde moderauit dicendo, posse quidem in homine admitti lib. arb. respectu actionum externarum, & ciuiliū, non verò respectu moralium, & in ordine ad salutem supernaturalem animæ, Luthero subscribitur Calvinus, Bucerus, & alij Hæretici moderni; qui ulterius modificant asserendo (signanter Calvinus) posse tamen concedi hominem esse liberum respectu coactionis, quia non agit coactè, licet non sit liber à necessitate, quia necessariò facit, quæcumque facit; cui videtur fauere Iansenius olim Episcopus Iprensis, ut infra ostenderetur.

Not. 2. Quòd Principes Scolaſtici, nempe Alex. Alenf. D. Thom. D. Bon. & Scot. nec non plures alij ex veteribus, interdum appellant voluntatem liberam, etsi necessariò agat, dummodo tamen non coactè agat; & sic liberum consideratur cum perfectè voluntario, quale reperitur in amo-

re necessario, quo Deus amat seipsum. Vnde in hoc sensu Pater, & Filius spirant Spiritum S. Verum præcitati Doctores non loquuntur de libero, quatenus requiritur ad bonos mores, & malos, siue ad meritum, & demeritum, ut inter alios rectè obseruat Herincx contra Hæreticos Doctorum Cathol. auctoritatibus pessimè abutentes, qui discurrendo disp. 2. de libert. act. human. q. 1. ita subdit. Phrasi Scotistarum prior libertas dicitur essentialis, & physica; estque solùm lubentia quædam; posterior autem accidentalis, & ab actu voluntatis separabilis; & denique moralis, quæ etiam sola simpliciter stat hodie pro libertate. Phrasi D. Bon. à priori dicitur arb. lib. à posteriori verò deliberrans. Phrasi denique D. Thomæ à priori dicitur voluntas libera, à posteriori verò lib. arb. & Scotus pluribi se ostendit propugnatorem lib. arb. & signanter in 1. d. 25. q. un. & in 2. d. 25. q. un. & in 3. d. 17. q. 1. ubi docet sic. Dicitur autem libera voluntas in quantum in potestate eius est ita elicere actum oppositum eius inclinationi, siue conformem, & non elicere, sicut elicere. Quibus verbis non poterat Doctor clariùs exprimere indifferentiam lib. arb. humani.

I. Concl. Liberum arb. est adedò proprium naturæ intellectualis humanæ, ut nec per Dei potentiam, homo creari possit sine lib. arb. Hæc est conformis principijs Scoti, & Theologorum, & prob. breuiter. Nequit homo esse formaliter homo sine partibus essentialiter illum constitutentibus, quæ sunt corpus, & Anima rationalis; sed Anima rationalis, cum sit natura intellectualis impossibile est, quod non sit prædita potentijs, & maxime intellectu, & voluntate, in quibus fundatur lib. arb. ergo etiam per potentiam Dei nequit homo esse sine lib. arb.

Cæterum, quod de facto nobis insit lib. arb. naturali experientia est omnibus notissimum. Quid enim notius quàm in nostra potestate sit sedere, vel stare, loqui, vel tacere? Quare hoc negantes, tormentis, vel igni exponendi sunt, inquit Auicenna, quotisque concedant in potestate Tortoris esse illos comburi, vel non comburi, torqueri, vel non torqueri.

II. Concl. Datur in homine etiam lapsa liberum arbitrium: est de fide contra recensitos hæreticos. Prob. ex S.

Scrip. n. 38. *In arbitrio viri erit, suū faciat, suū non faciat*; & Ios. 24. *Upio vobis datur eligere, quod placet*; ergo in homine etiam lapso datur lib. arb. nomine optionis, & electionis clarè expressum, tam in ordine ad actiones ciuiles, quàm morales; cum auct. Scrip. generaliter, & indefinitè loquantur, non solum in loc. cit. sed etiam in pluribus alijs.

Prob. 2. auct. S. S. Concil. nempe Bracarenf. 1. can. 10. Arausic. can. 25. & deniquè Concil. Trid. sess. 6. can. 4. ubi sic dogmatiztat, & definit. *Liberum arbitrium cooperari assensando Deo excitanti, & posse dissentire si velit*; & sess. 6. can. 5. contra Lutherum. *Si quis liberum hominis arbitrium post Adā peccatum amissum, & extinctum esse, dixerit, aut rem esse de solo titulo &c. anathema sit*. Hanc eandem veritatem tradunt SS. PP. quos Doct. moderni plena manu exhibent.

Prob. ratione. In homine est vis consultandi, ergo, & eligendi: sed ubi est vis eligendi, ibi est etiam libertas arbitrij, cum ea nil aliud sit, quàm potestas eligendi, quod velit, ergo &c. Confirm. Quia si in homine non esset lib. arb. frustra Deus ei dedisset leges obseruandas sub pœna peccati mortalis, cum illas defectu libertatis non haberet in sua potestate ut obseruare posset; Vnde D. Aug. lib. de fide cont. Manich. c. 10. *Quis non clamat stultum esse præcepta dare ei, cui liberum non est quod præcipitur, facere*; ergo in homine etiam lapso reperitur liberum arbitrium.

Arg. 1. cont. 2. Concl. ab hæreticis varias scripturas afferentibus; quibus nituntur euertere lib. arb. D. Paulus ad Rom. 7. dicit. *Non quod vole bonum, hoc ago, sed quod nolo malum, illud facio*; ergo homo non habet lib. arb. ad agendum, vel non agendum malum. Item 2. c. 8. *Non est volentis, sed currentis, sed miserantis est Dei*; & ad Eph. 1. *Qui operatur omnia in nobis*; ergo non est in homine lapso liberum arbitrium.

Resp. ad omnes auctoritates; & quidem ad primam dicitur, quod D. Paulus illis verbis solum vult ostendere, in homine lapso adesse magnam difficultatem etiam cum auxilio Dei superandi appetitum sensitiuum contra rationem rebellem, & insurgentem. Vnde fit, quod voluntas sæpè immoderatè condelectetur obiecto delectabili appetitus sensitiui; ac proindè agit malum, quod aliàs non vult secundum regulam recti dictaminis. Ad cæteras auctorit. resp. quod solum licet inferre ex illis, hominem sine Dei adiu-

adiutorio non posse elicere actus supernaturales ; Idèdque non volentis : sed miserentis est Dei ; & in hoc pariter sensu Deus operatur omnia in nobis .

Arg. 2. In Prou. c. 21. *Cor Regis in manu Domini est . & quò voluerit vertet illud* , ergo non potest in homine consistere liberum arbitrium . Resp. neg. conf. & ratio est , quia etsi Deus possit , & soleat cor Regis vertere quo voluerit , tamen huiusmodi versio fit Rege liberè consentiente , & se ad talem versionem determinante .

Arg. auct SS. PP. qui videntur docere , liber. arb. peccato Adæ esse deperditum , & præsertim D. Aug. in Epist. 107. ad Vital. ait : *Liberum arb. ad diligendum Deum primò peccatù granditate perdidimus ; & in Enchirid. c. 30. Lib. arbitrio malè utens homo , & se perdidit , & ipsum* ; ergo in homine lapsò non est &c. Resp. PP. & Aug. solum velle Adam , & nos in eo perdidisse lib. arb. quoad accidentalìa , non verò quoad substantiam ; remansit ergo ratio formalis lib. arb. sed perdidimus ob peccatum dominium dispoticum super appetitum sensitivum , à quo trahitur nostra voluntas , adeout sine maxima difficultate non auertat se ab eo , quod appetit concupiscentia . Quod autem in hoc sensu sit loquutus D. Aug. liquidò constat ex eius doctrina , & præsertim in lib. 1. cont. 2. Epist. Pelagij c. 2. ubi ait . *Quis nostrum dicat , quèd primò hominis peccato perierit lib. arb. de humano genere ? & postea subdit . Libertas quidem periit per peccatum , sed illa , quæ in Paradiso fuit , habendi plenam cum immortalitate iustitiam ; propter quod natura indiget gratia .* Hæc D. Aug. & lib. 2. cap. 15. *Peccato Adæ lib. arb. de natura hominum periisse non dicimus ; sed ad peccandum valere in hominibus subditis Diabolo ; ad benè autem piequè viuendum non valere , nisi ipsa voluntas hominis Dei gratia fuerit liberata .*

### QVÆSTIO III.

*Vtrum ad merendum , & demerendum sufficiat libero arbitrio libertas à coactione .*

**N**Ot. 1. Quòd à Theologis triplex distingui solet libertas , nempe à seruitute , à coactione , & à necessitate . Prima est illa , qua liberè consentur , qui non sunt manci-



pia, seu non subditi propriè dicti, & ad hanc reuocatur libertas à peccato, à miseria, à Diabolo, & huiusmodi. 2. est illa, qua quis in agendo ita est liber, ut non cogatur ab extrinseco, licet non maneat in ipso indifferentia ad oppositos actus; sic quodammodo Beati dicuntur diligere Deum liberè; & hæc libertas interdum coincidit cum spontaneo, quod conuenit etiam Brutis, quæ, etsi ducantur, & determinantur ad agendum à naturali appetitu, non tamen coguntur, quia coactio attenditur à principio extrinseco, non conferente vim passio, ut explicatum est in tract. de actibus humanis: 3. libertas dicitur à necessitate, & est quæ quis positis omnibus requisitis ad agendum potest agere, vel non agere, vel agere hoc, vel eius oppositum, & huiusmodi libertas dici etiam solet libertas indifferentiæ, & ad opposita; quæ si sit ad contradictoria dicitur libertas contradictionis: si ad opposita dicitur contrarietatis, ut aliàs explicatum fuit.

Not. 2. Quod hæretici fatentur quidem, hominem etiam in natura lapsa mansisse liberum, sed tantum à coactione, non vero à necessitate; dicentes, absolutam, & antecedentem necessitatem voluntati hominis inferre; adeout dum benè agit, necessariò benè agat, & dum malè agit, necessariò malè agat: ac proindè non reperitur in homine lapsò libertas indifferentiæ. Idquè deducunt ex falso, & impiò principio. Idèò enim putant Hæretici, nempe Lutherani, Calvinistæ, Manichæi, & VVicleffistæ, hominem non remansisse liberum libertate indifferentiæ post peccatum, quia, posito Adæ peccato, Deus decreuit saluare tantum certum numerum hominum, qui prædestinati dicuntur, alios verò relinquare in massa perditionis. Insuper voluit Deus, in executione prædestinationis illorum, dare prædestinatis gratias efficaces. quibus voluntas nequit resistere, & reprobis talem gratiam negauit, ac proindè necessariò peccant. Quare ex hoc impijsimo principio inferunt, quod nec reprobi, nec prædestinati sint indifferentes ad bonum, & ad malum; Non quidem prædestinati, quia mediante gratia supradicta, non possunt non consentire, & se non conuertere. Nequè reprobi, quia bonum operari non valent, cum careant gratia, qua possint bonum operari; & sic concupiscentia moti irreparabiliter in peccata labuntur.

Not.

Not. 3. quod Iansenius Episcopus Iprensis circa lib. arb. facultatem videtur sentire cum Calvinistis, & alijs Hæreticis. Etenim si per liberum arb. intelligatur potentia voluntaria, quæ se spontè, & non coactè determinet; fatetur Calvinus æquè ac Iansenius existentiam lib. arb. ut notant Doct. Moderni; & signanter Herincx, Frassen, & Boyuin in tract. de gratia. Vnde Calvinus lib. 2. cont. Pichium dicit, si coactioni opponitur libertas, lib. arb. & fateor, & constanter asseuero: At si per lib. arb. intelligatur facultas indifferens, negat apertè illud Calvin. in antidoto Conc. Trid. ad can. 5. sess. 6. ubi insolenter ait esse titulum finire. Cæterum idem profitetur Iansenius, volens omnem voluntatis indifferentiam perijsse in homine lapsò, & solam remansisse necessitatem, quæ oritur, vel ex concupiscentia, dum fit malum, vel ex efficacia gratiæ medicinalis, dum quis bonum operatur.

Not. 4. Quod Iansenius in lib. 6. de gratia Christi c. 34. sic habet. In Angelis, & in primo homine indifferentissimum fuisse liberum arbitrium ad bonum, & ad malum; in hominibus autem lapsis viatoribus itidem indifferens esse, sed longè minus, utpotè, qui vident aliàm legem in membris repugnantem legi mentis, & captiuantem cos sub lege peccati. In his videtur Iansenius cum Catholicis indifferentiam lib. arb. fateri. Sed quam indifferentiam admittat, aduertite quæso, inquit Boyuin in tract. de gratia Christi, & videbitis eum in omnibus esse fallacem, & captiosum. Non enim dicit voluntatem esse liberam à necessitate absoluta, sed à necessitate immutabilitatis, in quantum pro eo instanti, quo agit voluntas bonum, posset non agere, si videlicet gratia abesset, & dum malum operatur, posset illud non operari, si nempe gratia adesset, & in hoc ponit suam indifferentiam, quæ est indifferentia tantum in sensu diuiso; quod non sufficit secundum Catholicos, qui ponunt indifferentiam in sensu composito; dicentes, quod, licet voluntas habeat gratiam, possit tamen non agere, & licet pulsetur à concupiscentia, possit vitare peccatum, quia ad hoc numquam deest gratia. Vndè meritò Innocen. X. Bulla incip. *Cum occasione*. Damnauit hanc Iansenij propositionem, velut hæreticam.

*Ad merendum, & demerendum in statu nature lapsæ non requi-*

*ritur in homine libertas à necessitate, sed sufficit libertas à coactione; & Trid. iam definierat sess. 6. can. 4. Liberum arb. cooperari assentiendo Deo excitanti, & posse dissentire se velit. Sit igitur.*

*Concl. Fide certissimum est, in homine etiam lapsò reperiri libertatem à necessitate, ac proinde libertatem à coactione non sufficere ad merendum, & demerendum.*

*Prob. 1. ex S. Scrip. Gen. 4. Deus ait Cain. Quare iratus es, & cur concidit facies tua? Nonne si bene egeris recipies? Sim autem male, statim in soribus peccatum tuum aderit, &c. Sub te erit appetitus tuus; & tu dominaberis illi, ex quibus verbis liquidò patet libertas indifferentiæ hominis etiam lapsi. Item Ecclesiast. c. 31. Qui potuit transgredi, & non est transgressus, facere mala, & non fecit, idè stabilita sunt bona illius in Domino. Si potuit autem facere mala, & non fecit; immò fecit bonum, ergo ad utrumquè erat indifferens. Prob. auct. Concil. Araus. Session. & signanter Trid. damnantis Calvinum, & Lutherum asserentes, hominem lapsum remansisse liberum solummodò à coactione; sess. 6. can. 5. Si quis dixerit liberum arb. post Ada peccatum extinctum, & amissum esse, anathema sit, & can. 4. Si quis dixerit lib. arb. à Deo motum. & excitatum non posse dissentire, si velit, anathema sit. Quæ quidem damnatio militat directè etiam cont. Iansenium, asserentem quod gratia sit talis efficacitatis, ut non possit illi resistere voluntas creata. Eandem doctrinam tradunt SS. PP. videndi apud Doctores modernos supracitados.*

*Arg. cont. concl. ab aduersarijs afferentibus quosdam S. Scrip. textus, quibus etiam alibi satisfactum est: ac proinde non opus est in illis explicandis immorari. Itaque breuiter, quando ipsi dicunt. A Domino sunt gressus viri.*

*Resp. quia nos dirigit per suas inspirationes, & per suam gratiam, cui tamen resistere possumus. Quando pariter in Ezech. 36. dicitur Dabo vobis cor nouum &c. & faciam, ut in præceptis meis ambulatis; ex hoc tamen non debet concludi, quod homo solo tractu necessariò sequatur, & nihil eius voluntas præstet in ordine ad bonum opus; etenim qui dicit dabo vobis cor &c. dicit etiam ad Ephes. 2. Renouamini in spiritu mentis vestra. Si dicant ex Ioan. c. 8: Si vos filii liberaueris, verè liberi eritis: sed reprobi non liberantur, ergo verè liberi non sunt. Resp. quod triplex est libertas, à peccato, à miseria, & à necessitate, ut significatum est supra. Si ergo*

nos liberauerit Christus, verè liberi erimus à peccato, quos verò efficaciter non liberauit non sunt liberi à peccato, idque non ex parte Dei, sed hominis non cooperantis; sunt tamen liberi à necessitate, cum sit in eorum arbitrio bene agere, vel malè, agere, vel non agere.

Arg. 2. ex D. Aug. Illud nobis est liberum; quod est in nostra potestate, & illud est in nostra potestate, quod fit cum volumus, sed ex Iansenio omnis volitio, eo ipso quo volitio est, fit cum volumus, ergo omnis volitio est libera, licet sit necessaria. Maior quoad utramque partem est D. Aug. lib. 3. de lib. arb. c. 3. & minor est Iansenij lib. 6 de gratia Christi. Resp. Verissimam esse 1. part. mai. nam in nostra potestate est nostra volitio, & illud est in nostra potestate, quod ita à nobis dependet, ut illud possimus facere, & non facere: at volitio necessaria non est in nostra potestate. Cæterum, etsi Aug. lib. de Ciuit. Dei cap. 10. videatur admittere aliqualem necessitatem; non tamen admittit necessitatem in sensu Iansenij. Agebat enim D. Aug. contra doctrinam Ciceronis, qui ex præscientia Dei infallibili concludebat nihil esse liberum, sed omnia esse necessaria; cui respondet D. Aug. ea esse necessaria necessitate subsequenti (quam nos vocamus in sensu composito) quæ non tollit libertatem agentis rationalis; cum præsupponat, quod agentia intellectualia ad hoc, vel illud sint liberè se determinatura, antequam Deus eorum determinationes præuideat, quo sensu non tollitur libertas indifferentiæ, ut in 1. part. ostensum est. Verùm Iansenistæ à veritate deuiant, dum admittunt in actibus humanis necessitatem antecedentem, quæ est vel à gratia respectu boni, vel à concupiscentia respectu mali.

Dices. D. Aug. lib. 22. de Ciuit. Dei c. vlt. docet, *Beatos multò liberiores esse in Cælo, ubi peccare non possunt*, ergo in via non erant liberi libertate à necessitate. Resp. D. Aug. sumere ibi liberum arb. prout opponitur seruituti à peccatis.

Arg. Iansenius lib. de gratia Christi c. 12. Aug. & alij PP. opponunt libertatem coactioni, dicentes, quæcumque sunt spontè, fieri liberè; Scholastici pariter veteres semper explicant libertatem per exemptionem coactionis, ergo sufficit lib. arb. libertas à coactione. Resp. 1. ad PP. antiquos, ipsos non distinguere inter coactionem, & necessita-

tem ; dum enim dicunt voluntatem non cogi, volunt idem esse, ac non necessitari ; ut patet ex eorum doctrina ; ubi Patres cum dicunt, voluntatem non cogi, explicant, dicentes illam manere indifferentem, vel posse ad utrumlibet se determinare, vel actum semper remanere in sua potestate, ut videri potest apud Clementem Rom. Epist. apud Irenæum lib. 4. cap. 71. apud Hilarium in psal. & apud alios. Quare in eodem sensu loquuntur, quando dicunt, id fieri liberè, quod sit spontè ; nam per fieri spontè intelligitur aliquid fieri taliter, ut ille actus remaneat in potestate voluntatis. Resp. 2. ad scholasticos veteres ; illos ante errorem Lutheri, & Caluini, & ante Concil. Trid. communiter intellexisse per coactionem, omnem antecedentem necessitatem, siue fuisset ab extrinseco, quæ propriè dicitur coactio, siue ab intrinseco, in quo stat ratio necessitatis. Vnde asserentes voluntatem esse liberam, quia non est coacta, nec violenta, indicare volebant, nullam illi necessitatem imponi, sed ita esse suorum actuum dominam, ut esset in sua potestate ad quælibet se determinare ob suam libertatem indifferentiæ. Quidam autem usurpabant, ut supra nomen liberi pro voluntario.

Arg. 2. Si admitteretur libertas indifferentiæ, ergo nulla esset differentia inter gratiam sanitatis, & medicinalē, quod contradicit D. Aug. docenti gratiam sanitatis differre à gratia medicinali per hoc, quod primæ potuerit Adam resistere, & quod nunquam resistatur secundæ. Resp. pro nunc, nam de gratia sanitatis, & medicinalierit sermo in disp. 2. falsum esse quod nostra voluntas resistere gratiæ medicinali nequeat. Quod si Aug. dicat gratiam medicinale semper habere suum effectum, intelligendus est de gratia medicinali efficaci ; dum etiam loquitur de auxilio, quod quod datur in natura lapsa, & dat reuerà effectum, intelligitur pariter de auxilio quod efficaci, non vero sufficienti.

Arg. 3. Si homo gaudet libertate indifferentiæ, ergo haberet potentiam ad bonum, sicut ad malum : sed conf. est hæreticum, ergo & ant. est falsum. Resp. neg. conf. mai. ratio, quia homo non habet potentiam ad bonum nisi per gratiam ; malum autem ex se potest operari.

## QVÆSTIO IV.

*Utrum sit de ratione agentis liberi, ut, positis omnibus natura, & causalitate ad agendum, possit non agere in sensu composito.*

**N**ot. 1. Quòd circa hanc quæst. non est levis contro-  
uersia inter Thomistas, & Scotistas modernos. Ete-  
nim Thomistæ, & signanter Gonet tom. 3. Comp. theol.  
tract. 2. c. 4. §. 4. contendit non esse de ratione agentis libe-  
ri, ut positis omnibus natura, & causalitate requisitis ad  
agendum, possit non agere in sensu composito; quod hac ra-  
tione probat. Ea, quæ secundum ordinem naturæ tantum  
prærequiruntur ad agendum sunt simul cum actu ( priori-  
tas enim naturæ est solum prioritas causalitatis, & instan-  
tis à quò, non vero naturæ, & instantis in quò ) unde quia,  
quod est, quando est, nec esse est esse, impossibile est. quod,  
positis omnibus necessario prærequisitis in agente libero ut  
operetur, possit non agere in sensu composito seu negatio-  
nem actionis cum illis componere; aliàs posset non actum  
cum actu, & formam cum eius negatione componere: ha-  
ctenus Gonet. E contra Scotistæ, & Neutrales nobiscum,  
sentientes, ideoque pro maiori claritate sit.

Not. 2. Quòd, licet duo actus inter se simul repugnent;  
& sint impossibiles. non tamen repugnat unam, & ean-  
dem facultatem simul esse potentiam ad utrumque actum,  
ita ut particula, simul, non ad actus inter se componendos,  
sed ad potentiam referatur v. g. in homine est potentia si-  
mul ad ambulandum, & ad sedendum; non tamen ut simul  
utrumque faciat, cum inter actus ipsos sit repugnantia, &  
impossibilitas; hinc ortum habuit illa distinctio com-  
muniter recepta de simultate potentiæ, & de potentia si-  
multatis. Siquidem in lib. arb. est simultas potentiæ ad ope-  
randum. & non operandum, licet in eo non sit potentia  
simultatis ad actus contrarios, vel contradictorios: ad quod  
explicandum applicatur communis distinctio sensus com-  
positi, & diuisi; nam potentia de se actiua ad utrumque; sub  
uno actu existens, in ratione potestatis, quam retinet, dici-  
tur posse alium actum facere in sensu diuiso. non tamen  
in sensu composito; eò quòd, manens sub actu non potest  
alium actum simul habere.

Concl.



Concl. Definitio tradita superius potentia<sup>e</sup> libera<sup>e</sup>, nempe ut positis omnibus prærequisitis possit agere, & non agere, ita est intelligenda, ut verbum illud (potest) faciat sensum compositum, & non diuisum, hoc est cum illa potentia, & omnibus prærequisitis possit componi, idest simul poni tam actus, quam carentia actionis, simultate quidem potentia<sup>e</sup>, quia hoc postulat formalis, & intrinseca vis, & indifferentia potentia<sup>e</sup> liberè.

Prob. concl. Ad hoc ut actus voluntatis sit liber, oportet ut sic egrediatur ab ipsa voluntate, ut prius natura quam ponatur, possit non poni, seu ut voluntas quatenus concipitur nondum esse sub actu, qui dicitur liber, possit illum non ponere, etiam positis omnia<sup>bus</sup> prærequisitis, adeo ut eodem tempore sit potentia ad actum, & ad eius omissionem, ergo ad libertatem creatam non sufficit indifferentia in sensu diuiso; siquidem nec ipsi hæretici indeterminacionem in sensu diuiso negarent, sed faciliè concederent, cum optimè consistat cum præmotione diuina necessitante voluntatem. Confirmatur. Quia alioquin falsum esset, agens liberum posse agere, & non agere; quando enim sunt prærequisita ad agendum, non potest agere; si autem ijs positis, nequeat actionem omittere, nec prærequisitorum ablatio sit in eius potestate, falsum est, quod tale agens possit non agere, ergo &c. Hæc ratio est euidentis; nam quod agens non agat defectu eorum, quæ prærequiruntur, non oritur ex interna dispositione, & eminenti dominio in actum, sed potius ex defectu alicuius necessarij, sicut ex simili defectu, & non ex libertate oritur, quod ignis, qui est agens necessarium, non agat, combustibili non applicati.

Prob. secunda pars, nempe, quod requiratur indifferentia in sensu composito. Si talis indifferentia non exigeretur, esset rationæ diuinæ præmotionis physica<sup>e</sup> ad omne opus liberum necessaria cum quâ absolutè impossibilis est non actio, ut aiunt Thomistæ, at huiusmodi præmotionis necessitas gratis asseritur, ergo pariter gratis negatur lib. arb. indifferentia in conclusione asserta. Prob. min. Quia fundamenta illius esset subordinatio perfecta causa<sup>e</sup> creatæ, etiam libera<sup>e</sup> ad causam primam; sed talis subordinatio optimè, & nobilius haberi potest absque tali præmotione, nimirum per hoc, quod creatura, nil possit agere, nisi Deo

si Deo coagente; quod Deus possit pro libito omnem creaturæ actionem impedire; imò & omnem liberum consensum voluntatis, siuè suadendo, siuè permittendo obtinere; ergo non est necessaria ista præmotio; ac proinde, danda est lib. arb. indifferentia in sensu composito. Hoc enim modo meliùs, & facilius saluatur sanctitas Dei, & creata libertas; & Doct. Cathol. magis recedit ab Hæreticorum sententia, ac proinde fortius impugnantur eorum errores.

Prob. auctoritate Trid. sess. 6. cap. 5. ubi explicans concordiam libertatis cum gratia, docet hominem posse abijcere inspirationem, quâ ad iustificationem perducitur; & can. 4. definit, liberum arbitrium à Deo motum, & excitatum posse dissentire, si velit. Quæ verba abijcere, dissentire apertè indicant sensum compositum; nam abijcere est rem habitam dimittere, aut sibi oblatam respuere; dissentire pariter non est quomodocumquè non consentire, aut non consentire excitationi non existenti, sed excitationi de facto existenti non consentire, seu cum illa existente dissensum, aut non consensum coniungere, Quod etiam apertius tradit Concil. Senon. in Decreto fidei 15. dicens. *Non est tale Dei trahentis auxilium, cui resisti non possit.* Ut dictum est p. 1. disp. 8. q. 6. Accedit etiam, quod D. Thomas consonat Concilij in quol. 1. art. 7. ad 2. ubi sic habet. Proponitur hoc, quod virtus rationalis se habet ad opposita, ideo sic mouet Deus mentem humanam ad bonum, quod tamen potest huic motioni resistere; ergo gratis excogitatur à Thomistis sensus diuisus. Cæterum ratio Gonet. in 1. notabili allata parum fundata videtur. Siquidem nulla est contentio de actu, qui quando est, necessario est, ut supra indicauimus; sed dicimus, quod eo ipso, seu in eodem instanti, quò ponitur actus, posset non poni, seu poni actus oppositus; cum potentia in illo instanti sit libera libertate indifferentiæ, etiam positis omnibus requisitis ad agendum.

Arg. cont. concl. Inter prærequisita antecederet ad usum lib. arb. ut scilicet homo producat actum dilectionis, enumeratur absolutum, & efficax Dei decretum, quo statuit, ut lib. arb. producat talem actum, & auxilium efficax, quo in tempore præmouet voluntatem ad eundem actum, sed cum prædicto decreto, & auxilio efficaci non  
stat

stat simul, quod lib. arb. non producat illum actum dilectionis, aut eliciat actum odij in contrarium; ergo, positis omnibus requisitis ad producendum aliquem actum, non stat simul, quod lib. arb. non producat illum actum, aut eliciat actum contrarium. Resp. neg. partem mai. de præmotione physica prædeterminante, quia sic læderetur libertas voluntatis, cum sit necessitas antecedens, ac proinde impediens voluntatem, ne in actum oppositum exeat, vel actionem suspendat; ad min. neg. non stare simul cum decreto, & auxilio efficaci, quod lib. arb. non producat actum dilectionis, vel actum oppositum; Decretum enim Dei concurrente cum voluntate creata, & auxilium efficax non adimunt homini libertatem, ut ostenditur in 1. p. in disp. de Diuina Prouidentia, & prædestinatione.

Arg. 2. Vnum ex prærequisitis, ut Deus operetur ad extra est æternum decretum de illo opere v. g. de creatione Mundi: sed posito tali Decreto, Deus non potest non agere in sensu composito, idest non potest componere suum decretum de creatione Mundi cum non creatione illius; & tamen Deus liberrimè creauit mundum; ergo non est necessarium ad saluandam libertatem, quod positis omnibus natura, & causalitate ad agendum prærequisitis, possit quis non agere in sensu composito. Resp. conc. mai. & etiam min. quia cum Deus sit immutabilis, posito decreto æterno de re producenda in tempore, non potest non producere illam; potuit tamen in illo priori, quo intelligimus Deum adhuc non posuisse huiusmodi decretum, ad quod liberè se determinauit.

Cæterum hæc ratio non militat de decreto à Deo posito, concurrenti, scilicet ad actus nostræ voluntatis; quia huiusmodi decretum est accomodatum nostro lib. arb. seu nostris voluntatibus, quæ continentur eminenter in diuina voluntate, imò si hæc ratio valeret, sequeretur quod non esset in nostra potestate agere, vel non agere, vel agere oppositum, quod etiam est supra improbatum.



## DISPUTATIO II.

## QUESTIO I.

*Vtrum gratia rectè diuidatur in gratiam gratis datam.  
& in gratiam gratum facientem.*

**N**OT. 1. Quòd gratia iuxta sensum magis usitatum, scilicet Scrip. & SS. PP. & Theologorum loquendi modum significat beneficium, quod gratis, & sine debito datur; quò sensu dixit Apost. ad Rom. 11. *Si gratia iam non ex operibus; alioquin gratia non est gratia* Quarè cum beneficia, seu dona gratis data sint triplicis generis; ita triplex est gratiæ acceptio, & significatio. Prima lata, & impropria, quæ comprehendit quodcumque beneficium à Deo nobis collatum, siue ad naturam pertineat, siue supra naturam sit; & in hoc sensu PP. Synod. 6. 11. in Epist. ad Sophronium Angelorum immortalitatem, estò illis connaturallem, gratiam appellant, sic pariter rerum creatio, & conseruatio gratia vocari possunt. 2. acceptio gratiæ est magis propria, quæ comprehendit tantum dona aliqua naturalia omninò indebita, quale in statu naturæ integræ fuit donum integritatis; sicut etiam à quibusdam Doctoribus numerantur auxilia quædam intra ordinem naturæ specialia, quæ homini lapso ad aliqua opera difficilia, & heroica ordinis naturalis exercenda donantur. 3. demum est acceptio gratiæ propria, quæ significat solum dona, & beneficia supra totum naturæ debitum, nobis per merita Christi exhibita in ordine ad nostram salutem, & gloriam, & hæc est propriè theologica, de qua præcipuè agendum est in hoc tractatu.

NOT. 2. Quòd gratia tertio modo accepta diuiditur in gratiam increatam, & creatam; increata est donum aliquod increatum concessum hominibus, quod vel Deus ipse est, vel persona diuina, vel aliqua perfectio Dei, quæ speciali modo creaturæ rationali communicatur; sic in iustificatione Deus dat seipsum; sic pariter in incarnatione. Gratia creata est omne donum creatum gratis datum homini in ordine ad beatitudinem; hæc autem subdividitur in

gratiam internam, & externam. Prima est, quæ hominem interius afficit, siue per modum permanentis, ut gratia habitualis, siue per modum transeuntis, ut gratia actualis. 2. est, quæ hominem interius non afficit, sed solum mouet sensus, ut prædicatio Euangelij, miracula &c. sine gratia interna externa nihil prodest, quicquid reclament Pelag.

Not. 3. Quod gratia gratis data accepta non genericè, prout est idem, ac donum gratis concessum; sed specificè, prout opponitur gratiæ gratum facienti (& pro tunc speciei relinquitur nomen generis defectu vocabulorum) est donum supernaturale sine debito collatum particulariter ad salutem aliorum; dicitur donum supernaturale ratione modi, & finis, estò sit aliquod naturale in entitate, ut patet de dono linguarum, & interpretatione sermonum, quæ sunt entitates merè naturales, ordinantur tamen ad finem supernaturalem. Gratia autem gratum faciens, de qua hic propriè agendum est, est illa, quæ vel proximè, vel remotè ordinatur ad salutem propriam, de qua in sequenti quæst. erit clarior explicatio.

Concl. Gratia interna rectè, & adèquatè diuiditur in gratiam gratis datam, & in gratiam gratum faciètem. Prob. Tot sunt gratiæ, quot sunt dona, quæ hominibus dantur, ut ad Deum perueniant; sed duplex donum homini confertur, alterum ad salutem propriam spectans, alterum ad salutem aliorum, ergo diuiditur rectè gratia interna in gratiam gratis datam, & in gratiam gratum facientem.

Arg. contra. Illa membra diuisionis non habent inter se oppositionem, quia possunt esse in eodem homine, ergo non est bona diuisio, patet consequ. quia omnis bona diuisio datur per membra opposita. Resp. dist. ant. ex natura rei, & ex parte subiecti in quò ponuntur, conc. ant. ad quem ordinant hominem, neg. ant. patet distinctio ex dictis.

Contra. Fides, spes, & auxilia actualia non pertinent ad gratiam gratis datam, quia sunt ad salutem propriam, neque ad gratiam gratum facientem, quia reperiri possunt in homine peccatore, ergo &c. Resp. dist. ant. non spectant ad gratiam facientem gratum formaliter, & primariò conc. reductiuè, & secundariò neg. ant.

Arg. 2. Prædestinatio, quæ dicitur fons, & origo gratiæ, non est gratia gratum faciens, neque gratia data, ergo &c. Resp.

Resp. dist. ant. Si prædestinatio sumatur pro effectibus, quos continet, nego, quia sic reducitur ad utramque gratiam, cum omnes gratiæ dentur propter executionem prædestinationis hominis; si verò sumatur pro actu diuinæ voluntatis; & sic conc. in hoc enim sensu prædestinatio est gratia increata; quod si sumatur pro actu diuinæ voluntatis terminato ad prædestinatos; tunc includitur in utraque gratia, tanquàm causa in effectū.

Quæres. Quotuplex est gratia gratis data.

Resp. D. Paulus 1. ad Corint. 12. nouem species gratiæ gratis datæ enumerat dicens. *Per spiritum alij datur sermo sapientia, alij sermo scientia, alteri fides. Alij gratia sanitatum, alij operatio virtutum, alij Presetia, alij discretio spirituum. alij genera linguarum, alij interpretatio sermonum*; cuius diuisionis sufficientiam sic ostendit D. Thom. Gratia gratis data conferatur homini, ut consulat alterius saluti, ad hoc autem tria requiruntur: 1. cognitio rerum diuinarum, alioquin non esset idoneus ad alios instruendos: 2. ut possit confirmare ea, quæ dixit, alias eius doctrina esset inefficax: 3. ut ea, quæ scit, & intelligit, conuenienter possit auditoribus proferre. Quare ad hoc ut hæc tria idoneè præstentur, nouem species gratiæ gratis datæ desiderantur.

Ad. 1. tria requiruntur; primo ut contineat prima principia cognitionis rerum diuinarum, & hoc fit per fidem: 2. ut nobiliores effectus, seu altiores conclusiones ex illis principijs deductas possideat; & hoc spectat ad sapientiam: 3. ut inferiores effectus illius supremæ causæ cognoscat, quæ cognitione mediante, Auditores suos ducat ad primi principij notitiam, & hoc fit per scientiam.

Ad 2. idest ad confirmationem suæ doctrinæ, seu rerum, quæ reuelantur, requiritur ut Euangelicus Doct. faciat opera quæ naturalem virtutem superent, & ista opera sunt quatuor. Aliquando enim reddit sanitatem corpori; & sic est gratia sanitatum. Aliquando facit ea miracula, quæ ostendunt diuinam potentiam; ut quod Sol stet &c. & sic habetur operatio virtutum. Aliquando futura secreta reuelat; & hoc fit per Prophetiam. Aliquando tandem secreta cordium scrutatur, ut sciat qua intentione loquuntur homines; & sic est discretio spirituum.

Ad. 3. duo sunt necessaria 1. vt Doct. loquatur idioma-



te, quò intelligi possit, & ob id dantur genera linguarum: 2. ut ea quę sunt reuelata in scriptura proferat, & explicet eo sensu, quo dicta sunt à Prophetis, & Euangelistis, & ad hoc datur interpretatio sermonum. Itaque ex illis tribus capitibus nouenarius numerus colligitur gratiarum gratis datarum; quarum definitiones. ex superiori doctrina, eruuntur. Sermo sapientiæ est facilitas diuinitus data explicandi altiora fidei mysteria. Sermo scientiæ est facilitas diuinitus data explicandi res fidei, & morum. Fides est excellens intelligentia diuinitus data, atque certa fiducia impetrandi miracula; & sic de reliquis.

## QVÆSTIO II.

*Vtrum gratia gratum faciens rectè diuidatur in  
actualem, & habitualem.*

**N**Ot. Quod gratia actualis est auxilium transiens hominem interius excitans, aut eleuans ad benè operandum, ut oportet ad salutem; ex quà descriptione colligitur, quod tale auxilium non constitit formaliter in actibus indeliberatis intellectus, aut voluntatis, ut volunt plures ex Recentioribus; sed in quadam motione, vel qualitate transeunte à Deo impressa potentijs Animæ, ut eas eleuet, compleat, & constituat in actu primo sufficienti ad tales actus eliciendos. Gratia verò habitualis est donum Dei permanens, quò homo iustificatur, sanctificatur; sitque Deo acceptus, & amicus, de quà latè agetur post disputationem de gratia actuali.

Concl. Optima est supradicta diuisio. Prob. Illa est legitima diuisio, cuius membra diuidentia habent tres istas conditiones. Prima est, quod participant rationem genericam: 2. quod inter se distinguantur: 3. quod adæquantur diuisum; sed hæc diuisio sic se habet; nam primò participant rationem genericam, nempe gratiæ gratum facientis: 2. distinguuntur, vt patet: 3. diuidunt adæquatè; quia, nulla est gratia gratum faciens, quæ non sit, vel transiens, vel permanens.

Arg. Quod datur peccatoribus, nequit esse gratia gratum faciens; sed gratia actualis datur peccatoribus, ergo &c.

Resp.

Resp. dist. mai. Quod datur peccatoribus nequit esse gratia gratum faciens formaliter, & proximè conc. remotè, & concomitanter, neg. datur enim gratia actualis, ut mediante ipsa bonum operemur, & gratiam habitualement consequamur.

Contra Non. omnis gratia actualis est gratum faciens remotè, ergo nulla responsio. Prob. ant. Datur quædam gratia, quæ non ordinatur ad iustificationem, sed solum ad obseruantiam legis citra meritum vitæ æternæ, ergo &c.

Resp. neg. ant. ad probationem dicimus, quod licet à quibusdam Recentioribus admittatur quoddam auxilium actuale quod non ordinatur ad beatitudinem supernaturalem; attamen probabilius negatur huiusmodi auxilium speciale, etiam si non supernaturale ratione finis; nulla enim apparet ratio, quæ cogat ad id ponendum.

Quæres. Quotuplex est gratia actualis.

Resp. Quod gratia actualis diuidi solet à Theologis in, operantem, & cooperantem, in excitantem, & adiuuantem, in præuenientem, & consequentem, in concomitantem, & subsequenter; sed quia huiusmodi diuisiones nomine tantum differunt; nam ex una parte antecedens, præueniens, excitans, & operans pro eadem gratia sumuntur; & ex alia, consequens, adiuuans, & cooperans idem sonant; idè rectius procedemus, si unica tantum diuisione contenti erimus; videlicet, in gratiam excitantem, & in adiuuantem, quæ secundum diuersa munia diuersè nominantur; Vnde dicitur excitans, quatenus vel hominem peccatorem excitat, ut à peccato resurgat, vel iustum à bono opere cessantem adiuuat: iuxta illud Apoca. *Ego steti ad ostium & pulso; & ad Ephes. c. 5. Surge qui dormis, & exurge à mortuis & illuminabit te Christus*: Effectum huius gratiæ eleganter describi D. Aug. in lib. conf. ubi sic ait. *Vocasti, & clamaui, rupisti surditatem meam*. Dicitur antecedens, quatenus antecedit consensum nostrum; dicitur præueniens, quatenus præuenit prioritate temporis, vel naturæ bonum liberi arbitrij usum, seu consensum iuxta illud Psal. 58. *Miserericordia eius præueniet me*; dicitur operans, quia operatur in nobis sine nobis, idest liberè consentientibus; unde Apost. ad Corint. *Deus est qui operatur in nobis velle, & perficere*. & c. 15. *Non ego sed gratia Dei*; 2. dicitur adiuuans quatenus adiuuat

nostros conatus, dicitur consequens, quatenus, illos consequitur &c. dicitur cooperans quia nobiscum operatur, & facit ut quod voluerimus impleamus; Vnde D. Aug. *si velimus sine nobis operantur, cum autem volumus, & sic volumus, ut faciamus, nobiscum operantur.*

### QVÆSTIO III.

*Vtrum gratia excitans rectè diuidatur in sufficientem, & efficacem, & an ab inuicem distinguantur ex natura rei.*

**N**OT. Quòd gratia sufficiens, seu inefficax est auxilium diuinum, quò sufficienter homo excitatur ad bonum faciendum, & ad malum fugiendum, estò de facto non operetur, & potest dici sufficiens, ut notat Herincx dupliciter, remotè, scilicet, & proximè. Tunc proximè est sufficiens, quando ex parte gratiæ nulla virtus deest ad opus ipsum exercendum; tunc verò remotè est sufficiens, quando non potest quidem homo sine nouis, aut maioribus viribus opus facere; per illam tamen potest præstare aliquid, quo acquirat vires superiores ad opus necessarias.

Not. 2. Quòd non semper quælibet gratia sufficit se sola ad opus ultimatè intentum, ad quod præparat; sufficit tamen semper ad aliquod opus bonum, aut effectum bonum, aut saltem deliberatam complacentiam eliciendam. Alioquin potius ad legem, vel doctrinam, quam ad gratiam, propriè dictam esset referenda; nam Spiritus S. operatur intrinsecus, ut valeat aliquid medicina, quæ adhibetur extrinsecus, ut ait D. Aug. 15. de ciuit. c. 6. Vnde non datur gratia Christi, quæ sit insufficiens; si autem voluntas oblata gratia rectè utatur; tunc Deus illam inuabit amplius usquè ad opus, ad quod ab initio gratia eam præparabat. Non enim miseretur Deus, & primò deserit. Si vero voluntas gratiam neglexerit, tunc Deus ob eius demeritum cessat ulterius eam excitare.

Not. 3. Quòd gratia efficax est illa, quæ non solum dat posse operari, ut sufficiens, sed dat infallibiliter operari, quia ita mouet, ut reuerà consentiamus; & licet dissensus sit possibilis, tamen nunquam in actu ponitur. De utraque  
gra-

gratia, nempe sufficienti, & efficaci meminit S. Scrip. & quidem de sufficienti habetur 2. ad Corint. 13. *Sufficit igitur gratia mea*; & ad Philip. 4. *Omnia possum in eo, qui me confortat*. De efficaci Ezech. c. 26. *Spiritum meum ponam in medio vestri, & faciam, ut in preceptis meis ambuletis*, & Paul. ad Philip. 2. *Deus est qui operatur in nobis velle, & perficere*.

Not. 4. Quod sicut à Theologis homo consideratur diuersimodè in statu innocentiae, & in statu naturae lapsae; ita diuerso modo loquuntur de gratia, & eius effectibus; nam gratia, quam Deus dedit Adæ in statu innocentiae dicitur gratia sanitatis, qua potuisset obseruare mandata Dei, & dicitur sanitatis, quia collata homini sano. Gratia verò quæ datur homini lapsò dicitur medicinalis, & dicitur medicinalis, quia datur homini ægrotanti ob passionem concupiscentiæ. Differunt autem inter se istæ duæ gratiæ, non quia, ut ait Calvinus in antidoto Concil. Trid. sess. 6. art. 5. gratiæ sanitatis potuerint liber. arbitr. resistere; & gratiæ medicinali nemo unquam resistere valet, hæc enim differentia est hæretica: sed differunt primò, quia gratia medicinalis est abundantior iuxta illud Io. c. 10. *Ego veni, ut vitam habeant, & abundantius habeant*. & alibi: *Vbi abundauit delictum* &c. 2. quia gratia sanitatis conferebatur ut homo sanctitatem, & innocentiam conseruaret bene agendo; gratia verò medicinalis datur, ut homo à lege carnis oppressus concupiscentiæ moderare possit appetitum, 3. quod gratia quædam medicinalis, idest efficax dat non solum posse, sed etiam operari; gratia verò sanitatis solam potentiam non vero effectum conferebat, his prælibatis sit.

I. Concl. Rectè diuiditur gratia excitans in sufficientem, & efficacem. Prob. omnis gratia, quæ mouet hominem, vel ita mouet, ut gratiæ consentiat, & tunc est efficax; vel ita mouet ut illi homo resistat, estò acquiescere posset, & cum illa operari, & tunc est sufficiens; ergo optima est diuisio. Quicquid latret Calvinus lib. 2. Inst. it. c. 3. §. 10. alijque hæretici recentiores existimantes, omnem veram gratiam Christi, seu medicinalem esse efficacem; adeo ut tollat liberi arbitrii indifferentiam, ac proinde necessitet, & rapiat ad consensum; quibus adhæsit etiam Iansenius ut obseruant Theologi Recentiores.

II. Concl. Gratia sufficiens, & efficax non distinguuntur

neque realiter, neque formaliter intrinsecè, sed extrinsecè tantum. Hæc est Recenriorum Scotistarum iuxta mentem Scoti. Prob. breuiter, & clarè. Quæcunque distinguuntur vel realiter, vel formaliter, distinguuntur per aliquod intrinsecum, quod est in uno, & non in alio; sed nihil intrinsecum est in gratia efficaci, quin sit in sufficienti, ergo intrinsecè non differunt, sed solum penes diuersas habitudines extrinsecas, quas habent, vel non habent ad consensum, ita quod illa dicatur efficax, quæ consensum obtinet; & illa sufficiens, quæ non habet consensum.

Confirmatur. Gratia excitans potest æqualiter illustrare, & excitare duos homines in æquali dispositione constitutos, idest eodem modo passionibus, & tentationibus affectos, & tunc æqualis gratia utrique datur saltem in ratione entitatis; & tamen unus operatur, & alter non; sed hoc non prouenit à gratia, sed à lib. arb. hominis, qui gratiam negligit, & cooperando non efficit efficacem, ergo gratia sufficiens, & efficax ex natura rei non distinguuntur, sed solum ex parte liberi arbitrij cooperantis; & non eoperantis. Confirm. hæc doctrina S. Scrip. auct. & signanter Matth. 11, ubi sic habetur. *Vae tibi Corozain, vae tibi Bethsaida, quia si in Tiro, & Synodo facta fuissent virtutes, quæ olim operata sunt in te, cum cinere, & cilicio egissent penitentiam.* Quibus verbis Christus ostendit, quod easdem gratias, quas fecerat Corozain, Bethsaidæ, si tecisset Tiro, & Sydoni, eorum habitatores se ad penitentiam conuertissent; ergo de duobus habentibus æqualem gratiam, potest fieri, quod unus conuertatur, & alius non. Immo fieri potest, quod aliquando conuertantur illi, qui minorem habent gratiam, & non conuertantur qui maiorem habent gratiam; quod patet Matth. 12. Vbi Christus Iudæos reprehendens dicit. *Viri Niniuita surgent in iudicio cum generatione ista, & condemnabunt eam, quia penitentiam egerunt in predicatione ionæ: sed Ionæ prædicatio fuit minor gratia in Niniuitis, quam in Iudæis, qui habuerunt maxima, & multa Dei auxilia; ergo Niniuiti cum minori gratia conuersi sunt, & Iudæi nequaquam ergo &c.* Similiter de Iuda videtur probabile accepisse maiores gratias pluribus prædestinatis. Denique pro certo habetur aliquos superiores Angelos cedidisse, minores vero perseverasse in gratia, & gratia fuit maior in superioribus,

bus, ut dictum fuit in tractatu de Angelis, ergo &c.

Arg. cont. 2. concl. Qui consentit vocationi recipit à Deo maiorem gratiam: ergo falsò supponitur, quod detur auxilium æquale, dum unus consentit, alter non, quia gratia respectu unius est tantum sufficiens, respectu verò alterius est efficax, quæ est maior. Resp. dist. ant. in ratione doni, quia reuerà habet effectum conc. ant. in ratione entitatis, neg. antecedens.

Dices. Ergo conuersio nostra repetenda est à nostro libero arbitrio, cont. D. Paulum dicentem. Quis te discernit? quid habes, quod non accepisti? &c. Resp. dist. conf. est à libero arbitrio se solo, neg. conf. à lib. arb. excitato per gratiam, & adiuto per cooperantem, conc. conf.

#### QVÆSTIO IV.

##### *In quo consistat efficacia Gratiæ.*

**N**Ot. Quod præter ea, quæ hætenus dicta sunt, ulteriùs considerari potest gratia in actu primo, & in actu secundo. Tunc dicitur in actu primo, quatenus potest habere suum effectum, & sic habet à Deo; Tunc dicitur in actu secundo, quatenus suum effectum, obtinet; de quâ efficacia sumpta in actu secundo, variæ sunt opiniones. Nam alij volunt efficacem gratiæ consistere in aliquo influxu reali, qui reperitur in gratia efficaci, & non in insufficienti, quia ita physicè prædeterminat voluntatem ut illo posito, non possit voluntas non agere, ita Thomistæ. Alij arbitrantur consistere in quadam prædeterminatione morali; quæ in hoc consistit, quod tanta sit gratia, ut, licet voluntas absolutè, & physicè illi possit resistere, numquam, tamen resistit, ac proinde inuoluit effectum infallibiliter, non quidem physicè, quia non infert illum necessariò, sed moraliter. Alij putant consistere in quadam congruitate ipsius cum voluntate humana; ita quod illa gratia sit efficax, quam Deus præuidet esse talem, & dari tali modo, tali tempore, ut reuerà voluntas consentiat. Alij deniquè sentiunt gratiam reddi efficacem per cooperationem voluntatis humanæ adiutæ gratia secunda, quæ vocatur cooperans.



I. Concl. Efficacitas gratiæ non consistit in influxu physico prædeterminante voluntatem physicè. Hæc videtur conformis doctrinæ Scoti, & nostræ scholæ, ut supra indicauimus; est tamen contra Thomistas. Prob. concl. Voluntas humana, posito tali influxu reali prædeterminante, adhuc remanet indifferens ad consentiendum, & non consentiendum, vel non habet amplius illam indifferentiam. Si remanet indifferens, non determinatur physicè, eò quia per physicam prædeterminationem ita mouetur voluntas, ut non posset resistere, aliàs non esset physica prædeterminatio, quæ ita determinat ad unum, ut in aliud declinare non possit. Si non remanet indifferens, ergo non maneret libera libertate morali, quæ requiritur ad meritum ut supra ostensum est, ergo efficacitas gratiæ non consistit in prædeterminatione physica, quia voluntas necessitaretur, ac proindè læderetur eius liberitas &c. & quamuis hæc opinio post decretum Xisti V. & Clementis VIII. à nemine censura notari possit, attamen multis displicet.

II. Concl. Neque consistit efficacitas gratiæ in prædeterminatione morali, nec in congruitate eius cum voluntate. Prob. utraque pars eadem ratione. Quia in hoc sensu ut gratia redderetur efficax, requireretur, quod esset tanta, ut moraliter voluntas non posset illam repudiare. Vel ut esset ita conformis voluntati, & loco, & tempore, ut infallibiliter haberet suum effectum; sed hæc videntur absurda, ergo &c. Prob. min. Quia ex primo sequeretur, quod voluntas non esset libera moraliter, cum stante tali prædeterminatione non posset negare suum consensum, quod est contra Concil. Trid. Tum quia ex secundo, & pariter ex primo sequeretur, quod illa gratia non esset sufficiens propriè, quæ non haberet hæc omnia sibi adiuncta; idest si non esset moraliter prædeterminans, aut si non haberet illam congruitatem; unde cum hoc non detur omnibus; sequeretur quod non omnes haberent gratiam sufficientem; si illa determinatio, & congruitas, quæ à solo Deo dependet, illis deesset.

Confirmatur. Quia si ex prædeterminatione morali sequeretur efficacitas gratiæ illi, qui haberent maiorem gratiam semper agerent, & qui minorem haberent, non agerent; sed hoc est falsum, ut patet ex dictis, ergo &c. Tum  
quia

quia illi peccatores possent conqueri de Deo, quod non dedisset illis tales gratias prædeterminantes, & congruas, ergo &c.

III. Concl. Efficacitas gratiæ in actu secundo pendet à cooperatione nostræ voluntatis. Hæc videtur Scot. & nostræ Scholæ, eamquæ docent Frassen in tract. de gratia, & Boyuin, nec non Herincx ibidem; & est conformis Concil. Araus. & Trident. sess. 6. can. 4. ubi definitur esse in potestate liberi arbitrij consentire, vel dissentire vocationi: ergo consensus, seu cooperatio nostri liberi arbitrij reddit gratiam efficacem. Vnde D. Paulus monet, ne in vacuum gratiam Dei recipiamus, ergo monet, ut demus efficaciam gratiæ; sicut dissensu, & negligentia in respondendo gratiæ, facimuseam inefficacem.

Arg. 1. cont. 1. concl. Prædeterminatio physica voluntatis non necessitat ipsam voluntatem ad sic, vel sic operandum; ergo admittenda est ista efficacitas in prædeterminatione physica. Prob. ant. necessitas conditionata non tollit libertatem, ut patet in homine currente; supposito namque quod currat, necessariò currit; ergo ob istam necessitatem non est dicendum, efficaciam gratiæ non posse consistere in prædeterminatione physica nostræ voluntatis. Resp. neg. ant. ad prob. disting. ant. quando conditio à nobis dependet, ut in homine currente, conc. ant. quando autem est independens à nostra voluntate, neg. ant. In proposito nostro talis conditio non dependet à voluntate creata, sed à diuino decreto, quod nequit ab ea impediti, quin sequatur talis morio.

Cont. necessitas in sensu composito non est impossibilis cum nostra libertate, ut patet in prædestinato, qui liberè saluatur, licet in sensu composito necessariò saluetur, idest quatenus prædestinatus est: ergo &c.

Resp. ut supra dist. ant. Necessitas in sensu composito non tollit libertatem, quando id, quod componitur cum libertate dependet ab illa, ut in prædestinato, cuius prædestinatio ex dictis in quæst. de prædest. pendet à voluntate cooperante prædestinati, saltem præuisa, & sic conc. quando autem conditio, quæ ponitur cum voluntate non pendet ab illa, ut in proposito ubi gratia prædeterminans non est in potestate nostra, & sic nego.

Cæterum si dicat; ergo si prædestinatio fieret sine præuisione meritorum, tunc necessitas in sensu composito staret cum libertate; sed talis modus prædestinandi docetur etiam à Scoto, ergo necessitas in sensu composito &c. Resp. etiam si demus prædestinationem fieri absque præuisione meritorum, non componi necessitatem in sensu composito secundum sensum Thomisticum, quia Deus non prædeterminat prædeterminatione physica nostras voluntates, ut latè ostensum fuit in superiori quæstione.

Contra. Vel Deus prædeterminat voluntatem, vel expectat illam; secundum est contra Concil. Araus. 2. can. 4. *Si quis contendit Deum expectare voluntatem, ut purgemur à peccato, non autem facere, ut volumus conuerſi, resistit Spiritui S. dicenti. Præparatur voluntas à Domino*; ergo admittendum est primum. Resp. conc. Deum non expectare voluntatem nostram, sed potius anticipat, & præuenit per inspirationes, suppositis autem inspirationibus, seu gratia præueniente expectat aliquo modo cōsensum voluntatis, ut cooperetur gratiæ iuxta illud. *Ego ſto, & pulſo ad ostium ſi quis aperuerit, &c.*

Arg. cont. 2. concl. Aug. vocat gratiam efficacem altam, eximiam, secretam inæſtimabilem, & infallibiliter suum effectum operantem; ergo saltem moraliter voluntatem prædeterminat. Resp. neg. conf. licet enim Deus aliquando concedat gratias quibusdam personis, ut latroni, Paulo, Magdalena &c. ita fortes, & eximias, ut subito consentiant, & non possint non consentire, nisi cum maxima difficultate, tamen non tollunt absolutè libertatem moralem, sicut nec graues tentationes, quādo urgent, maximè in hominibus deprauatis, non tollunt libertatem, quin voluntas possit resistere; aliàs non diceret Trid. sess. 6. can. 4. *Si quis dixerit liber. arb. motum non posse dissentire ſi velit, Anathema ſit.* Nec dicant quidam, hominem conseruare semper libertatem physicam resistendi, licet non habeat amplius moralem; talis enim responsio videtur contradicere Concilio loquenti de potentia morali, cum agat in materia iustificationis contra Caluinum asserentem gratiam necessitare liberum arbitrium, estò fateretur voluntatem habere semper potentiam physicam, ut resisteret.

Arg. cont. 3. concl. Talis gratiæ efficacitas tribuenda est Deo; ergo malè tribuitur voluntati.

Resp.

Resp. dist. ant. principaliter conc. quia deriuatur ab eius gratia; minus principaliter etiam à nobis, quatenus nostro libero arbitrio gratiæ cooperamur, neg.

Dices. Ergo liberum arbitrium aliquam efficaciam tribuit gratiæ. Resp. neg. conf. estò enim insuat in opus; nihil tamen tribuit gratiæ; sicut nec approximatio aliquid tribuit igni in ratione actiuitatis; nec sumptio in efficaciam medicinæ; nequè est inconueniens, quod gratia quoad effectum pendeat à lib. arbitrio, ut pluries explicauimus, cum Deus instituerit negotium salutis nostræ, ut possimus illud, gratia adiuuante, vel non; nequè ex hoc sequitur salutem esse in nostra potestate, quia non sumus certi, de consensu dando gratiæ ob conditionem nostræ naturæ corruptæ, & ob tentationes &c.

Quæres 1. An concursus Dei tanquam causæ primæ quatenus est debitus principio supernaturali, v.g. habitui infuso pertineat quoque ad ordinem gratiæ.

Resp. Herincx cum nostro Doctissimo Vega affirmatiuè. Quia præstatur à Deo, tanquam gratiæ Auctore. Neque tollit ab ipso rationem gratiæ, eò quod sit conaturaliter debitus ipsi principio supernaturali ex gratia collato; imò à Theologis gratia pro gratia dicitur.

Quæres 2. An gratiæ gratis datæ sint permanenter in hominibus iustis. Resp. quod aliquæ sunt in illis permanenter, & per modum habitus, ut de ijs utuntur ad arbitrium, & quando volunt, ut fides, sapientia, & scientia. Aliæ verò se habent in illis per modum motionis, seu impressionis actualis, quibus pro libito uti possunt, sed solum quando à Deo mouentur, ut Prophætia, & donum miraculorum; ab hac tamen regula excipiendum est Christus, in quo omnes gratiæ gratis datæ fuerunt perfectò modo, ac proinde permanenter, ut communiter docent Theologi.

Cæterum placet hic ponere quasdam propositiones Iansenii, quas sum. Pontifex Innocentius X. damnauit, quia sicut in superioribus questionibus de aliquibus egimus; ita in sequentibus occurret occasio de illis disserendi.

Prima est. Aliqua præcepta Dei hominibus iustis volentibus, & conantibus secundum præsentia, quas habent vires, sunt impossibilia; deest quoque illis gratia qua possibilia fiant: 2. Interiori gratiæ in statu naturæ lapsæ nunquam

restituitur : 3. Ad merendum , & demerendum in statu naturæ lapsæ non requiritur in homine libertas à necessitate , sed sufficit libertas à coactione . 4. Semipelagiani admittebant præuenientis gratiæ interioris necessitatem ad singulos actus , etiam ad initium fidei , & in hoc erant hæretici , quod vellent eam gratiam talem esse , cui posset humana voluntas resistere , vel obtemperare : 5. Semipelagianum est , dicere Christum pro omnibus omnino hominibus mortuum esse , aut sanguinem fudisse . Quæ quidem postrema propositio damnata est tanquam hæretica intellecta in hoc sensu , ut notat noster Herincx , nempe , quod Christus pro salute prædestinatorum tantum sanguinem fuderit .

Quoniam verò postquam Pontifex damnauerat enarratas propositiones tanquam hæreticas , quidam conabantur defendere Iansenium dicendo , non illas in hoc sensu docuisse ; ideoquæ S. Sedes per aliam Bullam declarauit , eas non solum contineri in libro Iansenij , sed etiam damnari in sensu ab Auctore intento ; quantum scilicet sensum præferant verba in libro eiusdem Iansenij expressa , attento contextu , & circumstantijs .

### DISPUTATIO III.

#### *De necessitate Gratia .*

#### QVÆSTIO I.

#### *Vtrum homo sine gratia cognoscere valeat verum naturale .*

**N**ot. 1. quod plures errores seminauit Pelagius heresiarcha , natione Brito , professione Monachus contra doctrinam Catholicam de gratia Diuina . Primò , docuit , hominem viribus naturæ posse velle , & facere bonum sufficiens ad vitam æternam . Secundò cum cogere ex Sac. Scrip. aliquantulo agnoscere gratiam Dei , ipsam agnouit , sed nomine gratiæ naturam intellexit , quam gratiam vocabat , quia gratis à Deo datur : 3. cum præmeretur à Patribus eiusdem Scrip. testimonijs admisit aliam Dei gratiam , sed externam , consistentem in doctrina legis : 4. cum

cogeretur præter naturam atque legem, aliam Christi gratiam fateri, eam admisit tanquam necessariam ad redimenda peccata, non verò ad ipsa vitanda: 5. cum adhuc urgeretur agnoscere gratiam Christi, quæ adiuuetur homo ad non peccandum, tandem admisit reuerà, sed voluit illam esse externam in exemplo Christi constitutam; ita apud Aug. lib. de gratia, & lib. arb. c. 2. & alibi: 6. denique coactus admisit gratiam internam, quæ dabatur à Deo homini, se volebat eam esse solummodo utilem, non verò necessariam ad salutem. Ex quibus omnibus patet, quomodo Pelagius diuersis his modis loquendi, tenuit hominem posse simpliciter facere bonum ad vitam æternam perducens absque speciali auxilio Spirit. Sancti: ita ex Herinex.

Not. 2. quod sicut triplex est verum, ita triplex est cognitio veri. Prima est naturalis notitia, siue sit mechanica, ut cognitio artium; siue sit theoretica, ut cognitio scientiarum, idest de ijs, quæ ex primis principijs per euidentem consequentiam possunt deduci, & ex sensibilibus cognosci: 2. est cognitio veri moralis, ut cognitio quæ quis scit virtutem esse bonam, esse amandam, & vitium fugiendum in communi; aut in particulari, ut eleemosynam esse hic, & nunc largiendam, & intemperantiam vitandam: 3. est notitia veri supernaturalis, ut articulorum fidei, de quâ in sequenti quæstione; hic autem quærimus de vero naturali tantum, quia etiam de morali agetur inferius.

Not. 3. Quod in hac quæstione sunt tres opiniones. Prima est Henrici de Gandauo; quam refert, & rejicit Scot. in p. d. 3. q. 4. opinantis, nos nullam sinceram, & certam notitiam ullius veritatis naturalis assequi posse sine speciali illustratione, cuius ratione adducentur, & soluentur in in parte argumentatiua. Eandem sententiam ex parte videtur instaurasse Vasquez disp. 188. c. 2. ubi arbitratur notitiam cuiuscumque veritatis naturalis mouentis affectum ad rectè viuendum non posse haberi sine auxilio gratiæ per Christum, secus autem de ea, quæ ad virtutem non mouet; idest posse quidem haberi sine ulla gratia Christi, non tamen sine aliquo auxilio gratiæ Dei. II. Opinio est Durandi in 2. dist. 28. q. 1. cui adhæret etiam Caiet. contendentis intellectum hominis lapsi posse cum solo concursu generali agnoscere omne verum speculatiuum, non solum di-



diuifim, fed etiam coniunctim, feu collectiuè. III. Opinio est Theologorum utriusque Scholæ, nempe Thomistarum, & Scotistarum, exceptis quibusdam paucis, docentis hominem lapsum posse quidem cognoscere veritates naturales diuifim absque speciali auxilio, non verò coniunctim, iuxta quam sententiam sit.

Concl. Homo sine speciali auxilio Dei, sed solo concursu generali potest plures, immò singulas veritates naturales agnoscere, diuifue, non autem collectiuè. Prima pars est contra Vasquez, & Vincent. Contesonum Thomistarum. 5. diff. 2. cap. Prob. Quælibet creatura potest cum solo generali Dei concursu actus sibi connaturales, & proportionatos elicere; ut sol illuminare, ignis calefacere, &c. ergo pariter intellectus solo generali concursu potest agnoscere veritates naturales, quæ ex primis principijs per euidentem consequentiam possunt deduci, & ex sensibilibus cognosci; intellectus enim habet lumen naturale, quod est de se sufficiens ad aliqua intelligibilia; cognoscenda, ergo &c.

Confirmatur. Quia nihil deest intellectui, neque ex parte potentia, cum intellectus sit ex se completus ad cognoscendum; neque ex parte obiecti, quia obiecta naturalia, suam speciem producant, vel potentia obijciuntur, ut experientia docet. Prob. 2. pars, nempe quod singulas agnoscere possit. Maxima, & difficillima cognitio veritatum naturalium est illa, quæ habetur de Deo ex effectibus naturalibus, cum sit de obiecto immateriali, & à sensibus remotior sed in statu naturæ lapsæ potest Deus naturaliter ex creaturis ab homine cognosci, ut tradit D. Paulus ad Rom. 1. *Inuisibilia Dei, per ea quæ facta sunt intel. eia conspiciuntur*, & Sap. 13. *A magnitudine, potest & creatura cognoscibiliter potest horum Creator videri*; ergo à fortiori quæcumque alia veritas naturalis poterit naturaliter, & absque speciali auxilio Dei cognosci. Prob. 3. pars, nimirum, quod homo non valeat pro statu isto cognoscere omnes veritates naturales collectiuè cont. Caiet. putantem hominem posse eas agnoscere. Potentia infirma, & vulnerata nequit præstare totum id, quod facere potest potentia sana, & integra; sed attingere omne verum speculabile nedum diuifue, sed etiam collectiuè est actus potentia intellectiua sanæ, ergo

intellectus hominis naturæ lapsæ vulnere ignorantia affectus nequit, nisi sanetur per gratiam specialem, totam collectionem veritatum naturalium agnoscere. Confirm. voluntas propter vulnus malitiæ non potest omnia præcepta legis naturæ collectiue sumpta adimplere, ut infra patebit, ergo nec intellectus vulneratus ignorantia &c.

Prob. 2. Ad hoc ut potentia intellectiua, & sic pariter potentia volitiua, possit tendere in omne verum speculatiuum, non solum requiritur potentia physica, sed etiam moralis, & expedita, seu ab omnibus impedimentis libera; sed in homine lapsa, licet sit potentia physica ad totam collectionem veritatum ordinis naturalis, quia continentur sub eius adæquato objecto; non tamen potentia moralis, & expedita, cum in statu naturæ lapsæ plura sint impedimenta, quibus quasi ligatur, & impeditur, ne possit omnes veritates naturales collectiue attingere; qualia sunt breuitas vitæ, indispositio corporis, hebetudo sensuum, rebellio, & perturbatio passionem, sollicitudo frequens circa temporalia, & similia, quæ insinuari videntur verbis illis Sap. 9. *Corpus, quod corrumpitur, aggrauat animam, & terrena inhabitatio deprimit sensum multa cogitantem.*

Arg. cont. 1. part. concl. SS. Patres videntur asserere omnem nostram cognitionem descendere à Patre lumen, & omne verum quodcumque dicatur esse à Spiritu S. ergo nemo sine speciali Dei auxilio potest ullam veritatem attingere; patet ant. & præsertim ex illa forma orandi, quam studiis suis præmittere solebat D. Thomas. *Creator ineffabilis, qui verus fons luminis, & sapientia dicaris, infunde super intellectus mei tenebras radium tue claritatis, duplicem à me remouens priuationem, & tenebras, peccatum scilicet, & ignorantiam.*

Resp. 1. SS. Patres loqui de cognitione aliquo modo supernaturali, & ad salutem conducentem. Vel solum velle indicare scientiam, & cognitionem veritatum naturalium prouenire à Deo, ut Auctore naturæ, & per concursum generale. Resp. 2. ex D. Thoma q. 24. de veritate art. 14. ad arg. in hac quæst. art. 1. ad ubi sic ait. Ad primum dicendum, quod omne verum quodcumque dicatur est à Spiritu S. sicut infundente naturale lumen, & mouente ad intelligendum, & loquente veritatem non tamen sicut ab inabitante per gratiam. Cæterum quod attinet ad illam

orationem Sancti Thomæ, & aliorum PP. dicimus quod postulabant à Deo notitiam virtutum supernaturalium, vel remotionem impedimentorum, ad hoc ut clariùs, & faciliùs cognoscerent veritates naturales. Quæmadmodum enim oramus pro pluuia, & serenitate obtinenda, ita possumus orare pro afflictione, seu perfecta attingentia veri, etiam naturalis, quando illud habet aliquid fallibilitatis, & contingentie.

Contra. D. Aug. lib. 9. de Trinit. c. 8. habet, quod sincere veritates videntur in regulis æternis, & dicit illas veritates scriptas esse in libro lucis illius, qui veritas dicitur; sed hoc fieri nequit, nisi per speciale auxilium, quo attingere veritates sincere valeamus: ergo &c. Resp. Scotus loc. cit. explicando quatuor modis posse in regulis æternis videri sincere veritates; ad quem vos mitto, ne limites breuitatis transeam. Vnde breuiter resp. videntur in regulis æternis, hoc est, in suis Ideis, non quæ videntur in verbo, sed quæ participant ex Verbo; omnes enim Ideæ, quas habemus de veritatibus necessarijs, sunt participationes Idearum diuinarum.

Arg. 2. cont. 2. part. concl. Voluntas in statu naturæ lapsæ remansit impotens ad aliqua opera moraliter bona ordinis naturalis, ut infra ostendetur, nempe ad diligendum Deum, & ad superandam grauem tentationem, & ergo similiter intellectus ob ignorantie vulnus sine speciali auxilio nequit singulas veritates naturales agnoscere.

Resp. conc. ant. & neg. conf. Ratio disparitatis est, quia, etsi utraque potentia per peccatum originale remanserit vulnerata, non tamen eodem modo; nam intellectiua non fuit adeo vulnerata, ut non possit intelligere prima principia, & ex illis ad conclusiones agnoscendas procedere, sed solum in extrinsecis, nempe quia sensus externi fuerunt debilitati, vita abbreviata &c. at voluntas fuit vulnerata circa finem, qui est principium in operalibus, quatenus per peccatum originale remansit auersa à fine ultimo.

Arg. cont. 3. part. Vulnus ignorantie ex peccato originali proueniens non afficit intellectum speculatiuum, sed tantum practicum; ergo homo lapsus potest absque auxilio speciali omnes veritates speculatiuas collectivè sumptas agnoscere. Resp. neg. assumptum in ant. nam ut supra in-

nui-

nuimus, etiam intellectus speculatiuus remāsit vulneratus.

Contra. Non obstantibus impedimentis prædictis potest homo singulas veritates naturales agnoscere; ergo etiam omnes collectiue, cum à singulis enumeratis ad omnia simul ascendendo, valeat consequentia.

Resp. conc. ant. & neg. conf. ad rationem allatam, nempe arguēdo à singulis enumeratis, resp. valere quando conf. eodem modo sumitur ac ant. secus autem si diuerso modo, ut est in proposito; quia arguitur à sensu diuiso ad collectiuum, ac proinde non recte arguitur.

Dices. Intellectus ut potentia spiritalis quò plures veritates cognoscit, eò sit potentior ad intelligendum alias; ergo tandem poterit ad totam veritatum naturalium collectionem peruenire. Resp. dist. ant. potentia intellectiua, in seipsa considerata, conc. ant. ut subiacet impedimentis, seu moraliter, neg. ant.

## QVÆSTIO II.

*Vtrum homo sine auxilio speciali possit verum morale cognoscere.*

**N**Ot. Quòd hic non est sermo de vero morali tantum, in communi, nempe quod Deus sit colendus, parentes honorandi, & similia; nam hæc omnia facilitate eadem, qua cognoscitur verum naturale, cognoscuntur; sed quæstio procedit de vero morali in particulari, v. g. an quis scire possit naturaliter, se teneri Parentes colere pro tali tempore; tale bonum hic, & nunc esse faciendum, tale malum vitandum, eleemosynam esse huic pauperi elargiendam, & id genus similia. Hæc autem cognitio dicitur practica, & diuiditur in practicè practicam, & in practicam simpliciter, de qua diuisione egimus etiam in tractatu de actibus humanis disp. 1. q. 3. ac proinde superfluum est illam hic repetere.

Concl. Potest homo sine gratia speciali aliquas veritates morales cognoscere, licet in multis fallatur; ac proinde non omnes sine speciali auxilio. Hæc est communis. Prob. Constat apud Theologos, hominem naturalibus viribus posse cognoscere bonum morale in generali, idest prima-

prin-

principia doctrinæ moralis; ergo ex illis poterit naturaliter elicere conclusiones saltem principales; puta, alienum esse restituendum, alteri facere, quod nobis fieri volumus, & è contra; ergo &c. Ita Scot. in 3. d. 37. & in 4. d. 14. q. 3.

Confirmatur auct. Scrip. & SS. PP. siquidem ex Scrip. S. homini etiam gentili à natura inest quædam notitia naturalis veritatem practicarum dictans de honesto, ac turpi, quæ appellatur lex cordis; Videad Rom. c. 2. *Gentes, quæ legem non habent, naturaliter ea, quæ sunt legis faciunt, etusmodi legem non habentes ipsi sibi sunt lex, qui ostendunt opus legis scriptum in cordibus suis*; ut latè ostenditur in tract. de legibus. Hinc D. Aug. in psal. 56. ait. *Manus formatoris nostri in ipsis cordibus veritatem scripsit, quod tibi non vis fieri, alteri ne feceris*; ergo &c.

Prob. 2. pars. Etenim de omnibus agibilibus in particulari procedit illud Eccles. c. 1. *Cunctæ, res difficiles, non potest unus homo explicare sermone*. Quare PP. passim docent, antiquos Philosophos, etsi perspicacissimos, circa plura agibilia errasse ob defectum gratiæ actualis; ergo ad omnia agibilia in particulari est necessaria gratia actualis pro statu isto.

Arg. cont. 1. part. conc. Quælibet cognitio cuiuscunque veritatis ex Concil. Araus. est donum Dei; ita enim habet c. 22. *Fatendum est tam veritatem, quam iustitiam esse ab illo fonte, quem in heremofitire delamur*, & Milevit. can. 4. *Deus est qui docet hominem scientiam*; ergo ad agnoscendas veritates, tam speculativas, quam morales naturales est necessaria gratia Dei. Resp. Araus. solum velle, quod omnis veritas sit à Deo, ut fonte, quia ipse est Auctor naturæ, & suo generali concursu præstat quicquid opus est ad omnes effectus causarum secundarum; quod si contendatur Concil. loqui de speciali auxilio, dicendum loqui in ordine ad salutem æternam. Ad Milevit. pariter resp. loqui de Deo ut naturæ Auctore, qui sine dubio docet hominem scientiam, cum dicat D. Paulus. *Quid habes quod non accepisti?* Verùm melius est dicere præfata Concilia loqui de cognitione, scientia, & iustitia in ordine ad vitam æternam, ut supra innuimus; fundamentum autem huius responsionis est, quia Concilia agebant, ut benè notat Boyuin, in tract. de gratia cont. Pelag. dicentem, legem scriptam esse quidem donum gratiæ, eius verò observantiam, quæ ducit ad bea-

itudinem, posse habere sine gratia; ideoquē Concilia determinarunt hominem non posse &c.

Cont. Cuncta cogitatio hominis intenta est ad malum, ut habetur Gen. 6. ergo nulla est cognitio boni. Resp. dist. ut plurimum, conc. semper, nego, & in hoc sensu etiam dicitur omnis caro corruerat viam suam, & similia.

### QVÆSTIO III.

*Vtrum homo sine gratia possit cognoscere verum  
supernaturale.*

**N**Ot. 1. Quodd veritas aliqua dici potest supernaturalis triplici ratione, nempe ex parte obiecti, ex parte motiui assentiendi, & ex parte utriusquē simul. Primo modo dicitur supernaturalis, quando ex se transcendit captum naturalem intellectus, adeo ut non possit percipi, nisi ex diuina reuelatione; posita tamen reuelatione attingitur etiam ratione, & motiui naturali, ut contingit in hæreticis: 2. modo dicitur supernaturalis quando intellectus veritatem percipit, & illi assentitur per diuinam reuelationem: v. g. dum quis credit Isaac genuisse Iacob, quod ex parte obiecti est purè naturale. Tercio modo deniquē dicitur supernaturalis quando obiectum cognitum, & motiuum, quod cognoscitur, sunt supernaturalia; ut dum credimus Deum esse trinum, quia Christus hoc reuelauit.

Concl. Ad cognoscendas veritates supernaturales, & assentiendum mysterijs fidei non sufficit externa reuelatio, seu prædicatio; sed necessariò requiritur gratia interna non solum in intellectu, sed etiam in voluntate in ordine ad vitam æternam. Est de fide. Prob. concl. quoad 1. p. auct. S. Scrip. nam Ioan. 6. dicitur: *Nemo potest venire ad me (sub intellige credendo) nisi Pater, qui misit me, traxerit eum*; ac hæc tractio fit mediante auxilio speciali. D. Paul. ad Cor. 1. c. 4. ait: *Quid enim te discernit &c.* Si enim fides esset in nobis, ex nobis, quasi dicat Apost. quilibet fidelis dicere posset, fides mea, quam non ex gratia, sed ex me ipso habeo, me discernit. Item ad Ephes. 2. *Gratia salui facti estis per fidem, non ex nobis donum domini Dei est.*

Prob. auct. Conciliorum Arausic. can. 7. sic dogmatiz-



zat. *Si quis per natura vigerem aliquod bonum ad salutem perueniens, aut cogitare, aut eligere se posse confirmet absquē illuminatione Spirit. Sancti, heretico fallitur Spiritu. Et Trident. sess. 6. can. 3. Si quis dixerit, sine prouenienti Spirit. S. inspiratione posse hominem credere &c. sicut oportet anathema sit.*

Prob. etiam ratione. Assensus fidei, quo prædictis veritatibus assentimur, est supernaturalis; sed supernaturale est improporcionatum intellectui nostro, ac proinde non attingibile; ergo noster intellectus suis viribus naturalibus nequit elicere huiusmodi assensum, sed indiget eleuatione, & gratia intrinseca, seu interna ad illum eliciendum. Tum quia assensus mysterium fidei, ut oportet, est una ex dispositionibus requisitis ad iustificationem supernaturalem peccatoris; ergo debet esse quid supernaturale.

Prob. 2. pars de voluntate, nempe quod sicut ad initium fidei supernaturalis, hoc est ad primum, & supernaturalem actum exigitur diuinum auxilium; ita etiam ad pium credulitatis affectum, hoc est ad efficacem voluntatis affectum requiritur gratia actualis. Prob. etsi probationes primæ partis militent etiam in hac parte secunda, auctoritate Apost. ad Philip. 1. *Qui capis in vobis bonum opus (id est fidei) ipse perficit; & iterum. Nobis datum est per Christum non solum ut in eum credatis; ergo ad initium fidei necessaria est gratia actualis.* Prob. etiam de sola pia credulitate auct. Concil. Araus. loc. cit. sic definientis. *Si quis sicut augmentum, ita etiam initium, pium credulitatis affectum, non per gratia donum, id est, per inspirationem Spiritus Sancti, sed naturalem nobis inesse, dicat, Apostolicis dogmatibus aduersarius probatur.*

Prob. etiam ratione. Ad credendum ex motiuo supernaturali requiritur pia motio, seu affectio voluntatis, quæ efficaciter moueat, & determinet intellectum ad assentiendum veritatibus ipsis reuelatis: ergo etiam requiritur auxilium supernaturale ex parte voluntatis. Illa enim affectio pia voluntatis habet obiectum supernaturale, ac proinde indiget auxilio supernaturali.

Arg. 1. auct. D. August. dicentis in lib. de bono perseur. c. 14. dum agit de Syrijs, & Sidonijs, qui, uisis Christi miraculis, credidissent; sic. *Ex quo apparet habere quosdam ingenio diuinum naturaliter munus intelligentia, quo inducantur ad fidem, si congrua suis mentibus, vel audiant verba, vel signa conspiciant.*

Qui-

Quibus verbis docere videtur aliquos ex solo naturali lumine intelligentiæ absque ullo interiori dono gratiæ, quo præueniantur posse moueri ad fidem, & credere mysterijs reuelatis. Resp. D. Aug. loqui de motione ad fidem tantum obiectiua; unde dicere vult Aug. quosdam habere naturale munus intelligentiæ tale, quod eadem miracula, & eadem exterior prædicatio Euangelij sunt magis congrua naturali eorum ingenio, quam ingenio aliorum ad eos mouendos solum exterius, & obiectiue.

Dices ad Rom. ita scribit c. 7. Velle adiacet mihi perficere autem non inuenio. Resp. velle adiacet &c. viribus naturæ, neg. Dei adiutorio, conc.

Arg. ratione. Quidquid exigitur ab homine, est in eius potestate: sed quod est in hominis potestate, non est gratia propriè dicta, nec donum Dei præter naturæ debitum; ergo &c. mai. patet, quia aliàs frustra Deus à nobis exigeret aliquid, quod non esset in nostra potestate:

Resp. dist. mai. Vel per Dei gratiam, vel per naturam, conc. esse in potestate hominis; per naturam semper neg. mai.

#### QVÆSTIO IV.

*Vtrum homo sine gratia sanctificante, vel sine fide possit facere aliquod opus morale ordinis naturalis.*

**N**Ot. 1. Quod hæc quæstio proponi solet sub istis terminis: an opera infidelium, & existentium in peccato mortali sint bona moraliter, vel omnia sint peccata. In qua sunt plures opiniones. Prima est Lutheri in assert. art. 6. & Caluin. l. 2. instit. c. 3. de grat. & lib. arb. temerè assertentium hominem in natura lapsa, ne quidem cum gratia Dei, & auxilio speciali posse aliquid boni agere, & quantumcumque iustum, & sanctum non posse quidquam operari, quod peccatum non sit, non tamen fidelibus in Christum credentibus imputatur ad peccatum: & hæc est hæretica: 2. est Ioan. Hus dicentis ad quoduis honestatis opus esse necessariam gratiam habitualement, ac proinde omnia peccatoris opera esse peccata; quæ pariter est hæretica: 3. est Michael. Baij qui inter propositiones ab Ecclesia damnatas, hanc, quæ est 25. euomit: omnia opera infidelium sunt peccata, & Philoso-

phorum virtutes sunt vitia; cui videtur consentire Iansenius 24. est Greg. Arim. Vasq. & Vincent. Contefoni in theol. mentis, & cordis putantium gratiam quandam actua-lem auxiliantem esse necessariam: 5. denique est utriusque scholæ, nempe Scotist. ac Thomist. docentis ad id sufficere vires lib. arb. cum solo generali Dei concursu.

Not. 2. Quodd certum est de fide contra Pelagianos, & Semipelagianos, non posse hominem lapsum absque gratiæ auxilio quidquam cogitare, velle, & facere, quod conducat ad vitam æternam, ut S. Scrip. apertè docet in Psal. 36. *A domino grassus hominis durigentu*. Sap. 8. *Sciui quoniam aliter non possum esse continens, nisi Deus det*, & Corint. 12. *Nemo potest dicere Domino Iesu nisi in Spiritu S.* Idem constat ex definitionibus Concil. Araus. can. 7. *Si quis dixerit sine prauersantis Spiritus S. operatione &c* & idem Concil. can. 1. & 2. Accedit etiam ratio, quia cum vita æterna sit quid supernaturale excedens omnem vim creaturæ naturæ, & creabilis exigentiam, media ei proportionata debent esse supernaturalia, ac proindè vires naturæ excedentia.

I. Concl. Ad opus morale ordinis naturalis producendum non requiritur gratia sanctificans. Est Scot. 3. d. 36. q. 20. & in Report. d. 28. q. un. & videtur esse de fide; quia colligitur manifestè ex Trid. sess. 6. can. 7. ubi anathema dicitur, ei qui dixerit, omnia opera, quæ ante iustificationem fiunt, verè esse peccata; & can. 8. damnantur ij, qui dixerint, metum gehennæ esse malum. Imò quidam Doctores pronunciant conclusionem esse de fide, ac proindè hæreticum est dicere, omnia peccatoris opera esse peccata.

Prob. 1. Etenim Scrip. S. inuitat peccatores, ut orent, se-juent, & ad conuersionem se præparent, sed, si hæc omnia, elicitæ, & facta à peccatoribus essent peccata, sequeretur, quod Ecclesia ad peccata inuitaret, quod est hæreticum, ergo, & ant. Tum quia Concil. Trid. sess. 6. can. 7. sic dogmatizat. *Si quis dixerit, omnia opera, quæ ante iustificationem fiunt, quacumque ratione facta sint, esse peccata, anathema sit*:

Prob. ratione. Absentia iustificationis non facit, quin opera fidei, spei, Religionis &c. sint consona rectæ rationi; ergo absentia gratiæ sanctificantis non operatur, quod non sint bona moraliter; id enim est planè ridiculum: inquit Herinex.

Confirm. Quia alioquin peccaret, qui peccatorem ad se conuertendum induceret; imò ipse Spiritus malè ageret, quod est impium dicere, ad hoc excitando; quia excitaret ad actus peccaminosos iuxta errorem damnatū Ioan. Hus.

II. Concl. Ad eliciendum opus honestum, & moraliter bonum non requiritur fides: est communis utrique Scholæ contra Baium, eamque docent Scot. in 3. dist. 30. q. un. & in 2. d. 28. q. un. D. Bonau. Richar. & alij.

Prob. 1. ex S. Scrip. quæ narrat varijs in locis opera infidelium fuisse à Deo remunerata; ut exod. 1. Deus remunerasse obstetrices Ægyptias ob beneficium ab eis præstitum Israelitis, & ædificasse illis domos. Et Ezech. 29. Nabucdonosor dicitur, sui operis mercedem recepisse à Deo. Ex quò inquit D. Hieron. *Intelligimus etiam ethnicos, si quid operis boni fecerint, non absque mercede Dei iudicio prateriri*, & D. Aug. lib. 5. de Ciuit. Dei c. 15. asserit: *Deum dedisse Romanis amplum imperium, ut eorum virtutes in hac vita remunerationem aliquam haberent*. Resp. Iansenius his, & similibus testimonijs solum probari dari in Infidelibus aliqua opera bona ex officio, & obiecto, non autem ex parte finis.

At contra: Scrip. & PP. loc. cit. testantur aliqua infidelium opera à Deo remunerata; sed si illa fuissent bona ex obiecto, & mala ex parte finis, seu mala ex intentione agentis, non fuissent à Deo remunerata, cum huiusmodi opera, non mercedem, sed pœnam mereantur, ergo &c. Quare meritò Sedes Apost. in Bulla Pij V. damnauit hanc propositionem. *Cum Pelagio sentit, qui boni aliquid naturalis; idest quod ex solis viribus natura ortum ducit, agnoscat*: Et aliam videlicet. *Liber. arbit. sine adiutorio gratia Dei, non nisi ad peccandum valet*.

III. Concl. Homo sine gratia strictè sumpta, imò sine auxilio speciali ordinis naturalis, potest solo concursu generali Dei facere aliqua opera moraliter bona. Est Scoti, & Scotistarum, & videtur communis. Prob. 1. auct. Trid. sess. 6. can. 1. *Si quis dixerit, hominem suis operibus, quæ vel per humana natura vires, vel per legis doctrinam sunt absque diuina per Iesum Christum gratia posse iustificari coram Deo, anath. sit*. Quibus verbis Concil. apertè supponit, per vires naturæ absque Iesu Christi gratia effici posse aliqua opera moraliter bona; sed hoc intelligi nequit de operibus bonis solum.

ex officio, vel ex obiecto, & malis ex fine, & intentione operantis; ergo Concil. supponit per naturæ vires possè fieri aliqua opera bona non *ex obiecto tantum, quæ sunt peccata, cum sint mala ex intentione*. Hæretici autem non erant ità stolidi, & amentes, ut dicerent per illa hominem iustificari, alioquin affirmassent peccata peccatis deleri; asserabant igitur hoc de operibus moraliter bonis, tam ex obiecto, quam ex fine, & intentione operantis: ac proinde Concilium supponit opera moraliter bona per vires naturæ fieri posse, & ita docent PP. & signanter D. Aug. in lib. de Spiritu, & littera c. 27. dicens: *Infideles à iqua bona opera fecisse; nam inquit, quæ secundum iustitiæ regulam merito, rectèque laudamus*; & quidem per naturæ vires, seu lib. arb. absquè ulla gratia. Nec valet responsio Vasquez SS. PP. loqui de bono morali, seu naturali, nempè de ijs, quæ fiunt propter commoditatem naturæ, vel ad gubernationem eternam, nempè ædificare domos, plantare vineas &c. non valet, inquam, quia, ut supra ostensum fuit ex eodem August. loquuntur de operibus moraliter bonis, de quibus remunerationem infideles à Deo in hac vita receperunt.

Prob. ratione. Homo in statu innocentie poterat viribus naturæ operari omne bonum morale suæ naturæ proportionatum; ergo in statu naturæ lapsæ aliquod opus moraliter bonum facere potest; quia propensio lib. arb. ad bonum honestum non est totaliter extincta, sed debilitata, & infirmata ex Concil. Trid. sess. 6. can. 5.

Arg. 1. cont. 1. concl. In Prouerb. c. 5. dicitur: *Victima impiorum Deo abominabiles*; & Isai. 1. *Ne offeratis ultra sacrificium frustra, incensum abominatio est mihi. Kalendas vestras, & sollemnitates vestras &c* ex quibus verbis infertur, sacrificia impiorum Deo displicere; ergo à fortiori opera, quæ sunt indifferentia. Resp. S. Scrip. loquitur de illis operibus, quæ exigunt in sui productione gratiam sanctificantem; ut susceptio Eucharistiæ; non verò de operibus moraliter bonis, quæ cum non tendant ad Dei reconciliationem, sed ad solam honestatem finis naturalis, non exigunt gratiam sanctificantem.

Arg. 2. ex Psalm. 13. *Omnes declinauerunt, & inutiles facti sunt*. Item *Arbor mala non potest bonos fructus facere*; ergo peccator nequit efficere opus moraliter bonum. Resp. ad 1. Inu-

Inutiles esse ad opera meritoria gloriæ. Vnde dicit D. Aug. omnes indigent gratia Dei; non tamen sunt inutiles ad opera moralia. Ad 2. resp. arbor mala in genere meriti, & in ordine ad vitam æternam conc. in genere moris, nego.

Arg. 3. ex D. Paulo ad Titum. *Omnia munda mundis, coinquinatis autem, & infidelibus nihil est mundum, sed coinquinata sunt eorum mens, & conscientia*: ergo &c. Resp. Apost. non loqui de operibus infidelium, sed de cibis mundis, & imundis secundum legem. Quasi dicat hominibus iustis, & fidelibus nullus est cibus immundus post abrogatam legem; sed tantum Iudæis, & infidelibus, qui nolunt credere Christum, omnes cibi sunt immundi, quia mala conscientia manducant, existimantes se teneri legi &c.

Arg. 4. ratione. Ad moralem bonitatem actus humani exigitur, quod in Deum referatur; sed ad Deum nequit referri nisi per gratiam habitualement, & per charitatem: ergo &c. Resp. neg. assumptum in mai. Nam ad bonitatem moralem actus humani sufficit, quod ipse actus ex natura sua, siue ex obiecto ordinetur in Deum, ut luminis naturalis, & boni honesti Auctorem, & sicut bonum particulare in bonum uniuersale, & quod eliciens talem actum non impediat huiusmodi ordinationem, ordinando illum ad aliquem finem prauum, vel alia circumstantia vitiosa deturpando: eo enim ipso quod non impeditur relatio, quam ex sui natura importat ad Deum, refertur ad illum.

Arg. 1. cont. 2. concl. Nullum potest dari opus bonum sine intentione recta; sed non potest dari intentio recta sine fide: ergo &c. min. prob. quia fides est veluti mentis oculus, qui intentionem dirigit; dicente D. Aug. *Nemo computat sua bona ante fidem*, & concludit: *Intentiones fides dirigit*.

Resp. neg. min. ad prob. dicitur, quod D. Aug. intelligendus est de operibus bonis ordinis supernaturalis, non verò ordinis naturalis, qualia sunt opera moralia, quæ etiam ante fidem illa supponit, ut indicat per illa verba. *Nemo bona sua* &c.

Contra. D. Aug. lib. 4. cont. Julian. videtur docere, quod fides ad omne opus bonum exigitur: ergo sine fide nullum opus bonum potest ab homine fieri, patet ant. nam infert omnia opera infidelium esse peccata, & virtutes Philosophorum non esse veras virtutes, sed vitia. Resp. bre-



uiter cum nostro Herinex. D. Aug. solum velle, quod nulla sint bona meritoria. Deinde quod ordinariè sunt vitiosa ex fine, ut satis patet ex contextu, & exemplis, quæ allegat, & ex alijs locis eiusdem, ubi clarè asserit oppositum, signanter lib. de spiritu, & litt. c. 27. Quarè Iansenius, qui nimis sic arguendo confidit in testimonijs D. Aug. deberet illa interpretari ad mentem ipsius Doctoris, & non eum trahere in suam prauam intelligentiam.

Contra. Idolatra habet pro suo ultimo fine idolum: ergo idolatra omnia facit propter idolum, ac proinde omnia eius opera sunt peccata. Resp. neg. ant. Non enim omnia opera idolatræ procedunt ex intentione expressa, vel implicita placendi idolo, ut patet, quando dat eleemosynam, nihil cogitans de idolo, sed solum ex pietate erga pauperem; & quando tribuit alteri, quod suum est ratione iustitiæ.

Arg. iterum ex D. Aug. lib. 9. de Trinit. c. 7. ubi ait. Quicquid ab homine fit, fit aut charitate, aut cupiditate, at cupiditas est vitiosa: ergo &c. Resp. Aug. intelligit ut plurimum, non verò semper. Vel resp. dist. ant. aut charitate humana, aut charitate diuina. Vnde si non fit ab infideli; & peccatore charitate diuina, fit tamen charitate humana, ut patet de eleemosyna &c.

## QVÆSTIO V.

*Vtrum homo solis viribus naturæ possit obseruare præcepta legis naturæ.*

**N**Ot. 1. Quòd præcepta legis naturæ obseruari possunt dupliciter, vel quoad substantiam, vel quo ad modum. Tunc dicuntur præcepta moralia (& idem dicendum est de alijs) seruari quoad substantiam, quando scilicet homo fidelis facit rem præceptam, ut si det eleemosynam, diligat Parentes; & prohibita vitet, ut non occidat, non fornicetur &c. Tunc verò dicuntur obseruari quoad modum, quando actus præcepti, vel prohibiti ex lege naturali exercentur, vel vitantur propter finem supernaturalem, vel ex motiuo supernaturali charitatis id est secundum mentem legislatoris, & in ordine ad vitam æternam.

Not.

Not.2. Quòd potentia hominis ad bonum morale est duplex, nempe physica, & moralis; physica attenditur penes naturæ potentiam, quæ quantum est ex se nata est facere aliquid, non habita ratione de circumstantijs extrinsecis, quæ possunt illud reddere difficile, aut impossibile. Potentia verò moralis est ea, quæ non solum respicit obiectum, & potentiam, sed etiam circumstantias loci, temporis, tentationis, & aliorum, quæ in exercitio boni operis possunt impedimentum afferre. Si spectetur potentia physica, homo non est impotentior in natura lapsa ad actus virtutum naturalium, quam in natura integra: secus si spectetur potentia moralis, cum circumstantijs extrinsecis, quæ reperiuntur in agendo sit igitur.

I. Concl. Homo in statu naturæ lapsæ per solius naturæ vires potest physicè obseruare omnia legis naturæ præcepta quoad substantiam; moraliter verò nequit omnia collectiue ad implere, sed aliqua tantum quoad substantiam, non quoad modum. Est Scoti D. Thom. Prob. ex hæctenus dictis. Potest homo operari secundum naturæ potentiam, & naturam obiecti; sed præceptum legis naturæ est proportionatum potentiæ naturali in se considerata; voluntas enim humana habet potentiam physicam sufficientem ad fugiendum, & ad prosequendum, quæ lumen naturale ei proponit facienda, & fugienda, ergo naturaliter, spectata potentia physica, homo potest omnia legis naturalis præcepta seruare. Prob. 2. pars ex D. Paulo ad Rom. 7. *Video in membris meis aliam legem repugnantem legi mentis meæ &c.* & idem tradunt Conc. Carteg. 11. Mileuit. & alia. Ratio est: quia moraliter impotentes sumus ad id, quod est laboriosum, & perdifficile, sed in statu naturæ lapsæ est homini valde laboriosum, & difficile seruare omnia præcepta collectiue; ergo nequit in statu naturæ lapsæ &c. minor est manifesta, nam homo pro slato isto agitatur innumeris tentationibus, exterioribus, & interioribus, tum concupiscentiæ, tum Dæmonis, adeout moraliter sit homini impossibile, etiam breui tempore seruare omnia præcepta; sicut nequit facere omne opus morale.

Prob. 3. pars. Eo quia aliquando possunt occurrere aliqua præcepta naturæ, quæ ita sint facilia, ut homo sine gratia ea seruare valeat, & rectè seruet; maxime si non

agitetur graui tentatione; & sit homo non adhuc vitijs deditus. Prob. etiam hæc concl. iisdem rationibus, quibus ostensum fuit, hominem posse viribus naturæ cum solo generali concursu facere aliquod bonum morale (dico aliquod, non verò omnia sigillatim) quia non possumus vincere omnem tentationem, ut infra videbimus, quæ in obseruatione omnium præceptorum occurrere possunt, iuxta illud Sap. 8. *Scius, quoniam aliter non possem esse continens, nisi Deus det.*

II. Concl. Homo in statu naturæ lapsæ nequit sine gratia habituali, seu sanctificante obseruare totam legem naturæ. Hæc est communis utriquæ Scholæ. Prob. impossibile est esse benè ordinatum circa media, qualia sunt præcepta, & non circa finem, idest Deum, quia media propter finem eliguntur, sed sine gratia sanctificante nullus homo pro statu isto est benè ordinatus in Deum ultimum finem, ergo sine gratia habituali nullus homo lapsus potest obseruare omnia mandata naturalia. Confirm. Sub lege naturæ comprehenditur præceptum diligendi Deum super omnia tanquam naturæ auctorem; at hoc impleri nequit sine gratia, ut paulo infra videbimus ergo nec tota lex naturalis.

III. Concl. Homo lapsus ad totius legis naturæ obseruantiam præter gratiam habitualement, necessariò indiget auxilio speciali Dei, seu gratia actuali. Prob. I. pars. Impotentia moralis ad totius legem obseruantiam in homine lapso, & in peccato mortali existente, non solum prouenit ex defectu subiectionis mentis ad Deum, ut finem ultimum, sed etiam ex rebellionem, & pugna appetitus inferioris contra rationem: sed gratia habitualis estò mentem Deo subijciat, rebellionem tamen appetitus inferioris contra superiorem non tollit, immò eam ad pugnam, & meritum in nobis reliquit, ut docet Trid. sess. 5. in Decret. de peccato originali; & experientia satis ostendit; ergo in homine lapso ad totius legis naturæ obseruantiam, præter gratiam habitualement, necessariò requiritur gratia actualis.

Arg. I. cont. I. concl. In Deut. c. 30. habetur. *Mandatum hoc, quod ego præcipio tibi hodie, non est supra te, neque præcul positum, nec in caelo situm.* Quibus verbis indicari videtur, obseruantiam legis, quam nomine Dei intimabat Moyses Populo hebræo, non esse supra naturales vires: ergo &c.

Resp.

Resp. dist. & simul explicando auctorit. Mandatum hoc non est supra te adiutum gratia diuina, conc. ant. supra te operantem ex solis viribus naturæ, neg. ant. Id sanè significare voluit Moyſes Populo hebræo.

Arg. 2. Ad Rom. 2. dicitur. *Gentes, quæ legem non habent, naturaliter quæ legis sunt faciunt*; ergo Gentiles ex solis viribus naturalibus legem naturalem obseruabant. Resp. 1. ex D. Aug. lib. 4. cont. Iulian. cap. 3. & ex D. Thoma in comment. super hunc locum; illa verba Apost. possè intelligi de gentibus ad fidem conuersis, & operantibus per naturam, gratia reformatam. Resp. 2. ex Orig. Chrysost. Hieron. & Ambrosio. Quod equè benè verba Apost. intelligi possunt de gentibus non dum ad fidem conuersis; Vnde dicere voluit Apost. Gentiles naturaliter idest solo lumine naturali, viribus naturæ in aliquibus benè operari, & aliqua legis naturalis præcepta obseruare; licet totam præceptorum naturalium collectionem, totamque naturæ legem adimplere non possent sine auxilio diuinæ gratiæ.

Contra. Præcepta legis naturæ collectiue sumpt, cum sint naturalia, non excedunt vires naturæ; ergo ad illa obseruanda non est necessaria Diuina gratia. Resp. dist. ant. non excedunt vires naturæ sanæ, & integræ, conc. ant. infirmæ, & corruptæ, neg. ant. Rep. 2. non excedunt naturam etiam corruptam physicè conc. moraliter neg. ant. quæ distinctio patet ex dictis.

Contra. Homo in statu naturæ lapsæ potest singula præcepta legis naturæ, sine speciali gratia obseruare; sed qui potest singula præcepta, potest etiam, & totam collectionem; ergo homo in statu naturæ lapsæ potest obseruare omnia præcepta naturalia absque diuina gratia. Resp. 1. neg. mai. homo enim lapsus requirit sine gratia obseruare primum, & maximum mandatorum Dei, ut infra dicetur, sine diuina gratia, nempe de dilectione Dei, ut auctoris naturæ. Resp. 2. data mai. neg. min. cuius falsitas patebit ex dicendis infra, cum de venialibus agatur. De qua difficultate aliquid dictum fuit etiam in quæst. de cognitione veritatum naturalium.

Arg. 1. cont. 2. concl. Habitus non est necessarius nisi ad actus sibi proprios, v. g. temperantia, ad actus temperantiæ. Iustitia ad actus iustitiæ &c. sed gratia habitualis est

tantum necessaria ad actus supernaturales, & meritorios; ergo non est necessaria ad actus virtutis naturalis.

Resp. dist. mai. non est necessaria per se, & influendo conc. mai. per accidens, & remouendo impedimentum, nego mai. estò enim temperantia influat tantum in actus temperantiæ; per accidens tamen concurrit, ut actus iustitiæ exerceatur; nimirum impediendo, ne homo per voluptates corporis diuertatur à iure reddendo unicuique; &c. sic gratia propter influxum in actus meritorios est necessaria per accidens, quatenus Deus iustificato intuitu ipsius gratiæ dat gratias actuales. Tum quia ut dictum fuit in tract. de Sacram. in genere, gratia habitualis penitentiae e. g. exigit quodammodo gratiam sacramentalem, quæ consistit in gratia actuali, qua resistitur peccato.

Cont. Si homo sine gratia habituali non posset obseruare totam legem naturæ, teneretur quilibet Christianus conteri, & confiteri quamprimum peccata mortalia; sed hoc est contra communem sententiam Theologorum, ergo &c. Sequela maioris probatur, eò quia teneretur quilibet sub peccato mortali vitare occasionem peccati mortalis; at remanere in tali statu, ut non possit non peccare contra legem naturæ, est remanere in occasione peccandi mortaliter, quam vitare tenemur; ergo &c. Resp. neg. sequelam mai. ad prob. dist. min. occasionem proximam teneretur quis vitare conc. remotam, neg. Talis autem occasio in nostro proposito non est proxima, quia licet homo in peccato existens nequeat toto tempore vitæ suæ seruare legem naturæ, potest tamen pro aliquo tempore, saltem adiutus auxilio actuali, nec non superare graues tentationes; & sic non manet in proxima occasione peccandi, quæ tunc est, quando quis moraliter loquendo, vel semper, vel plerumque peccat mortaliter, ut docent Theologi, de qua p. 4. t. 3.

Cont. Si gratia habitualis requiratur ad obseruationem legis naturalis, ergo nullus infidelis poterit legem naturæ obseruare, sed hoc videtur absurdum; ergo &c. Resp. dist. sequelam mai. Quamdiù infidelis manserit in infidelitate conc. si autem studeat transire ad veram fidem, nego. Nullus enim est infidelis, cui desint media, quibus cessare possit ab infidelitate, ut alibi dicitur:

Arg. 1. cont. 3. concl. ex canone Concil. Mileuit. *Gratia Dei,*

*Dei, quâ iustificamur per Dominum nostrum Christum, non ad solam remissionem peccatorum commissorum valet, sed insuper est adiutorium, ut non committantur, ergo præter gratiam habitualement, non est necessaria gratia actualis. Resp. Quod ex dictis paulò superius constat quid sit respondendum. Dicendum ergo, quod Concil. nil aliud intendit docere, nisi quod etiam gratia habitualis aliquid præstat ad observantiam legis; & maximè, quia in ea fundantur gratiæ actuales sacramentales, ut supra indicatum fuit. Itaque Concil. loquitur de gratia habituali, quæ velut principalis trahit ad se minus principale, seu accessorium, idest gratiam actualement. Ex hæcenus dictis evidenter inferitur, quam temerè, & impiè asseverauerint hæretici, Deum impossibilia præcipere, in quò errore etiam Iansenius se inuoluit, ut patet ex eius prima propositione damnata. Quarè ne cogamur novam quæstionem instituere contra hæreticos, & Iansenium, dicimus de fide esse; Deum nihil impossibile præcipere, imò omnia eius præcepta esse possibilia homini, vel proximè, vel remotè, idest mediante gratia sufficiente, quam nemini Deus denegat, ut infra ostendetur. Quod si illa gratia non sit tanta, ut cum illa vinci possint omnes difficultates, quæ in præceptorum observatione aliquando occurrunt; tamen semper talis est, ut per eam petere maiorem possimus, & impetrare, vel eleemosynis, vel orationibus, vel ieiunijs, & ut unico verbo omnia complectar, eliciendo aliquod bonum. Hæc autem veritas catholica clarè traditur in S. Scrip. ut Deut. 30. *Mandatum, quod ego &c.* Matth. 11. *Iugum enim meum suave est, & onus meum leue*; ergo iugum præceptorum Dei non est impossibile, aliàs non esset suaue, sed durum. Ioan. præcepta eius graua non sunt; & Paul. ad Corint. c. 20. *Fidelis est Deus, qui non patietur vos tentari supra id, quod potestis, sed faciet etiam cum tentatione prouentum, ut possitis sustinere*. Vbi Apost. non loquitur solis prædestinatis, ut malè abutitur Scrip. Iansenius; sed & omnibus fidelibus, qui erant Corinthi, quorum plurimi erant contentiosi, rixantes, & vino indulgentes; ac proinde non obseruabant omnia mandata legis ut patet ex c. 11.*

Traditur insuper eadem veritas à Concilijs, & signanter à Senonensi, quod primum contra Lutherum celebratum fuit, in sua præfatione referente hanc propositionem, quæ



Lutheri est. *Qui negat Deum ad impossibilia hominem obligasse, malè agit, & qui dicit hoc falsum esse, pessimè facit, contra quam definiuit, illam damnando.* Et Trid. sess. 6. c. 11. *Nemo temerè illa, & à Patribus probata voce utatur. Dei præcepta hominibus iustificato ad obseruanda esse impossibilia.* Et subdit: *Deus impossibilia non iubet, sed iubendo monet, & facere quod possis, & perere quod non possis, & dat, ut possis, idem habet can. 18. & sess. 6. can. 6. Si quis dixerit non esse in hominis potestate vias suas malas facere anathema sit.* Cui damnationi subiiciuntur Iansenistæ, quia in eadem prorsus opinione versantur.

Neque respondeat Iansenius, se differre ab illis hæreticis, eo quia intelligebant, mala opera esse in potestate hominis; ipse verò dicat lib. 8. de gratia Christi c. 24. *Malè facere, esse in potestate peccantium; nam hæc responsio est elusoria, quia ut notat Boyuin sexcentis in locis explicat, quomodo peccatum sit in potestate hominis; non quod homo sit dominus eius, ut illud vitare semper possit; sed quia ad illud non cogitur, licet necessiteretur; ex qua falsa doctrina constat, idem sentire cum Caluino, licet Iansenius diuersis verbis utatur ad euitandam hæreticorum damnationem. Denique eandem veritatem docent unanimi consensu SS. PP. atque Theologi Catholici.*

## QVÆSTIO VI.

*Vtrum homo solis viribus naturæ diligere possit  
Deum super omnia.*

**N**OT. I. Quòd sicut duplex distingui potest Religio, altera ordinis naturalis, cui præfulget lumen rationis, & qua Deus colitur ut auctor naturæ per actus eiusdem ordinis, altera supernaturalis, cui præfulget lumen fidei, & qua Deus colitur ut auctor gratiæ per actus fidei, spei, & charitatis, & virtutum moralium infusarum; ita etiam duplex est dilectio Dei sumpta, non pro naturali propensione in finem ultimum, seu in bonum, quo maius excogitari non possit, sed pro dilectione elicita, seu voluntaria; prior est naturalis, & ex genere suo acquisita, quæ per lumen rationis regulatur, & ad Deum ut auctorem naturæ terminatur; posterior supernaturalis, & per se infusa, quæ regu-  
la-

latur per lumen fidei, & qua Deus ut auctor gratiæ, & gloriæ à nobis diligitur; hanc non posse ab homine elici ex proprijs viribus, & sine auxilio gratiæ de fide habetur definitum in Trident. sess. 6. can. 3. sed de altera controuersia est inter Theologos.

Not. 2. Quòd amor Dei naturalis duplex esse potest; unus beneuolentiæ, quo quis Deum propter ipsum Deum diligit; etsi à Deo redametur, vocatur amor amicitiae. Alius concupiscentiæ, quo creatura diligit Deum, ut bene sit ipsi creaturæ. Rursus amor concupiscentiæ duplex est, alius licitus, quo Deum amamus, ut ultimum finem nobis conuenientem; alter illicitus, & vitiosus, quo amamus Deum tanquam medium ad obtinenda ut ultimum finem, bona temporalia. Insuper amor Dei vel est perfectus, vel imperfectus. Imperfectus est ille, quo Deus diligitur, non tamen super omnia, nec omnibus rebus actualiter præferatur. Perfectus verò est ille, quo Deus diligitur super omnia; & iste adhuc duplex est, nempe affectiuus, seu inefficax, & effectiuus, seu efficax. Primus est propositum nostræ voluntatis statuentis Deum diligere super omnia, si daretur occasio: 2. est executio illius propositi videlicet, cum voluntas Deum rebus omnibus anteponit; & hic amor includit obseruantiam omnium mandatorum Dei.

Not. 3. Quòd amor Dei super omnia potest intelligi tripliciter; nempe intensiuè, & est quando summo voluntatis conatu, & actu intensionis diligitur Deus. 2. extensiuè; idest dum diutius durat talis amor; 3. æstimatiuè, seu appetitiuè, & est quando Deus ita diligitur, ut pluris æstimetur Deus, quam cætera bona omnia, siue fiat comparatio cum bonis creatis in particulari; siue diligatur absolute tanquam infinitum bonum, & omnibus præstantius.

I. Concl. Homo etiam lapsus viribus naturæ cum generali concursu Dei potest amare Deum, ut auctorem naturæ amore imperfecto, tum concupiscentiæ, tum beneuolentiæ, quocum stare potest peccatum mortale. Hæc est Alenf. Bonau. Richard. Scoti, & Scotistarum Recent. contra Michaelen Baium, qui in propositione 34. damnata à Pio V. & Gregor. XIII. sic ait. *Distinctio illa duplicis amoris, quo Deus amatur, ut auctor natura, & amoris gratuiti, quo amatur, ut benefactor, vana est, & commentitia ad illudendum Scrip-*

*tura & Patribus. Prob. concl. ex D. Paulo ad Rom. ubi ait. Gentiles esse inexcusabiles, quod cum Deum cognovissent, non tanquam Deum glorificaverunt; idest laudaverunt, & amauerunt. Prob. 2. auct. SS. Concil. Milevit. can. 4. Arausic. can. 25. Trident. sess. 6. can. 3. docentium, Deum sine gratia non posse diligi; prout oportet, ad salutem, ergo si non prout oportet, saltem amore naturali imperfecto. Eandem doctrinam tradunt SS. PP. & signanter D. August. contra Julian. lib. 4. cap. 3.*

Prob. ratione. Naturalis ratio ostendit, Deum esse bonum summum, & infinitum, ergo voluntas saltem actu imperfecto potest naturaliter in eius dilectionem exire.

Confirmatur, eo quia in huiusmodi amore eliciendo non experitur specialis difficultas, cum non excludat efficacem affectum erga creaturas, neque peccaminosum, ergo &c.

II. Concl. Homo lapsus nequit viribus lib. arb. & cum solo generali concursu diligere Deum ut naturæ auctorem super omnia dilectione efficaci: Hæc est Alens. D. Bonau. Richard. & Scoti, licet non solum à Thomistis, & signanter à Gonet, sed etiam à quibusdam Scotistis ei adscribatur sententia conclusioni opposita. Prob. 1. auct. Concil. Arausic. can. 25. *Provisus donum Dei est diligere Deum; & Trident. sess. 6. & cap. 6. docet: Hominem à Deo motum, & excitatum, atque eodem adiuvente, incipere diligere Deum; ergo nequit homo &c.*

Prob. auct. D. Aug. lib. de gratia, & lib. arb. cap. 16. dicentis; *Si non ex Deo, sed ex hominibus est dilectio Dei, & proximi vicerunt Pelagiani: Si autem ex Deo, vicimus Pelagianos.* Prob. ratione, Perfectus amor amicitiae Dei, maxime ut finis supernaturalis, præferet omnium præceptorum observantiam; nam diligens Deum super omnia habet efficacem voluntatem implendi quicquid iubet Deus iuxta illud Apost. ad Rom. c. 13, *Plenitudo legis est dilectio*; sed observatio omnium præceptorum nequit haberi sine gratia actuali Dei, ergo neque amor perfectus amicitiae Dei.

Præterea. Amor perfectus amicitiae Dei super omnia appetitativè est opus omnibus excellentius, ac proinde valde arduum, quia cum eo pugnat natura corrupta, voluntas ad malum procliva, appetitus sensitivus circa sensibilia, & delectabilia; quæ sunt impossibilia cum perfecto Dei amore ex viribus naturæ elicto; ergo ad hoc ut vo-

luntas difficultates præfatas superare valeat, indiget necessarîo gratia Dei ad ipsum super omnia diligendum.

Arg. cont. 1. concl. Scrip. non meminit alterius amoris, quàm illius, qui elicitur à charitate, ergo non debemus admittere amorem naturalem. Resp. neg. conf. & ratio est quia finis scripturæ est tantum accendere in cordibus nostris amorem, qui ad salutem æternam ducit.

Arg. intellectus agnoscere potest viribus naturæ Deum esse summum bonum; ergo voluntas potest viribus naturæ illum diligere super omnia; voluntas namquæ potest habere suos actus circa quodlibet obiectum ab intellectu ei ostensum. Confirm. auct. Scoti docentis in 3. d. 27. q. un. & dist. 26. q. un. hominem posse ex puris naturalibus diligere Deum super omnia, & idem videtur docere quol. 17. & in 2. Reportat. dist. 28. Resp. neg. conf. & ratio est, quia voluntas est magis vitiosa ad appetitum boni, quam intellectus ad cognitionem veri; peccatum namquæ à voluntate commissum, & appetitus rebellio est contra voluntatem magis, quàm contra intellectum. Quare plura intellectus dictare potest, quæ nequit voluntas se sola, & cum solo generali concursu operari; dictat siquidem omnia præcepta esse seruanda, & tamen non potest viribus naturæ obseruare, ut paulò superius ostensum est.

Ad confirm. dicendum quod Scot. loquitur de potentia physica, non verò de potentia morali; nam spectando potentiam intellectiuam dictantem, Deum esse diligendum super omnia potest, ut Scot. loquitur signanter in 3. d. 27. Vel intelligi de amore imperfecto, & inefficaci &c. Vel resp. cum aliquibus Scotistis, Scot. tantum velle, quod voluntas hominis possit absquæ gratia habituali, non verò absquæ actuali diligere obiectum summum, & infinitum, quale est Deus. Vndè ly in puris naturalibus non est particula exclusiua simpliciter omnis alterius comprincipij supernaturalis, etiam actualis; sed solum habitus charitatis, de quo loc. cit. erat disput. & concertatio inter Scotum ex una parte, & D. Thom. & Henric. ex altera. Hinc si hunc Scoti sensum, eiusquæ phrasim loquendi profundius inuestigasset Bontempo, non dixisset tract. 5. de gratia disp. 1. q. 11. Scotum improprie, & laxè nimis in hac questione loquutum fuisse, nec se videre quomodo eum defen-

dere possit à Pelagianis; nimis equidem temeraria censura in tantum Doct. cuius scripta inoffenso pede percurrunt.

Arg. 2. Paganus magis diligit sua Idola, quam cæteras mundi creaturas, & hæreticus plus diligit suam peruersam Religionem, quam omne aliud, cum uterque paratus sit potius mori, quam Idola contemnere, & hæreses deserere; ergo à fortiori homo sine gratia poterit diligere Deum super omnia, etiam longo tempore, & non obstante graui tentatione. Resp. neg. absolutè conf. & ratio est quia ad malum faciendum non requiritur gratia, benè tamen ad bonum operandum, quod longo tempore duret, quia naturæ corruptæ est vitium in malum propendere, & usquè ad sanguinis effusionem, & vitæ profusionem peruersam voluntatem tenere, & delectabilibus sensus inhærere. Sic operati sunt, & operantur Gentiles, & Hæretici propugnantes suos errores, etiam usquè ad mortem, qui meritò martyres Diaboli appellantur. Vnde Concil. Araus. can. 17. ait fortitudinem Gentilium mundana cupiditas, fortitudinem Christianorum Dei charitas facit. Itaque ad difficilia perferenda, ut de mente Aug. adnotauit noster Herinex disp. 2. q. 3. de necessitate gratiæ n. 31. hoc in impijs præstat mundana delectatio, seu cupiditas, quod in virtuosjs præstat delectatio cœlestis, seu diuina gratia.

Arg. ultimò. Potest aliquis homo solis naturæ viribus mori pro Patria, vel pro Parentibus; ergo à fortiori pro Deo, ut naturæ Authore; ac proindè Deum solis naturæ viribus super omnia efficaciter diligere iuxta illud Ioan. c. 15. *Maiores charitatem &c.* Resp. dato ant. neg. conf. & paritatem ob duplicem rationem discriminis. Prima est quia Deus est magis separatus à bonis sensibilibus, quæ magis & efficacius nos mouent: 2. quia dilectio Patriæ, vel Parentum non postulat, quod relinquantur omnia peccata mortalia; sicut dilectio efficax Dei, quæ nullum peccatum mortale, siuè actuale, siuè habituale, siue originale compâtitur.



*Vtrum homo solis viribus liberi arbitrij possit se  
disponere ad actus contritionis, vel attritio-  
nis saltem quoad substantiam.*

**N**ot. 1. Quòd contritio imperfecta, seu attritio ex Con-  
cil. Trid. est dolor de peccatis commissis cum propo-  
sito de cætero non peccandi ob turpitudinem peccati, vel  
ob metum gehennæ, & pœnarum. Contritio autem perfe-  
cta est dolor efficax, seu detestatio de peccatis commissis  
cum proposito de cætero non peccandi ob offensam Dei,  
summè diligendi; ex quibus diffinitionibus constat diffe-  
rentia, quæ intercedit inter attritionem, & contritionem  
perfectam; de quibus Deo adiuuante latè agetur in 4. parte  
huius Breuarij theologici. Quid autem sit contritio, &  
attritio quo ad substantiam, & quoad modum ex dictis  
patet.

Not. 2. Quòd Pelagiani, ut refertur in Concil. Palest.  
propositione 22. dicebant hominem proprijs viribus posse  
resurgere à peccatis, & vitam æternam assequi; addentes,  
quod petentibus venia non datur secundum gratiam, &  
misericordiam Dei, sed secundum meritum, & laborem  
eorum. In quo errore nonnulli malè intelligentes Scotum,  
ne dicam malo affectu in Scotum, ipsum inuoluerunt; eo  
quia in 4. d. 14. q. 2. §. de 2. principali ait. Peccator in  
peccatis existens potest ex naturalibus cum influentia  
communi considerare peccatum commissum, ut offensi-  
uum Dei, & contra legem Dei, ut auersiuum à Deo, & ut  
inductiuum supplicij &c. Doctiss. noster Vega expendens  
illam particulam, ex naturalibus; dicit, quod illa se tenet  
ex parte intellectus tantum, quia Scot. loquendo de volun-  
tate, non ponit illam particulam ex naturalibus. Delfi-  
nus, & Fauentinus aliter explicant Scotum; sed ne limites  
breuitatis, cui studeo, transgrediar; omissis cæterorum Sco-  
tistarum responsionibus, & explicationibus amplector ex-  
positionem Hiquæi Scoti coment. in 4. loc. cit. qui in hoc  
sensu Doctorem interpretatur, videlicet, Scotum utendo  
hac phrasi ex puris naturalibus, cum communi Influentia  
excludere solum gratiam inhærentem, cum ponat duas re-



gulas in intellectu dictantes poenitentiam, alteram ex lumine naturali, alteram ex lumine fidei; subditque esse regulam reuelatam, & notam peccatori fideli. Neque ly ex puris naturalibus cum communi influentia, intelligitur de concursu generali causæ primæ ad effectus causarum secundatum. Neque dicitur communis eo modo, quo adiutoria communia extrinseca dicuntur generalia, sicut dicebat Pelagius de lege, reuelatione, & exemplo Christi, & eius doctrina, sed dicitur communis, & generalis, quatenus comprehendit sub influentia communi, & generali omnia media supernaturalia operandi, siue permanentia, siue transeuntia, idest tam actualia, quàm habitualia, & dicitur generalis, denominatione desumpta à lege diuinæ essentiae, qua decernitur Prouidentia generalis de omnibus hominibus in ordine ad auxilia supernaturalia. Qui quidem modus loquendi est etiam D. Aug. qui aliquando sub nomine generico Prouidentiae comprehendit gratiam, & adiutoria, etiam efficacia, ut patet in lib. de perfectione iustitiae cont. Cælestium. Scotus igitur nomine influentiae generalis diuinæ Prouidentiae comprehendit dona per se necessaria ad detestandum peccatum, ut oportet.

Cæterum, quod hæc Scoti doctrina non faueat Pelagianis, & sanè sit intelligenda, euidenter deducitur ex ijs, quæ habet pluribi, & præsertim in 4. d. 20. q. un. ubi docet sic. Cum ergo opus sit non hominis, sed Dei fructuosam poenitentiam inspirare, potest eam quandocumque vult, supplere, & inspirare. In 1. d. 17. q. 2. art. 2. in principio docet, quod asserere actum ex puris naturalibus esse meritorium, appropinquat errori Pelagij, & art. 1. §. contra istam conclusionem, nempe quæ dicitur Magistri; sic discurret. Ex secunda via, hoc autem quod meritorie agit, supplere homo, non potest esse pura natura, quia tunc ex solis naturalibus posset meritorie agere, quod videtur error Pelagij ex quibus locis, & ex alijs perspicue constat nunquam Scotum exclusisse gratiam actualem. Quare immeritò Aduersarij trahunt in calumniam illum modum loquendi ex naturalibus cum communi influentia, & eo vel maxime, quod etiam D. Thomas, & alij utuntur eadem phrasi, idest generali influentia, & tamen Doctores, non eos censurant, sed conantur eos in bonum sensum trahere: tum quia deberet eis  
suf.

741

sufficere Scoti doctrinam à supremo Tribunali SS. Inquisitionis Romæ Decreto specialiter edito 1610. fuisse canonizatam; pronunciando. Quidquid constaret dixisse Scotum, intactum inuiolatumquè admittendum esse.

Concl. Homo potest cum solo generali concursu Dei elicere actum contritionis, non quidem perfectè, sed imperfectè, quæ attritio dici solet quoad substantiam actus; non verò quoad modum, seu meritoriè in ordine ad gratiam, & gloriam. Prob. Concl. quoad 1. p. Potest homo absquè gratia actuali obseruare præcepta aliqua; etiam diligere Deum super omnia amore imperfecto; ergo potest homo fidelis considerare peccatum ut vitium, ob eius turpitudinem detestabile, & ut inductiuum supplicij æterni, & illud fuggere, nolle, & detestari citra meritum vitæ æternæ: sed talis detestatio dicitur attritio quoad substantiam actus; ergo homo fidelis talem actum attritionis &c.

Prob. 2. pars auct. Concil. Araus. can. 35. Mileuit. c. 14. & Trid. sess. 6. can. 3. *Si quis dixerit sine præuenienti Spirit. Sancti operatione &c* ergo sicut nequit elicere homo etiam fidelis actus fidei, spei, & charitatis sicut oportet, idest meritoriè; ita nec actus poenitentiae, idest attritionis. Prob. ratione. Sicut actus fidei, spei, & charitatis supernaturales, ut oportet ad iustificationem assequendam sunt in adultis peccatoribus dispositiones ad ipsam iustificationem, ita actus supernaturalis attritionis; ergo homo non potest elicere actus supernaturales poenitentiae; ac proinde ut proportionentur formæ, ad quam disponunt, est necessaria gratia actualis ad illos meritoriè, & ut oportet eliciendos. Nam principium naturale simpliciter nequit se solo proportionari effectui supernaturalis ordinis.

Arg. cont. concl. Si attritio esse potest actus naturalis; quoad substantiam, & ab homine sine gratia haberi posset; ergo attritio, seu contritio non computarentur inter difficilia; sed inter difficilia computantur; ergo &c. Resp. neg. sequelam, quia attritio meritò inter difficilia computatur; non autem inter impossibilia quoad substantiam actus, benè tamen quoad modum, seu quoad supernaturalitatem, cum impossibile sit, quod homo sine gratia Dei à peccato mortali resurgere valeat.

Quæres. An gratia sit necessaria ad actus virtutum mo-

ralium, videlicet Prudentiæ, Iustitiæ, Temperantiæ, & Fortitudinis. Resp. Quodd virtutes morales possunt esse naturales, vel supernaturales: sunt naturales quando eliciuntur ex motiuo naturali; ut abstinentia à cibis propter sanitatem, vel arduum aggreditur, ut mors deuiteretur, & sic est Temperantia, & Fortitudo naturalis. Supernaturales verò sunt quando eliciuntur ex motiuo supernaturali; ut si quis hic, & nunc abstinet à cibis, à societatibus prauis &c. ne Deum offendar, ne gratiam amittat his prænotatis. Dicendum, quod virtutes, seu actus morales, ut naturales sunt, dum eliciuntur, non exigunt gratiam ad illos producendos, nisi in casu, quo urgetur grauis tentatio. Verum ut producantur actus virtutum moralium, supernaturales, necessariò requiritur gratia actualis. Ratio, quia obiectum, & potentia debent esse eiusdem ordinis, sed obiectum est supernaturale, & potentia naturalis; ergo exigitur gratia Dei, ut potentia eleuetur ad ordinem supernaturalem. Similiter dicendum est de donis Spiritus S. quæ sunt numero septem, quorum quatuor pertinent ad intellectum, nempe sapientia, scientia, intellectus, & consilium, & tria ad voluntatem; idest timor, fortitudo, & pietas. Etenim dona ista, vel identificantur in nostra sententia cum virtutibus infusis; & sic equè gratia indigemus; vel distinguuntur, ut volunt alij, inquantum procedunt ex speciali motione Spirit. S. & tunc gratia specialis est pariter necessaria, imò specialior ad huiusmodi actus eliciendos; dixi specialior; quia hoc discrimen est inter virtutes, & dona Spirit. S. quod illæ ordinent hominem ad omnes actus bonos; ista autem ad actus heroicos, seu præstantissimos.

Sed petes. Quid sit virtus heroica.

Resp. quod virtus heroica, alia dicitur philosophica, alia theologica. Prior sic describi potest, est illa, quæ supra homines in genere naturæ euehit, quatenus in operando facit superare modum communem agendi aliorum hominum. Posterior autem sic. Est Regula tam perfecta rationis, & dominium tam absolutum super omnes passionem, ut nullum obiectum vim habeat remouendi heroum ab honesto, & hoc ne dum respectu alicuius virtutis, sed respectu omnium; adeout homo in suis actionibus potius diuinum sapiat, quam humanum; ita operabantur Sancti in-

terris degentes. Vnde actio heroica ut sic, quæ Christo assimilatur, est, ut docet Emin. Cardinalis Lauræa Seraphici Ordinis Decus in tom. de virtut. hominis fidelis operatio in aliqua materia virtutis ob finem supernaturalem, supra communem aliorum modum ex diuino dono, ac instinctu, seu operatione, cum abnegatione, siue implicita, siue explicita operantis. Dicitur hominis fidelis; quia solus christianus sic operatur; dicitur in aliqua materia virtutis, quia actio indifferens, & malà, non competunt Heroi christiano; dicitur ob finem supernaturalem; quia differt à ciuili, & philosophico; dicitur supra omnem communem agendi modum; quia id competit ipsi soli, dicitur instinctu diuino, quia licet iustus auxilio supernaturali operetur obseruando diuina præcepta, ut alij; attamen non habet instinctum specialem, seu donum, quod in actionibus non indiget ratiocinio humano, sed à Spiritu S. ducitur, ut constar in multis sanctorum actionibus ob solam Dei gloriam, & absquè humano affectu. Hinc rectè infertur hominem in statu innocentiae sine gratia speciali potuisse quidem operari heroicè in ordine ciuili, & philosophico, non verò in ordine supernaturali, & Theologico.

Quæres 2. An homo pro statu naturæ lapsæ cum sola gratia habituali possit elicere actus supernaturales, & meritorios. Resp. negatiuè. Ratio est, quia habitus, quo quis liberè agit nunquam operatur nisi applicetur ad operandum à potentia, in quâ reperitur; potentia autem creata nequit applicare habitum supernaturalem ad operandum, nisi ipsa potentia supernaturaliter eleuetur, ut possit applicare habitum supernaturalem. Quod docuit D. Aug. etiam de Adam in statu innocentiae in lib. de correptione, & gratia, ubi ait. *Primum parentem præter illam gratiam, in quâ conditus fuerat, indiguisse adiutorio, sine quo permanere non posset.* Imò sic videtur definitum in Concil. Trid. sess. 6. c. 16. ubi habetur. *Christus Iesus tanquàm caput in membra in ipse iustificatos virtutem influit, quæ bona eorum opera semper antecedit, concomitantur, & sequitur.* Quæ verba indubiè de gratia actuali intelligenda veniunt; ut communiter Doct. contra Ruardum, Bellarmin. lib. 6. de gratia, cap. ult. quorum opinionem non omninò improbabilem, ut refert Herincx, censent VVigger, & Malderus; et si Ouiedo tract. 7. con-

trou. 6. punct. 7. credat, quod ab hac doctrina communi nemini recedere liceat; ob auctoritatem præsertim Trid. & Araus. can. 9. docentis. *Quoties bona agimus, Deus in nobis atque uobiscum, ut operemur, operatur.*

Quæres 3. An homo lapsus viribus naturæ, seu lib. arb. solo generali concursu possit vitare omnia peccata mortalia saltem quoad substantiam.

Resp. ex hæcenus dictis constat, hominem lapsum non posse obseruare præcepta naturalia; & tantò minus totam legem; ergo nec potest vitare omnia peccata mortalia alioquin obseruare posset totam legem. Cæterum, posse hominem viribus lib. arb. vitare aliqua peccata citra meritum vitæ æternæ, & maximè non urgente graui tentatione; patet ex supradictis.

## QVÆSTIO VIII.

*Vtrum homo lapsus viribus solius liber. arb. possit vincere omnes tentationes.*

**N**ot. 1. Quod tentatio nihil aliud est, quàm motium ad malum inducens, & à bono retrahens. Tentatio autem ex triplici capite oriri solet. Primo ex suggestione Diaboli: 2. ex inclinatione appetitus: 3. ex occasione, quæ in vita occurrunt: Tentationum autem aliæ sunt leues, quæ parum afficiunt, & alterant animum, leuiter suadendo intellectum, & mouendo voluntatem. Aliæ sunt graues, quæ vehementer mouent, & suadent, & afficiunt animum. Quæ quidem tentatio grauis duplici modo afficere potest animum. Primò taliter, ut usum rationis prorsus impediat, vel absorbeat, ut contingit in aliquibus iracundis, qui irati nesciunt quid faciunt: 2. taliter, ut iudicium rationis saluum, & inalteratum remaneat.

Not. 2. Quod tentatio ex triplici motiuo vinci potest. Primo per aliud peccatum; sic aliqui propter auaritiam, resistunt tentationi luxuriæ; & tunc non est necessaria gratia: 2. ob amorem Dei, & hoc motiuum est supernaturale, ad quod semper exigitur gratia: 3. propter honestatem, & de hoc motiuo est quæstio. Vnde quærimus: An tentatio, quæ rationis usum non perturbat, siue leuis, siue

gravis vinci possit sine gratia, non quod vincatur meritorie, hoc enim est extra difficultatem apud Catholicos, sed ex honestate. Circa quam questionem sic explicatam sunt tres opiniones. Prima est Pelagij dicentis lib. arb. sine gratia posse superare omnes tentationes, quæ est hæretica: 2. est Mick. Baij asserentis nullam quatumvis leuem sine gratia vinci posse: 3. est Theologorum Catholicorum, quæ videtur communis, videlicet leues vinci posse, & aliquando graues aliquas pro breui tempore; non autem graues semper.

Concl. Homo lapsus nequit sine gratia Dei vincere leues tentationes collectiue sumptas; diuisiue autem, immò, & aliquam grauem tentationem pro aliquo tempore, non verò pro longo tempore superare sine gratia potest citra meritum vitæ æternæ. Prob. 1. pars. Nam in subitis, & repentinis tentationibus aliquando ita mens hominis commouetur in natura lapsa, ut nisi adiuuetur gratia diuina, necesse sit succumbere leui tentationi, quæ frequenter occurrit. Neque natura humana potest ita vigilare, ait Scot. in 2. d. 28. q. 11. quod omnes motus sensualitatis continuo reprimat, dum enim unum conatur reprimere, alius aliunde insurgit, cui moraliter necesse est, ut succumbat: ergo &c. Prob. 2. pars. Ex Pio V. & Gregorio XIII. qui damnant Baij propositionem 30. ubi fures, & latrones appellat eos, qui dicunt homines posse ulli tentationi sine Christi adiutorio resistere. Id etiam ratio suadet. Quia quando facultas aliqua, seclusis impedimentis, potest aliquid facere, potest etiam illud, dum leuia impedimenta occurrunt, fugere, & deuitare, alioquin talia impedimenta essent grauiora. Prob. 3. pars ratione Scoti in 1. d. 1. q. 4. & in 4. d. 49. cont. D. Thom. & plures modernos. Ex duobus bonis potest voluntas minus bonum præferre maiori; ergo licet bonum delectabile, vel utile per tentationem oblatum præponderet bono honesto attamen poterit voluntas natia virtute honestum eligere; maximè quia grauis tentatio iudicium rationis relinquit integrum, nec voluntatem necessitat ad consentiendum; ergo voluntas hominis lapsi naturalibus viribus poterit graui tentationi non consentire, immò etiam reluctari; non quidem pro longo tempore, sed pro aliquo tempore breui, citra tamen meritum vitæ æternæ, seu non meritorie.



Arg. cont. 2. & 3. part. Scriptura, Concilia, & PP. docent, victoriam tentationum esse à Deo; ergo &c. Resp. Victoriam nostram in ordine ad vitæ æternæ meritum esse à Deo, attramen citra meritum posse esse etiam à lib. arb.

Cont. Apost. ait. *Quis me liberabit de corpore mortis huius?* resp. gratia Dei per Iesum Christum: ergo nequit homo superare tentationes; Unde D. Aug. lib. 50. homilia 23. sic ait. *Si adulterum fusti, hoc dicit Dominus Deus tuus: servabam te mihi, ut non adulterium committeres. Suator defuit, & ut deesset, feci: locus, & tempus defuit, & ut hac deesset, feci. Adfuit suator; non defuit locus, non defuit tempus, ut non consentiret: ego tenui. Agnosce ergo gratiam eius, cui dices, quod non admisisti: ergo &c.*

Resp. Apost. loqui de tentationibus grauib. longo tempore durantibus, & de victoria meritoria, & D. Aug. vult nobis ostendere, quod si Adulterium, & huiusmodi peccatum non comiserimus, adscribendum esse diuinæ gratiæ, non sibi, & proprijs viribus.

Arg. quod possint ab homine superari etiam tentationes graues D. Aug. lib. de pœnit. c. 27. ait. *Potest aliquis ab Ecclesia separatus, pro veritate Sacramenti, qua apud eum remansit, superare metum mortis, & pati eius supplicium: sed hoc est grauis tentatio: ergo &c.* Resp. dist. ant. Vel fieret bono motiuo, vel malo; si ex bono motiuo, cui non misceatur aliquod vitiosum, ut vana obstinatio, tunc non patitur mortem nisi per gratiam, quam ipsemet Aug. lib. cit. c. 28. vocat donum exheredatorum; si autem ex malo motiuo mortem patiatur, idest, vanitatis, obstinationis; nil mirum si gratia non exigatur, gratia namquæ non requiritur ad malum.

## QVÆSTIO IX.

*Vtrum homo necessario indigeat gratia, ut ad illam se præparet.*

**N**OT. I. Quòd Pelagiani asseriebant primam gratiam auxiliantem, primamquæ Dei vocationem dari intuitu boni operis, ab homine facti sine gratia, sed ex solis naturæ viribus; velut meritum de condigno, vel saltem de congruo; quòd est heresis damnata in pluribus Concilijs. Cæterum sunt aliqui Doctores catholici putantes, dari ex viribus

ribus naturæ causam dispositiuam, non tamen meritoriam primi auxilij supernaturalis. Ita Durand. Gabriël, Richard. & lauellus, prout refertur inter quos immerito Gonet enumerat Scotum. Alij autem dicunt, quod licet opera bona naturalis ordinis non sint ratione sui dispositiones ad primam gratiam auxiliantem; ex lege tamen Dei, & pacto inito cum Christo, de non neganda gratia facienti, quod in se est ex viribus naturæ, habere connexionem infallibilem cum illa, sic Molina in concordia disp. 10. quem sequuntur plures ex Recentioribus.

Not. 2. Quòd tripliciter potest intelligi, hominem se disponere viribus naturalibus ad gratiam. Primo modo proximè naturaliter ad gratiam habitualement, eliciendo aliquod opus morale, cui Deus teneatur infallibiliter conferre gratiam habitualement. 2. remotè, ut est facere aliquod opus naturale morale, cui Deus teneatur conferre gratiam actualement, qua mediante homo eliciat deinde aliquod opus supernaturale meritorium gratiæ habitualis. 3. remotissimè se disponere ad gratiam potest dupliciter accipi, negatiuè, seu per accidens, & indirectè, vel positiuè, seu per se, & directè. Disponere se positiuè est facere aliquod opus naturale morale, ad quod Deus respiciens teneatur dare gratiam; negatiuè autem est remouere obstacula, quæ impedire possent, quo minus Deus conferret gratiam.

I. Concl. Homo viribus lib. arb. non potest se disponere ad gratiam, nec remotè, nec remotissimè positiuè, bene tamen negatiuè. Prob. concl. quoad 1. part. contra Faustum asserentem hominem posse eliciere aliqua opera, quibus de congruo gratiam actualement mereatur. Apost. ad Philip. c. 1. ait. *Qui capit in nobis, ipse perficiet*; & 2. ad Corint. c. 4. *Quis te discernit? Quid habes quod non accipisti?*

Prob. etiam auct. Concil. Araus. 2. sic dogmatizzantis. *Deum non expectare voluntates nostras, ut a peccatis purgemur sed gratiam facere non solum ut purgemur, sed etiam ut purgati relinamur.* Prob. ratione. Dispositio ad aliquam formam, perit formam, cuius est dispositio: sed nihil naturale potest esse dispositio ad formam supernaturalem; cum de ratione entis supernaturalis sit excedere totius naturæ exigentiam; ergo actus ordinis naturalis ad gratiam disponere nequeunt. Tum quia destrueretur gratia præueniens; neque

Deus

Deus nos præueniret, sed nos Deum, quod est contra Scrip. & D. Aug. qui tali ratione utitur contra Pelagianos. *Si sine Dei gratia per nos incipit cupiditas boni, ipsum captum eris meritum, cui tanquam ex debito gratia veniat adiutorium.*

Prob. quoad 2. part. utroque modo explicatam, & primò, quod nequeat homo se disponere remotissimè positiuè. Etenim illud opus, quo homo se disponderet ad gratiam, postulat infallibilem consecutionem gratiæ, vel ex natura actus, vel ex promissione Diuina; non primum, quia Pelagianum est id credere; nec secundum, quia non inuenitur in S. Scrip. talis promissio. Prob. 2. idest quod negatiuè &c. ex Scot. in 4. d. 28. q. un. Nam quò magis homo facit bona opera moralia, eò minus peccat sed qui minus peccat, minora ponit impedimenta ad gratiam, quam Deus ordinariè largitur ijs, qui minora ponunt obstacula; dixi ordinariè; nam aliquando Deus, ut ostendat virtutem suæ potentiæ, & bonitatis, maximos peccatores conuertit; ergo peccator minus peccans, negatiuè se disponit ad gratiam; non quod illa obseruatio bonorum moralium, & illa abstinencia à peccatis sit causa influens in effectum, sed illa bona opera moralia solum sunt occasio, cur Deus aliquando det gratiam.

II. Concl. Nulla lex diuina extat; adeo ut homini facienti quod in se est viribus lib. arb. Deus infallibiliter conferat auxilia gratiæ. Hæc est contra Molinam, est tamen utriusque Scholæ. Prob. Lex illa, cum pendeat à libera Dei voluntate debet nobis innotescere, vel ex S. Scrip. vel ex Concilijs, vel ex SS. PP. sed talis lex nullum habet fundamentum in Concilijs, nec in SS. PP. ex quibus potius oppositum colligitur, ut supra ostendimus de Concil. Araus. & de SS. PP. ergo talis lex sine ullo fundamento adstruitur.

Cæterum testimonia Scrip. quibus Molina conatur legem illam firmare, aut probare, nec à longè eam indicant. Præcipua testimonia sunt duo. Primum est illud Ioan. c. 1. *Dedit illis potestatem filios Dei fieri*; & secundum est illud 1. ad Timot. 2. *Deus vult omnes homines saluos fieri*, sed ex istis non colligitur recte D. Aug. lib. 1. contra duas Epistolas Pelagian. cap. 3. ubi sic ait. *Datur ergo potestas ut filij Dei fiant, qui credunt in eum, cum hoc ipsum datur ut credent in eum, quæ potestas nisi detur à Deo, nulla esse potest ex lib. arb.*

Neque ex 2. Testimonio, eo quia lex ista in sententia Molinæ fundatur in meritis Christi, sed voluntas antecedens saluandi omnes homines, in prædicto testimonio contenta, antecedit merita Christi; & decretum de Christo venturo, ut Redemptore, ergo talis lex nequit deduci ex dicto testimonio, cum verba illa, ut notatum fuit in 1. part. agendo de Diuina voluntate, & prædestinatione solum indicent sincerum affectum Dei, & suæ infinitæ bonitatis offerentis omnibus hominibus auxilia gratiæ.

Arg. cont. 2. concl. Si quis in syluis enutritus ductum rationis naturalis sequatur in appetitu boni, & fuga mali; certissimè tenendum est, quod ei Deus, vel per inspirationem reuelaret ea, quæ ad credendum sunt necessaria, vel aliquem fidei Prædicatorem ad eum dirigeret, sicut misit Petrum ad Cornel. ita docent. D. Thomas q. 14. de verit. art. 11. & Scot. in Prol. sent. ergo Deus facienti, quod in se est ex viribus proprijs infallibiliter dat gratiam.

Resp. Tam D. Thomam, quàm Scot. loqui de homine faciente quod in se est, non ex viribus naturæ, sed ex gratiæ auxilio: quod constat exemplo allato de Cornelio; qui non ex solis viribus naturæ fecit, quod in se erat, sed speciali auxilio præuenientis gratiæ,

Dices. Homo ille in syluis enutritus supponitur destitutus omni auxilio gratiæ, cum supponatur esse sine fidei illustratione, quæ est primum auxilium supernaturale sufficiens; ergo Doctores citati loquuntur de homine faciente, quod in se est ex viribus naturæ, non autem ex vi diuini auxilij. Resp. neg. assumptum, quia, estd homo non haberet fidem expliciam de Deo, ut Auct. supernaturali, nec haberet fidem explicitam de Deo, ut Auct. supernaturali, haberet tamen de illo fidem implicitam: & ratio est, quia in statu eleuationis naturæ ad ordinem supernaturalem, impossibile est, quod de facto ponatur conuersio in Deum, ut Auctorem naturæ sine conuersione ad Deum ut Auctorem gratiæ, & gloriæ. Vnde etiam ille homo ductum rationis sequens &c. esset in Deum ut auctorem naturæ conuersus; esset etiam conuersus saltem implicitè in Deum tanquam auctorem supernaturalem; ac proindè haberet fidem de illo, saltem implicitè; & Deus in tali casu, eum vel per illustrationem inspirationis, vel per aliquem Predica-

torem dirigeret ; sicut misit Petrum ad Cornelium. & Paulum ad Macedones.

## QVÆSTIO X.

*Virum homo iustus necessariò indigeat specialiori gratia ad perseverantiam finalem.*

**N**Ot. Quèd perseverantia potest sumi dupliciter. Primo pro continuatione in gratia longo tempore, præscindendo ab hoc, quod continetur usque ad mortem : 2. pro perseverantia in gratia usque ad finem vitæ inclusivè, seu pro coniunctione gratiæ cum morte, quæ perseverantia finalis dicitur. De perseverantia primo modo egimus supra, ubi ostensum est, hominem iustum, ut diù abstineat à peccatis mortalibus, & in bonis operibus perseveret, præter gratiam habitualement, indigere auxilio speciali. Igitur agendum est hîc de perseverantia secundo modo accepta ; quæ est donum specialius Dei, non quidem per modum habitus intrinsecè perficientis potentias hominis iusti ; satis enim perficiuntur per gratiam habitualement, & actualement, sed per modum directionis specialis, qua Deus operationes nostras ita gubernat, & tentationum passiones ita temperat, vel minuit, ut homo non deficiat ob occurrentes difficultates ; quæ in tentationibus reperi solent.

Concl. Perseverantia finalis est donum Dei speciale à gratia habituali, & communibus auxilijs distinctum. Hæc est D. Bonau. D. Thomæ Scoti, & est communis.

Prob. 1. ex Trid. cont. Molin. & alios Recentiores opinantes dari omnibus gratia, & auxilia sufficientia, quibus possint usque ad mortem perseverare, sed quosdam benè ijs uti, & quosdam malè ; & idè illos perseverare, non verò istos ; ac proinde actu perseverare non esse donum à gratia, & auxilijs ex parte Dei distinctum : ità definit sess. 6. can. 6. & 2. *Si quis dixerit hominem iustificatum posse sine speciali auxilio Dei in accepta iustitia perseverare, anathema sit.* Prob. ratione Etenim licet homo sanetur per gratiam habitualement, & adiuvetur gratia actuali ad vitandum hoc peccatum, & illud, & omnia diuinsiue, imò facere diuinsiue quodlibet opus bonum ; non tamen potest vitare omnia peccata, & facere om-

omnia bona, quæ occurrunt in toto vitæ cursu, nisi insuper specialius gubernetur per specialem manutentioniam Dei, qui vel tentationes aufert, vel mitigat, vel corroborat tentatos, ut possint tentationes superare iuxta illud ad Corinth. c. 1. *Fidelis est Deus, qui non patietur vos tentari supra id, quod potestis*; ergo &c.

Confirmatur, eo quia si admitteretur opinio Molinæ plura sequerentur absurda, & inconuenientia; nam si donum perseverantiæ subijceretur lib. arb. & ab eo quantum ad efficaciam, & usum dependeret, sequeretur primò, quod qui perseverant, se ab alijs non perseverantibus discernent per aliquid sibi proprium, idest per bonum usum lib. arb. determinantis, & applicantis gratiam cont. illud 1. ad Corinth. 4. *Quis enim te discernit* &c. Sequeretur insuper, quod Deus per gratiam daret nobis solum posse perseverare, ipsum verò perseverare esse à lib. arb. ac proindè Deo minus adscriberetur. Denique sequeretur quod prædestinatio esset incerta, & fallibilis, quia inniteretur medio fallibili, nempe dono perseverantiæ, quod non potest esse firmum, & stabile, si eius efficacia ab instabilitate humanæ voluntatis dependeret. Prob. 2. Effectus specialis providentiæ habens infallibilem connexionem cum gloria est specialissimum Dei donum, à gratia habituali, & à communibus auxilijs sibi annexis distinctum; sed perseverantia finalis est effectus specialissimus, & præcipuus prædestinationis, quæ est providentia specialis ordinis supernaturalis, & habet infallibilem connexionem cum gloria, ergo &c. Quod circa ex dictis infertur, quod donum perseverantiæ finalis est distinctum ab eo, quod requiritur ad diù perseverandum in bono; illud enim est effectus proprius prædestinationis; ac proindè solis prædestinatis datur; istud verò providentiæ generalis ordinis tamen supernaturalis, quod datur etiam Reprobis. Insuper infertur, quod admittendum est donum perseverantiæ non solum pro his, qui longo tempore ante mortem in gratia perseverant; sed etiam pro illis, qui post acceptam gratiam citò moriuntur; imò & pro paruulis baptizatis, decedentibus ante usum rationis iuxta illud Sap. c. 4. *Raptus est, ne malitia mutaret intellectum eius*, teste D. August. de bono perseverantiæ, ubi ait. *Sed mirabiliter, & fidelibus evidentior largitas bonitatis Dei est, quod etiam*



*etiam paruulis, quibus obedientia non est illius ætatis, datur hæc gratia.* Denique infertur differentia inter perseuerantiam, & confirmationem in gratia; nam perseuerantia est donum commune omnibus prædestinatis, seu electis ad gloriam, & ad illam sufficit auxilium finale efficax moriendi in gratia, estò in vita quis permissus sæpè fuerit in peccatum mortale labi. Confirmatio autem includit quandam continuationem auxiliorum efficacium per totam vitam non peccandi saltem mortaliter. Hoc singulare donum datum fuit B. Virgini immaculatæ. Idem creditur de Ioan. Baptista, & de Ieremia pariter in utero sanctificato. De Apostolis quoque traditur, quod post acceptum Spiritum Sanctum in Pentecoste, nunquam mortaliter peccauerint ex singulari priuilegio confirmationis. Idem pariter de Seraphico nostro S. Francisco affirmant plures nostri Scriptores, & signanter Pisanus, maximè post donum Stigmatum.

Arg. cont. concl. Gratia habitualis cum auxilijs sibi annexis est sufficiens ad omnia peccata vitanda per aliquod tempus, intra quod causæ naturales, v. g. morbus, intemperies aeris, & similia possunt inferre mortem; ergo ad finiendam vitam in gratia non est necessarium donum speciale perseuerantiæ, à recensitis donis distinctum.

Resp. dist. ant. sufficiunt tanquam causæ per accidens, conc. ant. tanquam causæ per se, neg. ant. Nam gratia habitualis una cum alijs auxilijs communibus non ordinatur ad hunc specialem effectum, nempe ad coniungendam mortem cum gratia, quemadmodum ordinatur donum perseuerantiæ.

Dices. Ergo Deus iubet impossibilia, iubet enim quod perseueremus, id tamen facere non possumus cum gratia habituali, & actuali ergo. Resp. neg. ant. Nam Deus, ut supra monstrauius, impossibilia non præcipit; quia possumus per gratias communes petere, ut Deus det nobis perseuerare in gratia; & sic dicere possumus, quod homo cum gratia habituali perseuerare potest saltem remotè, quatenus Deum orando obtinere potest donum perseuerantiæ.

Contra. Donum perseuerantiæ erat debitum connaturaliter homini in statu innocentie, ergo sicut tunc non erat donum à gratia distinctum; ita nec etiam in hoc statu.

Resp. neg. ant. & ratio est, quia licet in illo statu integri-

gritatis non esset necessarium donum perseverantiæ ob appetitus sensitiui rebellionem, erat tamen necessarium velut quid distinctum ob lib. arb. vertibilitatem.

#### DISPUTATIO IV.

*De sufficientia gratiæ diuinæ ad salutem.*

##### QVÆSTIO 1.

*Vtrum homo auxilijs ordinarijs diuinæ gratiæ vitare possit omnia peccata venialia.*

**N**ot. 1. Quòd peccatum, ut ait D. Aug. non est peccatum, nisi sit voluntarium; Voluntarium autem ex D. Bon. in 2. d. 41. art. 1. potest dici triplici modo, nempe, aut voluntate aliena, ut peccatum originale; de quo satis egimus in tract. de homine lapsio: aut voluntate propria, & sic, dicit Doctor Seraph. est peccatum mortale actuale, & hoc quidem genere peccati nullus peccat, nisi consentiens; aut voluntate partim aliena, partim propria; & sic est peccatum veniale, & illud maximè, quod confurgit ex repugnantia carnis ad spiritum, hoc, inquam, peccatum, quia partim est à voluntate aliena, partim à propria, ideo quodammodo secundum Aug. tenet rationem pœnæ, & quodammodo rationem culpæ. *Quia homo non voluit vitare peccatum, dum valuit infirmum est, ut non possit, dum velit, inquit D. Aug.*

Not. 2. Quòd voluntarium voluntate propria, idest peccantis, non est omne peccatum veniale simpliciter, sed secundum quid ex eodem Doct. Seraph. Illud enim est voluntarium simpliciter, quod est à voluntate præambula, & mouente; illud autem quod oritur à voluntate concomitante, & non prohibente, vel non præcauente, dum possit præcauere, & prohibere, dicitur voluntarium secundum quid, seu interpretatiuè, eò quia talis deordinatio voluntati imputatur. Itaque peccata venialia sunt triplicis generis: alia enim oriuntur ex inaduertentia, & surreptione, quando scilicet non adest plena deliberatio; licet enim ad peccatum mortale exigatur consensus perfectus; ad ven-

niale tamen sufficit imperfectus, quia imperfectum est ergo. Alia oriuntur ex infirmitate; hoc est propter malam corporis affectionem, & vehementiam passionum. Alia denique proueniunt ex certo consensu, & deliberato.

Concl. Homo iustificatus solis auxilijs ordinarijs gratiæ diuinæ annexis gratiæ habituali nequit vitare omnia peccata venialia collectiue per totam vitam, vel per aliquod longum tempus; sed ad id requiritur speciale priuilegium, quod soli Immaculatæ Deiparæ fuit concessum à Diuina bonitate. Prima pars est de fide definita in Concil. Mileuit. can. 7. & 8. & in Trid. sess. 6. can. 23. ubi sic habetur. *Si quis dixerit, hominem semel iustificatum posse in tota vita omnia peccata vitare, etiam venialia nisi ex speciali priuilegio; Anathema &c.* Sic enim Ioan. scribit. *Si dixerimus, quod peccatum non habemus, ipsi nos seducimus*; Quod debet dici à iustis non solum ex humilitate, sed etiam ex veritate, ait Concil. Mileu. sic etiam in Prouerb. c. 24. septies cadet iustus, etsi quidam apud Cornel. à lapide legant septies in die cadet iustus; at delendum est (in die) quia nec in biblia Sixtina, ut notat noster felix, nec in Romana, ut videre est, ponitur in die, sic quoque docent PP. & signanter D. Aug. tract. 1. in Ioan. *Non potest, ait, homo quàm diu carnem portat, non habere lenia peccata*; & Leo Papa serm. 4. Quadrag. *Dum per varias actiones vita huius sollicitudo distenditur, necesse est mundano puluere etiam religiosa corda sordescere.*

Prob. ratione ad hoc, ut homo iustus possit omnia venialia collectiue usque ad mortem, vel per aliquod longum tempus deuigare, necessario requiritur, quod vel ligetur, vel extinguatur fomes peccati: at ex vi auxiliorum quæ communi lege gratiæ habituali annectuntur, nec ligatur, nec extinguitur fomes: ergo homo auxilijs ordinarijs nequit vitare omnia peccata venialia; ergo exigitur aliud donum speciale: maior constat ex dictis, minor est certa; Tum quia in sola B. Virg. ob dignitatem Matris Dei, ligatio fomitis, vel extinctio agnoscitur, & fatetur à Theologis. Hinc remanet 2. pars concl. probata; cum enim in B. Virgine Immaculata, vel non fuerit fomes, vel fuerit ligatus, vel ut melius loquamur, fuerit totaliter extinctus; sequitur euidenter, quod in ipsa non fuit impotentia illa moralis vitandi omnia venialia collectiue, quæ oritur ex  
fo-

fomite ; sed habuit speciale priuilegium nunquam peccandi venialiter, ut tradit Trid. cit. asserens semper ita sensisse Ecclesiam. Cæterum, quod talis prærogatiua non sit extendenda ad alios sanctos quantumlibet insignes, constat ex eo, quod exceptio firmat regulam in contrarium ; ut tradunt legales ; sed Trid. ab hac regula generali ( *Nullus est iustus, qui non venialiter peccet* ) solam Immaculatam Deiparam excipit, ergo cæteros quantumuis iustos, & sanctos sub hac regula comprehendit. Verum probabiliter ac piè quamplures Theologi censent aliquos sanctos habuisse priuilegium vitandi omnia venialia in aliqua determinata materia ; ut D. Ioan. Baptista peccata venialia, quæ locutione committuntur, quia illa specialiter repugnant officio Predicatoris, & Præcursoris. D. Iosephum, quæ sunt contra castitatem, quia hoc decebat sponsum purissimæ Virginis.

Arg. 1. cont. 1. part. concl. Nullus peccat in eo, quod vitare non potest, ut docet D. Aug. lib. 3. de lib. arb. c. 18. Sed si homo in statu naturæ lapsæ indigeret speciali auxilio ad vitanda omnia venialia, non posset illa vitare ; cum Deus non sit paratus omnibus dare tale auxilium, seu priuilegium : ergo non posset ei ad culpam imputari, quod omnia peccata venialia non vitaret.

Resp. conc. mai. & neg. min. & ratio est, quia ut peccata venialia homini in statu naturæ lapsæ imputentur, non requiritur, quod Deus det, aut paratus sit dare illud speciale auxilium ; quod necessarium est ad vitanda omnia peccata collectiue, sed satis est, ut det auxilium ad vitanda omnia diuisiue. Resp. 2. ex nostro Herinx in tract. de gratia disp. 3. q. 3. neg. min. eo quia seorsim, & secundum se vitare potest si diligentiam debitam adhiberet, quam singulis vicibus dum peccat, liberè non adhibet. Deinde impotentia, seu impossibilitas est tantum moralis, quæ stat cum physica libertate, & sufficit ad peccandum venialiter saltem ; & licet Deus etiam nil moraliter impossibile præcipiat tanquam necessarium ad salutem, id tamen non debet extendi, ad venialia, quæ non sunt ita salutis repugnantia ; est igitur impossibilitas velut consequens de re possibili, quæ nunquam fiet. Ita Herinx.

Dices. Si potest homo vitare omne peccatum veniale.

diuissim, seu in particulari, hoc, & illud, & sic de singulis, ergo poterit vitare omnia peccata venialia collectiue.

Resp. ex D. Bonau. in 2. dist. cit. Aut potentia vitandi comparatur ad obiectum coniunctim, vel diuissim, si diuissim, sic est vera ista propositio. Homo iustus potest vitare, vel præcauere omne veniale peccatum, quia non est dare aliquod peccatum, quod non possit vitari. Si coniunctim sic est falsa; est enim sensus, quod potest facere, ut omnino sit absque veniali peccato, & in hoc sensu, nequit homo vitare omnia peccata venialia; & dat exemplum de Naui in Mari perforata in pluribus locis; dicendo, posset Nauta obturare quodlibet singulare foramen sibi demonstratum, non tamen omnia simul, quia dum unum obturaret, aqua per aliud intraret; & sic in proposito, dum homo studet vitare unum peccatum veniale, vel per inaduertentiam, vel per ignorantiam, vel per fragilitatem, vel per surreptionem, vel per necessitatem, intellige moralem, in aliud labitur. Vnde glos. super illud Prouerb. c. 24. *Septies cadit iustus ait Singulis diebus, vel inuiti, vel nolentes frequenter peccamus* Nec valet illa illatio dicit Seraph. Doctor, possumus vitare hoc, & illud, ergo omnia, sed est fallaccia figuræ dictionis; procedit enim à pluribus determinatis suppositionibus huius verbi, potest, ad unum, sicut in ista, hic homo potest portare unum lapidem, alium lapidem, & sic usque ad decem diuissimè; ergo potest portare decem lapides; quod non tenet consequentia. Si dicas quod D. August. lib. 3. de lib. arb. ait quod sunt quædam necessitate facta improbanda, quæ homo vult certè facere, & non potest.

Resp. D. Aug. intelligi de impotentia, & necessitate morali, ut alibi notatum fuit, non vero de physica.

## QVÆSTIO II.

*Vtrum peccatores etiam obdurati habeant auxilium sufficiens ad vitandum nouum peccatum mortale.*

**N**Ot. Quòd cordi peccatoris tribuitur induratio metaphorice; eò quia instar rei duræ non cedit, sed inflexibile ad rectam Dei voluntatem, & iussionem maneat, unde obduratio sic breuiter describi potest: est pertinacia volun-

luntatis, peccato firmiter adhærentis, & gratiæ Diuinæ resistentis. Simili quadam metaphora explicatur excæcatio, qua peccator mentem suam auertit à lumine Diuinæ gratiæ; & breuiter; excæcatio est voluntaria diuinæ claritatis priuatio, & spiritualium tenebrarum inductio per repulsam illustrationum diuinarum. Quot verò modis fiat talis obduratio, seu excæcatio pater ex dictis in 1. part. disp. 2. de volunt. Diuina q. 3. Cæterum certissimum est, gratiam sufficientem dari omnibus, ut ostendunt Theologi cont. Caluin. & Iansenium; verùm de peccatoribus obduratis, de infidelibus, & de paruulis morientibus sine baptismo videtur esse aliqua difficultas; idcirco de illis agemus in hac, & in sequentibus quæst.

Concl. Omnes peccatores etiam obdurati; seu obcæcati habent auxilium saltem remotè sufficiens ad euitandum nouum peccatum mortale. Hæc est communis sententia Theologorum contra hæreticos recentiores, & contra Iansenium, & quoad induratos, & obcæcatos contra Greg. Ariminens. Abulensem, & Ruffensem, quæ quidem 2. pars traditur communiter à Doctorebus sine exceptione, ut aduertit Herinex in disp. de sufficientia gratiæ, estque iuxta plures Doctores theologicè certa, imò iuxta Smising. tract. 3. disp. 2. est de fide. Prob. concl. quæ colligitur ex Scoto in 2. d. 46. q. un. S. Scrip. indefinitè; & sine ulla exceptione peccatorum obduratorum testatur Deum misereri, & pœnitentiam expectare; nam Sap. dicitur cap. 11. *Misereris omnium* (dando scilicet gratiam sufficientem) *Quia omnia peccas, & dissimulas peccata hominum propter pœnitentiam.* Ad Rom. 2. *Ignoras quoniam benignitas Dei ad pœnitentiam te adducit? Secundum autem duritiam tuam, & impœnitens cor tuum thesaurizas tibi iram in die ira,* & in 2. Petri cap. 3. generaliter loquitur. *Patienter agit propter nos, nolens aliquos perire, sed omnes ad pœnitentiam reuerti;* ergo Deus omnibus peccatoribus, etiam obduratis dat gratiam sufficientem saltem remotè.

Prob. iusuper specialiter de obduratis auct. D. Aug. Psal. 6. ubi ait. *Dedit eos in reprobum sensum, nam ea est cecitas mentis; in eam quisquis datus fuerit ab interiori Dei luce secluditur; sed nondum perit; cum in hac vita est;* & in Psal. 58. sic obduratis alloquitur: *Sed etsi nolis curare vulnus tuum, admonet, ut cures, & auersum reuocat, & refugientem quodammodo ad se re-*



*Vtrum Peccatoribus etiam obduratis detur gratia  
sufficiens ad pœnitendum.*

**N**Ot. Quod ex dictis satis constat non omnibus peccatoribus, etiam fidelibus, dari auxilium proxime sufficiens ad pœnitendum, cum nec quidem iusti semper habeant auxilium proxime sufficiens ad opera salutis, aut perseuerantiæ. Insuper peccatores non habent omni tempore auxilium etiam remotè sufficiens v.g. ad orandum; multi enim sæpè hic, & nunc sunt huiusmodi auxiliij incapaces, sicut etiam pœnitentiæ, siuè ratione somni, siuè ebrietatis, usus rationis, aut alterius defectus; siuè etiam quia de conuersione, aut de pœnitentiâ nil penitus cogitant.

Concl. Peccatores adulti, etiam obdurati habent pro tempore, & loco auxilium saltem mediatè sufficiens ad pœnitendum de omnibus mortalibus. Hæc est sententia communis Theologorum, exceptis Doctoribus in prima quæstione relatis. Vnde Smising. putat esse de fide. Prob. 1. ex Sac. Scrip. quæ generaliter omnes inuitat ad salutem, & quosuis peccatores ad conuersionem, & ad pœnitentiâ sic Isai. 31. *Conuertimini, sicut in profundum, idest iniquitatum recesseratis.* Sic Ezech. 33. *Conuertimini à vijs vestris pessimis. No'o morsem peccatoris, sed ut conuertatur.* Sic Zacchar. *Conuertimini ad me, & conuertar ad vos, & pluribi similia habet.*

Prob. auct. SS. Patrum Chrysost. homil. 16. in Epist. ad Rom. ait. *Tulit Deus Pharaonem multa patientia ad pœnitentiâ inducere volens; nisi enim hoc voluisset, tamdiu eum non tulisset.* Greg. 17. moral. c. 4. *Quisquis delinquit, & vivit, idcirco hunc diuina dispensatio in equitate tolerat, ut ab iniquitate compescat.* Idem tradunt D. Aug. & alij.

Prob. Praxi Ecclesiæ catholicæ, quæ velut Mater optans omnium salutem, dat præcepta generalia pro omnibus fidelibus ad annuè confitendum, & communicandum; sed talia præcepta indicant manifestè omnibus etiam obduratis adesse sufficiens auxilium ad veram pœnitentiâ agendam, ideoquæ eos tanquam transgressores condemnat noui peccati mortalis, imò & in eos animaduertit, ergo etiam obduratis datur &c. Vnde merito in Actib. Apost. c. 7. in-

dam fidem, ac proinde ad iustificationem, & salutem, quo auxilio si rectè uterentur acciperent ulteriora auxilia, usque ad illud, quod proximè sufficeret ad fidem suscipiendam. Hæc est communis Theologorum sententia teste Herinex in tract. de gratia. Prob. Nam Deus voluntate generali, & antecedente vult omnes homines etiam post Adæ lapsum saluos facere, in quo errauit Iansenius lib. 9. & 10. de gratia Christi, asserens Deum habuisse quidem talem voluntatem pro omnibus, & singulis hominibus consideratis in statu innocentiae, sed non post Adæ lapsum, & præuisionem peccati originalis. Item S. Scrip. generaliter omnes homines inuitat ad salutem, quæ à fide sumit initium. Similiter probatur ex eo, quod Christus mortuus est pro omnibus, quoad sufficientiam, estò non quoad efficaciam, ut in 3. part. ostendetur, & omnes redemit; sicut pro omnibus, & singulis hominibus mortuus est, distributiue quidem, & non solum pro generibus singulorum, ut malè interpretatur Iansenius; ergo Deus voluntate antecedenti etiam infidelibus dat auxilia sufficientia saltem remotè ad fidem suscipiendam.

Prob. etiam illa Scrip. Ioan. c. 1. *Illuminat omnem hominem venientem in hunc Mundum*; quæ ex communi PP. consensu intelligenda est de lumine gratiæ, quo hominibus datur potestas, ut filij Dei fiant. Vnde D. Prosper de vocat. gent. lib. 2. c. 14. ait. *Neque ex hoc excusabiles sunt nationes* (loquitur de infidelibus) *quia hac abundantia gratia vari antea largitate non fluxit. Adhibita enim semper est vniuersis hominibus quædam superna mensura doctrina, quæ etsi parcioris, occultiorisque gratia fuit sufficit tamen sicut Dominus iudicauit, quibusdam ad remedium, omnibus ad testimonium.* Sic etiam discurret D. Ambrosius super illud Psal. 18. *Misericordia tua Domine plena est terra*; sic D. Aug. super illud Psal. 18. *Non est, qui se abscondat à calore eius.* Cæterum faciunt pro hac quæst. quæ in prima part. dicta sunt in disp. de Diuina Voluntate, & Prouidentia.

DISPUTATIO V.  
De Gratia habituali.

QVÆSTIO I.

*Vtrum Gratia habitualis creetur immediatè à Deo,  
vel potius educatur de potentia Animæ.*

**N**Ot. 1. Quod apud Theologos gratia habitualis, gratia sanctificans, gratia gratum faciens formaliter, & gratia iustificans sunt penitus synonyma imposita eidem rei solum ob diuersas connotationes, & effectus, dicitur enim habitualis, quia inhæret Animæ per modum habitus, dicitur sanctificans, quia præstat Animæ, cui inhæret formalem sanctitatem; dicitur gratum faciens formaliter, quia reddit formaliter Animam gratam, & acceptam Deo; dicitur iustificans, quia transfert hominem de statu iniustitiæ ad statum iustitiæ, & adoptionis Filij Dei, & potest sic describi. Est forma quædam supernaturalis intrinsecè Animæ inherens, reddens eandem iustam, & gratam Deo, & potentem ad elicienda opera meritoria de condigno; quæ omnia ex dicendis patebunt.

Not. 2. Quod in hac quæst. sunt duæ opiniones, Prima est D. Thomæ, & Thomist. in p. 1. q. 45. art. & alibi negantium gratiam habitualemente creati; Ratio fundamentalis est, quia in eorum sententia creatio propriè dicta est tantum subsistentium; cum igitur gratia non sit ens subsistens, sed forma accidentalis Animæ inhærens, consequens est, ut creati nequeat, sed educatur de potentia obedientiali Animæ. Altera est Scoti in 4. d. 1. q. 4. Alens. p. 2. q. 9. D. Bonau. 2. d. 24. art. 1. q. 4. imo & quorundam Thomist. ut notat Boyuin, nempe Soti, Ferrariensis, Paludani, & etiam Caiet. contra Suarez, & Vasquez, & Gonet. qui contendunt; D. Thomam oppositum docere.

Concl. Gratia habitualis à solo Deo per creationem producitur est Scot. l. c. Prob. quoad 1. part. nempe, quod sit à solo Deo. Nulla creatura quantumvis perfecta potest esse causa principalis gratiæ sanctificantis, nec etiam ipsemet Christus quatenus homo: ergo à solo Deo producitur.

Prob.

Prob. ant. Per infusionem gratiæ sanctificantis datur Spiritus S. iuxta illud Apost. ad Rom. 5. *Charitas Dei diffusa est in cordibus nostris per Spiritum S. qui datus est vobis*: ergo non nisi à Deo potest esse gratia habitualis. Prob. quoad 2. p. Quod educitur de subiecti potentia, est in illo virtualiter: sed gratia, cum sit donum supernaturale, nequit contineri in Anima: ergo nec de ipsius potentia materiali, seu subiectiua educitur. Prob. 2. Gratia habitualis infunditur à Deo Animæ: ergo non educitur ab Anima hoc namque est discrimen inter infundi, & educi quod forma, quæ infunditur, veniat ab extrinseco, & forma quæ educitur, veniat ab intrinseco subiecti. Resp. Thomistæ neg. mai. primæ probationis, & dicunt ad veram educationem sufficere quod concurrat subiectum in genere causæ materialis cum dependentia formæ productæ ab ipso.

Ad 2. rationem resp. gratiam dici infundi, quia nobis confertur supra ordinem, & debitum naturæ non verò quia fiat sine concursu materiali ipsius Animæ. Et si opponatur quod in Sac. Scrip. indicatur gratiam creati ut in Psal. 50. *Cor mundum crea*, & ad Galat. 6. *Iustus dicitur non a creatura*, & ad Ephes. 1. *fideles dicuntur creati in Christo Iesu*.

Resp. signanter Gonet. & Caspense. in tract. de gratia, quod etiam secundum D. Thomam gratia in S. Scrip. dicitur creati, non quod secundum suum esse materiale, & physicum producat ex nihilo, sed quia infunditur à Deo nullis nostris meritis præcedentibus, quod habet quandam similitudinem creationis quæ appellari solet creatio moralis.

Contra allatas responsiones arg. 1. Nam cum gratia sit forma supernaturalis, & in sententia Thomistarum participatio diuinitatis dignificari debet à formis naturalibus in productione, ergo dicendum est creati non moraliter, sed physice: 2. Quid importat concursus in genere causæ materialis nisi virtuales continentiam? ergo ne confundantur voces, & res, fateri debent, quod si Anima concurrat per influxum materiale contineat virtualiter gratiam, vel fateri cogantur gratiam propriè creati.

Arg. cont. 1. part. concl. Causans partialiter ultimam dispositionem ad aliquam formam ipsam quoque partialiter producit, v. g. qui producit partialiter calorem, ut octo inducit etiam partialiter formam ignis; sed homo

causant partialiter actus contritionis, qui sunt ultimæ dispositiones ad gratiam sanctificantem; ergo est causa partialis illius. Resp. dist. mai. si forma naturaliter, & necessario sequatur ad ultimam dispositionem, conc. mai. si non naturaliter sequatur, sed exigatur aliqua conditio ex parte agentis extrinseci, ut est in proposito, neg. mai. ut patet de Anima rationali, quæ ad ultimam dispositionem ponitur à Deo in corpore non eam educendo, sed creando.

Arg. 2. Ex actibus supernaturalibus generari possunt habitus supernaturales de facto, ut quidam Scotistæ probabiliter putant, ergo de potentia Dei absoluta tales actus possunt producere etiam habitum gratiæ. Resp. neg. conf. Nam etiam si illi habitus essent supernaturales (ut nunc gratis demus) attamen sunt acquisiti per actus supernaturales, qui cum sint vitales requirunt principium creatum; at gratia cum sit habitus infusus per creationem solummodo est producibilis, ac proinde à Deo solo.

Arg. cont. 2. part. Quando gratia producitur per creationem; vel producitur extra subiectum, vel in subiecto; Non primum, aliàs accidens naturaliter esset sine subiecto; si secundum, ergo gratia non creatur, sed educitur; quia subiectum concurrit ad eius productionem in genere causæ materialis. Resp. Gratiam in primo instanti temporis creati in subiecto; in instanti vero naturæ neque est in subiecto neque extra subiectum quia ut sic consideratur tantum secundum suum esse simpliciter, non verò secundum esse inherentiæ quæ est passio; exinde tamen nequit inferri educi de subiecto.

Arg. 2. Quod creatur non potest corrumpi à causa secunda sed gratia corrumpitur per actionem peccaminosam ergo &c. Resp. dist. min. physicè corrumpitur nego, moraliter, seu demeritoriè, conc. Deus namque statuit auferre gratiam ad positionem peccati mortalis.

Arg. 3. Anima est in potentia obedientiali ad gratiam, sed nequit intelligi quomodo sit in potentia ad illam nisi quia Deus illam educit de potentia obedientiali Animæ; etgo gratia educitur, & non creatur. Resp. dist. mai. Anima est in potentia obedientiali ad gratiam recipiendam, conc. mai. ut ex eius potentia educatur, neg. mai.

*Utrum gratia distinguatur à charitate.*

**N**OT. 1. Quòd in hac quæst. sunt duæ opiniones: Altera Thomistarum cum D. Thom. in p. 2. q. 10. art. 3. asserentium gratiam habituales distinguui realiter à charitate; eò quia gratia sanctificans se habet in ordine supernaturali sicut forma substantialis in naturali: ergo sicut hæc ex communi Philosophorum sententia distinguitur realiter à proprietatibus, & virtutibus actiuis, quarum est radix, ita & illa à virtutibus supernaturalibus, quæ ab ipsa profluunt, sicut proprietates ab essentia; de rebus namque supernaturalibus, seruata proportionem, & præcisâ supernaturalitate, philosophandum est sicut de naturalibus. Altera est Scoti, & Scotistarum in 2. d. 27. §. Ideo dico sic. Dico quod gratia est virtus, & idem ac ipsa charitas, ut patet per multas præeminencias quas Sancti attribuunt aliquando charitati, aliquando gratiæ pro cuius intelligentia sit.

**NOT. 2.** Quòd idem habitus supernaturalis quo homo iustificatur dicitur modo gratia, modo charitas ob diuersam connotata, & munia. Dicitur namque charitas, quatenus est principium, quo nos diligimus Deum; dicitur autem gratia, quatenus est forma, ob quam sumus à Deo dilecti, velut amici, & filij adoptiui, adeoque hæredes vitæ æternæ. Quod quidem posterius connotatum est quid extrinsecum essentiæ ipsius habitus, & per cons. ab ipso separabile, quia posset absolutè habitus charitatis esse in eo, qui non foret Deo gratus, nec ab eo dilectus de potentia absoluta, ut infra dicitur.

**Concl.** Gratia non disting. realiter, nec formaliter à charitate, sed extrinsecè per connotata, & munia diuersa. Prima pars, est contra D. Thom. & etiam D. Bonau. in 3. d. 27. art. 1. q. 3. Secunda pars est contra Boyuin opinantem in tract. de gratia distinguui formaliter à charitate.

**Prob. 1. pars auct. S. Srip.** quæ tribuit effectus proprios gratiæ sanctificantis charitati; utpute facere filios Dei Io. 3. *Videte qualem charitatem dedis nobis Pater, ut Filij Dei nominemur, & simus.* Sanctificare; ad Ephes. 1. *Elegit nos in ipso, ut essemus Sancti, & immaculati in conspectu eius in charitate:* Tollere pec-



peccata 1. Petri 4. *Charitas operit multitudinem peccatorum.* Virire hominem Deo 1. Io. 4. *Qui manet in charitate in Deo manet.* Spiritum super illam inhabitare in nobis ad Rom. 5. *Charitas Dei diffusa est in cordibus nostris per Spiritum S.* ergo cum iidem prorsus effectus sint gratiæ, & charitatis non sunt habitus supernaturales distincti realiter, sed unus tantum.

Prob. 2. ex Concil. Trid. quod sess. 6. c. 7. assignans formalem causam nostræ iustificationis dicit, illam esse charitatem; *Quamquam enim (inquit) nemo possit esse iustus, nisi cui merita passionis D. N. Iesu Christi communicantur, id tamen in hac impij iustificatione fit, dum eiusdem sanctissima passionis merita per Spiritum S. charitas Dei diffunditur in cordibus eorum, qui iustificantur, atque ipsis inharere:* hæc tamen Concil. ubi indubiè, ut notat Herincx est mētio de gratia iustificante; Vnde ex verbis infusionis, & inherentiæ quibus utitur Trid. colligant communiter Theologi naturam gratiæ. Deinde subdit Trid. *Vnde in ipsa iustificatione cum remissione peccatorum hæc omnia simul infusa accipit homo per Iesum Christum, cui inseritur, fides, spes, & charitatem,* ubi non fit mentio distinctæ gratiæ quæ tamen non debuisset reticeri, si ex sensu Trid. foret distincta, & forma principalior, ac radix charitatis & cæterarum virtutum, ut Thomistæ loquuntur. Similiter cap. 10. ait. *Iustitia incrementum potest S. Ecclesia cum orat, Da nobis Domine fidei, spei, & charitatis argumentum.*

Prob. 3. Quia Patres nullibi expresserunt distinctionem inter gratiam sanctificantem, & charitatem, sed passim sanctificationem tribuunt uni, & soli charitati, & signanter D. Aug. lib. de natura, & gratia c. 38. *Charitas Dei, quæ una verè virtus est quicumque virtus est;* ergo &c.

Prob. 4. ratione, Gratia iustificans est vita spiritualis Animæ sed hæc consistit in charitate; ergo charitas est gratia; Min. Prob. Vita Animæ nostræ consistit in hoc quod perfectè uniamur Deo, ipsique inhæreamus; sed id fit per charitatem iuxta Trid. cit. ergo charitas, & gratia sunt omnino unus habitus. Tum quia nulla est necessitas, aut fundamentum distinctionis realis à charitate ut ostensum est ergo &c. Prob. 2. Pars ex Scoto in 2. d. 26. ubi approbat illam sententiam, quæ dicit, Quod gratia formaliter est virtus, quæ est charitas, & quæcunque excellentiæ tribuuntur gratiæ; & charitati, & è conuerso; utraq; enim for-

formaliter equaliter diuidit inter filios Regni, & perditionis, ergo genuina mens Scoti est quod non distinguantur formaliter. Prob. etiam ratione ex mente eiusdem Doctoris; Etenim, sicut non sunt multiplicandæ entitates absque urgente necessitate, ita nec distinguendæ sunt formalitates; sed nulla apparet necessitas distinguendi gratiam sanctificantem à charitate, tanquam diuersas formalitates, quia iisdem effectus qui tribuuntur uni formaliter, tribuuntur alteri ergo &c.

Arg. Principium essendi realiter distinguitur à principio agendi; sed gratia sanctificans est principium essendi supernaturaliter, charitas verò principium operandi: ergo distinguuntur realiter. Resp. assumptum in maiori esse tantum verum respectu formæ accidentariæ ad substantiam, quam omnino debet supponere, ut operetur; imò & ut sit. At in forma accidentaria operante non est verum, quod necesse sit supponere aliam accidentariam non operantem, sed ipsa per se est, & operatur.

Arg. auct. & primo Concil. Viennens. docentis in Sacramento baptismi infundi gratiam informantem, & virtutes & traditur Clement. un. de Trin. & Fide Catholica, quo significatur gratiam distingui ab omni virtute theologica, ac proinde à charitate, & habetur ibi secundum probabiliorē sententiam; ergo probabilius est ponere distinctionem inter gratiam, & charitatem; 2. testimonio Trid. sess. 6. c. 6. ubi dicitur iustificationem esse renouationem interioris hominis per voluntariam susceptionem gratiæ, & donorum, & clariùs in can. 11. damnans eos qui dicunt iustificationem fieri exclusa gratia, & charitate &c. Quæ verba continent distinctionem gratiæ à charitate.

Resp. Concil. docere esse probabilius paruulis infundi gratiam informantem, & virtutes quia, ut explicat Herincx, ibi sub gratia intelligi potest charitas, nomine autem virtutis intelligi possunt cæteræ idest fides, & spes. Imò obseruat Macedo in 2. collat. 7. diff. 2. quod gloss. fauet nostræ sententiæ in Clement. cit. dum ait omnes Theologos concordare de virtutibus theologicis, de moralibus verò discordare; ex quo infertur Concil. non loqui de virtutibus theol. sed moral. Altera Trident. auctoritas, quæ duobus testimonijs continetur, non militat contra Scot.

Non

Non 1. quia dona sunt ultra virtutes theol. & sic nomine doni non intelligitur charitas, sed dona Spirit. S. neque secundum, imò potius nobis fauet; cum utroq; nomine synonimo eandem formam significet, ideoque non pluraliter, sed in singulari subdit: *qua in cordibus eorum per Spirit. S. diffunditur, atque illi inhaeret*, quod etiam adnotarunt, Vega, Frassen, & Macedo.

-Arg. ultimò. Perfectio simpliciter distinguitur realiter à perfectione non simpliciter: sed charitas in Deo est perfectio simpliciter, & gratia non est perfectio simpliciter, nec formaliter ponitur in Deo; ergo gratia, & charitas realiter ab inuicem distinguuntur. Resp. ex Scot. conc. mai. & dist. min. charitas increata est perfectio simpliciter, conc. min. charitas creata, neg. min. nam eadem res, ut supra indicauimus, est charitas, & gratia; diuersa tamen ratione; dicitur enim charitas, quia est principium dilectionis meritoriae, & dicitur gratia, quatenus per ipsam quis acceptatur ad vitam æternam. Hinc rectè colligitur, quod charitas est magis communis, quàm gratia; charitas enim est quid transcendens, & illimitatum, ac proinde ut sic præcisa descendit in charitatem limitatam, & illimitatam; adeoque dicitur Deus charitas, est, non vero dici potest Deus gratia est.

### QVÆSTIO III.

*Vtrum gratia habitualis ex natura rei intrinsecè hominem iustificet.*

**N**Ot. 1. Quòd Scot. in 1. d. 16. q. 2. §. ad solutionem videtur declarasse effectum formalem gratiæ, vocans illam spiritualem formam, decorem pulchritudinem rationalis creaturæ: & infra art. 3. dicit esse formam constituentem Animam templum Dei, qua mediante Spiritus S. inhabitat, & quol. 17. art. 2. in calce eam denominat formam deiformem constituentem hominem Diuinum, vel Diuinæ naturæ consortem; Deinde declarat effectus eius in genere causæ efficientis, videlicet quod sit ratio cur acceptetur à Deo natura rationalis in ordine ad vitam æternam: similiter quod sit ratio inclinandi voluntatem ad determi-

natos actus specialiter etiam Deo acceptabiles, velut de condigno meritorios beatitudinis.

Not. 2. Quod in hac quæst. sunt duæ opiniones, una est Thomistarum asserentium cum D. Thoma gratiam physicè, & ex sui natura reddere hominem iustificatum, & Dei amicum, absque alia Dei ordinatione, quemadmodum albedo formaliter reddit parietem album. Altera sententia est Scoti in 1. d. 17. q. 2. & alibi; quem præter Scotistas sequuntur etiam Ocham, Ricard Gabriel, Durand, & alij docentes gratiam secundum suam entitatem intrinsecam, & essentialem in esse qualitatis, præscindendo à quocunque Dei decreto, non esse causam formalem iustificationis, & aliorum effectuum, quos illa producit, benè tamen prout substat Diuinæ ordinationi, quatenus Deus statuit hominem præditum gratia habituali, liberari à peccato, fieri amicum Dei, filium eius adoptivum &c.

I. Concl. Effectus formales absoluti habitus gratiæ in genere qualitatis sunt, voluntatem hominis venustare, ornare, spiritualiter decorare, & insuper inclinare voluntatem ad Deum amandum, præscindendo tamen à debitis circumstantiis; gratia enim non inclinat ad Deum amandum hic, & nunc super omnia, sed tantum in genere moris. Hanc tradit Vulpes de mente Scoti. Prob. quoad 1. part. auct. S. Scrip. clamantis in Cant. *Quam pulchra es, & quam decora filia Hierusalem* &c. quæ verba indubiè intelliguntur, etiam de Anima gratia ornata. Prob. ratione. Omnis forma realis, siue substantialis, siue accidentalis, tam materialis, quam spiritualis ponit in subiecto, quod afficit, effectum realem formalem intrinsecum, & inseparabilem, sed gratia est forma accidentalis supernaturalis; ergo debet ponere in subiecto quod afficit suum intrinsecum effectum formalem; subsumo min. sed huiusmodi effectus non possunt esse nisi recensiti in 1. part. concl. ergo &c.

Prob. 2. pars. Habitus quicunque instar speciei impressæ habet determinatum obiectum, à quo specificatur in genere naturæ, & qualitatis; sed gratia habitualis est habitus de genere qualitatis appetitiuus, qui ponitur in potentia appetitiua, idest in voluntate; ergo &c.

Prob. 3. pars nempe quod non inclinet ad amandum Deum talibus, & talibus circumstantiis ex Scoto in 3. d.

28. ubi docet quod habitus gratiæ, ut absoluta qualitas nequit inclinare ad amandum sub circumstantiis, neque formaliter, neque virtualiter, quia habitus absolutus in genere naturæ ut unus fundat habitudinem ad obiectum, unum in genere entis, actus autem amandi Deum, ut sic absolute, est tantum materialiter bonus, honestus &c.

II. Concl. Gratia habitualis non exercet ullam causalitatem physicam circa iustificationem, adoptionem &c. sed moralem, seu theologicam est Scoti loc. cit. Prob. Habitus gratiæ est quædam accidentalis qualitas nullam habens cum Deo connexionem, nec commensurationem ex sua intrinseca natura; ergo in genere naturæ non potest meritorie iustificare, sed tantum theologicè, hoc est ex Diuina ordinatione. Prob. ant. Natura Angelica longè excedit omnia accidentaria supernaturalia, & magis participat de esse Diuino, quàm quodlibet accidens, seu donum supernaturale, sed natura Angelica nullam habet connexionem cum Deo in ordine ad iustificationem, adeo ut naturaliter sit iusta, & sancta, ergo nec etiam gratia, cum sit longè inferioris conditionis id habet ex sui natura, sed tantum ex ordinatione Diuina.

Prob. 2. Nostra sententia asserens gratiam exercere solam causalitatem moralem in ordine ad iustificationem &c. magis propriè saluat modum loquendi, & veritatem Sac. Scrip. & SS. PP. & Concil. unanimi consensu docentium remissionem peccatorum fieri gratis, nostram iustificationem esse opus Dei merè gratuitum &c. Tum quia asserendo causalitatem moralem tantum nullum fit præiudicium gratiæ habituali, ut constat ex dictis, quia sufficienter dignificatur gratia tribuendo ei causalitatem moralem; quemadmodum tribuimus Sacramentis. Tum quia causalitas moralis est vera causalitas, ut in physica ostenditur, & in disp. de Sacramentis in genere; ergo non est necesse ponere gratiam tanquam formam physicè iustificantem seclusa quacunque Diuina ordinatione.

Arg. cont. 2. Concl. Scot. in p. d. 17. q. 2. docet quod ordinatio ad gloriam est effectus formalis gratiæ inhærentis, ergo est effectus ipsius velut formæ iustificantis.

Resp. dist. ant. est effectus formalis ex sua intrinseca natura, nego ant. formalis moralis ex Diuina ordinatione.

concedo ant. Scotus intelligitur in hoc secundo sensu.

Contra ex hac sententia sequitur gratiam habitualement, non esse causam formalem perfectam, & unicam nostræ iustificationis, ut tradit Trid. sess. 6. c. 7. & insuper sequitur quod homo iustificetur solum per fauorem extrinsecum, Dei, idest per eius ordinationem, quod damnatur à Trident. in can. 11. dogmatizante; *Gratiam qua iustificamur, non esse tantum fauorem Dei extrinsecum*; ergo &c.

Resp. ad 1. neg. ant. eò quia, licet gratia sit tantum causa moralis, adhuc dicenda est vera causa moralis formalis, & perfecta, quia ipsa ex diuina ordinatione liberat hominem perfectè à peccato, & iustificatur, ac proinde est unica causa nostræ iustificationis, quia nulla alia qualitas creata præter eam datur, quæ ex diuina ordinatione de facto iustificet formaliter hominem. Ad 2. neg. ant. Etenim non solus fauor Dei extrinsecus, seu ordinatio diuina iustificat formaliter peccatorem prout dicebant quidam Hæretici, contra quos agit Trid. allegatum, sed præterea etiam requiritur ipsa qualitas gratiæ habitualis realiter inhærentis Animæ per modum formæ creatæ à fauore Dei extrinsecò distinctæ, estò moraliter tantum causet in homine iustificationem, ad quam utrumque requiritur, idest & qualitas gratiæ habitualis, & Diuina ordinatio, ita Herincx in tract. de gratia.

Arg. 2. Gratia habitualis est quædam participatio Diuinæ naturæ, ut indicat S. Scrip, ergo cum Diuina natura sit ex intrinseca sua ratione Sancta, ita & gratia, ac proinde, ex intrinseca, & physica ratione causat in homine sanctitatem, adoptionem &c. Resp. dist. ant. Gratia est quædam participatio physica Diuinæ naturæ, nego, moralis, conc.

Contra si gratia est tantum causa, & participatio moralis sequitur quod gratia se habeat solum per modum signi, ex cuius positione Deus iustificet, & adoptet in filium peccatorem; sed hoc est contra Trid. sess. 6. ergo gratia physicè causat suos effectus. Resp. neg. sequelam mai. Nam gratia non tantum significat dignitatem vitæ æternæ, sed est ipsa dignitas; ratione cuius est Deo gratus, & amicus homo habens illam; hæc autem dignitas non ei competit ex natura rei simpliciter, sed ex diuina ordinatione; sicut Rex v. g. non habet regiam dignitatem ex sui natura, sed



ex suppositione quod eligatur in Regem; qua de causa ea dignitas non est in eo physica, sed moralis, ac proinde non est purum signum.

#### QVÆSTIO IV.

*Vtrum Gratia habitualis possit augeri, & destrui.*

**N**Ot. 1. Quod diuersi sunt hæreticorum errores circa hanc quæstionem. Primus fuit Iouiniani, qui dicebat homines in accepta Dei gratia crescere non posse, ut refert D. Hieron. lib. 2. aduersus eundem hæreticum: 2. tribuitur Kemnitio, qui licet docuerit iustitiam, & sanctitatem posse recipere aliquod augmentum, negauit tamen id prouenire ex bonis operibus, sed aiebat incrementum prouenire ex fide diuinarum promissionum, ac proinde potius ex Dei beneplacito, quàm ex merito operantis: 3. denique error fuit Beguardorum, & Beguinarum, qui putabant homines ad talem sanctitatis, & iustitiæ gradum posse in hac vita pertingere, ut ad ulteriorem perfectionem progressum non dari.

Not. 2. quod quæstio non procedit de potentia Dei absoluta, nam apud omnes pro certo habetur Deum posse augere, vel diminuire gratiam iuxta rationem intensiōis, & remissionis graduum, idque pro libito, & absque respectu ad opera meritoria, vel demeritoria, sed procedit de facto, & de communi lege: hoc autem in quadruplici sensu intelligi, vel agitari potest; Primo ex parte charitatis in se: 2. quatenus gratia est in subiecto; 3. comparando charitatem ut ad Deum; 4. comparando eam ad causam demeritoriam, vel meritoriam: hic verò non loquimur de primo modo, nam indubiè gratia, cum sit habitus, & constet gradibus, potest augeri, & diminui; neque de 2. quia non videtur posse in dubium reuocari: An forma diuisibilis secundum se possit dari in subiecto esse diuisibilem; agitur ergo quæstio præsens in 3. & in 4. sensu.

I. Concl. Gratia habitualis à solo Deo effectiuè augeri, & diminui potest, ac proinde, neque peccatum mortale, neque veniale est causa physica ex pulsione gratiæ. Prob. 1. pars. Cuius productio est creatio, eius corruptio est an-

nihilatio ; sed solus Deus potest aliquid annihilare ; ergo solus Deus potest destruere , vel diminuere gratiam , quam solus effectiuè produxit , ut supra ostensum est de creatione gratiæ . Prob. 2. pars. Si peccatum esset causa physica , expulsionis gratiæ , id præstaret , vel effectiuè , vel formaliter , vel dispositiuè . Primum dici nequit , nam si peccatum mortale gratiam expelleret , deberet in Anima efficere formam aliquam physicè oppositam ipsi gratiæ : at hanc non efficit ; si enim peccatum omissionis sit , nihil physicè afficit ; si peccatum commissionis nil pariter posituum , producit , quod physicè opponatur gratiæ , nisi forte habitum vitiosum , sed ille nec physicè , nec moraliter pugnat cum gratia sanctificante , cum habitus vitiosi per assiduum peccatum contracti remaneant in iustificatis , & eos ad peccatum inclinant teste experientia &c. Secundum etiam dici nequit ; etenim quod expellit aliud tanquam formam , physicam oppositam , & incompatibilem , debet habere illam incompatibilitatem ex natura sua , sed peccatum talem incompatibilitatem non habet , quia idem actus , qui est peccatum mortale , si non fieret liberè , esset idem actus physicè , nec tamen gratiam expelleret ; ergo ex sui natura non habet , ut gratiam expelleret . Neque denique tertium asseri potest . Nam forma , quæ non dependet à physicis dispositionibus , nequit à dispositionibus contrarijs destrui ; ergo cum sic se habeat gratia , nequit dispositiuè dispositione quidem physica expelli à peccato .

II. Concl. Gratia habitualis ex natura sua augeri potest ; & de facto in hominibus augetur ex merito bonorum operum quamdiu in hac mortali vita existant ; itaut nullus sit adeo sanctus , & iustus , qui ad maiorem sanctitatem progredi non possit . Hæc est de fide contra recensitos hæreticos , & habetur apertè in S. Scrip. sic Eccles. 18. *Ne verearis usque ad mortem iustificari* , sic Prouerb. 4. *Iustorum semita quasi lux splendens procedit , & crescit usque ad perfectum diem* ; sic Apocal. 22. *Qui iustus est iustificetur adhuc* . Eadem veritas definita fuit in Concil. Vienn. in Clement. ad nostrum de hæreticis , & Trid. sess. 6. c. 10. & can. 24. ita decreuit . *Si quis dixerit iustitiam acceptam non conservari , atque etiam augeri coram Deo per bona opera , sed opera ipsa fructus solummodo , & signa esse iustificationis adoptiæ , non autem ipsius augenda causa . Anathema*

*maſſe*. Prob. 2. pars nempe quod gratia ſanctificans augeri poſſit non ſolum per actum dilectionis Dei, ſed etiam per opera bona ab auxilio gratiæ procedentia. Apoſtol. pluribi hanc veritatem docet, & ſignanter ad Rom. 6. ubi ait. *Sicut exhibuiſtis membra veſtra ſervire immunditia, & iniquitati ad iniquitatem; ita nunc exhibete membra veſtra ſervire iuſtitia in ſanctificationem*; & apertius ad Colloſ. 1. *Ut ambuletis digni Deo per omnia placentes in omni opere bono fructificantes, & creſcentes in ſcientia Dei, ut in omni virtute confortati &c.* Cæterum 3. pars id eſt quod iuſti per totā vitam iniuſtitia accepta proficere valeant, remanet probata ex ijs, quæ allata ſunt in prob. 1. p.

III. concl. Gratia habitualis per quodlibet peccatum mortale deſtrui poteſt demeritoriè, per nullum autem peccatum veniale minui, vel deſtrui poteſt: eſt pariter de fide. Probatur ex pluribus locis Sacræ Scripturæ ubi traditur homines per quodlibet peccatum mortale privari beatitudine, & excludi à Regni cœleſtis poſſeſſione; & præſertim id clarè indicat Apoſt. ad Galat. ſcribens. *Maniſeſta ſunt opera carnis, quæ ſunt fornicatio, immunditia, impudicitia &c. quæ prædico vobis ſicut prædixi, quia qui talia agunt Regnum Dei non poſſidebunt.* Prob. 2. pars, auct. Concil. Trid. ſeſſ. 6. c. 11. ſic dogmatizantis: *icèt in hac mortali vita quantumvis Sancti, & iuſti in levia ſaltem, & quotidiana, quæ etiam venialia dicuntur peccata. quandoque cadant, non propterea diſſimulet eſſe iuſti, nam iuſtorum iſta vox eſt, & humilis, & verax: Dimitte nobis debita noſtra.*

Arg. cont. 1. concl. & 1. part. Chriſtus diſtribuit gratiam ſingulis prout vult, & non ſecundum cuiuſcunque meritum, ut docet Apoſt. 1. ad Corinth. 2. ergo ſi aliquod ſit gratiæ augmentum, non ſit per bona opera, ſed per Dei diſpenſationem. Reſp. Apoſt. loc. cit. ſermonem facere de diſtributione gratiarum, quæ gratiæ gratis datæ nominantur, non vero de gratia habituali, de qua nunc agimus.

Arg. cont. 2. part. Habitus non poſſunt augeri niſi per actus ſimiles ijs, per quos eliciuntur; ergo gratia ſanctificans cum ſit eadem cum charitate, non poteſt augeri per actus aliarum virtutum, ſed tantum per actum amoris Dei.

Reſp. diſt. ant. habitus acquiſiti, & comparati per actus, conc. ant. habitus infuſi, & per ſolam Dei liberalitatem donati, neg. ant. ſiquidem actus meritorij non concurrunt

physicè ad gratiam augendam; sed solummodo moraliter hoc est, mouendo Deum ad conferendum illud augmentum per modum meriti.

Arg. cont. 3. part. auct. D. Aug. dicentis in Enchirid. c. 121. *Hic veniri ad tantam magnitudinem charitatis, qua maior esse non possit*; ergo potest homo viator deuenire ad tantam gratiam, ultra quam non possit proficere, & progredi.

Resp. neg. conf. Nam D. August. l. c. non agit de charitate secundum intensiorem habitus, sed secundum exhibitionem operis ex genere suo maximo, cuiusmodi est omnia propter Deum contemnere, & mortem pro Deo subire iuxta illud Ioan. c. 19. *Maiorem charitatem nemo habet, ut animam suam ponat quis pro amicis suis*.

Arg. cont. 3. concl. Omne malum in quantum malum aliquid diminuit de bono ex D. Aug. in Enchir. sed peccatum veniale est malum, quia Deus punit pro eo; ergo aliquid diminuit de bono, sed nullum bonum in Anima per contrarium potest diminui nisi charitas; ergo charitas diminui potest per peccatum veniale. Resp. conc. mai. cum toto discursu, & neg. min. subsumptam; quia peccatum veniale non adimit aliquid de bono secundum primum actum, cum actui primo non opponatur, sed adimit de bono in actu secundo non quidem de illo, quod inest, sed de illo, quod natum est inesse.

Arg. 2. Peccatum veniale impedit infusionem charitatis: ergo & conseruationem. Resp. dist. ant. impedit augmentum gratiæ, conc. ant. impedit infusionem ipsius gratiæ, nego: homines passim sunt in aliquo peccato veniali, quando recipiunt e. g. gratiam sanctificantem in Sacramento pœnitentiæ. Immo fieri potest quod etiam augeatur charitas per opera bona, etsi iustus cadat in plura peccata venialia.

## QVÆSTIO V.

*Vtrum gratia habitualis augeatur per actus remissos.*

**N**Ot. Quòd plures, & diuersæ sunt Dôctorum sententiæ circa præsentem quæstionem. Prima sententia asserit iustos per actus remissos neque mereri augmentum

gratiæ, neque propter actus remissos hoc gratiæ augmentum unquam conferri. Ita Durand. in 1. d. 17. q. 8. Secunda tenet iustos per omnes actus mereri augmentum gratiæ; & illud statim conferri, non tamen augmentum charitatis, quod ratione actus remissioris in hac vita, vel in alia conferendus sit. Ita Victoria Thomista in relectione de augmento charitatis part. 1. Tertia sustinet iustos per omnes quidem actus charitatis mereri augmentum gratiæ charitatis, & gloriæ, hæc tamen non augeri statim per actus remissos, sed tunc quando homo per actus feruentiores disponitur ad huiusmodi augmentum, ita Bannes pariter Thomista. Quarta sentit, iustos per omnes actus charitatis mereri augmentum gratiæ, charitatis, & gloriæ, & illud augmentum statim conferri, & successiuè crescere per continuationem temporalem eiusdem actus. Ita Almai. Gabriel, Maior, & alij quos refert, & sequitur Suarez p. 3. & 2. disp. 18. sect. 2. & 4. Quinta denique sententia est Scoti in 4. d. 21. q. 1. ubi docet iustos per omnes actus quidem charitatis mereri augmentum gratiæ, & gloriæ, illud autem, quod debetur actibus remissis, non conferri statim in hac vita, aut saltem non in ipso instanti, quo efficiuntur actus remissiores. In hac eadem sententia est D. Thom. qui in d. 17. q. 2. art. 3. docet omnem actum charitatis mereri augmentum illius, quamuis hoc augmentum non statim conferatur.

Concl. Gratia habitualis augeri potest etiam per actus remissos, & minus intensos. Prob. 1. auct. S. Scrip. & Trident. docentium nostram sanctitatem augeri per quæcumque bona opera, sed actus remissi sunt bona opera: ergo per eos gratia habitualis augetur &c. Prob. ratione Scoti loc. cit. si gratia sanctificans per actus remissos non augetur, cum illa sit semen gloriæ sequeretur, quod Adultus qui plures actus remissos exercuit post Baptismum, non foret beator, nec ampliori beatitudine dignus, quam paruulus, qui statim post baptismum moritur; sed consequens pugnat contra iustitiam remuneratiuam ipsius Dei, quæ etiam minimum opus bonum, puta calicem aquæ frigidæ ex misericordia donatum, non sinit esse absque mercede ergo &c. Confirm. Deus nulla opera mala, quantumuis remissa, sinit esse impunita; Venialia namque puniuntur, vel  
in

in hac vita, vel in alia; ergo pari ratione non debet Deus irremunerata relinquere bona quatumvis minuta, & maxime cum Deus sit proclivior ad præmiationem, quam ad punitionem. Confirm. etiam ex Trid. sess. 6. cap. 16. ubi postquam statuit conditiones ad merendam desideratas, nempe quod sit opus honestum, voluntarium, à gratia procedens, ait. *Nihil ipsis iustificatis amplius deesse, ut vero promeruisse consueantur*; ergo non requiritur actus intensior, quia conditiones assignatæ à Trid. etiam in actu remisso reperiri possunt; & can. 32. definit. *Iustum per bona opera quæ ab eo per Dei gratiam, & Christi meritum sunt, verè mereri augmentum gratiæ, & præmium vitæ æternæ, si tamen in gratia decesseris*. Eandem doctrinam tradunt unanimiter SS. PP. ergo &c.

Arg. cont. Concl. Habitus naturalis solum crescunt per actus ipsis intensiores; ergo similiter habitus supernaturales. Resp. neg. mai. nam virtutes infusæ in sententia D. Thomæ non augentur effectivè, sed meritorie, ut supra monstrauius ex Scot. ac proinde, cum actus etiam remissi sint meritorij, sequitur quod etiam per ipsos gratia habitualis augeatur.

Arg. 2. Sicut dilectio est dispositio ad habitum charitatis, ita maior dilectio debet esse maior dispositio ad maiorem habitum, sed habitus, qui præcedit augmentum charitatis, ad sui introductionem postulavit dispositionem æqualiter intensam, ratione cuius productus est: ergo subsequens augmentum, per quod habitus fit intensior, necessario postulat intensiorem dilectionem, quàm fuerit dispositio actus præcedentis; ac proindè etiam ipse habitus, qui in intensione illi dispositioni fuit æqualis. Resp. conc. mai. quando cætera sunt paria maiorem habitum postulare maiorem dispositionem quàm ille, qui est remissior. At si ex alia parte sit inæqualitas fieri potest, ut eadem intensio, quæ est dispositio ad habitum æqualem, in alia circumstantia sit dispositio ad maiorem, quod contingit in proposito.

Arg. 3. auct. Apocal. c. 3. vbi Episcopus Sardis reprehenditur, quia non erant plena eius opera, sed opera non plena nil aliud sunt quàm opera remissa, ergo &c. Resp. neg. min. Quia per opera non plena non intelliguntur opera remissa, sed opera facta ob inanem gloriam, quæ vacua sunt retributionis, & mercedis.



Quæres 1. Quandomam à Deo conferatur iusto augmentum gratiæ promeritum per opera remissa.

Resp. Variant Doct. in huius dubij resolutione; Etenim sunt, qui censent illud augmentum statim concedi ac opus meritorium elicitum fuit. Ita Gabriel. in 1. d. 17. q. 4. art. 3. Vasquez disp. 220. Alij putant cum S. Thoma 1. 2. q. 114. art. 8. tale augmentum non dari statim, sed tunc quando homo elicit actum intensiorem. Verùm dicendum cum Scoto in 4. d. 21. q. 1. augmentum illud conferri maximè in instanti mortis. Ratio quia, cum actus remissus per se, & physicè non augeat habitum infusum, sed solum dispositiuè, & moraliter, conueniens est, ut Deus, qui suauem modum augendi seruat, non statim augeat, quia non est dispositiō sufficiens, sed in ultimo vitæ; ne videlicet opera remissa sine præmio remaneant; Tum quia Anima in illo instanti propter perseuerantiam in gratia disposita est, ut illi detur tale augmentum. Tum quia ordinariè fit, ut charitas in fine vitæ sit intensior, & consequenter postulet tunc augmentum promeritum.

Dices Concil. Trid. indicat iustificatos ire de virtute in virtutem, & de die in diem bonis operibus crescere, atque magis iustificari; ergo debent suscipere suæ iustitiæ augmentum non solum in fine vitæ, sed statim post elicitionem operis remissi. Resp. Concil. Trid. loqui de operibus intensis, non verò remissis, congruentiori enim modo augeatur charitas in fine vitæ ratione maioris dispositionis, ut supra dictum est.

Quæres 2. An sit de fide gratiam, qua iustificamur, esse quid habituale, & permanens.

Resp. cum Herincxp. 2. d. 4. de iustificatione q. 3. saltem post Concil. Trid. nemo Doctorum catholicorum negat conferri in iustificatione, siue Adultorum, siue paruulorum gratiam habitualement; Quare plures censent nunc esse de fide. Alij esse fidei proximum. Alij esse de fide quoad iustificationem paruulorum, non tamen Adultorum; saltem dum iustificantur extra Sacramenta. Alij denique esse valde temerarium id negare, ut etiam tenet Frassen, ut pote contra omnium Doctorum huius temporis, & fidelium sensum absque fundamento. Prob. ex Trident. sess. 5. can. 5. ubi generaliter definit post baptismum conferri gratiam,  
que

quæ tollit peccatum, non confertur autem actus aliquis v. g. contritionis, aut dilectionis, ut patet, ac proinde per gratiam intelligitur donum aliquod habituale, & permanens. Confirmatur exemplo paruulorum, qui sunt incapaces actuum, in quibus proinde gratia iustificans illos est quid habituale, & consequenter etiam in adultis. Deinde Trid. sess. 14. c. 4. docet in Sacramento poenitentiae conferri gratiam, ad quam disponit, siue contritio, quæ plerumque præcedit tempore susceptionem, adeoque effectum Sacramenti; siue attritio, hæc autem gratia nequit esse actus, sed actum consequitur. Vnde ulterius infertur etiam extra illa Sacramenta iustificari hominem per donum habituale. cum Trid. eodem planè modo loquatur de utraque iustificatione, & effectu illius, seu gratia.

Confirmatur hæc doctrina per idem Trid. eò quia enumeratis sess. 6. c. 6. actibus dispositiuis subiungit c. 7. impium proportionatè ad illos actus iustificari per susceptionem gratiæ recipiendo quisque suam, quæ sonant non actum elicitum, sed gratiam habitualement infusam, uti & illud quod can. 3. definit, diligentibus gratiam conferri, & c. 11. Eandem inherere, item diffundi. Et sess. 7. can. 67. & 8. de Sacramentis in genere docet dogmatizzando, Sacramenta non ponentibus obicem infallibiliter ex opere operato conferre gratiam sanctificantem primam, vel secundam, sed non conferunt actum, ergo habitum. Hæc Herincx.

## QVÆSTIO VI.

*Vtrum gratia ponatur immediatè in Anima essentia, vel in eius potentia, idest voluntate.*

**N**ot. Quòd in hac quæst. sunt duæ opiniones. Prima est D. Thom. in 1. p. q. 110. art. 4. & Thomistarum asserentium gratiam principalius esse in essentia Animæ, quorum præcipuum fundamentum est, quia gratia est radix, & vita omnium beatorum, ut patet ex Aug. de laude charitatis, at vita principalius pertinet ad essentiam: ergo gratia immediatè ponitur in essentia. Tum quia Anima se habet ad perfectiones supernaturales, sicut ad perfectiones naturales, sed respectu perfectionum naturalium prius Ani-

Anima perficitur secundum essentiam, quam secundum potentiam, ergo, cum gratia sit quædam perfectio supernaturalis, prius est in essentia Animæ; quam in potentia. Secunda opinio est Scoti in 2. d. 26. q. 1. docentis gratiam immediate poni in voluntate, & mediata in Animæ essentia, ideo sit.

Concl. Gratia immediate ponitur, seu inest voluntati, & mediata essentia Animæ. Est Scoti loc. cit. & D. Bon. eadem dist. art. 1. q. 1. Prob. 1. auct. D. Aug. sermone 12. de Verbis Domini c. 12. ubi ait. *Gratia se habet ad lib. arb. sicut sessor ad equum, sed lib. arb. immediate ponitur in voluntate*, ergo & gratia. Prob. ex Scot. ratione. Gratia perficit Animam quatenus est operatiua actus meritorij; ergo debet inesse Animæ quatenus est sic operatiua; sed Anima non est operatiua actus meritorij nisi per voluntatem, ergo gratia ponitur in voluntate, per quam Anima operatur.

Confirm. Sapientia non debet poni in Anima quatenus essentia est, sed quatenus habet intellectum, quia est determinatiua actus intellectus; ergo pari ratione gratia, quæ ordinatur ad eliciendos actus meritorios, debet inesse Animæ quatenus habet voluntatem. Prob. 2. Gratia est aliqua forma in Anima, sed omne quod est in Anima vel est passio, vel potentia, vel habitus ex 2. Ech. sed gratia non est passio, vel potentia: ergo est habitus, at omnis habitus est in potentia: ergo &c. Tum quia iustitia, & iniustitia sunt formaliter in voluntate ex D. Ansel. in lib. de conceptu virginali c. 3. ergo cum gratia sit quædam iustitia, debet esse in potentia, in qua est iniustitia.

Prob. 3. Quando aliqua forma est indeterminata secundum virtutem actiuam ad plura, id, quod præcisè respicit unam actionem determinatam, non potest esse perfectio eius in quantum est indeterminata, sed bene in quantum est potentia determinata respectu istius actionis, perficitur a tali perfectione e. g. si Anima est indeterminata ad plures actus, Sapientia perficiens non perficit Animam, quatenus est indeterminata, sed quatenus est intellectiua, ergo pariter gratia perficit Animam quatenus volitiuam, ut supra. indicauimus.

Arg. 1. Essentia est magis indeterminata quam potentia, ergo magis indiget determinatiuo, ac proinde gratia pon-

nenda est principalius in essentia Animæ, quàm in potentia: Resp. Scotus dist. ant. Essentia magis est indeterminata in ratione operatiui proxime neg. nam sic essentia non est operatiua in ratione operariui; remotè conc.

Arg. 2. forma, quæ determinat ad agendum, potius debet poni in principali agente quàm in instrumento, sed essentia est principale agens, & potentia eius instrumentum; ergo &c. Resp. ex Scoto dist. mai. debet magis esse in essentia quàm in instrumento separato extrinseco, conc. mai. quàm in instrumento coniuncto intrinseco naturali, nego maiorem.

Arg. 3. Habitus, qui immediatè recipiuntur in potentijs solum ordinantur ad actus huiusmodi potentiarum; at gratia non solum ordinatur ad actus voluntatis, sed etiam ad actus omnium potentiarum; ergo nõ recipitur immediatè in aliqua potentia. Resp. dist. min. ordinatur ad actus voluntatis, & aliarum potentiarum eodem modo, neg. min. diuerso modo, conc. Siquidem ordinatur effectiue ad actus voluntatis, imperatiue autem ad actus cæterarum potentiarum: ex dictis patet quid sit respondendum ad fundamentum Thomisticæ opinionis: idcò &c.

## DISPUTATIO VI.

### *De Iustificatione primo effectu Gratiæ habitualis.*

#### QVÆSTIO I.

*Vtrum Adultus debeat aliquas dispositiones præmittere in ordine ad iustificationem.*

**N**Ot 1. Quodd iustificatio multipliciter sumitur. Primo pro lege, quæ iustitiam docet, ut Psal. 18. *Iustificationes tuas custodiam, Docce me iustificationes tuas.* 2. sumitur pro acquisitione iustitiæ, ut ad Rom. 8. *Quos vocauit, hos iustificauit*, idest transtulit à statu peccati ad statum gratiæ, quæ translatio vocatur à Theologis iustificatio: 3. sumitur pro augmentatione iustitiæ, ut in Apocal. c. 22. *Qui iustus est, iustificatur adhuc* 4. sumitur pro declaratione iustitiæ per aliquam sententiam iuridicam, quo pacto Iudices eos, qui in-

ter Reos censentur, iustificant aliquando, idest innocentes declarant, ut in Prouerb. c. 17. *Qui iustificat impium, & qui condemnat iustum, uterque abominabilis est apud Deum*; hic autem loquimur tantum de iustificatione secundo modo accepta idest pro acquisitione iustitiæ. Cæterum hæretici usurpant tantum iustificationem quarto modo, in quantum non reddit hominem ex peccatore iustum, sed ipsum iustum declarat imputando ei iustitiam Christi, qua reguntur peccata, quæ reuerà, & realiter remanent, sed non ampliùs imputantur, de quo errore infra &c.

Not. 2. quod iustificatio habet duos terminos, unum à quò, alterum ad quem, & pro solito more denominatur non à termino à quò, sed à termino ad quem, seu ab acquisitione nouæ formæ, ut calefactio, dealbatio &c. Itaque iustificatio pro termino à quò habet, vel iustitiæ priuationem, ut iustificatio peccatoris, vel meram, & simplicem negationem iustitiæ absolutè, ut iustificatio Angeli, & Adæ, vel negationem iustitiæ intensioris, ut iustificatio secunda, quæ pro termino ad quem habet secundam, hoc est augmentum gratiæ, seu iustitiæ præexistentis. Dicitur autem iustificatio dupliciter scilicet actiua, & passiua; prior est actio, qua Deus facit creaturam intellectualem iustam: posterior est iustitiæ receptio. Cæterum iustificatio pro formali sic describi solet. Est translatio hominis à statu quo quis nascitur Filius primi Adæ, vel in quo detinetur sub peccato personali, ad statum gratiæ habitualis, & adoptionis filiorum Dei per secundum Adam Iesum Christum; Ita ex Trid. sess. 6. c. 4. quæ quidem descriptio, cum sit de se clara, non indiget alia explicatione.

Concl. Adultus præmittere debet aliquas dispositiones lib. arb. in ordine ad iustificationem; nequit tamen huiusmodi dispositiones ponere sine præuenienti Spirit. S. inspiratione. Est de fide; & prob. 1. auct. Trid. sess. 6. cap. 4. definientis, quod iustificandi gratiæ excitanti, & adiuuanti liberè assentiendo, & cooperando disponantur, & can. 4. sic dogmatizat. *Si quis dixerit liberum hominis arbitrium à solo Deo motum, & excitatum nihil cooperari assentiendo Deo excitanti, atque operanti, quo ad obtinendam iustificationis gratiam se disponat, ac præaret, inique posse dissentiri, si uolet, sed uelut inanimè quoddam nihil omnino agere, motuq; passiuè se habere,*

*anathema sit*; ergo ex Trid. in Adulto peccatore prærequiritur aliqua dispositio lib. arbit. in ordine ad iustificationem: Eandem veritatem catholicam docent SS. PP. quæ etiam ratione comprobatur. Liberum arbitrium ex nullo capite impeditur à ponenda dispositione sui consensus, seu cooperationis ad gratiam iustificationis obtinendam: ergo ad eandem se disponere debet. Prob. ant. Non impeditur ex eo, quod sit vulneratum per peccatum, quia per gratiam sanatur lib. arb. ex D. Aug. lib. de Spiritu, & lit. Nec etiam ex eo quod lib. arb. per aduentum gratiæ euacuetur, quoad suas vires; quia ut dixit D. Aug. loc. cit. *liberum arbitrium euacuamus per gratiam, absit, sed magis lib. arb. statumus*, ergo ex nullo capite impeditur lib. arb. à ponenda aliqua dispositione requisita ad iustificationem: 2. pars concl. videlicet quod lib. arb. hominis nequeat ponere huiusmodi dispositiones sine præuenienti Spirit. S. gratia patet ex dictis in disputationibus de gratia actuali.

Arg. 1. Concil. Araus. 11. cap. 4. ait, *Us à peccato purgemur, Deus voluntatem nostram non expectat*; ergo &c. Resp. Araus. tantum velle, quod Deus non expectet nostram voluntatem, dum eam præuenit gratia excitante, & adiuuante; expectat tamen nostram voluntatem quatenus excitata gratia actuali se disponit per actus liberos ad iustificationem, ut tradit Trident.

Arg. 2. Si Adultus suo lib. arb. aliquas dispositiones ponere deberet, sequeretur quod peccator proprijs actibus naturæ attingeret suam iustificationem; sed hoc est cont. Trid. sess. 6. can. 1. definiens: *Siquis dixerit hominem suis operibus, quæ vel per naturæ, vel legis doctrinam fecerit &c. posse iustificari anathema sit*: ergo Adultus &c. Resp. si tales dispositiones ex viribus naturæ tantum poneret, conc. mai. si vero ponat gratia excitante adiutus; nego quod adultus ex suis viribus iustificationem attingeret.

Quæres. Quot dispositiones, seu actus præuij ad iustificationem requirantur. Resp. Septem à Concil. Trid. numerantur sess. 6. c. 6. Primus est timor D. Iustitiæ: 2. spes remissionis obtinendæ per Christum: 3. Amor Dei: 4. Odium, seu detestatio peccatorum, idest actus pœnitentiæ: 5. propositum inchoandi nouam vitam: 6. seruandi mandata: 7. suscipiendi Baptismum. De timore dicitur Eccl.



clefiast. c. 1. *Timor Domini expellit peccatum*; nam qui sine timore est, non potest iustificari; Hunc tamen timorem non esse simpliciter necessarium satis ostendit Trident. dicens timore iustitiæ utiliter concuti hominem. Vnde, qui sine isto timore eliceret alios actus, vere iustificaretur. De spe extat testimonium expressum ad Rom. c. 8. *Spo salui facti estis*. Vnde D. Ambros. lib. de pœnitentia c. ait. *Nemo potest bene agere pœnitentiam nisi qui sperauerit indulgentiam*. De dilectione verò Dei dicitur Luc. 7. *Remittuntur ei peccata multa, quia dilexit multum*, & Io. c. 3. *Translati sumus de morte ad vitam, quoniam diligimus fratres*; Qui non diligit in nos in morte, hoc est saltem dilectione inchoatiua, seu initiatiua, ut indicat Trid. De necessitate actus pœnitentiæ dicitur Luc. 11. *Si pœnitentiam non habueritis, omnes simul peribitis*, & Act. 2. *Pœnit. mini, & conuertimini, ut deleantur peccata vestra*. De proposito nouæ vitæ, seu voluntate præcauendi peccatum de cætero habetur Isai. 1. *Lauamini, quiescite agere peruersè* & statim subditur iustificatio. *Si fuerint peccata vestra ut socinum quasi nix dealbabitur*. De proposito seruandi mandata dicitur Ioan. 14. *Si quis diligit, mandata mea seruabit*; & denique de proposito suscipiendi Baptismum, si non est Baptizatus, similiter dicitur. *Nisi quis renatus fuerit ex aqua, & Spiritu S. non potest introire in Regnum Dei*. Cæterum an omnes isti actus sint necessarij formaliter, & expressè ad iustificationem dicetur in disputatione de Pœnitentia,

## QVÆSTIO II.

*Vtrum fides sit necessaria ad iustificationem.*

**N**Ot. 1. Quodd Caluinistæ, & Lutherani lib. 3. instit. c. 2. sess. 9. contendunt fidem esse triplicem correspondentem tribus Dei perfectionibus. Prima dicitur historica, & est quæ credimus vera esse ea omnia, quæ à Deo reuelata in Sacra Biblia continentur, de qua loquitur Apost. ad hebræos c. 11. *Fide credimus aptata esse secula*. 2. dicitur fides miraculorum; quæ coincidit cum historica quatenus connexionem habet virtutem patrandi miracula, nempe credendo, quodd nihil sit quod à Deo fieri non possit, & de hac loquitur Apost. 1. ad Corint. c. 13. *Si habuerim omnem fidem,*

*itaque*

*stant mentes transferam* &c. 3. fides dicitur promissionum, & est, qua credimus veras esse promissiones Dei de gratuita peccatorum remissione per Christi merita; & hanc dicunt Lutherani esse quandam fiduciam, quam habet homo in promissione, & misericordia Dei, de qua dicitur, *qui crediderit, & baptizatus fuerit saluus erit*; Vnde asserunt supradicti hanc solam fidem iustificationi esse necessariam.

Not. 2. Quod in tribus fides hæreticorum à fide Catholicorum differt, nimirum in obiecto, quod illi volunt esse solum Dei misericordiam, quæ credentibus in Christum promissit remissionem, seu non imputationem peccatorum: Catholici verò esse quidquid Deus reuelauit. Deinde in diuersitate subiectorum fidei, quam hæretici tenent esse in voluntate, fiducia enim in voluntate residet: Catholici autem in intellectu. Tandem quoad fidem historicam, quam nos dogmaticam, & catholicam nominamus; Calvinistæ sustinent eam consistere in notitia, nos verò in assensu, ideo &c.

I. Concl. Necessariò ad iustificationem requiritur fides aliqua actualis, quæ non est fiducia aliqua promissionum, vel fiducia specialis, sed est fides historica, seu dogmatica: est de fide contra præfatos hæreticos. Prima pars patet ex Trid. & expressè habetur in S. Scrip. & signanter ad hebræos 11. *Sine fide impossibile est placere Deo*, & Io. 3. *Qui non crediderit iam iudicatus est*. ergo &c. Prob. 2. pars ex ijs, quæ habentur in: Epist. ad hebræos, ubi postquam Apost. dixisset. *Iustus autem ex fide uiuit*, statim sequenti capite exprimit hanc fidem pertinere ad intellectum, & esse historicam per illa verba, *Fide credimus præparata esse sæcula Verbo Dei*: ergo fides, quæ est dispositio præuiua ad iustificationem non est fides promissionis, vel fiducia specialis sed dogmatica &c.

Prob. 2. auct. Trid. damnantis sess. 6. can. 12 asserentes fidem, quæ ad iustificationem disponit esse puram fiduciam. *Si quis dixerit fidem iustificantem nihil aliud esse, quam fiduciam Dei. Misericordia peccata remittentis propter Christum, vel etiam fiduciam solam esse quæ iustificat Anathema sit*: ergo &c. Eandem doctrinam tradunt omnes SS. Patres, ut videre est apud recentiores Doctores. Prob. 3. ratione. Interdum contingit aliquem iustificari per actum fidei formatæ absque fide promissionis, seu fiduciæ, sic Hemeroissa apud Lucam c.

40. refertur habuisse actum fidei formatæ dum dixit. *Si tetigero fruibram vestimenti eius, salua ero*, ideoque statim à Christo vocatur filia, quo iudicatur eam esse iam vi illius actus fidei iustificatam secundum D. Hieron. expendentem illam Scrip. & deinde Christus primò hortatur illam ad habendam fiduciam per hæc verba. *Confide filia*: ergo fides promissionum per fiduciam acceptam non est necessaria dispositio ad iustificationem, ac proinde debet esse fides illa, quæ est actus intellectus. Insuper. Nullibi extat aliqua specialis promissio Dei reuelata, quod Caluino, Luthero, vel alij peccatori in specie sint remissa peccata: ergo circa hoc nequeunt hæretici habere fidem, qua iustificentur. Nec sufficit generalis promissio Dei in Scrip. reuelata, quod omnibus rectè conuersis Deus remittat peccata; quia saltem nullus textus Scrip. Caluino, vel Luthero, vel aliæ particulari Personæ dicit se rectè esse conuersos. Quare circa huiusmodi conuersionem istæ particulares Personæ nullam fidem iustificantem possunt exercere, quæ semper innititur obiecto reuelato.

II. Concl. Fides dogmatica sine operibus non sufficit ad iustificationem. Est de fide contra recentiores hæreticos.

Prob. 1. auct. S. Scrip. & signanter Iacob. 2. dicitur. *Fides sine operibus merua est*, & ad Galat. c. 5. *In Christo enim Iesu neque circumcisio aliquid valet, neque praputium, sed fides, quæ per charitatem operatur*. Quæ quidem Scripturæ etiam à Trid. allegantur definiente sess. 6. c. 7. fidem sine operibus non sufficere ad salutem. Idem docent SS. Patres præsertim apud nostrum Bernard. VVetueis in suis controuersis, & Belarm. lib. 1. de iustificatione cap. 13. ergo fides dogmatica sine operibus non sufficit ad iustificationem.

Arguunt Hæretici 1. auct. Apost. ad Rom. c. 1. docentis iustificationem sequi ex fide promissionis illis verbis. *Ideo ex fide, ut secundum gratiam firma sit promissi omni semini &c.* ergo &c. Item in S. Scrip. iubetur nos orare cum fiducia, obtinendi quod petimus; sic enim habetur Iacob. 1. *Si quis vestrum indiget sapientia postulet à Deo, & dabitur ei, postulet autem in fide nihil hafitans*: ergo fides accepta pro fiducia est dispositio ad iustificationem, cum ea indeget homo iustificari desiderans. Resp. ad 1. auct. nego Apost. loqui de fide accepta pro fiducia bene tamen pro fide dogmatica quam habuit

Abra-

Abraham de omnipotētia Dei, qua effecturus erat aliquando, ut promissiones eius adimplerentur, sibi factæ de conuersione gentium ad fidem, & aduentu Messie ex semine suo; & sic esset Pater futurus omnium credentium, non solum Iudæorum secundum circumcisionem, sed etiam gentium secundum fidem. Quare de hac fide dogmatica sequitur in eodem capite: *Conseruatus est* ( idest Abraham ) *Fide dans gloriam Deo plenissimè sciens, quia quæcumque promissit Deus, potens est facere.* Ad secundam concedimus quod nostras orationes comitari debeat aliqua fiducia, puta ut non dubitemus Deum posse donare, quod petimus, negamus tamen fiduciam in sensu hæreticorum, qui volunt quòd nos in particulari certò impetraturi sumus quod petimus, quia nullibi constat absque reuelatione, quod orans oranes conditiones necessarias ad ritè orandum posuerit.

Arg. cont. 2. concl. 1. Act. c. 13. dicitur. *In hoc omnis, qui credit iustificabitur.* Lucæ c. 7. refertur de Magdalena; *Fides tua te saluam fecit,* & c. 8. *Credite tantum, & saluaberis:* quæ quidem auctoritates, & maximè ultima apertè indicant fidem sine operibus ad iustificationem sufficere. Resp. Quod præfati textus S. Scrip. loquuntur de fide formata; non enim dicunt solam fidem, cum alibi manifestè præcipiant, ut mandata Dei seruemus si volumus ad vitam ingredi; ergo non sola fides iustificat, sed præter fidem requiruntur omnia supradicta definita à Trid. Cæterum 3. & ultima auct. non sunt intelligendæ de fide in ordine ad iustificationem, cum ibi sit sermo de fide Matris requisita ad patrationem miraculi, ut filia sanaretur, ac proinde non est ad rem. Ex doctrina superius tradita apertè, & euidenter deducitur; falsissimam, & temerariam, & scandalosam prorsus esse 23. propositionem: ab Innocentio XI. meritò damnatam, quæ est talis. *Fides late dicta ex testimonio creaturarum, sine aliis moribus ad iustificationem sufficit.*

### QVÆSTIO III.

*Vtrum iustificatio impij fiat per solam imputationem iustitiæ Christi.*

**N**Ot. Quòd variant hæretici in assignanda ratione formalis iustificationis. Lutherus asserit in coment. c. 12.

ad Galatas causam formalem nostræ iustificationis esse, Christum fide apprehensum, & ibidem esse fidem ipsam, addens insuper sola fide hominem iustificari, nullamque in nobis esse iustitiam inhærentem. Melancthon in apologia confessionis augustanæ art. 4. 5. 6. ait non propter ipsam fidei virtutem, sed propter Christi meritum fide apprehensum, nos coram Deo reputari iustos, & in hoc convenit cum Luthero, quod solam iustitiam imputatiuam admittat. Holiander non agnoscit iustitiam imputatiuam cum Lutheranis, nec inhærentem cum Catholicis, sed inhabitantem, quæ nil aliud est, quàm iustitia ipsius Dei, qui inhabitans in nobis, nos reddit iustos per iustitiam, quæ illi essentialis est. At si hoc verum esset sequeretur, quod habitando in nobis suam pariter potentiam, misericordiam &c. nobis communi caret. Calvinus cum Lutheranis negat quidem iustitiam inhærentem, admittit tamē iustitiam Christi nobis imputatam, & insuper contendit iustificationem consistere nedum in imputatione iustitiæ Christi, sed in remissione peccatorum, quæ non tolluntur reuerà intrinsecè, sed extrinsecè teguntur per illam iustitiam imputatam. Bucerus denique in lib. concordia consentit esse aliquam iustificationem imperfectam, quæ in virtutibus inhærentibus consistit, sed aliam perfectam dicit esse necessariam, quæ non est nisi iustitia Christi nobis imputata. Hæ sunt Nouatorum opiniones hæreticæ.

I. Concl. Causa formalis iustificationis nostræ, seu iustificatio nostra non fit per iustitiæ Christi imputationem; hæc est de fide definita in Trid. sess. 6. can. 11. *Si quis dixerit homines iustificari, vel sola imputatione iustitiæ Christi, vel sola peccatorum remissione, exclusa gratia, & charitate, qua in cordibus eorum per Spiritum, S. diffundatur, atque illis inherere; aut etiam gratia, qua iustificamur esse tantum fauorem Dei, anathema sit.* Et infra. *Vnica formalis causa est iustitia Dei, non qua ipse iustus est, sed qua nos iustos facit, qua videlicet ab eo donati renouamur spiritu mentis nostra &c.*

¶ Prob. ratione. In rebus fidei nihil ex propria mente fingendum, sed tantum ea sunt credenda, quæ habentur ex S. Scrip. ex Concil. ex Patribus, & ex traditionibus; sed nullus ex omnibus ijs afferri potest locus, qui dicat iustitiam Christi nobis imputari, aut nos per iustitiam eius effici

ci iustos; ergo gratis hæc sibi fingunt Calvinistæ, & Lutherani. Prob. 2. Christus iustificando peccatores restituit eis quod in Adam perdididerant: sed in Adam non perdidimus iustitiam imputatam sed veram iustitiam inherentem: ergo talis iustitia reparatur in iustificatione. Prob. 3. Si iustificaremur per eandem iustitiam numero, quæ in Christo est, censeremur æqualiter iusti, ac ipsemet Christus, qui est tons, & origo omnis iustificationis; sed hoc nullus sanæ mentis dicere audebit ergo &c.

II. Concl. In iustificatione peccata non teguntur, sed verè delentur, & tolluntur. Hæc pariter est de fide contra recensitos hæreticos definita in Concl. Trid. sess. 6. can. 5. & sess. 6. c. 7. can. 11. & sess. 5. can. 5. ubi sic dogmatizant. *Si quis per Iesu Christi Domini nostri gratiam, qua in baptismo confertur, eorum peccati originalis remitti negat, aut etiam asserit non tolli totum id, quod veram, & propriam rationem peccati habet, sed illud dici tantum radi, aut non imputari, anathema sit.* Habetur eadem veritas expresse in S. Scrip. & signanter Zacchar. 3. *Ece abisti à te iniquitatem tuam, Ioan. 1. Si confiteamur peccata nostra, fidelis est, & iustus, ut remittat nobis peccata &c*

Prob. ratione. Si peccata remanerent in homine iustificato sequeretur, quod iudicium Dei non esset secundum veritatem, quod indicat Apost. ad Rom. 2. Quomodo enim homo reuerà iniustus, iustus à Deo iudicaretur non imputando illi peccata, quæ reuerà haberet? Planè hoc iudicium non esset secundum veritatem, quia non iudicaret rem sicuti est in se: Immò, quod est verè culpa, censeret non esse culpam, ac proindè hominem peccato, & sordibus plenum pronunciaret, ac declararet iustum, & Sanctum, quod est manifestum absurdum. Si respondeant Calvinistæ Deum imputare quidem ad culpam peccatum hominis iustificati, quia verè culpa in illo remanet; non imputare tamen ad pœnam, ex pura misericordia, idem absurdum sequitur, quia Deus nequit sine iniustitia non punire quod iudicat esse dignum pœna.

Arg. cont. 1. concl. In Psal. 31. *Beati dicuntur, quorum tolluntur peccata*, ergò in iustificatione impij, peccata non tolluntur, sed teguntur. Item in eodem Psal. habetur *Beatus vir, cui non imputauit Dominus peccatum*, sed non imputare, non est tollere, ergo iustificatio peccatoris, nil aliud est:



quàm non imputatio peccati, quod est idem ac tegere peccatum. Resp. Hæreticos in prauum sensum detorquere S. Scrip. quæ pluribi docet deletionem, ac destructionem iniquitatis; quare attendere debent hæretici, quod ipsa Scrip. dicit. *Beati, quorum remissa sunt iniquitates.* Vnde peccati tectio non est tegere physicè aliquod vulnus, seu maculam, sed est vera curatio, & abolitio, & tam perfecta, ut nec remaneat illius vestigium; quo sensu Patres prædictos textus interpretantur.

Arg. cont. 2. Concl. auct. D. Pauli 1. ad Corint. c. 1. ubi ait. *Christus factus est nobis Sapientia, & iustitia, & Sanctificatio, & redemptio*, ergo nos iustificamur per imputationem iustitiæ Christi, & non per aliquam formam Animæ inhærentem, qualis est gratia. Resp. Apost. loqui in sensu causali, non autem formali.

Cont: Arg. 2. in Psal. 142. dicitur: *Non intres in iudicium cum seruo tuo Domine, quia non iustificabitur in conspectu tuo omnis vivens.* Ergò nostra iustificatio est iustitia Christi.

Resp. Dauid non voluisse negare, recitatis verbis, nullum iustificari in conspectu Dei, cum in Psal. 17. dixisset, *Retribuet mihi Dominus iuxta iustitiam meam &c quia custodiui vias Domini &c &c* & *ere immaculatus cum eo*; Itaque huiusmodi loquendi modo, vult significare, quod non iustificabitur quis in conspectu Dei, siue, quia iustitia iustorum vera quidem est, sed non ab ipsis est, cum sit donum Dei, ut Aug. expendit, siue quia non est pura omnino, cum culpis quotidianis, venialibus tamen admisceatur; siue quia, etsi pura foret, comparatione infinitæ iustitiæ Diuinæ nulla videtur; Vnde dicebat Iob. c. 4. *Numquid homo comparatione Dei iustificabitur?* & c. 9. *Non iustificabitur homo comparatus Deo*; idest comparatus Deo, & c. 19. *Si habuero quidpiam iustum, non respondebo, sed meum in iudicium detrahebam.*

Arg. 3. In Isaia c. 64. habetur. *Facti sumus uti immundi omnes nos, & quasi pannus menstruatus vniuersa iustitia nostra*: sed huiusmodi verba indicant maculas, & sordes in nobis iustificatis, ergo iustificamur per imputationem iustitiæ Christi, & peccata tecta remanent, & non tolluntur.

Resp. Prophetam loqui in persona populi impij, de quo subdit, non est, idest vix est, qui innocet nomen tuum, quod tamen Isaia ipse, indubiè inuocabat, velut iustifi-

catus, & iustus, ut glossant D. Hieron. & noster Adam Sabot, & alij.

Arg. ultimò ab hæreticis. In Sac. Scrip. iustificare, idem est, ac declarare iustum, ut patet per ea, quæ scribit Paulus ad Rom. c. 5. opponendo iustificationem condemnationi sic: Sicut per unius delictum, omnes homines in condemnationem, sic per unius iustitiam omnes homines in iustificationem vitæ, sed condemnatio est declaratio peccati, ergo iustificatio est declaratio iustitiæ, ergo quando Deus dicitur iustificare homines, est idem ac dicere illos declarare iustos per iustitiam Christi, quæ illis imputatur, ac proinde non est illos per aliquam formam inhærentem iustos efficere, & peccata tollere.

Resp. Estò aliquando maior propositio vera sit de aliquo loco S. Scrip. non tamen semper iustificatio sumitur pro declaratione iustitiæ, ut liquidò patet, ex loc. cit. ubi Apost. docet. Sic nos constituit iustos per obedientiam Christi, sicut constituti sumus per inobedientiam Adami, sed per Adamum amisimus iustitiam inhærentem, ergo per Christum in iustificatione, recuperamus iustitiam intrinsicam, hoc est gratiam Animæ inhærentem.

#### QVÆSTIO IV.

*Vtrum non solum gratia habitualis, sed etiam actus contritionis, seu dilectionis, sit forma iustificans.*

**N**Ot. 1. Quòd à Trid. definitum est, in sess. 6. hominem iustificari per habitualis gratiæ infusionem; idque docuit & Scot. in 1. d. 17. q. 1. Dubium tamen est, an effectus iustificationis formalis sit ita proprius gratiæ habitualis, ut de facto nunquam fiat hominis iustificatio, nisi per gratiam, nec aliter evenire possit, etiam per potentiam Dei absolutam. Et quidem dubitatio est de perfecta contritione, & dilectione Dei super omnia; an videlicet, propter excellentiam intrinsicam talis actus vim habeat iustificandi, non tantum per modum dispositionis, ut de facto se habet, & à Theologis docetur, sed etiam per modum causæ formalis, adeout, sine infusione gratiæ posset iustificare hominem.

Not. 2. Quòd circa hanc quæstionem, ut supra explicatam sunt tres opiniones. Prima, quæ est valde communis, denegat hanc vim actui contritionis, & dilectionis Dei, non solum de facto, sed etiam de possibili, ita Suarez, Valentia, Sot. Bellarmin. Vega, Caspensis, & alij Recentiores. 2. ex diametro opposita primæ, concedit actui contritionis, & dilectionis, hanc vim iustificandi, & de possibili, & de facto. Ita Vasquez disp. 207. Meratius tract. de gratia. Hurtad. tract. de pœnit. Turrian. opus. 6. disp. 4. & nonnulli alij; quæ quidem opinio, inquit Vasquez eius Auctor, non est contra Ecclesiæ definitionem, quam, ait, definisse solum contra sectarios, fieri iustificationem, per formam inhærentem, non per imputationem; an verò hæc forma sit actus, vel habitus, Ecclesia non definiuit. 3. opinio, est Scoti in 1. dist. 17. q. 1. Scotistarum, & Thomistarum, qui docent actum perfectæ contritionis, & dilectionis Dei super omnia de facto non iustificare formaliter, sed tantum dispositiue, quatenus sunt dispositiones proximæ ad iustificationem, ut definit Trid. sess. 6. c. 6. Cæterum de possibili, posse esse causam formalem nostræ iustificationis: sit igitur secundum nostram sententiam.

Concl. Actus perfectæ contritionis, vel dilectionis Dei super omnia non habent vim iustificandi formaliter de facto, bene tamen de possibili. Hæc quoad 1. part. est Scoti, & D. Thomæ; à qua non est recedendum, ut ait noster Herinx, sed omninò asserenda. Prob. 1. ex Trid. cuius veritati, & doctrinæ sententia opposita minus videtur consona, ait Gonet. in suo Comp. Theolog. Concilium sess. 6. c. 7. docet, unicam esse causam formalem nostræ iustificationis, nempe iustitiam Dei, non qua ipse iustus est, sed quæ nos iustos facit. Quòd verò hæc iustitia, ex eius mente sit solum gratia habitualis, non verò aliquis actus, patet ex initio eiusdem capituli, ubi dicit hanc iustificationem, fieri per voluntariam susceptionem gratiæ, & donorum; Item sess. 14. c. 4. ait, contritionis motum præparare ad remissionem peccatorum, si coniunctus sit cum fiducia diuinæ misericordiæ, sed quod disponit ad remissionem peccatorum, non est ipsa forma iustificans, cum inter formam, & dispositionem reperiatur aliqua causalitas, & dependentia, ac proinde realis distinctio, ergo ex Trid. actus contri-

tritionis, non est causa formalis iustificationis. Confirm. Causa formalis iustificationis, non impetrat veniam, & remissionem peccatorum, sed illam formaliter causat, at contritionis actus, seu dilectionis non causat formaliter veniam, & remissionem peccatorum, sed eam solum impetrat, ut patet ex Trid. ibidem dicente; *Fuit autem quoniam tempore ad impetrandam veniam peccatorum, hic contritionis motus necessarius*, ergo idem quod prius.

Resp. Turrianus, cum Vasquez sensum Concilij esse, hominem non iustificari per aliquod inhærens simul, & per imputationem Dei extrinsecam, uti dicebant Canonici Colonenses, & ex hæreticis Bucerus, & Ken nitius. Verum, etsi Trid. hunc quoque sensum intendat, tamen ibidem pronunciauit in eo sensu hoc dogma, videlicet, unicam esse causam formalem nostræ iustificationis, ut dici non posset, unum hominem per unam formam iustificari, & alium per aliam diuersæ rationis, quia forma iustificationis debet esse una, & eadem in omnibus iustis, quare cum paruuli iustificentur per baptismum, absque ullo suo actu, & adulti accedentes ad Sacramentum pœnitentiæ cum sola attritione, per solam gratiam habitualement, tanquam per formam iustificentur, consequens est, ut & alij iusti eadem gratia habituali iustificentur. Quamvis, ergo concedatur præcipuum Concilij intantum eo loco fuisse, hæreticorum errores refutare, attamen hunc quoque alium sensum intendit, neque enim nouum est, Concilia interdum in confutando uno errore, aliud dogma statuere, ut est in proposito. Prob. ultimo, ratione Scoti in 1. dist. 17. quam Cardinalis de Lugo æstimat à priori sic. Status Sanctitatis, & iustitiæ est status firmus, & habitualiter perseverans, ergo provenire debet ab aliqua forma habituali perseverante, sed actus contritionis ex sui natura est facile transiens, ergo actus contritionis requirit dare statum iustitiæ habitualis, & permanentis.

Prob. 2. pars. In nostra sententiâ, ut infra ostendetur, potest Deus de potentia absoluta remittere peccatum mortale, absque infusione habitualis gratiæ per solam extrinsecam condonationem, ergo tanto magis id à Deo fieri poterit mediante actu contritionis, & dilectionis perfectæ Dei.

Arg. cont. 1. part. concl. 1. auct. S. Scrip. quæ in Prouerb. cap. 10. habet. *Vniuersa delicta operis charitas*, & in 1. Epist. D. Petri c. 4. *Charitas operis multitudinem peccatorum*; ergo & c.

Resp. ad auctoritates adductas, & confimiles, intelligendas esse de dilectione, & charitate habituali. Neque dicat Vasquez de charitate habituali explicari non posse, sicut nec eodem modo explicandæ sunt auctoritates SS. Patrum, & signanter D. Aug. ut minus rectè ait Vasquez, nunquam de charitate habituali est loquutus. Planè falsum est, nunquam D. Aug. loquutum fuisse de charitate habituali, nam, ut Scotus ipse in 1. d. 17. q. 1. obseruauit in argumento ad oppositum de charitate habituali D. Aug. expressè in lib. de moribus Ecclesiæ c. 4. sermonem fecit de charitate habituali, super illud ad Roman. Quis nos separabit à charitate Christi. *Charitas hæc, dicta est virtus qua animi nostri rectissima est affectio*. Resp. 2 quod si aliqua testimonia S. Scrip. vel Patrum, loquuntur de ipso actu dilectionis, & contritionis, non sunt intelligenda formaliter, sed dispositiuè tantum, ut supra dictum est.

Arg. ratione ab eodem Vasquez. Contritio, & dilectio Dei est perfectissimus actus, quem creatura cum auxilio Dei elicere potest, ergo est forma ex sui natura sanctificans, & à peccato emundans. Resp. neg. conf. & ratio est, quia, licet actus charitatis sit omnibus perfectior in genere perfectionis actualis; attamen de facto attingere nequit perfectionem gratiæ habitualis; hæc enim sola præstat dignitatem amicitiae Dei, ac Diuini amoris, & ipsa sola est ratio acceptandi, tam naturam, quam actum, ut docet Scot. loc. cit.

Arg. 1. cont. 2 part. Actus dilectionis Dei, & contritionis, de facto non est dispositio ad iustificationem impij, ergo nec de potentia Dei absoluta potest esse forma ipsius iustificationis. Prob. conf. quia dispositio, etiam de potentia absoluta, nequit esse forma respectu illius effectus, cuius est dispositio, ut patet de calore ut octo, qui ut dispositio ad expellendam formam aquæ nequit esse forma, vel causa formalis talis expulsionis, sicut nequit esse forma substantialis, ergo & c. Resp. neg. conf. ad cuius probationem dist. ant. dispositio, quæ ex sui natura est talis, ut calor, ut octo adductus pro exemplo, conc. ant. dispositio, quæ

quæ non habet ex sui natura, saltem completè nequit esse, per absolutam Dei potentiam, forma respectu illius effectus, cuius est dispositio, neg. ant. Siquidem contritio, seu etiam dilectio Dei, ex sui natura intrinseca, seclusa Diuina ordinatione, non est dispositio necessitans ad formam, ac proinde ipsamet dispositio, per absolutam Dei potentiam, potest esse velut forma iustificationis, non quidem per modum permanentiæ physicæ in Anima, bene tamen per modum permanentiæ moralis.

## QVÆSTIO V.

*Vtrum Deus de potentia absoluta possit iustificare peccatorem absque infusione gratiæ; aut physica mutatione peccatoris.*

**N**ot. 1. Quòd iustificatio perfecta peccatoris, inuoluit. Primo remissionem peccati mortalis: 2. restitutionem diuinæ amicitiae: 3. recuperationem filiationis adoptiuae Dei, & consequenter iuris ad hæreditatem æternam. Quæ omnia iuxta supernaturalem Dei prouidentiam, seu dispositionem perficiuntur renouatione interioris hominis, per infusionem gratiæ, ad quam homo adultus se disponit per actus fidei pœnitentiæ &c. ut ex Trid. diximus supra.

Not. 2. Quòd circa hanc 1. part. quæst. sunt tres opiniones, duæ extremæ, & una media. Prima docet, non posse remitti peccatum mortale sine gratia, seu sine aliqua forma sanctificante intrinseca, & inhærente, ita Thomistæ p. 2. q. 113. art. 2. & plures recentiores neutrales: 2. opinio arbitrat, Deum de sua potentia absoluta, posse peccata remittere, non solum sine gratia habituali, sed etiam, sine quacunque alia forma, & entitate, aut mutatione physica peccatoris, vel restituendo illum ad statum puræ naturæ sine aliqua iustitia, vel sanctitate, vel etiam aliquo alio modo illum iustificando, ita Alenf. D. Ben. Scot. cum suis, & Ocham cum Nominalibus: 3. denique opinio media asserit in pura natura peccatum potuisse deleri absque forma sanctificante, in natura autem eleuata ad finem supernaturalem, non posse remitti sine forma sanctifi-



ficante, ita Bellarmin. Zumel, Martin. Gonet, quorum sententiam probabilem existimant Vasquez, Turrianus, & alij recentiores.

I. Concl. Omne peccatum, siue personale, siue originale non solum in pura natura, sed etiam in natura iam eleuata ad finem supernaturalem, posset à Deo ex vi alterius prouidentiae ab ea, quæ nunc est, remitti absque infusione formæ sanctificantis, & absque ulla forma intrinseca. Est Scoti, & Doctorum secundæ sententiæ. Prob. Scotus sic. In humanis verè remitti potest iniuria illata, per puram illius condonationem, absque collatione alicuius doni intrinseci, ut constat ex terminis, ergo idem poterit Deus præstare respectu iniuriæ sibi illatæ, conf. prob. nam Deus potest efficere omne id, quod non dicit contradictionem, seu imperfectionem, sed nulla contradictio, seu imperfectio in proposito apparet; ergo &c.

Prob. 2. quidquid Deus concedit ad petitionem creaturæ, potest etiam concedere pro sua libertate, absque ulla præuia petitione, sed sic est, quod solus Deus, de facto aufert, & remittit habituale peccatum, esto ad petitionem, vel exigentiam creaturæ, idest gratiæ, & contritionis, ergo potest de potentia absoluta remittere peccatum mortale ex sua sola voluntate, per solam extrinsecam condonationem absque præuia petitione.

II. Concl. Deus potest remittere peccatum mortale de absoluta potentia, absque physica mutatione peccatoris. Hæc est Scoti in 4. d. 14. q. 1. §. ex his contra Thomistas, & quosdam alios; procedit tamen Conclusio de adultis, nam de paruulis loquendo, certum est de facto iustificari per gratiam, in Baptismo eis collatam, sine motu voluntatis eorum. Prob. 1. ratione Scoti, desumpta ex humanis, quæ etiam utitur Lugo disp. 1. de pœnit. sect. 8. Homo offensus potest remittere offensam sibi irrogatam absque eo, quod offendentem pœniteat facti, aut illud retractet, ergo multo magis id potest facere Deus, qui est infinitè misericors, sed sic est, quod remissa offensâ, remittitur peccatum, ergo &c. Prob. 2. licet peccatum sit voluntariè à peccatore commissum, non repugnat remitti absque illius voluntate; dummodo voluntas eius actu non peccet; ergo potest expelli peccatum per solam gratiæ habitualis infusionem.

Ant.

**Ant. prob. dupliciter; 1. quia commissio peccati,** pendet per se à libera peccatoris voluntate, eius autem remissio est opus Dei, ergo à Deo tantum dependet, peccatum remitti, vel non. Deinde, eo ipso, quod homo cessat ab actu peccandi, status peccati, seu habituale peccatum iam non est ei amplius voluntarium actualiter, ut patet, nec virtualiter, quia virtuale voluntarium, non est sine aliquo voluntario actuali, in quo illud contineatur, neque est voluntarium interpretatiue, quia sic dicitur voluntarium, cum quis potest, & tenetur illud facere, & non facit, quæ ad rem nostram non pertinent, ergo ad summum non est voluntarium, nisi causaliter, & quodam morali modo; quo sensu voluntaria dici solent votum, matrimonium, & alij contractus humani iam facti, ac proinde Deus potest de potentia absoluta remittere peccatum mortale, absque ulla mutatione physica voluntatis peccatoris; quod clarè patet de dormiente, cui Deus posset dare gratiam sanctificantem, absque ullo actu peccatoris.

**III. Concl. De potentia absoluta potest recuperari filia-** tio adoptiva, & ius ad hæreditatem æternam absque gratia interna, aut physica mutatione peccatoris; ita communiter Doctores, & signanter Herincx disp. 4. de iustificatione q. 7. Prob. Ex natura rei, ut constat, in humanis fieri potest adoptio, per solam adoptantis voluntatem, etsi adoptato nihil intrinsece conferatur, ergo à fortiori potest Deus eligere aliquem in filium, cui conferat hæreditatem æternam, absque gratia interna, aut physica mutatione peccatoris. Confirmatur, nam posset Deus constituere aliquem Regem absque eo, quod illi conferret aliquod donum internum, ergo cur similiter non poterit constituere hæredes, & Reges Regni cœlestis.

**IV. Concl. Potest etiam Deus de potentia absoluta,** peccatorem sibi habere amicum absque gratia interna, non tamen amicitia ex utraq; parte completa. Prima pars patet ex dictis, eò quod, si potest Deus peccatori remittere peccatum, & eundem adoptare in filium, ut supra dicebamus, nulla ratio apparet, quin similiter possit in eo, tanquam filio sibi complacere, & sibi gratum habere. Prob. 2. pars, ex Arist. 8. Eth. c. 2. & 9. Ad completam utrimque amicitiam communiter requiritur amor benevolentia reciprocus,

cus, fundatus in reciproca bonorum communicatione, & notus utrique amicorum, sed hæc fieri non possunt absque physica mutatione peccatoris, & præsertim absque amore, seu dilectione ipsius erga Deum: ergo &c.

Cæterum huiusmodi amicitia non semper requiritur in ordine ad perfectam iustificationem, quæ defacto fit, cum in carentibus usu rationis non sit amor actualis, nec reciproca Dei dilectio sit ipsis nota: immo & ipsi adulti cum Sacramento iustificari possunt, absque eo quod actum amoris benevolentiae eliciant; ut Deo dante dicetur in tract. Sacramenti pœnitentiæ.

Arg. cont. 1. concl. Iustificatio ex Trid. est translatio à statu peccati ad statum gratiæ; ergo iustificatio impij, fieri nequit absque infusione gratiæ: cons. est evidens, quia deducitur ex rei definitione. Resp. Trid. diffinire iustificationem, prout defacto fit, non verò de possibili, de qua nunc agitur.

Arg. 2. nequit assignari obiectum D. voluntatis in iustificatione facta absque infusione gratiæ; ergo, nec de possibili haberi potest iustificatio, absq; gratiæ infusione. Prob. ant. Etenim in nostra sententia non potest esse carentia gratiæ, cum ex hypotesi, gratia non infundatur, vel restituatur; neque potest esse actus ipse præsens, ut sic, quia iste tolli non potest, neque negatio condignæ satisfactionis, quia ista à peccatore satisfaciente tolleretur, si tolli posset, & ab eo æqualiter satisfieri, ergo remanet tollenda solum negatio ipsa Divinæ condonationis, ac proinde Deus intantum remittit peccatum, in quantum à peccatore tollit condonationis negationem; hæc autem non tollitur, nisi per condonationem ipsam, & consequenter voluntas, quam Deus habet condonandi peccatum, directè habebit pro suo obiecto formali, ipsam condonationem.

Resp. breuiter neg. ant. ad prob. satis prolixam dicimus, quod in nostra sententia, cum peccatum consistat in condignitate ad pœnam, vel in reatu ex peccato præterito, in peccatore relicto, quod idem est ac permanentia moralis peccati transacti, obiectum D. voluntatis est illa condignitas, vel reatus peccati habitualis, quod erat obiectum odij rationabilis Dei, ut patet etiam in humanis.

Arg. 1. cont. 2. concl. Peccatum pendet adequatè à so-

la hominis voluntate ; ergo nequit tolli à Deo, absque aliqua mutatione physica peccatoris . Resp. dist. ant. Peccatum pendet adequatè &c. in fieri conc. in condonari nego, imo condonatio à solo Deo dependet, etsi de lege ordinaria requiratur dispositio peccatoris adulti, non verò paruuli, cui condonatur peccatum originale absque ulla prorsus mutatione &c.

Contra. Carentia retractationis peccati habitualis est de essentia ipsius, adeout nequeat tolli, nisi ex parte peccatoris ponatur actus retractationis ; ergo Deus nequit de potentia absoluta peccatum condonare absque mutatione peccatoris : ant. patet, quia peccatum habituale non manet in ratione voluntarij, nisi quatenus non retractatur, nam post retractationem iam non est voluntarium, sed involuntarium. Resp. neg. assumptum ; etenim peccatum, etiam posita retractatione, adhuc manet in ea ratione voluntarij, quæ est de ratione peccati habitualis, ut patet de peccatore non habente actum perfectum, sed imperfectum contritionis, in quo simul manent peccatum, & retractatio, id est actus contritionis imperfectæ.

Contra. Si Peccatum, absque retractatione posset tolli, ergo posset Deus condonare peccatum eodem instanti, quo committitur sed hoc dicit repugnantiam ergo &c. Resp. neg. sequelam mai. Quia peccatum, eo ipso, quo condonatur, tollitur, & destruitur ; Peccatum autem, eodem instanti, quo fit, tolli nequit quia tunc esset peccatum, & non esset ; non esset quia à Deo tolleretur, ut supponitur, esset, quia voluntas actu peccaret.

## QVÆSTIO VI.

*Vtrum gratia, & peccatum, de potentia Dei absoluta possint esse simul.*

**N**Ot. Quòd circa hanc quæst. versantur duæ sententiæ una affirmatiua, altera negatiua. Negatiuam tenent Thomistæ, & quam plures Neuterici, hac præcipua ratione ducti, eo quia, si gratia, & peccatum possent esse simul, sequeretur, quod quis esset iustus, & iniustus, peccator, & Sanctus, Amicus Dei, & inimicus, quæ omnia  
aper.

apertè repugnant. Affirmatiuam sententiam docent D. Bonau. Scot. in 2. d. 28. v. q. 1. in 4. d. 1. q. 1. & alibi, & omnes Scotistæ, nec non Ocham cum suis Nominalibus, & alijs, qui sentiunt, iustificationem non esse effectum physicum gratiæ, sed moralem tantum, & ex ordinatione Diuina. Sit igitur.

Concl. Gratia, & peccatum mortale, de potentia Dei absoluta possunt esse simul in eodem subiecto. Prob. breuiter, quia in superioribus questionibus, plura de hac questione tacta fuerunt. Nulla est repugnantia, ergo à Deo fieri potest, ut gratia, & peccatum sint simul. Prob. ant. si esset aliqua repugnantia, hæc maximè ratione oppositionis, quæ est inter gratiam, & peccatum, sed hæc oppositio non est physica, & ex natura rei, ut aliàs dictum fuit, sed moralis, & ex Diuina ordinatione ergo &c.

Prob. min. Si gratia, & peccatum opponerentur ex natura rei, reduceretur talis oppositio ad aliquod, ex illis quatuor generibus oppositionibus; at hoc non apparet, non enim opponuntur relatiuè, ut patet, neque contradictoriè, ut affirmatio, & negatio; peccatum namque non est pura negatio cum sit in subiecto capaci gratiæ. Neq; contrariè, quia hæc oppositio est inter formas positiuas, peccatum autem non est quid positium physicum, etsi gratia sit forma positua; nec tandem priuatiuè, ut opinantur Thomistæ. Nam peccatum actuale, consistit in priuatione actuali honestatis debitæ inesse actui, non in priuatione gratiæ; habituale vero in reatu, vel iuxta communem sententiam in permanentia morali eiusdem actus, non dum retractati, & condonati. Quod si aliquo modo inuoluit priuationem habitus gratiæ materialiter, & concomitanter, hoc verum est de facto, & regulariter iuxta leges iam statutas, non autem absolutè, & ex natura rei, ergo absolutè, & simpliciter, nec priuatiuè opponitur, ac proinde nulla est repugnantia, quæ impedire possit D. potentiam, quin gratia, & peccatum stent simul &c.

Arg. cont. concl. Gratia, ut gratia excludit necessariò peccatum, ergo gratia, & peccatum nequeunt simul consistere. Resp. dist. ant. Gratia, ut gratia, idest quatenus est forma sanctificans, & ex Diuina ordinatione reddit habentem Deo, gratum, conc. gratia, ut qualitas, seu in ge-

nere entis neg. ant. in hoc igitur sensu dicimus, gratiam stare posse per Diuinam potentiam cum peccato. Neque talis gratiæ distinctio est à Scotis solis conficta; cum insignes Theologi, ut adnotauit Mastrius, præfatam distinctionem recipiant.

Arg. 2. Implicat, aliquem esse simul iustum, & iniustum, Deo gratum; & exosum, dignum gloria, & simul indignum, immo æternæ damnationi addictus, sed homo per gratiam sanctificantem ita se haberet, si consisteret cum gratia peccatum mortale: ergo &c. Resp. conc. mai. & dist. min. de potentia ordinaria, conc. de potentia absoluta, neg. In tali enim casu, homo haberet solum gratiam in genere qualitatis, non verò quoad alios effectus, quos non possidet gratia, ex natura rei, sed ex Diuina ordinatione. Adde, quod esse gratum, & exosum Deo, & idem dicendum de cæteris, non sunt effectus contradictorij, sed tantum contrarij, prouenientes ex diuersis fundamentis, ac proinde, non implicat esse simul; quemadmodum non implicat, quod filius Regis iure primogenituræ dignus sit corona, & Regno, & indignus ijs sit propter scelera, & propter coniurationem in ipsum Patrem.

## QVÆSTIO VII.

*Vtrum Contritio perfecta peccatoris, procedat effectiue ab habitu gratiæ, seu charitatis.*

**N**ot. 1. quod duplex est dispositio ad gratiam sanctificantem, alia proxima, alia remota; Ad proximam dispositionem pertinent actus illi, quibus in eodem instanti temporis est annexa gratia habitualis, seu infusio ipsius, & sunt contritio perfecta & dilectio Dei super omnia; Ad remotam autem spectant illi actus, qui gratiam præcedunt; Quare hic non agitur quæstio de remotis, quæ cum tempore gratiæ existentiam præcedant, ab ipsa procedere nequeunt, sed de proximis, nempe de dilectione Dei super omnia, & de contritione perfecta, quæ ex Trid. sunt ultima dispositio, quam infallibiliter sequitur infusio gratiæ, & iustificatio, ut etiam definiuit Greg. XIII. & Pius V. contra Michaellem Baium.

Ecc

Not,



Not. 2. quod apud omnes Theologos pro certo habetur, tam dilectionem, quam contritionem effectiuè procedere ab auxilio speciali supernaturali, ut aliàs ostensum est contra Pelag. difficultas tamen est, an contritio, & dilectio procedant efficienter, etiam à gratia habituali, circa quam difficultatem sunt duæ opiniones. Prima est Thomistarum, & nonnullorum Neutericorum, & signanter Valentiz, & Vasquez putantium, actum charitatis, qui est ultima dispositio ad gratiam habitualement, procedere ab habitu charitatis, & consequenter à gratia immediatè, si hæc à charitate non distinguatur, & immediatè si sint duo habitus inter se distincti. Quam quidem sententiam, Gonet. ex communi doctrina Thomistarum sic declarat. Gratia habitualis, quæ in iustificatione infunditur, potest considerari duobus modis, secundum quos duo munia exercet. Primò, ut est in fieri, seu infundi, & prout se tenet ex parte Dei illam communicantis: 2. ut est infusa, & in facto esse, & quatenus se tenet, ex parte hominis illam accipientis. Primo modo gerit vices auxilij mouentis: 2. habet rationem habitus, & formæ permanentis, atque dantis esse diuinum participatiuè, esse gratum Deo, & obiectum congruum dilectioni eius, & quia primum munus est propter secundum, prius exercet primum, quam secundum ordine executionis; Quare prius prioritate à quò comunicatur Animæ in ratione auxilij mouentis, quàm in ratione habitus, & formæ sanctificantis, ut communicata prius in ratione auxilij disponat per actus contritionis, & charitatis, ad sui naturalem receptionem, in ratione habitus. Hactenus Gonet. cui infra satisfiet: 2. opinio est Scot. Alens. D. Bonau. Richard. Suarez, Coninch, eamque sequuntur ferè omnes Recentiores, immò & quidam Thomistæ, ut Io. à S. Thoma, Hacquetus eandem sententiam, de mente D. Thomæ defendunt, & nouissimè Contesonus pariter Thomista, sit igitur.

Concl. Neque contritio perfecta, neque dilectio Dei super omnia, cum sint dispositio ultima, & proxima ad gratiam habitualement recipiendum, effectiuè procedere possunt ab ipsa gratia sanctificante. Est Scoti expressa sententia, in 4. d. 14. q. 2. estque conformis doctrinæ Trid. perspicuè docentis sess. 14. c. 4. contritionem fuisse quocunque tem-

pore necessariam, ad impetrandam peccatorum veniam, quod etiam antea docuerat sess. 6. c. 7. cum post descriptam dispositionem ad iustificationem necessariam subdit, hanc dispositionem, seu præparationem iustificatio ipsa consequitur, quæ non est sola peccatorum remissio, sed & sanctificatio, & cap. 5. 6. & 7. dicit, hominem speciali Dei auxilio adiutum, se disponere ad susceptionem, & can. 3. definit, hominem per auxilium gratiæ posse se disponere, ut ei iustificationis gratia conferatur. Ex qua doctrina, euidenter deducitur contra Caiet. & Gonet, & alios Thomistas, Trid. distinguere auxilium, seu gratiam actualem à gratia habituali, ac proinde, siue gratia consideretur ut in fieri, & quatenus homini à Deo communicatur; siue consideretur in facto esse, nulla ratione potest producere ultimam, & proximam dispositionem, idest contritionem, & dilectionem perfectam, cum illas necessariò præsupponit. Prob. ratione. Gratia habitualis infunditur homini, quia est contritus, vel quia diligit Deum super omnia, ergo talis contritio nequit esse ab ipso habitu gratiæ, tanquam à principio eliciente talem actum: conf. patet, quia si contritio eliceretur ab habitu gratiæ esset vera hæc causalis; homini infunditur habitus, ut conteratur, sed hoc repugnat priori propositioni causalis, ergo non potest admitti. Min. Prob. nam lumen gratiæ eo ipso, quod datur Animæ, ut videre possit, non potest illi infundi, quia videt, ergo hæc gratia sanctificans datur homini, ut conteratur; cum repugnet priori causalis, hoc est: Ideo homini gratia infunditur, quia est contritus, vel quia diligit Deum super omnia.

Prob. 2. Non potest concipi, quod aliquid sit dispositio, seu præparatio necessaria ad alterius productionem (qualis est contritio respectu productionis charitatis) nisi prius habeat esse; ergo contritio nequit à gratia habituali accipere esse, cum iam supponatur habere esse. Confirmatur, quia gratia habitualis nil potest efficere nisi sit, & Animæ prius inhæreat, sed quando gratia inhæret, iam supponit contritionem præcessisse: ergo &c. Prob. etiam ratione philosophica. Generaliter dispositio, etiam ultima ad formam, non procedit ab ea effectiue, sed ab agente cum præsupponatur formæ in genere causæ efficientis, ergo &c.

Arg. Gonet, cont. nostram concl. sic in suo Compendio

Theol. tract. 7. de gratia §. 6. De ratione actus vitalis est, quod procedat à principio proximo vitæ, ut coniuncto principio radicali, sed actus contritionis, & charitatis sunt vitales vita spirituali; ergo procedunt ab habitibus charitatis, & pœnitentiæ, ut coniunctis gratiæ sanctificanti, quæ est principium radicale, vitæ spiritualis supernaturalis.

Resp. conc. mai. & dist. min. sunt vitales, vel à gratia actuali, vel habituali, conc. à gratia habituali semper, neg. min. Etenim in nostro proposito influxus gratiæ actualis se habet velut principium sufficiens ad eliciendum actum supernaturalem, ac proinde vitæ spiritualis &c.

Arg. 2. Non repugnat, causas esse sibi inuicem causas; ergo neque repugnat contritionem esse dispositionem ad gratiam, & gratiam esse per modum auxilij actualis causam ipsius contritionis. Resp. ant. esse verum tantum de causa efficiente, & finali; hæc enim tantum moraliter causat mouendo efficiens secundum suum esse præoptatum, ideoque in suo esse reali potest adhuc à causa efficiente physice dependere.

Arg. afferendo exemplum aperitionis fenestrationis, quo Thomistæ putant, satis ostendere causas posse esse sibi inuicem causas, etiam in genere formali, & materiali. Ventus ingrediens per fenestram illam aperit in genere causæ efficientis, ingressus venti est prior, & deinde sequitur aperitio fenestrationis; e diuerso autem in genere causæ materialis, prior est aperitio fenestrationis, & deinde sequitur ingressus venti, qui certè ingredi non posset, nisi prius tolleretur impedimentum fenestrationis clausæ: ergo à simili philosophandum est de gratia &c. Resp. exemplum nec quidem à longè posse currere cum gratia, & eius dispositione; Siquidem ventus, qui ingreditur est causa illius aperitionis, non tamen, ut ingressus intra spatium, in quo erat fenestra, sed ut veniens usque ad contactum cum fenestra, sic per contactum impellit fenestram, ut relinquat locum. Itaque ventus, ut attingens cum vi fenestram, est causa aperitionis illius; hæc verò est causa prærequisita, ut ventus ulterius progrediatur ad partem spatij, in quo erat fenestra: Vnde hoc exemplum nimis materiale non est proportionatum ad explicandam causalitatem efficientis, & formalis, & materialis; sunt, & aliæ rationes, quæ, cum dependeant à Doctrina, quæ tradi-

ditur in physica agendo de causis; videri possunt signanter apud Mastr. disp. 5. Phys. q. 8. arr. 1. & in lib. de generatione, & disp. 8. phys. & Cardinal. de Lugo de pœnitent. disp. 8. sect. 8. ubi latè examinat hoc exemplum, & alia in fauorem nostræ sententiæ, ideo &c.

Quæres 1. An infusio gratiæ, & remissio peccati sint duæ mutationes, vel una tantum.

Resp. ex Scot. in 4. dist. 16. q. 2. quod sunt duæ mutationes, quarum una est realis, & positiua, & hæc est transitus à priuatione gratiæ ad ipsam gratiam, altera negatiua, vel priuatiua rationis, & hæc est transitus à peccato ad negationem ipsius peccati; Quas mutationes clarè indicat Trident. sess. 6. c. 7. inquiring. Iustificationem non esse solam peccatorum remissionem, sed & renouationem, etsi ab eodem Trid. c. 4. describantur per modum unius, docendo iustificationem esse translationem à statu peccati ad statum gratiæ; idque ratione connexionis necessariæ, quam inter se habent de facto.

Quæres 2. quomodo se habeant ad inuicem in iustificatione infusio gratiæ, & expulsio culpæ.

Resp. quod Scot. in 4. dist. 16. q. 2. mouens hoc dubium, in terminis de remissione peccati, & infusione gratiæ, quæ nam eorum sit prior, dicit, quod via generationis prior est expulsio culpæ, at via perfectionis prior est infusio gratiæ; Et subdit; Quod Deus, licet in iustificatione impij ordine intentionis prius velit homini gratiæ infusionem, quam culpæ remissionem; ordine tamen executionis, prius vult, illi non inesse culpam; quam inesse gratiam, & ita loquuntur Scotist. ibidem, ut aduertit Mastrius, præsertim Aretin. art. 4. Hiribames disp. 14. sect. 6. Faber de pœnitent. disp. 17. c. 3. Mastrij, circa præsens dubium. Quod hæc quæstio decidenda est, iuxta dicta in generali, de ordine introductionis nouæ formæ, & expulsionis antiquæ disp. 5. Phys. q. 3. arr. 2. & disp. 5. de generatione, & corruptione, q. 4. licet enim gratia, & culpa non opponantur inter se formaliter, & ex natura rei, sed tantum moraliter; quoniam tamen hæc moralis oppositio equiualeat repugnantiae physicae, & ex natura rei, eo quia, sicut illa, quæ physicè repugnant, sunt pro quolibet instanti impossibilia, & in eodem subiecto repugnantia, ita repugnant tantum mora-

liter, stante præfixa lege, & inter se omninò repugnant; ideo pari proportionè de repugnantia gratiæ, & culpæ discurrendum est, petendè ac si repugnarent ex natura rei. Quamvis enim peccatum actuale in privatione consistat debitæ rectitudinis, habituale tamen quid positivum morale importat, aut saltem per quid tale explicatur. Sicut ergo loc. cit. generatim dictum est, introductionem formæ novæ esse natura priorem expulsionè antiquæ, & illam causalem, esse absolutè veram, nempe, quia forma nova introducit, ideo prior expellitur; Sic pariter in proposito dicimus infusionem gratiæ esse natura priorem expulsionè peccati, & hanc causalem, esse absolutè veram. Quia gratia, introducit, ideo culpa expellitur. Hactenus Mastrius, qui hanc resolutionem ptobat, tum auct. Concil. tum ratione phylophica dicendo, prius censetur causam formalem esse, quam effectum, sed remissio peccati comparatur ad gratiam, tanquam effectus formalis ad suam causam ex Trid. ergo &c. Tum Scoti doctrina, quam Doctor tradit in 2. d. 37. q. un. & in 4. d. 1. q. 1. ita etiam sentit Herincx disp. 4. de iustificatione q. 13. n. 78.

Quæres 3. An unum peccatum mortale remitti possit sine alio. Resp. quod si loquamur de potentia ordinaria, Dei nequit unum peccatum mortale sine altero remitti, idque est certissimum apud omnes Doctores, & fideles, & videtur definitum præsertim à Trid. sess. 6. ubi agit de iustificatione, & sess. 14. de pœnitentiâ. At si loquamur de potentia Dei absoluta, potest remitti unum peccatum sine alio, & maxime in nostra sententiâ. Ratio, quia Deus potest unum tantum debitum remittere, & non aliud; sic remittit etiam de potentia ordinaria unum peccatum veniale, alio non remisso, cur ergo de potentia absoluta non poterit remittere unum peccatum mortale, alio non remisso. Sicut enim gratia absolutè posset stare cum quolibet peccato mortali, ut supra ostensum est; ita à fortiori.

Quæres 4. An ad remissionem culpæ sequatur infallibiliter remissio pœnæ.

Resp. De facto quando remittitur culpa mortalis, infallibiliter simul remittitur pœna æterna; estque de fide definitum à SS. Concilijs, & signanter à Trid. sess. 6. c. 14. Verùm in iustificatione extra baptismum, & martyrium

non semper remittitur tota pœna, sed plerumque pœna æterna mutatur in temporalem, ut apertè definiuit Trid. loc. cit. & sess. 14. c. 2. & 8. & can. 12. Eandem veritatem vnanimi consensu docent SS. Patres, & Doctores Scholastici. Obseruandum tamen, pœnam, quæ relinquitur, non semper esse æqualem, tum quia congruebat, ut Deus non tantam pœnam exigeret ab eo, cui condonat plura, vel grauiora, sed cæteris paribus, iuxta mensuram delicti esset & plagarum modus. Tum quia feruens contritio, conducit ad remissionem maioris pœnæ temporalis, quàm minus perfecta, ut passim Doctores docent; imo hæc contritio posset esse tanta, ut ad totius pœnæ remissionem disponeret, quod Trid. supponit esse velut certum, dum sess. 6. c. 14. ait. Sed pro pœna temporali, quæ ut Sacræ litteræ docent, non tota semper, ut in baptismo fit, dimittitur.

### QVÆSTIO VIII.

*Vtrum iustificatio impij, sit opus Dei miraculosum.*

**N**Ot. Quodd miraculum sic ex Scoti doctrina, & præfertim ex q. 2. Prologi describitur: Miraculum est opus à solo Deo secundum rem, vel secundum modum, excedens facultatem naturæ creatæ formaliter, vel dispositiuè, supra omnes leges, à Diuina prouidentia præfixas in utroque ordine, tam naturæ, quam gratiæ, ex qua descriptione deducitur, quod ad miraculum duo præcipuè requiruntur. Primum, ut sit opus insolitum, & extraordinarium, vel in effectu, vel in modo: 2. ut fieri nequeat per causas naturales, proprijs viribus agentes. Manifestum est autem, quod prima conditio iustificationi ordinariæ deest, cum hominis iustificatio fiat quotidie per administrationem Sacramentorum, tanquam per media à Deo ordinata ad ipsam conferendam. Notanter dicitur ordinariè, quia contingit interdum, quosdam peccatores graues vocari, & iustificati modo insolito, & extraordinario, qualis fuit conuersio Magdalenæ, Larronis, & Pauli, de quibus in præsentiarum non agitur, sed de iustificatione ordinaria tantum.



Concl. Iustificatio impij, prout communiter fit, Deo hominem paulatim conuerrente, aut per Sacramentum infantem iustificante, non est opus miraculosum. Est communis, & prob. Iustificatio impij fit iuxta consuetam, prouidentiam Dei, iuxta leges præfixas, in ordine gratiæ a Deo institutas, ut sunt Sacramenta, & dispositiones ad iustificationem; ergo talis iustificatio non rectè dicitur miraculosa. Conf. patet, quia non dicitur actio miraculosa, nisi illa, quæ ultra naturæ vires, fit à Deo præter solitum, & ordinatum agendi modum, propter quod admirationem causat iuxta D. Aug. lib. 26. contra Faustum c. 3. Ant. prob. quia Deus ex communi lege non denegat viatori impio auxilium sufficiens ad hoc, ut se disponat ad iustificationem; unde dicit: Ego sto ad hostium, & pulso.

Cæterum iustificatio potest esse miraculosa quoad modum, seu secundum quid, quando videlicet Deus dat auxilium efficax gratiæ excitantis, & adiuuantis peccanti actualiter, ac ponenti positivè obicem, ut fuit iustificatio Pauli, actu persequentis Christum, & Ecclesiam, tunc iustificatio esset miraculosa secundum modum, seu secundum quid. Similiter si daretur auxilium efficax peccatori morti proximo, cui vix ordinarium sufficeret ob eius voluntatis prauitatem, & ob instantem mortem. Quare Scot. in 4. d. 22. q. 1. refert virum valde perfectum, postea profundissimè lapsum ob eius facinora morte damnatum, per subitam penitentiam sibi inspiratam fuisse à Deo viuatum.

Quæres 1. An iustificatio impij sit absolutè maximum Dei opus. Resp. ex sententia communi, quòd iustificatio impij non est opus Dei absolutè maximum, sed secundum quid, & cum aliqua proportionem. Ratio, quia in primis secundum physicam perfectionem creatio Angelorum, & Hominum, imò & generatio aliarum substantiarum eam excedit; iustificatio enim respicit tantum accidens tanquam terminum, idest gratiam habitualement; loquendo autem de perfectione morali tanta est hominis, & Angeli creatio in iustitia, quanta est hominis lapsi reparatio: at maior est iustorum glorificatio, sicut etiam Verbi incarnatio.

Ratio 2. p. habetur ex doctrina tum SS. PP. tum Theol. unde D. Aug. tract. 72. In Ioan. ait: *Melius, & maius esse videri in iustificare, quàm creare cælum, & terram.* Hinc Ecclesia.

canit in Collecta Dominicæ X. post Pentecost. *Deus qui omnipotentiam tuam, parrendo maxime, & miserando manifestas &c.*  
 Quia videlicet in opere iustificationis impij maxime re-  
 luctet infinita Dei potentia, dum pro nutu suo voluntatem  
 etiam rebellem infallibiliter, & efficaciter trahit, & qui-  
 dem volente, & cooperante libere etiam ipso impio; Ita  
 discutrit Herincx in hac quæst. apud quem plura videri  
 possunt, etiam latius apud Frassent. 3. in tract. de gratia.

Quæres 2. Qualem certitudinem, possit homo habere de  
 sua iustificatione. Resp. Quod alia est certitudo habita-  
 per fidem Diuinam, alia est certitudo habita per scientiam  
 Theologicam, & denique alia est certitudo moralis, non  
 enim est hic sermo de certitudine metaphysica &c.

Resp. Itaque primò. Quod hæretici Recentiores ia-  
 ctant posse, & debere quemlibet hominem fide diuina cre-  
 dere, se esse iustum coram Deo, & peccata sibi esse dimissa,  
 seu non imputari. Sed contrarium de fide definiuit Tri-  
 dent. sess. 6. can. 9. & can. 13. & 14. Eandem veritatem do-  
 cent omnes Scholastici, & SS. PP. & habetur expressè in  
 S. Scrip. pluribus in locis. Ratio theologica est, quia ne-  
 mo potest, vel tenetur credere, quod non est sufficienter  
 reuelatum, quod quisque in particulari v. g. Lutherus, aut  
 Calvinus sit iustus: ergo nemo id tenetur, nec potest cre-  
 dere, nisi fiat ei extraordinaria reuelatio, quæ rarissimè fit,  
 ut unus quisque Sapiens, in se ipso experitur.

Prob. ad hominem cont. hæreticos. Fidei diuinæ non  
 potest subesse falsum, sed falsum subesse potest fidei, quæ  
 hæretici credunt se esse iustos; nam id credunt, tam Calui-  
 nistæ, quam Lutherani, cum tamen se inuicem conde-  
 mnent tanquam iniustos: ergo non possunt credere fide  
 Diuina se esse iustos, non enim est maior ratio, quare fide  
 Diuina credant Calvinistæ, & non credant Lutherani,  
 cum utrique iactent, fide Diuina credere se esse iustos.

Resp. 2. In hominibus iustis, potest esse certitudo quæ-  
 dam moralis, fundata in quibusdam coniecturis, desum-  
 ptis ab experientia, & effectibus, eò quod in se experiantur  
 desiderium vitandi peccata mortalia, diligentiam in ca-  
 uendis venialibus, studium pietatis, desiderium celestium,  
 fastidium terrenorum &c. Similiter homo post peccata  
 commissa potest habere quandam moralem certitudinem.

se gratiam amissam recuperasse quia curauit facere confessiones, ut lex Diuina præscribit, satisfactiones præstitit &c.

## DISPUTATIO VII.

### *De reuiuiscencia meritorum secundo effectu gratia habitualis.*

#### QVÆSTIO I.

*Verum opera meritoria per peccatum mortale mortificata in iustificatione reuiuiscant.*

**N**ot. 1. Quòd certum est apud catholicos, dari opera meritoria de condigno vitæ æternæ per peccatum mortale superueniens solum mortificata, ac proinde nequeunt esse simpliciter mortua, nec simpliciter uiua, idq; Scotus probat in 4. dist. 22. q. 1. art. 2. auct. D. Aug. super Epist. D. Pauli ad hebr. affirmantis bona opera per peccatum mortale mortificata in resurgente à peccato per fructuosam pœnitentiam ad statum reconciliantis gratiæ reuiuiscere; & in Decret. de pœnitentia dist. 4. s. *Unius Clemens dimissa peccata ex ultionum destructionem redire non patitur, quomodo dignatur reuiuiscere in se bona opera.*

Not. 2. Quòd opera, quæ facit homo reduci possunt ad quatuor genera. Alia enim sunt uiua, quæ ex principio vitali, nempe gratia oriuntur; gratia enim, sicut est principium vitæ spiritualis Animæ, ita est principium vitalium operationum; Alia dicuntur mortua, quæ ex genere suo, & principio obiectiuo sunt quidem bona, sed quia fiunt ab homine existente in peccato mortali, ideoque omni principio vitali carent. Alia dicuntur mortifera, quæ videlicet priuant hominem gratia Dei, & mortem Animæ inferunt; Alia denique dicuntur opera mortificata, quæ licet ex se bona sint, & condigna vitæ æternæ, ut potè elicita à gratia, & charitate, tamen per subsequens peccatum mortale dicuntur mortificata, quatenus impediuntur quoad actum secundum, ne habeant vim promouendi hominem ad vitam æternam. Addunt quidam opera media, hoc est, neque uiua, neque mortua qualia sunt attritio dilectio  
Dei,

Det, & huiusmodi elicita ab homine peccatore, excitato à gratia Dei ad iustificationem, sed meo videri talia opera, potiori iure pertinere videntur, tanquam dispositiones iustificationis ad opera viua, quia licet reuera non sint viua, sunt amen dispositiones proximæ ad vitam, ac proinde appellari possunt vitales dispositiones.

Concl. Opera meritoria per superueniens peccatum, mortificata in iustificatione indubiè reuiuiscunt. Hæc est aded certa, ut aliqui censeant esse de fide. Alij dicunt oppositum esse etroneum. Alij cum Suarez non posse absque temeritate negari. Prob. 1. auct. S. Scrip. & maximè ex illo Ezech. cap. 18. Vbi Deus vocat sic peccatores; *Conuertimini, & agite penitentiam ab omnibus iniquitatibus vestris, & non erit vobis in ruinam iniquitas*; Recordaretur autem Deus iniquitatum, & peccatori esset in ruinam, si propter illa priuaretur homo in æternum fructu meritorum præcedentium; ergo &c. & Ioel. c. 2. vbi Deus ait. *Raddam vobis annos, quos comedit locusta, & vicius, & rubigo, quem locum expendens S. Hieron. scribit. Penitentia, est res optima, qua omnes defectus ranoat ad perfectum.* Prob. 2. auct. Trid. sess. 6. c. 16. ubi ait. *Hac igitur ratione iustificatis hominibus, siue acceptam gratiam perpetuò conseruauerint siue amissam recuperauerint proponenda sunt Apost. verba. Abundate in omni opere bono scientes, quod labor vester non est inanis in Domino, non enim est iniustus Deus &c.* Quibus verbis, non obscurè indicat Trid. meritorum reuiuiscantiam. Prob. ratione, quæ est Scoti, D. Thomæ, & aliorum; Merita hominis iusti sunt digna vitæ æternæ, ergo etiam talia sunt, postquam homo lapsus ad iustitiam, redit; explicat Scotus à simili. Nam sicut in humanis potest aliquis habere ius immobile ad certam rem, ad quam, tamen pro tunc postulandam actione iuridica caret, ob aliquod impedimentum in Persona subortum; ita iustus benemeritus cadens à iustitia cadit quoque ab actione ad vitam æternam, & pro tunc, vel potius in ea impeditur, sed impedimento sublato per penitentiam, & gratiâ recuperatam idem ius, quod remanebat in actu primo, fit rursus expeditus quoad actum secundum.

Arg. 1. Eadem est forma viuificans hominem, & eius opera, sed forma iustificans per peccatum superueniens totaliter extinguitur, & homo relinquitur simpliciter mor-

mortuus, & non mortificatus; ergo & opera remanent mortua. Resp. dist. mai. Eadem forma viuificans hominem, & eius opera eodem modo neg. diuerso modo conc. Gratia namque viuificat Animam, & quoad actum primum, & quoad actum secundum; opera autem meritoria posita in esse, viuificantur solum in actu secundo, ideoque remanent meritoria quoad ius, seu quoad actum primum, etiam si secundus impediatur.

Arg. 2. In Epist. Iacobi habetur c. 2. *Qui deficit in uno, factus est omnium reus*: Item Apostolus docet, quod *quicumque solam legem seruauerit, offendat autem in uno, factus est omnium reus*: ergo &c. Resp. Scotus in 4. dist. 22. quod Iacobus intendit reuelare generalem damnationem ita incurri per unum peccatum, sicut per omnia extensiuè. Resp. 2. hominem lapsum fieri reum etiam bonorum operum negatiuè, per solam suspensionem actionis, inducentis possessionem vitæ æternæ, non vero positiuè.

Arg. 3. Sicut se habent bona opera in ordine ad vitam æternam; ita peccata ad mortem æternam, sed peccata, semel deleta in relapsu non redeunt, ergo nec opera meritoria. Resp. Scot. loc. cit. neg. paritatem, & ratio est, quia in remissione peccatorum ius Dei acquisitum per illa ad puniendum omnino extinguitur per iustam eorum penititionem, vel poenitentialem retractationem; mala enim possunt puniri temporaliter, & sufficienter, si pœna æterna sit commutata in temporalem. At bona meritoria non possunt præmiari sufficienter per talem temporalem commutationem, cum adhuc retineant ius ad vitam æternam debitam ex pacto legali.

## QVÆSTIO II.

*Vtrum opera mortificata reuiuiscant in iustificatione, ex misericordia, vel ex iustitia.*

**N**ot. Quòd in hac quæst. sunt tres opiniones; Prima. est Alenf. D. Bonau. Durandi, & aliorum asserentium opera meritoria reuiuiscere in iustificatione ex sola misericordia Dei: 2. ex diametro opposita primæ existimat, reuiuiscantiam meritorum esse opus merè iustitiæ, ac proinde

de reuiuiscere merita ex natura rei, adeo ut nullo modo potuerit impediri à Deo eorum reuiuiscencia; Quare et ta Dei misericordia est, quod homo pœniteat, vel iustificetur; supposita verò iustificatione, necesse est merita reuiuiscere, alioquin si ex misericordia Dei id oriretur, merita non haberent veram dignitatem. Ita Vasquez p. 2. disp. 221. Turrianus disp. 14. de pœnitentia dub. 2. quibus videtur consentire Vulpes disp. 27. art. 4. 3. opinio mediat inter utramque asserens merita, partim ex iustitia, partim ex Dei misericordia reuiuiscere; licet enim opera meritoria semper retineant condignitatem ad præmium in actu primo, & per superueniens peccatum solum suspendatur ius, seu impediatur quoad actum secundum, tamen quod remoto statu peccati, iterum Deus teneatur priori iure, ad conferendum promeritum præmium, prouenit ex suo beneplacito; sicut enim poterat non se obligare per promissionem ad illa præmianda, ita poterat non se obligare, quoties per superueniens peccatum, esset interrupta. Ita communiter tenent Scotistæ cum Scoto in 4. d. 22. q. un. art. 2. & sequuntur Suarez, Becanus, Tanerus, Auerſa, Caspenſis, & alij; sit igitur.

Concl. Merita mortificata per superueniens peccatum mortale in iustificatione reuiuiscunt, partim ex misericordia, partim ex iustitia. Est Scoti qui sic discurret loc. cit. Dici potest, quod hæc est superabundans bonitas, & misericordia Diuina, quia bona semper viuunt in eius acceptatione, bona, inquam, meritoria, & semper esset eis præmium retribuendum nisi esset indispositio recipientis propter nouam culpam, sed mala totaliter extinguuntur, ita quod nec in se nec in intellectu, vel voluntate Diuina remanent in ordine ad vindictam, & per istam viam esset ad propositum bonum exemplum Iuristarum, quod alicui remanet aliquod ius, cui tamen non remanet, vel non competit actio propter aliquod impedimentum. Ita habenti bona merita in acceptatione Diuina, mortificata tamen per peccatum mortale, remanet totum ius, quod correspondet illis meritis ad vitam æternam, sed non remanet actio, quamdiu ille est inimicus, etsi perpetuò sit inimicus, perpetuò cessat illa actio; cessante autem inimicitia contracta per nouum peccatum mortale, non redit nouum ius, sed cōpetit actio



secundum ius antiquum. In mortali autem remisso, nec ius remanet, nec actio; quia nec Deus habet ius vindicandi in istum; ita enim perfecte textit peccatum istius, & remisit, ut nec actio sibi remaneat ad vindicandum. Quamvis (sequitur Scoti textus) hoc sit bene dictum in commendationem misericordiae Divinae; tamen potest aliquo modo reduci ad iustitiam hoc modo. Peccatum non remittitur nisi ad minus debitum poenae aeternae commutetur in debitum poenae temporalis, qua commutatione facta, nunquam regulariter remittitur illa culpa, nisi illa poena solvatur in se, vel in poena aequivalenti, & per consequens remisso peccato mortali in se primo, & in poena soluta, postea nil iuris remanet, per quod ab isto sit exigenda poena, aliqua pro illo peccato, sed post meritum aliquod vitae aeternae dignum, nunquam dignitas ista ad bonum aeternum commutatur, secundum iustitiam in bonum temporale. Igitur nunquam expirat illud ius, quousque bonum aeternum sit solutum: sed illud non solvitur in viatore, dum est viator; ergo semper manet illud ius, tamen quia est extinctum per peccatum mortale, tunc non competit sibi executio iuris sui. Non est igitur simile de remuneratione meritorum mortificatorum, & de reditioe peccatorum remissorum, non solum propter Dei misericordiam, quod utique verum est, sed etiam propter istam iustitiam commutantem ibi aeternum in temporale, non sic autem hic. Haecenus Doctor, ex quibus clare patet eius mens circa praesentem quaest. & apparet satis probata nostra Concl.

Arg. prob. quod ex sola misericordia reuiviscant opera meritoria. Merita per peccatum mortificata non possunt reuiviscere, nisi tollatur peccatum, sed peccatum ab homine non tollitur ex iustitia, bene tamen ex sola misericordia, ergo etiam merita mortificata non redeunt ex iustitia, sed ex sola misericordia. Resp. conc. mai. & min. nempe, quod sit gratia Dei resurrectio hominis peccatoris, posita autem resurrectione, & reditioe in gratiam, redunt etiam merita, non simpliciter, ex misericordia, sed ex iustitia, ut supra explicatum fuit.

Contra per peccatum homo meretur spoliari omni simpliciter bono; ergo reparatio meritorum praecedentium soli misericordiae Dei est tribuenda, Resp. conc. ant. & dist.

dist. consequens, si non præcessit Diuina promissio, quæ decreuit dare hominibus præmium omnium meritorum, etiam mortificatorum, conc. cons. si autem præcessit sicut de facto colligitur ex S. Scrip. præcessisse, neg. cons. Itaque, supposita Diuina misericordia de præmiandis operibus bonis, & mortificatis, id, quod sequitur, præstatur à Deo ex iustitia: Vnde talis redditio, supponit misericordiam, & perficitur ex iustitia.

Arg. Vasquez probando reparationem meritorum mortificatorum fieri ex sola iustitia, fundata in actu contritionis. Homo peccator per contritionem condignè satisfacit Deo ad æqualitatem, ergo de iustitia ei debetur reparatio meritorum &c. Patet ant. nam sicut homo per peccatum auertit se à Deo, ita per contritionem conuertit se ad Deum. Resp. neg. assumptum in antecedente, & quando etiam concederetur per contritionem condignè satisfieri Deo pro offensa, adhuc neganda est cons. quod fieri debeat reparatio meritorum ex iustitia in ipsa contritione fundata, quia licet satisfaceret pro culpa, non tamen pro omni pœna, ac proinde in pœnam culpæ, & offensæ iuste potuisset Deus priuare peccatorem præcedentibus meritis.

### QVÆSTIO III.

*Vtrum merita in iustificatione reuiuiscant in ordine ad essentialia præmium cum totalitate, & integritate reddendi.*

**N**Ot. I. Quòd ius ad gloriam, quod dicitur præmium essentialiale, competit homini duplici titulo; nempe titulo hæreditatis, & titulo mercedis. Prior fundatur in gratia sanctificante, per quam efficimur consortes Diuinæ naturæ, & filij adoptiui. Si autem filij, & hæredes, hæredes quidem Dei &c. ait Apost. Posterior fundatur in bonis operibus factis in gratia, & ex gratia, supposito præuio pacto Dei, ut docet Trid. sess. 6. c. 16. ubi ait. *Bonè operantibus usque in finem, & in Deo sperantibus proponenda est vita æterna, & tanquam gratia filijs Dei, per Iesum Christum misericorditer promissa, & tanquam merces ipsius Dei promissionis ipsorum operibus, & meritis fideliter reddenda, si in gratia decesserint.*

Not.

Not. 2. Quod circa hanc quæstionem diuersa sunt Doctorum placita. Alensis p. 4. q. 57. D. Bon. 4. d. 14. art. 2. q. 1. quos sequuntur plures Recentiores, censent, quod perdita gratia per peccatum, non restituitur per pœnitentiam, nisi iuxta gradum contritionis ab hoc inchoata; Unde non alio modo opera mortificata volunt reuiuiscere, quam quia idem præmium essenziale, quod gratiæ per contritionem collatæ correspondet, conferatur pluribus titulis, nempe contritionis præsentis intuitu, & meritorum antecedentium; licet concedant maius gaudium accidentale propter bona opera ante lapsum facta. Ocham in 4. q. 8. cum suis Nominalibus opinatur, quod homo in virtute pœnitentiæ reuiuiscat, non solum ad gratiam, & gloriam correspondentem contritioni præsentī, sed insuper ad tot gradus gratiæ, nec non in ius ad tot gradus gloriæ, quot habuisset per merita præcedentia, si non fuissent mortificata. D. Thom. p. 3. q. 88. art. 3. quem aniplectuntur plures ex eius discipulis, docet, quod resurgens à peccato recipiat nouum aliquem gradum gratiæ, & consequenter ius ad nouum gradum gloriæ essentialis ratione præcedentium meritorum; non tamen recipiat totam gratiam, quam habebat antequam peccaret. Scotus denique in 4. d. 22. docet, merita mortificata in iustificatione reuiuiscere quidem quoad ius in ordine ad eundem gradum gloriæ ipsis debitum ante peccatum, non autem ad maiorem gratiam, ita quod reuiuiscencia sit ad gloriam respondentem meritis proprijs, non autem ad gloriam respondentem gratiæ.

I. Concl. Non potest asseri, quod merita tantum reuiuiscant ad præmium accidentale, nempe ad gaudium, quod homo percipiat de operum mortificatorum reparatione. Hæc est satis certa, & ratio est, quia alioquin tolleretur omnino reuiuiscencia meritorum, quæ pro præmio proprio respiciunt beatitudinem, quam ex S. Scrip. & Trident. reservari meritis liquidò patet. Tum quia gaudium accidentale, etiam respondebit operibus mortuis, siue factis in statu peccati mortalis. Insuper neque asseri potest, quod merita reuiuiscant solum ad præmium essenziale, correspondens gratiæ, & meritis de nouo acquisitis: Et quàmuis Bannes, ut refertur, docuerit oppositum, tamen cum hoc alie num sit à vera sententia non recipitur, immò Sotus ait esse

esse falsissimum, Ledesma esse erroneum. Sequeretur enim quod peccator in fine vitæ per unicam, sed ferventem contritionem iustificatus, esset maior in gratia, quam is, qui post vitam diù sanctè transactam, semel lapsus, & cum minori gratia præueniente tepidus resurgens moreretur, quod absurdum est, & piarum aurium offensivum, inquit Herinx.

II. Concl. Merita reuiuiscunt semper ad integrum præmium essentiale, & non solum iuxta mensuram præsentis dispositionis, secundum quam peccator resurgit, vel etiam, quam postea habebit. Prob. Opera meritoria post lapsum retinent idem ius, quod habebant ante lapsum, ut dictum est supra, & per peccatum solum impeditur; ergo reuiuiscunt semper ad integrum præmium essentiale.

Prob. 2. pars. Gratia, quam in iustificatione recuperat homo, non tribuit bonis operibus valorem, sed tantum remouet obicem peccati, quo sublato redeunt ad pristinum ius secundum totum ergo merita non reuiuiscunt secundum mensuram præsentis dispositionis &c.

Quæres. An resurgens semper in iustificatione resurgat ad maiorem gloriam.

Resp. Scotus loc. cit. de 2. art. cit. §. Per hoc dico ad argumentum, quod resurgens, plura merita habet in acceptione Dei, quam habuit quando cecidit, & per consequens ad maiorem gloriam, ex ea parte ordinatur; sed non oportet, cum in maiori gratia resurgere, qua secundum eius dispositionem in detestando peccatum commissum, intense, vel remissè datur sibi nunc maior, vel minor gratia. Neque ex hoc peccator reportat commodum, sed magnum incommodum, non solum quia peccauit, sed ad propositum, quia totum tempus, quo mansit in peccato est sibi perditum, quo tempore merita potuisset multiplicasse, si tunc in gratia mansisset. Hæc Doctor, ex cuius Doctrina colligitur, quod si non restituitur gratia, statim in iustificatione respondens meritis, & gradibus gloriæ, nihilominus verè dicitur resurgere ad maiorem gratiam restituendam statim, siue in se, siue in iure proximo ad illam, & consequenter ad maiorem gloriam, scilicet iure obtinendam.

*Vtrum tota gratia, prioribus meritis debita, per subsequenter iustificationem restituatur.*

**N**ot. 1. Quod duplex gratiæ portio potest considerari inesse, vel in fuisse homini iustificato. Altera, quam iusti consequuntur per propria merita; altera verò, quam obtinent sine merito proprio, sed ex meritis Christi, qualis est prima gratia, quam quis accipit, dum à peccato refurgit; & omnis gratia, quæ ei, ex opere operato confertur, ex vi Sacramentorum. Quare de omnibus his gratijs procedit præsens quæstio.

Not. 2. quod sicut solus Deus nouit, quid reuerà contingat in hominis iustificatione post lapsum, ita intellectus humanus, utpotè insufficiens ad talem veritatem assequendam, solum probabiliter, de hac re differere valet. Hinc tot capita, tot sententiæ, quas Maltorius ad tres principales omnes reducit. Prima affirmat absolutè, & uniuersaliter omnem gratiam restitui in ipso iustificationis instanti, ita Suarez, Coninch. Caspens. Lugo, & alij relati à Maltorio. Secunda absolutè, & uniuersaliter negat, antiquam gratiam restitui tunc, quando homo refurgit, sed ait postea restitui in fine vitæ, vel in principio gloriæ, ita Scotistæ passim sentire videntur, ut notat ipse Maltorius, quia sic Scot. in 4. d. 22. insinuare visus est, ita Aretin. ibidem, Hiqucus, Faber. Tertia tandem sententia asserit, in instanti iustificationis restitui totam gratiam, quæ prò antiquis meritis, antea habebatur, sed negat recuperari gratiam, quæ per susceptionem Sacramentorum comparata fuerat, quia, id non constat ex Scripturis, neque ex Patribus, neque colligitur ex reuiuiscencia meritorum in superioribus quæstionibus stabilita, ita Vasquez disp. 221. q. 7. Turrianus disp. 14. de penitentia dub. 5. & probabile censet Caspens. Vnde sequitur, nec homini concedendam esse gloriam tali gratiæ Sacramentali per modum hæreditatis correspondentem.

I. Concl. In iustificatione restituitur homini pœnitenti portio gratiæ, præcedentibus meritis acquisita per augmentum, siue hæc gratia restituatur in ipso iustificationis instanti, siue postea, & falsum prorsus, esse hanc nunquam

restitui. Hæc est Mastrij in 2. d. 7. de iustificatione q. 10. art. 2. & Herincx disp. 4. de iustificatione q. 12. & est communis tanquam certum gloriam dari iuxta mensuram gratiæ, quia gloria est debita meritis mediante gratia, quæ illis dat valorem, ergo antiqua merita nequeunt resurgere ad gloriam, quin etiam resurgant ad gratiam proportionatam. Confirm. Etenim, sicut ius ad gloriam fundatur in gratia, ita maius ius ad maiorem gloriam in gratia maiori; gratia namque tribuit ius ad gloriam, ut tradit Aureolus in 4. d. 22. art. 1. Immo Scotus d. 21. q. 1. docet ad determinatum gradum gloriæ requiri ut præuiam dispositionem determinatum gradum gratiæ, & q. 2. ait, quod nulli datur aliquid gloriæ correspondens meritis, sine correspondente gratia. Alioquin sequeretur, Deum plus præmiare præmio essentiali gloriæ, quem minus diligeret, & è contrà minus præmiare, quem magis diligeret, quia Deus diligit creaturam per gratiã, ergo si antiqua merita resurgerent ad gloriam, & non ad æqualem gratiam, Deus plus præmiaret per gloriam, quem minus diligeret per gratiam, & è contra. Prob. etiam ex S. Scrip. & Patribus simpliciter significantibus, hominem per iustificationem restitui in pristinam gratiam, & statum; ut Ioel. 2. *Reddam vobis annos, quos comeditis locusta*, & c. 3. Malachiæ idem habetur, & Lucæ c. 15. imperat Pater Filio prodigo reddi stolam primam, idest pristinam gloriam, quam (ut ait Chrysost. homilia 4. in Lucam ex seductione Diaboli nudatus amiserat.

II. Concl. In iustificatione hominis post lapsum, restituitur gratia Sacramentalis, & quæcunque alia, sine meritis obtenta, licet etiam oppositum sit probabile imo videatur esse mens Scoti. Hæc pariter est Mast. & Herincx. Prob. Nam gratis asseritur ab ijs, qui oppositum tuentur, quod quæ pendent ex liberali Dei donatione, semel per peccatum amissa, nunquam per poenitentiam recuperentur, & sanè excellens Dei misericordia suadet oppositum, ergo quando ex iustitia non recuperarentur, sicut quæ pendent ex nostris meritis, satis pium est credere, quod recuperentur ex Dei benignitate, ut apertè colligitur ex parabola de Filio prodigo superius allata. Tum quia, etsi contrito, aut suscipienti Sacramenta gratia non detur ex pro-



prijs meritis, datur tamen ex merito condigno Christi, quod homini, tanquam proprium applicatur, ergo gratia Christi, semel nobis applicata, non minus sit nostra, quam gratia, vel eius augmentum, ex meritis proprijs nobis collatum, cum merita Christi ex Dei ordinatione fiant nostra. Resp. Iugo, & alij, rationem desumptam ex meritis Christi urgere de possibili, non autem de facto, eò quia non semper quando aliquid datur nobis ex meritis Christi, datur cum omni perfectione, & iure, quo posset dari ex eius meritis, quia non vult Christus semper illa applicare cum tota eorum perfectione, sed cum limitatione, etsi ex parte valoris eorum possent utique applicari. Quæ sententia, est Scoti, qui in 4. d. 22. q. un. §. ad secundum dico, sic concludit. Igitur reuiuiscunt merita, sed non reuiuiscit prior gratia prius habita, & istud est satis consonum iustitiæ, quia gratia prior fuit tantum donum Dei, merita autem erant aliquo modo opera hominis, & ideo illa sunt sibi semper salua in acceptatione Dei, gratia verò non. Vnde propter eam ordinatur ad aliquod præmium, quia habuit eam, sed tantummodo per eam, si nunc habet eam, hæc Scotus &c.

Quæres 1. An gratia per peccatum amissa restituatur statim in iustificatione.

Resp. quod Scotus loc. cit. supponere videtur, illam tantum restitui in fine vitæ, & interim manere ius ad illam. Verùm Nominales, quos sequuntur plures Recentiores, existimant totam gratiam restitui statim. Qua in re, inquit Herincx, certum est in utraque sententia sufficientissimè saluari reuiuiscantiam meritorum, satis etiam constat, neutram efficaciter probari, sed utramque niti quibusdam congruentijs, & coniecturis. Pro prima facit, quod sufficiat gratiam antiquam restitui in fine vitæ, imò id videtur consentaneum Diuinæ iustitiæ. Tum ut dilatione ista peccatum quodammodo temporaliter puniatur. Tum ne sit necesse, in hominibus frequenter in peccata relabentibus, eandem gratiam reproducere. Secus autem est de meritis, quæ non fuerunt simpliciter extincta, uti gratia sed potius impedita pro tempore status peccati. Quare congruum videtur, ut Deus de nouo infundat illam solam gratiam, quæ respondet nouæ dispositioni pœnitentis, reseruato iure ad reliquam gratiam in fine vitæ restituendam.

**Pro 2.** Sententia facit, quod cum supponatur gratia aliquando restituenda, nec appareat ratio urgens differendi, eò quòd viator sublato peccato, sit statim capax prioris gratiæ, sicut alterius gratiæ augmenti, credibile videatur, illam restitui statim, quæ quidem ratio non militat de gloria, cuius viator non est capax. Nec obstare videtur, quod dispositio non sit proportionata ad gratiam restituendam, nam cum non sit gratia noua, sed restituenda non oportet dispositionem respondere gratiæ; & è contra ipsa etiam opera præcedentia, sicut tantum sunt moralis dispositio ad gratiam primò infundendam, ita, etsi præterita possunt esse moralis dispositio ad eandem gratiam de nouo infundendam; accedente noua dispositione, tanquam conditione remouente obicem peccati. Vnde utraque sententia est satis probabilis, sed incerta, ut pote dependens à Diuina voluntate, quæ de hac re nobis non satis innotescit, nec ex S. Scrip. nec ex auctoritate Patrum, nec ex ratione.

**Quæres 2.** An opera meritoria, quæ reuiuiscunt quoad gratiam, & gloriam reuiuiscant pariter quoad satisfactionem. Resp. quæsi sit sensus sic explicatur. Estò, quod aliquis iustus peccet, qui ante peccatum non tenebatur satisfacere, quia forte nullum fecerat peccatum, etsi fecerat aliquod veniale, eius satisfactio fuerat adeò abundans, ut multum superesset satisfactioni, applicandum thesaurò Ecclesiæ. Quæritur modo, an illo resurgente reuiuiscant opera ante peccatum facta, non solum ad gloriam, sed etiam prosint illi ad satisfactionem, pro pœna temporali peccati dimissi. Videtur quod sic, eo quia opera mortificata resurgunt ad gloriam non ob aliud nisi quia non fuerunt præmiata, sed eadem opera valebant ad satisfactionem pro pœna temporali; ergo &c.

Ceterum hac ratione non obstante dicendum, quod opera illa non valebant pro satisfactione peccati futuri, quia satisfactio est tertia pars pœnitentiæ, & pœnitentia nunquam admittitur pro peccatis futuris, sicut contritio, & confessio non habetur de committendis, sed de commissis peccatis; similiter etiam satisfactio, ac proinde non reuiuiscunt quoad satisfactionem; Ita discursit Pitigianus in 4. dist. 22. q. unica art. 7. §. 2. concl.

*De merito bonorum operum tertio effectu gratie  
habitualis.*

QVÆSTIO L

*Vtrum iustus per sua bona opera possit aliquid à Deo  
verè, & propriè mereri.*

**N**OT. 1. Quòd meritum in S. Scrip. aliquando accipitur in bonam partem, & quandoque in malam partem, dum videlicet bonis, & malis operibus aliquid retribuitur, vel præmij, vel pænæ. Vnde de malis operibus dicitur Paralip. cap. 2. *Iram Dei merentibus*, & Iob. 6. *Vtram appendentur peccata mea, quibus iram merui*. At hic est sermo tantum de merito, quod correspondet bonis operibus, & in sua generalitate acceptum sic describi potest. Est opus bonum præmio aliquo dignum, siue à Deo, siue ab homine conferendum, in qua acceptione meritum, est quid commune ad meritum Politicum, & Theologicum. Politicum est opus cui de iustitia distributiva debetur præmium, adeout sic merenti fiat iniuria, si tale præmium non redderetur. Theologicum autem est opus moraliter bonum, exigens aliquo modo compensationem præmij à Deo conferendi; idque communiter a Theologis diuiditur in meritum de condigno, & in meritum de congruo, ut etiam tradit Scotus in 4. d. 14. q. 2. art. 2.

NOT. 2. Quòd pluribi Scotus describit meritum, & præfertim in 1. dist. 17. q. 2. d. 18. q. vnica quol. 17. art. 3. Verum ut bene notat Mastrius in disp. de merito loc. cit. describit meritum apud Deum, & maximè meritum de condigno, & solum in 3. d. 18. meritum in communi descripsisse videtur, ut obseruat Bargius, dum inquit. Meritum est aliquid acceptatum, vel acceptandum in alio pro quo ab acceptante est aliquid retribuendum illi, pro tali merito, vel alteri pro quo meruit; cuius descriptionis intelligentia dependet ex infra dicendis, ideoque hic dandæ sunt definitiones, utriusque meriti idest de condigno, & de congruo iuxta veriore, & communiolem sententiam.

Meritum de condigno est illud, quod ex iustitia inducit obligationem ad reddendum præmium, supposito tamen pacto Diuino ob condignitatem, quæ in tali opere bono, & meritorio reperitur. Meritum autem de congruo est illud, quod, etsi supponat pactum diuinum, non tamen inducit obligationem ad reddendum præmium ex iustitia, sed ex quadam congruitate, & debito liberalis promissionis Diuinæ, seu fidelitatis, loquendo de merito de congruo strictè accepto, nam latè sumptum non includit promissionem.

Not. 3. Quod æqualitas præmij, quam respicit meritum de condigno, non importat æqualitatem absolutam, aut formaliter secundum entitatem actus meritorij; nam ut sic æquari nequit præmio æterno beatitudinis. Vnde ait Apost. non sunt condignæ passionis huius temporis ad futuram gloriam, sed æqualitas huiusmodi attenditur penes moralem æstimationem, quam Scotus vocat æqualitatem proportionis, eò quod Deus æstimet meritum de condigno ratione gratiæ sanctificantis, à qua procedit, & valorem proportionatum tribuat bonis operibus sua ordinatione legali, qua promissit se acceptaturum nostra bona opera ad præmium supernaturale, si à gratia sanctificante, velut à principio meriti fuerint elicitæ.

Not. 4. Quod hæretici, & signanter Calvinus negant bonis operibus omnem rationem meriti, vnde sic impudenter loquitur Calvinus lib. 3. instit. cap. 15. Bonorum operum laudem, non ut sophistæ faciunt inter Deum, & hominem partimur, sed totam integram, ac illibatam Domino saluamus; & inter Catholicos Durandus, ut refert Mastrius in 2. d. 27. q. 2. duplex distinguit meritum de condigno, unum improprie, & large sumptum, ex diuina ordinatione, & acceptione, proueniens; aliud proprium, quod inducit obligationem iustitiæ, ob æqualitatem operis; admittit primum Durandus, sed negat secundum, hinc Amicus dicere audet, quod idem sequitur ex sententia Scotistarum docentium, opera iustorum non esse ex se æternæ vitæ condigna, sed ex Dei ordinatione ad tale præmium acceptantis; Verum quam aperte decipiatur iste Auctor patet infra.

Concl. Iustus per sua bona opera potest aliquid à Deo verè, & proprie mereri. Hæc est de fide determinata in

Trid. sess. 6. c. 16. Prob. 1. auct. S. Scrip. Genes. c. 1. habetur. *Ego Protector tuus sum, & merces magna tuis*, ubi illa vox merces indubiè relatiuè se habet ad meritum propriè dictum Matt. 20. *Voca operarios & redde illis mercedem*: & Eccl. c. 16. *Omnis misertordia faciet leum unicuique secundum meritum operum suorum*, ergo homo viator poterit mereri &c.

Prob. auct. Trid. loc. cit. can. 32. sic dogmatizantis. *Si quis dixerit hominis iustificati bona opera ita esse donum Dei, ut non sint etiam bona ipsius iustificati merita &c. anathema sit*, & ita docent omnes SS. Patres: Nota Trid. loqui de merito de condigno. Prob. ratione. Meritum ut supra indicauimus, consistit in quadam æqualitate secundum proportionem inter præmium, & meritum; sed huiusmodi æqualitatem habent opera bona, ab homine iusto elicita, quia gratia habitualis tantam dignitatem tribuit, & confert homini, ut sit filius Dei adoptiuus, & particeps factus Diuinæ naturæ, ac protinde ad quoddam esse diuinum eleuatur, ergo opera, quæ ex tali gratia procedunt, tantam dignitatem inde participant, ut habeant æqualitatem valoris in ordine ad vitam æternam, quam doctrinam tradit Scotus in 1. d. 17. q. 2. in corpore quæstionis ubi declarans naturam meriti de condigno in ordine ad vitam æternam disertè docet quomodo habitus gratiæ sit ratio acceptandi naturam, & actum tanquam vitæ æternæ meritoria; neque aliam nouam, & superadditam ordinationem, & acceptationem agnoscit Doctor, à qua desumenda sit dignitas actus meritorij, præter eam, quæ in ipsa gratia includitur. Quod si alia Diuina promissio, & ordinatio, præter allatam est necessaria, planè hæc non est necessaria ad fundandam dignitatem, & valorem in actu primo ad æquatum, sed erit tantum necessaria ad inducendam in Deo obligationem pro præmij retributione, ut infra magis patebit. Præterea prob. ex paritate malorum operum in ordine ad pœnam, quæ sicut peccatis mortalibus est condigna, ita præmium bonis operibus est condignum, licet tam pœnæ, quam præmij extensiuæ infinitas non habeatur in nostris operibus ex natura rei, sed ex Diuina ordinatione.

Arg. 1. auct. S. Scrip. ad Rom. 6. dicitur. *Gratia Dei vita æterna*, & c. 8. scribit Paulus. *Quod non sunt condigna passionibus &c.*, ergo iustus non potest de condigno mereri aliquid apud

apud Deum, sic etiam videntur loqui SS. Patres. Resp. Sac. Scrip. & Patres vitam æternam etiam frequentius appellare mercedem, & coronam, quod si interdum gratiam appellant, non intendunt ab ea rationem mercedis excludere, sed significare volunt radicem, & principium mercedis, seu merendi vitam æternam, gratis nobis conferri, sicut etiam cæteræ gratiæ actuales, seu auxilia.

Arg. ratione. Meritum de condigno est meritum ex iustitia, sed inter Deum, & hominem intercedere nequit vera, & rigorosa iustitia; ergo homo non potest apud Deum mereri de condigno. Resp. conc. mai. & dist. min. inter Deum, & hominem non intercedit iustitia rigorosa, adeo ut ratio meriti excludat omnem gratiam, & liberalitatem præmiantis, conc. iustitia qualis est inter servum, & Dominum, ut late ostendit Scotus in 4. d. 46. q. 1. neg. min. pro hac responsione q. 3. huius disp. facit &c.

Arg. 3. Si nostra opera essent meritoria de condigno, ergo non posset Deus non dare gloriam merentibus, sed hoc est falsum ergo &c. Resp. neg. sequelam mai. & ratio est, quia Deus plures habet titulos, ob quos posset Deus ea opera ab homine exigere; cum enim nos, & in esse, & conservari, & in omnibus alijs à Deo necessaridè dependeamus, potest Deus huiusmodi opera à nobis exigere titulo creationis, conservationis, redemptionis, & supremi domini. Unde non esset iniustus, si gloriam nobis denegaret.

Cont. Si Deus sine ulla iniustitia potest denegare gloriam merentibus eam de condigno, ergo sequitur, quod iusti nullum ius suis meritis ad gloriam acquirunt, ac proinde eorum merita nullam habent in ordine ad gloriam condignitatem, hæc enim fundatur in perfecto iure iustitiæ.

Resp. neg. sequel. licet enim iusti suis operibus ius rigorosæ iustitiæ non acquirant ad gloriam, acquirunt tamen quoddam ius iustitiæ improprie, ut supradictum est, ius quidem remotum per ipsam gratiam, aut per ipsam ordinationem in gratia inclusam, non vero ius proximum, & completum per aliquam promissionem, & ordinationem superadditam de præmio retribuendo, distinctam ab ordinatione in ipsa gratia inclusa, ut alibi dicitur.



*Vtrum meritum de condigno, & de congruo uniuocè  
conueniant in ratione meriti.*

**N**ot. 1. Quod meritum Theologicum, ut præscindis  
tam à merito de condigno, quam à merito de congruo,  
sic describi solet à Scotistis; Est moralis quidam valor actio-  
nis humanæ bonæ ad obtinendum præmium aliquod à re-  
munerante. Dicitur moralis valor, ad significandam di-  
gnitatem actus, ratione cuius secundum moralem æstima-  
tionem, aliqua retributio actui meritorio conuenit. Ad-  
ditur, actionis humanæ, ut valor meriti secernatur à valore  
perunitæ, qui quidem valor potius dicendus est præmium.  
Dicitur deinde, actionis bonæ ad indicandum meritum,  
vel meriti rationem, & valorem conuenire actioni humanæ,  
quatenus est bona formaliter, & non materialiter tantum.  
Denique dicitur ad obtinendum præmium, quia, ut docet  
Doctör, actio humana ab hoc ordine ad præmium habet,  
quod dicatur meritoria, meritum namque ut meritum, est  
correlatiuum ad præmium. Quare, etsi à parte rei meritum  
aliud non sit, quam extrinseca denominatio sumpta ex bo-  
nitate moralis actionis humanæ, & connotatione præmijs;  
tamen iuxta nostrum modum concipiendi apprehenditur  
ut ordo & respectus ad præmium, ut habet Scotus quod. 17.  
lit. B. ubi ex hac ratione inquit, meritum addere supra  
actum bonum duas relationes rationis, unam ad volunta-  
tem acceptantem, aliã ad illud præmium, ad quod acce-  
ptans ipsum actum bonum ordinat.

Not. 2. quod Sotus lib. 2. de natura, & gratia c. 4. &  
Medina p. 2. q. 114. art. 6. negant, meritum de congruo ha-  
bere veram, & propriam rationem meriti. Recentiores ve-  
rò, ut notat Mastrius, licet fateantur meritum de congruo  
esse verum meritum; quia non metaphoricè, sed per ali-  
quam proprietatem est tale; attamen dicunt, esse adeo im-  
perfectum, ut solum analogicè sit meritum; non quidem  
analogia quasi extrinseca, & metaphorica, sed intrinseca,  
per imperfectam quandam meriti participationem, quo  
modo accidens dicitur esse analogicè ens. Verùm Scoti-  
stæ non admittentes analogiam puram velut mediam inter

uniuoca, & æquiuoca, sed analogiam ad mixtam, quæ stat, vel cum uniuoco, vel cum æquiuoco, intrinsecè participans rationem aliquam communem, etsi imperfecto modo; consequenter docent meritum de congruo uniuocè analogicè conuenire cum merito de condigno in ratione communi meriti, iuxta descriptionem superius traditam; sit ergo.

Concl. Meritum de congruo, & de condigno uniuocè analogicè conueniunt in ratione communi meriti. Prob. meritum de congruo est verum, ac proprium meritum in suo ordine, ergo conuenit in ratione communi meriti analogicè. Prob. ant. ex Scoto in 4. d. 14. q. 2. art. 2. ubi demonstrat meritum de congruo habere veram rationem meriti, aliter oporteret dicere, ait Doctor, quod iustificetur peccator sine omni dispositione sufficienti de congruo ex parte eius, & per consequens, difficile esset saluare, quod apud Deum non sit acceptatio Personarum. Prob. ratione si opus meritorium de congruo non exigeret præmium aliquo modo, nec ex congruitate, & fidelitate, nec ex condignitate, nullum prorsus haberet moralem valorem ad præmium obtinendum, ergo nulla ratione vocari posset meritum; ac proinde nec præmium, quod eius intuitu datur, sed donum tantum, & munus: at hæc omnia sunt absurda: ergo &c. Prob. specialiter de uniuocatione analogica. Meritum de congruo non ita perfectè participat de ratione meriti, sicut meritum de condigno, sed ad uniuocationem analogicam talis uniuocatio reducitur, ergo uniuocatio meriti de congruo cum merito de condigno est analogica, & mixta, non verò pura uniuocatio. Min. patet de cane, & de homine respectu animalis, de Creatura, & Deo respectu entis ut sic &c.

Arg. contra huiusmodi meriti uniuocationem. Nihil est commune uniuocum ei, quod est simpliciter tale, & ei, quod est secundum quid tale; sed ita se habent meritum de congruo, & de condigno ut sic, quia primum dicitur secundum quid tale, & secundum dicitur simpliciter tale: ergo &c. Resp. dist. mai. quando inferiora dicuntur simpliciter, & secundum quid talia in participanda ipsa ratione communi, conc. mai. quando vero dicuntur talia, solum per comparationem unius ad aliud, neg. mai. In-

proposito meritum de congruo, dicitur meritum secundum quid in comparatione ad meritum de condigno; sicut accidens in comparatione ad substantiam dicitur ens secundum quid, esto participet de ratione communientis.

Arg. 2. Merito respondet primum debitum, sed quod dandum est ex aliqua congruitate, nequit reuera dici meritum, ergo nec meritum de congruo potest esse verum meritum, nam ly de congruo destruit rationem meriti.

Resp. conc. mai. & dist. min. Nequit dici meritum simpliciter, & absolute, quale solum est meritum de condigno conc. min. nequit dici meritum late sumptum, idest pro remuneratione orta ex quadam decentia, & promissione nego min. nam in hoc sensu respondet ei debitum proportionatum: Qua ratione consultò Scot. in 3. d. 18. describens meritum in communi, posuit illam particulam, quasi debitum.

Arg. 3. Qui meretur, acquirit aliquid ius ad id, quod meretur, alioquin nullum est meritum, sed ius non acquiritur nisi per meritum de condigno, ergo &c. Resp. eadem proportionem esse discurrendum de iure correspondente merito, sicut dicebamus de debito, etenim sicut debitum est quasi debitum, ita ius est quasi ius, cum motus attritionis e. g. non habeat condignitatem ad primum, nec habet ius absolute, sed quasi ius ex congruitate, & promissione, ac fidelitate Dei, qui se obligauit acceptare talem actum pro dispositione ad Sacramentum recipiendum.

Quæres 1. Quæ conditiones exiguntur ad rationem meriti de condigno ex parte operantis.

Resp. I. conditio est, quod homo sit in statu gratiæ sanctificantis, quia gratia habitualis est principium meriti de condigno. Cæterum in nostra sententia, de potentia Dei absoluta posset homo in statu puræ naturæ conditus sine gratia habituali ponere verum meritum de condigno, ita Scotus in 1. d. 17. q. 2. ne dum cum sua schola, sed etiam cum schola Nominalium, & sequuntur plures Recentiores. Ratio quia Deus potest de potentia absoluta iustificare hominem sine infusione gratiæ; ergo etiam eadem potentia poterit acceptare ad rationem meriti opera hominis conditi in statu puræ naturæ, ac proinde poterit homo ponere meritum propriè dictum. Conf. patet à pari, eò quia  
non

non alia ratione de facto requiritur gratia in merente, quam ex eò quòd Deus ordinauerit, ut merita procedant à gratia habituali, aliter non acceptaturus ea ad præmium vitæ æternæ, quam ordinationē posset Deus variare, & aliam ponere.

II. conditio est; quod operans seu merens sit in statu vitæ, & hæc patet ex S. Scrip. Eccles. 14. *Anno obitum operare iustitiam*: & cap. 9. *Mortui non habent ultra mercedem*: & cap. 11. *Vbi cecideris lignum, ibi manebis*, & D. Paulus ad Galat. c. 6. *Dum tempus habemus operemur bonum ad omnes*, & ad Corint. c. 6. *Tempus sementis est presens vita*. De potentia tamen absoluta potest Deus aliter disponere, ut dispensatum fuit in Christo, qui, quamvis à primo instanti suæ Conceptionis beatus, attamen usque ad mortem meruit pro nobis.

Quæres. 2. Quæ, & quot conditiones requiruntur ex parte actus meritorij.

Resp. Quòd quatuor conditiones exiguntur. Prima, quod actus debet esse liber non solum libertate à coactione, sed etiam à necessitate, ut definiuit Innoc. in sua constit. contra Iansen. damnans illam propositionem. *Ad meritandum, & demerendum in statu naturalis, non requiritur in homine libertas à necessitate sed sufficit libertas à coactione*; & ratio est, quia esse meritorium, & demeritorium est proprietas quædam actus humani, sed actus purè spontanei, & à sola coactione, non verò à necessitate immunes, non sunt propriè humani; actio enim humana debet procedere à voluntate deliberata, ergo nec meritorij, vel demeritorij. 2. quod opus sit moraliter bonum seu honestum, quia opus malum non est dignum præmio, sed pœna, opus verò indifferens nec pœna, nec præmio est dignum; ergo debet esse opus bonum, moraliter elicited à voluntate gratia informata. Vnde monet Apostolus prima ad Corint. 15. *Abundate in opere bono scientes, quod labor vester non est inanis in Domino*. 3. quod opus meritorium de condigno, sit supernaturale hoc est deriuetur ex aliqua gratia actuali Dei, præter gratiam sanctificantem, ut dictum est in tractatu de gratia actuali. 4. quod huiusmodi opus aliquo modo referatur in Deum, ut à charitate imperatum; ex Scoto in 2. d. 41. q. vn. & tradunt D. Bonau. D. Thom. Alenf. & est communis, & deducitur ex S. Scrip. & signanter ex 1. ad Corint. 10. *Sine manducatis, sine bibitis, sine aliud quid facitis, omnia in gloriam Dei*

*Dei faciat* : sed hæc verba apertè indicant relationem boni operis in Deum : ergo &c. idem docent SS. Patres, quos videre licet in Maftrio, Frassen, Herincx, & in alijs.

Cæterum talis relatio operis meritorij in Deum non est necesse, quod sit semper expressa, & actualis idest per expressum affectum charitatis in Deum, vel per actualem intentionem, sed sufficit virtualis, ut docet Scotus l. c. & alias dictum est.

Quæres 3. Quæ conditiones requirantur ex parte Dei præmiantis. Resp. Quòd ex parte Dei primò exigitur ordinatio operis ad præmium, seu promissio de præmio conferendo, ita Scot. in 1. d. 17. q. 2. & in 3. d. 19. D. Thom. & nominales contra Vasquez, Turrian. Lugo, & quosdam alios opinantes opera salutaria, secundum se considerata, seclufa quævis D. promissione, esse de condigno vitæ æternæ meritoria. Prob. nostra sententia 1. auct. D. Aug. in Psal. 83. sic dicentis ; *Debitorum ipse facit se non accipiendo, sed promittendo*, & Ser. 131. *Promissor Deus debitor factus est bonitate sua, non prerogativa nostra*. Quæ quidem veritas colligitur clarè ex S. Scrip. signanter Matthæi 20. ubi adducitur parabola de conventionè facta cum operarijs ex denario diurno ; & Jacob. 1. *Beatus vir, qui suffert temptationem, quoniam cum probatus fuerit, accipiet coronam vitæ, quam repromisit Deus* ; ergo ex diuina promissione datur nobis corona &c. Verùm Diuina promissio, qua Deus se obligauit ad acceptanda, & præmianda opera meritoria, non est tota ratio meriti de condigno, sed cum ea stat, quod merita à gratia habituali, & actuali, à qua eliciuntur, sumant rationem dignitatis, & valoris ad præmium vitæ æternæ obtinendum, etiam non sufficientem absque promissione. Ita docent communiter Scotistæ cum Scoto in 1. d. 17. q. 2. paucis exceptis, qui conantur interpretare mentem Scoti de sola acceptatione D. quasi sola acceptatio Dei det dignitatem, & valorem bonis operibus ad præmium vitæ æternæ. Quare, ut tollatur omnis ambiguitas in verbis Scoti, obseruandum, quod l. c. promissionem D. seu acceptationem appellat tantum complementum in esse meriti de condigno ; ac proinde acceptatio sola non est tota ratio retributionis ; & clariùs in Report. in 1. d. 17. q. 2. loquitur, ubi docet tam hominem habentem charitatem, seu gratiam habitualem, quàm eius actum

actum ex charitate elicitum esse Deo acceptum ad gloriam, & habere ex vi charitatis valorem, & dignitatem ad primum, quam dignitatem vocat ibi habilitatem; & addit, quod propter ipsam habilitatem non est necesse Deum tribuere vitam æternam, quia videlicet talis acceptatio habitualis, licet inducat dignitatem, & valorem in actu, non tamen debitum, & obligationem ex parte præmiantis, nisi accedat noua promissio de præmiando, quæ est ultima ratio completiua meriti.

Accedit etiam ratio. Etenim vita æternâ reddenda pro meritis de condigno vocatur à S. Scrip. à SS. Concilijs, & PP. merces corona, atque stipendium meritorum, & quidem ex iustitia reddendum iuxta illud ad Timot. 4. *In reliquo reposita est mihi corona iustitiæ, quam reddet mihi illa die iustus Iudex*: sed merces corona, & stipendium supponunt dignitatem aliquam, & valorem in operibus, quam iustitia postulat inter opus, & mercedem, rem, & prærium, ergo reuerà merita habent aliquam dignitatem respectu præmij, ac proinde non est sola acceptatio Diuina.

Quæres 4. Quæ requirantur ad meritum de congruo.

Resp. quod ad meritum de congruo exigitur, quod sit opus liberum, honestum, & quodammodo relatum in Deum, etsi fiat in ordine ad præmium supernaturale (ut communiter fit) debet procedere à gratia. Non tamen sufficit pura mali omissio, aut, ut quidam semipelagiani, opus bonum, quod fieret si superuiueret. Notanter dicitur in ordine ad præmium supernaturale, quia præmio naturali, seu temporali satis proportionatum est opus bonum, solis naturæ viribus factum, bonum quidem etiam ex circumstantijs, quamuis quidam pauci id negent, quibus non fauet exemplum obstetricum Ægypti, ut habetur in Exod. c. 1. quibus Deus ædificauit domos, id est prosperitate temporali, & posteritati illas donauit, eò quod occultassent masculos hebræorum, estò ad hoc fuerint usæ mendacio. Nam resp. cum Aug. q. 1. in Exodo, & lib. contra mendacium c. 15. fuisse præmiatas, non quia meritiæ sunt, sed ut dicit scriptura, quia timuerunt Deum; ideoque conseruabant vitam masculorum hebræorum. Idem dicendum est de Iehu 4. Reg. de Rachab, ut videre est apud Herinex disp. 6. de merito q. 5. n. 78. Hinc patet discrimen inter



meritum de congruo à condigno, nam meritum de congruo non requirit promissionem Dei de danda mercede, nec valorem, seu condignitatem operis procedentem à gratia sanctificante; Quare defectu status gratiæ contritio peccatoris non est meritum de condigno in ordine ad iustificationem; quamvis ex S. Scrip. habeat infallibilitatem; cum Deus promiserit contritis, & attritis acceptare tales actus, velut dispositiones proximas infallibiles ad iustificationem. Vnde, excepta contritione, cætera opera etiam iustorum defectu D. promissionis non merentur id, quod accedente promissione mereri possent; ideoque dicitur meritum congruum, quia de se non habet effectum infallibilem, in operis dignitate fundatum, sed tantum in quadam congruentia pendentem à liberali beneplacito, & beneficio Dei. Nisi dicere velimus, ut supra indicauimus, meritum de congruo strictè sumptum ex liberali Dei promissione habere infallibilitatem, & meritum de congruo latè sumptum carere tali infallibilitate ob carentiam Diuinæ promissionis, & tantò magis meritum de congruo in ordine ad præmium temporale.

Quæries 5. Quæ opera habeant rationem veram meriti de condigno Resp. 1. tam opera consilij, quàm opera præcepta possunt esse meritoria de condigno vitæ æternæ, si habeant conditiones superius recensitas. Ita communis sententia Theologorum, & habetur expressè in S. Scrip. & præsertim Matth. 19. *Qui reliquerit domum, vel fratres, vel sorores &c.* & ratio est, quia præceptum non tollit conditiones meriti de condigno, puta libertatem, & honestatem actus; ergo &c. Tum quia sequeretur, quod de votis factis observatio non esset meritoria de condigno, quia iam inducunt rationem præcepti, quod est falsum.

Resp. 2. Omnes actus quarumcumque virtutum, tam theologalium, quàm moralium, dummodo virtualiter, saltem à charitate sint imperati, possunt esse meritorij de condigno vitæ æternæ, vel alterius præmij supernaturalis, ita colligitur ex Scoto in 4. dist. 40. & sequuntur communiter Scotistæ. Prob. doctrina, quam tradit Trid. sess. 6. c. 16. *Hæc igitur ratione iustificatis hominibus proponenda sunt verba Apostoli: abundate in omni opere bono scientes, quod labor vester non est inanis in Domino; ergo &c.* Accedit etiam

etiam ratio, eò quia, licèt actus virtutum, tam Theologi-  
carum, quàm moralium essent fortasse ex se impropor-  
tati ad merendum de condigno vitam æternam, vel aliud  
præmium supernaturale, attamen tales actus, quatenus im-  
perati à charitatè, ab ea dignificantur, & fiunt condigni  
tanto præmio; ergo &c. Resp. 3. Merita iustorum inclu-  
dentium veram displicentiam peccatorum venialium pos-  
sunt de condigno esse satisfactoria pro iisdem peccatis, &  
promereri remissionem eorundem. Ita probabilior senten-  
tia, quæ est D. Thomæ, & etiam Scoti prout colligi potest  
ex eius doctrina; Ratio, quia huiusmodi merita includen-  
tia displicentiam de peccatis venialibus habent bonitatem,  
non minorem, quàm sit malitia peccatorum venialium; &  
si cut venialia aliquàlter auertunt à Deo, ita merita con-  
uertunt ad Deum; ergo &c. Resp. 4. Quædam etiam meri-  
ta iustorum, qualia sunt opera pœnitentiæ, nempe ieiu-  
nium, oratio, eleemosyna, corporales afflictiones &c. sunt  
de condigno satisfactoria pro pœnis temporalibus, in quas  
à Deo commutatae fuerunt æternæ; ita docet communis  
sententia catholica contra modernos hæreticos, tollentes  
à bonis operibus omnem vim satisfaciendi pro pœnis tem-  
poralibus; & constat ex Trid. sess. 14. c. 9. Tum etiam ex  
perpetua praxi Ecclesiæ applicantis opera pœnalia pro ob-  
tinenda remissione pœnarum temporalium; Tum etiam ex  
sacris litteris.

### QVÆSTIO III.

*Utrum Deus præmium bonis operibus, seu meritis iusto-  
rum reddat ex iustitia.*

**N**Ot. 1. Quòd iustitia in S. Scrip. accipitur tribus mo-  
dis. Primo pro complexione omnium virtutum, sic  
accipitur Matthæi 5. *Beati qui iustitiam faciunt, & faciunt iustitiam;*  
& Psal. 150. *Qui faciunt iustitiam in omni tempore*, quo etiam  
sensu locutus est D. Ansel. dum lib. de verit. c. 12. ait: ius-  
titia est rectitudo voluntatis propter se seruata. 2. accipi-  
tur iustitia pro misericordia, & eleemosyna, quæ ad iusti-  
tiam, & sanctitatem disponit peccatorem, sic Matth. 23.

*tendite, ne iustitiam vestram faciatis coram hominibus*. 3. accipitur pro virtute speciali, cuius est reddere unicuique quod suum est ad æqualitatem. Diuiditur communiter iustitia, hoc tertio modo accepta in commutatiuam, distributiua, & legalem de quibus Deo adiuuante agetur part. 3. tract. 3. de iust. & iure disp. 1. sufficiat hic aliqua notare pro intelligentia quæstionis.

Not. 2. Quod ad rigorosam iustitiam tres conditiones exiguntur. Prima est quod obligatio ex merito operantis opera orta, non fundetur in gratia, & liberali acceptatione remunerantis. 2. ut id, quod darur ex rigorosa iustitia, ita sic ex bonis proprijs ipsius creditoris, ut nullo modo sit ipsius debitoris. 3. est, quod obiectum seu materia iustitiæ commutatiuæ propriè dictæ sit commutatio dati, & accepti secundum æqualitatem, & debitum. Quare sicut inter Patrem, & Filium formaliter, seu quatenus tales nulla intercedit iustitia strictè accepta, seu simpliciter, quia Filius ut Filius est aliquid Patris, ac proinde quidquid Filius debet Patri, debet titulo pietatis, & sicut inter Dominum, & seruum formaliter nulla potest intercedere iustitia simpliciter, quia seruus est aliquid Domini, ut potè animatum eius instrumentum; ita inter Deum, & homines nulla intercedere potest rigorosa iustitia in præmiando merita iustorum, quamuis Theologi doceant Deum aliquo pacto seruare in præmiando modum utriusque iustitiæ, scilicet commutatiuæ, & distributiuæ; distributiua quidem iuxta illud ad Corint. c. 9. *Qui parce seminat, parce, & metet, & qui seminat in benedictionibus, de benedictionibus & metet*. Commutatiua verò iuxta illud ad Roman. 2. *Reddet unicuique secundum opera eius*; & 1. ad Corint. *Vnusquisque mercedem accipiet secundum suum laborem*.

Not. 3. Quod in hac quæst. sunt tres opiniones. Prima est negatiua, & est communis omnibus negantibus iustitiam commutatiuam propriè dictam, & solum admittentibus Deum remunerare merita hominum ex gratitudine, & fidelitate; ex gratitudine quidem, quatenus Deus mouetur propter obsequium factum, retributio namque obsequij pertinet ad gratitudinem, fidelitatis autem, quatenus talis retributio procedit à promissione facta. Vnde ad au-  
cto-

Meritoritates significantes Deum remunerare ex iustitia, respondent intelligendas esse de iustitia latè sumpta, prout coincidit cum fidelitate, & gratitudine quæ sunt inter virtutes potestariuas iustitiæ; Ita Vasquez, Turrianus, Arubal, & alij, & ex nostris, ut refert Mastrius in 3. d. 3. de merito Christi, Hiquæus in 4. d. 46. q. 1. Gallus in 3. disp. 2. sect. 1. Smising t. 1. de Deo uno tract. 3. disp. 475. 3. opinio est Suarez tom. 1. 3. p. disp. Valentia Bellarm. Montesinos, & aliorum asserentium Deum remunerare iustorum merita ex iustitia, non quidem rigorosè accepta, qualis intercedit inter homines, sed quadam iustitia soli Deo competenti, ac proinde excludenti imperfectiones, quas nostra iustitia commutativa præferebat. 3. mediat inter utramque opinionem docens inter Deum, & hominem non posse intercedere iustitiam simpliciter sed tantum secundum quid, & aliquantulum secundum proportionem, sicut inter Dominum, & seruum, Patrem, & Filium, & hæc est germana Scoti sententia, Bassol. & aliorum veterum Scotist. ut bene notat Mastrius concordans aliquos Scotistas, qui videntur inter se discordare, stando quidam pro prima sententia, & quidam pro secunda hac interpretatione, dicens quod ij, qui à Deo iustitiam excludunt in meritorum remuneratione, loquuntur de iustitia rigorosè accepta, ut Hiquæus, & Gallus; qui verò concedunt Deum ex iustitia remunerare loquuntur de iustitia latè sumpta, ut Bellutus, & alij; vnde rectè Auerfa; & Mastrius censent hanc controuersiam esse potius de nomine, quam de re; sit igitur.

I. Concl. Deus remunerat merita viatoris de condigno, non quidem ex solo motiuo fidelitatis, vel gratitudinis, sed etiam aliquo modo ex motiuo iustitiæ. Est Scoti in 4. dist. 46. q. 1. Bassolij, & omnium fere Scotist. & constat ex hæcenus dictis, nam S. Scrip. apertè prædicat, iustitiam Dei remuneratiuam, & idem tradunt SS. PP. Prob. ratione. Ex promissione onerosa sub conditione condigni ad rem promissam oritur obligatio ex iustitia, ut patet de obligatione reddendi denariū operario, facta conuentione de labore diurno; sed Deus promissit nostris meritis de condigno vitam æternam, & alia præmia supernaturalia, ergo ex tali promissione reuerà oritur obligatio ex iustitia remunerandi &c.

II. Concl. Iustitia remuneratiua Dei non est iustitia rigorosè commutariua, sed secundum quid. Est Scoti in 4. d. 40. q. 1. Bassolij, Mastrij, Herincx, & cæterorum Sco-  
tistarum. Prob. 1. auct. SS. PP. & signanter D. Ansel. pro-  
solog. c. 18. aientis, *Iustus es, non quia reddis debitum, sed quia facis, quod decez To summmum bonum.* D. Aug. lib. 1. confes. c. 4. *Reddis debita nulli dabis* & clariùs D. Bernard. serm. 1. de Annunt. *Neque talia, inquit, unt hominum merita ut propter ea vita æterna debeatur ex iure etc.* Prob. ratione. Iustitiæ remun-  
neratiuæ Dei desunt principales conditiones superius re-  
censitæ, quæ ad rigorosam iustitiam commutariuam requi-  
runtur. Deficit 1. quæ, siquidem prima; nam merita hominis fun-  
dantur in gratia Dei auxiliantis, & iustificantis, insuper in liberali, & gratiosa acceptione remunerantis. Deficit 2. eo quia opera nostra sunt ipsius Dei, & multis titulis ei debita. Deficit 3. quæ, ut indicauimus, consistit in commutatione dati, & accepti secundum veram translationem dominiij; Deus enim transfundendo in nos suam gloriam, & donando alia dona supernaturalia non priuatur suo altissimo dominio. Addi etiam potest 4. quæ consistit in hoc, quod tam dans, quàm accipiens sit sui iuris, quæ certè non reperitur in proposito, quia homo accipiens præmium vi-  
ræ æternæ, non est sui iuris, sed sub Dei dominio; ergo defectu talium conditionum iustitia remuneratiua non est iustitia rigorosa, sed solum secundum quid.

III. Concl. Iustitia Dei remuneratiua est iustitia propriè distributiua. Est Scoti 4. d. 46. q. 1. Et est communis. Prob. Ratio iustitiæ distributiuæ est seruare equalitatem propor-  
tionis geometricæ in distribuendo unicuique bona secundum dignitatem, seu merita Personarum, dando v.g. pro meritis ut sex, gloriam ut sex, sed Deus huiusmodi iusti-  
tiam exercet in remunerando de condigno merita iusto-  
rum, qui sunt membra Reipublicæ Cœlestis, seu Ecclesiæ triumphantis, ergo iustitia Dei remuneratiua, est propriè iustitia distributiua; Estò non sit modo rigoroso, quo est iustitia distributiua in Republica humana, cuius membra habent aliquod ius ad bona communis distribuenta; nam homines ex sui natura, nullum ius habent ad gloriam, sed hoc habent à Diuina liberalitate, ut supra expli-

carur. Quare ad dirimendam omnem litem dici potest iustitiam Dei, siue commutatiuam, siue distributiua, conuenire in conceptu analogicè communi ad iustitiam diuinam, & humanam; Ea propter existimo, non esse necessarium afferre argumenta contra nostras conclusiones, cum ex doctrina allata facili negotio possint solui omnes obiectiones; quod si studens ea videre optat, legat Mastrium in hac quæstione, qui more suo latè discurret &c.

#### QVÆSTIO IV.

*Vtrum homo iustus possit mereri sibi, & alteri primam gratiam de condigno.*

**N**ot. 1. Quòd hic non loquimur de gratia actuali, quia ceerum est, illam non cadere sub merito, neque de condigno, neque de congruo, ut definitur in pluribus Concilijs contra semipelagianos, qui, ut censet Smisingus, contendebant eam cadere sub merito de congruo; Imo nec iusti augmentum gratiæ actualis de condigno merentur, nulla enim de hac re existit infallibilitas vel promissio: Vnde fit, quod etiam sanctioribus detur parcius, quàm minus sanctis, immò quam peccatoribus, quos abundantioribus auxilijs quandoque Diuina clementia præuenit.

Not. 2. quod de lege ordinaria nequit purus homo obtinere de condigno pro alijs primam gratiam, siue actualem, siue habitualem, de absoluta tamen potentia non implicat, unum hominem iustum mereri alteri gloriam, & gratiam, tam habitualem quam actualem de condigno, si Deus ordinasset, sicut gratiam habitualem idest augmentum gratiæ de facto sibi meretur, & gratiam actualem similiter sibi mereri posset, si Deus ita disposuisset; nam gratia, & gloria danda alteri, non est dignior, & perfectior ea, quæ daretur sibi ipsi. Constat tamen apud omnes, quod solus Christus Deus, & homo meruit de condigno hominibus, tum auxilia actualia, tum gratiam sanctificantem, & remissionem peccatorum conferendam, Adultis quidem cum præiudicio dispositione, paruulis autem in Baptismate, absque alia præiudicio dispositione. Idque congruè inquit Herincx, quia,



cum meritum iusti sit finitum, & determinatum, adæquatè compensatur gratia; & gloria nobis danda.

Concl. Homo iustus nec sibi, nec alteri mereri potest de condigno gratiam actualem, & habitualem; sed de congruo tantum. Est Scoti in 4. d. 14 q. 2. & passim aliorum contra Thom. Prob. 1. pars auct. Trid. sess. 6. c. 8. vbi docet, *Quod nihil eorum, quæ iustificationem præcedunt, siue fides, siue opera ipsam iustificationis gratiam promeratur.* Prob. 2. pars. Supposita prima gratia vocationis, in hoc enim sensu intelligitur 1. pars concl. ac proinde iustificatione iam inchoata, possumus mereri ulteriora auxilia, sed hæc non possumus mereri de condigno, ergo de congruo. Mai. patet ex D. Aug. qui Epist. 105. ait. *Nec ipsa remissio peccatorum sine aliquo merito est, si fides hanc impetrat,* & Epist. 106. *Si quis dixerit, quod gratiam bene operandi fides mereatur, negare non possumus.*

Cæterum, quod de congruo mereri possit etiam alteri constat ex auctoritate, & praxi Ecclesiæ, quæ, ut ait D. Aug. orat, ut credentes perseueremus. Immo possumus alijs de congruo mereri, etiam primam gratiam vocantem, nam ad hoc non requiritur gratia in altero, sed sufficit, ut præcedat in nobis, qui alteri meremur: Sic conuersio Pauli tribuitur merito S. Stephani orantis; Conuersio S. Aug. lacrymis S. Monicæ: Nunquam tamen meremur de congruo alteri immediate iustificationem, vel reparationem post lapsum, sed mediatè, quatenus obtinemus alteri gratiam efficacem, & credendi, & pœnitendi de peccatis.

## QVÆSTIO. V.

*Vtrum homo possit mereri reparationem post lapsum.*

**N**OT. Quod sensus quæstionis potest intelligi dupliciter, uno modo ut sit sensus: An homo iustus, quamdiu iustus est, per opera meritoria, quæ tunc facit, mereatur apud Deum, ut si contigat peccare mortaliter, reparationem post lapsum. 2. modo potest intelligi: An homo, qui iam peccauit mortaliter mereri possit per bona opera, quæ facit in statu peccati, remissionem peccati. Quæstio hic agitur in primo sensu, non in secundo, cum certum sit,

opera

Opera in peccato mortali facta esse mortua, ut supra &c.

Concl. Nequit homo iustus mereri de condigno sibi reparationem post lapsum, bene tamen de congruo: pars 1. est communis; 2. autem est D. Bonau. in 2. dist. 28. Scoti in 4. dist. 22. contra Thomistas. Prob. pars 1. auctoritate Ezech. cap. 18. *Si auerterit se iustus à iustitia sua, & fecerit iniquitates, omnis iustitia eius, quas fecerat, non recordabor &c.*

Prob. ratione. Si iustus posset mereri reparationem post lapsum, sequeretur, quod qui semel iusti sunt, & bonis operibus dant operam, non possent mori in peccato mortali, sed hoc est falsum, ergo & antecedens. Sequeretur enim, quod peccans per bona opera præcedentia meruisset de condigno, illius peccati remissionem, ac proinde non posset mori in peccato. Prob. 2. pars. Sicut homo manens in peccato habet conuenientiam, & congruitatem ad merendum, ita ex opposito homo manens iustus, per opera facta in statu gratiæ, habet congruitatem apud Deum, ut ipsi largiatur Spiritum pœnitentiæ.

Confirm. hæc ratio auctoritate D. Aug. qui sic discurret super loc. cit. Ezech. *Desiderium quo quis desiderat reparationem post lapsum, dicitur iustum, & simulatio, qua tendit ad iustitiam; non tamen ita quod innitatur iustitia per modum meriti, sed per modum misericordiæ, & congruitatis: ergo &c.*

Arg. contra 1. part. conclusionis ex D. Paulo ad hebræos c. 6. ubi monet sic. *Non enim iniustus est Deus, ut obliuiscatur operis vestri, & dilectionis, quam ostendistis in nomine iohannis, quæ ministrastis sanctis, & ministratis; sed hæc verba Apostoli indicant iustum mereri de condigno remunerationem laborum; ergo &c.* Resp. neg. min. nam Apostoli verba intelligenda sunt de congruo, non de condigno. Vnde Lyramus in Paralip. cap. 19. *Merebaris iram de rigore iustitiæ, sed propter alia opera tua bona peperit tibi ex dulcore suæ misericordiæ.* Vel resp. Apostolum loqui de operibus per peccatum mortificatis.

Arg. contra 2. part. concl. Merita de condigno per peccatum superueniens pœnitentia mortificantur; ergo nequeunt habere, aut retinere meritum de congruo saltem quoad actum primum: patet tam ant. quàm cons. ex auctoritate superius allegata Ezech.

Resp. conc. ant. & neg. conf. Ad auctorit. Ezech. dicendum, quod intelligitur de congruo, non vero de congruo, ut explicat cum alijs Herinex, qui etiam docet congruum esse, ut fidelis Dei seruus in peccatum cadens, in illo ob priora seruitia non relinquatur; nam si homo iam lapsus in peccatum, adeoque de facto inimicus Dei, potest illam emereri, cur id non poterit qui nec dum lapsus est, sed adhuc manet Dei amicus? Hæc planè sententia viderur magis pia, ac proinde magis decere bonitatem Diuinam, ut, non obstante superueniente peccato, Deus recorderetur præcedentium meritorum, quorum intuitu peccatorem excitat, ut à peccato resurgat.

## QVÆSTIO VI.

*Vtrum homo iustus possit mereri sibi donum finalis perseverantiae.*

**N**Ot. Quodd Thomistæ non eodem modo, quo nos explicauimus, declarant meritum de congruo. Dicunt enim quod meritum de congruo dupliciter accipi potest; primo modo largè, & improprie; & sic actibus charitatis contritionis, alijsque bonis operibus iustificationem antecedentibus peccator ad primam gratiam iustificantem disponitur, & eam impetrat à Deo, quæ, cum sint dispositiones, dicunt quandam congruentiam respectu formæ, ad quam disponunt, cum eam connaturaliter exigant; similiter petitio, & impetratio alicuius doni aliquod meritum imperfectum dici potest iuxta illud Aug. Epist. 105. Neque ipsa remissio peccatorum &c. 2. modo accipitur strictè, & proprie prout videlicet importat ius amicabile ad præmium, quod ius amicabile habere nequeunt actus gratiam iustificantem per modum dispositionis antecedentem, cum ius amicabile ex gratia iustificante media charitate proueniat. Quare fatentur hominem iustum promereri non posse de congruo, sumpto merito de congruo in stricta significatione, alteri primam gratiam auxiliantem, vel iustificationem, vel reparationem post lapsum; Vnde quando dicunt Thomistæ, iustum non posse sibi mereri reparationem post lapsum, vel

per-

perseuerantiæ donum, loquuntur de merito congruo strictè sumpto, non autem largè accepto; Ita colligo ex Gonet. in suo Compendio Theologico tom. 4. c. 16 pag. 398. tract. 7. de gratia §. 8. Vnde non rectè Vulpes Thomistarum opinionem de hac re videtur referre, putans à nostra sententia dissentire.

Concl. Homo iustus potest sibi promereri donum perseuerantiæ finalis, non quidem de condigno, sed de congruo. Hæc est communis utrique Scholæ paucis exceptis. Prob. 1. pars. Si iustus posset sibi mereri donum perseuerantiæ de condigno, sequeretur, quod nullus iustus, vel saltem pauci essent, qui illud non obtinerent, cum meritum de condigno infallibiliter consequatur suum præmium, quod repugnat verbis illis Christi. *Multi sunt vocati, pauci vero electi.*

Prob. 2. Id, quod se tenet ex parte principij meriti, non cadit sub merito, sed bonum perseuerantiæ se tenet ex parte principij meriti, quia dependet ex motione gratiæ, non quidem quacunque motione gratiæ, sed ex illa motione gratiæ, quæ est conseruatiua gratiæ; sic enim nequit cadere sub merito, quia est continuatio primæ productionis, & entitatiuè ipsamet prima productio, seu infusio gratiæ, ergo &c.

Prob. 2. pars. Donum perseuerantiæ finalis cadere potest sub merito de congruo, sicut reparatio post lapsum, tam respectu sui, quam alterius, ergo iustus potest promereri de congruo, non solum sibi, sed etiam alteri iusto perseuerantiæ finalis donum. Hinc D. Aug. lib. de bono perseuerantiæ cap. 6. ait. *Donum suppliciter mereri potest, sed cum datum fuerit, amitti contumaciter non potest;* & D. Thomas art. 6. ita docet. *Merito congrui potest aliquis alteri mereri primam gratiam, quia enim homo in gratia constitutus implet Dei voluntatem, congruum est secundum amicitie proportionem, ut Deus impleat hominis voluntatem in saluatione aliorum;* quibus aperte fauet S. Scrip. signanter Iacob. 5. *Orate pro inuicem, ut saluemini; multum enim valet deprecatio iusti assidua.* Hinc tritum est illud Aug. in Sermone de Sancto Stephano. *Si Stephanus non orasset, Ecclesia Paulum non haberet;* ergo &c.

Quæres 1. An homo possit sibi promereri augmentum gratiæ iustificantis. Resp. D. Bon. in 2 d. 29. art. 2. q. 2. *Iustos non promereri gratiæ augmentum de condigno,*  
sed

sed de digno. Docet enim Doctor Seraphicus, quod meritum est triplex. Primum dicitur de congruo in Persona digna per modum dispositionis ad gratiam, ut principium dignificandi: 2. est meritum de digno in Persona digna, sed non habente condignitatem ad talem mercedem glorię: 3. est meritum de condigno in Persona digna habente condignitatem ad talem mercedem gratiæ. Vnde infert, quod habens primam gratiam meretur de digno augmentum eius, quia est in Persona digna habente principium merendi, non autem est meritum de condigno, quia meritum de condigno exigit mercedem iuxta æqualitatem meriti; & quia gratia maior excedit in proportionem secundum æqualitatem gratiam minorem, ideo gratia maior non potest cadere sub merito gratiæ minoris. Verum resp. ex Scoti doctrina, quæ est communis. Iustum de condigno promereri posse augmentum gratiæ; hæc responsio patet ex hæcenus dictis; eò quia si iustus de condigno promereri potest gloriæ augmentum, ergo etiam gratiæ augmentum, cum gloria corresponsdeat gratiæ. Tum quia in iusto concurrunt omnes conditiones necessariæ ad meritum de condigno, ergo promereri potest de condigno augmentum gratiæ.


Quæres 2. An homo iustus promereri possit bona temporalia. Resp. 1. Homo iustus non promeretur bona temporalia secundum se spectata, & absolutè. Ratio quia si iustus mereretur bona temporalia absolutè, & in se spectata, ergo quò magis esset iustus, eò magis abundaret bonis temporalibus, sed sæpè sepiùs videmus iustos penuriam pati; homines impios diuitijs, & temporalibus prosperitatibus abundare; ergo &c.

Resp. 2. Homo iustus promereri potest bona temporalia relatiuè, hoc est, quatenus ordinantur ad vitam æternam consequendam. Patet ex S. Scrip. quæ pluribi promittit bona temporalia obseruantibus Dei præcepta. Vnde in Psalm. 33. *Timentes Deum, non minuentur omni bono*, & alibi: *Non vidi iustum derelictum, nec semen eius &c.* Quæ auctoritates non ita sunt intelligendæ, quasi nunquam accadat iustis absolutè non deesse aliquid de bonis temporalibus, sed non eis deesse, quatenus sunt ordinata ad vitam æternam assequendam, idest eo modo, quo expedit, & eis sufficiat secundum

dum regulas D. providentiae, quam humiliter precamur,  
ut mentis, & intercessione B. Annae Deiparae Matris, quae  
interpretatur gratioſa, seu miſericors, cuius hodie ſolemnia  
agimus nobis omnibus viatoribus, coeleſtes gratias, & mi-  
ſericordias aeternas impetrare dignetur, ut ad vitam aeter-  
nam pervenire valeamus Amen.

*Omnia, quae in hac ſecunda parte, & in omni alio  
meo ſcripto continentur, S. R. Eccleſiae, ac Sum-  
mi Pontificis iudicio, atque correctioni humiliter  
ſubmittō.*

**F I N I S.**





## ERRATA:

accepro  
 affectum  
 res  
 essentialiter  
 in fine  
 obiecti  
 vna  
 cart. 47.  
 infra cart.  
 cart. 60.  
 velatè  
 inuium  
 velle contra  
 elicitio  
 ordinatum  
 ratio  
 sequitur  
 voluntaria  
 receptione  
 intrinsecam  
 prohibere  
 riuent  
 de qualis  
 præceptorum  
 malè  
 compatut  
 adulterum  
 catum

## CORRECTA:

	pag.	5	verf.
accepto		5	37
effectum		8	36
tres		15	8
essentialior		18	19
in fieri		30	20
abiectioni		34	14
vera		64	39
cart. 84.		108	24
supra cart.		108	24
cart. 109.		90	21
relatè		100	22
inuicem		129	15
vel è contra		140	11
elicitio		173	43
inordinatum		190	14
generatio		279	8
pariter		283	38
inuoluntaria		351	31
acceptione		361	27
extrinsecam		409	26
non prohibere		467	20
viuent		493	26
de qua lis		425	39
peccatorum		624	6
malle		660	8
computatur		741	35
adulter non		746	8
reatum		789	15





5-2

